


Diospan Tsain



New Testament in Sharanahua (PE:mcd:Sharanahua)

Diospan Tsain

New Testament in Sharanahua (PE:mcd:Sharanahua)

copyright © 2008 Wycliffe Bible Translators, Inc.

Language: Sharanahua

Translation by: Wycliffe Bible Translators, Inc.

Sharanahua [mcd], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sharanahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
8402923d-fd05-5a85-a7ae-203f04ecb375

Contents

Mateo	1
Marcos	55
Lucas	86
Juan	141
Hechos	178
Romanos	223
1 Corintios	245
2 Corintios	271
Gálatas	286
Efesios	295
Filipenses	304
Colosenses	310
1 Tesalonicenses	316
2 Tesalonicenses	321
1 Timoteo	324
2 Timoteo	331
Tito	336
Filemón	339
Hebreos	341
Santiago	361
1 Pedro	368
2 Pedro	375
1 Juan	380
2 Juan	386
3 Juan	387
Judas	388
Apocalipsis	390

Mateo Jesushuunoa Cununi

Jesucristo ahuun shunifo

Lc 3.23-38

¹ Un mato Jesucristohuunoa tsain shara tapimai. Ahuun shunifoan aton anufo un mato yoiqui tau huai. Ahuun shuni David yafi Abraham.

² Abraham facu Isaac ini.

Isaac facu Jacob ini.

Jacob facu Judá yafi ahuun yorafo ini.

³ Judápan facu Fares yafi Zara ini. Aton ahuari Tamar ini.

Fares facu Esrom ini.

Esrom facu Aram ini.

⁴ Aram facu Aminadab ini.

Aminadab facu Naasón ini.

Naasón facu Salmón ini.

⁵ Salmón facu Booz ini. Ahuun ahuari Rahab ini.

Boozpan facu Obed ini. Ahuun ahuari Rut.

Obed facu Isaí ini.

⁶ Isaí facu David ini. Nan David Israelifoan aton niaifocoin ipaoni.

David facu Salomón ini. Salomón ahuafin Uriaspan ahuin ipaoniquin.

⁷ Salomón facu Roboam ini.

Roboam facu Abías ini.

Abías facu Asa ini.

⁸ Asa facu Josafat ini.

Josafat facu Joram ini.

Joram facu Uzías ini.

⁹ Uzías facu Jotam ini.

Jotam facu Acáz ini.

Acáz facu Ezequías ini.

¹⁰ Ezequías facu Manasés ini.

Manasés facu Amón ini.

Amón facu Josías ini.

¹¹ Josías facu Jeconías yafi ahuun yorafo ini.

Nantianri Babilonia anoa niaifoan ahuun ranushumuafu nichini Israelifo rutushon atirifi ahuun mai ano ihuushonafoanno ahuun oinmatifo huanon.

¹² Chipofin Babilonia anoashu futsafori cainni.

Jeconías facu Salatiel ini.

Salatiel facu Zorobabel ini.

¹³ Zorobabel facu Abiud ini.

Abiud facu Eliaquim ini.

Eliaquim facu Azor ini.

¹⁴ Azor facu Sadoc ini.

Sadoc facu Aquim ini.

Aquim facu Eliud ini.

¹⁵ Eliud facu Eleazar ini.

Eleazar facu Matán ini.

Matán facu Jacob ini.

¹⁶ Jacob facu José ini.

José ahuin María nan Jesús ahuia ini. Jesús Upa Diosin catonni nocon Numamisi inon. Nan non Cristoran huamisi.

¹⁷ Abraham ahuun funafo catorce ahuun unutani David ini. David ahuun funafori catorce ahuun unutani Babilonia anoshon ato achinifo ato mai ano inonfo. Nanfoan ahuun funafori catorce ahuun unutani Cristo cainni.

Jesús cainni

Lc 2.1-7

¹⁸ Jesucristo cainfin iscaniquin. José María yoini, –Non fiananon, –ishon. Ascafia fiananfoatima María man facu nanua ini. José ayamafian Diosin Yoshin Sharapan nanu-mana.

¹⁹ Ascashon José Dios tanasharacoinshon ahuun chain ahuin rafini huacasmaquin yorafoan ointaifi yoicasmani.

²⁰ Nanscara ahuun nomuranshon shinanfiaino ahuun namapan Diosin ahuun oinmatinin afu nai muran imisi aqui oshon yoiquin isca huani, —José minfin David funaquin. Ascacun shinanchacaquima María fihuu. Nan facu nanuafin Diosin Yoshin Sharapan nanumanaquin.

²¹ Ascan nan caianofin anuqui Jesusran min huashquicain. Nantonmain ahuun yorafo chaca soashofain ato numashquiamaiton, —ishon yoini.

²² Diosinhuunshon inon pacoai yoimisifoan cununifo cuscan man aaquin.

²³ Nanfoan cunuquin isca huani,

“Nicapon. Ainfo funuoma tsoa afu iyamafiamisi facu nanushquin. Caianno furonanfacu iishquin. Ahuun anufin Emanuel (Onicoinnin tsainman Diosin nofu icaran) ishquiquin,”

ishon Dioshuunshon inon pacoai yoimisi cununi.

²⁴ Ascaino José moinacahuatan nan Diosin oinmatinin afu nai muran imisi yoia cuscan María fiini.

²⁵ Fiiifashocai ipaonima furun caiyain chain. Ascashu furun caincun José anuqui Jesusran huani.

2

Nocofunu tapicoianfo fari oaiquirinoashu Jesús oinpai funifo

¹ Ascano Herodes niaifoaitian Jesús Belén anoashu cainni. Nan Belén Judea muran ini. Nantianri fishifohuunooa tapicoianfo fari oaiquirinoashu fucani Jerusalén ano noconifo.

² Ascano nococashon ato yocanifo, —Raniashumun a facu caianquin Judiofoan aton niaifo ishquiai. Non fishi oianhuunshon non tapia facu caincun. Man nonfin ahuun fishi fari oai aria oianquin. Ascacufin non aqui unimai oaquin. Min nocon niaiforan ishon oinpai non oaran, —ishon ato yocanifo.

³ Ascaifoon nicai Herodes ahuun ointi fucashricatani. Jerusalén anoa yoraforifi Herodes icai cuscan arifi muunifo.

⁴ Ascacun ahuun yorafohuunshon Diosin cufimisifoan niaifofo yafi Moisés cununi cuscan tapimamisifo Herodes ato yoimaquin isca huani, —Uqui fucahuun, —ishon ato yoimanano aqui fuaifoan ato yocaquin —¿Raniashumun Cristo cainshquiquin? —ishon Herodes ato yocani.

⁵ Ascaiton cumacaquin, —Belén Judea murannoashu cainshquin, —nannori Diosinhuunshon inon pacoai yoimisifoan cunuquin isca huani.

⁶ “Belén anoafoan ua nicasharacahuun. Maton mai Judea muran. Maton pushu ichapayamafiano nannoashu niaifo uhuapacoin cainshquin. Uhuun yora Israelifoan aton cushumisi iishquiran,” icashu cununi.

⁷ Ascacun Herodes a fishifohuunooa tapicoianfo tsoa yoitama tsain ato fomaquin isca huani, —Fucahuun. Un matofu tsainon, —ishon ato yoimani. Ascano nocotoshiaifoan ato yocaquin, —¿Ahuutianmun man fishi oinquin tau huaquin? —ishon ato yocaiton. Tapimanifo ahuutianmain oinquin tau huafoquin.

⁸ Ascashon aton yoini, —Belén ano focashon facu funatacahuun. Fuchicashon nasofuratan ua yoi fuushcaquin. Urifi un ahuun noicanon, —ishon Herodes ato yoini.

⁹⁻¹⁰ Ascano niaifoan ato yonoo cuscan nicatan fishifohuunooa tapicoianfo fonifo. Focaquin oianfo fishi fari oaiquirinoashu oaiton oincani unimacoinnifo. Ascatan muufocaquin oianfo facu raca manan nituni.

¹¹ Ascaiton oincani pushu muran iquifainshon facu yafi ahua María fuchinifo. Ascashon ratoconun mai chachishon facu yoinifo isca huaquin, —Minfin fasi sharashtacoquin. Min nocon Ifo, —ishon yoinifo. Ascacatan aton mao fupucashon ahuaara chicoin inancoinnifo. Oro inanfain ahuun ininti shara inanfain ininti sharacapa futsa ahuun anu mirra nanri inannifo.

¹² Ascashu nanno oshayofoan aton namapan Diosin ato yoiquin isca huani, —Afanan Herodes ari foyamacahuun. Fai futsan mato mai ari fotacahuun, —ishon Diosin ato yoini. Ascacuai Jerusalén ano fonifoma.

José futan María furun Belén anoshon Egipto ano ichoquinifo

¹³ Man fishihuunooa tapicoianfo atomaquinoashu foafono Diospan oinmatinin afu nai muran imisi José ahuun namapan yoiquin isca huani, —Funinaca huahuun. Nan facu yafi ahua Egipto ano iyoriscatahuun. Ascashu nanri iyohuu nan un mia afanan yoiaitian. Nan Herodes facu funaiqui rutushquin, —ishon Diospan oinmatinin José yoini.

¹⁴ Asca huaino moínacahuatan facu ahua futan yamu Egipto ano ichoquinifo.

¹⁵ Ascashu nanno iyopaonifo nan Herodes naitian. Ascacun Diosihuunshon inonpacoai yoimisitón cunushoni isca huaquin,

“Unfin uhuun facu Egipto ano a fanan yoimanicain,”
ishon yoini cuscacoin man aaquin.

Herodes ahuun ranushumuafó yononi facumishtifo rutunonfo

¹⁶ Ascano fishihuunoa tapicoianfo fai futsan foafo nicai, —Ua paraforan, —icashu Herodes fasi sinacoinni. Nan fishifohuunoa tapicoianfoan yoiafo man fari rafu caano fishi oinquin tau huafo. Ascacun Herodes ranushumuafó yononi, —Belén anoafó yafi a chaíma icafoan aton furonafacufo fari rafu yafó non yomumishti rutuqui cuyotacahuun, —ishon ato yononi.

¹⁷⁻¹⁸ Ascano

“Ato nicafo Ramá anoashu uaicani aton facuhuunoaashu uaiyanan shoraras-caífoan nicacaquin. Aton ointi main huamapaicaquin, ‘Uaiyamacahuun,’ ato huafaiinfono aton facu manocani unupainfomaran,”
ishon Jeremías Diosihuunshon inonpacoai yoishomisitón cununi cuscacoin man aaquí.

¹⁹ Ascashu man Herodes naano Diosin oinmatinín afu nai muran icatón José ahuun namapan yoiquí isca huani,

²⁰ —Moinacahuahuu. Facu yafi ahua afanan Israelifo muran ato nasoquishquin. A facu rutupaimisifo man naafoquin, —huani.

²¹ Ascaino moínacahuatan José ahua yafi furun Israeli mai ano afanan ato iyoni.

²² Caaquin nica Herodes man naano ahuun facu Arquelao Judea murannoa niaífo nicai José musuni. Ascaitón Diosin oinmati afu nai muran imisitón afanan ahuun namapan yoini, —Judea muran caquima futsanori catahuun, —huani. Ascano Judea muran catama Galilea anori fonifo.

²³ Ascashu Nazaret pushurasi muran fonifo. Diosihuunshon inon pacoai yoimisitón nannori cunuquin isca huani,

“Cristofín Nazarenón ishquin,”
ishon cununi.

3

Nan ato unu muran iquimamisi Juan tsoa istaipama ano ipaoni

Mr 1.1-8; Lc 3.1-9, 15-17; Jn 1.19-28

¹ Ascatan man fari ichapa finoanno nan Juan yorafo unu muran iquimamisi tsoa istaipama Judea ano caní.

² Ascano nannoshon ato yoiquín isca huani, —Nantifi yorafoan ua nicacahuun. Matón chaca shatucoincashon Diosin tsain nicacoincahuun. Samamashta Diosin mato yonoshqui oiquin, —ishon Juanpan oi ashcafinín ato yoini.

³ Nan Isaías Diosihuunshon inon pacoai cuscan yoimisi ipaoni. Nanton Juanhuunoa yoini isca huaquin,

“Tsoan istaipamashon Diosin yonoa cuscan oi ashcafinín yoiquín isca huanon-pacoin, ‘Nocon Ifo nocoqui ooshquin. Ascacun itisharacahuun. Matón chaca shatucoincahuun,’”
ishon Isaías Juanhuunoa cununi.

⁴ Ascano camello inapan ahuun rani sahuuti huashon Juanpan sahuua ini. Ascashon yoina fichin aquí nanushumuni. Ascatan ocutsuru pifain afuchi fona ayani.

⁵ Ascano Jerusalén anoafó yafi unu Jordán ano icafo non Judea muran icafori ahuun tsain nicapaicani aquí funifo.

⁶ Ascashon aton chaca shatupaicaquin yoiaífoan Juanpan unu Jordán muran ato iquimacuni afanan ipaoni cuscan huatama ismanonfo.

⁷ Ascaino Fariseofo yafi Saduceofo Juanqui funifo yorafo ato unu muran iquimanaitón oin fucani. Nanfori Israelifo ini. Ascaitón oinquín Juanpan ato yoini isca huaquin, —Manfin rono paupaton facu cuscaracoinfoquin. Icoinra huayamaífoan Diosin atoqui sinaquin ato omitsiscapanonfo. Ascán manfin omitsiscapanacafo muran focasmaífaqui matón chaca man shatupaima.

⁸ Ascacun chaca shatucoincashon Diosin mato yoia cuscan nicacoincahuun. Man ipaoni cuscari afanan ayamacahuun. Man ascaitón yorafoan ointirofo man afanan chaca huapaitama Dios fusti man tanasharaitón.

⁹ Ascashon matón nomuran shinanquin isca huayamacahuun, “Nonfin Abraham funafo non ahuun caíforíquin. Diosin Abraham yoíyotiani cuscan nocorifi ashotiro. Ascán Diosin

noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin.

¹⁰ Fana fimi sharayamaiton ifoan ahuun tapo nantifi ruratinin shatuquin cuyoshon chi muran potatiro coi futsunon. Nanscarifiai natianri Diosin man itishara chaca shatutama man isharayamacaiyaiton mato omitsiscamapacushquin.

¹¹ Ascacun un mato unu muran iquimapacua maton chaca shatucoinshon natian Diosin tanasharashon man ismanon. Ascafia futsa matoqui chipo oi. Naantofin ua fasi finoncoianquin. Ahuamamishiti huatiro. Nantorifi ahuun Yoshin Shara mato ya rafumapacunaca. Ascano ahuunshon maton nomuran man shinansharanon. Matofu rafuano nantifi ahuara chacafo ahuunshon shatuashu a cuscara shara man inon. Ascan uncai a cuscarama. Un ahuara shara huahuu rafanancai un ahuun oinmatima. Ascatama uhuun ramapayamainoricai un ahuun oinmati icuanama.

¹² Ascano naantorifi chipo a icoinra huafosi yafi a nicacasmaifo ato pashcanan huaashquin. Nan icoinra huafosi a icari ato ihuicoinsquin afu isharapacushanonfo. Ascan nan nicacasmamisifo chi urumanhuan muran ato potai anoashu omitsiscai unupacunacafomaran, —ishon Juanpan nan Fariseofo yafi Saduceofo yoini.

Jesús unu muran iquimani

Mr 1.9-11; Lc 3.21-22

¹³ Ascaino Jesús Galilea anoashu unu Jordán ano cani. Nan Juanpan ato unu muran iquimana nanno cani naanrifi iquimanan.

¹⁴ Ascashu aquí nocoaiton Juanpan Jesús yoini, —Uacaiarocon mian acafin shara icuanquin, —huaiton.

¹⁵ Jesús cumani, —Upa Diosin noco yonoo cuscan fusti nantifi non aca shara itiro. Ascan natian ua iquimahuu, —huaiton. —Ascan mín ua yoiai cuscan un mia unu muran iquimairan, —ishon Juanpan yoini.

¹⁶ Asca huatan Jesús unu muran iquimana cainna cahuan mapuinifoanni. Ascata-paiyaino Dios ica ariashu nai fupuini. Nai fupuicaino Diospan Yoshin Shara ruhui cuscara Jesusqui fotopacu cahuan.

¹⁷ Ascano nanno niafoan nai murannoa Upa Diosin ahuun oi nicanifo yoiquin isca huaiton, —Nan uhuun Facu un catoan. Un fasi ahuun noi. Un fasi aquí unimacoinran, —ishon Apa Diosin yoini.

4

Yoshin chacanun Jesús chaca huamapaini

Mr 1.12-13; Lc 4.1-13

¹ Ascano Jesús Diosin Yoshin Sharapan tsoa istaipama ano iyoni. Nannoshon nan yoshin chaca Satanás cuarenta oshatan chaca huamapaifainni.

² Nan cuarenta oshatan piqui tununi. Ascashu fasi fonaincoinni.

³ Ascaino nan yora chaca huamapaimisi aquí nocoshon yoini isca huaquin, —Min Diospan facumainquin na toquirifo misi onihuhuu, —ishon Satanás yoiaiton.

⁴ Jesús cumani, —Noncai misi fustihuunoashu ipatiroma. Diosin tsain fusti non yopacoini. Nan noco yoia cuscan fustihuunoashu non isharatiroquin, —huaiton.

⁵ Nicaquin Satanás Jesús Jerusalén pushurasi shara Diosin ahuun yorafofu imisi ano iyoni. Nan Israelifoan aton Diosfu tsainti pushu pumancaya cuyacoin iyoshon yoiquin,

⁶ —Minmain Diospan facuquin nurishu pacucaintahuun. Diosin tsain mihuunoo cununi isca huaquin,

“Diosifin ahuun oinmatifo afu nai muran icafo yonoiquin min pacuaiton mia cushunonfo. Min tauri toquirifoquin rutunonma mia achinonfo,”

nannorifi Diosin tsain mihuunoo cununiquin, —ishon Satanás yoiaiton.

⁷ Afanan Jesús cumani, —Ascafia Diospan tsain cununiri isca huaquin, Ahuara musunicoin huaquin shinanyamacahuun uatsi Diosin cushuiquin ishon. Ascacun asca huayamahuu ishon cununiran, —Jesús huani.

⁸ Ascaiton afanan Satanás Jesús machi cuyamamaquin iyoshon nan manifoti sharashtacoin oinmani.

⁹ Ascashon yoini, —Oinpon Mian ratoconun mai chachishon ua yoiquin, “Minfin uhuun Ifoquin,” mian huaitofin nan na maitio un mia inantiroquin, —ishon yoiaiton.

¹⁰ Afanan Jesús cumaqui, —Diospan tsain cununiri “Nan nocon Ifo Diosin fustifin non ratoconun mai chachishotiroquin. Nan fustimain nocon Ifocun,” ishon cununi. Ascan umaquinoashu cariscatahuun Satanás, —ishon Jesús yoini.

¹¹ Asca huaino Satanás Jesusmaquinoashu caino Diosin ahuun oinmatifo afu nai muran icafo aquí fotonifo pimashcaquin.

*Jesús Galilea anoshon ato tapimaquin tau huani**Mr 1.14-15; Lc 4.14-15*

¹² Ascashu nan Juan ranushumuafoan cunu muran iquimanafo nicatan Jesús Galilea ano nasoni.

¹³ Nan Nazaret anoashu pushconi. Nannoashu Capernaum ano cani atofu iyoicai. Nan Galilea ian cusumunri Capernaum ini. Nannori mani rafutan ato mai Zabulonfo yafi Neftalifo icafo.

¹⁴⁻¹⁶ Jesús nanno inon pacoai cuscan nan Isaías inon pacoai yoimisiton ahuunoo cunuquin isca huani,

“Zabulonfo yafi Neftalifo Galilea ian ano icafo. Nanno aton mai. Unu Jordán ocuma futsa. Nannori Dios icoinra huamafo atofu icafo. Ascashu nanfo faquish muran ica shinantsafo. Ascafia samamashta oianfo shafariscatani cafiscashqui. Nanscarifiai numamisimai omitsiscapanacafo muran focuanafo. Ascacun Cristo atoqui nocorisca ato numashquiran,”

icashu atohuunoo cununi.

¹⁷ Nannoshon Jesús ato yosiquin tau huaquin isca huani, —Nocon Ifo Diosin matoqui samamashta nocoyoi. Ascacun maton chaca shatucahuun. Chaca huatamarocon Diosin tsain nicacoincahuun, —ishon Jesús ato yoini.

*Jesús rafu non rafuri nushumisifo ato cunani afu fononfo**Mr 1.16-20; Lc 5.1-11*

¹⁸ Ascano ato yoitan Jesús ianmanhuan cusumun cani. Caquin Simón chipocu Andrés futan nushutinin nushuaiffoan ato ointoshini. Nan Simón ahuun anu futsa Pedro. Nan rafutafin nushumisicoi inifoquin.

¹⁹ Ascaiton ato yoiquin, —Ufu fucahuun. Manfin nushumisicoi quin. Man shiman ichaparasi nushutinin fia cuscan natian man uqui yora ichapa ihuushqui un aton Ifo inon, —ishon Jesús ato yoini.

²⁰ Ascaino nushuti huafaicani afu fonifo.

²¹ Ascashu chaimashta catan Zebedeo facu rafuri fuchini. Nan rafuri nanu rafu Santiago yafi Juan. Nan rafutan apa futan shasho naquishon nushuti icushaiffoan atori yoini, —Ufu fucahuun, —ato huaino.

²² Samamashta apa shasho naqui nichifainifocani afu fonifo.

*Jesús yorahunrasi ato yosini**Lc 6.17-19*

²³ Ascatan afu foafoanno nantishon Galilea ano cahuancacaiquin. Judiofoan ichananti pushu muranshon Jesús ato Apa Diosin tsain shara yoiquin isca huafoanfaini, —Itisharacahuun. Upa Diosin mato iquishquin oiran, —ishon ato yoifoanfaini. Ascashon pau futsa futsatapafoan icaiffoan ato caya huamani.

²⁴ Ascaiton Siria mai anoafoanri ahuunoo nicacashon isinincaifo aqui ihuunifo ato cayahuamapacunon. Ascashon isipaunun icaiton caya huamafain yoshin chaca atom-aquinoa potafain nisofori caya huamafain yoratisho charishi futsuari caya huamapaoni. Nantifi ato caya huamapacuni.

²⁵ Ascaiton yorafoan mufainifo. Atirifi Galilea anoashu fuaino atirifi Decápolis anoashu fuaino atirifi Jerusalén anoashu fuaino atirifi Judea anoashu fuaino atirifiri unu Jordán oquirinoashu fucatan Jesús mufainifo.

5*Jesús machi anoshon ato yosini**Lc 6.20-23*

¹⁻² Yorahunrasi aqui fuaiffoan oin Jesús mapufaintan machi pochinin tsaoni. Nanno tsaonoo ahuunshon tapiafo a shinain caiton noco yosiquin isca huani.

³ —Tsoa futsan aton nomuran shinanquin isca huai, “Uficai un ishara tiroma. Un Dios yopacoinran,” icaiton

Diosin ato unimamashquin. Ascashu uhuun Upa Diosin niaifo ano afu ipatirofoquin.

⁴ Ascan tsoara futsa uaiquin omitsiscafishu chipo unimatiro.

Diosin atohuun ramapaiquin aton ointi main huamatiro.

⁵ Capapaimisi itamarocon futsa ahua huamisima. Mato ahuun nomuran shinanquin isca huai, “Ufi apaiyai cuscan atama Diosin ua amapaiyai cuscan fusti un atiroran,” ishon shinanfainaiton Diosin ato unimatiro.

Nan cuscarofo Diosin yoyotiani cuscan ato inanshquin. Diosin icano arifi afu inonfo. Ascashu nantifi ahuunari atonari iishquin.

⁶ Ascan nan ratoranfo Diosifu ipaiquin ahuun tsain tapipaiquin finaifo a cuscara shara iishcaquin.

Nan cuscarafaoan fuchipaiyaifo cuscan Dios ato imatiro a cuscara shara inonfo.

⁷ Ascan nan futsafohuun ramapaiquin ato shara huaiton Diosin man tapia.

Ascacun nanrifi ahuun ramapaiqui a shara huashopacunaca arifi unimanon.

⁸ Ascan nan Dios fusti tanasharashu ahuun nomuran shinansharamisi.

Nan cuscarafaoan chipo Dios ointirofo. Ascaiton Diosin ato ointi unimamashquin.

⁹ Ascan tsoan nan noicasmatanainfoan ato raunan huaino afanan rau huantanano.

Nan cuscarafao Diosin yoiquin, isca huaqui, “Min uhuun facuran,” ishon ato yoiaino fasi unimacoinshcani.

¹⁰ Tsoa Diosin yonoo cuscan aiton futsafaoan omitsisca huafainfoan tunua.

Nan cuscarafao Diosin ato unimamashquin. Ascashon nan Diosin niaifo icariafo nanfori atona iishquin.

¹¹⁻¹² Ascan futsafaoan uhuunshon mato roaquin omitsiscamafain matohuunoo chani futsa futsatapafo yoifiafoanoo shinanchacayamacahuun. Mato omitsisca huaifo cuscan mato shunifori nan Diosin tsain yoimisifo omitsisca huapaonifo. Ascan man uhuunoashu omitsiscafiahu Upa Diosiqui man nocoaitian fasi sharacoin mato imashquin man afu ipashanon. Ascacun unimacahuun.

Jesús icoinra huafo sao yafi shafa cuscara

Mr 9.50; Lc 14.34-35

¹³ Ascan manfin nan nuno mai anoa sao cuscaroquin. Nami saomua shara payocotiroma. Nanscarifiai yora chacafo muran ishon marifi man ato shinanmasharatiro chaca huanonfoma. Ascan nami saomuamacai shara itiroma. Paismacoin itiro. Ascafia afanan nami shara iyamainorica saori shara itiroma. Afanancai ahuashta itiroma. Nanscara non potatiro puamanonfo. Nanscarifiai afanan man ua tanasharayamainocai matohuunshon tsoan ato chaca shatutiroma isharashquin. Man ua tanasharayamashu man funocointiro.

¹⁴ Ascafia manfin nan manifoti ato chasha cuscaroquin. Machi cuya mamaquinoa pushurasi fasi chaicushon shafacafi ointirofo. Onucai atiroma. Nanscarifi aquin man ua tanasharaino mato oinquin matohuunshon ua icoinra huatirofo shafacafi iishcaquin.

¹⁵ Nanscarifi aquin tsoancai faquishiano oinpaifiaquin lamparina tapa camaqui otashon cutipan fupomisima. Ascatarocon otashon tapa camaqui huatiro shafacafi tsaocun pushu muran iquicaquin oinsharanonfo.

¹⁶ Ascacun nantifi yorafo shara huacoincahuun. Man ato shara huai cuscan oinquin shinantirofo isca huaquin, “Diospan yorafoan fasi noco shara huafafaincani. Apa Diosin ato yoisharamisi. Asca aton Upa Dios fasi sharacoinran,” ishon shinantirofo. Anori shinancaquin maton Upa Dios nai muran ica yoitirofo isca huaquin, “¡Aicho! Upa Diosin tsoa futsacai mia cuscara sharama. Min nantifi finoncoianran,” ishon yoishquicani. Afanan yoitirofo isca huaquin, “Dioshuunshon noco shara huashomisifo. Ascan aton Dios sharacoinran,” ishon yoishquicani.

¹⁷ Isca huaquin man shinan raca, “Moisés Diosin yononi cuscan cunushoni yafi Diosin tsain yoimisi futsafaoan cununi cuscari nanfo Jesús noco nicamapaima. Nanfo noco potamapairan,” ishon raca man shinan. Anori shinanyamacahuun. Uncai Moisés yafi Diosin tsain yoimisi futsafaoan cununi cuscan potapaiquimarocun man cununifo cuscan un huamashquin un oa.

¹⁸ Un mato shafacafi yoi. Diospan tsain cunushoni cuscan nannorifi Diosin yonoi. Ato yonoquin cunushopaoni cuscan nan fustishtacai funopacunacama. Nai yafi maitio cuyoyamainon nanscasi apanaca ahuun tsainri inonpacoai cununshoni nantifi fustishtacai cuyopacunacama aqui tau huani cuscan.

¹⁹ Ascan tsoa Diosin yononi cuscan fustishta potashu non futsafori potamashu Dios icano aacai ahuama itiro. Ascafiaquin tsoan Diosin tsain nicasharafafainquin futsafori Diosin tsain shafacafi yosicun nan Upa Diosin icano niaifo patashari itirofoquin.

²⁰ Ascano nan Fariseofo non Judiofo aton niaifofo futsafaoanri, “Nonfin fasi shara imisiran,” ifianmisishacaiquin Diosin yononi cuscan tanacoianfoma. Diosin yononi cuscan huacoinmisifoma. Mancai ato finoanshuma Diosin yononi cuscan man huashuma Upa Diosin icano man nocopacunacama.

—Sinayamacahuun, —ishon Jesús ato yosini

Lc 12.57-59

²¹ Moisés nocon shunifo yononi cuscan man nicamisi isca huaquin, “Tsoa rutuyamacahuun. Man futsa rutucun niaifofo ano mato iyotiro matori copiquiri namatirofo,” ishon Moisés nocon shunifo yononi.

²² Cayacafi anori yonofianicun un mato tsain futsa cayacafiri yoinon. Oinfain. Tsoa futsaqui sinaiton a niaifo ari iyotiro a onaintimanon. Ascan tsoan futsaqui tsain chaca huaiton isca huaquin, “Mincai ahuama. Min ahua tapiamaran,” ishon yoiaiton niaifofa ari iyotiro a onaintimanonfo. Ascafia tsoan futsa chaca huai isca huaquin, “Minfin mapo chacaquin. Min nisoncoinran,” huaiton Diosin a omitsiscapanacafo muran nan chi muran potatiro anoashu capashonma.

²³⁻²⁴ Ascacufin man Dios cufiaitian nantianri man shinanquin isca huaquin, “¡Ohua! Un futsa chaca huaran,” ishon shinancun. Afanan Dios cufitamarocon iquisi nan futsa min chaca huua ano catahuun. Aqui nocoshon yoisharahuu mia rauhuanon. Asca huano afanan min nasotiro Upa Dios cufishquin.

²⁵ Man futsa nifishon matogui nocoaiton isca huaquin, “Min ua nifian cuscacai mian inanma. Natian un mia niaifo ano iyoiran,” ishon mia yoicun. Afu caquin niaifo ano nocoaitama rufofo aroshararisca huahuun. Asca huaiyamaiton mato niaifo ano iyotiro. Nocoshon niaifoan ranushumua yoitiro, “Na nocofunun futsa nifian cuscan inanma. Ascan cunu muran iquimatahuun,” huatiro.

²⁶ Un mato icon yoicoin. Mato iquimanano man cainritiroma nifian cuscan atifi inanshuma. Nanscarifi aqui man Dios chaca huamisiqin. Oataima arorisca huahuu mato omitsiscahuapanonma.

—*Maton ahuinma oincaquin chotapaiyamacahuun, —Jesús ato huani*

²⁷ Moisés nocon shunifo yononi cuscan man nicamisi isca huaquin, “Maton ahuinma chotayamacahuun. Ainfofoan maton funuma chotamayamacahuun,” ishon yononi.

²⁸ Aafin iconquin. Ascarifi un mato yoirifi huai. Tsoa ainfo ahuun ahuinma oinquin ahuun nomuran shinain, “Un nan ainfo chotapainonran,” ishon nannori shinanquin a chotacoin shinantsai.

²⁹ Ascan man oinquin man chaca huapaiquin maton furon ocuma futsa shara tsucashon potahuu afanan chacanonma. Man mumafiacun omitsiscapanacafo muran mia potacun nancai sharamafinquin. Ascaquimarocon man mumamafishu Dios icari nocoshon nanno afu ipashanon nan sharacoin.

³⁰ Nanscarifiai min mumiorishon min mucuman min ahuara min chaca huaiton, min mushtua shara icuana. Man mumafishu omitsiscapanacafo muran mia potacun nancai sharamafinquin. Ascaquimarocon man mumamafishu Dios icari nocoshon nanno afu ipashanon nan sharacoin.

Nocofunu yafi ainfo ununantirofohuunoa Jesús ato yosini

Mt 19.9; Mr 10.11-12; Lc 16.18

³¹ Nocon shuni Moisés nocon shunifo yonoqui isca huani, “Tsoan ahuun ahuin unushquin iquisi cunushotiro isca huaquin, ‘Un afanan mia fipaima. Un natian mia unuiran,’ ishon cunushotiro.”

³² Nannori Moisés yonofianicun un mato tsain futsa yoinon. Ratoran futsan ahuun ahuin nocofunun futsa fu iyamafiaiton unuquin chaca huaino. Nan ainfoan nocofunun futsa fu fiananquin fasi chaca huai. Asca huaquin nan funu fu iqui shinantsai. Funumain afi unucun. Ascafia nan funun ahuin unua nan ainfo nocofunun fiiquin aarifi chaca huai. Asca huaquin nan ahuun ahuinma fu iqui shinantsa huai.

—*Man yoitiani cuscan acahuun, —ishon Jesús ato yoini*

³³ Nocon shuni Moisés afanan tsain futsa nocon shunifo yoini. Nanri man nicamisi isca huaquin, “Man Diosin yoitiani cuscan acahuun. Man Diosin yoitiani cuscan ayamashu nancai sharamafinquin,” ishon Moisés nocon shunifo yoini.

³⁴ Mato anori yoini. Un afanan mato yosinon nicacahuun. Yora futsafona yopaquin ato yoiquin, “Un mia yoia cuscan un acunma Upa Diosin ua onaintimatiroran,” ishon afanan anori yoiyamacahuun. “Un mia yoia cuscan un acunma nantifi nai muranshon ua nicatiro Upa Diosin ua onaintimatiroran,” ishon afanan anori yoiyamacahuun. Diosin nai muran ica. Ascan anori yoiyamacahuun.

³⁵ “Un mia yoia cuscan un acunma nuno mai anoa ua onaintimatiroran,” ishon afanan anori yoiyamacahuun. Nantishon mai Upa Diosinna. Ascan anori yoiyamafain, “Un mia acunma nocon pushurasi Jerusalén ano ua copitiroran,” ishon afanan anori yoiyamacahuun. Nan pushurasi Jerusalén nocon niaifocoin Diosina.

³⁶ “Uhuun mapon un shinain cuscan un mia acunma ua onaintimatiroran,” ishon yoiyamacahuun. Maton shinanhuunshon maton fo fiso iyamarai osho imatiroma.

³⁷ Ascan maton yora ahuara yoipai ato yoihuu isca huaquin, “Un mia yoia cuscan iconcoin,” iyamarai “Nan iconmaran,” ishon ato yoicahuun. “Un mia acunma ahuara ua

onaintimatiroan,” ishon anori yoyiamacahuun. Na yoshin chaca Satanasfin chanimisi-coinquin. Ahuunshon yora anori yoitiro.

*Tsoamain futsa copitiro Jesús ato tapimani
Lc 6.29-30*

³⁸ Ascan nocon shuni Moisés afanan tsain futsa nocon shunifo yononi cuscari man man nicamisi yoiquin isca huanicun, “Futsa mia asca huaiton niaifo ano min iyotiro mia copishonon. Min furo ocuma futsa mia tsucacun copiquiri niaifoan ahuun furo tsucamatiro. Ascan mia sutuquin min shuta fusti tucucun niaifoan copiquiri ahuun shuta fusti tucuntiroran,” ishon Moisés yononi.

³⁹ Nocon shunifo nannori yonofianicun un mato tsain futsa yoiaiton ua nicacahuun. Tsoan mato chaca huafia ato copiyamacahuun. Mato tapasaiton ato copitamarocon nanno nishohuun mia ocuma futsari afiaiton tunuhuu.

⁴⁰ Futsan mia niaifo ano iyocun min camisa mia fiainton min sahuuti cushtopari inanhuun.

⁴¹ Ascano ranushumuaton iyamarai futsan mato yonoquin isca huai, “Uhuun forusa kilometro fusti ua foshocahuun,” ishon mato yonoaiton shinantaquima kilometro rafu foshohuun.

⁴² Tsoanran mato ahuaa yocaiton ayashon ato inancahuun. Futsan mato yoiquin isca huai, “Ua inanyopun,” mato huaiton inanriscayocahuun. Fishcotama.

*–Mato noicasmafiaifoan atohuun noicahuun, –ishon Jesús ato yoini
Lc 6.27-28, 32-36*

⁴³ “Ascashon naan maton yorafohuun noicoicahuun. Ascan a mato noicasmaifori copiquirifi ato noicasmacahuun,” ishon nocon shunifoan yoinifo cuscan man man nicamisi.

⁴⁴ Nannori yofianifo un mato yoiquin isca huai, Naan mato noicasmafiaifoan atohuun noicoicahuun. Tsoan mato omitsisca huairi Dios cufishocahuun.

⁴⁵ Diosin fari onihuani yora sharafo yafi chacafori chashashonon. Nanscarifi huaquin Diosin oirifi onihuani nan yora sharafo yafi chacafori ato onihuashoni. Diosifin nan tanaifo yafi a chaca huaiforifi ato shara huamisi. Ascacun marifi nanscarifi huacahuun a mato shara huaifo yafi mato chaca huaifori shara huacahuun. Asca huaifin marifi man Diospan facuoinfoshon futsafori man ato ismatiro.

⁴⁶ A matohuun noiaifosi copiquirifi man atohuun noiainocai aacai ahuama. Yora chacaforifi ascarfiaifoanno. Man ascainocai Dios mato yoima man shara huaran ishon.

⁴⁷ Maton yorafo fustisi man tsain shara yoiaino aacai ahuama. Yora Dios icoinra huaamafori nanscarifiaifoanno. Man ascainocai Diosin mato yoima “Man shara huaran,” ishon.

⁴⁸ Ascano maton Upa Diosin nai muranshon nantifi yorafo noia cuscan marifi nansca huacahuun. Upa Diosin shinansharamisi cuscan marifi shinansharacahuun.

6

–Ahuuomafo atohuun ramapaiquin inanhuun, –Jesús ato huani

¹ Oinfain. Man futsafo shara huaino maton nomuran man shinain isca huaquin, “¡Aicho! Un ato shara huacun futsafo ua oincani uqui shinansharanonforan,” ishon anori man shinancai Upa Diosin matoqui unimaima. Mato ahua inainna.

²⁻⁴ Nan paramisifo cuscara iyamacahuun. Nanfoan atohuunoo yorafo shinansharamacani isca huaquin, “Nan yora fasi sharacoin. Futsafo shara huashoanran,” ishon nannori futsafo atohuunoo shinanmpai. Nantifi ato ointaifi yora shara huapai ato oinonfo. Ascara chaca. Upa Diosin atoqui unimaima. Futsafoan ato, “Min shararan,” huatirofaino Upa Diosincai atohuunoo tsain shara yoishquima. Atoqui unimaima. Ascan marifi ato cuscara iyamacahuun. Futsafo ato ointaifi ahuuoma inanpaicahuun mato oinonfo. Ascaquimarocon tosa futsa oinyamaino man ahuuoma inanquin Upa Diosin oin matoqui unimai mato ashosharatiro.

*Jesús afu rafuafo yosini ahuuscashomain Upa Dios cufitirofoquin
Lc 11.2-4*

⁵ Man Upa Dios cufiaitian nan paramisifoan cufimisifo cuscan huayamacahuun. Nanfoanfin nishon yora ichananfo anoshon yafi ichananti pushu muranshonri ato ointaifi Upa Dios cufipaicani ato nicanonfo. Upa Dios shinancointamarocon nannofo atohuunoo shinansharamapaicani. Ascaifoan oinquin futsafoan atohuunoo shinansharatirofia Diosincai atohuunoo shinansharatiroma. Ascashocai ato ahuashta inansharashquima.

⁶ Ascacun marifi ato cuscara iyamacahuun. Man Dios cufaitian tsoa yamaino Upa cuficahuun. Ascafiacun Upa fustiton mato ointiro. Ascashu matoqui unimacoinquin man yopai cuscan mato inansharashquin.

⁷ Man cufaitianri nan tsain fustisi yoiriamacahuun. Nan icoinra huamafoan cashmancoïn cufimisifo cuscan. Ascashon yoimisifo. “Un nan tsain nannorisi yoiriaiton ua Upa Diosin nicatiroran,” ishon shinanmisifo. Asca huafiainfoancai Diosin ascaran tsain nicapaima.

⁸ Ascacun marifi ato cuscara iyamacahuun. Man Upa Dios yocataima man yopai cuscan man tapiaquin.

⁹ Ascashon cufinquin isca huacahuun,
“Nocon Upa nai murannoaton min fasi sharacoin.

Nantiffain mihuunoa yoisharapainon.

¹⁰ Min apaiyai cuscan min ica
nai muranshon samamashta arisca huamisifo.

Nanscarifi nuno manifioto anaofaon huanonfo cuscan
nansacoinrifi nuno mai ano anonfo.

Manifotiton aton niaifo iishquin mia ifoannonfo.

¹¹ Shafatifi nocon tushu non yopai cuscan noco inanhuun.

¹² Nan noco chaca huaifoan
non ato rauhua cuscan huafain
nocon chacafori noco rauhuashohuun, Upan.

¹³ Satanás yoshin chacapan noco chaca huamapaifaiton
nocoqui cumatima huahuu.

Nansca huaquin,”

ishon cuficahuun ato huani.

¹⁴ Ascacun futsafoan mato chaca huafiacun ato rauhuacahuun. Ascacufin maton Upa Diosin nai muranshon man aqúi chaca huaa cuscari rau huatiroquin.

¹⁵ Ascafia futsafoan mato chaca huaa cuscan man ato rau huayamaiton manrifi chaca huacun Uparicai mato rauhuashoima.

Piqui tunumisifohuunoa Jesús ato yosini

¹⁶ Ascano tsain futsari un mato yoi man tapinon. Man piqui tunuaitian nan paramisifoan amisifo cuscan huayamacahuun. Nanfoan aton fuso chocayamafain puusimisifoma piqui tunucani. Dioshuunoa shinantama atohuunarocon yorafo shinanmapaicani. Yorafoan atohuunoa shinanqui isca huanonfo, “¡Oincapon! Naton fuso Dios shinanquin piqui tunui puusiquimaran,” ishon. Ascashon atohuunoa shinansharafoanno unimacani. Ascafi- afoanno Dioscai atoqui unimaqui ato ahuara inainma. Ascacun marifi ato cuscara iyamacahuun.

¹⁷⁻¹⁸ Ascatarocon man piqui tunuaitian fuchoquimucain foshti isharashon Dios shinancahuun. Man ascaitocai futsafoan mato oinfiakin tsoan tapitiroma man piqui tunufaiton. Ascafia Diosin fustichifin tapitiroquin. Ascashon nan icari man nocoaitian mato ahuara sharashta inanshquin.

—Upa Dios icanoa ahuara sharacoinfo mato mucushotiroran, —ishon Jesús ato yosini
Lc 12.33-34

¹⁹ Ascan nuno mai ano niyoshon mafo ichapa mucuyamacahuun. Nanfo chacanai futsuaino man funotiro. Yomutsori maton pushu muran iquishon nantifi maton mafo onuntiro. Ascaino marifi man funocoin.

²⁰ Ascatarocon Dios fu rafufafaincahuun mato amapaiyai cuscan ashquin. Man asca huaiton Dios nan icanoshon mato ahuara sharacoinfo mucushoni. Nanfocai chacanapa- cunacama. Tsitsa iquiyamacai yomutsoricai iquitiroma maton onunshquin.

²¹ Ascan man mafo fusti shinanfainquin nan fusti man noicain. Ascan man Diosihu- unoa fustisi shinanfainquin nanrifi man yonoshosharatiro ahuun noicoïnquin. Ascashu man afu isharapacusharatiro.

Nocon furo nan lamparina cuscarahuunoa Jesús ato yosini
Lc 11.34-36

²² Afanan tsain futsa un mato yoi man tapinon. Nocon furo rafu nocon cayan lamparina cuscara. Nan rafu shara non oinsharatiro. Ascashon nocon caya cushusharatiro non ahuuscanonma. Nanscarifiai mato nomuranshon man shinansharai man isharacointiro.

²³ Ascafia nocon furo chacanocai non oinsharatiro. Faquishcoin itiro. Nanscarifiai nocon nomuranshon non shinanchacaicain non isharatiroma. Ascacun oinfain. Man Dios

shinain isharafiashu chipo Upa Diosin ahuun tsain man cachiquiri huashucaí afanan man isharacointiroma. Ascashu nan faquish muran ica shinantsain man funocointiro.

Dios yafí pui
Lc 16.13

²⁴ Ascán oinmatinincái ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiroma. Ascashon futsa, “Nacái ahuamaran,” ishon shinantiroma. Tapicái huatiroma ratocaimain nicasharaiquin. Nanscarifai Dios yonoshopaiquicái man pui noitiroma maton ifo inon.

–Upa Diosin ahuun facufo cushushararan, –ishon Jesús ato yoini
Lc 12.22-31

²⁵ Afanan un mato yoisharanon. Isca huaqui shinanyamacahuun, “Non ahua pitama nonricái ahua ayaimaran,” ishon shinanchacayamacahuun. Ahuaricái non sahuuimaran iyamacahuun. Non ahua pifain non sahuuatocái noco imasharatiroma.

²⁶ Shinançapon. Nan puiyafocancái ahua fanayamafain ahua chintumisifoma ahuaricái fotsuyamafain ahuamafocacun Diosin ato pimamisi. Nanscarifai aquin Diosin matoahuun noiquin nan puiyafocái aca finonmafain mato cushushara.

²⁷ Ascacun shinanchacayamacahuun. Non shinanchacatocái shafa fusti noco nimayotiroma.

²⁸ Ascashon shinanquiri isca huayamacahuun, “¡Ohuashta! Raniamun un sahuuti fii nan sahuushqui,” ishon shinanyamacahuun. ¡Shinançapon! Charofocái yonoyamafain sahuuti icushumisifoma.

²⁹ Ascátama sharamishticoín foaifafo. Nocon shuni niaifo Salomón sahuuti sharashtacoin sahuufiapaonincái nan charo sharashtacoinfo cuscarama.

³⁰ Diosin charo sharashtacoinfo onihua. Foai sharafia supashon samamashta tsasicun coatirofo. Nanfo finonmafain mato noiquin mato camisa sahuumashquin. Ascafia mancái icoinra huasharacoinnafa.

³¹ Ascacun shinanquin isca huayamacahuun, “¡Ohuashta! Unmun ahua piquin uhuun tushuyamaino. ¿Unmun ahua ayaicái? Unricái ahua sahuuimaran,” ishon shinanchacayamacahuun.

³² Ascán nannori nan icoinra huamafoan shinanchacamisifo. Ahuara pifain sahuupaiyafocái fustisi shinanmisifo. Ascán maton Upa Diosin tapiquin man yopai cuscan. Ascacun mato inanshquin.

³³ Ascacun Diosicairocon shinanchahuun. Mato yonomapaiyai cuscan nan fusti shinanfafaicahuun. A cuscara shara ipaicahuun. Nancái shinanquin tau huafafaincahuun. Man ascacitón ahua futsa man yopai cuscan Upa Diosin mato inanshquin.

³⁴ Ascacun shinanchacacuí isca huayamacahuun. “¡Ohuashta! Uncaí tapiama funamanri ahua chaca finoainno raca un tunuima,” ishon anori shinantama shinanquirocon isca huafafaincahuun, “Upa Diosin shafatifi ua cushusharamisi cuscan funamanriri ua cushusharairan,” ishon shinanfafaicahuun.

7

Futsafohuunoa shinanchacayamacahuun
Lc 6.37-38, 41-42

¹⁻² Futsafohuun shinanchacacuí yoiquin isca huayamacahuun. “Nanton chaca huai cuscan onaintimainonnan,” ishon futsafohuunoa yoiyamacahuun. Man ascara yoiaiton Diosin mato onaintimai.

³ ¿Ascacun ahuuscái yora ahua pasnanshta fuostamua man futsupaiyain marifi sapa uhuapa fuostamufiashocái man muima? Nanscarifai min chaca huairan futsa huafiaquin mancaifin fasi finacaiquin.

⁴⁻⁵ Ascashon man yoiqui isca huai, “Uhuun yorashtan, un min furo murannoa ahua pasnanshta un mia futsunon,” man huamisi. Ascafiashocái man tapiama man sapa fuostamufafainna. Man fuparamitsapaimisi. Ascacun sapa futsucumacahuun. Asca huashon oinsharafain marifi man futsa pasnanshta futsutiro. Nanscarifai aqui futsafoan ato chaca man shatumapaiyafocái marifi man chaca huua. Man fasi paran. Ascacun iquisi maton chaca shatucahuun. Ascashon marifi man futsafo chaca shatumatiroma.

⁶ Tsain futsari un mato yoi man tapinon. Pashna pofu iyamarai yahua pofu non tushu inansharatiroma. Non mucuman tushu inansharapaiyafocái nan pitama nocorocon mocotiro. Nanscarifai aquin ratoranfoan man ato tsain shara Dioshuunoa yoiyapaiyafocái nicacasmaquin mato chaca huatiroma. Ascacun ascarafo ato yoiyamacahuun. Man yoisharapaiyafocái Diosin tsain potatirofoquin.

*Dios yocafain funafain cunahuu**Lc 11.9-13*

⁷ Afanan ahuara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Diosin cuffafaincahuun man cufiai cuscan mato inanon.

⁸ Tsoan Upa Dios yocariai fiishquin. Ascan tsoan ahuara shara fasi fuchipaiyai cuscan Diosin ato fuchimatiro. Ascan tsoan Upa Dios cufiraiiton ashoshquin.

⁹ ¿Ascacun maton facun mato yoa yocaiton man toquiri inantiromun? Ma. Mancai maton facu asca huatiroma.

¹⁰ ¿Maton facuri mato shiman yocaiton man rono inantiromun? Ma. Mancai maton facu asca huatiroma.

¹¹ Ascacun tapicahuun. Man chaca huamisifashon maton facufo man inansharamisi. Man ascacaiton maton Upa Diosin nai murannoaton man yocai cuscan finaciaia mato inansharashquin.

¹² Man futsafo matohuunoo shara huamapayai cuscan nanscarifi huaqui futsafori shara huashofafaincahuun. Moisés cununi cuscan yafi Diosin tsain yoimisifoanri nannori cununifo man shara huashofafainon.

*Caincaiti atsoshta**Lc 13.24*

¹³ Ascashon tsain futsari un mato yoinon. Nannofin fai rafuquin. Nan fai tohuaica uhuapaton yorahunrasi ahuunsi fomisifo. Ascafia nan mau fai tanashu ahuun unutaqui omitsiscapanacafo muran iquishcani. Ascacun mau fai uhuapaton catama fai atsoshta tanacahuun.

¹⁴ Nan fai tohuaica uhuapama atsoshtacoin. Ascan nanfin fustirasiton fuchitirofo. Nan atsoshta tanafainashu omitsiscatirofodia ahuun unutaqui Dios ari nocoshcani nipasharashcaquin.

*Ihui ahuun fimihuunshon non onantiro**Lc 6.43-44*

¹⁵ Oinfain. Paramisifo matoqui fucashon mato yoiqui isca huacani, “Nonfin Diosin tsain yoimisifoquin,” ishon yoifiacani afoancai Diosin tsain yoimisifoma. Ascan nanfofin nan chashoan cuscarafofishu ato nomuran nan masharo pofu cuscarafuquin. Ascacun ato nicayamacahuun.

¹⁶ Un mato tapimaquin isca huai. Fanafoti ahuun fimifohuunshon non onantiro ahuu cuscarafomainquin. Ihui moshayafohuuncai uva foaicun non tuscutiroma. Nan-huafaquisihuunricai shopa foaicun non tuscutiroma.

¹⁷ Ascafia ihui sharano ahuun fimiri shara itiro. Ihui chacano ahuun fimiri chaca itiro.

¹⁸ Nanscarifiyai ihui sharacai ahuun fimi chaca itiro. Ihui chacanocai ahuun fimi shara itiro.

¹⁹ Ascacun ihuin ahuun fimi sharamacun ifoan rurashon coatirofo.

²⁰ Ascacun fimi chaca iyamarai sharacun onantirofo ahuu cuscaramain ihuiquin. Nanscarifiyai nan tapimamisifoan amisifo cuscan man onantiro yora sharafo iyamaraimain chacafoquin.

*Atificai Upa Dios icano iquitirofoma**Lc 13.25-27*

²¹ Ascacun atirifiton ua Ifo huafishucau uhuun Upa Diosin ato amapaiyai cuscan amisifoma. Nan cuscarafa Upa icari nocotirofoma. Nan uhuun Upa nai ari icaton afi ato amapaiyai cuscan huamisifo nanfo fusti uhuun Upa ari nocotirofo afu nipashcaquin.

²² Ascacun Upa Diosin nantifi icoinra huamafo onaintimaitian nantianri yora ichapaton ua yoiqui isca huashcani. “Ifoshta, shinanhuun. Non min anuhuunshon non yorafo mihuunoo tapimamisi. Min anuhuunshonri yoshin chacafo non futsafomaquinoa potamisi. Min anuhuunshonri tsoan atiroma cuscan non huapaoni. ¿Iconmamun, Ifon?” ishon yoishquicani.

²³ Ascacifoan un ato cayacafi cumaqui isca huashquin, “Mancai uhuun yorafo imisima. Manfin paramisifoquin. Chaca fustisi man huamisi. Ascacun umaquinoashu fotocahuun,” un ato huashquin.

*Futsan pushu mutsisipa huaino futsan pushu mutsisipama huatiroma**Mr 1.22; Lc 6.47-49*

²⁴ Ascacun un mato tapimai un mato yoimisi cuscacoin aashucau man funopacunacama. Nanscarafa non pushu mutsisipa huamua cuscarafa. Pushu huaquin ahuun quishi mai tuiqui nocoo.

²⁵ Ascano fasi oi ichapa fucain faitahuan pushu naman foannaino fuhuanri nocofi-aquicai pushu mutsisipa paon huaquima. Nanscarifiai nan uhuun tsain nicacoianfo nan un yoia cuscan acani. Ascashu ahuaara ahuscarafaiainocai umaqui itirofoma.

²⁶⁻²⁷ Ascafia pushu futsa mai puhuuqui fuquinishta huaa ahuun quishi mai tuiqui nocoama. Ascano fasi oi ichapa fucain faitahuan pushu naman foannaino fuuhuanquiri pushu mutsisipama paon huaqui chacana huatiro. Nanscarifi aqui tsoan uhuun tsain nicafiaquin un ato tapimana cuscacoin aima. Aatocai shinansharama. Ascashu ahuun unutaqui arifi nantifi funoshqui omitsiscairan, —ishon Jesús ato yoini.

²⁸⁻²⁹ Jesús tsainqui anaitiano yorahuanrasi anoshon nicacanashu yoinannifo, —¡Aira! ¡Nicacapon! Ahuun tsain sharacoin. ¿Ahuuscashon anori noco yositiromun? Ahuun tsain shara iquina. Nocon tapimamisifoan Moisés cununi cuscan noco yosimisi cuscan aacai anori noco yositamarocon niaifo tapia cuscan noco yosiaran, —ishon yoinannifo.

8

Jesús nocofunu yoratisho rashquishi futsua caya huani

Mr 1.40-45; Lc 5.12-16

¹ Ascatan Jesús ato yoiquin anaititan machi tunanmanri tusuriqui cainaiton yorafoan mufainifo.

² Jesús caino nocofunun ahuun yoratishon ranimamishti rashquishi futsua Jesusqui nocoshon ratoconun mai chachipacufoan yoini isca huaquin, —Ifon, ua caya huapaiquifin mian cayahuatiroquin, —huaiton.

³ Jesús aqui mupishon yoini, —Icon un mia caya huai. Ascan natianfin min cayaiquin, —huaino a rashquishi futsua cayariscatani.

⁴ Cayacun Jesús yoini isca huaquin, —Un mia caya huaa cuscan tsoa yoiyamahuu. Nocon caifohuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscacoin min aiton, —ishon Jesús yoini.

Romano ranushumua niaifoan ahuun oinmati Jesús caya huani

Lc 7.1-10

⁵ Asca huafaini Capernaum ano cani. Ascaino nanno ranushumua niaifo noconi ahuunshon ahuun oinmati caya huamapai.

⁶ Aquí nocoshon yoiqui isca huani, —Ifon, uhuun oinmati isininqui. Uhuun pushu ano furoiquima raca. Fasi omitsiscairan, —huaiton.

⁷ Jesús cumani, —Un canonqui cayahuashquin, —ishon yoiaiton.

⁸ —Ifon, uncai ahuaama. Min nocofunu tsoa cuscaramacoin. Uhuun pushu muran capaiyamaquin. Min tsainmansi uhuun oinmati ua cayahuashohuun.

⁹ Ascacun urifi uhuun niaifoan ua yonomisi. Ascacun urifi ranushumuafo un yonotiro. Ascan un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashohuun,” un huaiton ua ashoriscatiro. Ascan minfin ahua-mamishti huatiroquin. Ascacun min tsainmansi yoihuu uhuun oinmati cayanon, —ishon yoini.

¹⁰ Ascaiton nicai Jesús afu foaifo yoini, —¡Aira! Nicacapon. Israelimafishon naton ua yoiat cuscaicai tsoa futsan ua icoinra huacoinmisima. Israeli anoafonanricai ua icoinra huacoinmisifoma.

¹¹ Ascacun un mato shafacafi yoi. Mani futsafori anoshon nan Dios icoinra huafoti nocon shunifo Abraham yafi Isaac non Jacobori Dios icano nai murannoashu atofu ichananshcani Diosin yorafo iishcaquin.

¹² Ascafia atirifi nocon caifon Israelifo Diosin ahuun yorafo ato imapaifacai tsoan icoinra huafoma. Ascacanashucai Dios icano nocotirofoma. Ascacun Diosin ato faquish muran potashquin. Nannoashu uaiqui omitsiscapanacaforan, —ishon Jesús ato yoini.

¹³ Ascashon Jesús Romanon ranushumua niaifo yoini, —Min ua icoinra huaino min oinmati man caya. Ascan natian min pushu ano catahuun, —ishon yoini. Jesús yoiaitian ahuun oinmati cayariscatani.

Pedro ahuun raisi yoshafu Jesús caya huani

Mr 1.29-31; Lc 4.38-39

¹⁴ Asca huatan Jesús Pedro pushu ano cani. Nanno caquin oian Pedronun ahuun raisi yoshafu fasi yonacoin oshati camaqui raca ini.

¹⁵ Ascaiton Jesús yoshafuan ahuun mucuqui mupiaino ahuun yona matsiriscatanaino funinaca huan nan isinincama ointsacai Jesús pimashquin tushu huani.

*Jesús yora ichapa caya huamani**Mr 1.32-34; Lc 4.40-41*

¹⁶ Ascaino man fari caino isinincai futsa futsatapafo yorafo aqui ihuunifo ato cayahuamapacunon. Atirifi yoshin chacafo atohuun nuufafaina Jesús ahuun tsainmansi atomaquinao potano caya sharanonfo.

¹⁷ Jesús nantifi ato caya huani cuscan nannori ahuunoa Diosin tsain yoimisi Isaías inon pacoai cuscan cunuqui isca huani, —Cristofin ahuaara isin futsafoan noco isininmai cuscan noco caya huaquin. Nocon isinfori nocomaquinao potaran, —ishon Isaías cununi cuscan Jesús huani.

*Jesús tanasharapaiyairo**Lc 9.57-62*

¹⁸ Ascashon Jesús oian yorahuanrasi aqui fuaifoan afu rafuafo yoini, —Non ian ocuma futsa fonon focahuun, —ato huaino.

¹⁹ Nantianri Moisés yononi cuscan tapimamisi aqui cashon yoiquin isca huani, —Tapimamisiton, min raquirá caino urifi un mifu cahuacacainon, —huaiton.

²⁰ Jesús cumaquin, —Marifi quiniyaquin. Puiyafari naayafofiano uncai pushu yama, —ishon yoini.

²¹ Ascaiton a tanamisi nocofunu futsan Jesús yoiquin isca huani, —Ifon, natian un mifu capafiai uhuun pushu ano un cayatanon ua nichiyopun. Nan uhuun upa naitian un mai huayotan un mia tanasharashquinon, —huaiton.

²² —Ascaquima ua tanahuun. Ua ifoamafofin nan yora naa cuscarafuquin. Ascashon nanfoan ato yora naacun mai huatirofo. Ascan minfin natian ua tanaicain, —ishon Jesús cumani.

*Jesús fuuhuan yafi ian fuchomanhuan nishma huani**Mr 4.35-41; Lc 8.22-25*

²³ Asca huatan Jesús shasho naqui nanuano norifi afu rafuafo non afu nanucaini.

²⁴ Ascashu ianmanhuan non pocuaino fuuhuan nocoqui noconi. Nantian Jesús shasho murannoashu osha ini. Ascano ian fuchomanhuanquin shasho muran unu iquimani.

²⁵ Ascaiton non moinni. —Moihuu, Ifon, noco numashqui. Man non asai futsuicai, —ishon non yoini.

²⁶ Ascaino moinachahuan noco yoini —¿Ahuuscai man ratuain? Man ua icoinra huasharashucai man ratucuanama, —ishon noco yoini. Ascatan fuuhuan yafi ian fuchomanhuan yoiqui isca huani, —Fuun nishmahuu, —huafain, —Fuchomanhuan nishmahuu —huaino fuu yafi ian fuchoai nishmafaini. Asacatan ianmanhuan pusiquima racani.

²⁷ Ascaiton oin non yoinanni, —Ahuu cuscara nocofunushonmun nocon Ifoan isca huaquin. Fuuhuan yafi ian nan yoiai cuscan man nishma huaquin, —icashu non yoinanni.

*Gadara mai anoa nocofunu rafuhuan yoshin chaca nuua ini**Mr 5.1-20; Lc 8.26-39*

²⁸ Ascatan ianmanhuan pocufaini Gadara mai ano non nocotan Jesús no fu caino nocofunu rafu yoshin chacafo atohuun nuumisi aqui funifo. Nan rafu fasi musucoin ini. Nantifi yorafo atoqui musumisifo. Ascan nan rafu icafoanno cai tsoan ato finontiro imisima. Ascacun atoqui turocomumisifo. Nan mahua quini muran naafo mai huamisifo ano nan rafu inifo.

²⁹ Jesús fuchicatan oi ashcafinitin yoinifo, —Minfin Diospan facuquin. ¿Min noco ahuusca huapai oamun? Min noco omitsisca huaitian icataiyamafiano min noco omitsisca huai oamun, —ishon Jesús yoinifo.

³⁰ Ascaino nantianri ato chaimashon yahua inafanon piinifo.

³¹ Ascashon yoshin chacafoan Jesús yoicaquin, —Min na nocofunu rafumaquinao noco potaimancai yahuarasihuan noco nichipun, —huaifoan.

³² Ascaiton —Yahuafohuun fotocahuun, —Jesús ato huaino. Nan nocofunu rafumaquinaoashu yoshin chacafo yahafo muran fonifo. Ascaino yahuaahuanrasi ian muran maocofainni asai futsunifo.

³³ Ascaifoan oinfainceni yahua cushumisifo ichonifo pushufoti anoafo ato chani huai focani. Ascatan nococashon Jesús nocofunu rafumaquinao yoshin chacafo potaiton oianfo cuscan futsafo yoifoanfainifo.

³⁴ Nicacani nantifi nan pushufoti ano icafo Jesusqui funifo. Ascashon yoinifo, —Nuno noco mai anoashu catapun, —huanifo.

9

Jesús nocofunu funitiroma caya huani

Mr 2.1-12; Lc 5.17-26

¹ Ascatan Jesús shasho naqui nanucaini ian mahuan pocufaini ahuun pushurasi ano noconi.

² Asca caini pushu muran iquicun rafu non rafuri nocofunufao aton caifo isinincai afa raqui caiyamacai afiri ahua huatiroma Jesús shinanmaqui shuhua naratashon ihuunifo a cayahuamanon. Ascaiton Jesús oian nan nocofunu isinincaiton ahuun yorafoan fasi icoinra huaifoan oinquin isinincai yoiqui isca huani, —Uhuun yorashta, ratuyamahuu. Natian mun mia chaca soashona, —huaiton.

³ Nicacani Moisés cununi cuscan tapimamisifoan aton nomuranshon shinanquin isca huanifo, —Ajaa. Natocai chaca soatiroma. Fasi Dios chaca huai. Diosin fustitofin chaca soatiroquin. Asca noco paraquin. “Un Diosiran,” noco huamapai, —ishon aton nomuranshon shinanchacanifo.

⁴ Ascaifoan onanshon Jesús ato yoiquin isca huani, —¿Ahuuscail maton nomuranshon man amaqiri shinanchacaimun?

⁵⁻⁶ Unfi Cristoquin yorafoan aton chaca un soashotiro. ¿Ascan ahuuscacaimun un huaicai? Un chaca soashoyamaraquin un cayahuai. Ascacun un mato ismai Upa Diosin ua catoan. Ahuunshofin un chaca soafain un yorafo caya huacointiroquin, —ishon ato yoini. Ascatan Jesús nan nocofunu afa raqui cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino.

⁷ Funinaca huanan ahuun pushu ano cani.

⁸ Ascaiton oincani nantifi mustaiaaricatan yoinifo, —Ahuuscashomun Diosin isca huaiquin. Diosin fasi sharacoin tsoa cuscarama. Ahuun yonohuunshon na nocofunu isinincai Jesús ahuun tsainmansi caya huafain ahuun chacari soashonaran, —ishon yoinifo.

Jesús Mateo cunani

Mr 2.13-17; Lc 5.27-32

⁹ Nansacaini caaquin Jesús ua oinni. Unfin noco niaifo pui fishofafainmisi iniquin. Ascan uhuun anufin Mateoquin. A muranshon aton pui fiанти pushun facu muran un tsoaa ini. Ascaiton Jesús ua yoini, —Un fu cahuun ua tanamisi iishquin, —Jesús ua catonquin huani. Ua asca huaino un afu cani.

¹⁰ Ascashon Jesús uhuun pushu muranshon un pimani. Yorafori no fu cani. Niaifo pui fishomisi futsafo non icoinra huamafo futsafoan atohuunoo shinanchacamisifo yafi non afu rafuafori cani. Ascashon nanfoan no futan piinifo.

¹¹ Ascaiton oincaquin Fariseofoan Jesús fu rafumisifo yoini, —¿Ahuuscail maton tapimamisi Jesús nan niaifo pui fishomisisifo non chaca futsafo futan piimun? —huanifo.

¹²⁻¹³ Ascaifoan nicaquin Jesús ato cumani, —A isinincaifoma cayahuamamitsamisi yopacanima. Ascan nan isinincaifoti fasi cayahuamamitsamisi yopacani. Ascarifi aquin, “Uncai ahua chaca huamisima. Un Numamisi yopaimaran,” icaifocai un aton chaca soashotiroma. Ascan tsoan yoiqui isca huai, “Un fasi chaca huamisi. Un numamisi yopacoinran,” icaifoan un ato chaca soashotiro. Ascacun Diosin tsain cununi cuscan tapitacahuun. Cunuqui isca huani, “Ua man ina fushomisi un mato chaca soashonon. Nan fusticai un fuchipaima. Ascatamarocon man futsafohuun ramapaiyai nancaifin un fasi fuchipaiquin,” ishon Diospan tsain cununi. —Jesús ato huani.

Piqui tunuaihuunoo

Mr 2.18-22; Lc 5.33-39

¹⁴ Ascashon ato yoiaino Juan fu rafumisifo aqi fucashon yocanifo. —¿Ahuuscail Fariseofo futan non piqui tunumisifiano mifu rafuafoan piqui tunumisimamun? —ishon Jesús yocaifoan.

¹⁵ Ato cumani, —Nocofunu fu ainfo fianainnoricai unimai fusicuquin tsoan piqui tunutiroma. Nanno funu anocai ahuun yorafoan piqui tunutirofoma. Ascafia funu amaqi rutuafoano shinancaquin piqui tunutirofo.

¹⁶ Sahuuti shunicoin fashnucun poto funapan icushumufia ustuashu fasi chacanai finatiro. Tsoancai afanan ascara icushpaitiroma. Nanscarifiai un mato tsain funa shara yosia cuscan nicacoinshocai man apaoni cuscan afanan man huatiroma. Tsoan ua tanacoianshu ipaoni cuscan cachiquiri huacointiro. Ascashu funa cuscara shara iishquin.

¹⁷ Nanscarifiai tsoancai fichi tutso shuni muran vino funa nanutiroma. Fichi tutso toshacainaino vino funa chacanai cuyofotiro. Nanscarifiai maton shunicaifoan mato yosimisi cuscan yafi un mato yosiai cuscacai nan rafu ositirofoma. Un mato yosiain cuscacoin nannori Diosin tsain shara. Ascafia mato shunifoan mato yosimisifo cuscacai

anorima. Nan tanashocai Diosin mato amapaiyai cuscan man huatiroma. Nan rafu osishon nicapaiquicai man shinansharatiroma. Fichi tutso funa muran vino funa nanua sharacoin itiro. Nanscarifiai ratoranfoan apaoni cuscan unucatan un ato tsain funa shara yosiain nan fusti tanasharacun Diosin ato funa shara imai, –ishon Jesús yoini.

Jairo shotocofacu caya huafain ainfoan Jesús sahuuti muunni cayashquin
Mr 5.21-43; Lc 8.40-56

¹⁸ Ascashu Jesús tsaincai muran Israeliffoan ichananti pushu anoa aton niaifo Jesusqui noconi. Nocoshon ratoconun mai chachishon yoiqui isca huani, –Uhuun shotocofacushta man naaquin. Un fu capun. Min mucupan uhuun facu mui caashquin cayatan ninon, –ishon niaiffoan Jesús yoini.

¹⁹ Asca huaino Jesús niaifo fu caino non acho non afu cani.

²⁰ Nannori ainfon imi imitiani doce fari man aqi cafiano nusu yamacai. Jesús caiton nan ainfono acachorishori ahuun sahuuti muunni.

²¹ Mun ataima ahuun nomuran shinanqui isca huani, –Un ahuun sahuuti muuanshu un cayatiroati, –ishon shinanni.

²² Ascashon muuaiton Jesús ifiacucahuatan ainfo fuchishon yoini –Achishtan, ratuyamahuu. Min ua icoinra huashufin min caya sharaquin, –ishon yoiaino ahuun imi nusuriscatani. Ascaiton mua man caya sharacoian ini.

²³ Asca huatan Jesús niaiffoan pushu muran iquicaiquin nica yorafoan aton shainti manuaiffoanno futsafo shorarascacani. Fasi achacoin uaicani.

²⁴ Ascaiffoan Jesús ato yoini, –Chifi caintacahuun. Na facuca naama. Oshafinquin, –ato huaiton osanifo.

²⁵ Ato caimatan shotocofacu mutsoinifoannaino samamashta funinaca huani.

²⁶ Ascano Jesús shotocofacu man naafiacun funia nicacani pushufoti chaniffoanfainifo.

Jesús fusho rafu cayahuani

²⁷ Ascano Jesús niaifo pushu anoashu caiton fusho rafutan mufainifo. –Min nocon niaifo ipaoni nan David ahuun funa. Nocoahuun ramapaihuu, –oi ashcafinin cunarianifo.

²⁸ Asca huaifono Jesús pushu futsan muran iquicun fusho rafuri afu iquinifo. Iquiaiffoan Jesús ato yocani, –¿Un mato caya huanon man icoinra huaimun? –huaiton. –Ai, Ifon, non mia icoinra huai, –huaiffoan.

²⁹ Aton furo munquin yoini, –Ua icoinra huashufin man cayaquin, –ato huani.

³⁰ Asca huaino oinsharariscatani. Oinsharaiffoan Jesús ato yoisharaquin –Ua nicaquin. Un mato cayahua tsoa yoyamacahuun, –ishon yoini.

³¹ Anori yoifiacun nan rafutan nantifi nanno icafo atoqui chaninifo.

Jesús nocofunun tsaintiroma caya huani

³² Nan rafu pushu murannoashu foaifono futsafoan nocofunu yoshin chaca ahuun nua ascacai tsaintiroma Jesusqui ihuunifo cayahuamanon.

³³ Jesús yoshin chaca amaquinoa potano nocofunu tsainon. Nanno icafo mustairitan yoinannifo, –¡Aira! ¡oincapon! Nocon mai nan Israeli anoshon Jesús rama aca cuscan tsoa oinmisimaran, –icanashu yoinannifo.

³⁴ Asca huafiainfoan Fariseoffoan yoinifo, –Nanton yoshin chacafo aton niaiffohuunshon yoshin chacafo potatiroran, –ishon yoinifo.

Jesús yorafohuun ramapai

³⁵ Ascaiton Jesús pushurasifoti nanno Judiofo icano cahuacacaini. Judiofoan ichananti pushu muranshonfin Jesús ato Diosin tsain shara yoiquin isca huani, –Itisharacahuun. Diosin nuno maton niaifo ipairan, –ishon ato yoiffoanfaini. Pau futsa futsatapafo caya huani.

³⁶ Yorahuanrasi aqi fuainfoan oin atohuun ramapaini. Aton nomuran omitsiscaiffoan. Ascan Jesús shinanquin isca huani, –Chashohuan cushumisioma nanscarifiai na yorafo cushumisiomaforan, –ishon shinanniquin.

³⁷⁻³⁸ Ascashon non afu rafuafo noco yoini, –Yora ichapaffoan uhuunua nicayamafiano ichapamaton ua yonoshocani uhuunua ato yoishcaquin nanfu nipashquin. Ascashon fasi Upa Dios cucicahuun ahuun yonoshomisifo catonquin uhuunua ato yoinonforan, –ishon Jesús ato yoini.

10

Jesús doce nocofunufu catonni afu rafunonfo
Mr 3.13-19; Lc 6.12-16

¹ Ascatan afu rafuafo noco cunani, —Uqui fucahuun, —noco huaino. Aqui fuaifoano yononi ahuuscashomain yorafo ahuunshon cayahuamafain yorafohuun yoshin chaca nuucun atomaquinoa potatiroquin. Ascashon pau isi futsa futsatapaforimain ahuuscashon caya huatirofoquin.

²⁻⁴ Nonfin doce iniquin. Nocon anufo un mato yoi. Futsa Simonfiacun ahuun anu futsa Jesús tuqui huani Pedro. Nanton chipocu Andrés. Futsafoan aton anu Santiago non Juan. Nan rafu Zebedeopan facu. Futsafoan Felipe non Bartolomé un Mateo non Tomás non Santiago Alfeopan facu non Simón futsari nanton ahuun caifo futsafo futan Romanonfo potapai afanan Israelifo yonononfoma. Futsan ahuun anu Judas Santiago facu futsarifi Judas Iscariote nanton Jesús potashon ato achimani. Nocofosi Jesús noco catonni non ahuun rafumisi inon non ahuunshon tsain tapishquin.

Jesús afu rafuafo doce nichini Dios niaifo icainomain ahuu cuscara iishquicain ishon ato tapimanonfo

Mr 6.7-13; Lc 9.1-6

⁵ Noco catonshon Jesús noco yonoquin isca huani, —Nan noco caifomafoan aton mai ano foyamacain Samaritanon icafo anorifi foyamacahuun.

⁶ Ari fotamaron nocon caifo Israelifo muransi fotacahuun. Nanfofin chashoan funoa cuscarafuquin.

⁷ Ascano focashon ato yoiqui isca huacahuun, “Nocon Ifo Dios samamashta nocoyoshquin noco niaifo iishqui,” ishon ato yoitacahuun.

⁸ Ascashon isinincaifori uhuun curushhuunshon ato cayahuamafain man yora nafiadun funimafain yora nami rashquishi futsafo ato cayahuamafain yoshin chacafo yorafohuun nuucun nanfori uhuunshon atomaquinoa potacahuun. Diosin mato cashman ahuun curush inon cusca huafain futsaforifi caya huasho ato ahua yocayamacahuun.

⁹⁻¹⁰ Ascashon focaquin mato ahua foyamacahuun. Pui foyamafain mato sahuuti yafi sapatori foyamafain forusa yafi poquitiri foyamacahuun. Nan man nuta fustiya fotacahuun. Man uhuunshon uhuun tsain shara ato tapimanaiton arifi man yopai cuscan mato inantirofo.

¹¹ Ascana nan man pushurasi ano nocoaition nocofunun Dios tanasharacoian funacahuun nan fuchiashu ahuun pushu muran iyoshon ato yoifoanfafaincahuun nan man caitian.

¹² Ascatan ahuun pushu muran icaquin nan pushu ano icafo ato yoiquin isca huacahuun, “¡Aicho! Min pushu muran non oiran,” huacahuun.

¹³ Ascasho nan pushu ifo futan ahuun yorafoanari mato shara huano ato yoihuu isca huaqui, “Dios mato ointi shinanshara huamashquiran,” ishon. Ascafia mato tanasharayamaifoancai Diosin aton ointi shinanshara huamashquima. Ascano Diosicai mato ointi shinanshara huamaqui unuima.

¹⁴ Ascana rato pushu futsa iyamarai pushurasi anofoanari mato nicacasmaifoan atomaquinoashu focaquin maton sapato tatashacahuun. Ascaquifin man ato ismatiroquin mato nicacasmafain Diosirifi nicacasmaifo cuscan.

¹⁵ Un mato icon yoi. Diosin nantifi nan chaca huamisifo ato yoipacuaition nan Sodoma yafi Gomorra ano ipaonifori ato onaintimashqui. Ascashon nan mato nicacasmafori natian ato onaintimaquin finacoishquin.

Diospan tsain ato yoiaifoan nicacasmaquai ato omitsisca huanifo

¹⁶ Chashoanfo masharonun pipaitiro. Nanscarifiai nan icoinra huamafoan mato chaca huapaitirofo. Ascafia nanfo muran un mato nichí. Ascacun nan rono onanya cuscara marifi icahuun. Ruhuincaí ahua shinanchacamisima cuscan marifi nanscarifi isharacahuun.

¹⁷ Ascacun oinfain. Nan yora chacafo masharo pofu cuscarafu mato achimatirofo. Ascano achicashon aton niaifofo ano mato iyotirofo. Asca huashon aton ichananti pushu muranshon mato ihuin futsa coshamatirofo.

¹⁸ Ascashori niaifofo ano mato iyocani uhuunshon mato nansca huacani. Ascafia nanfo yafi caifo futsafori nan tsain shara uhuunoa man ato yoitiro.

¹⁹ Ascatan mato achifiafo shinanchacayamacahuun ahuuscashomain man ato cumasharaicai. Ascashon niaifofoan ointaifi mato yocaifoanno nantianri Upa Diosin mato shinanmani man ato cumasharanon.

²⁰ Man ato yoiaitiancaí mafi man ato yoima. Maton Upa Diosifin aficoín yoi cafisca huaiquin ahuun Yoshin Sharapan man ato yoipai cuscan mato huashoi.

²¹ Ascano nantianri nocofunufufoan ahuun yora afu nanufo achimacani niaifofoan ato rutumanon. Apafoanri aton facufo achimacani ato rutunonfo. Nanscarifi huaquin facufoan aton apa yafi ahua nicacasmaquai ato achimani niaifofoan ato rutunonfo.

²² Ascasho nantifi yorafoan man ua icoinra huacun uhuunshon mato noicasmacani. Ascun omitsiscafiaquin man ua potama nan man naitian uhuun tsain tanasharashu Upa Dios fu man ipasharaiqui.

²³ Ascun pushurasi futsa anoshon mato omitsisca huaifoanno pushurasi futsa ano ichotacahuun. Ascacun un mato cayacafi yoi. Ua nicasharacahuun. Israel pushurasifo atirifi ari man cataima un afanan matoqui nasoshquin.

²⁴⁻²⁵ Ascano ahuunshon tapiafoancai ato tapimamisi finontiroma. Oinmatifoanricai ato ifo finontirofoma. Ascashu marifi man ua cuscara iishqui. Ua chaca huamisifo cuscan matorifi nansca huashceni. Nanfoan ua noicasmacaquin ua yoimisifo isca huaquin, "Minfin yoshin chacafoan ato niaifokin," ishon ua yoimisifo. Un mato ifofiacun ua asca huamisifo. Ascun matocafin asca huaquin finacaicaniquin.

Tsoaquimain man ratutiroquin

Lc 12.2-7

²⁶ Ascacun mato omitsisca huafiaifoanno atoqui ratuyamacahuun. Nanfoan ahuarashu onupaifamisi nantifi Diosin ato puashoshquin. Ahuarari fomanpaimisifo nanfori ato puashoshquin.

²⁷ Ahuara un mato fusti yoimisi nanfo nantifi yorafo cayacafi ato yoisharacahuun.

²⁸ Ascasho mato rutupaifiaifoanno ratuyamacahuun. Mato rutufiatirofocai maton yoshin tsoan ahuusca huatiroma. Ascacun atoqui ratucaquimarocon Dios fustiqui musucahuun. Nantofin noco rutufain nocon yoshin omitsiscapanacafo muran potatiroquin.

²⁹ Ascano tsitsipio rafu inanmitsashon toro fustistaraca fitiro. Ascafia mato Upa Diosin asca huapayamaquicai fustishta namatiroma.

³⁰ Diosin nantifi tapicoian. Nocon foori tanan huani.

³¹ Ascashon Upa Diosin tsitsipiofo shinanmisi cuscan fasi mimacai mato shinanfainiquin. Ascacun ratuyamacahuun. Matocafin tsitsipio aca finonmafain Diosin matohuun noiquin. Cushushon mima huaquin mato cushusharamisiquin.

Yorafoan ointaifi, –Jesús uhuun Iforan, –huaa

Lc 12.8-9

³² Ascano yorafoan ointaifi, "Jesús uhuun Iforan," ishon ato yoiain uhuun Upa Dios nai muran icanoshori ahuun ointaifi, "Naafin uhuun yoraquin," ishon un yoishquin.

³³ Ascafia tsoan yorafoan ointaifi, "Jesús uhuun Ifomaran," ishon yoiain. Nantocai ua icoinra huamisima. Nanscarifi huaquin uhuun Upa Diosin nai muranshon ahuun ointaifiri "Nacai uhuun yoramaran," ishon un yoishquin.

Jeshuunoacai yorafoan anorisi shinanfoma

Lc 12.51-53; 14.26-27

³⁴ Man shinanmun nantifi manifi anoafu uhuunoashu unimanonfo un oni. Ma. Ascaramafiqui. Un mato yoiain cuscaicai tsoan nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahua chaca futsafosi shinancani.

³⁵ Ascashon apa ua icoinra huaino furumun ua icoinra huashuma apaqui sinatiro. Ahuanri ua icoinra huaino ainfacun ua icoinra huashuma ahuaqui sinatiro. Ahuun yayan ua icoinra huaino ahuun raru ua icoinra huashuma ahuun yayaqui sinatiro. Un nai murannoashu matoqui oyamanicai tsoa ascacuanafoma.

³⁶ Nanscarifi aqicai tsoan nannorifosi uhuunoa shinancanima. Ascano tsoan ua icoinra huacun ahuun yoracoiffoan nan noicasmatirofo.

³⁷ Ascun tsoan ua finonmafain apa yafi ahua noiashucau uhuun yora itiroma. Nanscarifi tsoan furu yafi ainfacu ua finonmafain noiashucau uhuun yora itiroma.

³⁸ Ascun unfin mato ihui coyan iquinanquin nashoshquicain. Ascafia tsoan yoiqui isca huaima, "Natian un Jesús tana. Ascacun nai omitsiscafiaquicai un shinanchacaimaran," ishon tsoan anori yoicasmaicai uhuun yora itiroma.

³⁹ Ascashon tsoan shinanqui isca huai, "Un Jesús tanaiton raca ua omitsisca huacanicai," ishon shinanqui uhuun tsain cachiquiri huashu nanscara yorafo naashu omitsiscapanacafo. Asca tsoa uhuunoashu omitsiscafiaqui ua potama nanscara yorafori naashu ufu isharapacunacafo.

Ahuara shara noco Diosin inain cuscan

Mr 9.41

⁴⁰ Ascano ratoranfoan mato nicaifain mato shara huaifo. Nanfoanfin nan uacoin shara huai cafisca mato huacanicuin. Nanscarifi aquin tsoan nan un yoiain cuscan nicacoin yafi nan ua nichini uhuun Upa Dios nicacoin cafisca huaiquin.

⁴¹ Ascashon tsoanri Diosin tsain yoimisi ahuun tsain nicacoinfain shara huacun Diosin nanrifi nan ahuun tsain yoimisi inanshara cuscan huaquin nan shara huari inansharashquin. Ascashon nan Dios tanamisi yora shara futsan ahuun tsain nicasharafain shara huacun, Diosin nan a tanamisi inanshara cuscan huaqui nan shara huarifi inansharashqui.

⁴² Ascano tsoan ua rama icoinra huashon ua tanaiton futsan a shara huaqui unu matsi ayamacun. Ascacun Diosin arifi a futsa shara huaa. Ahuara shara inanshquiain cuscaai funotiromaran, —ishon Jesús noco yoini.

11

*Nan Juanpan ato unu muran iquimapacumisiton a tanamisifo Jesusqui nichini
Lc 7.18-35*

¹ Ascatan non afu rafumisifo doce noco yoiqui anaititan pushurasi futsafo ano Jesús noco iyoni. Nannoafori ato yosifain ato tapimaicai ahuuscashumain non Dios fu ipatiroquin.

²⁻³ Ascano nantianri Juanpan nan unu muran ato iquimapacuni ranushumuafonununu muran iquimanifo. Nan muranshon Jesús acái cuscan nicaquin ahuunoo fasi tapisharapaíqui. Nan unu muranshon a tanamisifo nichini Jesús yocanonfo. Ascano nan Juanpan ato yonoo cuscan focashon Jesús yocaquin isca huanifo, —¿Iconmun nan minmun nan non manamisi iyamarai futsa raca non manaicai? —ishon Jesús yocanifo.

⁴ Ascaiton Jesús ato cumaquin isca huani, —Nan man nica cuscan yafi man oian cuscar Juan tapimatacahuun.

⁵ Yora fushocoinfo un ato cayahua afanan oinsharanonfo. Nipaiqui ranainfori un ato cayahua nisharanonfo. Ato yoratisho coyo cuscara tocoi futsafofori un ato caya huaa afanan imisi cuscan ato nami shara inonfo. Pastocoinfori un ato cayahua nicasharanonfo. Man yora naacoinnafori un afanan ato funimana. Ascashon ahuuomafori tsain shara un ato yoifafainmisi ahuuscashumain Dios fu ipatirofoquin.

⁶ Ascatan tsoan ua icoinra huacoinshon ahuara futsa shinainma. Nan cuscara yorafofin unimacointiroquin. Nannori ua Juan yoishotacahuun, —ishon Jesús ato yoini.

⁷ Ascatan man foafono Juanhuunoo Jesús nanno niafo ato yoini, —¿Ahuuscái tsoa istaipama ano Juan oin focani fonifomun? Juancai nan faca tahua pui ninhuun focufocu acái cuscarama. Nanscarifiai man man tapia Juancai nocofunu ointi ranainyama.

⁸ ¿Ascacun ahuuscái Juan oinpai man fonimun? ¿Man shinanmun a nocofunun sahuuti sharacapa sahuucun oin foi man foní? Ma. Juanpacái sahuuti sharacapacoin sahuumisima. Niaifofoanfin aton pushu muranshon sahuuti sharashtacoin sahuutirofoquin.

⁹ ¿Ascán ahuuscái oinpai man fonimun? Man shinanra Diosin tsain yoimisi Juan oincai man cani. Ascafia nan icon. Juanpan Diosin tsain yoimisifia nanton yoimisi cuscaai tsoa futsafoan anori yoimisima.

¹⁰ Ascacun nanhuunoo Diosin tsain cununi isca huaquin,

“Min nai ariashu mai ano fotoataima iquisi uhuun tsain yoimisi un nichiqui tau huai. Mihunoo ato yoiaino itisharashon mia nicanonfo,”

ishon cununi.

¹¹ Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara yoyomisima. Ascafia Dios niaifo icanoafoan yoisharatirofo cuscaai Juanpan nicayamafain nanfoan oianfo cuscaricai Juanpan oinyomisima. Ascashon nantifi Dios icanoafoan Juan finoanfo.

¹² Nan Juanpan ato unu muran iquimapacunitian nantianri yorafo Dios icano fasi iquipaicoincani. Ascashon shinanqui isca huafo, “Diosin niaifoan ahuun yora urifi un ipai afu nipashquin. Ascacucái ahuashtaton ua nitun huatiroma un ahuun yora icaiton,” ishon shinancani.

¹³ Diosin tsain yoishomisifo futan Moisés cununi cuscan yoiquin isca huanifo, “Nan nocon numamisi noco niaifo oshquiran,” ishon yoinifo. Ascán natian Juanrifi man matoqui nocoo ahuunooari mato yoishquin.

¹⁴ Nanfoan cununifo cuscan icoinra huashon man tapitiro Juan arifi Diosin tsain yoimisi nan Elías cuscara. Ascacun Diosin tsain yoimisifoan cunuqui isca huanifo, “Un matoqui Elías nichishquiran,” ishon Diosin yoini. Ascán nanfin Juanquin.

¹⁵ Manmain ua nicatiroquin ua nicacahuun. Uhuun tsain maton nomuran nanushcaquin.

¹⁶ Ascashon natian niyoafo ahuu cuscarafomainquin un mato yoi man tapinon. Nanfofin nan facu cashumisifo cuscarafokin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafokin.

¹⁷ Nan facu cashumisifoan yoitirofo isca huaquin, “Man non shainti manufiainocai monopaicanima. Fanainca omitsiscati cuscara non fanaifainocai man uaipaimaran,” ishon nan facu cashumisifoan yoitirofo.

¹⁸⁻¹⁹ Nanscarifi aquin nanfoanri Juan yafi uqui tsain chipufafaini. Ascafia Juanpacai piqui tunufain fimi unu pau ayamisima. Ascacun ahuunooa yoiqui man isca huamisi, “Juan nisocoin. Yoshin chaca ahuun nuaran,” ishon yoimisifo. Asca unfin pii sharafain un aya sharamisiquin. Ascafia uhuunooari yoiqui isca huamisifo, “¡Cuu! Jesús pitsicoin fasi ichapari ayatiroran huafain Roma anoa niaifo puifishomisifo yafi yora chacafo furi rafuiran,” ishon uhuunooa chaca yoimisifo. Ascafia nanfoanri yoiqui isca huamisifo, “Tsoamain shinansharafain icaquin non onantiro. Nan yorafin isharacoianquin shinansharamain huaifin,” ishon nannori yoimisifo. Nannori yoifiaquicai uhuunooa ascara yoipaimisifoma. Ascatarocon uqui tsain chaca fusti huamisiforan, —ishon Jesús ato yoini.

Pushurasi anofo nicayosmashunifo

Lc 10.13-15

²⁰⁻²¹ Ascano ato yoiqui anaititan Jesús nan pushurasi anofo ato yoiqui isca huani, —¡Ohua! Man Corazín anofo yafi Betsaida anofoan man chipo fasi omitsiscái. Tsoan oinyomisima cuscara shara un mato ismafiano mancai chaca shatupaima. Ascan nan Tiro anofo yafi Sidón anofori un mato isma cuscan un ato ismaiton nanfoan aton chaca shatucuanafa. Ascasho yoicuanafa isca huaqui “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafa.

²² Ascafia Diosin nantifi icoinra huamafo onaintimaitian nan Tiro anofo yafi Sidón anofoari onaintimafiaquicai mato onaintimaquin finai cuscan ato huaima.

²³ ¿Ascán man Capernaum anofoan man shinanmun man nai muran Dios ari foicai? Ma. Omitsiscapanacafu muranrocon mato potai. Tsoan oiyomisima cuscara shara un mato ismafiaitocai maton chaca man shatupaima. Ascan nan un mato isma cuscan Sodoma anofo un ato ismaiton aton chaca shatu cuanifo. Tsoaricai cuyocuanama. Nantianri aton pushurasi icuana.

²⁴ Un mato yoi. Diosin nantifi icoinra huamafo onaintimaitian nan Sodoma anofoari onaintimafiaquicai mato onaintimaquin finai cuscan, —ishon Jesús noco yoini.

Uqui fucahuun. Un mato ointi fiananan huashonon man afanan shinanchacanoma

Lc 10.21-22

²⁵ Ascano ato yoiqui asca huatan Jesús apa cufini, —Upa Diosin, min fasi sharacoin. Nantifi nai murannofo futan mai anofoan aton Ifofin minquin. Ascano nan mapo sharayafu yafi cunu tapiafocai min tsain shara min ato tapimananama. Ascafia nan cunu tapiamafishon un ato isma cuscan un ato yoiai cuscan ua icoinra huafo. Nanfofin min ato tapimanaquin.

²⁶ Icon, Upan, minfin nanscara fuchipaiaqui, —ishon apa yoini.

²⁷ Ascashon Jesús afanan ato yoiquin isca huani, —Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aqui urus fusti Upa Diosin un onancoian. Nanscarifi aqui urifi un futsafo Upa Diosihuunooa onanmanai cuscan nanfoanri Upa Diosin onantirofoquin.

²⁸⁻²⁹ Ascacun uqui fucahuun ua tapishashcaquin. Unmain ahuu cuscaraquin un mato tapimai. Unfin yorafohuun ramapaimisiquin. Uhuun nomuranricai un ahuashta shinanchacayamafain un isharacoin fustimisi. Ascashon un mato yonomapaiyai cuscaai curushma. Nanricai ahua ihuuma. Ascacun maton nomuran ihuucoin mui uqui fucahuun un maton ointi fiananan huashonon man afanan shinanchacanoma.

³⁰ Ascano uqui oshon man mutiro un mato curush yonomaima. Ascatarocon ua tanasharacoinyashu mato ointi fiananan huashon man isharacointiroran, —ishon Jesús ato yoini.

12

Jesús fu rafumisifoan tunutitian trigo fimi mutusnifo

Mr 2.23-28; Lc 6.1-5

¹ Ascatan Israeliofan aton tunutitian Jesús yafi afu rafumisifo mau mamaqui focaquin trigo mutuscashon fonaincoinaquin piyaifoan.

² Oincaquin Fariseofan Jesús yoinifo, —¿Ahuuscai nocon shuni Moisés yononi cuscaai minhuunshon tapimisifoan nicapaicanimamun? Tunutitian trigo mutuscaniran, —huaifoan.

³ Jesús ato cumaquin isca huani, —¿Davidhuunooa cununi cuscan man man oinmisimun? ¿Fonainquin nocon shuni David ahuun yorafa futan ani cuscan man man nicamisimun?

⁴ Dios fu tsainti pushu muran iquicaishon amurannoa misifo ato piquini fasi fonicoinquin. Ano tushu futsa yamaino. A misifofin nan Diosin tsain yoimisinafosi iniquin. Tsoa futsacai a misi pitiro inima. Nannori yonofianifo fasi fonicoinquin David afu rafuafo futan pini.

⁵ ¿Ascashon Moisés cununi cuscari man man oinmisimun? Cunuqui isca huani, “Dios fu tsainti pushu muranshon tunutitian ahuun tsain yoimisifoan yonotirofo. Nanfoan yonofiaquicai ahua chaca huacanimaran,” ishon Moisés cununi.

⁶ Ascatan un mato yoi. Dios fu tsainti pushu fasi sharashtafia uncaifin fasi shara finacaiquain.

⁷ Upa Diosin yoini cuscan cununi isca huaquin, “Man ua inafo rutushomisi un maton chaca soashonon. Nan sharafia man futsafohuun ramapaiquin man ato shara huai. Nancaifin fasi shara finacaiquain. Nan fusti un fasi fuchipairan,” ishon yoini. Ascacun nan tapicoishocai man ufu rafumisifohuunoa yoicuanama, “Nanfoan chaca huaforan,” ishon. Afoantsi ahua chaca huacun.

⁸ Uafin uhuun Upa Diosin catonniquin. Ascacufin urusu fusti un yoitiro ahuamain tunutitian man huatiroquin, —ishon Jesús ato yoini.

Nocofunu mucu musufiquia

Mr 3.1-6; Lc 6.6-11

⁹⁻¹⁰ Ascatan Jesús Israelifoan aton ichananti pushu muran iquini. Nanno iquishon ato yosiaino nantianri nocofunu musufiquiaton arifi nicani. Ascano nan Fariseofoan Jesushuunoa ahua chaca yoipaicaquin nan yocanifo. —¿Nocoan shuni Moisés yononi cuscamun tunutitian non yora caya huatiro yamarai non caya huamatiromanmun? — ishon yocaifoan.

¹¹ Jesús ato cumani, —¿Man chashoan ayano tunutitian quini muran pacucun man ihuiriscatiromanmun? Ma. Ascata ma manrocon ihuiriscatiro.

¹² Nanscarifi huaquin fasi noicoinquin nocofunuhuunoa tunutitianfiacun non shinantiro. Moiséscai noco yononima tunutitian non yora cayahuanonma, —ishon ato cumani.

¹³ Ascashon nan nocofunu musufiquia yoiqui isca huani, —Mushahuun, —huaino. Mushatanaino nantian ahuun mucu muma sharacoin iriscatani. Nan ahuun mucu ocuma futsa cuscara shara ini.

¹⁴ Ascaiton oincanashu Fariseofo focashon shinannifo —¿Ahuuscashomun non Jesús achitiroquin rutushquin? —icashu yoinannifo.

Upa Diosin ahuun facucoin catonni ahuun oinmati cuscara inon

¹⁵ Jesús tapitan a rutupaiaifoanno anoashu cani. Yorahuanrasinon mufainifo. Ratomain isinincai nanfo cayahuamani.

¹⁶ Ato cayahuatan ato yoini, —Uhuunoa tsoa yoiyamahuu, —ato huani.

¹⁷ Nannori ato yoi Isaías cununi cuscan icocoin inon.

¹⁸ Isaíasin Diosin tsain cununi isca huaquin,

“¡Oincapon! Naquian uhuun oinmati cuscara un catonni. Un fasi ahuun noi. Un aquí unimacoin. Uhuun Yoshin Shara un afu rafumamisi. Nan manifoti uhuun tsain nicasharacun atorifi aton chaca yama huashotiro uhuun yora inonfo.

¹⁹ Acai yora futsa fu fochishmanantanainma. Tsain isininpaton yoishquima.

²⁰ Nan yora omitsiscái afanan tunutirofoma ato potaima ato cushusharai tunumashquin. Tsoan icoinra huapai ato yoisharashquin icoinra huacoinonfo. Ascán huaino afanan mai ano oaitian nantifi chacafoti unumashquin ahuunshon nantifi ishara fustisinonfo.

²¹ Nantifi manifoti ahuunoa nicaquin isca huacani shinanshcaquin, ‘Nan fustiton noco numatiro non ahuunoashu Upa Dios fu nipanon,’ ishon yoishquicaniran,” Isaías cununiquin.

—Satanashuunshon Jesús yoshin chacafo potairan, —ishon yoinifo

Mr 3.20-30; Lc 11.14-23; 12.10

²² Ascatan nocofunu fusho icain tsaintiroma. Ahuun nuushon yoshin chacanun tsainmapaonima nan Jesusqui ihuunifo caya huanon. Ascacun Jesús nan nocofunu afanan oinmasharafain tsainmani.

²³ Ascaiton oincani mustaiaricatan afiranan yoinancaquin yoinifo, —Jesús ahua-mamishiti shara huatiro. Asca nan naraca David ahuun funa. Nan Upa Diosin catonni, —ishon yoinifo.

²⁴ Ascaifoan nicaquin Fariseofoan yoinifo, —Ma. Atocai Upa Dioshuunshon yoshin chaca potama. Yoshin chacafoan aton niaifo Satanashuunshon yoshin chaca yorafohuunoa potatiroran, —ishon yoinifo.

²⁵ Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotiromo. Nanscarifiai pushurasi anoa icafo iyamarai pushu fusti muran icafo afi ranan chaca huatananfafaincani pashcanantirofo afanancai tsoa anosi itiro.

²⁶ Nanscarifiai Satanás niaifoan afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itirofoma.

²⁷ Ascafia manfin yoimisiqui Satanás curushhuunshon yoshin chaca potaran ishon man yoimisiquin. ¿Un asca huaino tsohuunshon mato yorafoan yoshin chacafo atomaquinoari potafomun? Ascacun nanfohuunshon man tapitiro man uhuunoa amaquiri shinanchacai cuscan.

²⁸ Un Diospan Yoshin Sharahuunshon yoshin chacafo atomaquinoa potaino maton Numamisi Diosin catonni cuscan matoqui nocoa.

²⁹ Afanan mato yoi nicasharacahuun. Ahuuscashomain yorafoan nocofunu mutsisipaton ahuun pushu cushu ano ahuun mafo onutiroma. Ascafiaino finoncaia aqui nocoshon achifain munushquin ahuun mafofo cuyonfiatocai ahuusca huatiroma.

³⁰ Tsoan unfu rafupaiquima ua nicacasmai. Tsoan uhuun tsain nicacasmaifin ua noicasmaiquin.

³¹ Ascano un mato icon yoiquin. Ratoran ahuara chaca huai Diosquiri Upa Diosin rau huashotiro. Ascafia ratoranton yoia isca huaquin, “Nanton aca cuscan Satanashuunshon acaran,” huafishu Diospan Yoshin Sharahuunshon aca. Nanton Diospan Yoshin Sharahuunoa tsain chaca huua. Asca huacun Upa Diosin ahuun chaca rau huanacama. Ahuun chaca ahuun nuupacunaca.

³² Tsoan ua chaca huafin un ahuun chaca rau huashotiroquin. Ascan tsoan Upa Diospan Yoshin Sharaqui tsain chaca huacai Upa Diosin rauhuanacama. Ahuun chaca ahuun nuupacunaca. Natian naitianri ahuun chaca ahuun nuupacunaca.

Fimi fana ahuun fimihuunshon non onantiro

Lc 6.43-45

³³ Ascano shinancapon. Fimi fana naman non orosharaino fana foaisharatiro. Ascashu ahuun fimirifi sharacoin itiro. Ascan non fana naman oroamacai fana foaisharatiroma. Ascashu ahuun fimiri chacacoin itiro. Fimi fana ahuun fimihuunshon non onantiro ahuu cuscaramainquin.

³⁴⁻³⁵ Nanscarifiai nocofunu sharapan ahuun nomuranshon ahuara sharafosi shinain cuscan ahuun tsainrifi sharacoin itiro. Nanscarifiai nocofunu chacapan ahuun nomuranshon ahuara chacafosi shinain cuscan ahuun tsainri chacacoin itiro. Ascano nocon ointi muranshon non shinain cuscan nannoricoi non yoitiro. Ascan manfin nan rono paupaton facu cuscarafocoin. Ascacun ahuuscashotsi chacacoinfiashon man ahuara shara yoitiro.

³⁶ Ascacun un mato yoi. Ratoran shafatan Diosin nantifi yorafo ichanan huaitian ato yoipacushqui ratotonmain icoinra huamisi iyamarai icoinra huamisiamaquin. Nantianri ahuashta shinantama yoimisifo cuscan ato puashoshquin.

³⁷ Ascashon man niyoano nantifi man yoimisi cuscan Upa Diosin mato nicamashquin. Ascan mato tsainhuunshon man afu ipatiro iyamarai mato omitsiscapanacafu muran mato potairan, —ishon Jesús ato yoini.

—Tsoan atiroma cuscan noco ismahuu non mia icoinra huanon, —ishon yora chacafon Jesús yoinifo

Mr 8.12; Lc 11.29-32

³⁸ Ascaiton Fariseofo futan Moisés cununi cuscan tapimamisifoan yoinifo, —Tapimamisiton, tsoan atiroma cuscan noco ismahuu min Dios ariashu oa non mia icoinra huanon, —ishon yoiaifoan.

³⁹ Jesús ato cumani, —Manfin chaca shinanfain Dios cachiquiri huamisiquin. Ascacun tsoan atiroma cuscan noco ismahuu ishon man ua yoia. Ascafia nan Diosin tsain yoimisi mato shuni Jonás ani cuscacoin un chipo mato ismaiton nan fusti man oinshquin.

⁴⁰ Jonás shimanoan shaqui muran osha rafu non fusti yoni cuscan. Nanscarifiai un Diospan Facu mai muran osha rafu non fusti un iyoshqui.

⁴¹ Ratoran shafatan Diosin nantifi yorafo ichanan huaitian ato yoipacushquin ratotonmain icoinra huamisi iyamarai icoinra huamisiamaquin. Ascaino nantianri Nínive ano ipaonifoan matohuunoa yoishcani isca huacaquin, “Jonás noco Diosin tsain yoini cuscan non nicacoinshon nocon chaca shatucoinshon non Dios icoinra huani. Asca man manfin Diospan furucoin nicafishocai maton chaca man shatumisimaran,” ishon mato yoishquin. Nan icon un Jonás finonfiacucai man ua nicapaimisima.

⁴² Nanscarifiai Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafu muran foshquicaniqui. Ascaino nantianri nan

ainfo Sabafoan ato niaifo ipaoniton matohuunooa yoiquin isca huashquin, “Salomón tapicoian cuscacai tsoan futsan tapipaonima. Ascacun ahuun tsain nicapacoian un aqai chaicunoashu cani. Ascan mancai nan Diospan Furun nicapaima. Ascataमारोcon man nicacasmaपाoniran,” ishon matohuunooa yoiashquin. Nan icon Salomón tapicoian ipaonifia uncaifin fasi Salomón finoncoinfia un mancai ua nicapaima.

Yoshin chaca afanan yoraqui nasotiro

Lc 11.24-26

⁴³⁻⁴⁴ Yoshin chaca nocofunumaquinoashu cai tsoan istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuhuun ipaoniquin. Ascacun un afanan aqai nasoiran,” ishon shinanni. Ascatan aqai nocoshon oian tsoa futsacai afu rafua inima.

⁴⁵ Ascacun nan yoshin chacanun afu yoshin chacafo siete ato ihuuni nan fasi chaca finacai fo. Ascashon ato yoiqui isca huani, “Nocofunu un mato ismai non ahuun nomuran iquitiroan,” ishon ato yoini. Ascatan aqai focanashu iquicainifoanno nan nocofunu fasi mimacai chacacoin ini. Manmain aqai rananri focun. Nanscarifiai maton shunifoan chaca huafiapaonifo mancaifin fasi chaca huaquin finacoianquin, –ishon Jesús ato yoini.

Jesús ahua yafi ahuun ushtofu

Mr 3.31-35; Lc 8.19-21

⁴⁶ Ascatan Jesús yorahuanrasi yoi tsaincai muran ahua yafi chipocufu noconi. Ascano aqai iquishon ahua yoi paifiaquin chifishon mananifo.

⁴⁷ Ascaiton futsan yoini, –Min uhua futan ushto rananun chifi nishon mia ahua yoi paifuaforan, –ishon yoiaiton.

⁴⁸ Jesús cumani, –Un mato tapimai ratofomain uhuun uhuafu yafi uhuun ushtofuquin, –ishon yoini.

⁴⁹ A tanamisifo oinyacuquin ato yoini, –Nafofin uhuun uhua cuscarafu yafi uhuun ushto cuscarafuquin.

⁵⁰ Nan uhuun Upa Dios nai ari icaton ato amapaiyai cuscan huaifo nanfofin uhuun ushtofu yafi uhuun chicofo non uhuun uhuafuquin, –ishon Jesús ato yoini.

13

Fimi ushu saacaihuunooa cuscara ato Jesús yosini tapinonfo

Mr 4.1-9; Lc 8.4-8

¹ Ascatan nan shafatari Jesús pushu murannoashu cai ian cusumun tsaoni.

² Ascaino aqai yorahuanrasi funifo ahuun tsain nicapai cani. Ascaino shasho muran nanuinacahuan ahuun cusha camaqui tsaoshon ato yoini.

³ Ascashon ahua futsahuunooa cuscara ato yoini ato tapimashquin. Yoini isca huani, –Nocofunun ahuun noshati murannoa fimi ushu fishon ahuun mau mamaqui saani.

⁴ Saacano ushufo fai nushmancayan pacua puiyafuquin piinifo.

⁵ Ascano ushu ranan toquiri camaqui pacua mai ichapamashta anoashu samamashta ushu foaica.

⁶ Fari tsacaqui yositimahuaino man naa. Ahuun taporicai chai foama ini. Ascashu fanafu nai cuyoa.

⁷ Ascaino ushu rananri tasha murannoashu foaifishucai ushu futsa foaisharanima.

⁸ Ushu rananri mai shara ano saaca nan mai sharanoashu nantifi foaisharashu fimi ichapayacoian ini. Futsa cien fimiya icaino futsa sesenta aya icaino futsari treinta fimiya ini.

⁹ Ascan manmain ua nicatiroquin ua nicacahuun uhuun tsainri maton nomuran nanucoincahuun, –ato huani.

Ahuuscaquimun futsafu yoi fashon Jesús afu rafuafosi shafacafi ato tapimaniquin

Mr 4.10-12; Lc 8.9-10

¹⁰ Ascaino non afu rafua aqai fucashon yocanon, –¿Ahuuscacai shafacafi ato yoitama ahuahuunooa cuscara min yorafo ato tapimashquinmun? –ishon non yocani.

¹¹ Jesús ato cumani, –Ahuuscashomain Upa Diosin ahuun yorafo iquiniquin mato fusti tapimai. Ascan nafocai ato tapimaima.

¹² Ascan tsoan Diosin tsain nicasharafain ahuun nomuran nanucoian naanfin Upa Diosin paratamari tapimashquin. Ascafia tsoan ichapama tapifashon Diosin nicasharaya-mafain nan yoi cuscan aima nanfin funoshquiquin.

¹³ Ascacun nan yorafo un ahua futsahuunooa cuscara un ato tapimashquin oinfacashon tapinonfoma. Nicafiaquiri tapinonfoma.

¹⁴ Nannori Isaiás nan Diosin tsain yoimisi ipaoniton atohuunoa inon pacoai yoiqui isca huani,

“Man nicafafaifiaquicai Diosin ato yoiai cuscan tapinacafoma.

¹⁵ Nan yorafoan aton ointi curushcoinyashu nicayosmashunifo. Diosin tsain man nicamisifiashu nan nicama cuscarafoma. Uhuun yonoshara oinfiacani nan futsoi cafiscaafoma. Ascashon un ato isma cuscan oianfoma. Ascayamacanashu uqui fucuanafoma un ato chaca soashonon uhuun yora sharafo iishcaqui,”
ishon Diosin yoini cuscan Isaiasin cununi.

¹⁶ Asafia nannori Isaiás cunufiani mancai ascarama. Ascatamarocon un mato oinmana cuscan man icoinra huafain un mato yoia cuscan man nicacoinmisi. Ascashu maton nomuran man unimacoinna.

¹⁷ Un mato icon yoi. Man oian cuscaai uhuun Upa Diosin ahuun tsain yoimisifo futan a tanamisi futsafoanri fasi oinpaifiaquicai tsoan oinpaonima. Un mato yoimisi cuscan fasi nicapaifiaquin tsoan nicapaonima.

Fimi ushu saamisihuunoa yoifiafashon shafacafi afu rafuafoma tapimani

Mr 4.13-20; Lc 8.11-15

¹⁸ Nan fimi ushu saamisihuunoa un ato yoia cuscan natian shafacafi un mato tapimani. Ascacun ua nicasharacahuun tapisharashquin.

¹⁹ Ascan nan Dios ahuun yorafo iquinai cuscan nicafiafashon tapiama. Nanfofin nan ushufo fai ano pacua cuscarafquin. Diosin tsain ato nomuran man nanufiafo nan yoshin chaca Satanás atoqui oshon nicafo cuscan ato fiatiro afanan afohuunoa shinanonfoma.

²⁰⁻²¹ Ascano futsafoanri Diosin tsain nicaquin tau huai unimacoinyofiafashu samamashta ahuun tsain cachiquiri huua. Ascan nanfofin nan ushufo toquiri camaqui pacua cuscarafquin. Nanfori nan ushufo toquiri camaquinoashu foaifia ahuun tapo chai foama. Samamashta nai cuyotiro. Nanscarifiai nanfoancai Diospan tsain aton nomuran nanu sharafofoma. Ascashon ahuara chaca finonyamarai futsafoan ato omitsisca huaino samamashta Dios cachiquiri huatirofo.

²² Ascan ushu futsafo moshafoma muran pacuashu foaisharatiroma. Nanscarifiai futsafoan Diospan tsain nicafiafashon ahuara nan acai cuscan fustisi shinain. Ascashon pui ichapa yafi mafo ichapa noi afi paramuquicai afanan Dioshuunoa shinantiroma. Ascaquicai Diosin ato amapaiyai cuscan futsafo shara huatiroma.

²³ Ascafiiaquin ushu futsa mai shara ano saacano foaiquin yosiashu fimi ya itiro. Nanscarifiai futsafo Diospan tsain nicafain tapicanashu nan yoia cuscan aafoma. Ascashon nanfoanfin futsafori Diospan tsain yoiquin icoinra huamatirofoquin. Futsan treinta iyamarai sesenta iyamarai cien yorafo icoinra huamatiroran, —ishon Jesús ato yoini.

²⁴ Afanan Jesús ato tsain futsa yoini tapinonfo. Isca huaqui, —Diosin nantifi iquinano nanscarifi aquin nocofunun ushu sharafo fana.

²⁵ Fana sharafofashu ahuun noicasmamisiton yamu ahuun mau ano caa. Mau ifo ahuun oinmatifo oshano noicasmamisiton tashafori mau ano fana. Fanatan mau anoashu caa.

²⁶ Chipofin nan ushu shara foaicaino tashafori foaini.

²⁷ Ascano aqiu fucashon mau ifo ahuun oinmatifoan yoimifo, “¿Ifo, min ushu shara min mau ano fanamamun? ¿Ahuuscainun natian tashafori foaicaquin?” ishon yocanifo.

²⁸ “Noco noicasmamisiton acaran,” huaiton. “¿Ascan nan tashafoma non tsucaifotiromun?” huaifoan.

²⁹ “Ma. Man tasha tsucaino nan fana sharafori tsucapayamafiaquin man afori tsucatiro.

³⁰ Nanscanonquin. Chitunmisitian tashafoma yafi fana sharafori foaitiro. Nantian un mau yonomisifo yoishquin isca huaquin, ‘Iquisi nan tashafoma tsucacahuun. Nantifi nusharahuun coashquinon. Asca huatanfin nan fanasharafori uhuun tapasi muran ua fushotacahuun,’ ” mau ifoan yoianan, —ishon Jesús ato yoini.

Mostaza ushuunoa Jesús ato yoini

Mr 4.30-32; Lc 13.18-19

³¹⁻³² Ascasho Jesús mostaza ushuunoa ato yoini ahuara futsa ato tapimashquin. Ato yoiqui isca huani, —Nocofunun ahuun mau ano mostaza ushu fanani. Rato fimi ushu futsacai mostaza ahuun ushu uhuapamashtatioma. Asafia foaica fasi cuya itiro. Rato pushu umainti fimi charo fanacai mostazatioma. Ihui noconan rafutiro. Ascatan yosiano puiyafoma ahuun tushpahuu tsaotiro. Nanscarifiai Diosin ahuun yorafo iquisi fustirasi ifiafashu chipo paratama caitioran, —ishon ato yoini.

Jesús misi farashatihuunoa ato yoini nanhuunshon Diosin nantifi yorafo iquinai cuscan tapinonfo

Lc 13.20-21

³³ Ascan Jesús ahuara futsa ato yoini Diosin nantifi yora iquinaí cuscan tapinonfo. Afanan ato yoiqui isca huani, —Diosinmain ahuun yorafo ahuusca huatiroquin un mato tapimai. Diosin ahuun yorafo nantifi ato iquifain ato yonotiro. Ainfoan farashati ichapamashta harinaya osishon camisonano farashinitiro. Nanscarifiai Diospan yorafoan nan icoinra huamafo muranshon nantifi ato shara huatiro, —ishon ato yoini.

Jesús ato yoiai cuscan ahuara futsa tapinonfo

Mr 4.33-34

³⁴ Ascatan ahuarahuunooa yoiqui Jesús ato yoini tapinonfo.

³⁵ Nannori Diosin tsain yoimisiton nan Jesús yoinon pacoai cuscan cunuqui isca huani, “Un ato ahuara futsahuunooa ato yoi ato tapimashquin. Upa Diosin nantifi onihuani chain tsoan ascara nicayomisima cuscarafu un ato yoishquiran,” ishon yoini cuscacoin man aa.

Trigo yafi faasi foaitirohuunooa Jesús shafacafi ato tapimani

³⁶ Ascatan yorahunrasi anoashu cai pushu muran iquini. Ascano non afu rafuafu aqui caashon non yocani, —Ifon, min trigo muran faasi foaitirohuunooa yoia cuscacai non tapiama. Shafacafi noco yoihuu non tapisharanon, —ishon non yocani.

³⁷ Ascaiton noco cumani, —Diosifi ua nichiniquin. Un nan ushu fanamisi shara cuscara inon.

³⁸ Nan maufin nantifi manifotihuunooaqui. Ascan nan ushu sharafofin Diospan yorafohuunooaquin. Ascan faasifin icoinra huamafona nan yoshin chaca ahuun yorafoquin.

³⁹ Ascan nan mau ifo noicasmamisi nanfin Satanasquin. Ascan nan fana fiaifotianhuunooafi nan manifoti cuyotirohuunooaquin. Nan fana fimisfofin Diospan oinmatifo afu nai muran icafo.

⁴⁰ Nan faasi mushashon coafo cuscan huaquin. Nan manifoti cuyoaitian.

⁴¹ Uhuun oinmatifo ufu nai muran icafo un nichishquin nantifi futsa chaca huamamisifo yafi nan chaca huafafainaifo uhuun yorafomaqui ato pashcascani.

⁴² Ascashon nan omitsiscapanacafo chi urumanhuan muran ato potano nannoashu fasi uaicani omitsiscacoinshecani.

⁴³ Ascaino nantianri Diospan yora shara icoinra huafoti aton Upa Dios icanoashu fari chasha cuscarafu. Ascacun manmain ua nicatiroquin ua nicacahuun. Uhuun tsain maton nomuran nanuocincahuun.

Ahuara sharashta onuahuunooa cuscarafin ato yoini

⁴⁴ Nocofunu mai futsa ano caa. Nannooa ahuara sharashta paratama ahuun pui nuua fuchia. Ascan fuchishon nannori afanan onua. Ascashu fasi unimacoinquin nan aya cuscati inanmitsashon nannooa mai fia nan ahuarashta paratama ahuun pui nuuari ahuuna inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

Perla funoahuunooa Jesús ato ahuaro futsa tapimani

⁴⁵⁻⁴⁶ Diosin ahuun yorafo ahuu cuscaramainquin afanan un mato yoiqui isca huai. Mafo inanmitsamisi cahuanacaini macush cuscara perla oshopa sharashtafo funafoanfafaaini. Ascashon man futsa anoa fuchia ahuun pui paratama nuua fuchishon nan aya cuscati inanmitsashon ahuun rafanan nan perla fii ahuunacoin inon. Nanscarifiai Diospan yorafo nantifi aya cuscan afiri inanmutiro Dios fu ipashcaquin.

Nushutihunooa Jesús ato yoini ahuara futsa ato tapimashquin

⁴⁷⁻⁴⁸ Ascano nushumisiton ahuun nushuti uhuapa pochishon shiman futsa futsatapafo fiini. Ahuun nushutininhuan shiman fospiano unuhuan cusumun cashon nini funi. Ascashon nan shiman chacafo nushuti murannooa tsucashon potani. Ascanshon nan piti sharafosi shihuati muran nanuni.

⁴⁹ Nanscarifiai manifoti cuyoaitian Diospan oinmatifo afu nai muran icafo nococashon nan chacafo yafi sharafo pashcancani huashcani.

⁵⁰ Ascashon nan chacafoti chi urumanhuan muran ato potashquin nannoashu uaiqui fasi omitsiscapashanonfo, —ishon Jesús ato yoini.

⁵¹ Ascatan afu rafuafonon Jesús noco yocaiton, —¿Un mato yoia cuscan nantifi man man tapiamun? —ishon noco yocaiton. —Ai. Min noco yoiai cuscan nantifi man non tapiaran, —non huaiton.

⁵² —Ratoran futsafoan Moisés yononi cuscan tapimamisifo nan Diosin ahuun yorafo iquinaí cuscan tapiafo. Ascan nanfofin nan mafo inanmitsamisi cuscarafuquin. Mafo inanmitsamisiton yorafo nan yopafo cuscan inantiro. Ahuara shunifo iyamarai funa ato inantiro. Nanscarifiai tsoan Moisés cununi cuscan yafi un mato rama Diospan

yorafohuunooa tapimanai cuscan huafain marifi man futsafo tapimatiroran, —ishon noco yoini.

Jesús afanan Nazaret ano cani

Mr 6.1-6; Lc 4.16-30

⁵³⁻⁵⁴ Ascano noco yoia cuscan ahuara futsa tapinonfo anaititan Jesús nan pushconi pushurasi ano nasoni. Ascatan Israelifooan aton ichananti pushu muran iquishon ato yoiaiton ahuun tsain nicacani mustairicatan yoinifo, —¿Ahuuscai na nocofunun fasi tapi sharacoianmun? Tsoan atiroma cuscan huapaiquifin atiroquin. ¿Tsoanco Jesús ascara tapimanamun?

⁵⁵ Nanfin ihui sapa yonomisiton ahuun facuquin. Ahuun ahuan Maria. Ahuun ushtofori Santiago yafi José non Simón non Judas.

⁵⁶ Ahuun poifori no fu imisifo. Man nonfin Jesús onanquin. Aacai ahuama. ¿Ascán ahuuscashomun ahuamamishti huatiroquin? —icashu yoinannifo.

⁵⁷ Ascashon nannori ahuunooa shinanchacaquicai tsoan icoinra huapainima.

Ascaiton Jesús ato yoiqui isca huani, —Nantifi mai anoshon Diosin tsain yomisiton yoiái cuscan nicapaitirofo. Ascafia nan cainni anoshon fusticai tsoan nicapaitiromaran, —ishon ato yoini.

⁵⁸ Ascano nannoshon icoinra huaiyamaifooan tsoan atiroma cuscan fustirasi huani.

14

Juanpan yorafo unu muran iquimapacutan nani cuscan

Mr 6.14-29; Lc 9.7-9

¹⁻² Ascano nantian Herodes nan Galilea mai anoa ato niaifooan Jesushuunooa nicaquin ahuun oinmatifo yoini isca huaquin, —Nanfin Juanqui. Un tushtumayamua afanan man funia. Ascashofin Diospan curushuunshon tsoan atiroma cuscan huafafainiquin, —ishon ato yoini.

³⁻⁴ Herodes Juan rutumanataima yoiqui isca huani, —Niaifo Herodes, min ushto Felipe ahuun ahui min fia. Ascaquicai min shara huama. Nocon shuni Moisés Diosin tsain cunuqui isca huani, “Futsan ahui min fitiromaran,” ishon Moisés cununiran, —ishon Juanpan Herodes yoini. Ascaiton nicai Herodes fasi sinacoinquin ahuun ranushumuafo yononi Juan achishon cunu muran iquimanonfo.

⁵ Ascashon Herodes Juan ruturiscapaifiaquicai funa rutunima yorafoanmain Juan fuchipaiyaifooanfin. Ascashon nanfoanri yoinifo, —Juanfin Diospan tsain yomisiquin, —ishon ahuunooa yoinifo. Ascacun Herodes shinanqui isca huani, —Un Juan rutucun ua yorafoan asca huatirofan, —ishon shinanni. Yorafoqui ratuquin Herodes Juan cunu muran iquimafashocai funa rutunima.

⁶⁻⁷ Ascano Herodes cainnitian yorafo ichananni fuusishcaquin. Ascashu ichananfoanno Herodías ahuun facu shomaya arusu ato ointaifi mononi. Nan Herodías Herodes ahuun ushto ahui ini. Ascashu shomaya monoaino Herodes fasi unimacoinquin yoini, —¡Aicho! Min monoai cuscan un fasi miqumi unimai. Ahuarashta fipaiquin ua yoihuu un mia inanon. Diosin tapia un mia icon yoiaiton min fipaiyai cuscan un mia inantiroran, —ishon yoini.

⁸ Ascashon cashon shomayaton ahua yoini. Ascacun nan ahuan yoia cuscan nasocura niaifo Herodes yoini, —Juan nan yorafo unu muran iquimapacumisi tushtuhuu. Purato naratashon ahuun mapo ua inanhuun, —huaino.

⁹ Niaifon Herodes puusinima. Puusitama ahuun nomuran shinanqui isca huani, —¡Ohua! Un Juan tushtumapaima. Ascafia yorafoan un shomaya yoia cuscan man nicafo. Ascacun un asca huapaiyamafiaqui un aquicairan, —ishon shinanni.

¹⁰ Ascashon niaifooan ahuun ranushumua yononi, —Juan tushtushon ahuun mapo ua fushotahuun, —huani.

¹¹ Ascaino cashon ranushumaton Juan tushtushon ahuun mapo purato naratashon funi. Fushon niaifo inancun nan niaifooanri shomaya inanni. Ascano shomayaton arifi ahua inanni.

¹² Ascashon afu rafumisifooan Juan nicacani focashon ahuun caya mai huanifo. Ascatan focanashu Jesusqui chaninifo.

Jesús cinco mil nocofunufu pimani

Mr 6.30-44; Lc 9.10-17; Jn 6.1-14

¹³ Ascashon Herodes Juan tushtuma nicai Jesús shashon tsoa icama ano cani. Jesús caa nicacani pushufoti anoashu yorahuanrasiton naman mufainifo.

¹⁴ Ascashu nocoquin Jesús oian yorahuanrasi oin atohuun ramapaini. Nannoshori isinincái futsafo ato cayahuapacuni.

¹⁵ Ascano man fari caino non afu rafuafo aqui cashon non yoini, —Yorafo nichihuun. Man fari caiquin. Fonaincaniquin. Pushurasi ano yafi a chaima icafoanno ato nichihuun anoshon tushu huanonfo, —ishon non yoini.

¹⁶ Ascaiton noco cumani, —Ma. Noncai ato nichima. Mafirocon ato piimacahuun, —noco huaiton.

¹⁷ —Nonfin nuno misi siete yafi shiman rafu ayaquin, —ishon non yoini.

¹⁸ Ascaiton, —Ua fishotacahuun, —noco huani.

¹⁹ Ascashon yorahuanrasi yoini, —Nanno faasi camaqui tsaocahuun, —ato huani. Ascatan shiman rafu yafi misi mucu fustiti tsomashon nai ari foisinifoantan Apa Dios cufinquin, —¡Aicho! Upan, mihuunshon un ato pimai. Min fasi sharacoincun, —huatan. Misi torupacutan shiman rafu ya osishon noco inanni non ato pashcanan huapanon.

²⁰ Ascashon picani mayancoinnifo. A picaquin tushu huafo non afu rafumisifoan doce shihuati fospi huani.

²¹ Nan piaifo cinco mil nocofunufosini ini. Ainifofo yafi facufocai non tanan huanima. Asca nanfoanri ato futan piinifo.

Jesús unu fumancayan cani

Mr 6.45-52; Jn 6.16-21

²² Ascashon ato pimaquin anaititan Jesús noco yoiquin isca huani, —Shashon rufofo oquiri pocui focahuun. Un na yorafo ato nichiyonon, —ishon noco yoini.

²³ Ascashon man ato nichiqui anaititan arus fusti machi ano caashon Apa Dios fu tsainni. Man fari caino arus fusti ini.

²⁴ Ascatan afu rafuafo shasho caino ian nushmancayan nocoqui fuuhuan noconi. Ascashu ian fuchuquin noco catima huani.

²⁵ Ascashu man faquishiaiani non oian Jesús ian fumancayan nocoqui ofiaitocai non onannima.

²⁶ Onanshma ratucoin non fiisini. “Yoshiran,” icashu non fisicaiton.

²⁷ —Unqui. Ratuyamacahuun, —ishon Jesús noco yoini.

²⁸ Ascaiton Pedronun yoini, —Ifon, minmainquin uarifi mia ano cunahuu. Urifi un ian fumancayan canon, —huaiton.

²⁹⁻³⁰ —Ohuu, —Jesús huaino Pedro shasho naquinoashu fotopacucahuan ian fumancayan Jesús ari caafian oian fuunhuaquin ian fuchuaiton oin ratui iquipacucahuanqui yoini, —Ifon, ua ari mutsoinifoanhuun, —Pedronun huani.

³¹ Ascaiton Jesús samamashta mutsoinifoanquin yoini, —Miancai ua icoinra huacoinnama. Ahuuscaquimun mian icoinra huamaquin, —ishon Jesús yoini.

³² Ascantan nan rafu shasho muran nanuinifoanafono fuu nishmapacufoanni.

³³ Ascano non shasho murannofo fasi aqui unimacoquin non yoini, —Iconfinquin min Diospan Facu, —ishon non yoini.

Genesaret anoshon Jesús isinincaifo ato caya huapacuni

Mr 6.53-56

³⁴ Ascatan ian pocufaini Genesaret ano non noconi.

³⁵ Ascashu non nocoaiton nannofoan samamashta Jesús onancashon a chaima icafori ato tapimanaino nicafuracani fucaquin aton yora isinincaifo Jesusqui ihuunifo.

³⁶ Ascano fucashon Jesús yoinifo, —Noco yora isinincaifo min sahuuti cupanan fusti ato muumahuu cayanonfo, —ishon yoinifo. Ascatan ahuu sahuuti muuncanashu cayapacunifo.

15

Nocofunun ahuara chaca huatiro cuscan

Mr 7.1-23

¹ Ascano Fariseofo yafi Moisés cununi cuscan tapimamisifori Jerusalén anoashu Jesusqui funifo.

² Fucashon yoinifo, —¿Ahuuscaimun nocon shunifoan piataifoma muchoquimupaonifo cuscaai mifu rafuafoan asca huapaicanimaran? —ishon yoiaino.

³ Jesús arifi ato yocani, —Ascán ahuuscai marifi maton fuyamisi fustisi man tana-paiyain. Ascashofin Diosin yononi cuscan huatamarocon nan maton shunifoan amaquiri yoisimisifo cuscan marifi man nansca huamisiquin.

⁴ Ascacan Upa Diosin yonoqui isca huani, “Maton upa yafi uhua nicasharafain ato shara huacahuun. Ascán tsoan apa iyamarai ahuaqui tsain chaca huacun ato rutumacahuun,” ishon yononi.

⁵⁻⁶ Nannori yononifianicun manfin noco yorafo yoiquin isca huamisiquin, “Maton upa iyamarai mato uhua man yoiqui isca huatiro, ‘Nantifi uhuun pui un aya cuscan mun Dios

inan. Ascacun un mia ahuara inanpaifiaquicai un mia inainmaran,' ishon yoiquicai mato yoa yafi uhua man afanan ahua inantromaran, ishon man fasi ato amaquiri yoimisi. Anori yoiquicai Diosin yononi cuscacoin man aima. Ascaquifin nan mato fuyamisi fusti man tanaqui.

⁷ Ascashufin man paramitsamisifoquin. Nan Diosin tsain yoimisi Isaías inon pacoai cuscan icocoinquin matohuunoo yoiqui isca huani,

⁸ “Nan yorafoan uhuunoo yoisharamisiflashocai aton nomuranshon ua shinancoianfoma.

⁹ Ipaitsi ichananshu fanaincai ua cuficani. Yorafo tapimamisifo cuscacai Diosin tsaincoinnma. Nanfoan aton nomuran shinainfo cuscan futsafori yosimisiforan,” —ishon Isaías cununi.

¹⁰ Ascashon nannori Fariseofo yafi Moisés cununi cuscan tapimamisifo ato yoitan Jesús yorahuanrasi cunaquin isca huani, —Uqui fucahuun un mato yoinon. Ua nicafain un mato yoiái cuscan tapisharashcaquin.

¹¹ Ahuarafo non piatocai noco ointi chaca huatiroma. Nocofununfin ahuun nomuranshon nan shinain cuscan yafi nan yoiái cuscan chaca huatiroquin, —ishon ato yoini.

¹² Ascaino non afu rafuafu aqui cashon non yocani; —¿Ifon, man min tapiamun nan rama min Fariseofo yoiái cuscan nicacani sinacaniran? —ishon non yoini.

¹³ Ascaiton noco yoiqui isca huani, —Mau ifoancai ahuara chacafo fanatiroma. Ascatama afin foaicun tsucashon potatiro. Nanscarifi aqui uhuun Upa Dios nai muran icatocai nan Fariseofo yonoama futsafo ahuun tsain tapimanon. Ascacun nanfo chipo omitsiscapanacafu muran ato potashquin.

¹⁴ Ascacun nanfo shinanyamacahuun. Fushocai afu fusho raqui iyotiroma. Iyopai afu shato muran pacutiro. Nanscarifiai Fariseofoancai Diosin tsain tapishoma futsafo yositiroma atofu funotiro. Ascashu Dios ari toa nocopacunacafomaran, —ishon ato yoini.

¹⁵ Ascaiton Pedronun yoini, —Min ato yoiái cuscan shafacafi noco tapimahuun, —ishon yoini.

¹⁶ Ascaiton Jesús noco yoiqui isca huani, —¿Ascan marifimun man nicasharama?

¹⁷ ¿Man tapiamamun ahuara man piacai mato shaqui muran nituima? Ascatama manrocon aya poitiro. Ascan nantocai mato chaca huamatiroma.

¹⁸ Ascashon mato nomuran man shinanchacai cuscan huafain yoiashuri man chacacoin itiro.

¹⁹ Ascano aton nomuranshon ahuara chaca shinainfo cuscan nanscacoin huatirofo. Shinanchacafain rutumitsamisi icain aton ahuinma fu nocofunufu icaifoanno ainfori nanscarifiaifanno. Ascashon ahuarari onufain futsahuunoo ahuara chaca yoiqui parafain roanmitsamisi itirofo.

²⁰ Nan chacafoanfin yorafo chaca imatiroquin. Ascan nan noco shunifoan apaonifo cuscan muchoquimushoma non piatocai nocon nomuran noco shinanchacamatiromaran, —ishon Jesús noco yoini.

Ainfoan patasharinoaton Cananea anoaton Jesús icoinra huani

Mr 7.24-30

²¹ Ascacaini Jesús nocofu anoashu cai nan pushurasi Tiro ano yafi Sidón ano cani.

²² Nannoashu Cananea anoa ainfo Jesusqui noconi. Nocoshon yoini, —Ifon, minfin David ahuun funaquin. Uhuun ramapaihuu. Uhuun facu ainfoshata fasi omitsiscai. Yoshin chaca ahuun nuushon omitsisca huamisi. Uhuun facu ua caya huashopun, —ishon yoiriani.

²³ Ascaiton nicafiaquicai Jesús cumanima. Ascaiton non afu rafuafu yoini, —Ifon, na ainfoan mia yocariaquin noco fucash huaiquin nichihuun, —ishon non yoini.

²⁴ Ascashon Jesús ainfo yoini, —Uhuun Upa Diosin ua Israel ano fusti nichini. Nanfomain nan chashoanun facu funoa cuscarafocun. Ascan uacai caifo futsa ano nichinima, —huaiton.

²⁵ Nicaiyainfo Jesús naman ratoconun mai chachipacufu yoini, —Ifon, uhuun facushta ua cayahuashopun, —huani.

²⁶ Ascaiton Jesús afanan cumani, —Apacai ahuun facufoan tushu pashnafo inantiroma. Ascaracai sharama. Nanscarifi aqui Upa Diosin ua yonoa cuscan un Israelifo fusti un shara huashonon. Ascacuai un caifo futsa ano catiroma ato shara huashoshquin. Un asca huaino nan Israelifo funotiro, —ishon yoiaiton.

²⁷ Ainfoanri yoini. —Icon, Ifon. Ascafia ahuara piqui tushu huafo sapa camaquinoashu potomishti pacuaiton pashnafoan pitirofo. Nanscarifi aquin Upa Diosin mia Israelifo ano nichini min ato shara huashonon. Ascafia mani futsafori miqiu nocoiffoan nanfori min ato caya huatiro. Ascashon min ato shara huashoainocai Israelifori funotromaran, —ishon yoiaiton.

²⁸—Min ua fasi icoinra huacoinna. Ascacun min ua yoca cuscan un mia ashoiran, —ishon Jesús nan ainfo yoini. Asca huatanaino ainfo ahuun facu cayariscatani.

Jesús yora ichapa isinincaifo ato caya huapacuni

²⁹Asca huatan anoashu Jesús no fu cai Galilea ian cusumunri cani. Nannoashu cai machi ano inashu tsaoni.

³⁰Ascano yorahuanrasi aquí funifo. Fucaquin isinincaifo ihuunifo Jesús ato caya huanon. Isinincai futsa futsatapafa. Futsafo nipaiqui ranainfo ihuufain fushofo ihuufain ahuun caya mumamafo ihuufain tsaintiromafo ihuufain isinincai futsafori Jesusqui ihuunifo. Ascacun nantifi Jesús ato cayapacuni.

³¹Ascashon ato caya huaa oincani mustairicatan yorafo afi ranan yoinancaquin yoinifo, —Noncai iscara oinyomisima. Tsaintiromafo natian tsaincani. Ahuun caya mumamafori natian man niisharafo. Nipaiqui ranainfori natian niisharatirofo. Jesusfin ahuamamishti huatiroquin. Israelifoan nocon Dios fasi sharacoinran, —ishon yoinifo.

Jesús cuatro mil nocofunifo pimani

Mr 8.1-10

³²Ascatan non afu rafuafu noco cunashon Jesús noco yoiqui isca huani, —Un na yorafohuun ramapai. Ufu rafu non fusti oshatan icafo. Afanan tsoa tushu ayama. Ahuashtacai picanima. Ascacun uncai ato tushuoma nichipaima. Fasi fonaincani shaca fuatiroforan, —ishon noco yoini.

³³Ascaiton non cumani, —Nuno tsoa icamanocai non tushu fuchitiroma na yorahuanrasi pimashquin, —ishon non yoiaiton.

³⁴Noco yocani, —¿Ahuuti misi man ayamun? —noco huaiton. —Siete non shiman rananarri non ayaran, —ishon non yoini.

³⁵Ascaiton Jesús yorafo yoiqui isca huani, —Nanno tsaocahuun, —ato huani.

³⁶Ascatan ato yola cuscan tsaoofoanno Jesús misi siete non shiman rananri finifoantan Apa Dios cufini, —¡Aicho! Upan, mihuunshon un ato pimai. Min fasi sharacoinquin, —huatan. Misi yafi shiman torupacutan non afu rafuafu noco inanni. Ascacun yorahuanrasi norifi non ato pashcashopacuni.

³⁷Ascashon nantifiton picani mayancoinnifo. Ascano man piqui tushu huafo siete shihuati non fospí huani.

³⁸Ascan nan piaifo cuatro mil nocofunifoosi ini. Ainforo yafi facufocai non tanan huanima. Ascafia nanfoanri ato futan piinifo.

³⁹Ascatan Jesús nantifi yorahuanrasi nichitan. Noco nanuquifaini cai mai futsa ahuun anu Magadán ano no cani.

16

Fariseofo futan Saduceofoan Jesús yocanifo, —Tsoan atiroma cuscan noco ismahuu, —huanifo

Mr 8.11-13; Lc 12.54-56

¹Ascashu Magadán ano man non nocoano Fariseofo yafi Saduceofoari Jesusqui funifo. Ascano fucashon yocanifo. —Minmain Diospan facucoinqin nan Diosin nai aria icahuunshon tsoa atiroma cuscan noco ismahuu non mia icoinra huanon, —ishon yoinifo. Ahuunoa ahuaara chaca ato niaiffo yoipaicaquin.

²Ascaifoan Jesús ato cumani, —Manfin yoiqin isca huamisiqin, “Man fari caino imi poshnan. Ascan funamanrifi nai shara itiroquin,” ishon man yoimisi.

³Ascashon shafaino nai choshtacun man yoimisi, “Nai choshtapan fupoa. Ascan natian oi fuiran,” man huamisi. Ascashon nai foisquin man tapitiro oi fuyamaraimain ahuuscaiqin. Ascan ahuuscaiqitsi Diosin mato yoiái cuscan man icoinra huapaima. Natian ahuaara ahuuscarai cuscacai man tapiama.

⁴Man ua icoinra huayamafain chacafashon man ua yocai. Ascafia tsoan atiroma cuscan un Diosihuunshon huatirofiacai un mato ismaima. Man oinpaifiaton. Nan Diosin Jonás nai cuscan nan fusti man chipo oinshquiran, —ishon Jesús ato yoini. Ascatan atomaquinoashu cani.

Fariseofoan yositirofo cuscahuunoa

Mr 8.14-21

⁵Ascano man ian pocufaini cashon non shinanni, —Non tushu ointiaquimacuranaran, —ishon non yoini.

⁶Non ascaiton onanshon Jesús noco yoini, —Oinfain. Fariseofo futan Saduceofoan aton misi farashati cuscara fiyamacahuun, —ishon noco yoiaiton.

⁷ Nicaí nofi ranan non yoinanni, —¿Ahuuscaimun Jesús noco yoiqui isca huaiquin, “Farise-
ofo futan Saduceofoan aton misi farashati fiyamacahuun,” noco huai? Non tushu fucuma
racan noco isca huaiquin, —icashu non yoinanni.

⁸ Ascano nan non yoiai cuscan onanshon Jesús noco yoini, —¿Ahuuscaquimun tushuhu-
noasi man yoicai? Mancai ua icoinra huaa sharacoiantaima.

⁹ Ascashon mancai tapisharataima. ¿Un mucu fustiti misihuunshon cinco mil no-
cofunufo un pimaita nan man shinainmamun? ¿Ahuuti shihuati fospia tushuita man
ointiaquimamun?

¹⁰ ¿Nan siete misihuunshori un cuatro mil yorafo pimaita nanri man man ointiaquimana-
mun? ¿Ahuuti shihuati fospia tushuitamun man ointiaquimamun?

¹¹ ¿Ascan ahuuscai un mato tushucoihuunoa yoiyamafiton man tapimamun? Unfi
tushuhuunoa yoi cafisca huaquin nan Fariseofo futan Saduceofoan yosiaifo cuscahuunoa
un mato yoiqui, —ishon noco yoini.

¹² Ascashon Jesús noco yoiai cuscan nicaquin non tapini tushucoihuunoa yoitama naan
Fariseofo futan Saduceofoan noco amaquiri tapimapaiyai cuscan Jesús noco yoini.

Pedronun, —Jesús Diospan facuran, —huani
Mr 8.27-30; Lc 9.18-21

¹³ Ascatan Jesús no fu mai futsari cani. Nan mai ahuun anu Cesarea Filipino. Nanno
nocoshon Jesús noco yoini, —Unfin Diospan Facufiashu un nocofunucuinquin, —ishon
yoitan afanan noco yocani, —¿Yorafoan shinanmun un tsoaquin? —ishon noco yocaiton.

¹⁴ Non cumaquin isca huani, —Futsafoan yoiain min Juanquin. Nan yorafo unu
muran iquimapacumisi, ishon yoiainfoanno futsafoanri yoiquifin min Eliasquin. Ascano
futsafoanri yoiainfo minfin Jeremiasqui. Ascan futsafoanri yoiainfo minfin nocon shunicaifo
Diosin tsain yaimisi futsa afanan funiaquin, —ishon noco yoiainfo.

¹⁵ Afanan noco yocani, —¿Asca marifi man shinanmun un tsoaquin? —noco huaiton.

¹⁶ Ascaiton Pedronun cumani, —Minfin Cristoquin. Nan Diosin nipanacaton mia catonni
min ahuun facuran, —ishon yoiainfo.

¹⁷ Ascaiton Jesús cumani, —Simón, minfin Jonás ahuun facuquin. Diosin mia noiquin mia
shara huaa. Rato nocofununcai mia tapimanama un Diospan facu. Uhuun Upa Diosin nan
nai muran icaton mia tapimana.

¹⁸ Un mia afanan yoi. Minfin Pedroquin, —ishon Jesús yoini. Ascan Pedrofin Israeli
tsainman toquirininhuan. Tsoan putsiquitiroma. Ascasho Jesús afanan yoiqui isca huani,
—Min yoiainfo cuscahuunshon futsafoan aarifi icoinra huashquicani. Ascainfoan uhuun yorafo
un ato imashquin. Yoshin chacafoan aaton curush huahuunshon ato namapafiaquicai ato
shatuyamafain aato finontiroma.

¹⁹ Tsoan shafi ya fupoti fuputiro yorafo pushu muran iquimashquin. Nanscarifi aquin
un mia yonoi uhuunshon min yorafo uhuunoa yoiro uhuun yorafo inonfo. Ascashu
uhuun Upa icano iquitirofo. Min yorafo yosiai cuscan tsoa nicacasmai uhuun yora itiro
Upa Dios fu ipashcaquin. Nannori Diosin yoini. Ascan min yorafo yosiai cuscan tsoa
icoinra huai uhuun yora itiro Upa Dios fu ipashquin. Nannori Upa Diosin yoini. Ascacun
un mia yonoi min futsafo tapimatiro Upa Dios icano iquionfo. Un mia shafi inain
cafisca huai min ato fupushotiro iquishu afu ipanonfo. Ascashon tsoan min yoiai cuscan
icoinra huayamashocai iquitiroma afu ipashquin. Ascan tsoan min yoiai cuscan icoinra
huacoinnashu afu ipashquin, —ishon Jesús Pedro yoini.

²⁰ Ascatan non afu rafuafo futsafori noco yoiqui isca huani, —Unfin Cristoquin tsoa
yoiyamacahuun, —noco huani.

—Unfin chipo naashquicai, —ishon Jesús ato yoini
Mr 8.31-9.1; Lc 9.22-27

²¹ Ascatan nantian yafi nan achiaifotian Jesús noco shafacafi yoiqui isca huay-
ofafainpaoni, —Un Jerusalén ano cai. Nannoshon nocon niaiffoan ua omitsisca huafain
ua ato rutumafiafo osha rafu non fustitan un afanan funishquiran, —ishon noco yoini.

²² Ascaiton Pedronun Jesús mutsofaitan yoini, —Ifon, ascayamahuu. Miacai tsoan
rutupacunacama, —huaiton.

²³ Jesús ifiacucahuan Pedro yoini, —Satanás catahuun. Min ua amaquiri shinanchacama-
pai. Upa Diosin shinain cuscaei shinantama nan nocofunufon shinainfo cuscan min
shinanran, —ishon Jesús yoini.

²⁴ Ascatan non afu rafua futsafori noco yoiqui isca huani, —Tsoan ua tanapaisharaquicai
afi apaiyai cuscan huatiroma. Ascataka nan un yoiai cuscaoin huatiro. Ascashon
shinanqui isca huatiro, “Ua omitsisca huafiaifonno uncai uhuun Ifo potapacunacama.
Ahuunshon ua rutufiaifonno un tanaqui unupacunacamaran,” ishon man shinantiro.

²⁵ Ascan tsoan shinanqui isca huai, “¡Ohua! Un Jesús tanaiton raza ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacanashu ufu isharapacunacafoquin.

²⁶ Ascan ratoran futsa nantifi manifoti anofo ahuara fia ahuunacoin ifiashu amaqui naino nantifi ahuunafu funotiro. Ascashu nantifi ahuuna iyopaonifia omitsiscapanacafo muran cainocai afanan ahuashta itiro. Ahuaracai Dios inantiroma afu ipashqui.

²⁷ Ascatan un chipo nai murannoashu mai ano fotoaino nan uhuun Upa cuscaracoin iishqui. Ascashu un chasha curanaino uhuun oinmatifo ufu nai muran icafo ufu fotoshcani. Nantianri un nantifi yorafoan aton niaifocoin iishquin. Ascashu nan yorafoan acafo cuscan un ato inanpacushquin. Nan shara huamisifo un ato inansharafain un ato unimamashquin. Ascan nan chaca huamisiforicaí un ato ahua inansharashquima.

²⁸ Ascacun icon un mato yoi. Man futsa nuno ufu niaton naataishoma un maton niaifo Upa Dios cuscaracoin un icaiton man oinshquiran, —ishon Jesús noco yoini.

17

Jesús fiananariscatani

Mr 9.2-13; Lc 9.28-36

¹ Ascano man seis osha finontan Jesús Pedro non Juan non Santiagori machi cuya pochininshon ato iyoni.

² Ascan nannoashu aton ointaifi Jesús ahuun yora mumacoin fiananariscatanaino ahuun fusori fasi chashacointani. Nan fari chashai ointsa. Ahuun sahuutiri oshopacoin nan yoa rama furoa ointsa ini.

³ Ascaino nantianri Moisés yafi Elías aquí niriscatanifo. Ascashu nan rafu Jesús fu tsaincaiton oinnifo.

⁴ Ascaiton Pedronun yoini, —Ifon, nuno non icashara itiro. Man ascapaiyaiton un mato tapasi rafu non fusti huashotiro. Mina futsa non Moisésna futsa non Eliasna futsa un mato ashotiroran, —ishon yoini.

⁵ Ascashu Jesús fu tsaincaino coin osho sharacoin atoqui cuyopacuni. Ascaino coin murannoa oi nicanifo yoiqui isca huaiton, —Nanfin uhuun Facuquin. Un fasi ahuun noi. Nanfin un catoanquin. Un aquí unimacoin. Ascacun a nicacoincahuun, —ishon Upa Diosin yoini.

⁶ Ascaiton nicacani fasi ratuocoincani fuopacufoannifo.

⁷ Ascaifoan Jesús ato pumanquin yoini, —Funicahuun. Ratucaquima, —ishon ato yoini.

⁸ Ascaiton foisinifoanquin oianfo Jesús fusti nia ini.

⁹ Ascatan machi pochininnoashu fotoshon Jesús ato yoiqui isca huani, —Nan man rama oian cuscan tsoashta yoiyoyamacahuun. Nan un naashu afanan funiano man rama oian cuscan man yorafo yoitiroran, —ishon ato yoini.

¹⁰ Ascaiton nicacaquin afu rafuafo yocanifo, —¿Ascan ahuuscaquimun Moisés cununi cuscan tapimamisifoan noco yoimisifo isca huaquin, “Nocon Numamisi Cristo nan Diosin catoan nocoqui oataima rufofo Elías oshquiran,” ishon noco yoimisiforan? —huaifoan.

¹¹ Jesús ato yoini, —Icon. Elías rucun oitautiro. Oshon nantifi ato imasharapai aton chaca shatunonfo.

¹² Ascan man ofiacucai tsoan onannima. Nan chaca huapaiyaifo cuscan fusti nan chaca huanifo. Nanscarifi aquín ua omitsisca huashcaniran, —ishon Jesús ato yoini.

¹³ Ascaiton nicacani afu rafuafoan shinantani nan Juan yorafo unu muran iquimacumisihuunoa ato yoiai cuscan tapinifo.

Jesús furonanfacuhuunoa yoshin chaca nuua caya huani

Mr 9.14-29; Lc 9.37-43

¹⁴ Ascatan machi anoashu fotocuranaino yorahuanrasi aquí noconifo. Ascaino nannoshon nocofunun ratoconun mai chachipacufoan Jesús yoini,

¹⁵ —Ifon, uhuun facuahuun ramapaihuu. Yoshin chaca ahuun nuushon fasi omitsiscamai. Chii muran potafain unu muranri potatiro.

¹⁶ Uhuun facu mifu rafuafo ano un iyofiacai tsoan caya huama, —ishon yoiaiton.

¹⁷ Ascaiton Jesús non afu rafuafo noco yoini, —¡Ohua! Mancai ua icoinra huacoinnama. Man fasi amaquiri shinanmisi. ¿Ahuutia un matofu icamun man ua nicayamacaiyai? —ishon noco yoini. Ascatan facun ahuun apa yoini, —Min facu ua ihuushonhuun, —huani.

¹⁸ Ascaiton furun ihuushocun Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcain yoiaino cayariscatani.

¹⁹ Ascatan non afu rafuafofi Jesús fu tsaintan non yocani, —¿Ahuuscainun norifi non yoshin chaca facumaquino potamaquin? —ishon non yocaiton.

²⁰ Noco afanan yoini. —Manfin ichapama ua icoinra huaaquin. Ascacun un mato icon yoinon. Nan mostaza ushu uhuapamashtacoinfia foacashu yosia uhuapacoin itiro. Nanscarifiai man ua ichapama icoinra huaaquin tau huatiro. Ascan chipo uhuun tsain maton nomuran nanucoinshon man ua fasi icoinra huaqui finacointiro. Ascashon man machi yoitiro shucucaitahuun man huaino shucucaini futsa ano catio. Ascaino ua icoinra huacoinshon nan man apaiyai cuscaicin man huatiroquin.

²¹ Ascan man Upa Dios cufiyanan piqiu tunuyamashocai nan na cuscara yoshin chaca man potatiromaran, —ishon Jesús noco yoini.

Jesús nashquiai cuscan afanan yoi futsani

Mr 9.30-32; Lc 9.43-45

²²⁻²³ Ascatan Galilea ano nocofu caquin afanan Jesús noco yoiquin isca huani, —Un mato yomisi cuscan afanan un mato yoi. Futsan ua ato achimashquin ua rutunonfo. Ascafia osha rafu non fustitan un afanan mai murannoashu funishquiran, —ishon Jesús noco yoini. Ascaiton nicaquin non fasi shinancoinni nocon nomuran noconi.

Israelifoan pui inantiro cuscan Dios fu tsainti pushu cushusharanonfo

²⁴ Ascatan nannoashu non cai Capernaum pushurasi ano non noconi. Nanno non nococun nan Dios fu tsainti pushu murannoa pui fimisifoan Pedro yocanifo. —Man min tapia nocon caiffoan faritifi pui inanfo Dios fu tsainti pushu muran yonoafoan nan yopaifo cuscan ahuun finonfo. ¿Ascan mato Ifo Jesús arifi man inanmisimun? —ishon Pedro yocaifoan.

²⁵ Pedronun ato cumani, —Aifain. Naanfin inanmisiquin, —ishon ato yoini. Ascashu Jesús man pushu muran iquiano Pedro arifi iquini. Ascaiton Jesús Pedro yoini. —¿Maifoti anoa niaiffoanmun ahuun caifocoin pui fiapai yamarai mai futsa ariafo yocaiqui? ¿Pedro, asca min raquiri shinainmun? —ishon Jesús Pedro yocaiton.

²⁶ —Mai futsa ariafo fiantiroran, —ishon Pedronun cumani.

²⁷ Ascaiton yoini, —Min ua cuma cuscan iconfia non na pui fimisifo nocoqui shinanchacamapaima. Ascacun ian ano catahuun shuamaquin shiman fiishquin. Ascashon ahuun shaqui murannoa toro fuchishon min fitiro uhuuna yafi mina nan Dios fu tsainti pushu murannoa pui fimisifo nocohuunshon ato inanshquin, —ishon Jesús yoini.

18

Ratotocaimun Dios icari fasi finoncoianquin

Mr 9.33-37; Lc 9.46-48

¹ Ascaiton non Jesús yocani. —¿Ifon, ratotocaimun Dios icari fasi finoncoianquin? —ishon non yocaiton.

² Jesús facu cunani, —Facushta, nuri ohuu, —huaino ocun ato nastui nimani.

³ Ascashon ato yoini, —Un mato icon yoi. Man shinan futsayamashu nan facu cuscara man iqui. Man ascaiyamacai Dios icari man noconacama.

⁴ Ascacun na facu apa yafi ahua nicafain icoinra huatiro cuscan ratoran futsan ua icoinra huacoinnashu nanfin uhuun Upa Dios icariashu fasi finoncoian iishquiquin.

⁵ Asca ratoran futsan uhuunshon facufo shara huafin nan uari shara huai cafisca huai.

Futsafoan noco chaca huaquinaino fasi musucoin

Mr 9.42-48; Lc 17.1-2

⁶ Ascafia ratoranfoan ua icoinra huafuna futsan chaca huamai nancaifin fasi onaintimaquin finacoinquin. Chaca huamataima toquiriya tunushushon unu noacoin muran potafin shara icuanaquin.

⁷ Ascano nan icoinra huamafoan futsafo chaca huamamisi. Ascafia nanfocaiquin fasi omitsiscacoinshcaniquin. Ascashon mato chaca huamaifaifaincani. Ascafia nan futsa chaca huamafocaiquin fasi omitsiscacai finacoinshcaniquin.

⁸ Ascano mato mucuman man chaca huacun mushatumushon potacahuun afanan chaca huashquima. Man raquiri caquin chaca huashon mato tau shatuhuu potashquin afanan chaca huashquima. Man mumafiahu Dios icano caafin sharacaiqui. Mumafiahu man omitsiscapanacafo muran cacuana. Nanno chii urumanhuan matsinacama.

⁹ Nanscarifiai ahua oinquin chaca huashon mato furo tsucahuu potashcaquin afanan chaca huashquima. Niyoashu furo fustiya man Dios icano caafin sharacaiqui. Ascan niyoashu furo rafuya man omitsiscapanacafo muran cacai sharama. Nanno chii urumanhuan matsinacama.

Chashoan fusti funoahuunoa Jesús ato ahua futsa tapimani

Lc 15.3-7

¹⁰ Facufohuunoa isca huaqui shinanyamacahuun, “Na facucai ahuamaran,” ishon ato-huunoa shinanyamacahuun. Un mato cayacafi yoi Upa Diosin ahuun oinmatifoan facufo cushusharafafainmisifo. Nan oinmatifori Upa Dios fu ifafaincani.

¹¹ Ascacun nantifi yora funoafu numayoifin un oaquin. Ascashon un aton chaca soashona isharapacushanonfo un oni.

¹² Ascano un mato yoinon. Ratoran futsa cien chashoan ayafiano fustishta amaqui funoano atirifi nan noventa y nueve faasi fununun potayofaintio a fusti funoa funay-oicaquin nan fuchiaitian. ¿Ascán man ahuu cuscara shinantiromun?

¹³ Ascashu noventa y nueve ahuun chashoanfoqui unimafiaicai nan funoa fusti fuchi-aquicaifin fasi unimai finacoinquin.

¹⁴ Nanscarifiai maton Upa Dios nan nai muran icatocai nan ua rama icoinra huafo fustishta funopaima.

—Ahuuscashumain Diospan yora rafu raunantirofoquin, —ishon Jesús ato yoini
Lc 17.3

¹⁵ Ascacun tsain futsari un mato yoi. Ua icoinra huaa futsan mia chaca huacun aqui cashon mia chaca huaa cuscan nan fusti yoihuu. Min yoiái cuscan nicashquin yoinon, “Ai. Mian yoiái cuscan icon. Un mia chaca huaa. Ascacun ua rau huapun,” ishon yoitiro. Ascaquin mihuunoashu afanan Diosqui nasoquin afanan mifu rafushquin.

¹⁶ Asca min yoiái cuscan mia nicacasmaiton icoinra huaa fusti iyamarai rafu iyohuu nan nocofunon yoiái cuscan nicaquin arifi icoinra huanonfo.

¹⁷ Ascafia nan rafuri nicapaiyamaiton icoinra huafo ichanainfotian nannoshon nantifi tapimahuu. Asca nan ichananfori nicacasmaiton nanfoan yoitirofo, “Acai afanan Diospan yoracoin cuscaramaran,” ishon.

¹⁸ Ascacun un mato icon yoi. Ahuara man nunoshon yoiái cuscan arifi Dios nan icanoshon nannori yoi. Nanscarifiai man ahuara nunoshon yoiyamaino arifi Dios nan icarishon yoitiroma.

¹⁹ Afanan un mato yoi. Man rafu nuno mai ano ichananshon nannori rafu shinanqui man ahuara yocaiton nan uhuun Upa Dios nai muran icaton mato ashoshqui.

²⁰ Ascashu rafu iyamarai rafu non fusti yora ua icoinra huashu ichanainfoanno urifi un atofu ichanainran, —ishon Jesús noco yoini.

²¹ Ascaiton Pedronun yocani —¿Ifon, futsan ua chaca huafafainaitomun un rau huaquin ahuuti huatiroquin? ¿Siete un rau huaquin huatiroquin? —huaiton.

²² Jesús cumani, —Ma. Siete huaquima. Nan mia chaca huafafainaiti min rau huatiroan, —ishon yoini.

Oinmatinin futsa rau huapainimahuunshon ato yoini

²³ —Ascacun un mato yoiái cuscan nanfohuunshon man tapitiro ahuu cuscaramain Diosin ahuun yorafu iquifain ato yonotiroquin. Isca huaquin mato tapimai. Niaifoan ahuun oinmatifo cunani nan nifiafo cuscan inanonfo.

²⁴ Ascano nan oinmati futsan ahuun niaifo fasi ichapacoin millones nificun aqui ihuunifo.

²⁵ Nan nifian cuscacai ahua inantiro inima. Ascacun ahuun niaifoan yoiqui isca huani, “Min ua ahua inantiroma. Ascacun un mia niaifo futsa inain min ahuun yonomati inon. Nanton mihuun rafanan ua pui inanon. Ascacun un mia inanfain min ahuin yafi min facufo non min mafofori nantifi min aya cuscan un inanmitsai ahuun rafanan min ua nifian cuscan fiishquin,” ishon niaifoan yoiáiton.

²⁶ Nicaquin oinmatinin ahuun ratoconun mai chachishon yoiqui isca huani, “Ifon, uhuun ramapaihuu. Funayamapun. Un mia nifian cuscafin un mia chipo nantifi inainqui,” ishon yoini.

²⁷ Asca huaiton nicai niaifo ahuun ramapaiquin yoini, “Afanan ratuyamahuu. Natian min ua nifian cuscan un afanan shinainma. Min ua inanyamafaiton nantifi un soai min ua afanan nifinonma. Ascacun casharatahuun,” huani.

²⁸⁻²⁹ Ascano niaifoan ahuun pushu murannoashu caqui afu oinmati futsa fuchini. Nantori nan ichapamashta nifian ini. Shafa fusti yonona nifian ini. Ascaciacun aqui nocoshon tumosfain achishon yoini. “Mian nifian cuscan ua inanriscahuu,” huaiton ratoconun mai chachishon yoini, “Funayamapun. Un mia inanon,” huani.

³⁰ Asca huafaitocai futsa manapainima. Ascatama futsanrocon cunu muran iquimani nan nifian cuscan inaintian amuran iyonon.

³¹ Ascaiton oincani oinmati futsafo fasi ahuun ramapaicoinnifo. Ascano focashon nan acaiton oian cuscan niaifoquin chaninifo.

³² Ascano focashon yoiiafoan nicaquin niafoan ahuun oinmati cunashon yoini, “Minfin fasi chacacoinquin. Mian fasi ichapacoin niffiashon min yoiqui isca huua, ‘Ifon, manayopun. Un mia nifian cuscan un mia inanon,’ ishon mian yoiaiton un mia nantifi soashona.

³³ Ascacun un mihuun ramapaia cuscan nanscarifi aqiu mifu oinmati futsa min ahuun ramapaia shara icuana. Ascatarocon min ahuun ramapaiamaran,” ishon niafoan yoini.

³⁴ Ascashu fasi sinacoinquin niafoan oinmati cunu muran iquimafain fasi onaintimashqui. Ascashon ahuun oinmatifo yonoqui isca huani, “Nan ua nifian cuscan nantifi ua inanyamaiton cunu muranshon cainmayamacahuun,” ishon nan yora omitsisca huamisifo ato huani.

³⁵ Nanscarifi huaquin ratoran futsan mato chaca huafiacun man ato rau huayamaino niafoan ahuun oinmati chaca onaintimana cuscan huafain nanscarifi aqiu nan uhuun Upa Diosin nai muran icaton matori onaintimashquiran, —ishon Jesús noco yoini.

19

Nocofunu yafi ainfo ununantirofokuuoa Jesús ato yosini

Mr 10.1-12; Lc 16.18

¹ Ascano tsainqui anaititan Jesús nocofu Galilea anoashu Judea mai unu Jordán ocuma futsa cani.

² Ascaiton yorahuanrasiton mufaincun nannoshon nan isinincaifoti ato caya huani.

³ Ascaino Fariseofo Jesusqui funifo. Amaquiri cumamapai fucani. Ascacun yocanifo, —¿Moisés cununi cuscan nocofunun ahuin unupaiquin unutimomun? ¿Nocofunun ahuin ahuuscarashta aiton unutimomun? —ishon yocaifoan.

⁴ Jesús ato cumani, —¿Man Moisés cununi cuscan oinmisimamun? Diosin nantifi onihuani. Tau huaquin nocofunu yafi ainfo onihuani.

⁵⁻⁶ Ascano Diosin yoiqui isca huani, “Ascacun nocofunun ainfo fiaino apa yafi ahua-maqui pashcashu ahuin fu itiro. Ascashu nan fusti shinantsa ashcaquin,” ishon cununiquin. Ascacun Diosin ato fianan huua cuscan afanan tsoa pashcanantimomaran, —ishon ato yoiaiton.

⁷ Yocanifo, —¿Nan iconfiacun asca ahuuscaquimun Moisés yonoquin isca huaniquin? “Tsoan ahuin unupaiquin iquisi cunushoquin isca huatiro, ‘Un afanan mia fipaima. Mun mia unuiran,’” ishon Moisés cununiran, —huaifoan.

⁸ Afanan ato cumani, —Manfin nan maton shunifo cuscarquin. Nanfoanri Dios nicacasma-paonifo. Nanscarifi huaqui marifi man nicacasmai. Ascacun rama man yoiia cuscan nannori Moisés cununi. Ascafiacai Diosin tau huaqui anori yononima.

⁹ Ascacun un mato cayacafi yoi. Ratoran futsan ahuun ahuin nocofunu futsa fu iyamafiacun ahuin unui futsa fiishquin. Asca huaquifin nanton chaca huaiquin. Nan ahuun ahuinma fu iquin cafiscairan, —ishon Jesús ato yoini.

¹⁰ Ascaiton nicaquin non afu rafuafoan yoini, —Nanscaracun nocofunu yafi ahuin fiananfoma shara icuanaran, —non huaiton.

¹¹ Jesús noco cumani, —Un yoiiai cuscaai atirifi yorafoan tapitirofoma. Nan Diosin ato shinanmanafoansifin tapitirofoquin.

¹² Ascano atirifi nocofunufocaiyainfo fu fianantirofoma. Atirifi nan cainni cuscan ainfo fu itiro. Ascan futsafoan atirifi chaca huatiro ainfo fu inonfoma. Ascaino atirificaiyainfo fu fiananfoma Dios yonosharashoshcaquin. Ascacun tsoa ahuionma itiromainquin nan un mato yoiiai cuscan nicacahuun, —ishon Jesús ato yoini.

Jesús apa Dioshuunshon facufo shara huani

Mr 10.13-16; Lc 18.15-17

¹³ Ascaino yorafoan aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan non afu rafuafoan ato yoini, —Maton facufo ihuutan nocon Ifo fucash huayamacahuun, —ishon non ato yoiaiton.

¹⁴ Jesús noco yoini, —Ato nitun huayamacahuun uqui funonofu. Uhuun Upa Dios niaifo icariafofin nan facumishti cuscaraforiquin, —ishon yoini.

¹⁵ Ascashon facufo manmanpacutan Jesús cani.

Pushcohuai mafo ichapaya Jesús fu tsainni

Mr 10.17-31; Lc 18.18-30

¹⁶ Ascano pushcohuai Jesusqui caashon yocani, —Tapimamisiton minfin sharacoinquin, ¿Unmun ahua shara huatiroquin Dios fu ipashashquin? —ishon yocaiton.

¹⁷ Jesús cumani, —¿Ahuuscaquimun mian yocaiquin ahua shara huunoo? Nannofin fustiquin shara. Naanfin Diosiquin. Ascan min Dios fu ipapaiquin nan noco yononi cuscan nicacoinfain nan yoiia cuscaoin min huatiroran, —huaiton.

¹⁸ —¿Rato noco yononicaimun un nicacoinfain nan yoia cuscan un huaiiqui? —ishon yocaiton. Jesús yoini, —Futsa rutuyamahuu. Min ahuinma fu iyamahuu. Ahuara onuyamahuu. Chaniri yoyimahuu.

¹⁹ Upa yafi uhua nicasharafain ato shara huahuu. Nan mifiri min noiai cuscan futsafohuunri noihuu, —ishon yoaiton.

²⁰ —Nantifi min ua yoiai cuscan mun nansacoin huaa. ¿Ascan ahua futsamun un ahuusca huatiroquin ahuunoashu isharashquin? —huaiton.

²¹ Afanan yoini, —Min Dios cuscara shara ipaiqui nantifi min aya cuscan inanmitsashon ahuun rafanan pui fihuu ahuuomafo ato inanshquin. Min ascaitofin Upa Diosin nai muranshon mia ahua sharacoin mucushoniquin. Asca huatan ua tanasharahuu, —ishon Jesús yoini.

²² Asca huaiton nicai nan pushcohuai puusinima. Mafo ichapayashu ahuun mafofo inanmitsacasmai. Ascatan Jesusmaquinoashu cani.

²³ Ascashu man caano Jesús noco yoiqui isca huani, —Un mato icon yoi. Yora mafo ichapaya fustirasi uhuun Upa Dios niaifo ari nocopaifacani nocotirofoma. Nanfoan aton mafo ichapa shinanquicai tsoan Dios shinantiroma.

²⁴ Ascacun afanan un mato yoi. Nan ina camellocai acoya shoi muran finontiroma. Mimacaiifi nocofunu mafo ichapaya Diosin niaifo ari nocotiromaquin, —ishon noco yoini.

²⁵ Ascaiton nicacaquin non afu rafuafo mustairitan non yoini. —¿Ascan tsoa Dios fu nipatiromun? —ishon non yocaiton.

²⁶ Jesús nocoqui fusoacucahuan noco cumani, —Nocofunucai afiri numatiroma. Diosin fustitofin yorafo numatiroquin. Nantofin ahuamamishti huatiroquin. Nocofunufonan atiroma cuscan nan Diosin huatiroman, —ishon noco yoaiton.

²⁷ Pedronun yoini, —Ifon, nonfin nocon ahuarafu nantifi yafi nocon yorafo non pota furani mifu oaquin. ¿Ascan Diosimun noco ahua inainquin? —ishon yocaiton.

²⁸ Afanan Jesús noco yoiqui isca huani, —Un mato icon yoi. Un chipo nantifi manifesti iquinaitian nantifiton ua oinshquicani uhuun Upa Dios cuscara sharacoin icaiton. Nantianri marifi nan ua tanamisi nocon caifo doce shoco Israelifo marifi man ato iquishquin.

²⁹ Ascata tsoan uhuunshon ahuun pushu yafi ahuun yorafo potafain apa potafain ahuari potafain ahuun facufo yafi ahuun mairi potashon ua tanapaisharai. Nanscara yorafin ugui nocoaitian fasi paratama fiishquiquin. Ascashu ufu ipanaca.

³⁰ Ascafia yora ichaparasi niyoashu nan niaifo cuscarafu. Ascan naashucafi afanan tsoa ahua ishquima. Nanscarifiafi atirifi niyoashu nan ahuama shinantsafo. Ascafia naashu u futan futsafori iquishceni.

20

Mau yonomisifohuunoa ahua futsa Jesús ato tapimani

¹ Ascano ahuu cuscarain Upa Diosin ahuun yorafo iquina cuscarquin afanan un mato tapimai isca huai. Mau ifoan funamanrishta nocofunufu funai cani ahuun mau uhuapa ano yonoi fononfo.

² Ascano ato fuchishon yoiqui isca huani, “Uhuun mau ano yonoi focahuun. Nan man shafa fusti yonoa cuscan un mato inain. ¿Ascan sharamun?” ato huaiton. “Ai. Sharafinquin,” huanifo. Ascashon ahuun mau ari ato nichini.

³ Ascatan man fari cuyainano mau ifoan caaquin oian plaza ano nocofunufu nia ini tsoa yonoima.

⁴ Ascaiton mau ifoan ato yoini, “Uhuun mau ano yonotacahuun un mato ahuun rafan inansharanon,” ato huaiton. Nicacani fonifo yonoi focani.

⁵ Ascano mau ifo afanan fari masafinin racano caaquin oian atirifi nocofunufoan ahuushta huatama niafo oinquin. Ato yoini, “Uhuun mau ari fotocahuun,” ato huaino man foafono. Afanan man fari cushca cainnaino macushcamuano atirifi fuchishon nanscarifi huaquin ato nichini.

⁶ Ascatan man yatai fari nii manaon caano mau ifoan afanan caaquin atirifi fuchini yonocanima niafoan. Ascaiton ato yocani, “¿Ahuuscainun nan shafatisho yonotama man niaquin?” ishon ato yocaiton.

⁷ Cumanifo, “Tsoan ahuashta noco yonoamaran,” huaifoan. “Ascacan marifi uhuun mau ari ua yonoshotacahuun,” ato huani.

⁸ Ascashon man yamuaino mau ifoan yonona niaifo patashari yononi, “Ua yonoshonaifo cunahuu nan yonoafo rafanan ato inanshquin. Ascashu ato inanqui tau huahuu nan ahuun unutaqui foafo yafi nan foi tauafo,” ishon yononi.

⁹ Ascaino man fari nii manaon caano foafo. Nanfo ato inanni naan shafa fusti yonoa shinantsa huaquin.

¹⁰ Ascano nan funamanrishta yonoi tauafoan oincaquin yoinifo, “Mau ifoan ato inanshara. Ascان nonfin paratama yonoaquin. Ascacun noco fasi paratamacoin inainran,” ishon shinannifo. Ascafia nan chipo iquiafo ato inan cuscari ato inanqui huani.

¹¹ Ascashon ato yonohuunshon ato inainton ficani mau ifoqui tsain chaca huacani ari ranan yoinancaquin yoinifo.

¹² “Ascان nonfin nan shafatishon yonoaquin. Fari isicoin muran. Ascان man fari caino chipo fuafo min ato inan cuscan huaquin nocorifi min inainran,” ishon yoiiafoan.

¹³ Mau ifoan futsa cumaqui isca huani, “Uhuun yorashta. Uncai mia inanqui chaca huama. ¿Ascان manmun u futan shara huama man shafa fusti yonoaihuunoo? Man manfin ‘Shararan’ huaaquin.

¹⁴ Ascان naquian min pui fiihuu min pushu ano catashquin. Ascان nan fari man nii manaon caano yonoafo nan un mia inain cuscan nanfori un ato inansharapai.

¹⁵ Nan un ato inanpaiyai cuscan un ato inantiro. Nanmain uhuun puicufin. ¿Ascان ahuuscaquin nan faricaino yonoafo yafi man uqui shinain chacaimun? Unfin futsafori shara huapaiquin,” ishon mau ifoan ato yoini.

¹⁶ Ascان nanscarifiai Upa Diosin nan icoinra huaqui tau huafo ato shara huaa cuscan huaquin nan chipo icoinra huafori nanscarifi ato shara huairan, —ishon Jesús ato yoini.

Naashquiai cuscahuunoo afanan Jesús yoi futsani

Mr 10.32-34; Lc 18.31-34

¹⁷ Ascashu Jesús Jerusalén ano caquin doce non afu rafuafo noco fusti futsano yonin nannonshon noco yoiquin isca huani,

¹⁸ —Non Jerusalén ano canon. Nannoshon futsan ua ato achimai nan nocon niaifofu futan Moisés tsain tapimamisifoanri ua chaca huacaquin yoicani isca huacaquin, “Jesús rutucahuun,” ishon yoifocani.

¹⁹ Ascashon caifo futsafori ua inancani nanfoan ua cashu mutsama huafain fichi cunouqui tuchiaton ua coshacani. Ascatan ihui coyan iquinanqui ua mastacani un nanon. Ua asca huafiafo osha rafu non fustitan Upa Diosin afanan ua funimairan, —ishon noco yoini.

Juan futan Santiago ahuan yocani cuscan

Mr 10.35-45

²⁰ Ascano Zebedeo ahuan facu rafu Juan yafi Santiago ahuan ato Jesusqui yoini. Ascatan aqúi nocoshon ahuan Jesús ratoconun mai chachishoni. Ahuara futsa yocapaiquin.

²¹ Ascaiton Jesús yocani, —¿Min ahua yoipaimun un mia ashonon? —huaiton. —Ifon, Upa Dios icari nantiffain min aton niaifo icaitian uhuun facu rafu mifu niaifo patashari ato imahuu. Ascatan niaifoan ahuan tsaoti ano min tsaositian uhuun facu rafutan mia naqui huashu tsaononfo, —ishon yoiaiton.

²² —Man ua yocai cuscacai man tapiama. ¿Un omitsiscashquiai cuscan man ufu omitsiscatromun? —ishon Jesús ato yocaiton. Cumanifo, —Ai. Non mifu itiroran, —huaifoan.

²³ Ato cumani, —Icon marifi man omitsiscacai. Ascafia uncai yoitiroma tsoanmain ua naqui huashu tsaocai. Uhuun Upa Diosin fustitofin tapiaquin. Nan catoanfosi ufu nanno tsaotiroran, —ishon ato yoini.

²⁴ Ascaiton nicai non afu rafuafo atirifi mucu rafuti nan nanu rafuqui non fasi sinacoinni Jesús naqui huashu tsaopaiyaifoan nicai.

²⁵ Non ascaiton tapishon Jesús noco cunashon yoiqui isca huani, —Uqui fucahuun un mato yoinon. Nan icoinra huafoma niaifofu ato curushcain yonofafainmisifo. Aton niaifo patasharifoanri ato yoiqui isca huamisifo, “Nonfin mato ifoquin. Ascacun non mato yoia cuscan man noco ashorisca huatiroran,” ishon curushcai ato yoimisifo.

²⁶ Ascafiaifoanno ato cuscara iyamacahuun. Man ratoran futsan niaifo ipaiqui maton oinmati man shara huafafainmisi itiro.

²⁷ Ascatan man futsan futsafori finonpaiyaino ahuan yonomati man itiro.

²⁸ Nanscarifiai futsa ua ashononcai un oama. Ascatarocon un futsafo ashoyoi ua oa. Ascataru un atohuunoashu naashquin un oni afanan Satanás ato ifon inonma, —ishon noco yoini.

Jesús fusho rafu caya huani

Mr 10.46-52; Lc 18.35-43

²⁹ Ascatan non Jericó anoashu caiton yorahuanrasifain noco mufainifo.

³⁰ Ascaino nannori fai cusumun fusho rafu tsaofu ini. Jesús fain caiton nicaquin nan rafutan cunanifo isca huaquin, —Ifon, minfin David ahuan funaquin. Nocoahuun ramapaipun, —ishon cunanifo.

³¹ Ascaifoaan yorahuanrasafain ato asca huanifo afanan tsainonfoma. Ato asca huafiaifoaanno oi ashcafinin afanan cunanifo, —Ifon, minfin David ahuun funaquin. Nocoahuun ramapaipun, —huariaifoanno.

³² Jesús nituacucahuan ato cunashon yocani, —¿Un mato ahua ahusca huashotironun? —ishon ato yocaiton.

³³ —Ifon, non fasi oinpaicoin, —huaifoaan.

³⁴ Jesús atohuun ramapaiquin aton furo muainno cayariscatan oinsharanifo. Ascashon nan rafutari Jesús mufainifo.

21

Jesús Jerusalén ano cani

Mr 11.1-11; Lc 19.28-40; Jn 12.12-19

¹ Ascatan non Jesús fu cai Jerusalén chaima non noconi. Nan chaimari pushurasi futsa ahuun anu Betfagé machi Olivo tunanman ini. Nanno nocoti chaima Jesús afu rafuafo rafu pushurasi Betfagé ano ato nichini.

² Ato nichiataima ato yoiqui isca huani, —Nan pushurasi ano fotacahuun. Nanno nocoshon man oian burro facuya nushua man fuchicai. Nan tupushon nuri ua ihuushotacahuun.

³ Futsan mato yocaiton ato yoicahuun, “Nocon Ifo yopaiton non iyoshoni cai. Ascafia non mato nasorisca huairan,” ishon ato yoitacahuun, —Jesús ato huani.

⁴ Jesús acai cuscan huaquin nannori ahuunoa Diosin tsain yoisimison cununi.

⁵ Ascano cunuquin isca huani,

“Jerusalén anoafo yoihuu isca huaquin, ‘Oincapon. Mato niaifocoin matoqui oi. Nan burropan facu camaqui tsaoshu matoqui oi. Nancai nocofunu ahuaton curafiapaitama shara fustisi oitsii huafain fusti yoitiroran,’”

ishon Diosin tsain yoisimison ahuunoa cununi.

⁶ Ascatan nan rafutan Jesús ato yoia cuscaicoi huashonifo.

⁷ Ascashon burro yafi ahuun facu Jesús iyoshonifo. Iyoshocata burropan facu camaqui ato camisa fucashonafoaanno acamaqui Jesús tsaoinacahuani.

⁸ Ascatan caiton yorahuanrasifoan fai naman cayan afufori aton camisafo fucashonifo. Ascaino atrifiton shupa shatushon nan caifufori nichinifo.

⁹ Ascano nan yorahuanrasi afufori foaifo futan acachori foaifoan nantififain oi ashcafinin yoinifo.

¡Aicho! David nocon niaifo ipaoniton ahuun funa nocoqui oi. Nanfin Dioshuunoaahu nocoqui oiquin. Ascacun Upa Diosin nan shara huahuu,

ishon yoinifo.

¹⁰ Ascashu Jesús Jerusalén ano caiton nicacani nantifi yorafo mustairicatan afi ranan yocanonannifo, —¿Tsoamun naaquin? —icashu.

¹¹ Ascaifoaan nan Jesús fu foafoan yoinifo, —Nanfin Jesusquin. Diosin tsain yoisimi. Nanrifí pushurasi Nazaret nan Galilea anoaquin, —ishon yoinifo.

Jesús Dios fu tsainti pushu muranshon ahuara chacafo potani

Mr 11.15-19; Lc 19.45-48; Jn 2.13-22

¹² Asca huatan Jesús Israelifoaan Dios fu tsainti pushu muran iquitoshiquin oian amuranoashu ahuara inanmitsashon pui fiaifoan oinqui nan sapa acamaquishon pui fiaifo finifoaan arasaquin futsani. Ascashon nan ruhui inanmitsaifoaan aton tsaotiri finifoaan potaquin futsani.

¹³ Ascashon Jesús ato yoini, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufiani nan yomutsofoan ichananti cuscara man huapairan, —ishon ato yoini.

¹⁴ Ascaino fushofo yafi nipaiqui ranainfo Dios fu tsainti pushu muran Jesusqui funifo. Ascacun ato caya huani.

¹⁵ Ascaiton nan Dios fu tsainti pushu muranshon unimacaquin facufoan oi ashcafinin yoinifo, —¡Aicho! Nan David ahuun funa Jesús fasi shara. Ascacun nan shara huahuun, Upa Diosin, —ishon yoinifo. Tsoan atiroma cuscan huaquin Jesús ato shara huashomisi ascaifoaan nicai Israelifoaan niaifofo yafi Moisés tsain tapimamisifo sinacoinnifo.

¹⁶ Ascashon nanfoan Jesús yoinifo, —¿Nan facufoan yoiaifo cuscan min nicaimamun? —ishon yoiafoan ato cumani, —Aifain. Munfin nicaiquin. ¿Ascán marifi nan Diosin tsain cununi cuscan man man nicamisimun? Cunuqui isca huani,

“Mihuunshon facufoan mihuunoa tsain shara yoicaniran,”

—ishon cununi.

¹⁷ Anori ato yoitan atomaquinoashu no fu cai pushurasi ahuun anu Betania ano cani. Nanno osha fustiyoni.

Fana higuera fimi yamacai yaiton Jesús ahuun tsainmansi namani

Mr 11.12-14, 20-26

¹⁸ Iyoconaino Jesús Jerusalén ano cai fonaincoinni.

¹⁹ Ascashu caquin oian fai cusumunri fana higuera fuchini. Ahuun fimi pipaifia ahuun puifosi ini. Ascacun nan fana Jesús yoiqui isca huani, —Afanancai min fiminacamaran, —ishon yoini. Yoiquin asca huaino fana tsasisiriscatani.

²⁰ Ascaiton oin non afu rafuafo non mustairini. Ascashon non yoini, —¿Ahuuscashumun nan fana tsasisiscaquin? —ishon non Jesús yocaiton.

²¹ Noco yoini, —Un mato icon yoinon. “Un icoinra huai iyamarai un icoinra huaimaran,” ishon shinantama man icoinra huacoishon un fana tsasi huaa cuscan marifi man nanscarifi huatiro. Ascashon machiri man yoitiro, “Tsucucaí. Unuhuan muran pacuhuu,” man huaino unuhuan muran pacuriscatiro.

²² Ascacun man icoinra huacoishon ahuarashta man Upa Dios yocaiton mato ashotirotan, —ishon Jesús noco yoini.

Jesús noco yonotiro

Mr 11.27-33; Lc 20.1-8

²³ Asca huatan Jesús Israelifoan aton Dios fu tsainti pushu muran iquishon ato yoiaino Israelifoan aton niaifofo aqui funifo. Aquí fucashon yocanifo, —¿Min acai cuscan tsoan mia yonoamun? —ishon yocaiton.

²⁴⁻²⁵ Jesús ato cumani, —Urifi un mato yocai. ¿Juanpan yorafo unu muran iquimapa-cuni tsoan yonoa asca huanimun? ¿Diosin iyamarai nocofunifoan yononifomun? Man ua cumasharaiton urifi un mato cumatiroran, —ishon ato yoiaiton. Nicacani afiranan yoinannifo —Diosin Juan nichiniran non huaiton Jesús noco yoitiro, “¿Ascan ahuuscaquin man Juan icoinra huamamun?” noco huatiro.

²⁶ Ascan Juan nocofunifoan nichiniran non huaino yorafo nocoqui sinatirofo. Nantifi yorafoanmain yoisimisifo “Juanpan Diosin tsain yoisimisan,” ishon. Ascacun noco asca huatiroforan, —icashu niaifofo yoinannifo atoque musucani.

²⁷ Ascashon Jesús yoinifo, —Noncai tapiama tsoanmain Juan yonoaquin, —ishon yoiaifoan. Jesús afiri ato yoini, —Urficai un mato yoima tsoanmain ua yonoa un ahuarafu huaiquin, —ishon Jesús ato yoini.

Pushco rafuhuunoa ahua futsa ato yoini

²⁸ Asca huatan ato yocani, —¿Man raquiri shinainmun? Nocofunu facu pushcohuai rafuya ini. Ascashon furu iyoa apan yoini, “Upashta, nocon mau ano yonotahuun,” huaiton.

²⁹⁻³⁰ Furumun cumani, “Ma, upa, un yonoicaimara,” huafiashu chipo shinan futsashu cani. Ascashon furu chipocuri yoini, “Upashtan, nocon mau ano yonotahuun,” huaiton. “Aí, upa. Mun yonoicairan,” huafiashucaí canima.

³¹ ¿Ascan rato ahuun facu rafu nan apa yoia cuscacoin animun? —ishon Jesús ato yocaiton. —Nan iyoaran, —ishon cumaifoan. Afanan ato yoini, —Un mato icon yoi. Nan yora chacafo niaifo pui fishomisifo yafi ainfo furomafoanri ua icoinra huacanashu nanfo Diosin nantifi iquinai ano iqui tautirofo. Ascan mancai ari iquitiroma.

³² Juanpan mato yoisharapaoni isca huaquin, “Man chaca huamisi cuscan shatufain natian Dios shinancahuun,” ishon mato yoipaoni. Ascafiacaí man icoinra huanima. Nan niaifo pui fishomisifo fuan ainfo furomafoanri icoinra huaifoan oinfaquicai maton chaca shatuyamafain man icoinra huamisimaran, —ishon Jesús ato yoini.

Mau yonomisi chacafihuunoa ahua futsa ato yoini

Mr 12.1-12; Lc 20.9-19

³³ —Nicacahuun un afanan ahua futsahuunoa un mato yoi mato tapimashquin. Mau ifoan ahuun mau ano fimi ahuun anu uva fanani. Ascashon ahuun fimi ica cuscan toquiri cunuacuni ahuun fimi fana ahuaton chaca huanonma. Asca huatan mai quini huashon amuran uva huashon ahuun tau puama puama anifo ahuun fimi unu fiishcaquin. Ascashon toquiri cuyacoin masoni anoshon ahuun yonomatinin cushushonon. Asca huaquin anaitishon futsafo yoini ahuun mau cushushononfo. Asca huafaini mau ifo mai futsa ano cayoni.

³⁴ Ascashu man fimi ano mau ifoan ahuun oinmati futsafo mau ano nichini ahuun fimi fishononfo.

³⁵ Ascano nocofoan fimi cushumisifoan ato achicashon futsa sutufain futsa rutucoin-fain futsari toquirinin tsacaqui futsanifo.

³⁶ Ascano mau ifoan ahuun oinmati ichapama nichiqui tau huani. Ascashon afanan acachori fasi paratama nichini. Ascafia nanfori ato chaca huanifo.

³⁷ Ascashon mau ifoan shinanni, “Uhuun facucoin un nichicuraca nicatirofoati,” ishon ahuun unutaqui furucoin nichini.

³⁸ Ascashon apa nichian caiton oincani nan fimi cushumisifo ahuun yoinancaquin yoinifo, “¡Oincapon! Mau ifoan ahuun facu oi. Na maufin apanaquin. Ascafia apa chipo ahuun facu inanshquin. Ascacun non rutunoncahuun nocona mau inon,” icashu yoinannifo.

³⁹ Ascatan furu iquicuranaiton achicashon mau tsisumun sharafoshon rutunifo.

⁴⁰ ¿Ascán mau ifo oshon nan fimi cushumisifo ato ahuusca huashquimun? —ishon ato yocaiton.

⁴¹ Cumanifo, —Nan yora chacafo rutui atohuun ramapaitama nanonfo. Ascashon ahuun mau futsafo cushumani cushusharashononfo. Nanfoan man fimicun cashcu futsa mau ifo inanonfo, —ishon yoiainfo.

⁴² Jesús afanan ato yoiqui isca huani, —¿Diosin tsain cununi cuscan man man oinmisimamun? Isca huaquin cununi,

“Pushu yonomisifoan pushu quishi shara potanifo. ‘Nan sharamaran’ ishon potafiafo pushu ifoan afanan fiini nanhuunoashu pushu mutsisipa inon.” Nanscarifiai niaifofoan Diospan facuhuunoa isca huaqui yoishquicani, “Nacai ahuama. Sharamaran,” ishon yoiqui potashceni. Ascafia Upa Diosin ahuun facu catoan ahuunoashu nantifi ahuun yorafo nipanonfo. Ascacun non yoitiro “Diosin Furunhuunshon aca cuscan fasi shararan,” ishon cununi.

⁴³ Ascacun Diosin maton niaifocoin ipai ahuun yorafo ato iquifai ato iquipacushquin. Ascafia man Dios nicacasmaiton futsafo catonshquin a fu ipanonfo.

⁴⁴ Unfin nan pushu quishi cuscaraqui. Futsafoan uhuunoa cayacafi tapimana cuscan icoinra huayamashu funocoinshceni. Un atoqui sinaqui omitsiscapanacafo muran un ato potashquin, —ishon Jesús ato yoini.

⁴⁵ Ascaiton nicacani Israelifoan aton niaifofo futan Fariseofoan tapinifo atohuunoa Jesús yoiainfo. Nanfoan icoinra huafomahuunoa ato yoini.

⁴⁶ Ascano ahuun yoinannifo, —¿Ahuuscashomai non Jesús ato achimanan ranushumuaton rutunon? —ishon shafatifi shinannifo. Ascafiaifoanno yorafoan yoinifo Jesús Diospan tsain yoimisirán ishon ahuunoa yoinifo. Ascacun na yorafoan yoiainfo cuscan tapinifo niaifofo yafi Fariseofoan yorafoqui musucaquin Jesús achimatai inifoma.

22

Nocofunu yafi ainfo fianantirohuunoa ahuara futsa ato yoini

Lc 14.15-24

¹⁻² Afanan Jesús ato yoiqui ahuara futsa ato tapimanon isca huani, —Upa Diosin niaifoan ahuun yorafo iquinaimain ahuu cuscaraquin un mato yoinon. Ua nicacahuun. Niaifoan ahuun facu ainfo fiaino ato chanihuani ichananshon ato futan pifain atofu fasi unimashquin.

³ Ascano man itisharashon ahuun oinmatifo nichini nan ato chani huaifo ato ihuitanonfo. Ascafiafai tsoan opainima. Fucasmarocon anifo.

⁴ Ascatan afanan oinmati futsafori nichiqui yoini, “Ato yoitacahuun. ‘Uhuun facu ainfo fiaino mun tushu itishara huaaquin. Moi rafu rutufain yoina shoa sharari un rutuaqui pii funonfo.’ Nannori ato yoitacahuun,” ato huani.

⁵ Ascano focashon ato yoiifiafo afanan fucasmanifo. Atirifi aton mau ari fonifo, pashaifocani. Atirifiri ato inanmitsati ari fonifo.

⁶ Ascán atiri nanno nituafoan niaifoan ahuun oinmatifo achicashon ato sutufain atirifi ato rutucoinnifo.

⁷ Ascano ahuun oinmatifohuunoa nicai niaifo fasi sinacoinquin ahuun ranushumuafonichini a rutumitsamisifo ato rutuqui cuyofain aton pushufo coanonfo.

⁸ Asca huatan niaifoan ahuun oinmati futsafo yoini, “Uhuun facu ainfo fiaino un tushu ichapa itishara huaa ato futan piishquin. Ascafia futamarocon fasi chaca huafo. Asca huashucaí afanan futirofoma.

⁹ Ascacun nan fai uhuapafo nanno nan yora ichapa fotirofo ano fotacahuun. Ratoran futsafo fuchicashon ato yoicahuun Funonfo,” ishon yoini.

¹⁰ Ato asca huaino focashon nan fai uhuapafo ano ratoran futsafo fuchicashon ato ihuunifo. Yora sharafo ihuufain yora chacafori ihuunifo. Ascano nan niaifoan ahuun facun ainfo fai pushu muran yorahuanrasi fospicoinnifo.

¹¹ Ascatan niaifo pushu muran iquini nantifi fuafo ato oinpai. Ascashon oian nantiffain sahuuti shara sahuuafo ini. Niaifoan ahuun facu ainfo fiaino sahuuti funa sharacoin ato sahumani. Ascafiaquin oian nocofunu futsan sahuuti shuni sahuua niaifoan fuchini.

¹² Fuchishon yoiqui isca huani, “Ahuuscai sahuuti sharacoin un ato sahumana cuscan min sahuuamamun. ¿Ahuuscai ascara min iquiamun?” ishon yocafainocai nan nocofunu pusinima.

¹³ Ascaiton niaifoan ahuun oinmatifo yononi, “Nan nocofunu munushfain onushushon faquish muran potacahuun. Nannoashu uaicaifoanno omitsiscapashanon,” ishon ato yoini.

¹⁴ Nanscarifiai Upa Diosin yora ichapa cuna a icano funonfo. Nan ahuun facu noiaifosi afu ipanacafo. Ascafia Upa Diosin fustrirasi ato catoin nan icoinra huafosi afu ipashanonfo, —ishon Jesús ato yoini.

Niaifofoan aton caifofo pui yocamisifohuunoa

Mr 12.13-17; Lc 20.20-26

¹⁵ Ascatan Jesús ato yoiái cuscan nicacani Fariseofo Dios fu tsainti pushu murannoashu chifi focanashu yoinannifo, —Non Jesús ahuaara yocanon. Noco amaquiri cumaquin chaca huaiton non cunu muran iquimanon, —icashu ahuun yoinannifo.

¹⁶ Ascashon Herodes ahuun tanamisifo yafi atohuunshon tapimisifori Jesusqui nichinifo cucun huaquin yocatanonfo. Ascano focashon yocaiqui isca huanifo, —Tapimamisiton, man non tapián min icocoin fusti noco yoifafainmisi. Upa Diosin noco amapaiyai cuscan nannoricoin min noco cayacafi yoimisi. Mincai ahuaara yoipai ranomisimari. Nan min noco yoiái cuscan cayacafi min yoimisi. Ahuaricai min fomamisima. Yora ahuaton cunama min yoimisi cuscan huaquin niaifofori min yoitiro.

¹⁷ Ascacufin min shinain cuscarí noco tapimahuu. ¿Nan Romanonfoan aton niaifo Cesari pui inanfo cuscan norifi non inantiromun? —huaifoan.

¹⁸ Nan fuparamitsamisifoan cucun huaquin yoiáifo cuscan onanshon Jesús ato yoini, —Fuparamitsamisifoan manfin ua amaquiri cumamapaiquin ranushumuafon ua achicashon ua cunu muran iquimanonfo, —ishon ato yoitán.

¹⁹ —Toro ua ismacahuun. Nan man ahuunshon niaifo inanmisi, —ato huaiton. Toro fushonifo.

²⁰ Ascashon Jesús ato yocani, —¿Tsoa ointsa torohuun nuamun? ¿Tsoan ahuun anuri nuamun? —ishon ato yocaiton.

²¹ —Niaifo Cesarinnaran, —huaifoan. —Ascan Cesarinacun nan inancahuun. Ascan Diosinacun Diosiri inancahuun, —ishon ato yoiáiton.

²² Nicacani fasi mustairicatan yoinifo, —Jesús yoiái cuscaí tsoan tafitiromaran, —icashu afi ranan yoinannifo. Ascatan amaquinoashu pashcafaini fonifo.

Yora naashu afanan funitirofohuunoa yocanifo

Mr 12.18-27; Lc 20.27-40

²³ Ascano nan shafatari Saduceofo Jesusqui funifo. Nanfoan shinanquin isca huamisifo, —Yora naashucaí afanan funinacamaran, —ishon yoinifo.

²⁴ Ascán nanfo Jesusqui fucashon yocanifo, —Tapimamisiton, noco shuni Moisés noco cunushoqui isca huani,

“Nan ratoran futsa ahuin futan facu acashma naano afu nanua futsan ahuun facahua fitiro a futan facu aashqui,”

ishon cununi.

²⁵ Un mia yoinon. Siete nanupacuafohuunoa. Nanfo nocofu iyopaonifo. Aton iyoacoin ahuinyain tauni. Ascafiashon a futan facu acashma nani. Ascano chipocuton ahuun facahua fiini.

²⁶ Ascashu arifi a futan facu acashma naani. Ascano chipocu futsari fiini. Arifi a futan facu acashma naani. Nanscasiai. Ascacaputan amaqui nai cuyonifo. Aquí facu ayamacaicani.

²⁷ Ascatan ahuun unutaní ainfori naani. Facu nanuyamacai.

²⁸ ¿Ascán ratotocaimun nai muranshon nan yorafo naashu funiaifotian fiishquiquin nan fusti fipashquin amaqui nai cuyoafo? —ishon yocaiifoan.

²⁹ Jesús ato cumani, —Man man funoa. Mancai Diosin tsain tapiamafain ahuun yonoricai man tapiama. Ascashofin amaquiri man ua yoiíquin.

³⁰ Naacanashu funiafocai Dios icari nocotan afanan fianannacafoma. Nantifi Diospan oinmatifo afu nai muran icafo cuscara iishquicani.

³¹ ¿Ascacun yora naashu funishquiaifohuunoa Diosicoinin mato cunushoni cuscan man man oinmisimun?

³² Isca huaquin Diosin yoini, “Unfin Abraham non Isaac non Jacob afoan aton Diosiquin,” ishon yoini. ¿Yora naashu afanan funiyamaino ahuuscashumun Dios fu itiroquin? Ascafia

ascarama. Yora man naafianishaquin afanan nia nanfofin Dios fu itirofoquin. Ascacun Upa Diosifin aton Diosiquin, —ishon Jesús ato yoini.

³³ Jesús Saduceofo yoi'ai cuscan nicacani mustairicatan yoinifo, —¿Ahuuscashomun iscara tsain noco yoiquin? Tsain sharacoin iquinaran, —ishon yoinifo.

Diosin yononi cuscan nantifi sharafiashu nan fusti shara finacai

Mr 12.28-34

³⁴ Ascano Jesús Saduceofo tsain shatumana nicacani Fariseofo afanan aqui funifo yocai fucani.

³⁵ Ascacun Moisés yononi cuscan tapicoian futsan Jesús amaquiri cumamapaquin yocani,

³⁶ —¿Tapimamisiton, Moisés Diosin yonoa cuscan cununi. Ascان nan ratocaimun fasi shara finacaiquin? —ishon yocai foan.

³⁷ Jesús cumaqui isca huani,

“Nocon Ifo Dios noi'iqui fasi mato ointi muranshon noifain fasi mato nomuranshori noifain mato shinanfo yashon fasi noi'ihu,”

ishon Moisés cununi.

³⁸ —Nan yononicaifi fasi shara finacaiquin.

³⁹ Futsari nanscaracuana yonoqui isca huani,

“Nan mifiri min musu huamuai cuscarifi aquin mia chaima icafori noi'ihu.”

⁴⁰ Nantifi Moisés yononi cuscan yafi Diosin tsain yoisifon yosipaonifo nan Diosin yononi rafuhuunoo cununifo. Dios yafi futsafo noicoi'iquin nantifi Diosin yononi cuscaoin man aiquin, —ishon Jesús ato yoini.

Tsoancaimun Cristo ahuun shuni ipaoniquin

Mr 12.35-37; Lc 20.41-44

⁴¹ Ascashu Fariseofo afu ichananfoan Jesús ato yocani,

⁴² —¿Nan Diosin catonni Cristohuunoo ahuu cuscara man shinanmun? ¿Tsoan funacaimun? —ishon ato yocaiton. —David ahuun funaran, —huaifoan.

⁴³ Ato yoini —¿Asca ahuuscai David Diospan Yoshin Sharahuunshon nan Diosin catonni yoi'iqui isca huanimun?

⁴⁴ “Upa Diosin uhuun Ifo Cristo yoini isca huaquin, ‘Minfin ufu niaifocoinquin.

Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’”

ishon Diosin yoini cuscan David cununi.

⁴⁵ ¿Criston David Ifono ahuuscashuon ahuun funa itirumun? —ishon Jesús ato yoi'aiton.

⁴⁶ Nicaquicai tsoan ahuashta cumatiro inima. Ascashu nantifi puusinifoma. Ascان anantiancai tsoan afanan Jesús ahuashta yocanima. Ato cayacafi cumaiton nicacashu aqui ranonifo.

23

Fariseofo futan Moisés cununi cuscan tapimamisifoan chaca huamisifo cuscan Jesús yoini

Mr 12.38-40; Lc 11.37-54; 20.45-47

¹ Asca huatan Jesús afu rafuafo yafi nanno niafo yoini,

² —Moisés cununi cuscan tapimamisifo futan Fariseofoan Moisés yononi cuscan mato tapimacani.

³ Ascان mato tapimanaifo cuscan huacahuun. Ascafishon nanfoan acai cuscan huayamacahuun. Nanfoan Moisés cununi cuscan mato tapimafiaquicai Moisés yononi cuscaoin acanima.

⁴ Mato ahuaa ihuucoin papimafishocai aton mucuman ahuashta mupaicanima. Nanscarifai Moisés yononi cuscan nantifi huacahuun. “Fustishta finonmayamacahuun,” ishon mato yonoafo. Moisés yononi cuscan fasi finonmafain mato huamacani. Ascان marifi apaifaquicai man atiroa. Ascashu maton nomuran man oitsiscafiatocai matohuun ramapaicanima. Mato yonomisifo cuscaai aafi acanima.

⁵ Ascashon nanfoan acai fo cuscan futsafoan yoi'iqui isca huacani, “Nanfofin sharaquin,” ato huamapaicani. Diosin tsain fichiqui cunushon fumananqui nutafain ato sahuuti poyan ocuma rafu nutafain sahuuti chainipari sahuuafo.

⁶ Ascان picani ichananshu nan niaifoan ahuun tsaoti ano tsaoafo nantiffain ato oinonfo. Nanscarifai aton ichananti pushu anori shafacafi tsaotiofo.

⁷ Ascashu nan yora ichaparasi anori fopaicani atohuunoo yoisharanonfo. Nanscafin apaicaniqui. “Tapimamisiton,” ato huaifoan nicapaicani.

⁸ Ascacun “Tapimamisiton,” ato huayamacahuun. Nocon tapimamisifin fustiquin. Naan nocon Ifo Dios. Ascashufin man nantifi yorahuantananquin.

⁹ Ascashori tsoa nuno mai anoa Upa huayamacahuun. Nan nocon Upacoinfi nai ari icaquin. Nan fusti non upa huatiro.

¹⁰ Ascatan “Iforan” ato huayamacahuun. Nocon ifofin fustiquin. Nan nocon Upa Dios. Nan man Iforan huatiro.

¹¹ Ascadari nan man ratoran futsa niaifo ipaiyai nantifiton ato oinmati itiroquin

¹² Tsoan nantifi finonpaifafaini naanfin Diosin ismashquiquin aacai ahuama. Ascan tsoa futsafoan aton oinmati cuscarashon ato shara huafafainai nanfin Upa Diosin chipo niaifocoin imashquiquin, –ishon Jesús ato yoini.

¹³ Ato asca huatan Jesús Moisés cununi cuscan tapimamisifo yafi Fariseofori yoiqui isca huani, –¡Ohua! Moisés cununi cuscan tapimamisifo futan Fariseofoan ua nicasharacahuun. Manfin fuparamitamisicoinfoquin. Upa Dios icano man yorafo iquimapaifiaquicai man ato iquimatiroma. Ascashu marificai man iquitiroma. Iquipaifiafoan man ato catima huaa. Ascacun Diosin mato fasi onaintimaquin finacoishquin.

¹⁴ Ascashon man futsafo matohuunoa shinansharamapaifiai man fasi chacacoinfo. Ainfo tatuomafori parashon man pushu ato fian. Ascatan fasi chaicoiri man cufiriatiro matohuunoa shinansharanonfo. Ascafia manfin fasi fuparamitsamisicoinfoquin.

¹⁵ Ascashu man foanfafaitsia man shinain cuscan yorafori shinanshquin. Ascaqui fusti fuchishon man icoinra huaa cuscan nanrifi man icoinra huama mato cuscara inon. Ascashon man futsa mato cuscara imano fasi chaca finacaia iiquin. Manfin fasi chacacoinfoquin. ¡Ohuashata! Nanrifi matofu omitsiscapanacafo muran cai.

¹⁶ ¡Ohua! Ascacun Diosin mato fasi onaintimai. Manfin nan fusho cuscarafoshiashon man futsafo tapimapaiqui ahuuscashomain Dios tanatirofoquin. Ascan ato tapimapaifiaquicai marifi man tapiama. Ascashon futsafo man yoiqui isca huamisi, “Tsoan yoiqui isca huai, ‘Dios fu tsainti pushu ahuun anuhuunshon un mia yoia cuscan un mia ashonon,’ huafishon chipo man shinan futsashon man yoi ‘Nanscanonquin,’ ishon. Ascafia nan Dios fu tsainti pushu murannoa orohuunshon un mia ashoiran futsa huashon. Nanscacoin huashohuun. Ascan nan non yoia cuscan huashoyamaino ahuara chaca finontiroran,” ishon man yoimisi.

¹⁷ Asca nan icon. Manfin nan fushon futsa iyopaiyai cuscarafoshiashon. Maton mapo curushcoin. Mancai ahuwa tapiama. ¿Ascan rato shara finacaiamun Dios fu tsainti pushu murannoa oro iyamarai Dios fu tsainti pushucoin? Nan Dios fu tsainti pushuanofin Dios itiroquin. Ascan nancaifin shara finacaiquin.

¹⁸ Ascashon marifi man yoiqui isca huamisi, “Tsoan yoiqui isca huai, ‘Nan cufiti camaqui ahuara coamisifohuunshon un mia yoia cuscan un mia ashonon,’ huafishon chipo man shinan futsashon man yoi nanscanonquin ishon. Ascafia, ‘Nan cufiti camaqui un Dios ahuara inanhuunshon un mia yoia cuscan un mia ashoiran,’ futsa huashon nanscacoin huashohuun. Ascan nan min yoia cuscan huashoyamaino ahuara chaca finontiroran,” ishon man yoimisi.

¹⁹ Manfin nan fusho cuscarafoshiashon. Mancai cayacafi shinantiroma. ¿Ascan ratocaimun shara finacaiquin? Nan cufiti camaqui ahuara man inan iyamarai nan cufiticoin. Man cufiahuunshon ina man coashonaino Diosin matoqui unimatiro. Ascafia nan cufiticaifin fasi shara finacaiquin.

²⁰ Ascashon Dios fu tsainti pushu murannoa cufitihuunshon futsa man yoiquifin nan cufiti camaqui ahuara man inan nancoin yoi cafisca man huaiquin.

²¹ Nanscarafi aqui tsoan Dios fu tsainti pushuhuunshon futsa ahuara yoiquifin nan Diosicoin yoi cafisca huaiquin. Nan muranmain Diosicoin.

²² Nanscarafi aqui tsoan Dios ica muranhuunshon futsa ahuara yoiquifin nan Diospan tsaotihuunshon yafi nan Dioscoihuunshon man yoi cafisca huaiquin.

²³ ¡Ohua! Moisés yononi cuscan tapimamisifo futan Fariseofoan manfin fuparamitsamisicoinfoquin. Ascacun Upa Diosin mato fasi onaintimashqui. Moisés yononi cuscan nantifi mato fanafu atirifi man Dios inanmisi. Man asca huafiaquicai ahuara shara finacaia man huamisisima. Ascashuca man futsafohuun ramapayamacain atori man shara huacoianmisima. Mato yorafoan ahuara chaca finonfiacun man ato shara huatamarocon man ato potamisi. Ascan man futsafohuun ramapaicai ato shara huafain ahuara ahuascarafiaino man ato potayamaino Diosin matoqui unimatiro. Ahuara futsafo Moisés yononi cuscan man huamisi cuscan man shara. Ascafia ahuara shara finacaiarocon huacahuun.

²⁴ Ascafia manfin nan fusho cuscarafoshiashon. Fushocai oinsharatiroma yora iyoshqui. Nanscarafi marificai man cayacafi shinantiroma yorafo tapimashquin. Motsa muran napun pacucun man nushfitiro aya shuashquima. Ascafia man nan ina uhuapa

camello shuai cafisca huai. Asca huaquifin ahuafoan yora imasharatiroma man shinan-fafainiquin. Ascafiashon yorafo ahuaara yopacoiainfo cuscaai man ato ashomisima.

²⁵ ¡Ohua! Ascashufin man fuparamitsamisicoinfoquin. Maton cucho yafi purato fuman-cayan choca sharafiaquicai ocumuran man chocamisima fasi choshtacoin. Nanscarifiai man yorafo shinanmapai yorasharaforan mato huanonfo. Ascafia maton nomuranshocai man shinansharamisima. Man shinanchaca fustimisi. Ahuaara fipaiqui futsa chaca huashon man fianmisi. Futsafo yopai cuscan atohuunoo shinantamarocon mafi man fipaiyai cuscan fusti man shinanfafaini.

²⁶ Fariseofoan mancai cayacafi shinansharamisima. Ascacun iquisi mato nomuran cayacafi shinansharacahuun isharashcaquin. Man ascaiton nantifiton ointirofo man yora sharacun.

²⁷ ¡Ohuashta! Ascashufin man fuparamitsamisicoinfoquin. Mahua quini muran yorafo nacun mai huamisifo. Amuran yorafoan shao suyacoinfo. Nan ahuun fupoti toquirinin-huan raishamisifo oshopa sharashta inon.

²⁸ Nanscarifiai futsafoan mato oinqui shinantirofo man yora shara ointsa man sharayamafiacun. Manfin fuparamitsamisicoinfoquin. Mato nomuranshon ahuaara chacacoinfo man shinanmisi.

²⁹ ¡Ohua! Moisés yononi cuscan tapimamisifo futan Fariseofoan. Manfin fasi fuparamitsamisicoinfoquin. Ascacufin Diosin mato onaintimaquin finacoinquin. Ascashon manfin mato shuni Dios tsain yoimisifo mai huanifo ano man ahuaara toquiri onihuamisiqui ato shinanshquin. Ascashori maiifo manaon man charofo huamisi.

³⁰ Ascashon man yoimisi isca huaquin, “Nocon shunifoan Diosin tsain yoimisifo rutunifo cuscan nantian norifi niyoshocai non ato rutu cuanimaran,” ishon man yoimisi.

³¹ Ascan nan man yoiia cuscan icon. Maton shunifo rutumistsamisifoan. Marifi man ato cuscaracoin.

³² Nanfoan ato chaca huafafainqui ato rutunifo. Ascan marifi man ato cuscaraquin na Diosin matoqui nichiarifi man rutushquiquin.

³³ Ascashu manfin rono cuscarafuquin. Rono paupaton facu cuscarafu. Diosin yoini cuscan nan omitsiscapanacafu muran marifi man iquishcani. Tsoancai mato nitun huatiroma. Marifi nanno man catio.

³⁴ Ascacun un afanan Diosin tsain yoimisifo yafi Diosin tsainhuunshon cayacafi shinansharamisifo non ahuun tsain tapimamisifori un matoqui nichishqui. Nanforifi man ato rutushquin. Futsan ihui coyan iquinanqui man mastashquin nanon. Ascashon atirifi maton ichananti pushu muranshon man fichi cunoqui tuchiaon man coshashquin. Ascaquin man ato omitsisca huai nan pushufoti cafoquin man ato omitsisca huafoicaiquin.

³⁵ Ascashofin nantifi Dios icoinra huafo rutunifoqui. Nan Abel shara rutuqui tau huafain ahuun unutaqui nan Zacarías Berequiaspan facu rutunifo. Nanfin Dios fu tsainti pushu muranshon. Anoshon cufiti chaimashon man rutunifo. Ascan manfin nantifi nan rutunifo cuscan marifi man rutui cafisca huaiquin. Ascacun Diosin atohuunshon mato omitsisca huaqui finacoin.

³⁶ Ascacun un mato icon yoi. Nantifi Diospan yorafo chaca huapaonifo cuscan natian man niyoano atohuunshon mato omitsisca huaqui finacoin.

Jerusalén anoashu Jesús yorafohuunoashu uaini

Lc 13.34-35

³⁷ ¡Ohua! Jerusalén ano icafoan. Manfin Diosin tsain yoimisifo rutufain nan Diosin matoqui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yorafoya chushupaifia mancaifin ua nicasmamisiquin. Manricai uqui fumisima un mato cushuon.

³⁸ Ascan natiancai tosan mato cushuima. Diosiricai afanan mato cushuima.

³⁹ Ascacucui man ua afanan oinnacama nan Diosin matoqui nichian un nai murannoashu oaitian. Man yoiqui isca huaino, “Dios nocoqui nichian fasi shara finacaia. Upa Diosin a shara huapanacaran,” ishon man uhuunoo yoishquin, —ishon Jesús ato yoini ahuunoo.

24

Jesús yoini Dios fu tsainti pushu paoinshquiran ishon

Mr 13.1-2; Lc 21.5-6

¹ Ascatan Jesús Dios fu tsainti pushu murannoashu caiton non afu rafuafoan yoini, —lfon, oinpon. Nocon Dios fu tsainti pushu fasi sharashtacoinran, —non huaiton.

² Noco cumani, —Ai. Nan icon. Natian Dios fu tsainti pushu toquiri putsamuashu cunuacua sharashtacoin. Ascafiashu nan man oiain chipo paoincanocai afanan rato

toquirishta tushushquima, putsamushquima. Nantifi paoinquin cuyocoinshquiran, —ishon Jesús noco yoini.

Nan cuyoaitian ahuarafu iishquiai cuscan

Mr 13.3-23; Lc 21.7-24; 17.22-24

³ Ascatan machi Olivo ano mapufaintan Jesús tsaoni tsoa futsa anomano non afu ra-
fuafoan yocaqui isca huani, —¿Nan min yoiai cuscan ahuutian ishquimun? ¿Ahuuscashomun
non tapitiroquin nantifi cuyoaitian min afanan oshquiai? Noco yoihuu, —non huaiton.

⁴ Jesús noco cumani, —Oinfain mato paranonfoma.

⁵ Yora ichapafaoan “Un Cristoran,” ishon mato parapaishcani. Ascashon yora ichapafori
parashcani.

⁶ Ascaino mani futsafo ya futsafo rutunainfoan man nicashquin. Ascara nicacani
ratuyamacahuun. Un mato yoimisi cuscan nanscacoïn aiquin. Ascafia nantifi cuyoaitian
icataima.

⁷ Mai futsa ariafo fu futsafo ya rutunainfoanno mani futsafori mani futsafo ya rutunan-
shquicani. Ascaino mai futsafoanri yora tushuomafo icaifoanno. Mai futsafo ari fasi mai
nayanaiyashquin.

⁸ Nanscaifin omitsiscái taushcaniquin. Ascafia chipo fasi finacai omitsiscashcani.

⁹ Ascano mato achicashon omitsisca huaquin mato rutushcani. Uhuunshon manifotiton
mato noicasmashcani.

¹⁰ Ascaino nantianri atirifi yorafoan ua cachiquiri huashquicani afanancai tsoan ua
icoindra huashquicanima. Nanfo afiranan achinantananshcani noincasmatanancani.

¹¹ Ascaino nan fuparamitsamisifoan yoiqui isca huashcani, “Unfin Diospan tsain
yoimisiquin,” ishon mato yoishcani. Afocai Diosin tsain yoimisiyamafashon yora icha-
pafao ato icoindra huamashcani.

¹² Ascaifoanno fasi yora chaca huaquin finacoïnshcani. Ascashocai afanan atirifi
yorafoan Diosi noishcanima.

¹³ Ascafia nan omitsisca huafiafoan tsoan ua cachiquiri huatama tunufain uhuun tsain
tanasharacun un cushusharatiro Uhuun Upa Diosin icano afu ipasharanon.

¹⁴ Ascaino nan tsain shara Diosin nantifi yorafo iquinaï cuscan manifoti uhuun tsain
yoimisifoan yoiaitian un afanan oshquin.

¹⁵⁻¹⁶ Ascacun Daniel nan Diosin tsain yoimisiton inon pacoai cuscan cunuqui isca huani,
“Dios fu tsainti pushu muran ahuaara fasi chacacoïnfo futsafoan huanonpacoin-
ran,”

ishon cununi. Ascacun nan topicahuun. Daniel cununi cuscacoïn aiton oin nan Judea ano
icafoan machi ari ichoriscatacahuun.

¹⁷ Ascan tsoa pushu fomancayan niashucaï afanan ahuun pushu muran iquitiroma ahuaara
fiishquin. Ascatama ichoriscatacahuun.

¹⁸ Nanscarifiai tsoacai mau ano yonofiai afanan ahuun pushu ano nasotiroma ahuun
sahuuti fiishquin.

¹⁹ Ascacun ohua ainfo nan facu nanuafao yafi aton facu yomumishti chocho acaïfo omitsis-
caashcani.

²⁰ Ascacun Upa Dios cuficahuun nan omitsiscaitian oipacutian yafi tunutianri as-
canonma. Ascan nantian ascayamaino man ichoima.

²¹ Nan omitsiscaitiancai tsoan ascara oniyomisima cuscara fasi yorafo omitsiscái fina-
coïnshcani. Diosin yora onihuaquin tau huani chaincai tsoa omitsiscái ascayomisima.
Ascashocai tsoari afanan omitsiscái ascanacama.

²² Ascashu nan omitsiscáifotian nantifi yorafo cuyocuashquin. Diosin ahuun yorafo nan
catoanfo atohuun ramapaiqui omitsiscáifotian ato shatumariscashquin.

²³⁻²⁵ Ascacun ua nicasharacahuun. Omitsiscáifotiancai icataima iquisi un mato yoïyoi.
Nan omitsiscáifotianri nan fuparamitsamisifo fucani. Fucashon yoïyoi isca huacani,
“Un Cristoran,” ishon yoi yamarai “Un Diospan tsain yoimisiran,” ishon nanfoan yoish-
cani. Ascashon nanfoanri Satanashuunshon tsoan atiroma cuscara mato ismaquin mato
parapaishcani. Ascan Diosin nan catoanfo ato cushuyamaino nanfoanri nan fuparamit-
samisifo icoindra huaacuana. Ascaino nantian mato yoishcani, “¡Oincapon! Nanfin nocon
Cristoqui,” ishon yoi iyamarai, “Nanno chaimashta Cristo nocoqui oaran,” ishon yoiaïfoan
ato icoindra huayamacahuun.

²⁶ Ascashon nanfoanri yoïcani, “Cristo tsoan istaipama ano nocoaran,” ishon mato
yoiaïfoanno ari foyamacahuun. Nanscarifi aquin mato yoishcani, “Criston nan pushu
cunu muran iquiaran,” ishon mato yoiaïfoan ato icoindra huayamacahuun.

²⁷ Uficoin un oaiton man ua shafacafi oinshquin. Canan facaicaiton shafacafi nantio non oinriscatatiro. Nanscarifiai unfin Diospan Facuquin un afanan oaiton nantifi yorafoan ua shafacafi oinshcani.

²⁸ Ahuara naa nanno cotocotofo nocoriscatiro. Nanscarifiai un nocoaitian ua tanamisifo uqui furiscashcani.

Diospan facu nasoaitian

Mr 13.24-37; Lc 21.25-28

²⁹ Ascashu nan omitsiscaifo cuscan anaitiano fari afanan chashayamafain oshuricai afanan chashashquima faquishicoin iishquin. Ascaino fishifori nai ariashu pacu fut-sushquin. Nantifi nai murannoafori nayanaiyaishquin.

³⁰ Ascashon ahuarafu nai arishon un ismai cuscacoin aiton tapitirofo un afanan mai ano nasoai cuscan nantifi yorafoan tapinonfo. Un Diospan facushon un nantifi iquinai cuscan. Un nai murannoashu coin camaqui fotoaiton oincani manifoti nan icoinra huamafo fasi ratucani uaihcani. Uhuun curushhuunoashu un fotoaiton oincani.

³¹ Ascaino nantianri uhuun oinmatifo ufu nai muran ifafo un nichishquin aton manuti fasi curushcai chaan chaan acaino uhuun yorafo manifoti anoafu yafi nai murannoafori uqui fushcani.

³² Ascacun un mato fana huiguerahuunoa ahuara futsa yoinon. Ua nicasharacahuun. Huiguera pui risquisi futsuaiton man tapitiro faritian itiro cuscan.

³³ Nanscarifiai nan un mato yoi ai cuscacoin aiton tapicahuun mun oti chaima nanscaco-in aiquin.

³⁴ Ascacun un mato icon yoi. Ahuarafu un mato yoi ai cuscacoin aiton nataishoma oinyocani.

³⁵ Ascaino nai yafi mai cuyoshquin. Uhuun tsain cayacafi iconcain fiananancai apanacama. Un mato yoi ai cuscacoin aashquin.

³⁶ Asafia ahuutiaran un nai ariashu afanan fotoainocai tsoan tapiama. Diosin oinmati afu icafoanricai tapiafoma. Urifi uhuun Upa Diosin facufiashocai un tapiama. Nan uhuun Upa Diosin fustitofin tapiaquin.

³⁷ Noco shuni Noé niyoano inifo cuscacoinrifiai afanan un oaitian nanscarifi ashcani.

³⁸ Ascaino nantian tsoan Dios shinantama pii sharafain ayafain fiananshara-cainaifoanno. Fai tahuan noconi. Nanscasi ariaifoanno Noé ahuun shashohuan muran iquini.

³⁹ Ascashu iquifiaitocai tsoan tapinima fai tahuan nocoai. Ascashu nantifi yorafo asai futsunifo. Nanscacoindirifi aashcani un afanan oaitian. Ua shinantama afo apaiyaifo cuscasi huariaifoanno.

⁴⁰ Ascaino nantianri nocofunu rafu mau ano yonocani futsa uari cai yamariscatanaino. Futsa nitushquin omitsiscapanacafu muran caashquin.

⁴¹ Nanscarifiai yainfon rafu nanincani. Futsa uari cai yamariscatanaino futsa nitushquin omitsiscapashquin.

⁴² Ascacun itisharacahuun. Un maton ifofiacucai marifi man tapiama ahuutiamain un afanan matoqui oshquicain. Un mato yoi misai cuscan nanscacoindirifi acahuun.

⁴³ Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma.

⁴⁴ Nanscarifiai marifi itisharacahuun. "Iscaino nocon Ifo oimaran," ishon shinanyamac-ahuun. Ahuuscara atanaino un matoqui nocoriscainquin.

Oinmati rafu futsa ifoan yonoai cuscacoin aino futsa nan yonoai cuscacoin aima

Lc 12.41-48

⁴⁵ Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaifo patashari yoitiro isca huaquin, "Uhuun oinmati futsafo ato tushu shafatifi inanhuun. Nanticoin rafu ato pashcananshara huahuun. Ascashon ua ato cushusharashohuun," huafaini catiro.

⁴⁶ Ascatan niaifocoin afanan nocoshon oian ahuun niaifo patashari nan yoi ai cuscacoin aano fasi aqai unimacointiro. Ascashon naan shara huatiro.

⁴⁷ Ascacun un mato icon yoi. Nan niaifoan ahuun oinmati yoi, "¡Aicho! Natian nantifi uhuunafu mian cushusharashotiroran," ishon yoitiro.

⁴⁸ Asafia niaifo patashari chacapan ahuun nomuran shinanquin isca huatiro, "Uhuun ifo funa nasoimaran," ishon shinanquin.

⁴⁹ Oinmati futsafo nantifi sutuqui futsatiro. Ascashon shafatifi nan paunmisifo ya pauncain monocai.

⁵⁰ Ascashon shinantiro isca huaquin, "Natiancai uhuun niaifo oimaran," ifiaino samashta nocoriscaitiro.

⁵¹ Ascashon niaifoan nan niaifo patashari fasi onaintimai. Asca huatan ahuun oinmati futsafo yonoqui isca huai, “Nan omitsiscapanacafo muran fuparamitsamisifo ano nan chaca potacahuun,” ishon ato yoishquin. Ascan nannoashu uaiqui omitsiscapanaca.

25

Diez shomayafohuunoa Jesús ato yoini ahuaara futsa ato tapimashquin

¹ Ascatan diez shomayafohuunoa un mato yoi un oaitian ahuu cuscaramainquin un mato tapimashquin. Ascatan nan diez nan nocofunun rama ainfo fiai manafo atofu fuusishcaquin. Ascafia nan nocofunun ahuun ahuin fiicashu nasoataimacai tsoa afi ranan fuusi tauafoma. Nan diez shomayafaon iquisi lamparina foafo. Nocofunu manai focani.

² Nan mucu fustiti shomayafain tsoancai cayacafi shinansharayamafain itisharafoma. Asca nan mucu fustiti futsafoan shinansharafain iquisi itisharafo.

³ Nan shinansharaimafoancai aton lamparina fofiaquin tsoan kerosene foama.

⁴ Ascafia nan shinansharafain itisharafoan aton lamparina fofain iquisi keroseneri foafo.

⁵ Ascafia nan nocofunun ahuun ahuin fiaicai funa nocoyamaino nan shomayafaon manariacani fasi oshapaicoincani oshafo.

⁶ Ascashu oshafoanno futsan yamu nacucahuanaino oi ashcafinin ato cuna, “Nan ainfo fiicaitan man oiqiyan. Moinifoancahuun. Non ihui sharanon,” ato huaa.

⁷ Ascaino shomayafa moinifoan aton lamparinafo otaqui futsafo.

⁸ Ascashon nan mucu fustiti shinansharaimafoan nan itisharafo yocani “Maton kerosene ichapamashta noco inancahuun. Man nocon lamparina nocaiquin,” ishon ato yocaifoan.

⁹ Nan itisharafoan ato cumani, “Ma. Noconariraca itiroma. Ascan kerosene inanmitsafo ari fotacahuun fiishcaquin,” ato huanifo.

¹⁰ Ascaino kerosene fii focani foaifoanno nan ahuun ahuin fiai nocotan iquicainaino nan shomaya itisharafo afu pushu muran iquiafo fuusishcaquin. Ascashon caincaiti fupofo.

¹¹ Ascaino chipo shomaya futsafo nococashon yoirafo, “Ifon. Noco fupushohuun non iquinon,” huaifoan.

¹² “Un mato fupushotiroma. Icon un mato yoi. Uncai mato oinmisima,” ishon ato yoini.

¹³ Nanscarifiai ahuutiaran un afanan matoqui oshquicain tsoan tapiama. Ascacun itisharacahuun.

Puihuunoa yoiqui Jesús ahuaara futsa ato tapimani

Lc 19.11-27

¹⁴ Afanan un mato ahuaara futsahuunoa yoi. Nocofunu ahuun pushu anoashu chai caquin ahuun oinmatifo cunashon yoiquin isca huani, “Uhuun pui ua cushusharashocahuun,” ato huafaini cani.

¹⁵ Ascashon ahuun oinmati rafu non fusti ato pui inanni. Futsa cinco mil pui inanfan futsa dos mil pui inanfan futsari mil inanni. Nan tapiafo cuscan ato inanpacua. Ascan ato inantan mai futsari cani.

¹⁶ Niaifoan caquin nan cinco mil inan cuscahuunshon samamashta ahuarafo fiashu afanan inanmitsashon ahuun rafanan cinco mil fia. Asca huaquin diez mil man fia.

¹⁷ Nanscarifi aqii nan pui dos mil fiaton afanan dos mil fia.

¹⁸ Ascan nan oinmati mil pui fusti fiaton funocasmaquin mai poquishon amuran ahuun niaifo pui huashoan.

¹⁹ Ascashu fari ranan finontan afanan niaifo ahuun pushu ano nasoni. Nasoshon nan rafu non fusti ahuun oinmati ato cuna ahuutimain fishofoquin ato yocashquin.

²⁰ Ascaino nan cinco mil pui inanniton yoiqui isca huani, “Niaifon, mian cinco mil pui inanni. Ascafia mun mia natian afanan cinco mil fishoan. Ascan oinpon. Naquian,” ishon inanni.

²¹ Ascaiton ahuun niaifoan yoini, “¡Aicho! Mian fasi shara huaa. Un mia yoi cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²² Ascaino nan dos mil pui inanniton arifi yoiqui isca huani, “Niaifon, mian dos mil pui inanni. Ascafia mun mia natian afanan dos mil fishoan. Ascan oinpon. Naquian,” ishon inanni.

²³ Ascaiton nanrifi ahuun niaifoan yoini, “¡Aicho! Mian fasi shara huaa. Un mia yoi cuscacoin min huaa. Un mia ichapama inanfia ahuunshon min yonocoin shara. Ascacun nan un aya cuscan mian cushusharashotiro. Un unimai cuscan mirifi nanscarifiai min ufu unimatiro. Ascacun iquiyohuu,” ishon yoini.

²⁴ Ascán nan mil pui inanniton arifi yoiqui isca huani, “Niaifo, mun tapián mincai tsoa shinainma. Minricai nocohuun ramapaima. Non mia yonoshofaitocai min noco ahua inantiroma. Mina fusti itiroran.

²⁵ Ascacun un ratuqui min ua inan cuscahuunshon ahuarafó fipaifai un funotiroracati, ishon un shinan. Ascacun nan mian inan cuscan un mai muran onua. Ascán natian mun mia fishoan. Oinpon. Naquian,” huaiton.

²⁶ Ahuun niaifoan cumani, “Min fasi chacacoin. Minfin oinmati shanishuniquin. ¿Min shinanmun un futsafo shinainmaquin? ¿Uaraca futsafoan yonoshonaiton un ato ahua inanma?

²⁷ ¿Ascán nannori shinanfiaquin ahuuscaquin mai muran min pui huamun? Asca huatararocon nan pui huamisifoanno min huacun un nocoshon paratamari un fiucanaran,” ishon niaifoan yoini.

²⁸ Ascashon ahúun niaifo patashari yononi, “Nan oinmati shanishuni ahúun pui fianhuun futsa nan cinco mil aya inanshquin.

²⁹ Ascán nan ua icoinra huacoinnafin un fasi paratamacoin inainquin. Ascán nan ua icoinra huama ichapama aya cuscan futsan fiain.

³⁰ Ascacun nan oinmati ahua tapiama chaca faquish muran potacahuun. Nannoashu fasi omitsiscái fasi uainon,” ishon niaifoan yoini.

Cuyoaitian Jesús yoishquin ratofomain afu ipatiro iyamarai omitsiscapanacafó muran focaniquin

³¹ Ascacun un mato afanan yoi. Unfi Dios ariashu mai ano fotoniquin. Ascashu un afanan oaitian nantiffain aton niaifocoin un iishqui. Un Diospan Facucoincun nantiffain ua oinshcáni. Uhuun oinmatifo ufu nai muran icafoya un oaiton. Nantianri un ato yoishquin ratofomain Diospan yorafó iyamarai ahúun yorafomaquin.

³² Ascashu nantifi manifestofi uqui fushcáni. Chashoan cushumisitón ahúun chashoanfo yafi nan chashoan ointsafó aton anu cabra aton ichanan huai. Nan chashoanfosi tiri futsa huafain nan cabrafori tiri futsa huai.

³³ Ascashon ahúun mumihuuri chashoanfo huafain ahúun mushquihuuri cabrafo huai. Nanscarifiai ua tanamisifo un tiri futsa huafain nan ua icoinra huamafo un tiri futsa huai. Ua tanamisifo uhuun mumihuuri huafain uhuun mushquihuuri nan ua icoinra huamafo ato huashquin.

³⁴ Ascátan un Niaifoshon nan ua tanamisifo un yoiqui isca huashquin, “Uqui fucahuun. Uhuun Upa Diosin mato unimamanon. Nan mai onihuaítian matohuunoa shinanquin isca huani, ‘Un icano un ato iquimanonpacói uhuun yorafó inonfo. Uhuunafori atona inonpacoiran,’ ishon Upa Diosin shinanyoni.

³⁵ “Man ua shara huamisi. Ascacun uhuun Upa Diosiri mato shara huashquin. Un fonaicaiton man ua pimamisi. Un nomiaiton man ua ayamamisi. Un matoqui nocoaiton ua oinyamafiamisishaquin man ua yoiqui isca huamisi, ‘Uhuun pushu muran iquiyohuu. Un mia pimafain min nuno uhuun pushu muran oshatiro.’

³⁶ Un sahuutiromacuri man ua sahuuti sahuumani. Un isinincaitori man ua cushusharamisi. Ua cunu muran iquimanafoanno man ua oin camisiran,” ishon ua tanamisifo un yoishqui.

³⁷ Ascacun ua tanamisisharafó uhuun Upa Diosin aton chaca soashona. Nanfoan ua cumacaquin isca huashcáni, “¿Ifon, ahúutian non mia oinmisimun min fonaincaiton non mia pimafain min nomiaitori non mia ayamamisi?

³⁸ ¿Ahuútiaritsi min nocoqui nocoaiton non mia oinyamafiamisishaquin non mia nocon pushu muran iquimafain min sahuutiromacuri non mia sahuuti sahuumamisi?

³⁹ ¿Ascán ahúutiaritsi mia cunu muran iquimanafoanno non mia oincani?” ishon ua yoishcáni.

⁴⁰ Ascaifoan un aton niaifoan un ato yoiqui isca huashquin, “Uhuun yorafó nan ua icoinra huafó futsafoan atohuunoa yoiqui isca huamisi ‘Nancai ahúamaran,’ ishon man yoimisi. Asca nan uhuun yora ahúamafíashu man ato shara huamisi cuscafin nan uari shara huai cafisca man ato huamisiquin,” ishon un ato yoishquin.

⁴¹⁻⁴³ Ascashon nan ua icoinra huamafo tiri futsa niaifoan un ato yoiqui isca huashquin, “Manfin ua chaca huamisiquin. Un fonainfiatocai man ua pimamisima. Un nomiaitoricai man ua ahuaarayamamisima. Un matoqui nocofiatocai ua oinyamafiamisishaquin man ua pimayamafain un sahuutiromafiacuri man ua sahuumamisima. Un isinincaitoricai man ua cushumisima. Ua cunu muran iquimanafoanno cai man ua oincamisima. Ascacun umaquinoashu fotacahuun. Nan yoshin chaca Satanás yafi afu yoshin chaca futsafo Upa Diosin ato chi urumanhuan itishara huashoan nannori mato potai. Nannoashu nanfoya man omitsiscapashquin,” ishon un ato yoiaiton.

⁴⁴ Nan ua icoinra huamafoan ua cumaquin isca huashcani, “¿Ifon, ahuutiamun non mia oinmisiquin min fonaincaiton non mia pimayamafain min nomiaiton non mia ayamamisima? ¿Ahuutianmun min nocoqui nocofiaiton oinyamafiamisishaquin non mia cushusharayamafain min sahuutiromacun non mia sahuumamisima? ¿Ahuutianritsi min isinincaiton mia cushuyamafain mia cunu muran iquimafiafo non mia oin camisimamun?” ishon ua yocashcani.

⁴⁵ Ascaiton un ato cumaquin isca huashquin, “Un mato icon yoinon. Nan ua icoinra hua futsafo man yoimisi isca huaquin, ‘Nancai ahuamaran,’ ishon atohuunoa man yoimisi. Ato asca huaquifin nan ua shara huaima cafisca man huamisiquin,” ishon un ato yoishquin.

⁴⁶ Un ato nannori yoiaino umaquinoashu omitsiscapanacafo muran foshcani. Ascaino nan ua icoinra huafo uhuun Upa Diosin aton chaca soashonafo un icano ufu foshcani ufu ipashcaquin, –ishon Jesús ato yoini.

26

Jesús rutushcaquin afi ranan yoinannifo

Mr 14.1-2; Lc 22.1-2; Jn 11.45-53

¹ Ascano noco yoiqui anaititan Jesús afanan afu rafuafofi tsain futsa noco yoiqui isca huani,

² –Man man tapian nocon fusiti shafa man nococuana. [Diosin ahuun oinmati nan afu ica yonoa Egipciofoan aton furun iyoafofosi rutuqui futsani. Ascafiacuicai nocon shunifoan aton furun iyoafofo finonmani ato rutuquima.] Nan non shinanmisi nocon fusiti osha rafutan iqui. Ascan nantianri ua ato achimacani ua mastanonfo, –ishon Jesús noco yoini.

³ Ascan nantianri nocon yorafohuunshon Dios cufimisi niaifofo futan Moisés cununi cuscan tapimamisifo non Dios fu tsainti pushu cushumisifo Caifás pushu ano ichanancani. Nan Caifás nocon yorafohuunshon Dios cufimisi niaifocoin ini.

⁴ Ascashu ichanancashon shinannifo, –¿Ahuuscashomain non Jesús achinoanti rutushquin? –ishon ahuara chanishtahuunshon rutupaicoquin.

⁵ Ascacun yoinifo, –Fusititancaí non achitiroma yorafa fasi mucacani nocoqui sinatiroforan, –icashu yoinannifo.

Ainfoan Jesusqui ininti ocani

Mr 14.3-9; Jn 12.1-8

⁶ Ascatan non Jesús fu Betania ano caní. Caashu Simón pushu muran non iquini. Nan Simón nami tocoi futsua ini.

⁷ Jesús nannoshon noco futan piaino ainfo ininti tsomashu oni aqui ocashquin. Nan moticanun ahuun anu alabastro. Amuran ahuun ininti fasi paratamacoin ahuun pui nuua. Ascashon ainfoan Jesús ahuun mapoqui ininti ocani.

⁸ Ocaiton oin non afu rafuafo ainfoqui non sinacoinqui yoini, –¿Ahuuscaimun nan ininti fasi paratamacoin ahuun pui nuua na ainfoan ocaiqui?

⁹ Nan ininti ocatama inanmitsashon ahuun rafanan pui fishon nan yora ahuuomafo inanshara icuanaran, –icashu non yoinanni.

¹⁰ Ascaiton non yoiai cuscan Jesús onanshon noco yoini, –¿Ahuuscaimun na ainfoqui man tsain chipuicain? Uafin nanton fasi shara huaquin.

¹¹ Manfin yora ahuuomafo fu ipanacaquin. Ratoran shafatan man ato ahuara shara huashotiro. Ascafia uncai nuno mai ano matofu ipanacama.

¹² Ascan nan ainfoanfin uqui ininti ocaquin. Nan yora maiamamaquin ininti ocamisifo cuscan un nataiyamafiaiton na ainfoan ua shinanquin uqui ininti oca. Uhuun caya iquisi itishara huapai ua mai huashquiaifo cuscan.

¹³ Ascacun un mato icon yoi. Nan tsain shara uhuunoa manifotiton yoishcani. Nan ainfoan ua rama aca cuscarí yoishcani. Ascashon ua shara huaa cuscan ahuunoa shinanpacushcaniran, –ishon Jesús noco yoini.

Judaspan Jesús ato achimani

Mr 14.10-11; Lc 22.3-6

¹⁴ Noco nannori Jesús yoaino non afu rafuafo doce futsan ahuun anu Judas Iscariote nocon yorafohuunshon Dios cufimisi niaifofo ano caní.

¹⁵ Ascacaini cashon ato yoiqui isca huani, –¿Un mato Jesús achimacun ahuuti pui man ua inantirorun? –ishon ato yocaiton. Cumanifo, –Non mia treinta toro oshopafo inantiroran, –ishon yoinifo. Asca huatan inannifo.

¹⁶ Ascano nantian Judaspan ahuun nomuran shinanqui tau huani, –¿Ahuuscashomain un ato Jesús achimanoanti? –ishon shinanriani.

Ahuun unutaqui Jesús afu rafumisifo futan pini

Mr 14.12-25; Lc 22.7-23; Jn 13.21-30; 1Co 11.23-26

¹⁷ Ascano noco fusiti shafan man nocoano nan shafa misi farashati maisi non pimisi. Nantian non afu rafuafo Jesusqui cashon non yocani, –Ifo, na shafan nocon fuusititian. Nan nocon shunifoan ato facu iyoafofo Diospan nai oinmati finonmani ato rutuquima nan non shinanmisi. ¿Ascán rani min noco nichipaimun non mia itishara huashonon no futan anoshon piishquin? –ishon non yocani.

¹⁸ Jesús noco cumani, –Jerusalén ano fotacahuun. Nanno nocofunu futsaqui nocoshon yoiqui isca huacahuun. “Nocon tapimamisiton mia tsain fomaqui isca huaa, ‘Un naitian man nocoti chaimashtaqui. Nocon fusititian non min pushu muranshon piiran,’ ishon noco Jesús yoiaran,” –ishon yoitacahuun noco huani.

¹⁹ Ascashu nan noco yoia cuscacoin huaquin cunu muran non itishara huani. Nan-noshori chashoanun facu non pichani piishquin.

²⁰ Man fari caino non afu rafuafoya Jesús sapa ano tsaoni.

²¹ Nannoshon non piaiton Jesús noco yoini, –Un mato icon yoi. Nan ratoran futsan man ua ato achimairan, –noco huaiton.

²² Nicai non pusinima. Ascashon non yocani, –¿Umun, Ifon? –ishon nantifiton non yocapacuni.

²³ Ascaiton noco yoini, –Nan man ufutan taso murannoa misi pocotan piaitofin man ua ato achimaiquin.

²⁴ Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainyamanifin shara icuanaquin, –ishon Jesús noco yoiaiton.

²⁵ Nicaquin Judas, nan ato achimaiton Jesús yocani, –¿Umun, Ifon? –huaiton. –Aifain. Minfiqi, –huani.

²⁶ Ascashon piaifoanno Jesús misi finifoantan iquisi apa Diosin cufiyoni –¡Aicho! Upa, min noco cushusharafafainiran, –huatan noco yoini, –Na uhuun caya cuscara. Picahuun, –ishon torupacushon nocoti inanni.

²⁷ Ascashon cucho finifoan afanan Apa cufini, –¡Aicho! Upa, min noco cushushararan, –huatan cuchoqui fimi unu manuta noco inanqui yoini. –Nantiffain na ayacucahuun, –noco huani.

²⁸ Asca huatan noco yoini, –Naafin uhuun imi cuscarquin. Uhuun imi focain un nai. Nantifi yorafoan chaca huamisihuunoashu un nai aton chaca soashonon. Un ascano yora ichapafu Diosin potapacunonma.

²⁹ Ascacun un mato icon yoi. Uncai funa afanan mato futan ayaima. Nan uhuun Upa Diosin niaifoan nantifi iquinaitian un afanan maton futan ayashquin, –noco huani.

³⁰ Ascano man ahuun tsain yoiqui anaititan Diosin tsain non fanainni. Ascatan machi ahuun anu Olivo ano non caní.

–Pedro min futsafo, “Un Jesús oinmisimaran,” ishon min yoiran, –Jesús huani

Mr 14.26-31; Lc 22.31-34; Jn 13.36-38

³¹ Ascashon afanan noco yoini, –Na yamutafin nantiffain man ua potafaini ichoi caiquin. Diosin tsain cununi isca huaquin,

“Unfi chashoanfo cushumisi rutuicain. Ascaino chashoanfo ichoi futsucaniran,” icashu cununi. Nanscarifiai ua rutuaifoanno na yamutan man uhuunoashu ratufaini ichoicai.

³² Ascafia un funiashu Galilea ano un cai tauicai. Ascano man uqui chipo nocoicashquiran, –ishon Jesús noco yoiaiton.

³³ Pedronun Jesús cumani, –Nantifiton mia potafiaifoannocai un mia potaimaran, –huaiton.

³⁴ Jesús Pedro yoini, –Un mia icon yoi Pedro. Tacara cuoatama min ato yoiqui “Uncai Jesús oinmisimaran,” ishon min ato yoiqui rafunon fusti huairan, –huaiton.

³⁵ –Ma, Ifo. Un mifu nafiaquicai un ato yoinacama un mia oinmisimaran, –ishon Pedronun yoini. Ascaiton norifi nantifiton non nannori yoini.

Jesús Getsemaní anoshon apa cufini

Mr 14.32-42; Lc 22.39-46

³⁶ Ascatan ihuifo mapoano ahuun anu Getsemaní nanno Jesús no fu cashon noco yoini, –Nuno tsaocahuun. Uhuun Upa un cufiyotanon, –noco yoini.

³⁷ Ascatan Pedro yafi Zebedeo ahuun facu rafu Santiago yafi Juan nan rafu non fusti ato iyoni. Nan fasi omitsiscái tauai cuscan shinain fasi ahuun nomuran isicoinni.

³⁸ Ascashon ato yoini, –Un fasi omitsiscái cuscan uhuun nomuranshon shinain mun naacuana. Ascacun nunoshon oinyocahuun. Oshacaquima, –ishon ato yoini.

³⁹ Ato asca huatan chaimashta caashu fuopacucahuan Apa Dios cufini, —Upa un omitsiscaí cuscan mian numatiromainquin ua numahuu. Ascafishon un apaiyai cuscan huaquima nan min apaiyai cuscan fusti ua huahuu, —huani.

⁴⁰ Ascashon apa cufinquin anaititan afanan atoqui oquin oian man oshafo ini. Ascaiton Jesús Pedro yoini, —¿Man u futan Diosin cufiyotiomamun?

⁴¹ Oshacaquima. Dios cuficahuun Satanás mato chaca huamapaiyai cuscan huashcaquima. Ascashon Diosin mato amapaiyai cuscan marifi huapaifiaquicai Diospan curshyamainocai man atiomaran, —ishon Jesús ato yoini.

⁴² Ato asca huatan afanan apa Dios cuficaicani. Cashon apa yoini, —Upa, min ahuara futsa yorafo numashqui atiomamainquin nan min apaiyai cuscan huahuu. Unfi man itisharaqui atohuunoashu omitsiscacaini naashqui, —ishon Jesús apa cufini.

⁴³ Ascashu afanan atoqui oquin oian afu rafuafo afi oshafo ini. Fasi osha murancoianfo.

⁴⁴ Ascaino afanan ato anoashu cashon apa Dios cufini. Nan cufia cuscaicin afanan nannori cufini.

⁴⁵ Ascatan afanan oquin oian afi oshafo ini. Ascaiton ato yoini, —¿Manmun afi moiama? Natianfin nan chaca huamisifoan ua ato achimai fucaniquin.

⁴⁶ Funicahuun. Non canon. Nan nocofunun ua ato achimai man oiquin, —ato huani.

Jesús achinifo

Mr 14.43-50; Lc 22.47-53; Jn 18.2-11

⁴⁷ Ascaino nan Judas Jesús fu rafumisi futsan oaino a yorahuanrasi nopy yafi coshatifo tsomacanasu funifo. Nocon yorafohuunshon Dios cufimisi niaifofoan futan Dios fu tsainti pushu niaifo patasharifoan ato yonoo funifo.

⁴⁸ Nan Judaspan yorafo iquisi yoiqui isca huani, —Un Jesús tamoqui tsoacaiton tapicahuun nanfin Jesusquin achicahuun, —ato huani.

⁴⁹ Ato yoiqui asca huatan samamashta Judas Jesusqui nocoshon ahuun tamo tsoacatan yoini, —Tapimamisiton, man yamuaran —ishon yoiaiton.

⁵⁰ Jesús cumani, —Uhuun yoran, nan mian apaiyai cuscan ua huahuu. Nanscayoi min oaquin, —huani. Ascaiton nan Judas fu fuafoan Jesús achinifo niaifofo ano iyoshcaquin.

⁵¹ Ascaiton Jesús fu rafua futsan nopy fitan nocon yorafohuunshon Dios cufimisi niaifofoan ahuun oinmati pashufain rurani.

⁵² Ascaiton Jesús yoini, —Unuhuu. Min nopy ahuun ona muran huahuun. Nan nopun yora rutuaftin arifi nopun natiroquin.

⁵³ Uhuun Upa Dios un yocaitofin ahuun oinmatifo afu icafo 72,000 ua nichishotiroquin ua cushui funonfo.

⁵⁴ Ascan uafin uhuun Upa Diosin ahuun nai oinmatifo ua nichishotiroquin ua cushui funonfo. ¿Ascafia ahuuscashumun Diosin tsain uhuunoo cununi cuscan un yorafohuunoashu natiromaquin? Ascan uncai Upa Dios cufima ua ahuun oinmatifo afu icafo ua cushunon, —ishon Jesús ato yoini.

⁵⁵ Ascaino nantianri Jesús achipaiyaifoan ato yoini, —¿Unmun yora pofu cuscaracun man ua nopy yafi coshatifo yashon achi fua? Shafatifi un Dios fu tsainti pushu muranshon un mato yoifiaitocai man ua achipaiti huama.

⁵⁶ Ascafia nan man ua acái cuscan Diosin tsain yoimisifoan uhuunoo cununifo cuscan nanscaicin man ua huairan, —ishon Jesús ato yoini. Ascaino non afu rafuafo nantifi non amaqui ichoni.

Jesús niaifofoan ointaifi iyonifo

Mr 14.53-65; Lc 22.54-55, 63-71; Jn 18.12-14, 19-24

⁵⁷ Ascano achicashon nocon yorafohuunshon Dios cufimisi niaifocoinin ahuun pushu ano iyonifo. Nan niaifoan ahuun anu Caifás. Nannori niaifofo ichanannifo.

⁵⁸ Ascaino Pedro acachori cani. Acachori cafiai fishtatama cani. Dios fu tsainti pushu cushumisifoya Pedro niaifofoan umainti ano tsaoni Jesusmain ahuusca huacaniquin ishon oinpai.

⁵⁹ Nannoshon niaifofoan shinanpainifo, —¿Nonmun raquiri huatiroquin Jesús ahua chaca huaran ishon rutushquin? Ahuacai ahuusca huaiton non nicayomisima non rutuai, —icananshu nocon niaifofo afi ranan yoinannifo.

⁶⁰⁻⁶¹ Yora ichapafoan, —Jesús ahua chaca huaran, —ishon ahuunoo tsain chaca yoinifo. Paracaquin. Ascafia niaifofoancai Jesushuunoo ahua chaca iconcoin nicanifoma rutushcaquin. Ascashon futsafoan Jesushuunoo tsain chaca huaquin anaitiafoanno chipo nocofunu rafutan niaifofoan ointaifi Jesusqui tsain chaca huanifo. —Man non nicaitan na nocofunun isca huaquin yoia, “Nocon Dios fu tsainti pushu yorafoan aca cuscan unfi choquiatiroquin. Ascashon osha rafu non fusti finontan un afanan futsa huatiro. Uncai tsufutan atioroma. Urus fustifin un atiroquin,” Jesús iquitaran, —ishon nan rafutan yoinifo.

⁶² Ascano yorafohuunshon Dios cufimisifo aton niaifocoin nan Caifás Jesús yocani, —¿Miqui tsain chaca huafo cuscan icon iyamarai iconmamun? —ishon yocaino.

⁶³ Jesús puusinima. Ascaiton afanan yoini, —Diosin nan nipamisi ahuun anuhuunshon ua yoihuu. ¿Minmain Diospan Furunquin nan Diosin mia catonnimainquin? Ascan natian nannori un mia yonoi. Ua icon yoihuu, —ishon yocaiton.

⁶⁴ Jesús cumani, —Nan mian yoiái cuscafin unquin. Un mato yoinon. Upa Diosin ahuamamishti huatiro cuscan chipo man ua oinshquin. Uhuun Upa Diosin niaifo fu un icun. Urifimain un afu niaifocoiashu. Ascacun un nai ariashu coinfo camaqui oaiton man ua oinshquiran, —ishon Jesús ato yoini.

⁶⁵ Ascaiton nicai nocon yorafohuunshon Dios cufimisi niaifocoin, —Un Diospan Fururan, —Jesús icaiton nicai fasi sinacoinni. Ascacun ahuun sahuuti fashnuqui yoini, —Noncai afanan yorafaon Jesusqui tsain chaca huai yopaima. Manmain nofocoin ahuun tsain chaca nicayamaifin, “Un Diospan fururan,” iquifin Dios chaca huaquin.

⁶⁶ ¿Ascacun man ahuusa Jesús huapaimun? —ishon aton niaifocoinin ato yocaiton. Nantiffain, —A rutucahuun, —huanifo.

⁶⁷ Asca huatan ahuun fusoku cumo michofain sutufain futsan tapasni. Ascashon cashu mutsama huacaquin.

⁶⁸ Yoinifo, —Min Cristomainquin min nantifi tapicoian. Asca tsoan mia acamainquin noco yoihuu, —ishon cashu mutsama huanifo.

—Un Jesús oinmisimaran, —ishon Pedronun yoini

Mr 14.66-72; Lc 22.56-62; Jn 18.15-18, 25-27

⁶⁹ Ascaino Pedro pushu umainti caashu tsaoni. Ascaino nocohuunshon Dios cufimisi niaifoan ahuun oinmati shomayatton Pedro fuchishon yoini, —Jesús Nazaret anoa fu mirifi min afu oaquin, —huaiton.

⁷⁰ —Ma. Mian yoiái cuscacai un tapiamafinquin, —Pedronun aton ointaifi huani.

⁷¹ Asca huafaini caincaiti ano caacon nannoshori shomaya futsanri Pedro fuchishon ato yoini, —Na nocofunufin Jesús Nazaret anoa fu imisiquin, —ishon yoiatton.

⁷² Afanan Pedronun yoini, —Ma. Min yoiái cuscafin Diosin tapiaquin uncai na nocofunu oinmisimaran, —ishon yoini.

⁷³ Sama racatan afu niafoan Pedro yoinifo, —Icon. Minfin mirifi Galilea anoquin. Min tsainhuunshon non mia onanran, —ishon yoiaino.

⁷⁴ Afanan ato yoini, —Uncai mato paratiroma. Diosin ua oin. Un chanicun Diosin ua chii uru muran potatiro. Nantonfin tapiaquin un mato icocoin yoiatton. Ascan uncai na nocofunu Jesús oinmisimaran, —ishon Pedronun afanan ato yoini. Ascaino samamashta tacara cuoni.

⁷⁵ Tacara cuoaino Jesús yoiái cuscan Pedronun shinantani. —Pedron un mia yoi. Na yamutan tacara cuoatima min ato yoiqui rafu non fusti huai. “Un Jesús oinmisimaran,” —ishon Jesús yoiái cuscan shinantani chifi caashu Pedro fasi uaini.

27

Pilato ano Jesús iyonifo

Mr 15.1; Lc 23.1-2; Jn 18.28-32

¹ Ascaino funamanrishta nocon niaifoan shinanpainifo, —Ahuuscashomain non Jesús rutumatiroquin, —icashu yoinannifo.

² Ascatan munushcashon nan Romanon niaifoan ahuun anu Pilato ano Jesús iyonifo.

Judas nani cuscan

³ Asca huashon Judaspan Jesús rutuaifoan nicaquin fasi shinanni. —¡Ohua! Un Jesús ato achimanama shara icuanaran, —ishon shinanni. Ascashu nocon yorafohuunshon Dios cufimisi niaifofo yafi Dios fu tsainti pushu niaifofo ano cani treinta toro paratamacoin ahuun pui nuua ato nasoin cai. Ascacainicashon ato yoini.

⁴ —Unfin chaca huaquin. Jesuscai ahuua chaca huayamafimisin un ato parashon achimanaran, —ishon ato yoiatton. Cumanifo, —Ahuuscaqitsi min noco anori yoiyoi. Noncai ascara tapipaima. Mififin min shinanquin, —huaifoan.

⁵ Nicaquin nan Dios fu tsainti pushu muranshon ato naman torofo saafaini caashu afiri rusfipan tunushumuacucahuatan nani.

⁶ Asca huatan Judas cai cachiori niaifofoan nan torofo topinifo. Ascashu niaifofo afi ranan yoinannifo, —Noccon shunifoan yononi cuscan non ahuun rafanan yora rutumana nan puicai non Dios fu tsainti pushu muran huatiroma. Nan pui huati murancai non huatiroma.

⁷ Na torofohuunshon nan cuti huamisi ahuun mai non finon. Nanno yora futsafo non mai huanon, —icashu yoinannifo.

⁸ Ascasho nan mai anunifo —Imi maiiran, —huanifo. Natianri nannori yoiafo.

⁹⁻¹⁰ Ascano nan Diosin tsain yoisimi Jeremías inon pacoai cununi cuscan natian man nansacoin huaafo. Isca huaquin cununi,

“Israelifoan yoinifo, ‘Non treinta toro inantiro nan nocofunun noco achi-mashocun,’ ishon yoiafo. Nan torofohuunshon cuti huamision ahuun mai fiafo. Uhuun Ifoan ua yononi cuscan un cuti huamision ahuun mai fia. Nanscarifi aqui nanfoanrifi aton torofohuunshon cuti huamision ahuun mai fiaforan,”

ishon Jeremías cununi.

Pilato ano Jesús iyonifo

Mr 15.2-5; Lc 23.3-5; Jn 18.33-38

¹¹ Ascashu Romanon niaifoan ahuun anu Pilato fu Jesús nia ini. Nan niaifoan Jesús yocani, —¿Minmun Judiofoan niaifocoin? —ishon yocaiton. —Nan min ua yoiai cuscafin unquin, —Jesús huani.

¹² Ascashon nocon yorafohuunshon Dios cufimisi niaifofo yafi Dios fu tsainti pushu niaifofoanri Jesús ahuaara chaca huamisiran huafiafoannocai puusinima.

¹³ Ascaiton Pilato yoini, —¿Yorafoan mia chaca huaifo cuscan min nicaimamun? ¿Min ato cumapaimamun? —ishon yoini.

¹⁴ Asca huafiaitocai Jesús cumanima. Tsain ichapa aqui chaca huafiafoanricai fustishta ato cumanima. Ascaiton Pilaton ahuun nomuran shinanni, —¡Aira! ¿Ahuuscai ato cumapaimamun? —ishon shinanni.

Niaifoan ato yononi Jesús rutunonfo

Mr 15.6-20; Lc 23.13-25; Jn 18.38-19.16

¹⁵ Nan fustitian faritifi a cunu muran iquiafo fusti caimaquin Pilato ato yocapaoni. —¿Ratocai man caimaimun? —ishon yorafu yocapaoni.

¹⁶ Nantianri cunu muran iquia nocofunu fasi pofu rutumitsamisi. Ahuun anu Barrabás ini.

¹⁷⁻¹⁸ Jesús ahua chaca huaiyamafiacun. A icai cuscan apaicaquin nocon niaifofo Jesusqui sinacaquin Pilato ano iyonifo. Nan acaifo cuscan Pilato man tapian ini. Ascacun Pilato nanno yora ichananfo yocani, —¿Ratocaimun un mato cainmashotioquin? ¿Barrabás iyamarai Jesús nan Cristo Diosin catoanran man huamisi? —ishon ato yocaiton.

¹⁹ Ato yocatan tsaoshon manani cumaifoan nicapaimun. Ascaino ahuinin cunu fuma aqui noconi. Cunun yoiqui isca huani, —Nan nocofunu Jesús shara. Ahua chaca hua-maquin. Ahuusca huayamahuu. Uhuun namapan un oian ahua chaca huayamafishu omitsiscaiton oin urifi uhuun nomuran ahuunoashu un omitsiscacoinna. Ascacun ahu-usca huayamahuu, —ishon Pilato ahuinin cunushoni.

²⁰ Ascafiacun nocon yorafohuunshon Dios cufimisi niaifofo yafi Dios fu tsainti pushu cushumisifoan nanno ichananfo ato yosiquin isca huanifo, —Jesús noco cainmashota-marocan Barrabás noco cainmashohuun. Ascashon Jesús rutuhuu ishon Pilato yoicahuun, —ishon ato yononifo.

²¹ Ascacun Pilato ato yocani, —¿Nan rafu ratocaimun man fuchipaiquin un mato caimashonon? —ishon ato yocaiton. “Barrabasquian,” huaifoan.

²² —¿Un Barrabás caimashomun un Jesús nan Cristo Diosin catoan un ahuusca huaicai? —ishon ato yocaiton. Afanan nantifiton yoinifo, —Mastahuun, nanon, —huaifoan.

²³ Ascaifoan Pilato ato cumani, —¿Ahuuscacufin? ¿Ahuamun chaca huaquin? —ishon ato yoiaiton. Ascafia fasi curushcain yoirianifo, —Mastahuun, nariscanon, —huanifo.

²⁴ Ascaiton Pilato oian tsoan nicapaitama fasirocon mucai finaifoan. Masu fitan aton ointaifi muchoquimuni. Muchuquimutan ato yoini, —¡Oincapon! Uhuun nuama. Un Jesús cainmapaifainocai man cainmapaima. Manrocon fasi rutupai. Ascan matohuunfi nuuquin, —ishon ato yoiaiton.

²⁵ Nantififain cumanifo, —Nanscanon. A nai nocohuun nuunonquin. Nocon facufohu-unri nuunon, —ishon yoinifo.

²⁶ Ascaifoan nicaquin Pilato Barrabás ato cainmashoni. Ascashon ahuun ranushumuafu yononcun fichi cunocui tuchiaton Jesús coshaqui futsanifo. Asca huashon mastanonfo iyonifo.

²⁷ Nan ranushumuafu Jesús iyoafo anofin niaifoan ahuun pushu iniquin. Ascano nan niaifo cushumisifoan ranushumuafu chifinoafo cunani Jesús oin funonfo.

²⁸ Ascashon ahuun sahuuti shorifain futsa shonan sahumanifo.

²⁹ Ascatan moshu chainipafo maiti huashon maimafain poquiti ahuun mumihuuri tso-mamashon ratoconun mai chachishon yoinifo, —¡Aicho! Minfin Judiofoan aton niaifoquin, —ishon cashu mutsama huanifo.

³⁰ Ascashon aqui cumo michofain ahuun poquiti fiantan ahuun coshapacunifo.

³¹ Ascashofin cashu mutsama huacatan nan sahuuti shonan pucashon ahuun sahuuti-coin afanan sahuumanifo. Asca huatan mastai focaquin iyonifo.

Jesús ihui coyan iquinanqui mastanifo

Mr 15.21-32; Lc 23.26-43; Jn 19.17-27

³² Focani nan nocofunu Simonqui noconifo. Nan Simonfin Cirene anoashu cainniquin. Ascan nan ranushumuaton yononi. —Ihui coyan iquinan noco foshoicahuun, —ishon iyamafainifo.

³³ Gólgota ano fonifo. Gólgota yoia mapo shao.

³⁴ Nanno nococashon Jesús fimi unu pau tashipia osia ayamapaiyaifoan muutacai Jesús apainima.

³⁵ Asca huatan Jesús iyocashon mastanifo. Mastacatan ahuun sahuuti fianpacunifo. Toquiri tocoro rafuya cashuqui nan finonmanaton ahuun sahuuti fiqui tau huani. Ascashon cuyonfianifo.

³⁶ Asca huatan tsaocashon a Jesús mastafa foisnifo.

³⁷ Ascano man ihui coyan iquinanqui mastacashon amanaonri cununifo isca huaquin,

NAN JESUSFIN ISRAELIFOAN ATON NIAIFOCOINQUIN

ishon cununifo. Nannori Jesús icaran ishon mastanifo.

³⁸ Ascashon yomutso rafuri mastanifo. Ocuma futsa futsafain ocuma futsa futsa anifo.

³⁹⁻⁴⁰ Ascashon camacaquin isca huanifo, —¡Cuu! Minfin yoimisiquin nocon Dios fu tsainti pushu min choquiacaí. Ascatan osha rafu non fustitan min afanan futsa huairan min imisi. Mifin numatan ihui coyan iquinanmaquinoashu fotohuu. Min Diospan facumainquin, —ishon roanifo.

⁴¹ Nannori nocon yorafohuunshon Dios cufimisi niaifofo yafi Dios fu tsainti pushu cushumisifo futan Moisés cununi cuscan tapimamisifoan Jesusqui cashumutsamanifo.

⁴² Ascashon yoinifo, —Nanton futsafo numafiatiroshaquin aficai numatiroma. Ascan minmain Israelifoan aton niaifoquin ihui coyan iquinanmaquinoashu fotohuu. Min ascaiton oinquin non mia icoinra huaicain, —ishon roanifo.

⁴³ Ascasho niaifofoan nanno niafo ato yoinifo isca huaquin, —Jesús noco yoimisi, “Unfin Diospan facuqui,” ishon noco yoimisi. Nantofin Dios icoinra huamisiquin. Ascan Upa Diosin a fuchipaiquifin numatiroquin, —ishon aqui tsain chaca huanifo.

⁴⁴ Ascano afu masta rafutan aqui tsain chaca huacaqui roanifo.

Jesús nani cuscan

Mr 15.33-41; Lc 23.44-49; Jn 19.28-30

⁴⁵ Ascano fari masafinin racafiashu nan maitio faquishpacucahuani. Ascashu man fari caino afanan shafani.

⁴⁶ Ascaino nantianri Jesús fasi oi ashcafinin apa cunani, —¿Elí, Elí lema sabactani? —nan yoipai, —¿Uhuun Diosin, Uhuun Diosin, ahuuscaí mian potamun? —huani.

⁴⁷ Jesús ascaiton yorafoan mapo cashon nicacaquin yoinifo, —Nicacapon. Elías cunaiton, —huanifo.

⁴⁸ Ascaino futsa ichoni fimi unu focash muran mishan nanupacufoantan faca tahua shatun mishan tunhuuinifoan Jesús inanpaiquin.

⁴⁹ Inanpaiyaiton atirifoan yoinifo, —Unuhuu. Elías oshomain fotomaicai non oinon, —huanifo.

⁵⁰ Ascano Jesús fasi fiisinacahuani. Fiisinacahuatan naani.

⁵¹ Ascashu Jesús natapaiyaino a Judiofoan Dios fu tsainti pushu murannoa pano puta pochimua aficoín fashnupacucahuani. Nanscatapaiyaino mai nayanaiyainquin. Toquirininhuanfo torufaini.

⁵²⁻⁵³ Ascaino nan Diospan yorafo naacun mahua quini muran mai huanifo. Nan toquirinin huafu fupucui futsuaino Diosin afanan ato nimani. Ascashu Jesús funiaitian nanfori nan mahua quini murannoashu Jerusalén muran iquinifo. Ascaiton nanao yora ichapafaoan oinnifo.

⁵⁴ Ascaino ranushumua niaifo yafi a futan Jesús cushuafoan mai naiyanaiyaicaino ahuara futsafori ahuascaraiton oincani fasi ratucoíncaquin yoinifo, —Iconfinquin. Nanfin Diospan facuquin, —ishon yoinifo.

⁵⁵⁻⁵⁶ Ascaiton nannoshon ainfo ichapafaoan chaicushon oinnifo. Nan María Magdalena non María futsa nan Santiago futan José ahua non Zebedeo facufoan aton ahuari. Nantifi nan ainfofo Galilea anoashu Jesús fu foanfainmisifoan nan apaiyaifo cuscan ato huashomisifo.

*Jesús mai huani**Mr 15.42-47; Lc 23.50-56; Jn 19.38-42*

⁵⁷ Ascatan man fari caino nocofunu ahuashta yopatanaima ahuun anu José nan Ari-matea anoashu cainni. Nantorifi Jesús tanamisi sharacoin ini.

⁵⁸ Nan José niaifo Pilato ano cashon yoiquin isca huani, —Niaifon, un Jesús toquirinin-huan quini muran mai huapai. Un mia yocayoaran, —ishon yoini. Ascaiton, —Jesús ahuun caya José inancahuun, —ishon Pilato yononi.

⁵⁹ Ascaiton José Jesús ahuun caya pano oshopa sharacoinchi raconi.

⁶⁰ Racoshon toquirininhuan quini muran Jesús mai huani. A murancai tsoa maiy-omisima muran mai huani. Ascashon toquirininhuanun fupofaini cani.

⁶¹ Nannoshori María Magdalena futan María futsan tsaoshon oinnifo.

Ranushumuafoan nan mahua quini ano cushunifo

⁶² Iyoconaino tunutitian yorafohuunshon Dios cufimisi niaifofo yafi Fariseofo Pilatoqui fonifo.

⁶³ Focashon yoinifo, —Niashu nan Jesús chanishunin yoimisi, “Un naashu osha rafu non fustitan un afanan funitiroran,” imisi.

⁶⁴ Ascacun min ranushumuafo a maia toquirininhuan quini ano ato nichihuun cushunonfo. Min asca huaiyamaitofin afu rafuafoan ahuun caya onui futirofoquin. “Man funiaran,” icashu chanishcaquin. Jesús chani tauyomisi. Ascan chipocai fin fasi chani finacointirofoquin, —huaifoan.

⁶⁵ Pilato ato yoini, —Manfin mato Dios fu tsainti pushu murannoa maton ranushumuafo a toquirininhuan quini ano ato nichicahuun cushutanonfo, —ishon ato yoini.

⁶⁶ Ascaiton a toquirininhuan quini ano ranushumuafo nichinifo. Nanfoan toquirinin-huan sapa tocoro fuposhon ahuara tuipaton tanyacunifo. Ranushumuafo nanno nichifu-rani funifo nannoshon cushunonfo.

28*Jesús funini cuscan**Mr 16.1-8; Lc 24.1-12; Jn 20.1-10*

¹ Ascano Israelifoan noco tunutitian nan Domingo anaitia iyoconaino nan maia ano oin focani fonifo.

² Ascaino nantianri mai fasi curushcain nayanaiaicaino nocon Ifo Diosin ahuun oin-mati afu icafo nai ariashu fotoni. Fototan toquirininhuan fuputan acamaqui tsaoni.

³ Ascaino ahuun fuso fasi chashacoinni. Naan canan facaica ointsa. Ahuun sahuutiri fasi oshopa yoa rama furoa ointsa.

⁴ Ascaiton oincani ranushumuafo fasi ratui tari taricani aton ratupasi nayonifo. Nan naa shinantsa anifo.

⁵⁻⁶ Ascaiton Diospan oinmatinin afu nai muran icaton María rafu yoini, —Ratuyamacahuun. Mun tapia man Jesús funai yoa. Jesús man mastafaitafo natian nunoma. Mato yoimisi cuscan man funia. Oin fucapon quini muran. Nan racaitano.

⁷ Ascashon afu rafuafo ato yoiriscatacahuun, “Jesús naafaitashaqui man funiaquin. Galilea ano cai tauicai anoshon mato manashqui. Nannoshon man ointiro.” Un mato yoiiai cuscan ato yoiriscatacahuun, —ishon Diosin nai oinmatinin ainfo rafu yoini.

⁸ Ascaiton nicatan nan ainfo rafu toquirininhuan quini anoashu ichonifo. Ratufiacani aton nomuran fasi unimacoincaquin afu rafuafo yoi focani ichonifo.

⁹ Ichoaifoanno Jesús atoqui niriscatani. Ascashon, —Mun moiyyaran, —ishon ato yoini. Ascaiton nan ainfo rafutan taicopacufoantan, —Min nocon Iforan, —huaifoan.

¹⁰ —Ratuyamacahuun. Ascatarocon uhuun ushtfoa ua yoishotacahuun Galilea ano fononfo. Nannoshon ua oinshcaquin, —ishon ato Jesús yoini.

Ranushumuafoan yorafu chani huani cuscan

¹¹ Ascatan ainfofo Jesús anoashu foaifoanno ranushumuafori yorafohuunshon Dios cufimisi niaifofoqui nan oianfo cuscan atoqui chaninifo.

¹² Ascaiton nicacani niaifofo ichanancashon shinannifo, —Nonmun ahuusca huaicai, —ishon. Ascashon ranushumuafo yoinifo, —Non mato yoiiai cuscan nannoricoinrifi futsafo yoicahuun non mato pui ichapa inanon.

¹³ Ascacun ato yoiqi isca huatacahuun, “Jesús fu rafumisifoan non oshano fucashon Jesús ahuun caya man onuaforan,” ato huatacahuun.

¹⁴ Ascaiton niaifocoinin nicaquin Jesús ahuun caya anoma nica raquirira icaiton non yoiharaicanan mato ahuusca huanonma, —ishon niaifofoan ranushumuafo yoinifo.

¹⁵ Ascashon ato pui inanfoanno focashon nan niaifofoan ato yoiayo cuscan nannoricoin ato yoinifo. Ascaiton nan maifoti anoayo futan Israelifoan nicanifo. Ascano nantian icoinra huanifo ranushumuafoan ato yoiayo cuscan nicacaquin.

Jesús ahuun unutaqui a rafuafo yononi cuscan

Mr 16.14-18; Lc 24.36-49; Jn 20.19-23

¹⁶ Ascashu non afu rafuafo once nan Jesús noco yoiayo cuscan machi Galilea ano non cani.

¹⁷ Ascashon oinquin non yoini, —¡Aicho! Min nocon Ifo Jesús. Non mia fasi noiran, —ishon non yoini. Ascafiatocai futsafoan icoinra huacuanima.

¹⁸ Ascano nocoqui chaimashta oshon noco yoini, —Uhuun Upa ua yonoa nantifi nai ariafo yafi mai anoafori un yononon.

¹⁹ Ascacun manifoti anoayo yoifoanfafaitacahuun ua icoinra huafain ua tanasharanonfo. Uhuun Upa Diosin ahuun anuhuunshon yafi uhuun anuhuunshon non Diospan Yoshin Sharahuunshonri yorafo unu muran iquimashcaquin.

²⁰ Ascashon nantifi un mato yonoa cuscan huafain yorafori yosicahuun icoinra huafain ua nicasharanonfo. Unfin matofu iquicai. Ascashu nan un afanan oaitian un mato furi ipanacaran, —ishon noco Jesús yoini. Nanti.

Marcos Jesushuunooa Cununi

Juan yorafo unu muran iquimamisi tosa istaipama ini

Mt 3.1-12; Lc 3.1-9, 15-17; Jn 1.19-28

¹ Natian tsain shara Jesucristo Diospan Furunhuunooa un mato cunushoni man tapinon. Nuno mai ano niyoashu ini cuscan un mato tapimai.

² Cainyataima fari ichapa inonpacoai cuscan ahuunooa nocon shuni Isaías cununi. Chipoo inaca cuscan yoiyomisi. Upa Diosin Furun yoiyoni cuscan Isaías aqui cununi isca huaquin, “Upashtan, min yorafoan mia onantaima uhuun tsain yoisimi un atoqui nichicain mihuunooa ato yoinon. Itisharanonfo mia nicashquin,”

ishon Upa Diosin Furun yoini cuscan aqui cununi.

³ Diosin tsain yoisimihuunooari cununi.

“Tsoan istaipamashon ahuun yorafo yoishquin isca huaquin, ‘Nocon Ifo oshquiquin. Itisharacahuun. Maton chaca shatucocincahuun isharashcaquin,’ atofin ato yoishquiquin,”

ishon Juan cainyataima fari ichapa inaca cuscan Isaías ahuunooa cunushoni.

⁴ Ascan cununi cuscacoin aa. Tsoan istaipamanoashu Judea mai ano Juan oni. Ascanao aqui furifurinifo. Furifuriaifoan ato yoiquin isca huani, —Maton chaca shatucocincahuun. Man ascaiton Upa Diosin maton chaca rau huanon afanan shinanshquinma. Asca huatan maton chaca shatucocinshon futsafori ismashcaquin un mato unu muran iquimanon, —ishon Juanpan ato yoini.

⁵ Ascanao Jerusalén anoafo yafi Judea anoashuri aqui funifo. Ahuun tsain nicapai funifo. Fucashon atiriffoan aton chaca yoiaiton Juanpan ato unu Jordán naquishon iquimatan cainmapacuniquin.

⁶ Camello inapan rani ahuun camisa huashon Juanpan sahuua ini. Ascashon yoinaton fichi aqui nanushumuni. Ascashori ocutsuru pifain afuchi fona ayani.

⁷ Ascanao isca huaquin yoini, —Nocofunu futsan samamashta mato tapimai oshquin. Ua fasi finoncaia. Ahuamamishti huatiro. Uncai asca huatiroma. Un ahuaara shara huahuu rafanancai un ahuun oinmatima. Uhuun ramapayamainocai un ahuun oinmati icuanama.

⁸ Un mato unu muran iquimatan cainmanaquin maton chaca shatushon man Dios tanasharanon ascashon man ato oinmanon. Atofin ahuun Yoshin Shara matoya rafumapacuiquin, —ishon Juanpan ato yoini.

Juanpan Jesús unu muran iquimani

Mt 3.13-17; Lc 3.21-22

⁹ Ascanao Jesús Galilea anoashu unu Jordán ano cani. Nannoshon Juanpan unu muran iquimatan cainmani.

¹⁰ Ascatapayaino naicoin finoinnifoantan Upa Dios icariashu nai fupuini. Nai fupuicaino Diospan Yoshin Shara ruhuin cuscara Jesusqui fotopacucahuanaiton oinnifo.

¹¹ Fotoaino nai murannooa Upan Diosin ahuun oi nicanifo isca huaiton, —Minfin uhuun Facuquin. Un mihuun fasi noicoin. Un miqui fasi unimacoinran, —ishon Apa Diosin yoini.

Satanasin Jesús chaca huamapairiani

Mt 4.1-11; Lc 4.1-13

¹² Ascanao tsoan istaipamashon ano Diosin Yoshin Sharapan Jesús iyoni.

¹³ Anocai tosa icai inima. Yoinafosi nanno icai ini. Nannoshon Satanás cuarenta oshatan chaca huamapairiani. Ascatan amaquinoashu caino Upa Diosin ahuun oinmatifo afu icafo Jesusqui fotonifo cushushcaquin.

Galilea anoshon Jesús ato yosiquin tau huaniquin

Mt 4.12-17; Lc 4.14-15

¹⁴ Ascanao Juan ranushumuafon cunu muran iquimanano Jesús Galilea ano nasocaini Diospan tsain shara yorafo yoishquin.

¹⁵ Ato yoiqui isca huani, —Nocon Ifo Diosin matoqui oshquiquin. Maton chaca shatucocincahuun. Chaca huaquima Diosin tsain shara icoinra huacahuun, —ishon Jesús ato yoini.

Jesús afu rafumisi rafu non rafuri catonquin tau huani

Mt 4.18-22; Lc 5.1-11

¹⁶ Ato yoitian ianmanhuan Galilea cusumun cani. Caquin Simón chipocun Andrés futan nushutinín nushuaifoan ointoshini. Nan rafutanfin nushumisi inifoquin.

¹⁷ Ascaiton, —U fu fucahuun. Manfin nushumiscoinquin. Man shiman ichaparasi nushutinin fia cuscan natian uhuunshon man uquin yora ichapa ihuushqui aton Ifo un inon, —ishon Jesús ato yoiniquin.

¹⁸ Ascaino nushuti huafaini afu fonifo.

¹⁹ Jesús chaimashta catan Zebedeo facu rafu fuchini. Nan nanu rafutan Santiago futan Juanpan shasho naquishon nushuti icushnifoquin.

²⁰ Ato fuchishon, —Un fu fucahuun, —ato huani. Ascaino samamashta apa yafi ahuun oinmatifo shasho naqui nichifaini focani afu fonifoquin.

Jesús yoshin chaca nocofunumaquinoa potani

Lc 4.31-37

²¹ Ascano Capernaum mai ano fonifo. Judiofoan aton tunutitian ichananti pushu muran atofu ichanannifo. Ichananfoan Jesús ato yosiniquin.

²² Ascaiton nicacani —¡Aira! Nicacapon. Tsoancai anori noco yosimisima. ¿Ahuuscashon nunori noco yosisharaimun? Ahuun tsain sharacoin nanua. Moisés cununi cuscan nocon tapimamisifoan anori noco yositamarocon niaifoan tapicoian cuscara noco yosiaran, —ishon yoinifo.

²³ Ascano nannoa ichananti pushu murannoa nocofunu yoshin chacanun ahuun nuushon fiisimani.

²⁴ Fiisimaino, Jesús fuchini. Fuchishon yoiquin, —¿Ahuuscain min noco fucash huai oamun, Jesús Nazaret anoaton? ¿Min noco omitsiscapanacafo muran min noco potai oamun? Man non mia onan. Diosin mia catonni. Mincái chaca huamisima, —ishon yoshin chacapan yoini.

²⁵ Ascaiton, —Tsainyamahuu. Amaquinoashu catahuun, —ishon Jesús yoshin chaca curushcain nichini.

²⁶ Ascainofin yoshin chacapan nocofunu fasi musta mustaimatan amaquinoashu fiiscaini cani.

²⁷ Ascaiton oincani, —¡Aira! Jesús fasi ahuamamishti huacointiro. Iscaracai ahuashta non oinyomisima. ¿Ahuuscashomun ahuun tsainman yoshin chacapan nicacasmafiaiton nan yoia cuscacoin huaaquin? —icashu yoinannifoquin.

²⁸ Ascatan chanifoanfainifo Jesús aca cuscan ahuunoa Galilea anoafo yoifoanfainifo.

Simón ahuun raisi yoshafo Jesús caya huamani

Mt 8.14-15; Lc 4.38-39

²⁹ Ascacaini Judiofoan ichananti pushu murannoashu Santiago yafi Juan fu focani Simón futan Andrés pushu ano noconifo.

³⁰ Nanno Simón ahuun raisi yoshafo fasi yonaiton Jesús tapimanifo.

³¹ Ascano Jesús mutsoinifoannaino funinaca huani. Funinaca huatan yona mat-siriscatan nan yoshafoan ato pimashquin pichacufaini.

Jesús yora ichapa caya huamani

Mt 8.16-17; Lc 4.40-41

³² Ascatan man fari caino isinincai futsa futsatapapo yafi yoshin chacafo atohuun nuufafaina yorafoan Jesusqui ihuunifo ato cayahuamapacunon.

³³ Nan pushurasi anoashu Jesusqui funifo.

³⁴ Isinincai futsa futsatapapo ato cayahuamapacuan. A yoshin chacafo atohuun nuufafaina atomaquinoa potani. Jesús Diospan facun yoshin chacafoan onainfoan —Tsainyamacahuun, —ato huani.

Jesús ichananti pushu muranshon Apa tsain ato yoini

Lc 4.42-44

³⁵ Ascatan shafacuaino pushu murannoashu Apa Dios cuficai tsoan istaipama cani.

³⁶ Caano Simón non afu rafuafoan Jesús funai focani fonifo.

³⁷ Fuchicashon, —Nantifi yorafoan mia funairan, —huanifo.

³⁸ —Pushurasi futsafo ano non canon un atori Upa Diosin tsain yoinon. Ascacun uhuun Upa Dios ariashu nuno un oaquin, —Jesús ato huaniquin.

³⁹ Ascashu nantishon Galilea ano cahuacacaini Israelifoan aton ichananti pushu muranshon Diosin tsain ato yoini. Nan yoshin chaca atohuun nuuafu atomaquinoa potaniquin.

Jesús nocofunu nami rashquishi futsua caya huamani

Mt 8.1-4; Lc 5.12-16

⁴⁰ Ascatan nocofunu futsa yoratishton ranimamishti rashquishi futsua Jesusqui nocoshon. Ratoconun mai chachishon yoini, —Ua caya huapaiquifin mian caya huatiroquin, —huaiton.

⁴¹ Ahuun ramapaiquifin ahuun mucuman ramanni, —Ai Un mia caya huai. Ascan natianfin min caiyaicain, —huainofin.

⁴² A rashquishi futsua cayariscani.

⁴³⁻⁴⁴ Cayacun yoini, —Un mia caya huaa tsoa yoiyoyamahuu. Nocon caifohuunshon Dios cufimisi a ismatahuun. Moisés mato yononi cuscan chashoanun facu a inahuun mia rutushonon. Min chaca soafain min caya ato oinmashquin. Ascano tapinonfo Moisés noco yononi cuscan min aiton, —ishon Jesús yoifia.

⁴⁵ Nicatamarocon samamashta ato yoifoanfaini, —¡Oincapon! Jesús ua caya huashara, —ishon ato yoifoanfaini. Ascaiton nicacani yorahuanrasi Jesusqui fupaifiacani Jesús iquitiroma ini. Ascano tsoan istaipama caano pushurasiti aqui cuyo funifo.

2

Jesús nocofunu charishi futsua caya huani

Mt 9.1-8; Lc 5.17-26

¹ Ascano osha ranantan afanan funifo. Capernaum ano nasofuracani. Nanno pushu muran iquicun nicanifo.

² Nicacani yorahuanrasi aqui funifo ato Diosin tsain yoinon. Pushu fospicioianno tsoa futsa afanan iquitiroma ini. Umaintiri yora ichapacoín yuruicafono afanan tsoa iquitiroma ini.

³ Ascano nocofunu rafu non rafuriton aton yora charishi futsua shuhua naratashon ihuunifo Jesús caya huamanon.

⁴ Iquimapaifiacaquin yorahuanrasi pushu fospiano iquimanifoma. Ascashon pushu fomancayan tapa tscashon Jesús nia naman fotomapacufoannifo. Nanno yorahuanrasi nastui shuhua ya ratapacufoannifo.

⁵ Jesús oian nan nocofunu yoratishton charishi futsua ahuun yorafoan fasi icoinra huaifoan. Oinquin a yoratishton charishi futsua yoini, —Uhuun yorashta, mun mia chaca soashona, —huani.

⁶ Ascano Moisés cununi cuscan tapimamisifo nanno tsaofa ini. Aton nomuran shinancani,

⁷ —¡Ajaal! ¿Ahuuscain na nocofunun anori yoimun? Diosin fustitofin chaca soatiroquin. Nocofin fuparaniquin. “Un Diosiran,” ishon. Anori yoiquifin “Upa Diosin chaca huaiquin,” —ishon aton nomuran shinannifo.

⁸ Ascaifoan shinainfo cuscan Jesús onanshon ato isca huani, —¿Ahuuscaquimun maton nomuran amaquiri man shinaincain?

⁹⁻¹⁰ Unfin Cristoquin un yorafo aton chaca soashotiroquin. Un chaca soafain un ahua-mamishti huatiro un mato oinmanicain. Upa Diosin ua catoan. Ahuunshonfin un yorafo aton chaca soashotiroquin, —ishon ato yoini. Asca huatan nocofunu yoratishton charishi futsua yoini,

¹¹ —Min pushu ano min shuhua ya funicaitahuun, —huani.

¹² Asca huatanaino nanno icafoti aton ointaifi funinaca huantan ahuun shuhua chishto-faini cani. Ascacainaiton oincani nantifi yoinain futsunifo, —¡Aira! Diosin ahua-mamishti huatiroquin. Noncai iscara oinyomisima. Diosin sharaquin, —icashu yoinannifoquin.

—Uqui ohuu. Ua tanamisi ishquin, —Jesús Mateo huani

Mt 9.9-13; Lc 5.27-32

¹³ Jesús nanscacaini afanan ian cusumunri caino yorahuanrasi afanan aqui funifo. Ascano ato yosini.

¹⁴ Ian cusumun cahuanquin Alfeopan facu ahuun anu Mateo Jesús oinni. Nanton niaifo pui fishofafainmisi. Pushu facu muran tsoa ini. Ascaiton Jesús a yoiquin, —Uqui ohuu. Ua tanamisi ishquin, —huani. Asca huaino funinaca huatan afu cani.

¹⁵ Ascaino Mateon Jesús yafi afu rafumisifo ya ahuun pushu ano iyonni ato pimashquin. Niaifo pui fishofafainmisifo non Moisés cununi cuscan tapificashon tanapainifoma Jesús fu foanfainmisifo ahuun tsain nicapaicani. Afori Mateon pushu muran iquinifo ato futan pishcaquin.

¹⁶ Ascano Moisés cununi cuscan tapimamisifo nanfofin Farisefo iniquin. Oincaquin Jesús tanamisifo yoini, —¿Ahuuscain Jesús na niaifo pui fishomisifo yafi Moisés tsain tapimafiachashon tanapainifoma futan piimun? —huanifo.

¹⁷ Ascaifoan nicaquin Jesús ato cumani, —A isinincaifoma caya huamamitsamisi yopacanima. Ascan nan isinincaifoti fasi caya huamamitsamisi yopacoicani. Ascarifi aquin, “Uncai ahua chaca huamisisaran,” icaifoan un aton chaca soashotiroma. Ascan, “Unfin fasi chaca huamisiquin. Un imisi cuscan un afanan apaimaran,” icaiton un ato yoitiro, “Uqui fucahuun. Un maton chaca soashotiroran,” —ishon Jesús ato yoini.

*Piqui tunumisifohuunoa Jesús yocanifo**Mt 9.14-17; Lc 5.33-39*

¹⁸ Ascano iyoco futsaino nan Juanhuunshon tanamisifo non Fariseofoan piqui tununifoquin. Ascaiton futsafoan Jesús yocanifo, —¿Ahuuscain Juanhuunshon tapimisifo futan Fariseofoanri piqui tunufiaino minhuunshon tapimisifoancai piqui tunucanimamun? —ishon yocaifoan.

¹⁹ Jesús ato cumani, —Yora unimaifoancai chaca shinancanima. Ascacuai piqui tunutirofoma. Funun ato chani huafoanricai piqui tunutirofoma. Fununmain ato fucunfin. Ascaino unimacaquin.

²⁰ Ascafiaino funu chipo atomaqui cano shinancaquin piqui tunutiroforan, —ishon Jesús ato yoini.

²¹ Tsain futsari ato yoini isca huaquin, —Camisa shunishta fashnucun funa potonun icushumua poto funa chopi futsuashu camisa fasi uhuai finacointiro. Tsoancai afanan ascara icushpaitiroma. Nanscarifi aqúi un mato tsain funa yosian cuscan nicacoínshon man apaoni cuscan man afanan apaitiroma. Tsoan ua tanacoinshocai apaoni cuscan huatiroma. Ascashu funa cuscara shara itiro.

²² Nanscarifi aqúi tsoancai fichi tutso shuni muran vino funa a muran manutiroma. Toshacainaino fichi tutso chacanatiro. Vinori cuyofotiro. Nanscarifi aqúin maton shunicaifoan mato yosimis cuscan yafi un mato yoiai cuscan nan rafucaí ositiro. Un mato yosiain cuscacoin nannori. Diosin tsain shara. Ascan maton shunicaifoan yosia cuscaí anorima. Anori tanashucaí Diosin mato imapaiyai cuscan man atiro. Nan rafu osishon nicapaiquicai man shinansharatiroma. Vino funa fichi tutso funa muran manua shara itiro. Nanscarifi aqúin ratoranfoan apaoni cuscan unutan un ato tsain funa yosiain cuscan fusti tanacointirofo Diosin ato funa shara imatiroman, —ishon Jesús ato yoini.

*Tunutitianhuunoa Jesús ato yosini**Mt 12.1-8; Lc 6.1-5*

²³ Ascatan Israelifoan aton tunutitian Jesús yafi ahuunshon tapimisifo mau mapai fucaquin trigo mutuscashon fonicoíncaquin piainfoan.

²⁴ Fariseofoan oíncaquin Jesús yoinifo, —¡Oincapon! ¿Ahuuscain nocon shuni Moisés yononi cuscaí man aima? Tunutitian trigo man mutuscániran, —huaifoan.

²⁵ Ascaiton Jesús ato cumaquin, —¿Davidhuunoa cununi cuscan man oinmisimamun? ¿Fonainquin nocon shuni David afu rafuafo futan ani cuscan man nicamisimamun? Nincapon un mato yoinon.

²⁶ Abiatar nocon yorafohuunshon Dios cufimisi niaifocoin ini. Nantianri David yafi afu rafuafo Diosin tsain cufiti pushu muran iquínifo. Iquican amurannoa misifo ato piquini fasi fonicoínquin. Tushu futsa yamaino, misifofin nan nocon yorafohuunshon Dios cufimisi niaifocoinnaasi ini. Tsoa futsan pitiroma. Nannori yonofiani fasi fonicoínquin David pini. Ascashon afu rafuafori pimani.

²⁷ Ascan un mato yoinon. Upa Diosincai nunori shinannima. Isca huaquin, “Un tunutitian yonoyonon. Chipó un yorafo onihuai tunutitian yonononfomaran,” ishon anori shinannima. Ascataka Upa Diosin yorafo shara huapaiquin Moisés yoini isca huaquin, “Ato yonohuun semantifi shafa fusti yonononfoma. Tunuyononfo ua shinancaquin,” ishon Upa Diosin yoini.

²⁸ Ascacun un yoitiro ahuuscain tunutitian man atiroquin. Uafin Upa Diosin catonquin, —ishon ato yoini.

3*Jesús tunutitian nocofunu musufimua cayahuani**Mt 12.9-14; Lc 6.6-11*

¹⁻² Ascatan tunuti futsaino Jesús Israelifoan aton ichananti pushu muran iquini. Iquican Fariseofo yafi Moisés cunu tapimamisifoanri Jesús aasi oinnifo ahuuscashomain nocofunu musufimua tunutitian caya huacain. Ahuunoa ahua chaca yoipaicaquin.

³ Ascan Jesús a nocofunu musufimua yoini. —Aton ointaifi nuno nihuu, —huani.

⁴ Ascaino nocofunun ato nishoni, —Un mato yocain man ua cumatiromainquin. ¿Raquiri Moisés tsain noco yonoamun? ¿Tunutitian non ahua huatiromun? ¿Nonraca sharatiro? ¿Nonraca chacatiro? ¿Tunutitian non yora cayahuatiromun? ¿Yora isinin icai oamun non cayahuaimun? Non caya huamama natiro. Noco huun nutiro. ¿Non rutua shinantsain? ¿Ascacun shara? —ishon ato yocani. Ascafiaino puusinifoma.

⁵ Ascatan sinaquin ato oiancutan ahuun nomuran fasi shinain, —¡Ohuashta! ¿Ahuuscashon aton nomuran shinanchacamisifomun? Ua icoinra huacatama, —ishon shinanni. Ascashon a nocofunu musufimua yoini, —Min mucu mushan huahuun, —huaino. Yonoa cuscan mushaniquin. Ascashu ahuun mucu muma sharacoin iriscatani.

⁶ Ascaino Fariseofo amaquinoashu Herodes ahuun yorafo ano fonifo, —¿Ahuuscashomain non Jesús achimanain rutunonfo? —icashu yoinannifo.

Jesús fu yorahuanrasi ian cusumun fonifo

⁷⁻⁸ Ascatan Jesús yafi afu rafumisifori nannoashu ianmanhuan Galilea ano fonifo. Foaifoanno yorahuanrasi Jesusqui funifo. Galilea anoashu fuaifo Judea anoashu fuaino Jerusalén anoashu fuaino Idumea anoashu fuaino unu Jordán chaimashta icafori fuaino Tiro yafi Sidón anoashuri aqei funifo.

⁹⁻¹⁰ Yora ichapa caya huamamisi tapicanashu isinincaifo ichaparasi aqei funifo. —Norifi non Jesusqui mupiashu non cayatiroran, —icashon shinannifo. Jesús oinquin afu rafuafo yoini, —Ua shasho fushocahuun. Ipaishoma un yopaicai. Yorahuanrasiton ua yuruatiroquin, —Jesús huani.

¹¹ Yora yoshin chacafo atohuun nuafo Jesús fuchicatan fuopacufonnifo. Ascashon yoinifo, —Minfin Diospan facuquin, —huaifoan.

¹² —Tsainyamacahuun. Un Diospan facuqui tosa yoiyamacahuun, —ato curushcai huaniquin.

Jesús afu rafuafo tanamisifo doce catoan

Mt 10.1-4; Lc 6.12-16

¹³ Ascatan Jesús machi mapufaitan afu rafuafo cunani, —Uqui fucahuun, —ato huani.

¹⁴ Aqei fuafoan doce catonshon ato yoini, —Man uhuun yonomisifo itiro ufu rafufafaincahuun. Un mato nichicai man yorafo Upa Diosin tsain ato yoinon.

¹⁵ Un mato yonoshqui uhuunshon yoshin chacafo futsafohuun nuucun atomaquinoa man potatiroran, —ishon ato yoini.

¹⁶ Nan doce Jesús catonni afoan aton anufo un mato tapimanon. Futsan Simonfiacun ahuun anu futsan Jesús tuqui huani Perdo.

¹⁷ Futsafo Zebedeo facu rafu Santiago yafi Juan. Aton anu tuqui huani Moanurquisi, onicoinnin tsainmanfin nocofunufu curushcain nan turuica cuscara.

¹⁸ Futsanfoan aton anu Andrés non Felipe non Bartolomé non Mateo non Tomás non Alfeopan facu Santiago non Tadeo non Simón futsan nanton fasi Diosin tsain tanasharacoinpaiyaino.

¹⁹ Futsan ahuun anu Judas Iscariote nanton Jesús potashon ato achimani.

Jesús yafi Satanás

Mt 12.22-32; Lc 11.14-23; 12.10

²⁰ Ascatan Jesús yafi afu rafuafo pushu muran iquinifo. Iquiano yorahuanrasi a nicapaicani aqei funifo. Ascano ato yosiaino a futan afu rafuafoan ahua piinifoma.

²¹ Ascano ato yosifaiquin, yosifaiquin huaiton. —¡Uru! Jesusfin nison cuscaracoinquin, —icashu ahuun yoinannifo. Acaifoan nicai ahuun yorafo funifo. Ihuipaicani.

²² Asca Moisés tsain tapimamisifori Jerusalén anoashu nicapai aqei funifo, Ascashon yoicaquin —Jesusfin Satanashuunshon ahuafo huaiquin. Satanás yoshin chacafoan aton niaifo. Ahuunshon nocofunumaquinoa yoshin chacafo potaian, —ishon yoinifo.

²³ Ascano Jesús ato cunani. Ato ahua futsafohuun yoshin chacafo potaian, —ishon yoinifo. Yoini isca huaquin, —¿Ahuuscashomain Satanás afiri potatiroquin?

²⁴ Caifofo afi ranan rutunain cuyotirofo.

²⁵ Yorafori afi ranan rutunain cuyotirofo.

²⁶ Nanscarifi aqei Satanás afin ahuun yoshin chacafo potaino arifi funotiro. Asca huaino ahuun yono chacanatiro arifi cuyotiro.

²⁷ Shinacapon. Nocofunu mutsisipacoinin ahuun pushu cushuanocai tosa iquitiroma ahuun mafo onunshquin. Ascafiaino rufoto achifain munushushon ahuun mafo onutiro, —ishon Jesús ato yoini.

²⁸⁻³⁰ —Jesuscai Diospan Yoshin Sharahuunshon yorafo caya huamama yoshin chacaahuunshon ato caya huamaman, —ishon yoinifo. Ascafiaifoan Jesús ato yoini, —Icon un mato yoinon. Ua nicacahuun. Ratoran futsan futsafo tsain chaca huafain Diosquiri chaca huacun Upa Diosin nantifi chaca huac cuscan rau huashotiro. Ascafia tsoan Dios nicacasmaiton yoiquin isca huatiro, “Naton aca cuscan Satanashuunshon acaran,” huafaino Diospan Yoshin Sharahuunshon atiro. Nanton Diospan Yoshin Sharahuunshon tsain chaca huacun Upa Diosin ahuun chaca rau huanacama. Chaca huac cuscan ahuun nuupacunacaran, —ishon Jesús ato yoini.

*Jesús ahua yafi ahuun chipocufo**Mt 12.46-50; Lc 8.19-21*

³¹ Ascano Jesús icano ahua yafi chipocufo noconifo. Pushu fospiaifono chifishon niafo futsa amuran nichini a yoinonfo.

³² Yorahuanrasiton cufuacunifo. Ascano futsan yoini, —Min uhuan futan ushto rananun chifi nishon mia ahuaara yoipai fuaforan, —ishon yoiaiton.

³³ —Un mato tapimai ratofomain uhuun uhua yafi uhuun ushtofuquin, —ishon ato yoini.

³⁴ Ascano cufuacufoannaifoan ato oiancufainquin, —Nafu uhuun uhua cuscarafu yafi uhuun ushto cuscarafuquin.

³⁵ Uhuun Upa Diosin ato amapaiyai cuscan afofin uhuun ushtofu cuscara non uhuun chicofo cuscarafu non uhuun uhua cuscarafuquin, —ishon Jesús ato yoini.

4*Ushu saamisihuunoo Jesús ato ahuaara futsa yosini**Mt 13.1-9; Lc 8.4-8*

¹ Ascano iyoco futsaino ian cusumunshon Jesús ato yosiaiton nicacani yorahuanrasi funifo. Fuaifono shashon naqui nanupacucahuan cushan camaqui tsaoshon ato yoini. Ascaino ian cusumun maponifo ahuun tsain nicacani.

² Ahuun tsainman ato ichapa yosini isca huaquin,

³ —Uhuun yoramishtichin ua nicasharacahuun un mato yoinon. Nocofunun ahuun noshati murannoo fimi ushu fishon ahuun mau mamaqui.

⁴ Saacano ushufu fai nushmancayan pacua puiyafuquin piinifo.

⁵ Ushu rananri toquri camaqui pacua maima ano pacuni. Samamashta ushu foaicano

⁶ farin tsacaqui yositima huani.

Ascano nani. Ahuun tapo chaimashta foanno fanafo nai cuyoni. Tsasi futsuni.

⁷ Ushu rananri tasha murannoo foaisharanima. Ascataru fiminima.

⁸ Ascun ushu rananri mai shara ano saaca. Foaisharashu fimini. Futsa foasharashu treinta ahuun fimi icaino ushu futsa sesenta ahuun fimi icaino futsa cien ahuun fimi ini, —ishon yosini.

⁹ Ascano Jesús ato yoiquin, —Man pafiqui yaquin ua nicasharacahuun, —ato huani.

*Jesús yorahuanrasi yoini cuscan chipo afu rafuafu shafacafi yosini**Mt 13.10-17; Lc 8.9-10*

¹⁰ Ascano chipo yorafa amaquinoashu fonifo. Foafono afu rafuafu doce fucashon yocanifo, —Ifon, min rama fimi ushu saamisihuunoo ahuaara noco tapimashquin non tapisharamaquin. Noco shafacafi yosihuu, —huaifoan.

¹¹ Asca huaifoan Jesús ato cumani, —Upa Diosin a icanoshon ahuun yorafa iquinai cuscan un mato fusti shafacafi tapimai. Ascashon futsafo ahuaarafo cuscarahuunshon fustisi un ato yoiquin.

¹² Nicasharaifoan Upa Diosin aton chaca soashocuana ato rau huashquin. Ascun oin-fiaquicai tapitirofoma. Nicafiaquicai tapitirofoma. Tapicashon aton chaca shatucuanafu Diosin tsain iconra huashquin. Ascaiton un aton chaca soashocuana, —ishon ato yoini.

*Jesús ushu saamisihuunoo ato tapimasharani**Mt 13.18-23; Lc 8.11-15*

¹³ —¿Nafu un saamisihuunoo ahuaara futsa ato tapima cuscan man nicayamaiton ahuus-cashomun man tsain futsafori nicatiroquin?

¹⁴ Nicasharacahuun un mato tapimanon. Nan ushu saamisi Diosin tsain yoimisi cuscara.

¹⁵ Ushufu fai nushmancayan pacua puiyafuquin samamashta piinifo. Nanscarifiai Diosin tsain yoimisiton aton nomuran nanupaifiai aton nomuran fai curush cuscaracoin. Ascun Satanás ato tsain futsa yoiquin afanan Diosin tsain nicanonfoma ahuun ointi muran funomana.

¹⁶⁻¹⁷ Ascun futsafoan aton ointi toquri cuscara. Ushu toquri camaqui pacuni anoashu ahuun tapo chaimashta foanno samamashta fanafo nai cuyoni. Tsasi futsuni. Nanscarifiai futsafoan Diosin tsain tau huaquin nicaiyoi unimacoinfiashon samamashta ahuun tsain cachiquiri huatirofo. Diosin tsain nicafiacatan aton nomuran nanucoianfoma. Ascun ahuaara chaca finonshon iyamarai omitsiscaifoanno afanan Diosin tsain nicapaitirofoma. Dios afanan tanapaitirofoma.

¹⁸⁻¹⁹ Ascun un mato yoiyai cuscan ushu futsa tasha muran foaicashu foaisharanima. Nanscarifiai futsafoan Diosin tsain nicafiai chipo ahuaara futsa chaca shinanquin. Shinan-chacafain pui ichapa noifain, “Un pui ichapayashuraca un isharatiroatin,” ishon amaquiri shinanquin. Diosin tsain afanan shinanma. Ascano Diosin tsain nicafiaquin ahuaara futsa shinanincaicoi ahua Dios ashotiroma.

²⁰ Ascanfiaquin ushu futsafoan mai shara ano saacano foaiquin yosiashu man fimi ichapa ya. Nanscarifiai futsafoan Diosin tsain nicacoinpaiquin ahuun tsain aton nomuran nanuointiro. Futsan ahuun tsain nanusharaino Diosin yoini cuscaquin atiro. Futsanri ahuun tsain nicacoinquin finacointiro. Futsanri fasi mima huacointiroran, —ishon Jesús ato yosiniquin.

Jesús lamparinahuunoa yoi caftscani
Lc 8.16-18

²¹ Ascano afanan ahuara futsan ato yosiquin isca huani, —Tsoancai faquishiaino oin-paiquin lamparina otashon cutipan fupotiroma. Tsoanricai oshati nanman huatiroma. Ascatama tapa camaquí huatirofo shafacafi oinsharanonfo. Nanscarifiai Diosin nocon imapaiyai cuscan apaiquicai non ahuun tsain casho muran iyamarai raniran futsa non onutiroma. Ascatama shafacafi oinsharatiro Diosin yoia cuscan huafain.

²² Ascashon non shinanmisi cuscan noco nantifi Diosin puashoshquin. Tsoancai afanan ahuarashita fomantiro. Diosin nantifi yorafoti aton ointaifi puashoyoshquin.

²³ Man pafiqi yaquin ua nicasharacahuun.

²⁴ Ascacun oinfain. Uhuun tsain nicasharacahuun. Amaquiri nicayamacahuun. Un mato yoia cuscan aashquin. Ascaquin man fasi uhuun tsain tapicoitiro.

²⁵ Asca tsoan uhuun tsain nicasharai ahuun nomuran nanucoiainno Upa Diosin mima huacoinquin tapimashquin. Ascan tsoan uhuun tsain nicafiai un yoia cuscan aiyamashu nan cuscarafano nantifi funocani. Upa Diosin funomanano ahuashtayacanimaran, —ishon Jesús ato yoini.

Jesús ushuhuunoa yoicoi caftscani

²⁶ Ascatan afanan ahuara futsan ato yosini. —Ahuu cuscaramain Upa Diosin nantifi iquinnaquin un mato yoicain. Nocofunun ahuun mau ano ushufo fana.

²⁷ Shafatifi non yamutifiri nan ushufo foaicaino yosishara. Ascan mau ifoancai nan ushufo foaimatiroma shafatan yafi yamuri afi yositiroquin. Ahuuscashumain afin foaitiroquin non tapiama.

²⁸ Mai muran ushu foanno iquisi ahuun tapo foaitiro. Ascashu chipo shuqui fimi ya itiro. Ahuun unutani shuqui choshitiro.

²⁹ Ascan shuqui choshiano mau ifoan shuqui samamashta chituntiro. Nanscarifiai tosa icoinra huamafoan icoinra huacani itisharacani samamashta Diosin mai ano nocotiro nantifi iquishquin, —ishon Jesús ato yoini.

Jesús ihui mostaza ushuhuunoa yoicoi caftisca huani
Mt 13.31-32; Lc 13.18-19

³⁰ Ascatan afanan Jesús ato yoiquin isca huani, —¿Ahuuscashomain un mato yositiroquin Diosin ahuun yorafoti yonofain iquinaquin? ¿Rato tsain futsacaimun un mato yosicain man tapinon ahuu cuscaramain Upa Diosin nantifi iquinaquin? Ua nicacahuun.

³¹ Mostaza ushu uhuapamashta.

³² Ascfia yosiashu fasi uhuapacoin itiro. Rato ihuicai mostazatioma. Ahuun tushpafori fasi uhuapacoin. Ahuun tushpahuu puiya futsa futsatapafo tsaotiro. Nanno mostaza ahuun puifoa ahuun tushpafo ihuaquin futsa fari tsacanoma. Nanscarifiai Diosin icoinra huafo tau huaquin ichapamaton nicayotirofo. Chipa fasi ichapafain tanacoin-tirofo Diosqui nocosharashcaquin, —ishon Jesús ato yoini.

Jesús tsain futsahuunoa ato ahuarafu yosini
Mt 13.34-35

³³ Ascatari tsain futsahuunoa ichapa ato yoini ato tapimanon. Afohuunshon ato Diosin tsain tapimani. Tapitirofo cuscan ato tapimani.

³⁴ Ahuarafu ato yosipaini tsain futsahuunoa nanfotisi ato yoini. Ascfia chipa afu rafumisifo atotisi tsain futsahuunoa shafacafi ato yosini.

Nihuu yafi ian fuchomanhuanri Jesús ahuun tsainmansi nishma huani
Mt 8.23-27; Lc 8.22-25

³⁵ Ascatan man fari caino Jesús afu rafafo yoini, —Ianmanhuan oquiri non fonon, —ato huani.

³⁶ Ascaino yorafomaquishon afu rafumisifoan Jesús ianmanhuan oquiri iyonifo. Chipa atirifiton mufainifo.

³⁷ Shashon pocuaifono atoqui fuuhuan noconi. Fuchomanhuaino unu fospini.

³⁸ Ascaino Jesús shasho tsispacamaquinoashu oshano afu rafumisifoan moinnifo. —Nocon tapimamisiton moihuu. ¿Min noco shinainmamun? Man non asai futsuicai, —ishon moinnifo.

³⁹ Asca huaifoanno moinacahuatan ninacahuan fuu nishma huani. —Fuun nishmahuu. Fuchomanhuan pusiyaahuu, —Jesús huani. Asca huaino fuun nishmafainaino ian pusiquima racani.

⁴⁰ Afu rafafo yoiquin isca huani, —¿Ahuuscain man ratu ain? Un ahuamamishti huatiro mancai icoinra huataimacai, —ato huani.

⁴¹ Ascaino aton nomuran fasi shinancani, —¡Aira! ¿Ahuu cuscara nocofunushonmun nocon Ifon? Na fuuhuan yafi ian fuchomanhuan nan yoiai cuscan huaaquin. Man nishma hua, —icashu afu rafafo yoinannifo.

5

Nocofunu yoshin chacafo ahuun nuucun Jesús caya huani

Mt 8.28-34; Lc 8.26-39

¹ Ascaino ianmanhuan pocufainifo. Gerasafoan aton mai ano fonifo.

² Nocotan Jesús mapufaini. Ascaino nocofunu yoshin chaca ahuun nua aqui noconi. Mahua quini muran naafo mai huapaonifo murannoashu aqui noconi.

³⁻⁴ Nan nocofunu mahua quini muran ipaoni. Yorafoan cunopan munushfain onushfain huafiafo cuno tusaqui futsani. Tsoan afanan achitiroma munushfain onushushquin.

⁵ Yamutifi yafi shafatifiri mahua quinifo muran icain machi ano cahuacacaipaoni. Nannoashu toquirinin afiri tsacai futsuni fiisiyanan.

⁶ Jesús chaicunoa fuchitan aqui ichoni. Ichotan fuopacucahuatan.

⁷⁻⁸ Ascaino Jesús yoini, —Minfin yoshin chacacoinguin. Na nocofunumaquinoashu catahuun, —huaiton. —¿Mian ahuusca huapaimun, Jesús? Diosin nai muran icaton ahuun Facufin minguin. Diosinhuunshon yoihuu min ua omitsisca huamashquima. Yoipun, —nocofunon yoshin chaca ahuun nuaton yoini.

⁹ Ascaino amaquinoashu cataima Jesús yocani, —¿Min ahuunumun? —ishon yocaiton. Yoshin chacanun cumani, —Uhuun anufin ichapaquin. Urus fusticai na nocofunu muran un icama. Un fu yoshin chaca ichaparasi amuran ica.

¹⁰ Mai futsa ano noco nichiyapun, —huariani.

¹¹⁻¹² Na machi mananunshon yahua inafon picaniquin. —Ato muran noco nichipun, —yoshin chacafoan huaifoan.

¹³ —Yahuafo muran fotocahuun, —Jesús ato huani. Asca huatanaino nocofunumaquinoashu dos mil yahuafo muran fonifo. Yahuafohuun nuui focani. Ascaino nantifi yahuafoanfo ian muran maocofainni. Ascashu asai futsunifo.

¹⁴ Ascaifoan oinfaincaini yahuafoanfo cushumisifo ichonifo. Pushurasi ari chani focani. Pasohuatofori chaninifo. Ascaiton nicacani yorahuanrasi yahua asai futsua oinpaicani funifo.

¹⁵ Fucaquin oianfo Jesús yafi nocofunu ahuun yoshin chacafo a muran imisi tsoa ini man amaquinoa Jesús yoshin chacafo potano. Afanan imisi cuscan chitoria inima. Man sahuuti sahuua. Afananricai nison inima. Shinansharacoinni. Ascaiton oincani ratucoinnifo.

¹⁶ Ascashon atirifoqui chaninifo nan oianfo cuscan huafain chaniaifoan.

¹⁷ Nicacaquin Jesús isca huanifo, —Nocon mai anoashu catapun, —huanifo.

¹⁸ Asca huaifono Jesús shashon nanucaini cani. Nanuataima, —Uari iyoicapun. Un mifu capaical, —a yoshin chaca amaquinoa potatoan huaiton.

¹⁹ —Ma. Min pushu ano cashon min yorafo yoitahuun. Upa Diosin mia ashoan cuscan huafain minhuun ramapaia cuscan ato yoitahuun, —huani.

²⁰ Asca huaino cashon Jesús aca cuscan mucu rafuti pushurasi ano yoifoanfaini. Ascaiton nicacani, —¡Aira! ¡Nicacapon! Tsoan anori nicayomisimaran, —icanashu nantifi yoinannifo.

Jairo ahuun ainfacu naafiacun Jesús funinini non ainfoan Jesús ahuun sahuuti muuanshu cayani

Mt 9.18-26; Lc 8.40-56

²¹ Ascatan Jesús fu afu rafafo afanan ian mahuan pocufurannaino yorahuanrasi cusumun aqui noconi.

²² Ascaifono Judiofoan ichananti pushu anoa aton niaifo ahuun anu Jairo Jesús fuchitan fuoshopacucahuaquin yoini,

²³ —Uhuun facushta isinin ishoinquin. Uhuun pushu ano ufu capun. Uhuun facushta ua maiaatashoshquin cayanon, —huani.

²⁴ Ascatan cani. Ascaino yorahuanrasi afu fonifo. Focani fasi yuruinfainifo.

²⁵ Nannori ainfo imi imitiani atofu cani. Doce fari man aqui caano nusuyamacai.

²⁶ Doctor rasi ano cata cataquin nantifi ahuun pui ato inanquin anaitini. Ascafiashu cayatamarocon finacoinni.

²⁷ Ascano Jesushuunoa yoiainfoan nicaquin ainfoan acachorishon ahuun sahuuti muunniquin cayashquin.

²⁸ —Un ahuun sahuuti muuanshuraca un cayatiroati, —ishon ahuun nomuran shinanni.

²⁹ Ascatan aqwi mupiashu imi shatariscatani. Afanan isinin inima.

³⁰ Ascano Jesús ahuunoashu ainfo cayano yorahuanrasi muran ifiacucahuan ato yocani, —¿Tsoan ua muamun? —ishon ato yocani.

³¹ Ascaiton cumanifo, —¿Min oianmamun yorahuanrasiton mia yuruacafo? ¿Ahuuscaqimun min noco yocaicain? —a fu rafumisifoan huanifo.

³² Ascaifoan Jesús ato oiancuni, —¿Tsoan ua muamun? —ini tapipai.

³³ Ascaino ainfo man caya huaa tapiashu ratui fuopacucahuaquin. Nantifi ahuunoa imisi cuscan yafi ramashata acai cuscaro yoini.

³⁴ Nicaquin yoini, —Achishtan, mian icoinra huashu min cayaquin. Ratuyamahuu. Min ointi muran unimahuu. Min afanan omitsiscaimacai. Min pushu ano casharatahuun, —ishon Jesús ainfo yoini.

³⁵ Jesús tsaincaino Jairo pushu anoashu futsanfo aqwi fucashon yoinifo, —Min facu man naaquin. Non ahuusca huatiromaquin. Nocon tapimamisi afanan catima huayamahuu, —ishon futsanfoan Jairo yoinifo.

³⁶ Jesús Jairo yoini, —Aton tsain nicayamahuu. Ratuquima. Ua fusti icoinra huahuu, —ishon Jesús yoini.

³⁷ Ascano Jesús yorahuanrasi nichitan, —Pedro non Juan non Santiago non atiri ufu fucahuun, —ato huani.

³⁸ Ascatan Jairo pushu ano nocoquin nica amurannoashu uaicani shorarascanifo manocani. Ascaiton Jesús oinni.

³⁹ Ointan pushu muran iquicaitan, —¿Ahuuscain man shorarascaimun? Na facucai naamafinquin. Oshafinquin, —ato huani.

⁴⁰ Ascaiton osanifo. Osaifoan ato chifi caimatan apa yafi ahua non afu rafuafo rafu non fusti cunu futsa muran ato iyoni. Nanno shotocofacu doce fari aqwi caa. Raca ini.

⁴¹ Jesús shotocofacu mutsoinifoan yoiquin, “*Talita, cum:*” Onicoinnin tsainmanfin “*Facushtan, funinaca huanhuun,*” huaino.

⁴² Samamashta funinaca huanaino apa yafi ahua mustairinifo. Ascatan, —¡Aira! Nocon facushta afanan man funia. Oianmaquicai non icoinra huacuanamaran, —icashu yoinanifo.

⁴³ —Maton facu man naacoinfiacun un funimana tsoan yoitama piimacahuun, —Jesús apa yafi ahua yoini.

6

Nazaret anoafoancai Jesús pushconi anoshon icoinra huanifoma

Mt 13.53-58; Lc 4.16-30

¹ Ascatan Jesús afu rafumisifo ya anoashu pushurasi ano nasonifo. Nannoashu Jesús pushconi.

² Ascano Israelifoan aton tunutitian Jesús aton ichananti pushu muran iquishon ato yosiaiton. Nicacani, —¡Aira! ¡Niacapon! ¿Ahuuscain na nocofunun fasi tapicoin sharamun? Tsoan oinyomisima cuscara huapaiquifin ahuamamishti huatiroquin. ¿Tsoancon Jesús ascara yosiamun?

³ Nanfin ihui yonomisiquin. María facu. Chipocufu Santiago non José non Judas non Simón. Ahuun poifori nuno no fu imisifo. Nonfin Jesús onanquin. Aacai ahua. ¿Ahuuscashomun ahuamamishti huatiroquin? —icashu yoinannifo. Nannori shinanchashon aqwi shinanchacanifo. Acai cuscarocon huacani. Afanan Jesús nicapainifoma.

⁴ Ascano Jesús ato yoini isca huaquin, —Nan maitio Diosin tsain yomisi nicatirofo. Ahuunoa yoisharamisifo. Nan cainni anoafo non ahuun yorafoancai nanfoansicai nicapacanimaran, —ishon ato yoini.

⁵ Ascano isinin icaifo fustrasi manmanshon ato cayahuamani. Futsafori cayahuampaifiaquin icoinra huayamaifoan anima. Diosihuunshon tsoa futsan atiroma cuscan ato ashopaifiaquin anima.

⁶ —¡Aira! Ahuuscain ua oinfiamisishaquin ua icoinra huapaicanimaran, —ishon Jesús shinanni. Ascaiton pushurasiti Israelifo icano cahuanacaini ato Diosin tsain shara yosin.

Jesús afu rafuafo doce ato nichini

Mt 10.5-15; Lc 9.1-6

⁷ Ascatan afu rafuafo doce cunani, —Uqui fucahuun, —ato huaino. Aqúi fuafoan ahuunshon yoshin chacafo yorafohuun nuucun atomaquinoa potanon. Ascashon ato rafurasisi nichini yorafo caya huamanonfo.

⁸⁻⁹ Ato nichiataima ato yonoquin isca huani, —Maton tushu foyamafain maton forusari foyamafain puin foyamafain maton sapato nan man sahuua fusti fofain maton sahuuti nan man tsahuua fusti ya fotacahuun. Poquti fusti ya fotacahuun.

¹⁰ Pushurasi muran nocotan nan pushu fusti muransi oshacahuun.

¹¹ Pushu futsan icanoafoan yafi pushurasi muran icanoafori mato iquimapaiyamaino iquiyamacahuun. Mato nicacasmaifoan maton sapato potapota sacaquin. Asca huaquin man oinmatiro mato nicacasmaifo. Ascan Diosin tsainri nicacasmacanian, —ishon Jesús ato yoini.

¹² Ascano ato yoiquin anaitiano pushurasiti anoafo ato yoifoanfainifo. —Maton chaca shatucahuun Diosin tsain nicasharacahuun, —ato huaifoan.

¹³ Yoshin chacafo yorafohuun nuucun atomaquinoa potanifo. Isinincaifori shuniyashon fumanfain Upa Dios cufishonifo Jesushuunshon caya huafoanfainifo.

Juanpan nan yorafo unu muran iquimapacumisi nani cuscan

Mt 14.1-12; Lc 9.7-9

¹⁴⁻¹⁶ Ascatan Jesús ahuamamishti atiro cuscan nantifi yora nicacani. Ahuunoa yoifoanfaini. Atrififoan yoinifo, —Jesusfin Juanquin nan ato unu muran iquimamisiquin. Afanan man funia. Ascacufin tsoan atiro ma cuscan Jesús Diosinhuunshon ahuamamishti huatiroan, —icashon atrifiton yoinifo. Atrifoanri yoiquin, —Jesusfin Eliasquin, —huanifo. Atrifiton yoini, —Jesús Diosin tsain yoisiquin. Nocon caifo Diosin tsain nocon shunifoan yoini cuscan Jesusri nansacoin huaquin yoiaran, —ishon yoinifo. Ascano niaifon Herodes afo nicashon yoini, —Naanfin Juanquin. Mun tushtufiati afanan funiaran, —ishon yoini.

¹⁷⁻¹⁸ Juan Herodes rutuataima yoini, —Niaifon Herodes, min ushto Felipe ahuin, Herodias, min fian. Ascan mincai shara huama. Nocon shuni Moisés nocon Diosin tsain cunushoni cuscan isca huani, “Futsan ahuin min fitiromaran,” ishon Moisés cununiran, —ishon Juanpan Herodes yoini. Anori nicacasmaquin ahuun ranushumuafu yononi Juan achishon cunu muran iquimanon.

¹⁹ Herodespan ahuin Herodiasin nicani Juanpan ahuunoa yoiaiton nicai aqúi fasi sinai. Rutumariscapaifiaquicai ahuun funu Herodes, —Ma. Mincai Juan rutumatiromaran, —ishon yoini.

²⁰ Juan nocofunu shara Dios tanasharamisi niaifon Herodes tapishon cushusharani.

²¹ Funun cushusharafiaino ahuin ahuuscashoma Juan rutupaini. Funun cainnitian Juan rututiro punin sharanan. Isca huaquin. Cainnitian ahuun niaifofo patashari non ranushumua niaifofo non niaifofo Galilea mai anoafori ichanannifo fuusishoshcaquin.

²² Piaifono Herodes ahuin Herodiaspan facu shomaya arusu mononi. Herodes yafi a futan piaifoan oincani fasi unimanifo. Ascano niaifoan yoini, —¡Aicho! Min monoaiton oin un fasi unimai. Ahuarashta fipaiquin ua yoihuu un mia inanon.

²³ Diosin tapia un mia icon yoiaiton min fipaiyai cuscan ua yoihuu un mia inanon, —ishon yoini.

²⁴ Nicatan shomayaton ahuia yoini. —¿Un niaifo ahuia yocaimun? —ahuia huaiton, —“Juan tushtumahuu. Ahuun mapo ua inanshquin,” niaifon yoi tahuun, —ishon yononi.

²⁵ Ascano shomaya niaifoqui nasoni. —Juan tushtuhuu. Purato naratashon ahuun mapo ua inanshquin. Natian ua ashoriscahuun, —huani.

²⁶ Nicai niaifon puusinima. Juan fasi shinain. Ahuun nomuran shinanquin isca huani, —¡Ohua! Un asca huapaima. Ascafia yorafoan un shomaya yoia cuscan nicacashon un asca huapaiyamafiaqui un aqúi cairan, —ishon shinanni.

²⁷ Ascaiton futsa yononi, —Juan tushtushon ahuun mapo ua fishotahuun, —niaifoan ranushumua yononi. Ascano cai cunu muran iquishon Juan tushtushoni.

²⁸ Tushtushon purato naratashon funi. Fushon shomaya inanni. Ascano shomayaton ahuia inanni.

²⁹ Asca huano Juanhuunshon tanamisifoan nicacatan focashon ahuun caya mai huanifo.

Jesús cinco mil nocofunufu ato pimaní

Mt 14.13-21; Lc 9.10-17; Jn 6.1-14

³⁰ Ascano Jesusqui afu rafuafo afanan naso furanifo. Acafo cuscan yafi ato yosia cuscani Jesús tapimashcaquin.

³¹ Ascaifono yorahuanrasi Jesusqui furi furinifo. Ascaquin ato pitimacoin huanifo. Afu rafumisifo yafi ato yoini, —Tsoa icama ano non fonon focahuun. Anoshon non tunuyonon, —ato huani.

³² Ascano shashohuanun tsoa icama ano fonifo.

³³⁻³⁴ Ascaiton yorafoan ato oinnifo. Ascatan Jesús yafi afu rafuafo nocoataima ian cusumunri yorahunyasi atoqui fuainfoan oin Jesús atohuun ramapaini. Ascashon Jesús shinanquin isca huani, —Chashohuanfo cushumisioma nanscarifiai na yorafo cushumi-siomaforan, —ishon shinanniquin. Ascashon ato ichapa yosini.

³⁵ Ascano man fari caino afu rafuafoan yoinifo, —Nuno pushu yafi tushu yamai. Na yorafo nichihuun. Man fari caiquin.

³⁶ Fonaincaniquin pushurasi ari yafi pushu patashari ato nichihuun anoshon tushu huanonfo, —ishon Jesús yoinifo.

³⁷ —Mafin ato piimacahuun, —ato huaiton. —Noncai ahua ato pimatiroma. Nocofunun oshu ranan yonoahuunshon ahuun rafanan fishon nan yorafo pimashquin. ¿Nantimun non atohuunshon potaicaí? —huaifoan.

³⁸ —¿Ahuuti misi man ayamun? Oinyocahuun, —Jesús ato huaino. Oinshon yoinifo, —Misi mucu fustiti yafi shiman rafusi non ayaran, —huaifoan.

³⁹⁻⁴⁰ Nicatan Jesús ato yononi isca huaquin, —Ato yoicahuun futsano cincuenta tsaohuai-fono futsa anori cien tsaononfo, —ato huani. Ascano yorafo faasi camaqui tsaocunifo. Ato yonoa cuscan tsaoshoacunifo.

⁴¹ Ascaino nan shiman rafu yafi misi mucu fustiti tsoamashon nai ari foisinifoantan Apa Dios cufini, —¡Aicho! Upan, mihuunshon un ato pimaicain. Min fasi sharacoincun, —huatan. Misi torupacutan shiman rafu ya oshon ahuunshon tapimisifo ato pashcanan huapani.

⁴² Ascaino picani mayacoinnifo.

⁴³ A misi yafi shiman tushu huafo afu rafuafoan doce shihuati fospi huani.

⁴⁴ Ascano cinco mil nocofunufufoan piinifo.

Jesús ian fumancayan cani

Mt 14.22-27; Jn 6.16-21

⁴⁵ Ascano ato pimaquin anaititan Jesús afu rafuafo yoini, —Shashon rufofo oquiri pushurasi Betsaida ano pocui focahuun. Un na yorafo nichiyonon, —ato huani.

⁴⁶ Ato nichitan arus fusti machi mamaqui caashu Apa Dios fu tsainni.

⁴⁷ Man fari caino afu rafuafo ian nushmancayan shashon nocoafono arusu ian cusumunshon Apa cufiyoni.

⁴⁸⁻⁵⁰ Ato oian ian nushmancayashon fuun huaquin ato catima huani. Man faquishiaino Jesús ian fumancayan atoqui cani. Ato finonquin rashquini. Ascaitocai onannifoma. Onanshma ratucani. —Yoshin shafain, —fiisnifo. Ascaiton —Unquin. Ratuyamacahuun, —ato huani.

⁵¹ Ascatan shasho muran atoqui nanuinacahuani. Nanuano fuu nishmapacufoanni. Ascaiton afu rafuafoan, —¡Aira! ¿Ahuuscashocon Jesús isca huaimun? —huanifo.

⁵² Tapiyonifoma Jesús Diospan facu ahuamamishti huatirofiacun cinco mil nocofunufu piimaiton oinfiatashacaquin Jesús onanyonifoma. Diospan facufiacun aton nomuran tapiyonifoma.

Genesaret anoshon Jesús isinin icaifo caya huani

Mt 14.34-36

⁵³ Ascatan ian pocufainifo Genesaret cusumunri nocoshon. Nanno shasho nushanifo.

⁵⁴ Ascatan mapuinifoannaifoan nannoafoan samamashta Jesús onannifo.

⁵⁵ Onantan ichonifo pushurasifo patashari chani focani. Isinin imisifo shuhua naratashon Jesusqui ihuunifo.

⁵⁶ Nantiocushon isinin icaifo aqi ihuunifo. —Uhuun yora isinin icaiton min sahuuti cupanan mia munpacani. Ato yoipun anonfo cayashcaquiran, —ishon yoinifo. Ahuun sahuuti muuncanashu cayapacunifo.

7

Ahuarafoan noco nomuran chaca huamatiro cuscan

Mt 15.1-20

¹ Ascano Fariseofo yafi Moisés tsain tapimamisifori Jerusalén anoashu Jesusqui fu-cashon.

² Oianfo Jesús fu rafumisifo piataifoma muchoquimupaonifiacashon aton shunifoan yononi cuscacai anifoma.

³ Israelifo aton shunifoan piataifoma aton fuuyamisi cuscan muchoquimupaoni. Ascan aton shunifoan apaonifo cuscan Fariseofo yafi nantifi Israelifoan nansca huamisifo.

⁴ Tushu inanmistsamisifo anoashu aton pushu ano nococashon aton shunifoan apaoni cuscan atorifi piataifoma muchoquimunifo. Aton shunifoan ahuafo futsa fuuyamisi

cuscan nanfoanri nanscari aponifo. Aton shunifoan cuchofo non aqui unu manutifo non paninrafori chocamisi cuscan nanscara fuuya huanifo.

⁵ Ascano nanfoan Jesús yocani, —Ahuuscaquimun nocon shunifoan piataifoma mu-chocomushoma pipaonifo cuscacai mifu rafuafoan asca huacanima, —ishon yocainfoan.

⁶ Ato cumani, —Isaias nan Diosin tsain yoisiton iconcain inaca cuscan matohuunoo yoini. Manfin fuparapaimisifoquin. Matohuunoo yoini isca huaquin,

“Nan yorafoan uhuunoo yoisharafaquin aton nomuran ua shinancoianfoma.

⁷ Ipaitsi ichananshu fanaincani ua cufiyanan. A yorafo tapimapaiyai cuscacai uhuun tsainma. Nanfoan aton nomuran afi shinain cuscan aton yorafo yoicaniran,”

ishon Isaias Diosin tsain cununi.

⁸ Diosin yononi cuscan atama maton shunifoan amaqiri shinanmisifo cuscan marifi man ascamisi.

⁹ Maton fuyamisi fusti man tanapai. Ascacuai Diosin mato yononi cuscan afanan man shinainma.

¹⁰ Nocon shuni Moisés yononi isca huaquin,
“Maton upa yafi uhua nicasharafain ato shara huacahuun. Tsoan apa iyamarai ahua tsain chaca huai ato rutumacahuun,”

ishon yoini.

¹¹ Anori cunufiani man ato yoiquin, “Maton upa yafi uhua man yoitiro isca huaquin, ‘Upa futan uhuashtan un mato inanpaisharafiaqui un Dios inainran,’” man imisi.

¹² Anori yoitacai Diosin yononi cuscan man ato yosima. “Maton upa yafi uhua cushusharacahuun,” mato huafiani mancai anori ato shinanmapaima.

¹³ Ascashon Diosin tsain man ato tapimatamarocon maton shunifoan yonopaoni cuscan nan fusti man ato tapimapai. Asca huaquin Diosin tsainmaquin man ato imai. Nanscara chaca futsafori man huamisiran, —ishon Jesús ato yoini.

¹⁴ Ato yoitan afanan Jesús yorahuanrasi cunani ato ahua futsa yoishquin. —Uqui fucahuun un mato yoinon. Ua nicasharafain tapisharacahuun.

¹⁵⁻¹⁶ Ahuafo non piatocai nocon nomuran chaca huatiroma. Ascataka maton nomuran shinansharashoma ahua man chaca huatiroquin, —ishon Jesús ato yoini.

¹⁷ Ascatan yorahuanrasi anoashu cai pushu muran iguiano a rafuafo aqui funifo yocain fucani, —Min yorafo min tapima cuscan nocori shafacafi yoihuu non tapinon, —huaifoan.

¹⁸ —¿Ahuuscaquimun marifi man tapisharataimacain? ¿Man tapiamamun ahua non piatocai nocon nomuran noco shinanchacamatiroma?

¹⁹ Maton nomurancai tushu nitutiroma. Maton shaqui muranfin itiroquin. Chipa man aya poitiroman. Nantifi tushu sharafin non pisharatiroquin, —ishon ato tapimani.

²⁰ —Maton nomuran man shinanchaca cuscan man yoitiro. Nanfohuunoo shinanquin man chaca huatiro.

²¹ Yorafoan aton nomuran ahua shinanchaca cuscan huatirofo. Isca huaquin, shinanchacafain nocofunu yafi ainfo chaca huatanantirofoquin yomutso icain rutumitsapaimisi icain aton ahuinma chotafain aton funumari chotamafain

²² Futsana fianpaifain chaca futsa futsatapafo huafain paramitsamisi icain rafipaitama ahua chacafo huafain man ahuarayafishu ahuan unimatama futsa fuchipaifain futsaqui tsain chaca huafain cacapaimisi icain Diosin tsain nicacasmamisi.

²³ Na chacafo aton nomuranshon shinainfo cuscan ato chaca huamashquiran, —ishon ato yoini.

*Ainfon mani futsa fustiton Jesús icoinra huani
Mt 15.21-28*

²⁴ Ascatan Jesús nannoashu pushurasi ahuan anu Tiro chaimashta caani. Caashu pushu futsa muran iguini tsoa tapimapaima. Ascafiaton samamashta nanno icafoan nicanifo pushu muran icun.

²⁵⁻²⁶ Ascano ainfocai Israeli anoa shafa inima Sirofenicia anoa ini. Nan ainfoan nicaní Jesús oaiton. Ascatan aqui iguicaini nan yoshin chaca ainfacahuun nuucun. Jesús cufini, —Ifon, uhuun facu shotocofacushta fasi omitsiscai. Yoshin chaca ahuan nuua. Na yoshin chaca amaquinoa ua potashohuun. Uhuun facushta ua cayahuashopun, —ishon yoiriani.

²⁷ Ascaino Jesús yoini, —Uhuun yorafo un ato tau huamanon. Tsoancai facufo aton tushu fiantan pashnafo potatiroma, —huaiton.

²⁸ —Ai, Ifon. Mian yoia cuscan icon. Ascafia facufoan piqui tushu huafo sapa camaquinoashu potomishti pacuaiton pashnafoan pitirofo. Nanscarifi huaquin min yorafo min caya huamayotirofiashon nocori min caya huamatiro. Min nocori caya huainocai min caifori funotiromaran, —ishon cumaiton.

²⁹ —¡Aicho! Mian cumasharaquin. Natian min pushu ano min catiro. Yoshin chaca min facumaquinoashu man caaquin, —ishon Jesús yoini.

³⁰ Ascano ahuun pushu ano nocoshon oian ahuun facu shara racaini man amaqui yoshin chaca caano.

Nocofunun tsaintiroma icain nicatiroma Jesús caya huani

³¹ Ascano Jesús Tiro anoashu cai Sidón finonfaini ianmanhuan Galilea cusumunri cani. Cai pushurasi anofo aton anu Decápolis ano noconi.

³² Nannoa yorafoan nocofunu tsaintiroma icain nicatiroma aqui ihuunifo. —Nocon yoran nicatiromacoin noco manmanshohuun, —ishon yoinifo.

³³ Ascaiton Jesús nocofunu nicatiroma atomaqui chaimashta iyoni. Iyoshon ahuun mutotinin ahuun pachu rafu munni. Ascashon cumo michotan ahuun mutotinin ana munni.

³⁴ Ascashon nai ari foisinifoantan fasi shacaitan yoini, “*Efata*,” Onicoinnin tsainmanfin: “*Cayasharahuu*,” huani.

³⁵ Ascano nocofunun nicasharariscani. Tsain cayacafi shara ato yoini. Afanan ahuun ana curushma.

³⁶ Ascano Jesús yorahuanrasi yoini, —Un nocofunu nicatiroma caya huama cuscan tsoa yoiyamacahuun, —ato huafia nantifiton yorafo chanifoanfainifo.

³⁷ —¡Aira! Jesús acai cuscaai tsoan oinyomisima. Ahuamamishti huatiroquin. Nantifi yoinifo cuscan fasi sharacoinquin. Yoran nicatiroma caya huamafain tsaintiromafori caya huamaran, —ishon yoinifo.

8

Jesús cuatro mil yorafo pimani

Mt 15.32-39

¹ Ascatan nantianri afanan yorahuanrasi Jesusqui funifo. Ahuun tsain nicacaquin ahua piinifoma. Ascano afu rafuafo cunani ato yoishquin.

² —Un nan yorafohuun ramapai. U fu rafu non fusti oshatan nuno icafo. Natian aton tushu man cuyoa. Ahuashta pitirofoma.

³ Atirifi chaicunoashu nuno fuafo. Ascacun un aton pushu ano nichicain fasi fonaincani napuitirofo tacayomancani, —ato huaiton.

⁴ —Nuno tsoa icamano non tushu fuchitiroma nan yorahuanrasi pimashquin, —huaifoan.

⁵ —¿Ahuuti misi man ayamun? —ishon yocaiton. —Siete non ayaran, —huanifo.

⁶ Anori yoiaifoan Jesús nan yorahuanrasi yoini, —Nuno tsaocahuun, —ato huani. Tsoa-fono Jesús misi siete tsoamashon Apa Dios cufiyoni, —¡Aicho! Upan, minhuunshon un ato pimaicain. Min fasi sharacoincun, —huatan. Misi torupacutan afu rafuafo inanni. Inanno yorahuanrasi pashcananpacunifo.

⁷ Shiman uhuapamamishti fuchishon Jesús inanfoanno Apa Dios afanan aicho huatan shimanri torupacutan afu rafuafo inanni. Inanno yorahuanrasi pashcananpacunifo.

⁸ Ascashon picani mayacoinnifo. Ascashon a tushu huafo siete shihuati fospicoian ini.

⁹ Cuatro mil yora icuanafu nanno inifo. Piafono Jesús aton pushu ari ato nichini.

¹⁰ Nanucainicai a fu rafuafo fu mai futsa ahuun anu Dalmanuta ari cani.

—Yorafoan atiroma cuscan noco ismahuu, —Fariseofoan Jesús huanifo

Mt 16.1-4; Lc 12.54-56

¹¹ Nocoafono Fariseofo Jesusqui funifo yocain fucani. Fochishmanantanapai funifo. —Minmain Diospan facucoinquin Diosin nai ariashu icahuunshon tsoan atiroma cuscan noco ismahuu non mia icoinra huanon, —ishon yocacaquin chaca huanifo.

¹² Ascaino Jesús fasi shacaini. Ascashon ato yoini, —Ahuuscain tsoa futsan atiroma cuscara man oinpaifainiquin. Un mato icon yoi. Diosin fustiton atiro cuscaai un mato ismairan, —ishon ato yoini.

¹³ Asca huatan ato anoashu afanan shasho nanucaiquin ian pocufaini cani.

Fariseofoan amaquiri yoinifo

Mt 16.5-12

¹⁴ Ascano ian pocufain cashon afu rafuafoan yoini, —¡Ohua! Non ointiaquima. Non tushu fuamaran, —huanifo. Ascashon misi fustishta shasho murannoa fuchinifo.

¹⁵ —Oinfain Fariseofo yafi niaifo Herodes aton misi faranshati piyamacahuun, —Jesús ato huani.

¹⁶ Nicacani yoinannifo, —Ahuuscain Jesús noco yoiai Fariseofo non Herodes aton misi faranshati piyamacahuun. Non tushu fucunma anori noco yoiran, —icashu yoinannifo.

¹⁷ Yoiaifo cuscan Jesús onanшон ato yoini, —¿Ahuuscaquimun tushuhuunoa man yoinaincain? Mancai ua tapisharataima. Maton ointi muran curushcoino uacai man icoinra huataima.

¹⁸⁻¹⁹ Man oinfiacquin man tapiama. Nicafiacquicai man nicacoianma. ¿Un mucu fustiti misihuunшон cinco mil nocofunufu pimaita ahuuti shihuati misi fospicoinyamain tushuitaquin? —ishon ato yocani. —Ascano doceran, —huanifo.

²⁰ —Un siete misifo un cuatro mil yora pimaita. ¿Ahuuti shihuati misi fospicoinyamain tushuitaquin? —ishon ato yocaiton. —Sieteran —huanifo.

²¹ —¿Ascan ahuuscain man tapiataimamun? —ato huani.

Jesús Betsaida anoa nocofunu fushocoin caya huani

²² Ascano Betsaida ano noconifo. Nannoafo nocofunu fushocoin Jesusqui ihuunifo. Ihuunшон yoinifo, —Ifon, nocon yora fushocoin noco caya huashopun, —huanifo.

²³ Ascano Jesús fusho mutsoinifoantan pushurasi pasoato iyoni. Nannoshon ahuun furoqui cumo michotan ayashon furo muunni. Ascashon yocani, —¿Min oinsharamun? —ishon yocaiton.

²⁴ Foisinifoantan, —Ai. Un yorafo oin. Matacoino. Ihui foro cahuanai ointsa, —ishon cumaiton.

²⁵ Afanan furo munni. Ascano oinsharacoinni. Man cayahuamacoian. Shafacaficoino nantifi oinsharani.

²⁶ —Pushufo ari cayamahuu. Min pushu ano cayacafi catahuun, —ishon Jesús yoini.

—Jesús, minfin Cristo Diospan Facuquin, —Pedronun huani

Mt 16.13-20; Lc 9.18-21

²⁷ Ascatan Jesús yafi afu rafuafo anoashu focani Cesarea de Filipo pasoato pushurasifo ano fonifo. Foaifoan Jesús ato yocani, —¿Yorafoan man shinanmun un tsoaquin? —ishon ato yocaiton.

²⁸ Cumanifo, —Futsafoan yoiafin min Juanquin. Nan ato unu muran iquimapacumisi. Asca futsafoanri yoiafofin minfin Eliasquin. Asca futsafoanri yoiafin minfin nocon shunicaifoan Diosin tsain yoimisiquin. Man min afanan funiaran, —huaifoan.

²⁹ —¿Anori uhuunoa shinanfiafonomun manri shinanmun un tsoaquin? —huiton. Ascaiton Pedronun cumaquin, —Minfin Cristoquin. Upa Diosin mia catonni nocoqui nichishquiran, —ishon yoiaiton.

³⁰ —Un Cristoqui tsoa yoiyamacahuun, —ato huani.

—Chipo ua rutushcaniran, —ishon Jesús ato yoini

Mt 16.21-28; Lc 9.22-27

³¹ Ascatan ato yoiquin tau huani, —Nocon caifoan Dios fu tsainti pushu cushumisifo non Moisés cununi cuscan tapimamisifo non yorafohuunшон Dios cufmisi niaifofoan ua omitsisca huashcaniquin. Nan nocon niaifofoan ua nicacasmacaquin ua rutumashcani. Ua rutumafiafo osha rafu non fusti finontan un afanan funishquiran, —ishon ato tapimani.

³² Anori shafacafi icaiton Pedronun Jesús pashaquifain yoini, —Ifon, ascaiyamahuu. Miacai rutupacunacafoma, —huiton.

³³ Jesús tapacucahuan afu rafuafo oinyoni. Ascatan afanan ifiacucahuan, —Satanás uhuunoashu catahuun. Upa Diosin ahuun nomuran cuscaai min shinainmacai. Anori min shinantama nocofunufoan shinain cuscan nannori min shinainran, —ishon Jesús Pedro yoini.

³⁴ Asca huatan yorahuanrasi yafi afu rafuafori cunani, —Uqui fucahuun un mato yoinon. Tsoan ua tanapaisharaquicai afin apaiyai cuscan huatiroma. Un yoiai cuscafin nicatiroquin. Tsoan ua tanapaiquin isca huatiro, “Ua rutufianfoannocai un uhuun Ifo potapacunacama. Ahuunшон ua rutufianfoanno un tanapacunacaran,” ishon yoitiro.

³⁵ Ascan tsoan yoiquin isca huai, “¡Ohua! Un Jesús tanaino uaraca rutucaniquin,” ishon yoitan. Ascashon uhuun tsaín cachiquiri nan cuscara yora naashu omitsiscapanaca. Ascan tsoan uhuun tsain tsaín yoiafin uhuunoashu rutushquiquin. Nan cuscara yora uhuunoashu naashu unfu isharapacunaca.

³⁶ Ratoranfo manifoannati ahuunacoinfiano naanocai afanan ahuunacoin itiroma. Nantifi funocointiro. Niyoshon Diosin tsain tanatama imisishaquin. Ahuun nomuran omitsiscatiro.

³⁷ Ahuun yoshin nipanoncai ahuara inantiroma.

³⁸ Yorafoan fasi chaca huamisifo. Upa Diosin tsain cachiquiri huaafo. Tsoan uhuun rafipaiquin uhuunoa yoicasmái uhuun tsainhuunoi yoicasmáiquin. Chipo un uhuun Upa Diosinhuunashu un nai murannoashu mai ano un fotoaino uhuun Upa cuscaracoin

un chasha curannaino uhuun Upan oinmati afu ica sharafori ufu fotoshcaniquin. Fotoshon nan uhuun rafiaifofin ua lfo huapaicanima. Uhuun tsainri yoicasmacani unrifi un atohuun rafitiro. Afocai “Uhuun yoraran,” un huanacama –ishon Jesús ato yoini.

9

¹ Afanan ato yoiquin isca huani, –Icon un mato yoinon. Man futsan nuno ufu niaton nayoshoma Diosin ahuamamishti atiro cuscan man oincain. A icano ahuu cuscaramainquin man oincain, –ishon ato Jesús yoini.

Jesús ahuun yora mumacoin ahuun sahuutifoya fianananriscatanaino chashatani
Mt 17.1-13; Lc 9.28-36

²⁻³ Asca huatan seis osha finontan Jesús Pedro non Santiago non Juanri machi cuya pochinin iyoni. Nanfo fusti nanno ini. Nannoashu aton ointaifi Jesús ahuun caya mumacoin sahuutifoya fianananriscatanaino ahuun sahuuti oshopacoin chashacoinni yoa rama furoamua ointa iriscatani. Tsoacai sahuuti ya ascatiroma.

⁴ Ascaino Moisés yafi Elías nitariscatan Jesús fu tsainnifo.

⁵ Ascaiton Pedron yoini, –Tapimamisiton, nuno non isharatiro. Non pushu facu rafu non fusti mato huashotiro. Mina futsa non Moisésna futsa non Elisna futsa. Santiago futan Juanpan non mato ashotiroran, –ishon Pedron yoini.

⁶ Raquirira huapaifiacani ratucoinnifo.

⁷ Ascatanaino naicoïn atoqui cuyopacuni. Naicoïn murannoa ahuun oi nicanifo, –Nanfin uhuun Facuquin. Un ahuun noi. A nicacoincahuun, –Upa Diosin huani.

⁸ Asca huatan nan rafu non fusti samamashta oinnifo Moisés yafi Elías yamariscatani Jesús fusti atofu nia ini.

⁹ Ascano machi cuya pochinnashu fotoshon Jesús ato yoini, –Man rama oian cuscan tsoashta yoiyoyamacahuun. Nan naashu un afanan funiano rama man oian cuscan man yorafa yoitiroquin, –ishon ato yoini.

¹⁰ Ato yoia cuscan tsoa futsa yoiyonifoma. Tapiamafishu yoinannifo, –Ahuacón Jesús noco yoiamun naashu afanan funishquiran. Noco huaa cuscan non tapiamaran, –icashu yoinannifo.

¹¹ Ascatan Jesús yocanifo, –¿Ahuuscaquimun Moisés tsain tapimamisifoan yoimisiquin isca huaquin? “Nocón Numamisi Cristo Diosin catonni nocoqui oataima Elías rufoco nocoqui oshquiran,” –ishon noco yoinifo.

¹²⁻¹³ –Icon. Elías rucun oitautiro. Oshon nantifi isharamapai aton chaca shatunonfo. Ascafia tsoan onannima. Juanfiacun tsoan onannima. Nan chaca huapaiyai cuscan chaca huani. Nannori ahuunoa cununi cuscan. Nanscarifi aquin unfin Díos ariashu un nocofunocin cainfiancin ua omitsiscamacani. Nannori Diosin tsain yoimisifoan uhuunoa cununiforan, –ishon ato yoini.

Jesús furonanfacu ahuun yoshin chaca nua caya huani
Mt 17.14-21; Lc 9.37-43

¹⁴ Ascatan machi tununman fotocatan yorahuanrasi nastui Jesús fu rafumisifo yafi Moisés tsain tapimamisifo fu fochishmanantanannifo.

¹⁵ Ascano yorafon Jesús fuchishon, –¡Oincapon! Jesús afanan oi. Tsoa futsacai a cuscarama. Ahuamamishti huatiroran, –icashu yoinannifo. Yoitan aqú ichonifo.

¹⁶ –¿Ahuuscain Moisés tsain tapimamisifo fu man fochishmanantanainmun? –ishon ato yocani.

¹⁷ Ato yocaiton nocofunu futsa cumani, –Tapimamisiton, uhuun furonanfacushta un mia ihuushona. Yoshin chaca ahuun nuucun tsaintiroma.

¹⁸ Achitan mipuani ahuun ashfapan facoshurasi atsispomumisi. Shucurushui futsutan charishi futsua. Uhuun facushta mifu rafuafo ano un ihuufia ua tsoa caya huamashotiro-maran, –ishon nocofunun Jesús yoini.

¹⁹ Ascaiton Jesús, –¡Ohua! Mancai ua icoinra huaima. Man fasi amaquiri shinanmisi. ¿Ahuutia un matofu ipamun ua man nicayamacaiquin? –Jesús ato huani. –Min facu ua ihuushonhuun, –Jesús apa huani.

²⁰ Ihuuafono yoshin chacanun furonanfacu musta mustaimani. Ascatan taramuacucaini facosh atsispomutan pacuni.

²¹ Ascashon Jesús apa yocani, –¿Ahuutiamun iscamisiquin? –ishon yocaiton. –Nan facuaitan tauniran, –huani.

²² –Yoshin chacanun uhuun facu chi muran potafain unu muran man potamisi rutupaquin. Min uhuun facu ua caya huashotiro-mainquin nocohuun ramapaihuu, –huaiton.

²³ –¿Ahuuscain mian anori huaimun? Tsoan ua icoinra huacoian un ato ahuamamishti ashotiro, –Jesús huaiton.

²⁴ —Un mia icoinra huai. Ua paratama icoinra huamahuu, —ishon apa yoiaiton.

²⁵ Ascano yorahuanrasi oinpai atoqui ichonifo Jesús yoshin chaca curushcain yoini, —Minfin yoshin chacaquin. Nan facu min pastomafain tsaintiroma. Amaquinoashu catahuun. Mincai afanan a muran ipanacamaran, —ishon Jesús yoshin chaca curushcain yoini.

²⁶ Asca huaino yoshin fiiscaini cani. Facu musta mustaimafaini amurannoashu cani. Ascaino oianfo furonanfacu naa shinantsacun yoinifo, —Man facu naaran, —ishon yoinifo.

²⁷ Ascafia Jesús furonanfacu mutsoinifoannaino funininacahuani.

²⁸ Ascashu Jesús pushu muran iquini. Iquiano afu rafafo aqui funifo. Ascashon yocanifo, —¿Ahuuscashomun nofi non yoshin chaca facumaquinoa potatiromaquin? —huaifoan.

²⁹ —Na cuscara yoshin chaca man Upa Diosin cufinyamaquicai man potatiromaran, —ishon Jesús ato yoini.

Afanan Jesús ato yoini, —Ua rutushquicaniran, —ishon yoini

Mt 17.22-23; Lc 9.43-45

³⁰⁻³¹ Ascatan anoashu Jesús yafi afu rafafo Galilea mai finonfaini. Nantian afu rafafo tapimani. Ascashon tsoa futsan tapimayopainima. Ato yoini, —Un mato yoimisi cuscan un Dios ariashu mai ano fotonu nocofunucain cainshquin. Ascafiacun futsan ua achimashquin ua rutunonfo. Ua rutufiafo osha rafa non fusti finontan un afanan mai murannoashu funishquiran, —ishon Jesús ato yoini.

³² Ato yoifiaiton tapinifoma. Ratucaquin tsoancai afanan yocanima.

¿Ratocaimun fasi shara finacoianquin?

Mt 18.1-5; Lc 9.46-48

³³ Ascatan Capernaum ano noconifo. Pushu muran iquicashon Jesús afu rafumisifo yocani, —¿Ahuuscai fai anoashu man fochishmanantanainmun? —ishon ato yocaino.

³⁴ Fuaifoan yocani, Ratocaimun fasi shara finaciaquin fochishmanantanancanashu rafinifo tsoancai Jesús cumanima. Puusinifoma.

³⁵ Puusiyamaifoan Jesús ato onanni. Ascashon tsaoshon ato yoini, —Nicasharacahuun un mato cayacafi yoinon. Tsoan ahuun yorafo fasi finonpaiquin nantifi yorafo aton oinmati itiroran, —ishon ato yoiniquin.

³⁶ Ascatan aton ointaifi ato nushmancayan facu nichipacufoanni. Ascatan chishito inifoantan ato yoini.

³⁷ —Tsoan uhuunshon facu cushusharaifin nanscarifi ua huaiquin. Nanscarifiai tsoan ua shara huaquin uhuun Upa Diosiri nanscari huairan, —ishon ato yoini.

Tsoan noco chaca huapaitama noco shara huai

Mt 10.42; Lc 9.49-50

³⁸ Ascano Juanpan Jesús yoini, —Tapimamisiton, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun non yoiquin isca huai, “Mincai no fu rafumisima. Asca min yoshin chaca yorafomaquinoa potatiromaran,” ishon non yoiaran, —ishon Juanpan Jesús yoini.

³⁹ Ascaiton Jesús cumani, —Na nocofunu shutiyamacahuun. Tsoancai uhuun anuhuunshon ahuamamishti yorafoan atiroma cuscan huaitocai uhuunoari tsain chaca huatiroma.

⁴⁰ Tsoan noco nicacasmaquima noco futan aquí.

⁴¹ Un mato icon yoi. Tsoan ahuun nomuran matohuunoa shinanquin isca huaiquin, “Afin Cristo ahuun yoraquin. Ascacun un shara huairan,” ishon yoitirofo man nomiaiton mato unu ayamatiro. Mato ascara shara huacun Diosin inanpaiyai cuscan funotiroma.

Futsafoan noco chaca huamatiro

Mt 18.6-9; Lc 17.1-2

⁴² Ua rama futsa icoinra huafiacun futsan chaca huamaiton nancairocofin toquiri uhuapa tuhumashon uhuunan noa muran potanon.

⁴³⁻⁴⁴ Asca huatan min mucuman ahuara chaca huai mifiri min mushatumua shara icuana. Mucu rafuya omitsiscapanacafo muran catama mucu fusti ya Upa ari min nocotiro nipashquin. Nan shara. Omitsiscapanacafo muran a chikai nocanacama. Nanscasi apanaca. Acai sharama.

⁴⁵⁻⁴⁶ Nanscarifi aquin min tau rafa yashon min raquiri capai ahuara chaca huapai mifiri oshatumua shara icuana. Min tau rafa ya omitsiscapanacafo muran catama min tau fusti ya Upa ari nocotiro nipashquin. Nanscara shara itiro.

⁴⁷⁻⁴⁸ Nanscarifi aquin ahuara chaca oinquin min ahuara chaca huaiton mifiri min futsucumua shara icuana. Min furo rafa ya omitsiscapanacafo muran catama min furo

fusti ya Upa ari min nocotiro nipashquin. Nanscarafin shara itiro. Nan chi uru muran caashu fasi min omitsiscacointiroquin. Nanscasi apanaca. Nan chiicai nocanacama.

⁴⁹ Tsoancai anori capanacama.

⁵⁰ Ascan sao fasi shara itiro. Nami saomua funa payocotiroma. Ascan saomui chacano nami payocotiro. Nanscarifiai tsoa ufu rafushocai chaca huatiroma. Futsafori ua icoinra huamatiroma. Ascalfaino tsoa ufu rafuyamaino afanan chacacoin itiro. Ua futsafori afanan icoinra huamatiroma. Ascacun ufu rafupacucahuun. Fochishmanantanacaquima. Isharacahuun, –ishon Jesús ato yoini.

10

Funu yafi ahuin ununainhuunoa Jesús ato tapimani

Mt 19.1-12; Lc 16.18

¹ Ascatan anoashu a rafuafo afu Judea mai nan unu Jordán ocuma futsa fonifo. Ascano afanan yorahuanrasi aqúi funifo. Amisi cuscan afanan Jesús ato yosinon.

² Ascano Fariseofo Jesusqui funifo. Aqúi fucashon amaquiri cumamapainifo. Fuparapaicaquin. Ascashon yocacaquin, –¿Nocon shunifoan Diosin tsain cununi cuscan nocofunun ahuin unupaiquin unutiromun? –ishon yocaifoan.

³ –¿Moisés ato yononi cuscan raquiri yoiamun? –huaiton.

⁴ –Moisés cunuquin isca huani, “Tsoan ahuin unupaiquin acataima cunushotiro isca huaquin, ‘Un afanan mia fipaima. Munfin mia unuicain,’ ishon yoitiro.” Anori Moisés ato yononiran, –huaifoan.

⁵ –Maton shunifo mato cuscarari. Nanfo Diosin yonoquin tau huani cuscan nicacasmacani. Ascashon Moisés tsain futsan yononi cuscan maton shunifo cunushoni.

⁶ Ascalfaino Diosin nocofunu yafi ainfon onihuashocai anori shinannima. Ato onihuaquin tau huani funu yafi ahuin potananonfoma.

⁷ Ascano Diosin yoini isca huaquin, “Ascan nocofunun ainfo fiashu apa yafi ahuamaqui pashcatiro. Oshati fusti muran afu iishquin.

⁸ Ascashu ano rafu niishcaquin. Fusti ica shinantsa aashquin. Afanan rafuma.”

⁹ Ascacufin Diosin ato cumanan huaa afanan tsoa pashcanantromaran, –ishon Jesús ato yoini.

¹⁰ Ascano afanan pushu muran iquiano a rafuafoan Jesús yocani –Min rama yorafo yosia cuscan nocori yoihuu, –huanifo.

¹¹ Ascaiton ato cumani isca huaquin, –Ratoran futsan ahuin unuquin futsa fiishquin chaca huai ahuun ahuinma fu iquin.

¹² Nanscarifi aquin ainfoan funu unutan futsa fiishquin arifi chaca huaiquin funuma fu iquin, –ishon Jesús ato cumani.

Jesús facumishtifo yoisharapacuni

Mt 19.13-15; Lc 18.15-17

¹³ Ascano yorafoan aton facumishti Jesusqui ihuunifo ato manmanpacuquin Upa Dios cufinon. Ascaifoan oinquin Jesús fu rafuafoan yoinifo isca huaquin, –Maton facufo ihuutan nocon Ifo fucash huayamacahuun, –ishon yoinifo.

¹⁴ Anori huafiaifono nicatama Jesús atoqui unimatama yoini, –Asca huayamacahuun. Facufo uqui funonfo. Ato nitun huayamacahuun. Uhuun Upa Diosin niaifo icanori facumishti cuscaforiquin. Facufoan ua icoinra huacoinnafo. Nai muran Uhuun Upa icano nanscarifi aafuquin, –ishon ato yoini.

¹⁵ –Un mato icon yoiquin. Facufoan ua icoinra huamisi cuscan tsoan nanscarifi aquin ua icoinra huashuma uhuun Upa niaifo icano afu ipanacamaran, –ishon Jesús ato yoini.

¹⁶ Ato yoiquin facufo shatsaomushon manmanpacuquin, –Upa Diosin, na facumishti shara huahuu, –ato huapani.

Nocofunu mafo ichapaya ahuashta yopaima ini

Mt 19.16-30; Lc 18.18-30

¹⁷ Ascano nocofunu aqúi ichotoshini. Ichotoshitan ratoconun mai chachishon yoini, –Tapimamisiton, minfin sharacoinquin. ¿Unmun ahuuscacatiroquin Dios fu ipashquin? –ishon yocaiton.

¹⁸ –Ahuuscaquimun mian “sharacoinran” huaicai. Fusticoifin sharaquin. Nanfin a Diosiquin.

¹⁹ Diosin yononi cuscan min tapian. Isca huaquin noco yoini, “Futsa rutuyamacahuun. Maton ahuinma fu iyamacahuun. Ascanori maton funumafuri iyamacahuun. Ahuara onuyamacahuun. Chaniri yoiyamacahuun. Fuparayamacahuun. Maton upa yafi uhua nicasharafain ato shara huacahuun,” –ishon Jesús yoini.

²⁰ Ascaiton cumani, –Tapimamisiton. Nantifi nan Diosin yononi cuscan facushon un nicainfoanna, –huaiton.

²¹ Jesús oianan noiquin. Yoini isca huaquin, –Fustiricai min nicataima. Nantifi min ahuara ya cuscan inanmitsatahuun ahuun rafanan pui fiishon ahuuomafo inanshquin. Min asca huaiton Upa Diosin nai muranshon mia ahuara sharacoin mucushoshquin. Asca huatan ua tanahuun, –huaiton.

²² Nicai nocofunu puusinima. Mafo ichapayashu ahuun mafofo inamitsacasmai puusinima. Ascatan Jesusmaquinoashu cani.

²³ Caiton oinguin tanatan ifiacucahuun afu rafuafo yoini, –Yora mafo ichapaya Uhuun Upa Dios niaifo ari atirifi nocotiroma. Aton mafo ichapa potacasmaquin Diosiquiri shinanpaicanimaran, –ishon ato yoiaiton.

²⁴ Nicacani afu rafumisifoan ahuun tsain tapipainifo. Ascano Jesús afanan ato yoini, –Uhuun facumishtichin, iconcon mafo ichapayafa Dios icano fustirasi nocotirofo. Dios shinantama aton mafo fusti shinanfo.

²⁵ Ina uhuapa camellocai acoya shoi muran finontiroma. Mimacaifin nocofunu mafo ichapa ya Diosin niaifo ari fustirasi nocotiro, –ishon yoiaiton.

²⁶ Nicacani ahuun tsain fasi tapipaicani yoinannifo, –¡Aira! ¿Mafo ichapa ya Dios fu ipatiromainquin tosa futsamun Dios fu ipatiroquin? –icashu yoinannifo.

²⁷ Jesús atoqui fusoacucahuan yoini, –Nocofunufocai afinri numatiroma. Diosin fustitofin yorafo numatiroquin. Diosifin ahuamamishti huatiroquin. Nocofunufocai atiroma cuscan Diosin huatiroquin, –huaiton.

²⁸ Nicaquin Pedro yoini, –Ifon, nonfin nocon mafo yafi nocon yorafo nantifi nocona non pota furanaquin mia tanayoquin, –huaiton.

²⁹ –Un mato iconquin yoi. Tsoan ahuun pushu potafain ahuun ochifo potafain ahuun ushtofu potafain ahuun poifo potafain ahuu potafain apa potafain ahuun facufu potafain ahuun mauri potafurashon ua tanapaisharatiro uhuun tsain shara futsafo yoishquin.

³⁰ Nanscarafoan niyocashon Diosin ato fumimacoin inain. Pushufo non ochifo non poifo non ahuafu non facufu non maufori ato inain. Ato inansharafiaino ahuunoashu nantianri omitsiscashquin. Ascatan chipo Upa Dios fu ipasharashcani.

³¹ Ascacia yora ichapa natian isharacoinfiashu naashu funocoincaini. Nanscarifiai atirifi natian ahuama shinantsa. Afo naashu Upa Dios fu ipasharashcaniran, –ishon ato yoini.

Afanan Jesús ato yoini, –Ua rutushquicaniquin, –ishon yoini

Mt 20.17-19; Lc 18.31-34

³² Ascano Jerusalén ano fonifo Jesús rucun caiton afu rafumisifoan mufainifo. – ¡Ohuashta! Ahuuscafin nocon Ifo Jesús Jerusalén ano caimun. Nanno musucoinran, –icashu yoinannifo. Futsafoanri mufainifo. Nanfori ratuocoinnifo. Ascano Jesús fu rafumisifo doce futsa chaimashta ano atotisi iyonni atofu tsainshquin. Ahuara ahuuscarashquin fiaiton ato yoini isca huaquin,

³³ –Ua nicacahuun. Non Jerusalén ano canon. Nannoa futsan ua achimashquin nocon yorafohuunshon Dios cufimisi niaifofo yashon Moisés tsain tapimamisifoan ua tsain chaca huashcani. “Jesús ato fasi chaca huamisi. A rutucahuun,” icashu uhuun yoinanshon. Mani futsafoan ua iyoshcani ua rutunonfo.

³⁴ Nanfo uqui cashupaicain uqui paran nashquicain uqui cumo michofain ua fichi cunocoin tuchiaiton ua coshashcani. Ua asca huacatan ua ihui coyan iguinanqui mastashcani un nanon. Ascacia osha rafu non fusti finontan Upa Diosin ua afanan funimashquiran, –ishon Jesús ato yoini.

Santiago futan Juanpan Jesús yocanifo cuscan

Mt 20.20-28

³⁵ Ascano Zebedeo facu rafutan Santiago futan Juanpan oinomashta Jesús yoinifo, –Tapimamisiton, non mia yocain cuscan noco ashopun, –huanifo.

³⁶ –¿Ahuu man ua yocapaimun un mato ashonon? –huaiton.

³⁷ –Nantifiton niaifo min iqui nocori min icano niaifo patashari noco imahuu. Min yorafo yonoaitian min tsaonon non mifu tsaonon. Nocori catonhuun, –huaifoan.

³⁸ –Ua man yocan cuscacai man tapiama. ¿Un omitsiscashquicain cuscan manrifi man omitsiscatiromun? –Jesús ato huani.

³⁹ Ascaiton cumanifo, –Ai. Nonfin itiroquin, –huaifoan. –Icon. Un omitsiscacai cuscan marifi man omitsiscacain.

⁴⁰ Ascacia tsoanmain ua naqui huashu tsaotirofoqui uncai tsoa yoiroma. Uhuun Upa Diosin fustiton tapia. Nan Upa Diosin catoon fosi nanno tsaotiroforan, –ishon ato cumani.

⁴¹ Santiago futan Juanpan ato finonpaiyaiton Jesús naqui huashu tsaopainifo afu rafumisi diez futsafoan nicacashu atoqui sinanifo.

⁴² Ascano Jesús ato yoini, —Uqui fucahuun un mato yoinon. Yora futsafo nocon caifoma aton niaifofoan ato curushcain yonofafainmisifo. Aton niaifo patasharifoanri ato yomisi isca huaquin, “Nonfin mato ifoquin. Non mato yoiai cuscan man noco ashorisca huatiro-ran,” ishon yoimisisifo.

⁴³ Asca huafiamisifo mancai ato cuscara itiroma. Nan man ratoran futsa niaifo ipai maton oinmati itiro. Maton shara huafafainmisi itiro.

⁴⁴ Ascatari nan man futsan finonpai maton oinmati itiro. Shinanqui isca huamisisiro, “Un futsafo shara huapai. Man yopa cuscan un ato ashopairan,” ishon anori yoitirofo.

⁴⁵ Urifi anori shinan. Un Upa Diosin ariashu mai ano fotoni urifi nocofunucoin cainshquin. Un Diospan facufiacun ua man amanon un oama. Ascatarocon un futsafo ato ashomisi. Un yora ichapari un atohuunoashu nashoshquin Satanás afanan aton ifon inonma un oquin, —ishon Jesús ato yoini.

Nocofunu fusho ahuun anu Bartimeo Jesús caya huani oinsharanon

Mt 20.29-34; Lc 18.35-43

⁴⁶ Ascatan Jericó pushurasi ano noconifo. Nannoashu Jesús fu rafuafo non yorahuanrasi fonifo. Timeopan facu fushon ahuun anu Bartimeo fai cusumunri tsaoa ini ahuara ato yocashquin.

⁴⁷ Jesús nan pushurasi Nazaret pushconi fain caiton nicai oi ashcafinin cunani, —Jesús, minfin David funaquin. Uhuun ramapaihuu, —huani.

⁴⁸ Ascaiton yora ichapafaoan yoinifo, —Tsainyamahuu, —curushcain huanifo. Anori huafaiinfono fasi curushcain oi ashcafinin afanan cunani, —Minfin David funaquin. Uhuun ramapaihuu, —huaiton.

⁴⁹ Nicai Jesús nituacucahuani. Nituacucahuun, —Yoihuu uqui onon, —ato huani. Yorafoan yoinifo, —Natian min unimatiro. Funihuu. Jesús mia cunaquin, —ishon yoiaifono.

⁵⁰ Nicaquin ahuun camisa potatan funiriscatan Jesusqui oni.

⁵¹ —Un mia ahua ahuusca huashotironun ua yoipaiquin ua yoihuu, —Jesús huani. Ascaiton cumani, —Tapimamisiton, un oinpai. Afanan un fusho ipaima, —huaiton.

⁵² —Mian icoinra huashu min cayaquin. Casharatahuun, —Jesús huani. Catan oinsharani. Ascashon fai Jesús mufaini.

11

Jesús Jerusalén pushurasi ano nocotoshiniquin

Mt 21.1-11; Lc 19.28-40; Jn 12.12-19

¹ Ascatan Jesús fu focani Jerusalén chaima noconifo. Nannori chaima pushurasi futsan ahuun anu Betfagé. Nan pushurasi rafu machi cuya ahuun anu Olivo ano inifo. Noco cuatan Jesús afu rafuafo rafu ano ato nichini.

² Ato yoini, —Nan pushurasi chaima sharaqui fotacahuun. Nocoshon man inapan facu nushua man oincai. Tsoacai na burro camaqui caiyomisima. Tupushon nuri ua ihuunshotacahuun.

³ Ascan ratoran futsan mato yocaiton, “¿Ahuuscaquin man muropan facu man iyoimun?” ishon mato yocaiton. “Nocon Ifo yopaiton non iyoshoni cairan,” ishon ato yoicahuun, —Jesús ato yoini.

⁴⁻⁵ Ato nichian focatan pushu caicainti ano muropan facu nushua fuchitoshinifo. Man tupuaifoan nannoa niafoan ato yocani, —¿Ahuuscaquin man burro cahuashara tupuimun? —huaifoan.

⁶ Jesús ato yoia cuscan cumacaquin, —Nocon Ifo yopaiton non tupuyoaran, —huanifo. Ascaiton, —Iyotacahuun, —ato huani.

⁷ Ascano Jesús ano ihuushontan camisa muropan catu camaqui fucashonifo. Fucashonafoanno acamaqui Jesús tsainacahuani.

⁸ Jerusalén ano caino yorahuanrasifoan fai naman cayan afoforin aton camisafo fucanifo. Futsafoan shupa shatushon nan cai fufori nichiacunifo.

⁹⁻¹⁰ Ascan nan yorahuanrasi afofori yafi acachori foaifoan nantiffain oi ashcafinin curushcai yoinifo,

¡Aicho! Noco numai oiquin. Upa Diosin Jesusqui unimai. Ascan nocon Ifon Dioshuunoashu nocoqui oa. Nocon shuni David nantifi yorafoan aton niaifo cuscara. Arifi nocon niaifo ishquin oa. ¡Aicho! Nocon niaifo shara nantifi iquinaran

ishon oi ashcafinin yoinifo.

¹¹ Ascatan Jesús Jerusalén ano nocotan Dios fu tsainti pushu muran iquitoshini. Amuran nantifi ato oian. Man yataino. Afu rafumisifo doce fu Betania ano fonifo nanno oshashquin.

Fana higuera Jesús tsasi huani

Mt 21.18-19

¹² Iyoconaino Betania anoashu Jerusalén ano fonainquin naso curanquin.

¹³ Oian chaima fana ahuun anu higuera nia fuchini. Fuchishon ahuun fimi apaiquin oian ahuun puifosi. Fimiama ini. Fimitiataima.

¹⁴ Ascaiton yoini, –Afanan min fimimaran, –ishon Jesús yoini. Yoiai cuscan a rafuafoan nicanifo.

Jesús Dios fu tsainti pushu murannoashu inanmitsaifoan ato potani

Mt 21.12-17; Lc 19.45-48; Jn 2.13-22

¹⁵ Ascano afanan Jerusalén anoashu cai Jesús Israelifoan Dios fu tsainti pushu muran iquitoshini. Iquitoshiquin oian ahuafo a murannoashu inanmitsaifoan. Fuchitan ato chifi cainmaquin futsani. Pui fiainfoan aton acamaquishon pui fitiri finifoan arasacaquin futsani. A ruhui inanmitsaifori aton tsaotiri finifoan arasacaquin futsani.

¹⁶ –Na Dios fu tsainti pushu murannoashucaí non ahuaara inanmitsatiromaran, –ishon tsain curushcain ato yononi.

¹⁷ Ato tapimaquin yoini,

–Diospan tsainhuunoa isca huaquin cununi. “Uhuun tsainti pushu muranshon nantifi manifoti iquitiro ua cufishcaquin,” ishon cunufianicun yomutsofoan ichananti cuscara man huapairan, –ishon ato yoini.

¹⁸ Ascan Israelifoan aton yorafohuunshon Dios cufimisi niaifofo non Moisés cununi cuscan tapimamisifo Jesús yoiaiton nicacaquin rutupainifo. Ascaiton futsafoan Jesús yoiai cuscan nicapaicoinnifo. Ahuun tsain nicaí, –¡Aira! Ascaran tsain shara tsoan nicayomisi-maran, –icashu yoinannifo. Ascano aton niaifofo Jesusqui ratunifo. Rutupaifiaquicai tapinifoma ahuuscashomain rututirofoquin.

¹⁹ Ascatan man fari caino Jesús yafi a rafuafo Jerusalén murannoashu patashari fonifo.

Fana higuera tsasi futsua

Mt 21.20-22

²⁰ Ascano iyoco futsaino afanan nasoquin fana higuera fuchitoshinifo. Man tsasi futsua. Ahuun tapofori man naa.

²¹ Oinquin Jesús higuera yoita cuscan Pedronun shinanquin yoini, –Tapimamisiton, oinpon. Na fana higuera min yoitan cuscan man tsasiaran, –ishon yoiaiton.

²² –Upa Dios icoinra huacahuun.

²³ Un mato icon yoinon. Maton nomuran man icoinra huacoinshon na machi man isca huatiro, “Tsucucain. Unuhuan muran pacuhuu,” man huaino man yoia cuscan asca huariscatiro.

²⁴ Ascacun un afanan mato yoinon. Man icoinra huacoinshon ahuarashta man yocaiton Upa Diosin mato inantiro. Matonna inon.

²⁵⁻²⁶ Ascano man Upa Dios cufipaiquin iquisi futsan mia chaca huaa cuscan rau huay-ohuun. Man ascaiton Upa Diosiri maton chaca rauhuatiro. Ascan man Upa Dios nai murannoa man cufiai cuscan mato ashotiroran, –ishon Jesús ato yoini.

–¿Tsoanmun mia yonoaquin? –ishon niaifofoan Jesús yocani

Mt 21.23-27; Lc 20.1-8

²⁷ Ascano afanan Jerusalén ano nococatan Jesús Israelifoan aton Dios fu tsainti pushu muran caino. Yorahuunshon Dios cufimisi yafi Moisés cununi cuscan tapimamisifo fu Dios fu tsainti pushu cushumisifo aqúi funifo.

²⁸ Aqúi fucashon yocanifo, –¿Min acai cuscan tsoan mia yonoamun? Min inanmit-samisifo nocon ichananti pushu muranshon min ato pota. ¿Tsoan mia yonoamun min ato asca huaa? –ishon yocaifoan.

²⁹⁻³⁰ –Urifi un mato ahuaara yocain. ¿Juanpan yorafu unu muran iquimapacuniquin tsoan yonocumun? ¿Diosin yonoyamaraquin nocofunufuon yonoafomun huani? Man ua cumasharaiton urifi un mato cumasharatiroquin, –ishon yoiaiton.

³¹ Jesús yoia cuscan nicacani yoinanannifo. –Diosin Juan nichiaran non huaiton Jesús noco yoishquin, “¿Ascan ahuuscaquin man Juan icoinra huamamun?” ishon noco yoitiro.

³² Ascafia Juan nocofunufuon nichini Diosincái nichinima ishon yoiaiton yorafu nocoqui sinatirofo. “Juanpan Diosin tsain yoimisiran,” ishon yoiaiton noco asca huatiroran, –icashu niaifofo yoinannifo.

³³ Ascashon yoinifo, –Tsoanmain Juan yonoaquin noncái tapiama. Non mia yoipanán, –ishon Jesús huaifoan. –Ascariñatan un acai cuscmain tsoan ua yonoaquin uncaí mato yoima, –ato huani.

12

Ahuarafo yoiai cuscarahuunshon Jesús ato yosini

Mt 21.33-46; Lc 20.9-19

¹ Ascano nantianri Jesús ahuarafo cuscarahuunshon ato yosini. Isca huaquin, —Nocofunu futsan ahuun mau ano fimi ahuun anu uva fanani. Ascashon fimicun aqui toquiri cunuacuni ahuaton chaca huanonma. Mai quini huashon prensa mafishtamani. Ascashonri toquiri cushuti cuscara cuya masoa anoshon cushusharashquin. Anaitishon mau yonomisifo ifoan ato inanyoa ahuun mau cushusharanonfo. Ato inanyotan mai futsa ano cayoni.

² Fimiatian ahuun oinmati futsan ahuun mau ano nichini fimi atirifi fishonon.

³ Nocoaiton mau cushuafoan achinifo. Achicashon sutunifo. Ascanshon fimi inanyamaifoanno oinmati ahuun ifo ano nasoni.

⁴ Ascano mau ifoan ahuun oinmati futsa atoqui nichifain arifi mapo sutunifo. Fasi chaca huacaquin namaquirashquinifo.

⁵ Ascano mau ifoan ahuun oinmati futsa atoqui nichini. A rutunifo. Ichapa nichian futsa sutufain futsa rutucoinnifo.

⁶ Ahuun unutani Furun fusti tushuni. Nan Furun fasi noifiaquin ahuun unutaquin atoqui nichini. “Uhuun facucuinfin nicacoinshcaniquin,” ishon mau ifoan yoini.

⁷ Ascashori shinanfiaquin ahuun facucuin nichini. Ascano caiton mau cushumisifoan fuchinifo. Fuchishon yoinifo, “¡Oincapon! Mau ifoan ahuun furun oi. Apana na mau. Ascan ahuun facuna chipo iishquin. Ascacun non rutunoncahuun nocona mau inon,” ishon yoinifo.

⁸ Ascatan furun iqui curannaiton achicashon rutunifo. Rutushon mau tsisumun sharafoshon ratanifo.

⁹ ¿Ahuamun man shinaincain? Mau ifoanfin tapiaquin ato rutumaquin cuyoi. Futsafo inanshquin cushunonfo.

¹⁰ ¿Diosin tsain yoini cuscan man oinmisimamun? Ascashon yoiquin isca huani,

“Pushu yonomisifoan toquiri quishi shara oincaquin yoinifo, ‘Nacai sharamafinquin,’ ishon potafo. Man potafiafoan pushu ifoan catonni nan toquiri quishihuunoashu pushu nisharanon. Nanscarifi aquin Diospan Furunhuunshon niaifofoan yoisifo, ‘Nancai ahuamaran,’ ishon man potafo. Ascafiacun Upa Diosin catonni ahuun yorafoti ahuunoashu nipanonfo.

¹¹ Ascandiosin aca cuscan oinshon non yoitiro, ‘¡Aicho! ¡Diosin ahuun Furunhuunshon aca cuscan fasi sharacoinran!’ ishon non yoitiroran,” —ishon Jesús ato huani.

¹² Nicacani Israelifoan aton niaifofo fasi sinanifo. Jesús atohuunshon yoiai tapicanashu Jesús achipaifiacani yorafoqui ratunifo achinifoma. Asca huatan amaquinoashu fonifoquin.

Niaifofoan noco inanmamai cuscahuunshon Jesús ato yosini

Mt 22.15-22; Lc 20.20-26

¹³ Ascatan chipo ichanancashon yoinifo, —Non Jesús ahuara yocanon noco amaquiri cumaimancai. Noco cumaquin chaca huaiton non cunu muran iquimanon, —ishon yoinifo. Asca huacatan Herodes niaifo ahuun tanamisifo non Fariseofo aton tanamisifori Jesusqui nichinifo a yocanonfo.

¹⁴ Aquin nococashon yocanifo,

—Tapimamisiton, man non tapian min iconcain fusti min noco yoifafainmisi. Upa Diosin noco amapaiyai cuscan nannori min noco cayacafi yoisimisiquin. Min ahuara yoipaicain min ranoima. Nan min noco yoiai min cayacafi yoi. Ahuashta min fomainma. Min yora ahuuoma yoia cuscan nanscarifi huaquin min niaifofo yoitiro. Nan rafu min ato Diosin tsain iconcain yoi. Ascacufin noco tapimasharahuu. ¿Romanonfoan aton niaifo Cesari nocon pui noco yoca cuscan non inantiro iyamarai non inantiromamun? Noco tapimahuu, —huaifoan.

¹⁵ Ascashon Jesús onanni nan fuparamitsapaimisifo. —¿Ahuuscain ua amaquiri cumamapaicanimun? Uhuunshon ahuara chaca niaifofo man yoipaicain ua cunu muran iquimanonfo. Man toro inanmisi ahuunshon ahuara finon. Futsan ua fishoriscahuun unoinon, —huaiton.

¹⁶ Toro fushoan. —¿Tsoa ointsamain torohuun nuaquin? Tsoan ahuun anu nutamun, —ishon ato yocaiton. “Niaifon Cesarinnaran,” huaifoan.

¹⁷ —Ascan Cesarina inancahuun. Diosinna Dios inancahuun, —ishon ato yoini.

Nicacani mustairinifo, —¡Aira! Ahuun tsain tsoancai tafitiromaran, —icashu yoianinifo.

—¿Yora naa afanan funiashu ahuuscatiromun? —ishon Jesús yocanifo

Mt 22.23-33; Lc 20.27-40

¹⁸ Ascatan nan shafatari Saduceofo aqui funifo. Nanfori Israelifo. Shinanquin isca huanifo, —Yora naashu afanan funipacunacamaran, —ishon yoinifo. Nanfoan yocapaicani Jesusqui funifo.

¹⁹ —Tapimamisiton, Moisés noco cunushoni isca huaquin, “Nan ratoran iyoa naano ahuun ahuin facuoma imisino chipocuton fishon a futan facu ashquin,” ishon cununi.

²⁰ Ascano siete nanupacuafohuunoo non mia yoinon. No fu iyopaonifo. Aton iyoacai ahuiyain tauni. Ascafiashon a futan facu acashma nani.

²¹ Ascano chipocu futsan arifi ahuun ochin ahuin fini. Ascashu arifi a futan facu acashma naani. Ascaino chipocuton futsan arifi ahuun ochin ahuin fini. Arifi a futan facu acashma nani.

²² Ascapacutan amaqusi nai cuyonifo. Aqui facu ayamacai. Ascatari ahuun unutani ainfo nani facu nanuyamacain.

²³ ¿Funiaitian nai arishon rato futsacaimun ficiquin? —ishon yocai foan.

²⁴ Ascan Jesús ato cumani, —Mancai Diosin tsain tapiama. Ahuun yonori man tapiama. Ascashofin man ua amaquri yoiquin.

²⁵ Yora naashucai futsan arifi Dios ari nocotan afanan fiananpacunacafoma. Nantifi Diospan oinmatifo afu icafo cuscarafosi iishcaniquin.

²⁶ Ascan yora naashu funishquiaifohuunoo Diosin mato yoini. ¿Yoi ai cuscan Moisés mato cunushoni man oinmisimamun? Diosin fana urumanhuan muranshon ahuun oi nica cuscan mato cunushoni isca huaquin, “Upa Diosin chofo urumanhuan muran ua yoiquin, ‘Unfi Abraham non Isaac non Jacob afoan un aton Diosiquin,’ ” ishon Moisés yoini. Nan rafu non fusti yamashtafiacanashu natian Dios fu niafo.

²⁷ Nayofianishaquin natian niafo. Diosin noco tapima nantifi niafo. Nocon yoshin cuyopacunacama. Ascan manfin amaquri shinanmisiquin, —ishon Jesús ato yoini.

Diosin yonoa cuscan futsa fasi shara finacai an

Mt 22.34-40

²⁸ Ascatan Jesús fu Saduceofo yoinanannifo cuscan Moisés tsain tapimamisiton nicani. Nicaquin ahuun nomuran shinanni, —Jesús ato cayacafi shara cumaran, —ishon shinanni. Ascashon arifi Jesús yocani, —¿Diosin yononi cuscan aafu Moisés cunushoni ratofomain fasi shara finacaiquin? —ishon yocaiton.

²⁹ —Israelifoan, nicasharacahuun. “Nocon Ifo Diosin fusti nocon Ifoquin. Futsan yamai.

³⁰ Nocon Ifo Dios maton ointi muranshon noifain maton nomuranshonri noifain man shinansharai cuscan ahuun noifain fasi mutsiscain maton Ifo Dios noicahuun,” ishon Moisés cununi.

³¹ Futsari nannoricoin yononi isca huaquin, “Nan mifiri min musu huamuai cuscarifi aquin mia chaima icafori noihuu.” Nan rafu Diosin mato yononi cuscan fasi shara finacai anran, —ishon Jesús ato yoiaton.

³² —Tapimamisiton, mian cayacafi shara cuma. Icon min yoi ai Dios fusti. Tsoa futsacai Diosima.

³³ Noncai Dios ahuashta inantiroma ahuun rafanan nocohuun noinon. Min yoi ai cuscan fusti shara. Ascacan non nocon Ifo Dios nocon ointi muranshon noifain nocon shinansharayashon noifain non fasi mutsiscain nocon Ifo Dios noi nofiri non musu huamuai cuscarifi aquin non nocon chaima ica noiaino. Ascaran fasi shara finacai anran, —ishon yoini.

³⁴ Jesús nicashon cumasharani. Ascashon yoini, —Natian Upa Diosin ahuun yorafo imapaiyai cuscan mirifi min tapicuaana afu nipashquin, —ishon Jesús yoini. Ascaiton nicacani puusinifoma. Afanancai tsoanshta Jesús ahua yocanima. Nantian yafi nan Jesús naitian afanan tsoan ahuashta yocanima. Ato cayacafi cumaiton nicacani tsoan cumanima aqui ranonifo.

—¿Tsoamun Cristoquin? —huanifo

Mt 22.41-46; Lc 20.41-44

³⁵ Ascatan Jesús Israelifoan aton Dios fu tsainti pushu muranshon ato yosianan yocani, —¿Ahuuscain Moisés tsain tapimamisifoan yoisimi isca huaquin? “Criston David ahuun funaran,” ishon yoini.

³⁶ Diospan Yoshin Sharanun David ahuun nomuran shinanmana cuscan yoini, “Upa Diosin uhuun Ifo Cristo yoini isca huaquin, ‘Minfin ufu niaifocoinquin. Mia noicasmaifoan min ato finoncoian. Un ato shatumashquin mia afanan ahuusca huatiroma. Min ato iquiniran,’ ” ishon Diosin yoini cuscan David cununi.

³⁷ ¿Criston David Ifono ahuuscashuon ahuun funa itiomun? —Jesús ato huani. Yorahuan-rasi Jesús yoiai cuscan nicacani fasi unimanifo.

—*Moisés cununi cuscan tapimamisifoan chaca huaforan, —ishon Jesús ato yoini*
Mt 23.1-36; Lc 11.37-54; 20.45-47

³⁸ Ascano nicatoshinifo Jesús ato yoiaiton, —¡Oinfain! A Moisés cununi cuscan tapimamisifoan saya chainipafu sahuushon ato oinmafoanfafaicani. Fasi tapicoianforan ato huamapaicani. Yora ichaparasi ano foanscanifo “Sharacoinforan,” ato huamapaicani. Fasi cacapaimisifo.

³⁹ Ichananti pushu muran iquitan shafacafi tsaonifo. “Noco oinonfo, non tsaotioran,” ishon shinannifo. Ichananshon piyainfoannori shafacafi tsaopainifo.

⁴⁰ Ainfo funuomafo, “Non mia shara huairan,” huafashon paranifo. Aton ahuafo onushcaquin. Fuparacaquin. Fasi chaicoin cufirianifo atoqui oinanpaquin. Dioshuushoncai cuficoinnifoma. Nanscarafo Upa Diosin ato fasi onaintimacoquin, —ishon Jesús ato yoini.

Ainfomaqui man funu naa ahuomashtacun Dios inansharani
Lc 21.1-4

⁴¹ Yoitan fuhuunina cahua Jesús oinni Dios fu tsainti pushu muranshon yorahuanrasiton pui nanuti muran nanuiniyaifoanno. Yora mafo ichapayatón atirifoan paratama pui nanuti muran nanunifo.

⁴² Ascano ainfomaqui funu naano ahuomashtaton toro chimashta rafusi pui nanuti muran nanuni.

⁴³ Oinquin Jesús fu rafumisifo cunashon yoini. —¡Oincapon! Un mato iconquin yoinon. Na ainfo funuoma ahuomashtafashon yora futsan inan cuscan aafin paratama nanua cuscara.

⁴⁴ Ascano mafo ichapayafoan inanfiacaquin ichapa tushu huanifo. Ascafia nan ainfoan nantifi ahuun pui nanuqui cuyoni. Inanqui anaititan. Afanancai ahuaahuunshon ahuun tushu fitromaran, —ishon Jesús ato yoini.

13

—*Dios fu tsainti pushu paon ishquinran, —ishon Jesús ato yoini*
Mt 24.1-2; Lc 21.5-6

¹ Ascano Jesús Dios fu tsainti pushu murannoashu caiton afu rafumisifo futsan yoini, —Ifon, oimpon. Nocon Dios fu tsainti pushu fasi sharashtacoin. Toquiri cunu putsamuashu cunuacua uhuapacoin fasi sharashtaran, —ishon yoiaiton.

² —¡Aii! ¡Oincapon! Natian Dios fu tsainti pushu toquiri putsamuashu cunuacua sharashtacoin. Ascafiahu na man oiain chipo paon ishquin. Afanancai toquirifo putsamua ishquima. Ratoshtacain putsamua tushuimaran, —ishon Jesús ato yoini.

Jesús oti chaima ahuafo ahuuscarashquiai cuscan ato yoini
Mt 24.3-28; Lc 21.7-24; 17.22-24

³ Ascano machi ahuun anu Olivo ano mapufaintan Jesús tsaoni nanno ishon Dios fu tsainti pushu ointiro ini. Tsoa futsacai ano inima Pedro non Santiago non Juan non Andrés non afo aqui funifo.

⁴ —¿Nan min yoiai cuscan ahutian ishquimun? ¿Ahuuscashomun non tapitiroquin? ¿Icataima non ahua ointromun tapishquin? Noco tapimahuu, —huaifoan.

⁵ —Oinfain mato paranonfoma.

⁶ Yora ichapafoan. “Un Cristoran,” ishon mato parapaishcani. Ascashon ichapafori parashcani.

⁷ Mani futsafo ya futsafo rutunainfoan man nicashquin. Icataimari anori man nicaiy-oicai. Anori nicai ratuyamacahuun. Un mato yoimisi cuscan nanscacoín aiquin. Ascafia Jerusalén cuyoataima.

⁸ Mai futsan fu yorafo mai futsari ya rutunainfono mai futsafo anori fasi mai naiyanaiyashqui icaifono mai futsanoafori yora tushuomafo icaino. Nanscai taushcani. Ascafiahu chipo omitsiscái finacaishcani.

⁹ Ascan itisharacahuun. Mato achishon mato niaifofoan maton ichananti pushu muranshon mato fasi coshashcaniquin. Niaifofoan aton ointaifi mato iquimashcani. Mato asca huacani. Uhuunshon man ato yoishquin.

¹⁰ Ahuun unutaní nan omitsiscacoínshquiai cuscan icataima uhuun tsain shara uhu-unoa atirifiton nicataicanima. Uhuun tsain shara manifotiton nicacoiaifono un afanan ooshquin. Nantianri ua icoinra huaafo afanan omitsiscashquima.

¹¹ Ascano chipo mato achimashquin matohuunoa tsain chaca yoishcaquin. Nantianri, “¿Raquiri non huaimun?” ishon shinanyamacahuun. Nan nocoaiton un mato tapimashquin man cumasharanon. Mafincai man cumaima. Diospan Yoshin Sharahuunshon ahuun tsain maton nomuran nanumashquin man niaifofo cayacafi cumasharanon.

¹² Nantianri iyoaton chipocuqui tsain chaca huashquin achinonfo rutushcaquin. Nanscarifi agui chipocuton ahuun ochiqui tsain chaca huashquin achinonfo rutushcaquin. Nanscarifi ai facufoan aton apa yafi ahua afanan nicascasmashcani niaifofo yoishcani ato rutunonfo.

¹³ Uhuunshon mato noicasmacani man ua tanasharaiton, manifotifoan mato noicasmashcani. Ascashon mato omitsiscahuafainfoanno tsoan uhuunoashu omitsiscafiquin tunucuin uhuun tsain tanasharaiqui unupacunacama. Nanfo un cushusharatiro uhuun Upa Dios icanon nipasharanon.

¹⁴ Ascacun Diosin ahuun yorafo fu imisi ano futsafoan ahuara fasi chaca huai. Nan un mato yoiai cuscan tapicahuun. Nanfo oin man ratoran futsa Judea mai anoashu machi ano ichotacahuun.

¹⁵ Tsoan pushu osa futsa niashu afanan pushu muran iquiyotiroma ahuara fipai.

¹⁶ Tsoan aton mau ano yonoi afanan pushu ano nasoyotiroma ahuun sahuuti fipai.

¹⁷ ¡Ohua! Ainfon facu nanuafo yafi aton facu yomumishtifo omitsiscaashcani.

¹⁸⁻¹⁹ Natian yorafo omitsiscaquin cuscan tsoan ascara oinyomisima. Fasi finacaia yora omitsiscaquin. Diosin yora tau huaquin onihuani chain cai tsoan ascan omitsiscaquin oinyomisima. Tsoaricai afanan ascai omitsiscanacama. Ascan Upa Dios cucicahuun oipacutian ascanonma.

²⁰ Nan omitsiscaifotian yorafoti cuyocucan. Diosin yonoyamaino nan yorafoti cuyocuanafa. Ahuun yorafo nan catoanfo atohuun ramapaiqui omitsiscaitian shaturiscamashquin.

²¹⁻²³ Ua nicasharacahuun. Omitsiscashquaitian nocoatima un mato yoiyoi. Man omitsiscaitian fuparapaimitsamisifocoin matoqui oshon. Mato yoitiro isca huaquin, “Unfin Cristoquin,” ishon yoyamaroquin, “Unfin Diospan tsain yoyomisiquin,” ishon mato yoishcani. Satanashuunshon yora atiroma cuscan mato ismai. Mato parapaishcaquin. Diosin nan catoanfo cushuyamaino atorifi nan fuparapaimitsamisifo icoinra huacuaana. Ascano nantian tsoan mato yoiquin isca huai, “¡Oincapon! Naafin nocon Cristoquin. Cristo nocoqui oaran,” ishon yoiiafoan ato icoinra huayamacahuun.

Jesús nan Diospan Furun afanan mai ano fotoshquin

Mt 24.29-35, 42, 44; Lc 21.25-36

²⁴⁻²⁵ Ascan nan omitsiscaquin cuyocucaino fari faquishcain ishquin oshuri faquishcain icaino fishifo nai ariashu pacui futsushquin. Nantifi nai murannofo naiyanaiyainqui futsushquin.

²⁶ Nantianri un nai ariashu fuufoya camaqui mai ano fotoaino uhuun Upa Diosin ahuun yonohuunoashu un afanan matoqui fotoshquin. Nantiffain ua oinshcani unfin Diospan facuquin. Un oaino fasi chashapacucahuanshquin.

²⁷ Nantianri uhuun oinmatifo ufu nai muran icafo un nichishquin uhuun yorafo manifoti uqui ihuunonfo.

²⁸ Ascatan nii ohuamisifohuunoa ahuara un mato tapimanon. Ua nicasharacahuun. Casho pui risquisi futsuaiton man tapitiro faritian.

²⁹ Nanscarifi ai nanfo un mato yoiai cuscan futsuaiton man onantiro mun oti chaima nuno mai ano niaifocoin iishquin.

³⁰ Un mato icon yoi. Ahuara un mato yoia cuscan a mai anofoan naiyocashoma oinshcaniquin.

³¹ Nocon nai yafi mai cuyoai cuscan fianananain futsuin. Uhuun tsain ascatarocon cayacaficoin. Iconcain. Uhuun tsain un mato yoiai cuscan nanscacoquin aiquin. Fianannapacunacama.

Ahuutiaran Jesús afanan nai murannoashu mai ano fotoi tsoancai tapiama

³² Ascafi ahuutiaran un nai murannoashu afanan fotoicain tsoancai tapiama. Diosin oinmati afu nai muran icafoanricai tapiafoma. Urifi un Upa Diosin facufiashocai un tapiama. Nan uhuun Upa Diosin fustitofin tapiquin.

³³ Un afanan oaitian tsoan tapiama. Ascacufin oinfain. Itisharacahuun.

³⁴ Shinacapon. Nocofunu mai futsa ari caquin iquisi ahuun oinmatifo yoitiro, “Un mato yoiai cuscan uhuun pushu cushusharacahuun. Yonosharacahuun. Futsan uhuun pushu anoshon cushutiro un afanan nasoaitian un oinnon,” ishon ato yoitiro.

³⁵ Nanscarifiai marifi itisharacahuun. Ahuutiaran un afanan matoqui nasoshqin tsoan tapiama. Fari caino iyamarai yamu nacucahuanaino iyamarai tacaranun acaino iyamarai shafaino un nocoriscairo.

³⁶ Oinfain. Un nocoaitian oshacaquima ua yonosharashocahuun.

³⁷ Un mato yoiai cuscan un nantifi yorafa yoi, “Itisharacahuun,” —ishon Jesús ato yoini.

14

—*Ahuuscashomain non Jesús rututiroquin, —ishon shinannifo*

Mt 26.1-5; Lc 22.1-2; Jn 11.45-53

¹⁻² Ascano Jesús ato yoini natianri fusiti shafa nococuanaino. Nannoshon misi farashati maisi piinifo. [Nan fusiti Israelifioan Egipto mai anoashu fonifo shinantacani. Nantianri Egipciofan aton facu furonanfacu iyoafofosi Diosin namaquin cuyoiquin. Israelifo ato muran ipaonifiacanashu Egipciofan aton facufo namafiaquin Israelifioan aton facufo finonmani.

Ascan faritifi ichanancashon Upa Diosin aton shunifioan aton facufo finonmani nanonfoma shinantacani. Ascan nan fuusiti anumisifo nocon shunifioan aton facufo finonmaniran.] Nantianri nocon yorafohuunshon Dios cufimisi niaifiofan Moisés cununi cuscan tapimamisifo futan ichanancashon isca huaquin yoinifo, —¿Ahuuscashomun non Jesús rutumatiroquin? ¿Ahuu chacamain ahuunoa non yoiqui rutumashquin? Natian fusimuinocai non achimatiroma. Yorafa fasi sinacani mucatirofo, —icashu yoinannifo. Jesús onushta rutumapaicani.

Ainfoan ahuun ininti paratamacoin pui nuua Jesusqui ocani

Mt 26.6-13; Jn 12.1-8

³ Ascano Jesús Betania ano caní. Cai Simón pushu muran iquini. Nan Simón nami rashquishi futsua ini. Nannoshon Jesús Simón acamaquishon piti ano tsaocun ainfoan toquiri moti tsoashu otan aqui ocashquin. Nan toquiri ahuun anu alabastro moti huamua. A muran ininti fospí huani. Ininti ahuun anu nardo fasi pui nua. Ascano ainfoan motica fuputan Jesús ahuun mapoqui ininti ocani.

⁴ Atirifioan oincani sinanifo, —¿Ahuuscainun na ainfoan ininti paratamacoin ahuun pui nuua potaquin?

⁵ Nan ininti inanmitsashon ahuun rafanan pui ichapa fishon yora ahuuomafo inanshara icuanaran, —ishon yoinifo. Yoicatan ainfoqui curushcain tsainnifo.

⁶ —¿Ahuuscain na ainfoqui man tsain chipuain? Fucash huayamacahuun. Ua fasi shara huaquin.

⁷ Yora ahuuomafo matofu ipanacafo. Ratoran shafatan man ato shara huashotiro. Ascafia un nuno matofu ipanacama man ua shara huanon.

⁸ Na ainfoan nan oianshta ua shara huaa. Yora maiquin ininti ocamisifo cuscan un nataiyamafaiton na ainfoan ua shinanquin uqui ininti ocayoa. Ua ashquiai cuscan uqui ocaquin tau huaa.

⁹ Un mato icon yoinon. Na tsain shara uhuunoa manifoti yoishcaquin. Nantianri na ainfoan ua aca cuscani ato yoishcaquin. Ascatan ua shara huaa cuscan ahuunoari shinanpacushcaquin, —ishon Jesús ato yoini.

Judas yoini, —Un mato Jesús achimairan, —ato huani

Mt 26.14-16; Lc 22.3-6

¹⁰ Ascano Jesús ato yoiquin afu rafumisifo doce futsan nan Judas Iscariote nocon yorahuunshon Dios cufimisi niaififo ano caní Jesús ato achimashquin.

¹¹ Nicacani niaififo fasi unimanifo. —¡Aicho! Min noco Jesús achimaicai. Ascacun ahuun rafanan non mia pui inainran, —huanifo. Asca huaifono nannoshon Judaspan shinanquin tau huainifoanni, —¿Ahuuscashomain un Jesús ato achimanoain? —ishon shinainyofafaini.

Jesús ahuun unutaqui afu rafumisifo futan pini

Mt 26.17-29; Lc 22.7-23; Jn 13.21-30; 1Co 11.23-26

¹² Ascano shinantani Israelifioan aton fuusititan nocoaino misi farashati maisi pimisifotian. Nantianri chashoanun facu piinifo. Nan chashoan facu faritifi rutupaonifo Diosin aton shunifo cushuni shinanonfo. Ascano Jesús fu rafumisifo aqui fucashon yocanifo,

—Ifon, Diosin nai oinmati nan afu imisiton nocon shunifioan aton facu iyoafofosi finonmani aton rutuquima. Non faritifi ichananmisi anori shinanashquin. Afanan natian non atiroquin. ¿Ascán rato pushu muran non mia itishara huashoimun nannoshon mi futan chashoanun facu piishquin? —ishon yocaifoan.

¹³ —Pushurasi ano fotocahuun. Nannoa nocofunun unu tutsaomushon fuaiton fuchishcaquin. Aqui nocoashu afu fotocahuun.

¹⁴ Nan iquiai ano afu iquifainshon pushu ifo yocacaquin, “Nocon tapimamisiton mia yocan, ¿Rato cunu muranshon ufu rafumisifo futan non chashoanun facu piimun?”

¹⁵ Man yocaiton mato cunu uhuapa fomancayan ismaiquin. Nan cunu muranfin nan non yopaiti mato ismaiqui. Nannoshon noco ati shara huashotacahuun, —Jesús afu rafumisi rafu yononi.

¹⁶ Ascano nan rafu pushurasi ano fonifoquin. Pushurasi ano focashon Jesús ato yoia cuscan nanscacoainton oinnifo. Ascashon chashoanun facu pichanshonifo.

¹⁷ Man fari caino Jesús yafi afu rafuafo doce pushu ano noconifo.

¹⁸ Fomancayan focashon acamaquishon piti ano tsaoshon piaifoan Jesús ato yoini, —Icon un mato yoinin. Nuno u futan piái futsan ua achimaiquin, —ato huaiton.

¹⁹ Nicaçaquin aton ointi noconifo. Fasi shinannifo. Ascashu puusinifoma. —Ifon, uncai mia ashquimaran, —ishon nantiffain yocapacunifo.

²⁰ —Nan man nocofunu doce u futan piái futsan uqui yonoafin ua achishcaniquin.

²¹ Unfin Diosin ariashu nuno mai ano fotoniquin. Un nocofunucuin cainshquin. Diosin tsain uhuuoa inon pacoai cununi cuscan un nai cai. Ascacia na nocofunun ua ato achimashufin arifi omitsiscapanacaquin. Caianmafin shara icuanaquin, —ishon Jesús ato yoini.

²² Piainfoanno Jesús misi finifoantan iquisi apa Dios cufiyoni, —Upan, aicho, min noco shara huafafaini, —huani. Apa asca huatan afu rafumisifo yoiqui isca huani, —Na uhuun cayan cuscara. Picahuun, —ishon. Misi torupacushon atoti inancuniquin.

²³ Ascatan Apa Dios afanan cufinquin, —¡Aicho! Upan, min noco shara huaquin, —huani. Cuchori finifoantan aqui fimi unu fuatan ato inancuniquin. Ascaiton nantiffain ayapacunifo.

²⁴ Ascashon ato yoiquin, —Naafin uhuun imi cuscaraquin. Uhuun imi foiquin mun nai. Nantifi yorafoan chaca huamisifoanno un atohuunoashu nai cai. Un ascaino yora ichapafu Diosin ato potapacunacama. Un ato nashoincai aton chaca soashoshquin.

²⁵ Un mato icon yoi. Un nunoshon afanan mato futan un ayaima. Mun nai ari cai. Nan uhuun Upa Dios niaifocoin ica anoshon un afanan ayashqinran, —ishon ato yoini.

—*“Uncai Jesús oinmisimaran,” min ato huashquicain, —ishon Jesús Pedro yoini*
Mt 26.30-35; Lc 22.1-34; Jn 13.36-38

²⁶ Ascano ahuun tsain yoiqui anaititan Diosin tsain fanainnifo. Anaititan machi Olivos ano fonifo.

²⁷ Ascatan Jesús tsain futsan ato yoini, —Nantiffain man ua potafainicaiquin. Diosin tsain cununi isca huaquin, “Unfin chashoanfo cushumisi un rutuicai. Ascano chashoanfo ichoi futsuigui,” ishon cununi. Nanscarifai ua rutuaifoanno man uhuunoashu ratufaini foi ichoshquin.

²⁸ Ascan un funiano Galilea ano man uqui nocoi foshqiran, —ishon Jesús ato yoini.

²⁹ Ascaiton Pedronun Jesús cumani, —Nantifiton mia potafiaifoannocai un mia potanacamaran, —ishon yoiaiton.

³⁰ —Pedron, un mia icon yoicain. Na yamutan tacara cuoi rafuamano min ato yoiqui rafu non fusti huaicai, “Un Jesús oinmisimaran,” —ishon min ato yoicain.

³¹ —Ma, Ifon. Un mifu natirocai un ato yoinacama un mia oinmisimaran, —ishon Pedronun yoini. Nantifiton afu rafumisifoan nannori yoinifo.

Jesús Getsemaní anoshon Apa Dios cufini
Mt 26.36-46; Lc 22.39-46

³² Ascano nanno ihuifo mapoa ano ahuun anu Getsemaní ano Jesús afu rafumisifo ya cani. Jesús ato yoiquin, —Nuno tsaoshon ua manacahuun. Uhuun Upa fu un tsainyotanon, —ishon ato yoini.

³³ Ascano Pedro non Santiago non Juan non afo ato iyoni. Fasi shinanquin ahuun nomuran omitsiscái tauai.

³⁴ Ato yoiquin, —Unfin fasi oimitsiscái. Uhuun nomuran un fasi shinain. Mun muucuin un nai cuscan. Nunoshon ua manayocahuun. Un futan oinyocahuun, —ato huani.

³⁵⁻³⁶ Ato yoitan chaimashta catan fuopacucahuan Apa Dios fu tsainni. —Uhuun Upashtan, ua rutushcani. Un omitsiscái cuscan mian numatiromainquin ua numahuu. Ascafashon un apaiyai cuscan huaquima. Min apaiyai cuscan ua huahuu, —huani.

³⁷ Ascatan Apa fu tsainqui anaititan afanan atoqui oni. Oquin ato oian man oshafo ini, —¿Pedron, min oshamun? ¿Min u futan Dios cufimamun?

³⁸ Oshaquima. Dios fu tsainhuun Satanás mato chaca huamapaiyai cuscan anonma. Maton nomuran Diosin mato imapaiyai cuscan marifi nanscasi huapaifiaquicai mafin man atiromaquin, —ishon Jesús Pedro yoini.

³⁹ Ascashu afanan Apa fu tsainqui cai chaimashta cani. Apa cufian cuscan nannori afanan cufini.

⁴⁰ Ascashon afanan atoqui nasoquin oian afanan afu rafuafu oshafo ini. Fasi oshapan noicani moipaiquin ranannifo. Raquirimain Jesús ato yoicai tapinifoma. Ascan puusini-foma.

⁴¹ Ascaino afanan atomaqui chaimashta cashion Apa Dios cufitani nasoquin oian afanan man oshafo ini. Ascaiton ato yoini, —¿Man man afanan oshamun? Nanscanon. Man oshatiro. Ascafiashu man afanan natian oshatiroma. Natianfin man ua achi fucaniquin. Na nocofunun ua yora chacafo achimani oiquin.

⁴² Funicahuun. Non canon. Na nocofunun ua noicasmaifo ua ato achimani oiquin, —ato huani.

Jesús achinifo

Mt 26.47-56; Lc 22.47-53; Jn 18.2-11

⁴³ Ascano Judas nan Jesús fu rafumisi futsan aqui oni. Yorarasi Judas fu noppu yafi coshati tsomacانشu funifo. Israelifoan aton yorafohuunshon Dios cufimisi niaifofo non Moisés tsain tapimamisifo ato yonoa funifo.

⁴⁴ Judaspan yorafo Jesús achimashquin yoini, —Un Jesús tsoacaiton tapicahuun nanfin Jesusquin. Achiti sharaqui. Achicatan niaifofo ano iyocahuun, —ato huani.

⁴⁵ Asca huatan samamashta nocoshon tsoaqui. Tsoatan, “Tapimamisiton,” ishon yoini.

⁴⁶ Ascano nan Judas fu fuafoan Jesús achinifo. Achicashon niaifofo ano iyoshquin.

⁴⁷ Ascaino Jesús chaimashta futsan nicun. Noppu fitan nocon yorafohuunshon Dios cufimisi niaifocoinin ahuun oinmati pashtufain rurani.

⁴⁸ Ascaiton Jesús ato yoini, —¿Man shinan un yomutsocunmun coshatifo ya noppu ya man ua achipai fua?

⁴⁹ Shafatifi un Dios fu tsainti pushu muranshon un mato yosifaitocai man ua achiyoti huama. Natian man ua acai cuscan Diosin tsain uhuunoa cununi cuscacoin man ua huairan, —ishon Jesús ato yoini.

⁵⁰ Ascaino afu rafumisifoan potafaini amaqui ichonifo.

⁵¹⁻⁵² Ascano pushcoai man Jesús mufainaiton achiaifoanno ahuun piracomua shorifaini chitoria ichoni.

Israeli aton niaifofoan Jesús yocanifo, —¿Min ahua chaca huamisisimun? —ishon yocani

Mt 26.57-68; Lc 22.54-55, 63-71; Jn 18.12-14, 19-24

⁵³ Ascano achicashon Israelifoan yorafohuunshon Dios cufimisi aton niaifocoinin pushu ano Jesús iyonifo. Nanno nan niaifofo non Moisés cununi cuscan tapimamisifo ichannanifo.

⁵⁴ Ascaino Pedro ato cachiori chaima cani. Nocon yorafohuunshon Dios cufimisi niaifocoinin ahuun pushu unmainti ranushumuafu yooaino Pedrori atofu yooni.

⁵⁵ —¿Nonmun raquiri huatiroquin Jesús ahua chaca huaran ishon rutushquin? Ahuacai ahusca huaa non nicayomisima non rutuai, —icashu Israelifoan aton niaifo yoinannifo. Nanno pushu muran nantifi Israelifoan aton niaifofo ichannannifo.

⁵⁶ Yora ichapafaan, —Jesús chaca huaran, —ishon yoifiacaquin nannorisi shinannifoma. Paracaquin.

⁵⁷ Yoiti huaquin anaitiafono nocofunu futsafoan niaifofoan aton ointaifi Jesusqui tsain chaca huanifo. Chanicani.

⁵⁸ —Non nicaino na nocofunu iscaita, “Nocon Dios fu tsainti pushu yorafoan acafo. Un choqui ashquin. Ascashofin osha rafu non fusti finontan un afanan futsa huashquicain. Unfin un atiroquin. Tsoan nocofunun u futan aquima. Urus fustifin un ashquicai,” ishon Jesús yoitaran, —ishon yoinifo.

⁵⁹ Yoifiacaquin tsoan anorisi yoinifoma.

⁶⁰ Ascano nocon yorafohuunshon Dios cufimisi niaifocoinin aton ointaifi Jesús yocani, —¿Miqui tsain chaca huaafo cuscan icon iyamarai iconmamun? ¿Min ato cumaimamun? —ishon yocaino.

⁶¹ Jesús puusinima. Ascaiton afanan yoini, —¿Diosin sharapan mia catonnimun min ahuun facu inon? ¿Icon min ahuun facuoinmun? —ishon niaifocoinin yocani.

⁶² —Mian yoiai cuscafin unquin. Upa Diosin ahuaamamishti huatiro. Chipu man ua oinshquicai uhuun Upa niaifo fu un icaiton. Urifimain afu niaifocoianshufin. Un nai ariashu nai coin camaqui un oaiton man ua oinshquicai. Un mai ano fotoshquinran, —ishon Jesús ato yoini.

⁶³⁻⁶⁴ Nicatan Israelifoan aton niaifocoin Jesusqui fasi sinaquin. —Man man nica Jesús fasi chaca huaa. “Un Diospan facuran,” icaiton man man nica. Ascaino non tsain futsa

yopaima a onaintimashqui. ¿Na nocofunun non ahuusca huaimun? –ishon niaifoan ato yoini. Ascashon nantiffain, –Diosquiri chaca huaquin nanonquin, –ishon yoinifo.

⁶⁵ Asca huatan ahuun fusoqui cumo michofain funushfain sutunifo. Sutucashon cashu huanifo, –Min Cristomainquin min nantifi tapicoian. Ascan tsoan mia sutuamainquin noco yoihuu, –ishon cashu mutsama huanifo. Ascatan ranushumuafaoanri Jesús fasi coshanifo.

Pedro, –Uncai Jesús oinmisimaran, –ato huani

Mt 26.69-75; Lc 22.56-62; Jn 18.15-18, 25-27

⁶⁶ Ascainofin Pedron nocon yorafohuunshon Dios cufimisi niaifocoinin pushu umaiti ano atofu yooaiton niaifoan ahuun oinmati shomayaton Pedro fuchiniquin.

⁶⁷ Fuchishon yoini, –Na nocofunufin Jesús Nazaret anoa min afu rafumisiquin, –huani.

⁶⁸ –Ma. Mian yoiai cuscacai un tapiamaquin, –Pedronun shomaya huani. Yoiqui asca huatan shoi caincaiti ano caani.

⁶⁹ Ascashon nan oinmati shomayaton Pedro fuchia afu niafo yoini, –Na nocofununfin arifi Jesús fu rafumisiquin, –huaiton.

⁷⁰ –Ma. Uncai Jesús fu rafumisimaran, –ishon Pedronun yoini. Samaracatan Pedron fu niafoan yoinifo, –Icon. Mirifi min Galilea mai anoashu oa. Ascan minfin Jesús fu rafumisiquin, –ishon yoinifo.

⁷¹ –Un mato paratiroma. Un chanicun ua Diosin chii uru muran potatiroquin. Diosin tapiafin un mato iconcoian yoiaquin. Uncai na nocofunu Jesús oinmisimaran, –ishon Pedro ato yoini.

⁷² Ascaino samamashta afanan tacara cuoni. Cuoaino Jesús yoia cuscacoin Pedronun shinantani. –Pedro, un mia yoi. Na yamutan tacara cuoi rafuamano min ato yoiqui rafu non fusti huacain, “Un Jesús oinmisimakin,” –ishon Jesús yoia cuscan Pedronun shinantani. Ascashu fasi uaini.

15

Pilato ano Jesús iyonifo

Mt 27.1-2, 11-14; Lc 23.1-5; Jn 18.28-38

¹ Ascano shafa acuaino nocon yorahuunshon Dios cufimisi niaifofo yafi Moisés cununi cuscan tapimamisifo Dios fu tsainti pushu cushumisifo fu ichanancashon shinanpainifo, –¿Ahuuscashomain non Jesús rutumaicai? Nan Pilato Romanonfoan aton niaifon ahuun mai arishon nocoqui nichini nocon niaifo inon. Non Pilato ano Jesús iyoicoian, –icashu yoinannifo. Ascatan munushcashion Pilato ano iyonifo.

² –¿Minmain Israelifoan aton niaifocoinquin? –ishon Pilaton Jesús yocani. –Aifain. Nan min ua yocain cuscafin unquin, –Jesús huani.

³ Ascano nocon yorahuunshon Dios cufimisi niaifofoan Jesusqui tsain chaca huanifo.

⁴ Ascashon Pilaton yoini, –¿Yorafoan mia chaca huaifo non nicaimamun? ¿Min ato cumapaimamun? –ishon yoini.

⁵ Asca huaino puusinima. Aqai tsain chaca huafiaifono puusinima. Ascaino Pilaton ahuun nomuran shinanquin, –¡Aira! ¿Ahuuscain ato cumapaimamun? –ishon shinanniquin.

Pilaton ato Jesús inanni rutunonfo

Mt 27.15-31; Lc 23.13-25; Jn 18.38-19.16

⁶ Ascatan aton fuusititian faritifi cunu muran iquiafo fusti ato caimapaoni. –¿Ratocai man caimapaimun? –ishon Pilato fuusititian ato faritifi yocapaoni.

⁷ Nantianri nocofunu Barrabás cunu muran ini. Nanton yorafo shinanchacamani. –Romanonfoan aton niaifofo non potanon, –ato huani. Fasi ato mucumati huapaoni. Asca yora ichapafoan Romanon niaifo potapainifo. Nantianri Barrabás yora rutuni. Ascaiton ranushumuafaoan cunu muran iquimanifo.

⁸ Ascatan man Jesús achiafono Israelifoan Pilato yoicaquin, –Min noco faritifi fuusititian ashopaoni cuscan afanan noco huashohuun. Afanan cunu muran iquia futsan noco caimashohuun, –huanifo.

⁹⁻¹⁰ –Jesuscai ahua chaca huamisima. Ato ashoan cuscacai Israelifo aton niaifofoan atiroma. Ascacufin Israeli niaifofo Jesusqui sinacaniran, –ishon Pilato ahuun nomuran shinanniquin. Ascashon ato yoini, –¿Maton niaifo Jesús man caimapaimun? Un mato caimashonon, –ishon ato yocafishon.

¹¹ Israelifoan aton niaifofo nannosi ichanannifo ato shinanchacamapaicani. –“Jesús noco caimashotama Barrabás noco caimashohuun,” ishon Pilato yoicahuun, –ishon niaifofoan yorafo yononi.

¹² Nannori, —Israelifoan, man yoimisi Jesús maton niaifo. ¿Ascacufin un Barrabás caimashomun un Jesús ahuusca huaicai? —ishon ato yocani.

¹³ Nantifishon, —Ihui coyan iquinanqui mastahuun, —ishon oi ashcafinin yononifo.

¹⁴ —Ahuuscacufin. ¿Ahuamun chaca huaquin? —ishon yocani. Ato yocafiaiton fasi curushcain, —Ihui coyan iquinanqui mastahuun nariscanon, —huarianifo.

¹⁵ Sinaifon oinquin Pilato ato rau huapaiquin Barrabás caimaniquin. Ascashon ato yonoa fichi cunoqui tuchiaon Jesús coshaquin futsanifo. Ascatan mastashcaquin iyonifo.

Ranushumuafoan Jesús cashu mutsama huanifo

¹⁶ Ranushumua Romanonfoanfin Jesús iyonifoquin. Niaifoan ahuun pushu chaimashta. Nannofin ranushumuafoan aton pushurasi iniquin. Nanno iyonifo. Ascashon niaifo cushumisifo ranushumuafoan ato chifi cunanifo oin funonfo.

¹⁷ Ascashon ahuun sahuuti pucanifo. Pucatan futsa shonan sahuumanifo. Ascadari mosha chainipafu maiti huashon maimanifo.

¹⁸⁻¹⁹ Ascashon yoicaquin, —¡Aicho! Minfin Israelifoan aton niaifoquin, —icashu aqui cashupainifo. Asca huacatan ratoconun mai chachishonifo. Aqui cashupaiqui poquiti ahuun mapo cosharianifo. Ascatan aqui cumo michonifo.

²⁰ Ascashon aquí paranaquin cashushonifo. Cashushoncatanfin sahuuti shonan pucashon ahuun sahuuticoín afanan sahuumanifo. Ascashon ihui coyan iquinanqui mastai focaquin iyonifoquin.

Jesús mastanifo cuscan

Mt 27.32-44; Lc 23.26-43; Jn 19.17-27

²¹ Jesús iyocaquin oianfo pushurasi patasharifo nocofunu Simón oaiton fuchishon ato finonfoanpaiyaiton ranushumuafoan achishon yoini, —Minfin ahuun ihui coyan iquinan foicaicain —ishon ranushumuafoan iyamafaini. Nan Simón Cirene mai anoashu oa iniquin. Ahuun facu rafu Alejandro yafi Rufo.

²² Gólgota ano Jesús iyonifo. Gólgota onicoinnin tsainmanfin mapo shao.

²³ Nanno nococashon fimi unu paun tashipia osia Jesús ayamapaiyaifoan ayanima.

²⁴ Ascatan Jesús ihui coyan iquinanqui mastanifo. Mastacatan ahuun sahuuti fianshcaquin. Toquiri tocoro rafu ya cashuqui potapacunifo. Nan finonmanaton ahuun sahuuti figui tau huani. Asca huapatan cuyonfianifo.

²⁵ Man fari nai pochinin racano mastanifoquin.

²⁶ Man mastacashon amanaonri ihui coyan iquinanqui cununifo isca huaquin,

ISRAELIFOAN ATON NIAIFOCOINQUIN

ishon amanaonri cununi.

²⁷ Ascashon yomutso rafuri mastanifo. Ocuma futsa futsafain ocuma futsa anifoquin.

²⁸ Nannori ahuunoa cunuyoni cuscan, —Shinanfo arifi chaca shafai, —ishon Diosin tsain inonpacoai cuscacoin aquin cununiquin.

²⁹⁻³⁰ Ascashon camacaquin, —¡Cuu! Minfin yoimisiquin nocon Dios fu tsainti pushu min choquiacaí. Ascatanfi osha rafu non fusti finontan min afanan futsa huairan min ica. Iconmainquin mifiri numatan fotohuu. Ihui coyan iquinanmaquinoashu fotohuu, —ishon roanifo.

³¹ Ascano nanscarifiai nocon yorafohuunshon Dios cufimisi niaifofo yafi Moisés cununi cuscan tapimamisifoan aqui cashupai yoinannifo, —Nanton futsafosi numafiatiroshaquicai aficai numatiroma.

³² Iconmainquin aafin Criston Diospan Furun Israelifoan nocon niaifoashu ihui coyan iquinanhuunoashu fotoaiton non oinquifin non icoinra huaicai, —icashu yoinannifo. Ascashon afu ihui coyan iquinanqui masta rafutari aqui tsain chaca huaquin roanifo.

Jesús nani cuscan

Mt 27.45-56; Lc 23.44-49; Jn 19.28-30

³³ Ascatan fari masafinfin racano nan maitio faquishpacucahuani. Ascashu man fari caino afanan shafani.

³⁴ Nantianri Jesús oi ashcafinin apa cunani, —*Eloi, Eloi, ¿lema sabactani?* —oinicoinin tsain manfin, —*¿Uhuun Diosin, uhuun Diosin, ahuuscain mian potamun?* —huani.

³⁵ Yorafoan mapo cashu Jesús nicacaquin, —Nicacapon. Elías cunaaiton, —huanifo.

³⁶ Ascainofin nocofunu futsan ichoniquin. Fimi unu focash muran nashan nanushon fiicai ichotan fitani oshon faca tahua shatun tuhuunifoantan Jesús inanpaiyaiton yoini, —Non oinyonon. Elías oshomain fotomaicai. Non oinyonon, —ishon cashu mutsama huanifo.

³⁷ Ascainofin Jesús fasi fiisnacahuaniquin. Fiisina cahuatanfin naaniquin.

³⁸ Nanscatapaiyaino Israelifoan aton Dios fu tsainti pushu murannoa pano putan pochimua afincoin fashnupacu cahuaniquin.

³⁹ Ascaiton, —Iconfinquin na nocofunufin Diospan Furunquin, —ishon ranushumua niaifoan Jesús naa cuscan oinshon yoini.

⁴⁰ Nannoshori ainfofoan chai mapo casho oinnifo. Futsan María Magdalena non María futsan Santiago non José aton ahua non Salomé.

⁴¹ Nan rafu non fusti ainfofo futsafoanri chai mapo casho oinnifo. Galilea anoashu Jesús fu foanfainmisifo cushusharashcaquin. Ainfofo futsafoanri Jerusalén ano afu funifo. Ato furi nanno nia ini.

Jesús mai huanifo cuscan

Mt 27.57-61; Lc 23.50-56; Jn 19.38-42

⁴²⁻⁴³ Ascatan sabado fainaca shafatan Israelifoan nan shafan anunifo, —Itisharati shafaran, —ishon anunifo. Nan itisharati shafatan man fari caino nocofunu José ratutama Pilato niaifo ano cani. Nan José arifi Israelifoan aton niaifo futsan. Arimatea mai anoah ini. Nanton manamisi Cristo Diosin catoanton aton niaifo inon. Nanscaini cashon José Pilato yoini, —Niaifon, un Jesús ahuun caya ihui coyan iquinanmaquinoa fotomapai mahua quini muran mai huai cashquin. Un mia yocai oa, —ishon yoini.

⁴⁴ Pilato nicatan, —¡Aira! ¿Ahuuscai Jesús samamashta naamun? —ishon shinanni. Ascashon ranushumua cunani yocashquin, —¿Icommun man Jesús naamun? —ishon yocaiton. —Ai, man naaran, —ishon ranushumuaton cumani.

⁴⁵ Ascaiton nicaquin, —Jesús ahuun caya José fotomatiro mahua quini muran mai huashquin, —ishon Pilaton ranushumua yononi.

⁴⁶ Ascatan José pano oshopa sharacoin fiini. Fiitan a mastafa ihui coyan iquinanmaquinoa Jesús ahuun caya fotomapacufoan ahuun yoratishton nan pano oshopa sharacoinchi raconi. Racoshon toquiri mahua quini muran mai huani. Mai huashon toquirininhuanun fuponifo.

⁴⁷ Mai huaifono María Magdalena futan María futsan José futsan ahuan nannoshon oinnifo.

16

Jesús maiashu funini cuscan

Mt 28.1-10; Lc 24.1-12; Jn 20.1-10

¹ Ascano Israelifoan aton tunutitian cuyoano María Magdalena non María futsan Santiago ahuan non Salomé non afoan ininti sharashta finifo Jesús ahuun cayaqui ocashcaquin.

²⁻³ Ascano iyoconaino nan Domingoai shafatan funamarishta ainfo rafu non fusti Jesús mai ano fonifo yoinanfonifo, —¿Nocomain tsoa toquirininhuan quini fupushonan? —icashu ainfo rafu non fusti yoinannifo.

⁴ Nococaquin oianfo quini ahuun fupoita toquirininhuan toromahuan man fupucuaini.

⁵ Ascaino iquifainpaiquin oianfo nocon mumicayahuuri man ointiaca quini muran tsoan ini. Sahuuti osho sharashta sahuuashu. Fuchitan mustai irinifo.

⁶ Ascaiton ato yoini, —Ratuyamacahuun. Man Jesús funicainaquin. Man funai Jesuscai nunoma. Mastafaitafo man funiaquin. Na quini muran raca iquitano. Oin fucapon.

⁷ Afu rafumisifo yoitacahuun. Pedrori yoifain. “Jesús Galilea ano caiyoi tauicaiquin. Anoshon mato manai. Mato yoimisi cuscan nannoa man ointiroran,” ishon man ointiaca Upa Diosin atoqui nichiaton, —ato yoini.

⁸ Nicaifaini nan ainfo rafu non fusti mahua quini murannoashu ichonifo. Ichoainfoancai icoinra huaquin rashquinifoma. Ratufaini focaquin rama oianfo cuscan tsoa yoinifoma.

Jesús María Magdalena oinmaquin tau huani

Jn 20.11-18

⁹ Ascano Jesús Domingo funamanrishta funini. Funiashu María Magdalenaqui noco tauni. Jesús naataima Mariamaquinoa yoshin chaca siete potani.

¹⁰ Jesús oian cuscan afu rafuafo ano cani ato tapimashquin. Atoqui nocoshon oian Jesús shinancani uainifo.

¹¹ —Un rama Jesús oian. Man funiaran, —ishon María ato yoifaiton nicacaquin tsoan icoinra huanima.

Jesús afu rafumisifo rafu oinmani

Lc 24.13-35

¹² Ascano ahuun tanamisi rafu fai foaifoanno Jesús atoqui niriscatani. Ascaitocai onannifoma.

¹³ Onancanashu afu rafumisifo futsafo ano fonifo ato tapimashquin. –Non Jesús oianran, –ishon ato yoifiaifoa tsoan atori icoinra huanima.

Jesús afu rafumisifo once yononi cuscan

Mt 28.16-20; Lc 24.36-49; Jn 20.19-23

¹⁴ Ascatan chipo piyainfoanno Jesús atoqui nocoriscatani. Ascashon ato yoini, –¿Ahuuscain un afanan funia man icoinra huamamun? Futsanfoan ua oinshon mato yoifiaiton man ato icoinra huamaran, –ishon afu rafumisifo once yoini.

¹⁵ Ascano ato yoiquin, –Mun funia. Atohuunoashu naiyofiafashu un afanan funia aton chaca soashoshquin ufu nipanonfo. Manifoti ato yoitacahuun.

¹⁶ Ratoran futsanfoan uhuun tsain shara icoinra huatan unu muran iquimamuashu ufu Upa Dios icano nipatiroquin. Ascfia ratoran futsafoan nan tsain shara uhuunoa icoinra huayamashu ahuun chaca ahuun nupacunaca. Ascashufin omitsiscapanaca muran fotirofoquin.

¹⁷ Ascano ratoran ua icoinra huashon uhuunshon yoshin chaca futsamaquinoa potafain tsain shara tsoan nicayomisima cuscara yoifain

¹⁸ rono paupan tsomashu yotucuyamarain rao paupan ayashu ahuuscayamacain isinin imisifo manmanshon caya huamashquiran, –ishon Jesús ato yoini.

Jesús nai muran Apa ari cani

Lc 24.50-53

¹⁹ Ato yoitan Upa Diosin atomaquishon nocon Ifo Jesús nai muran ihuini afu niaifocoin inon.

²⁰ Ascatan afu rafumisifo maitio foanfaincaquin Jesushuunoa ato yoiifono, nocon Ifo atofu yononi ahuamamishiti ahuunshon huanonfo. Ascano nocon Ifoan tsainhuunoa ato yoini cuscan icoinra huanifo. Nanti.

Lucas Jesushuunoa Cununi

Lucaspan tau huaquin ahuun tsain cununi cuscan

¹⁻² Teófilo un mia cunu fomain futsafoan Jesucristohuunoa cunuafo cuscan mirifi min icoinra huacoinnon. Jesús acaiton oinmisifo cuscan yafi ahuun tsain yoimisifoan noco yoinifo cuscan nannori futsafoan aqui cununifo.

³ Ascano urifi un nantifi yocapacuni Jesushuunoa aqui cunushquin. Nan caini cuscan huafain nan ahumamishti huayopaonishaquin apa ari nai muran naso caini cani. Ascacun afu rafuafo un ato yoca urifi tapisharashqui. Ascashon cayacafi cunushon mia fomashquin.

⁴ Ascacun uhuun cunuhuunshon mia futsafoan yosiainfo cuscan min icoinra huacoin-tiro.

Diosin nai oinmatinin nan Juan yorafo unu muran iquimapacumisi caiantaima ahuun apa tapimayoni

⁵ Ascacun natian un nica cuscan un mia yoinon. Herodes Judea anoa niaifoatian nantianri Zacarías nocofunu shara nanno ini. Naanfin Aarón ahuun funaquin. Ascashu nannoa ahuun caifohuunshon Dios cufimisi ipaoni. Aarón ahuun funafo shoco ranan. Nan shoco futsafoan aton niaifo Abías. Nanrifi Zacarías ahuun niaifo ini. Nan Zacarías ahuin Isabel arifi Aarón funa.

⁶ Ascashon nan rafutan Diosin tsain cununi cuscan nicasharacoinpaonifo. Nantifi Diosin yononi cuscan tanasharamisifo. Nan rafutan tanasharaifoan Diosin oinpaoni. Ascacucai tsoan ato ahuashta rafatiro ipaonima.

⁷ Ascafiashu facuoma rafu. Zacarías anifo icaino ahuinri yoshafo toosma ini.

⁸ Ascano Abías ahuun shocofo nan ahuun yorafohuunshon Dios cufimisifo ato yoini isca huaquin, —Manfin natian siete oshatan Dios cufiti pushu muranshon man yonoshonicai, —ishon ato yoini. Ascano nannori Zacarías atofu ini.

⁹ Nantianri Zacarías catonni Dios fu tsainti pushu muran iquishon ininti shara coanon. Nan ininti ahuun anu incienso. Nanscara cufimisifoan aton fuyamisi ipaoni.

¹⁰ Nan incienso fiin cuscara coaino yora ichapafo cufiti pushu umainti ano nishon Dios cufishcaquin.

¹¹ Ascashon Dios cufiti camaqui incienso coa ahuun mumihuuri Diospan oinmati afu nai muran ica Zacariasqui niriscatani.

¹² Ascaino Zacarías mustairitan fasi ratucoinni.

¹³ Ascafiaiton Diosin oinmatinin afu nai muran icaton yoini isca huaquin, —Ratuyamahuu, Zacarías. Min cufiainton Diosin man mia nica. Min ahuin Isabel chipo furonanfacu nanushquin. Ascan caincun min anuquin Juanran min huashquin.

¹⁴ Ascashu min fasi aqui unimasharacoinshquin. Ascaino yorafori fasi aqui unimacoinshquin caiano.

¹⁵ Ascano Upa Diosirifi aqui unimashquin. Nocofunu fasi sharacoin iishquin. Ascashocai ahuara pau ayapacunacama. Fimi unu pau ayayamafain ayati futsa pauro ayashquima. Caiyaintian Diosin Yoshin sharapan nan iquishquin.

¹⁶ Nan nocofunuaition ahuun caifo Israelifo Diosin tsain shara ato yoishquin ato chaca shatunonfo. Ascano aton Ifo Diosiqui nasononfo.

¹⁷ Ascashu nan Juan Elías ipaoni cuscara arifi iishquin. Elías Dioshuunshon ahuun yorafo cayacafi icocoin tapimapaoni cuscan nanscarifi aqui Juanpan ahuun yorafo arifi ato tapimashquin. Ascano ahuun tsainhuunoashu ato apafu yafi aton facufo afanan noinanshcani. Ascashu nan Diosin tsain nicacasmamisifoan arifi aton chaca shatucashon Dios icoinra huafain shinansharashcani. Ascacun Juanhuunoashu ahuun caifofo itisharashcani Diospan furun atoqui nocoaitian a nicasharashcaniran, —ishon yoiaiton.

¹⁸ Nicaquin Zacarías cumani, —¿Ahuuscashomun min yoiai cuscan un icoinra huatiroquin? Unfi anifocoinquin. Uhuun ahuinrifi yoshafoquin, —huaiton.

¹⁹ Afanan cumaquin, —Unfi Gabrielquin. Un Dios fu imisi. Ascacun nanton ua nichian un ahuun tsain shara mia yoinon.

²⁰ Ascan un mia yoiai cuscacai mian icoinra huaima. Ascan natiancai min afanan tsainyoima nan min facu caiyaintian. Un mia yoiai cuscafin nan apaiyaitian Diosin huaashquiquin, —ishon Diosin nai oinmatinin yoini.

²¹ Ascaino yorafoan Dios fu tsainti pushu umaintishon cufinquin anaiticatan Zacarías mananifo. Ascafiaino Zacarías atoqui funa caiamaino yoinifo, —¿Ahuuscain Dios cufiti pushu murannoashu Zacarías saman huaimun? —icashu yoinannifo.

²² Ascariaifoanno atoqui cainfiashocai ato tsainquinima. A pucutiroma muuquin ahuun mucupan ato yoi fustini. Ascaiton onannifo Dios fu tsainti pushu muranshon Zacarias namapan cuscara oianran, icashu ahuun yoinannifo.

²³ Ascashu yorafohuunshon Dios cufimisifo ato yono anaiticatan Dios cufiti pushu murannoashu fonifo. Ascaino Zacarias arifi ahuun pushu ano caní.

²⁴ Ascashon chipo ahuinin facu nanuni. Ascashucai ahuun pushu murannoashu mucu fustiti oshu raqui caipainima.

²⁵ Ascashon Isabel shinanquin isca huani, —¡Aicho! Diosihuunshon uhuun funun ua facu nanumana. Diosin ua ashoan. Afin ua nanumapaiyaitian ua facu nanumana. Uhuun ramapaiquin. Asca natiancai afanan uhuunoa yorafoan yoitiroma isca huaquin, “Nacai facuyamacamaran,” ishocai yoitirofomaran, —ishon shinanni.

Jesús cainshquiai cuscan Diosin nai oinmatin yoini

²⁶⁻²⁷ Ascano seis oshu Isabelqui man caano Diosin nai oinmati Gabriel Mariaqui niriscatani. Nan María funuoma ini. José fu fiananfotaima afu iyopaonima. Tsoaricai afu imisima. Ascan José ahuun shunifin David iniquin. Nan Israelifoan ato niaifo ipaoni. Ascacun Diosin ahuun oinmati afu nai muran icaton yoini isca huaquin, —Galilea mai Nazaret pushurasi muran Mariaqui catahuun, —ishon ahuun oinmati Gabriel nichini.

²⁸ Ascano aqúi nocoshon yoini, —Un miqúi oa. Diosin oian min fasi sharacoincun. Mia fasi noicoín. Nocon Ifo mifu icaran, —ishon yoini.

²⁹ Ascaiton nicaquin María ahuun nomuran shinanpaini, —¿Raquiri ua yoipaimun? —ishon shinanni.

³⁰ Ascaiton afanan cumani, —María, ratuyamahuu. Diosin mihuun noifain miqúi unimasharai.

³¹ Ascan minfin natian furonanfacu nanuicai. Ascashu caincun min anuquin Jesusran, huaashquin.

³² Ascano caianshu niaifocoin iishquin. Diosin nai murannoaton ahuun shuni David niaifo ipaoni cuscan arifi apahuunoashu niaifocoin iishquin.

³³ Ascashu naanfin Israelifoan aton niaifo unupacunacamaran, —ishon Gabriel yoiaiton.

³⁴ Afanan María cumani, —Uncai funuyamafinquin. Uacai tsoan tanamisima. ¿Ascan ahuuscashomun un facu nanutiroquin? —huaiton.

³⁵ Diosin oinmatin afu nai muran icaton afanan María cumani, —Diosin ahuun Yoshin Sharapan miqúi oshon mia facu nanumashquin. Nanto ahuun curushhuunshon ahua-mamishti huatiro. Nanhuunshon mia facu nanumashquin. Ascan nan facu cainshquiaifin shara fustisi imisiquin. Ahuashtacai chaca huamisima. Naanfi Diospan facuquin.

³⁶ Min yaya yoshafoancai facu nanumisima. Ascan toosmaran huafiamisifo natian man facu nanua seis oshu man aqúi caa.

³⁷ “Ascacun ahuacai Diosin aquimaracai,” non huatiroma. Nantofi ahua-mamishti huatiroquin, —ishon yoini.

³⁸ Ascaiton afanan María cumani, —Unfin uhuun Ifoan oinmatiquin. Afifin nan apaiyai cuscan ua huatiroquin. Nan mian yoiái cuscan ua huanonquin, —ishon María yoiaino amaquinoashu yamariscatani.

Marían Isabel oin cai caní

³⁹ Ascano man shafa ranan finontan María ahuun yaya ano cai fasi coshi caní no-riscapái. Nan Judea muran pushurasi ano machihuanrasifo ini.

⁴⁰ Nocotan Zacarias ahuun pushu muran iquitoshiquin ahuun yayan Isabel yoini, —Yayan, un mia oinyoiran, —huani.

⁴¹ Ascaiton nicai Isabel ahuun shaqui muranshon ahuun facun potapotani. Asca huaino Diosin Yoshin Sharapan ahuun nomuran shinansharamani.

⁴² Ascaino oi ashcafinin Isabel ahuun raru María yoini isca huaquin, —¡Aicho! Rato ainfo futsacai mia acai cuscan Diosin catoanma. Fasi mia shara huacoinna. Min facu chipo cainyano Apa Diosin aqúi unimacoinqui a cushusharashquin.

⁴³ Ascan un ahua shara huaa rafanancai Diosin ua shara huama. Ascashon uhuun Ifoan ahuun ahua uqúi nichian ua oinyonon.

⁴⁴ Ascano min tsain nicai unimaqui uhuun shaqui muranshon uhuun facun ua potapotata.

⁴⁵ Úpa Diosin nan min ishquiai cuscan mia iquisi tapimanaiton nantifi ahuun tsain min icoinra huaa. Ascacun Diosin mia unimamaran, —ishon Isabel ahuun raru María yoini.

⁴⁶ Ascaiton María arifi ahuun yayan yoini, “Uhuun nomuranshon un shinanqui isca huaa,

‘Ifon min sharacoin. Tsoa futsacai mia cuscara sharama.

⁴⁷ Min uhuun Numamisi

Diosiran icashu uhuun nomuran un fasi unimacoinna.

⁴⁸ Ascashu un ahuun oinmati.

Un ahuamafiacun uhuun ramapaiquin ua oinfafainni.

Ascacun ua Diosin shara huaa cuscan yorafoan uhuunua yoipacunacafo.

⁴⁹ Diosin ahuamamishti huamisisiton ua ahuaa sharashtacoin ashoan.

Aafin shara fustisiquin.

⁵⁰ Ascán ratoran futsan Dioshuunua nicaquin ahuunua shinansharafainai.

Nan cuscara yorafohuun Diosin ramapaipacunaca.

⁵¹ Diosin ahuun shinanpan ahuamamishti huamisi.

Ascashon nan cacapaimisifoan aton nomuran shinanchacamisifo cuscan Diosin ato shatumafain atori onaintimai.

⁵² Ascatan niaifofori Diosin ato shatumana afanan niaifo inonfoma.

Ascashon nan ahuamafo ato shinansharamana nanfoan tapinonfo ahuun facufocashon.

⁵³ Ratoran futsa ahuuomafo foni cuscarafasi Diosihuunua tapipai tanasharashcaquin.

Nanscarafasi Diosin ato cushusharatiro.

Ascashon ahuaa yopai cuscan ato inansharafain a tanasharaifoanri ato unimamashquin.

Ascashon ahuaa ichapa ayafofiashu Diosihuunua shinanyamaifo copiquirifi ato ahuaa inainma.

Man mafo ichapayafiashu ato nomuran shinansharayamafain tsoa unimamisima.

⁵⁴⁻⁵⁵ Ascafiafoanno nocon caiffo Israelifofin Diospan oinmatifoquin.

Ascashon non ahuaa acai cuscan noco ashomisi.

Nonfin noco shuni Abraham ahuun funafoquin.

Ascacun nocohuun ramapaipacunaca.

Nannori Upa Diosin nocon shunifo yoiyotianiran, ”

ishon María yoini.

⁵⁶ Ascashu oshu rafu non fusti ahuun yayan Isabel fu iyoní. Ascatan María ahuun pushu ano nasoni.

Nan yorafo unu muran iquimapacumisi Juan caini cuscan

⁵⁷ Ascashu Isabel ahuun facu caiyaintian furonanfacu cainni.

⁵⁸ Ascaiton a chaima icafo futan ahuun yorafoan nicanifo nocon Ifo Isabelhuun ramapaiquin facu cainmashara. Ascashu afu unimacoinnifo.

⁵⁹⁻⁶⁰ Ascatan ocho osha finontan Zacarías pushu ano ahuun yorafo funifo facushta ahuun foshqui rupa shatuni fucani. Ascashon apa anuquiri Zacariasran huapaifaifoan ahuá Isabel yoini, —Ma. Anoricai ahuun anu iquima. Juan ishquiran, —ishon ahuan yoiatón.

⁶¹ Cumanifo, —Ma. Rato min yorafoan ahuun anucaí Juanmaran, —ishon yoinifo.

⁶² Ascashon Zacaríasrifi yocanifo ato mucumansi raquinimain ahuun facun anucaí. Ascafiaifoan tsaintiroma muuqui ahuun mucumansi mutoacufaini ahuun anu tapipaifiainfoan.

⁶³ Ato papio yocain mucu mushan mushainni. Ascaiton inanfo cunutan ato ismaiton oianfo Juan ini. Ascara oincani mustairitan, —Icon ahuun anu Juan ishquiran, —ishon shinannifo.

⁶⁴ Ascano ahuun facun anu cunutapai Zacarías afanan tsainnacahuani. Ascashon Dioshuunua shara yoini.

⁶⁵ A chaima icafo futan Judea muran machi ichapa ano icafoan nicacaquin Diosin aca cuscan fasi sharacoin. —Noncaí ascara nicayomisimaran, —icashon Zacarías yafi ahuin Isabel non aton facu Juanhuunua yoiquin futsanifo.

⁶⁶ Ascashon nan nicafoan yoinifo, —¿Ahuu cuscaramun nan facu iishquiquin? Man non oian facufiacun Diosin Yoshin Sharapan iquinaiton, —icashu yoinannifo.

Zacarías fanainni cuscan

⁶⁷ Ascano facu ahuun apa Zacarías Diosin Yoshin Sharapan iquinaiton inon pacoai cuscan yoini isca huaquin,

⁶⁸ “Uhuun caifo Israelifoan nocon Diosin fasi sharacoin.

Nocoqui oa noco numashqui.

⁶⁹ Diosin nocon Numamisi nan ahuamamishti huamisi nocoqui nichian.

Noco shunifoan aton niaifo David ipaoni.

Nanton ahuun funa nocoqui nichian noco niaifocoin ipashanon.

⁷⁰ Nannori ahuun tsain inon pacoai yoisisharafahuunshon Diosin yoiyoni.

⁷¹ Ascashon yoiquin isca huani, “Un mato cushui.

Nan mato noicasmamisifoan afanan mato ahuusca huanonfoma.

Ascacun un mato Numamisi matoqui nichiran,' ishon Diosin inon pacoai yoimisifo huunshon noco yoini.

⁷²⁻⁷⁵ Ascashu noco shunifo huun Diosin ramapaipaoni.

Abraham yoiyoni cuscacai Diosin ointi aquimanama.

Yoiquin isca huani, 'Un min funafo numashqui ato noicasmaifoan ato ahuusca huanonma.

Ascano ratutama ua yonoshopacutirofoquin,' ishon Diosin yoiyoni.

Nocon Ifoan yoiyotiani cuscacoin man noco ashoin non isharacoincain non ahuun tsain tanapacushanon,"

ishon Zacarias yoini.

⁷⁶ Ascashon ahuun facu yomushtafiacun pushcoashu ishquiai cuscan yoiqui isca huani, "Uhuun facushtan, 'Mirifi min Diosin tsain yoishomisan,' mia huaashquicani.

Diosin nai murannoaton ahuun Yoshin Sharahuunshon ishquiai cuscan min ato yoifoanfainquin isca huashquin.

'Nocon Ifo oshquiquin itisharacahuun.

Maton chacari shatucahuun a nocoaiton nicasharashcaquin.

⁷⁷⁻⁷⁹ Diosin fasi nocohuun ramapaiqui

nocon Ifohuunshon noco chaca soashona non afu ipashanon,'

ishon noco caifo min ato yoishquin.

Nii muran faquishianocai non oinsharatiroma.

Chashamatimaisicai non fai tanasharatiroma nocosharapaiquin.

Nanscarifiai nocon Ifo oataimano tsoan Diosin fai tapiataima.

Shafaino fari otiro afanan faquish inonma.

Nanscarifiai nocon Ifo nai murannoashu oataima nan faquish cuscara.

Asafia nan nocoqui oaitian nan chashamati cuscara shara iishquin.

Ascashon Diospan fai noco oinmashquin

ahuunoashu non Dios fu rafunon.

Nonricai nai afanan ratutiroma.

Naashumain non Upa Dios fu ipasharatiroma.

Non nicuri noco cushusharafain nocon ointi fucash huanonma non isharashquin,"

ishon Diosin Yoshin Sharahuunshon Zacarias yoini.

⁸⁰ Ascashu nan Juan facu pushcocoin sharani. Ascashon shara fustisi tanapaiquin ahuun nomuran Diosin tsain shara nanuocoini. Tsoa istaipama anori iyopaoni ahuun caifo nan Israelifo Diosin tsain yoiquin tau huaitian.

2

Jesús cainni cuscan

Mt 1.18-25

¹ Nan Juan caiyaintianri Romanonfoan aton niaifoan ahuun anu Cesar Augusto. Nanton ahuun yorafo yononi maitio ato tanan huashon aton anufo cununonfo ahuuti yoramainquin tapipaiquin.

² Nantianri Siria anofoan ato niaifo ahuun anu Cirenio ini. Ascan nan Cirenio niaifoaitian ato tanan huaquin tau huani.

³ Ascano nantifi focanashu aton mai anoashu cununifo.

⁴ Ascacun José yafi María Nazaret pushurasi Galilea murannoashu focani Belén pushurasi Judea mai ano noconifo. Nan Belén David ahuun mai ini. José David ahuun funa. Ascacun arifi Belén ano cani.

⁵ María fu aton anu cunui focani fonifo. Ascashu man yoinanfo ini afu fiananshquin. Asafia nantianri man facu nanua ini.

⁶ Belén ano nocoaitian facu cainti sunuin ini.

⁷ Nannoashu furonafacu caianshu facuyai tauni. Nantifi pushu fospifafainano tsoan ato iquimapaiyamaino inafon pimisifo pushu facushta murannoashu furun cainni. Cincun ahuun rashutinini rashuni. Ascashon inafon piafo muran furun ratani.

Diosin nai oinmatifo yafi chashoan cushumisifo

⁸ Nan Belén chaimashon chashohuan cushumisifoan nan yamutari aton inafon faasi fununshon cushushinifo.

⁹ Ascaino atoqui nocon Ifoan ahuun oinmati afu nai muran icafo fotoi chashapacucahuani. Faasi fununnoafo Diosihuunshon ato chashariscatani. Ascaino nan chashoanfo cushumisifo fasi ratui futsunifo.

¹⁰ Ascaifoan ato yoini, —Ratuyamacahuun. Un mato tsain fasi sharacoin yoiyoaquin. Nica man unimaino manifoti anoafori unimanonfo.

¹¹ Na yamutafin Belén nan mato shuni David cainni anoashuri maton Numamisi cain huanquin. Naanfin Upa Diosin matoqui nichiaquin. Nan maton caifoaan manamisifo. Nanrifi maton Ifoquin.

¹² Ascacun un mato yoi ahuuscashomain man fuchitiroquin. Nan facu ahuun rashutin in rashucaí inafoaan pimisifo muran racacun man fuchitiroquin, —ishon Diosin nai oinmatinin ato yoini.

¹³ Ato yoiqui unutupaiyaino samamashta atirifi Diosin oinmati afu nai muran ica atoqui cuyopacunifo. Ascashon Diosihuunoa yoisharacaquin isca huanifo.

¹⁴ “*Diosin fasi shara. Nai murancoin ica. Atirifoqui Diosin unimai. Nafu aton nomuran unimasharacanian,*”

icashon yoinifo.

¹⁵ Ato yoiqui anaiticatan atomaquinoashu Diosin oinmatifo nai muran fonifo. Ascaino nan chashoon cushumisifoan yoinifo, —Non Belén ano canon. Nocon Ifoan noco yoiacusan non oin fonon, —icanashu yoinannifo.

¹⁶ Ascashu ichocaquin María yafi José fuchitoshiquin oianfo facu inapan pimisifo muran fasi toca racai ini.

¹⁷ Ascatan nan facu oianfo cuscan huafain ato yoifoaanfainifo.

¹⁸ Ascan nan chashohuan cushumisifoan ato yoiainfoan nicacaquin yoinifo, —¡Aira! ¿Ahuuscashomun ascara shara noco yoiainfoan? —inifo.

¹⁹ Ascacun María ahuun nomuran fasi shinanpaoni nan nicafain oian cuscan. Ascashori, —¡Aicho! Diosin noco shara huashoanran, —ishon shinanpaoni.

²⁰ Ascashu nan chashohuan cushumisifo ato yoifoaanfaintacani aton inafu ano nasofuracashon yoinifo isca huaquin, —¡Aicho! Dios fasi shara. Nan noco yoiacusan huafain nanscaracoín man non oianran, —icashu yoinannifo.

Dios fu tsainti pushu muranshon apa futan ahuan aton facu Jesús Dios inannifo

²¹ Jesús cainta ocho oshatan nan facun ahuun foshqui rupa shatuni. Nantianri anuquin Jesusran huani. Nannori María facu nanuataima Diospan oinmatinin afu nai muran icaton yoiquin tau huani.

²² Moisés Israelifo yononi isca huaquin, —Maton ahuin facu caianshu cuarenta oshatan Dios fu tsainti pushu muran iquiyotiromaran, —ishon ato yononi. Ascacun María futan José aton facu man cuarenta oshatan Jerusalén ano iyonifo. Dios fu tsainti pushu muranshon apa Dios inanshaquin. Ascano Dios fu tsainti pushu muran iquicashon yoinifo isca huaquin, —Upa Diosin nocon facu non mia ihuushona mia inainyoshquin mia yonoshopacushanon, —ishon yoinifo.

²³ Ascacun nannori nocon Ifoan yononi isca huaquin, —Nan furonanfacu cain tauafo nocon Ifo Diosina. Ascashon ari amapaiyai cuscan ato huapashanon, —ishon cununi.

²⁴ Nantianri José yafi María Diosin yononi cuscaín ruhui rafu iyamarai ruhui cuscara rafu foní nan ahuun caifohuunshon Dios cufimisi María inanni a rutushonon. Ahuun chaca soapaiyaton Diosin ashonon. Ascashon a tanasharafain ismanon.

²⁵ Ascan nantianri Jerusalén anoa nocofunun shara ahuan anu Simeón. Diosin Yoshin Sharapan iquina. Nanton Dios tanasharashon cuffafainpaoni. Ascashon nan Diosin catoon Israelifoan aton Numamisi manafafainpaoni.

²⁶ Ascacun Diosin Yoshin Sharapan ahuan nomuran yoini, —Min naataishoma nan Diosin catoon maton Ifo Cristo min oinshquiran, —ishon yoini.

²⁷ Ascashon Diosin Yoshin Sharapan shinanmani cuscan Israelifoan Dios fu tsainti pushu muran iquini. Ascaino José yafi María arifi aton facuya iquifainnifo. Diospan tsain yononi cuscan aton facu huashoshcaquin iquini.

²⁸ Ascano Simeón atoqui otan yoini, —¡Aicho! —ianan facu chishtoinifoanni. Ascatan Dios yoisharacaquin isca huani,

²⁹⁻³⁰ “Ifon, min nantifi tapicoian.

Mian yoyotiani cuscan mun oian. ¡Aicho!

Natian unimacaini un nai manmain min facu nan nocon Numamisi mun oianmashu.

³¹ Nantifi manifeston aton Numamisi min nocoqui nichian.

³² Ascacun nocon caifomafoan mia onanyamafiamisishaquin min facuhuunshon mia onanshquicani.

Ascafia nonfin min yora Israelifoquin non tapicoinshquin

na facuhuunoashu Diosin nocohuun ramapaiyaiton.

Ascano ahuunshon min noco yoiyoatiani cuscan noco huashoshquiran,”

ishon Simeón yoini.

³³ Ascaiton nicacaquin José futan Maríaan aton nomuranshon shinanquin isca huanifo, —¡Aira! Noncai iscara nicayomisimaran, —ishon shinannifo.

³⁴⁻³⁵ Ascashon Simeón Diospan Yoshin Sharahuunshon ahua María yoisharaqin isca huani, —Min facu nan nocon caifo Israelifo atirifoan nicacasmacashu omitsiscapanacafo. Ascan min facu nicacasmaifoanno min fasi shinanshquin. Ascafia nocon caifo atirifoan min facu icoinra huacanashu fasi unimacoinshecani. Ahuunshon yora ichapafain aton nomuranshon shinainifo cuscan puashcaniran, —ishon Simeón yoini.

³⁶ Nannori ainfoan ahuun anu Ana, Faniel facu. Nanton arifi Dioshuunshon inon pacoai cuscan yoipaoni. Nanrifi Aser ahuun caifo ini. Siete fari funun fipaoni. Ascafiashu amaqui funu naniano man Ana yoshafoshta ini.

³⁷ Ascashucaí ochenta cuatro fari funuya. Nantianri Dios fu tsainti pushu muranshon Dios cufinquin piqui tunufafainpaoni. Nan muransi ipaoni ahuun Ifoan amapaiyai cuscan aashquin.

³⁸ Ascano José yafi María Simeón fu tsaincaifoanno nantianari atoqui Ana oni. Oshon facu fuchitoshiquin yoini, —¡Aichoran! Upa Diosin, natian min facu min nocoqui nichian nocon Numamisi ipashanon, —ishon yoini. Ascashon nan facu oian cuscan Jerusalén anoafo nan manamisifo Anapan yoiqui isca huani, —Mun nocon Numamisi oincoian. Man nocoaran, —ishon ato yoipacuni.

Nazaret ano naso furanifo

³⁹ Ascano José fu María Diosin tsain yononi cuscaín aton mai Nazaret ano nasonifo. Nan Nazaret Galilea muran.

⁴⁰ Nannoashu facu mutsisipacoin yosini. Shafatifi ahuamamishti tapicoínfaini. Diosin ahuun noiquin shara fusti huamafainni.

Facushtafashu Jesús Dios fu tsainti pushu muran iquini

⁴¹ Ascano nan faritifi Jesús apa yafi ahua Jerusalén ano fopaonifo. Diosin nai oinmatinon aton shunifoan furonanfacu iyoafosi ato finonmashoni shinantacani.

⁴² Jesús man doce fari aqi caano apa futan ahuan nan imisifo cuscan fuusin focaquin iyonifo.

⁴³ Ascashu man fuusi anaiticatan María yafi José aton pushu ano naso furanaifoanno. Jerusalén ano nan facu Jesús atomaqui nitufaiatocai apa futan ahuan tapinifoma.

⁴⁴ Ascano atofu cai shafain icashon. Man shafa fusti fofaicatan ifiacucahua oian yamaiton. Funacufaincaquin ahua futan apa ahuun yorafo yafi afu rafuafo yocanifo, —¿Man Jesús oianmamun? —ato huaifoan. —Ma. Noncai oianmafinquin, —huaifoanno.

⁴⁵ Afanan nasofaincani fonifo Jerusalén ano funai focani.

⁴⁶ Ascano focashon rafu non fusti oshatan funacaquin Israelifoan Dios fu tsainti pushu muranshon. Moisés cununi cuscan tapimamisifo ya tsaoshon yoiainifo cuscan nicaquin ato yocariaiton apa futan ahuan fuchinifo.

⁴⁷ Ascaiton nicacaquin yoinifo, —Nicacapon. ¿Ahuuscashomun na furonanfacu ato caya-cafi cumasharaqin? Fasi tapisharacoian, —ishon nan nicafo cuscan afi ranan yoinannifo.

⁴⁸ Ascano ahua futan apan fuchicashon yoinifo, —Oinpon. Nocon facu iyoafoco nastui tsaao. ¿Ahuuscaimun noco facu icuscaquin? —huanifo.

Ascashon ahuan cunani, —Cocan, ¿Ahuuscaí upa yafi min noco funamanain? ¿Min tapiamamun upa futan un mia funai? Non fasi ratua, —huiton.

⁴⁹ Jesús ahua cumani, —¿Uhuun, ahuusca huaashquin man ua funaquin? Man tapiamamun nuno uhuun Upa cufiti pushu muran un iquia ahuun tsain nicasharashquin, —huani.

⁵⁰ Furumun yoiaini cuscaí ahua futan apa tapinifoma.

⁵¹ Ascashu ahua yafi apa fu Nazaret ano nasoni. Ascashon nantifi apa futan ahuan yonoaifo cuscan yafi yoiainifo cuscan nicacoinni. Ascatan furunmun yoiaini cuscan ahuan ahuun nomuran shinanfaini.

⁵² Ascashu Jesús pushcosharacoinni. Diosin ahuun shinanpan shinanmasharamanaino mapo sharayacoin ini. Ascacan Apa Diosin ahuunoa shinansharaqin yoini isca huaquin, —Uhuun facun Jesús fasi sharacoin. Un ahuun noicoiran, —ishon yoini. Yorafoan arifi Jesushuunoo nannorisi shinannifo.

3

Nan ato unu muran iquimamisi Juan tsoa istapamashon ani

Mt 3.1-12; Mr 1.1-8; Jn 1.19-28

¹ Nantianri Tiberio Romanonfoan aton niaifocoin ini. Quince fari niaifoyoni. Nantifiton aton niaifocoin. Ascano rafu non rafuri niaifo patasharinao nannori afu ipaonifo. Futsan ahuun anu Poncio Pilato nan Judea mai anoafoan aton niaifo. Galilea mai anoafoan aton niaifo Herodes ipaoni. Chipocu Felipe Iturea yafi Traconite anoafoan aton niaifo ipaoni. Abilinia anoafoan aton niaifo Lisaniá ipaoni.

²⁻³ Nantianri Anás yafi Caifás ahuun caifohuunshon Israelifo Dios cufimisi aton niaifo rafu ipaonifo. Ascaifono Juan tsoa istapamashon icamanoshon Diosin yononi. —Min caifo yoitahuun isca huaquin, “Maton chaca shatucahuun. Man chaca shinain cuscan afanan shinanyamacahuun. Diosin mato yoia cuscan nicacahuun. Man ascaiton Diosin mato chaca rau huashotiro. Ascacun un mato unu muran iquimapacutiro maton chaca shatushon man ismanon.” Anori ato yoitahuun, —ishon Diosin Juan yononi. Ascacun Diosin yoini cuscan Juanpan unu Jordán cusumunshon ato yoiriani.

⁴ Nannori Juanhuunoa Isaias inon pacoai cuscan yoimisiton cunuquin isca huani, “Tsoashta icamanoshon Diosin yononi cuscan oi ashcafinin yoiquin isca huanon-pacoi, ‘Nocon Ifo nocoqui samamashta ooshqui. Ascacun itisharacahuun.

⁵ Un tsoa cuscaramaran iyamacahuun. Ascatarocon uncai ahuama. Uhuun numamisi un yopacoinran, icahuun. Ahuara onushon afanan nasocahuun. Cayacafi ishara-shaquin. Man ipaoni cuscan afanan ayamacahuun. Nantifi mato chaca potacahuun nocon Ifo fusti tanasharshaquin.

⁶ Nan Diosin catoan nocon Numamisi oaiton nantifiton oinshquicaniran,” ishon Isaias cununi.

⁷ Ascano yorahuanrasi Juanqui funifo ato unu muran iquimapacunon. Ascashon ato yoiquin isca huani, —Manfin rono paupaton facu cuscaracoinfoquin. Icoinra huayamaifoan Diosin atoqui sinaqui amaquishon ato potano omitsiscapanacafo. Ascacun manfin nanscarafquin. Omitsiscapanacafo muran focasmafiaquicai maton chaca man shatupaima.

⁸ Ascafia chaca shatucocinshon Diosin mato yoia cuscan nicacocincahuun. Man ipaoni cuscan afanan ayamacahuun. Man ascaiton yorafoan ointirofo afanan chaca huapaitama Dios fusti man tanasharaiton. Maton nomuran shinanquin isca huayamacahuun, “Nonfin Abraham nunafo non ahuun caiforiquin iyamacahuun. Diosin Abraham yoiyotiani cuscan nocorifi ashotiro. Ascan Diosin noco onaintimashquimaran,” ishon anori shinanyamacahuun. Diosin onihuapaiquifin na unu cusumunnoa toquirifo Abraham ahuun funafo oni huatiroquin.

⁹ Fana fimi sharayamaiton ifoan ahuun tapo nantifi ruratinin shatuquin cuyoshon chii muran potatiro coi futsunon. Nanscarifiai natianri Diosin man itishara chaca shatutama man isharyamacaiyaton mato omitsiscamapacushquiran, —ishon Juanpan ato yoiatian.

¹⁰ Nicacaquin cumanifo, —¡Ohua! ¿Nonmun ahuuscaicain? —huaiton

¹¹ Ascan Juanpan yoiquin isca huani, —Nan sahuuti rafuyaton futsa ahuomacoincun inancahuun. Nanscarifi aquin nan tushuyaton a futsa tushuomacun inancahuun, —icaiton nicacani.

¹² Niaifo pui fishomisifori aqui fucashon yocanifo, —¿Tapimamisiton, nonmun ahuuscacitiroquin unu muran iquimamushquin? —huaifoan.

¹³ Ato cumani, —Afanan maton niaifoan yonoamati finonmafain pui fiyamacahuun, —huaiton.

¹⁴ Ascaino atirifi ranushumuafoanri yocanifo, —¿Ascainon nonmun norifi ahuuscacitiroquin? —huaifoan atori yoiquin isca huani, —Pui fianpaiquin ato asca huayamacahuun. Pofuyamacahuun. Man tapiflashon yora futsan ayamafiacun, “Nanto acaran,” ishon maton niaifo yoiyamacahuun. Nan mato niaifoan mato inantisiya unimacahuun. Tsain chipuyamacahuun, —ishon ato yoini.

¹⁵ Ascaiton nan Cristo manamisifoan Juan nicacani ato nomuranshon shinannifo, —Nanracafin Cristoquin. Nan Diosin catonni, —ishon shinannifo.

¹⁶ Ascaifoan Juanpan ato cumani, —Uncai Cristoma. Unfin mato unu muran iquimapacuaquin. Ascacun nantofin ahuun Yoshin Shara matoya rafumapacui oiquin. Ahuun shinansharapan maton nomuran shinanmanon. Ascashu matofu rafuano nantifi ahuara chacafo ahuunshon shatuashu a cuscara shara ishcaquin. Naanfin Diosin catoanquin. Nantofin ua fasi finoncoian. Ahuamamishti huatiro. Ahuashta chaca huayomisima. Uncai ascarama. Un ahuara shara huahuu rafanancai un ahuun oinmatima. Uhuun ramapaiyamainoricai un ahuun oinmatti icuanama.

¹⁷ Ascan natian man itishara a icoinra huafo yafi a nicascamamisifo ato pashcanan huashquin. Ascashon nan icari nan icoinra huafosi ihuicoishquin afu ishara pacunonfo. Asca nan nicascamamisifo chii urumanhuan muran ato potai anoashu omitsiscacai unupacunacafomaran, —ishon Juanpan ato yoini.

¹⁸ Ascashon tsain futsafori ato yoiriani aton nomuran nanumapaiquin chaca shatunonfo. —Nocon Ifo Cristo nocoqui oi noco numashqui, —ishon ato yoini.

¹⁹⁻²⁰ Ascashon Juanpan nan niaifo Herodes yoiqui isca huani, —Ushto ahuin fianfain ahuara chacafori min huaran, —ishon yoini. Asca huaiton nicaquin Herodes Juan cunu

muran iquimani. Ahuara chacafo huafiamisishaquin Juan iquimaquicaifin fasi chaca huaquin finacoinniquin.

Juanpan Jesús unu muran iquimani

Mt 3.13-17; Mr 1.9-11

²¹⁻²² Juan cunu muran iquiataima yorafo unu muran iquimapacuni nantianri Juanpan Jesusrifi unu muran iquimani. Asca huatan cainmainifoannaino Jesús Apa Dios cufini. Ascaino nai murannoashu ruhui cuscara Diospan Yoshin Shara nai ariashu aqui fotopacucahuani. Fotoaino nai murannoa oi nicani yoiquin isca huaiton, —Min uhuun Facucun fasi un mihuu noicoín. Un miqui unimacoínran, —ishon Apa Diosin yoini.

Jesucristo ahuun shunifo

Mt 1.1-17

²³ Jesús treinta fariatian tau huaquin yorafo yosini. Ascano yorafoan shinancaquin Jesús José ahuun facuran, huafiainfonocai ahuun facucoín inima.

José ahuun apa Elí ini.

²⁴ Elí ahuun apa Matat.

Matat ahuun apa Leví.

Leví ahuun apa Melqui.

Melqui ahuun apa Jana.

Jana apa José.

²⁵ José ahuun apa Matat.

Matat ahuun apa Amós.

Amós ahuun apa Nahúm.

Nahúm ahuun apa Esli.

Esli ahuun apa Nagai.

²⁶ Nagai ahuun apa Maat.

Maat ahuun apa Matatías.

Matatías ahuun apa Semei.

Semei ahuun apa Josec.

Josec ahuun apa Judá.

²⁷ Judá ahuun apa Joanán.

Joanán ahuun apa Resa.

Resa ahuun apa Zorobabel.

Zorobabel ahuun apa Salatiel.

Salatiel ahuun apa Neri.

²⁸ Neri ahuun apa Melqui.

Melqui ahuun apa Adi.

Adi ahuun apa Cosam.

Cosam ahuun apa Elmadam.

Elmadam ahuun apa Er.

²⁹ Er ahuun apa Josué.

Josué ahuun apa Eliezer.

Eliezer ahuun apa Jorim.

Jorim ahuun apa Matat.

³⁰ Matat ahuun apa Leví.

Leví ahuun apa Simeón.

Simeón ahuun apa Judá.

Judá ahuun apa José.

José ahuun apa Jonam.

Jonam ahuun apa Eliaquim.

³¹ Eliaquim ahuun apa Melea.

Melea ahuun apa Mena.

Mena ahuun apa Matata.

Matata ahuun apa Natán.

³² Natán ahuun apa David.

David ahuun apa Isaí.

Isaí ahuun apa Obed.

Obed ahuun apa Booz.

Booz ahuun apa Sala.

Sala ahuun apa Naasón.

³³ Naasón ahuun apa Aminadab.

Aminadab ahuun apa Admin.

Admin ahuun apa Arni.
 Arni ahuun apa Esrom.
 Esrom ahuun apa Fares.
 Fares ahuun apa Judá.
³⁴ Judá ahuun apa Jacob.
 Jacob ahuun apa Isaac.
 Isaac ahuun apa Abraham.
 Abraham ahuun apa Taré.
 Taré ahuun apa Nacor.
³⁵ Nacor ahuun apa Serug.
 Serug ahuun apa Ragau.
 Ragau ahuun apa Peleg.
 Peleg ahuun apa Heber.
 Heber ahuun apa Sala.
³⁶ Sala ahuun apa Cainán.
 Cainán ahuun apa Arfaxad.
 Arfaxad ahuun apa Sem.
 Sem ahuun apa Noé.
 Noé ahuun apa Lamec.
³⁷ Lamec ahuun apa Matusalén.
 Matusalén ahuun apa Enoc.
 Enoc ahuun apa Jared.
 Jared ahuun apa Mahalaleel.
 Mahalaleel ahuun apa Cainán.
³⁸ Cainán ahuun apa Enós.
 Enós ahuun apa Set.
 Set ahuun apa Adan.
 Nan Adán ahuun apa Dios. Nan Adán Diosin onihuani.

4

Yoshin chacanun Jesús chaca huamapaini

Mt 4.1-11; Mr 1.12-13

¹ Ascano Jesús unu Jordán anoashu nasoni. Ascashon Diosin Yoshin Sharapan iquinaino tsoanshta icamano cani.

² Nannoashu cuarenta oshatan nannoshon Satanás nan yoshin chacapan chaca huampaipañi. Ascano nantianri ahuashta pia inima. Ascashu fasi fonicoinni.

³ Ascaiton Satanás yoini, —Min Diospan Facumainquin na toquirifo misi onihuaahu, — huaiton.

⁴ Jesús cumaquin, —Uhuun Upa Diosin tsainhuunoa cununi isca huaquin, “Noncai misi fusti huunashu ipatiroma. Diosin noco yoiái cuscan nan fusti non fasi yopacoinran,” — ishon yoiáiton.

⁵ Satanás Jesús nai sumunmun iyoshon arishon manifoti ismariscatani.

⁶⁻⁷ —Oinpon. Ua ifoafain mian yonoshonaitofin nan min oiainfo un mia inantiroquin. Ascashu nantifi manifoti sharastacoifoan aton niaifo min itiro. Nantifi na maifotifi huuna. Ascacufin un tsoara inanpaiquin un inantiroquin ahuuna inon, —ishon yoiáiton.

⁸ Jesús cumani, —Ascafia Diosin tsainhuunoa cununi isca huaquin, “Maton Ifo Dios fustifin man ratoconun mai chachishotiroquin. Nan fustimain noco ifocun. Ascashon non yoitirori ‘Min uhuun Ifocun. Un mia fasi noicoiran,’ ishon non yoitiroran,” —huaiton.

⁹ Jerusalén ano Jesús iyoni. Nannoshon Dios fu tsainti pushu pumancaya cuyacoin iyoshon yoiquin isca huani, —Minmain Diospan facuquin nuriashu pacucaintahuun. Diosin tsain mihuunoa cunushoni cuscan aquin.

¹⁰ “Nantofin ahuun oinmatifo afu nai muran icafo yonoaino mia cushuiquin min ahuuscanonma.

¹¹ Min pacuaiton mia achicani. Min toquirifoqui pacui rutunonma. Ahuuscatama,” nannorifi Diospan tsain cununiquin, —ishon Satanás yoiáiton.

¹² Afanan Jesús cumani, —Ascafia Diospan tsain cununiri isca huaquin, “Ahuara musunicoquin shinanyamahuu uatsi Diosin cushuiquin,” cununiran, —ishon Jesús yoini.

¹³ Jesús chaca huamapairiashu caaquin Satanás shinanni, —Un chipo afanan Jesús chaca huamayoshquiran, —ishon shinanni.

Jesús Galilea anoshon ato tapimaquin tau huani

Mt 4.12-17; Mr 1.14-15

¹⁴ Ascatan Jesús Galilea ano nasoni. Diosin Yoshin Sharapan a iquinaino ahuunoo nicanifo. Galilea ano icafoan nicaifoanno a chaima icafoanri nicanifo.

¹⁵ Israelifoan aton ichananti pushufo muranshon ato yosifoanfainaiton oincani fasi aqai unimacoinnifo, Ascashon, —Na nocofunun sharacoinran, —ishon yoinifo.

Jesús afanan Nazaret ano cani

Mt 13.53-58; Mr 6.1-6

¹⁶ Ascacaini cai nan pushconi Nazaret ano cani. Nannoashu Israelifoan aton tunutitian nan imisi cuscan ato ichananti pushu muran iquishon ninacahuan Diosin tsain Jesús ato yoini.

¹⁷ Nan Isaiás Diosin tsain yoimisiton cununi cuscan Jesús inainfoan fupoacufoan nan yoipaiyaino fuchitan ato yoiqui isca huani.

¹⁸ “Diospan Yoshin Shara ufu ishon ua catoan. Ascashon ua nichian un ahuuomafo tsain shara yoifain nan cunu muran iqui cafiscafo un ato caimanon. Ascashon fushofori un caya huai oinsharanonfo. Omitiscaifori un numai afanan omitisecatama isharanonfo.

¹⁹ A mia nicasharaifo ato yoihuu isca huaquin, Natian Upa Diosin unimayanan mato shara huafain mato numashquiran,” ua huaran ishon Isaiás cununi cuscan Jesús ato yoini.

²⁰ Ascashon ato Diosin tsain yoiqui anaititan ahuun libro fupoacufoan nocofunu futsa inantan tsaopacuahuan. Ascaiton nantifiton oinquin futsanifo.

²¹ Ascaiton ato yoiqui isca huani, —Na rama un mato yoiai cuscan uhuunoo Isaiás cununi cuscacoin natian man aaran —ishon Jesús ato yoini.

²² Ascaiton nicacani mustairicatan yoinifo, —Ahuun tsain fasi sharacoin. ¿Nocofunu sharacoinfashon ahuuscashon iscara tsain shara noco yoimun ahuamafashon? Naanmun José ahuun facu, —ishon yoinifo.

²³ Ascaifoan Jesús ato yoini, —Noco shunifoan yoini cuscan marifi raca man ua yoiqui isca huapai, “Min caya huamitsamisimainqui min futsafo caya huua cuscan mifiri caya huamuhuu,” ishon raca man ua yoipai. Ascashon man raca ua yoipai isca huaquin, “Man non nica min Capernaum anoshon tsoan atiroma cuscan min ato huashoan. Ascan nuno min pushconi anoshori noco nanscarifi huashohuun,” ishon raca man ua yoipaiqui.

²⁴ Ascacun un mato icon yoi. Diosin tsain yoimisiton cainni anoshon tsoancai nicapaima.

²⁵ Un mato cayacafi yoi. Nocon shuni Elías niyopaonitian nocon mai Israeli ano ainfon funu amaqui naa funuomafo ichapa ini. Nantianri fari rafu non fusti nushmancayan oi funima. Ascano tushu yamacoin ipaoni.

²⁶ Ascafia Upa Diosicai noco shuni Elías nocon caifo funuomafo ano nichinima. Ascatamarocon Sarepta mai anoa funuomaqui nichini pimanon. Nan pushurasi Sidón chaimashta.

²⁷ Nan Israel anori yora ichapa isinincani cooyo cuscara tocoi futsuafiafocai nocon shuni Diosin tsain yoimisi Eliseocai nocon caifofo caya huatama. Nan Siria mai anoa fusticoin caya huani. Nancai Israeli inimaran, —ishon Jesús ato yoini.

²⁸ Ascano ato caifo caya huatama caifo futsa fusti caya huani nicacani fasi Jesusqui sinacoinceaquin.

²⁹ Achicashon Nazaret pasoato iyonifo. Nanno mahua cuyacoin anoshon potapaicaquin.

³⁰ Ascafia potapaifaquicai tsoan anima. Jesusrocon ato rahuin yocofaini atom-aquinoashu cafaitocai tsoan puusanima.

Nannori nocofunu yoshin chaca ahuun nua icai ini

Mr 1.21-28

³¹ Ascashu Jesús Capernaum mai ano cani. Nan Capernaum Galilea muran ini. Nannoshon Israelifo tunutitian ato yoini.

³² Ascaiton nicacani, —Nicacapon. Ahuun tsain sharacoin. ¿Ahuuscashucon iscara tsain noco yoimun? Ahuun tsain niaifoan tsain cuscararan, —ishon yoinifo.

³³ Ascaino Judiofoan ichananti pushu muranshon nocofunu yoshin chacanun ahuun nuushon fisimani.

³⁴ Asca huatan nan yoshin chacanun Jesús yoini, —Minfin Jesús Nazaret anoquin. ¿Min noco fucash huai oamun? Noncai mi futan ahua huatiroma. ¿Omitsiscapanacafo muranri min noco potai oamun? Unfin mia onanquin. ¡Ohua! Noncai mia ahuusca huatiroma. Miamain Diosin catoancun, —ishon yoshin chacanun yoini.

³⁵ Ascaiton, —Tsainyamahuu. Nocofunumaquinoashu catahuun, —ishon yoshin chaca Jesús curushcain nichini. Asca huaiton nan yoshin chacapan nocofunu mipuafain potafaini amaquinoashu yoshin chaca cafiarquicai ahuusca huanima.

³⁶ Ascaiton oincani mustairicatan afi ranan yoinancaquin yoinifo, —Jesús fasi ahua-mamishti huatiro. Iscaracai ahuashta non oinyomisima. ¿Ahuuscashomun ahuun tsain-mansi curushcai yoshin chacafai atomaquinoa potaquin? —icashu yoinannifo.

³⁷ Ascatan nan Jesús aca cuscahuunoo yorafo yoifoanfafainifo.

Simón Pedronun ahuun raisi yoshafu Jesús caya huani

Mt 8.14-15; Mr 1.29-31

³⁸ Ascacaini Israelifoan ichananti pushu murannoashu cai Pedro pushu muran noconi. Nanno Pedro ahuun raisi yoshafu fasi yonai omitsiscacoinnaiton Jesús yoishonifo, —Na isinincai cayahuapun, —huaifoanno.

³⁹ Amanon ota catipacucahuan yoini, —Ahuun yona matsiriscahuun, —huaino samashtacoin a yonai matsiriscatani. Ascano funinacahuan nan isinincama ointsa shara-cain ato pimashquin pichacufaini.

Ininincaifo ichapa Jesús ato caya huamapacuni

Mt 8.16-17; Mr 1.32-34

⁴⁰ Ascano man fari caino isinincai futsa futsatapafo yorafoan aqui ihuunifo ato cayahuamapacunon. Ascacun ahuun mucuman ato ramanpacuaino cayai futsunifo.

⁴¹ Atirifi yoshin chacafu atohuun nuufafaina Jesús atomaquinoa potaino fiisifainquin yoinifo, —Minfin Diospan Facuquin, —ishon yoshin chacafu Jesús yoinifo. Ascaiton Jesús curushcain ato asca huani, —Tsainyamacahuun. Uarifi anuyamacahuun, —ato huaino manmain tapiafoanfin a Diosin catonnicun.

Ichananti pushu muranshon Jesús ato yoini

Mr 1.35-39

⁴² Ascashu shafacuaino Jesús Apa Dios cuficai tsoan istaipama ano cani. Ascacun yorafoan funaquin fuchicashon yoinifo, —Nocomaquinoashu afanan cayamapun. Nuno no fu ipun, —huaifoan.

⁴³ Jesús ato cumani, —Un nan pushurasi futsafo muranri uhuun Upa Diosin tsain shara un ato yoifoanfafainon ua nichini. Ahuu cuscaramain uhuun Upa Diosin niaifoan ahuun yorafo iquinal cuscaraqui. Un nanscanon ua nichini un ato tapimanon, —huani.

⁴⁴ Ascashon Judea maitio Israelifoan ichananti pushu muranshon ato Diosin tsain yoiriani.

5

Jesushuunshon tsoan atiroma cuscan shiman finifo

Mt 4.18-22; Mr 1.16-20

¹ Shafa futsaino Jesús ianmanhuan Genesaret cusumun ini. Ascaino yorahuanrasi aqui funifo. Diospan tsain nicai fucani.

² Nan chaimanoa shasho rafu rutica Jesús fuchini. Ifofoan aton nushuti chocafono.

³ Ascatan nan futsa muran Jesús nanuinacahuani. Nan shasho Simonna ini. Ascashon nan yoini, —Ua onanshta shasho putsiquishohuun. Un anoshon ato yosinon, —ishon yoini. Ascatan shasho cusha camaqui tsainacahuan ato yosini.

⁴ Ato yoiquin anaititan Jesús Simón yoini, —Simón, noa ano focashon mato nushuti potacahuun shimanfo fiishcaquin, —huani.

⁵ Ascaiton Simón cumani, —Tapimamisiton, non nushushifiaquicai shiman fustishta non fiishiana. Non fasi yonoshina. Ascafia min noco yoi ai cuscan natian non huaicai, —ishon Simón yoini.

⁶ Ascashon aton nushutininhuan pochinifo. Pochishon muafo shimanfoan nushutininhuan fospicoinshon fashnuqui rashquini.

⁷ Ascaiton a shasho futsa murannoafu atirifo cunaquin ato mushananni ato futan inamashcaquin. Ascaino furiscatan ato muran nanuinifoan rananfaitan shasho muran nanunifo. Ascashon shimanrasi shashohuan rafu fospicoinni. Unu cufirisicoinni shashohuan rafu shimanfoya iqui cuani.

⁸⁻¹⁰ Nan Simón Pedro futan nushumisi rafu Santiago yafi Juan Zebedeo facu rafu inifo. Nan rafu non fustifain nushumisicoinfo. Ascaiton ato futan nushumisi futsafoanri shasho rafu fospicoian oincani mustairicatan yoinifo. —¡Oincapon! ¿Ahuuscashomun shiman ichaparasi fiafoquin? —icashu atoqui yoinannifo. Ascaiton oin Pedronun shasho naquishon Jesús ratoconun mai chachishon yoini, —¡Ohua! Ifon ufin nocofunu chacuquin. Asca minfin sharacoinquin. Chaca yafi sharacai ositroma. Ascacun umaquinoashu catapun,

—Pedronun huaiton. Jesús cumaquin, —Ratuyamahuu. Min shafatifi nushumisiflashon natian min uhuun Yoshin Sharahuunshon uqui yorafo ihuushqui ua icoinra huanonfo, —ishon Jesús Pedro yoini.

¹¹ Nicasatan aton shasho rafu cusumun corafainnifo. Ascashon nantifi aton ahuafofaya ato yorafori potafaini Jesús fu funifo.

Nocofunu yoratisho rashquishi futsua Jesús caya huani

Mt 8.1-4; Mr 1.40-45

¹² Shafa futsaino Jesús pushurasi ano ini. Nannoshon nocofunu ahuun yoratishon ranimamishti rashquishi futsuaton cahuanquin Jesús fuchitan fuopacuhuan yoini, —Ifon, ua caya huapaiquifin mian caya huatiroquin, —huaiton.

¹³ Jesús aqúi mupishon yoini, —Icon un mia caya huapai. Asca natianfin min cayaicain, —huaino. A rashquishi futsua cayariscatani.

¹⁴ Cayacun Jesús yoini isca huaquin, —Un mia cayahua cuscan tsoa yoiyamahuu. Noco caifo ahuunshon Dios cufimisi ismatahuun. Ascashon Moisés noco yononi cuscan chashoanun facu a inantahuun mia rutushonon. Min chaca soafain min caya cuscan ato ismashquin. Ascano tapitirofo Moisés noco yononi cuscan min aiton, —ishon Jesús yoini.

¹⁵ Asca huafaino ahuunna nantifi yoifoanfaini. Ascaiton nicacanashu Jesusqui funifo ato caya huamapacunon.

¹⁶ Ascacaini cashion tsoan icamanoshon Apa Dios cufin capaoni.

Nocofunu aft cayamacai ahuari aft huatiroma Jesús caya huani

Mt 9.1-8; Mr 2.1-12

¹⁷ Shafa futsaino Jesús ato yosini Fariseofo yafi Moisés yononi cuscan tapimamisifori nanno tsoacunifo. Ascaino pushurasiti Galilea anoafó yafi Judea mai anoafó non Jerusalén anoashuri aqúi funifo. Diosin curushhuunshon Jesús isinincaifo nannoshon ato caya huapacuni.

¹⁸⁻¹⁹ Ascaino nocofunu aft raquí cayamacai afiri ahua huatiroma ahuun yorafoan Jesús shinanmaqui shuhua naratashon iquimapaifiafo yorahuanrasi fospicoian ini. Ascano foman caya ina cashion tapa tsucashon Jesús nia naman yora huanrasi nastui shuhua ya ratapacufannifo.

²⁰ Ascaiton Jesús oian ahuun yorafoan fasi icoinra huaifoan oinquin Jesús a isinincai yoiquin isca huani, —Uhuun yorashtan, natian mun mia chaca soashona, —huaiton.

²¹ Nicasani Fariseofo yafi Moisés yononi cuscan tapimamisifoan yoinifo, —¡Aja! ¿Na nocofunumun tsoaquin? Fasi Dios chaca huai. Natocai chaca soatiroma. Diosin fustitofin chaca soatiroquin. Ascán naton noco parapai. “Un Diosiran” noco huamapai, —ishon aton nomuranshon shinanchacanifo.

²² Ascaifoan onanshon Jesús ato yoiquin isca huani, —¿Ahuuscaquimun mato nomuranshon man amaquiri shinanchacaiquin?

²³⁻²⁴ Unfin Cristoquin yorafoan aton chaca un soashotiro. ¿Ascán ahuuscacaimun un huaicai? Un chaca soashoyamarquimun un caya huaiquin. Ascacun un mato ismai Upa Diosin ua catoon. Ahuunshon un chaca soafain yorafo un caya huacointiroquin, —ishon ato yoini. Ascatan a nocofunu aft raquí cayamacai afiri ahua huatiroma yoini, —Min pushu ano min shuhua ya funicaitahuun, —ishon Jesús yoiaino.

²⁵ Funinaca huantan ahuun shuhua papifaiquin yoifoni, —¡Aicho! Min ua caya huaa sharaqin. Fasi Dios sharacoin, —huani.

²⁶ Ascaiton oincani nantifi mustairicatan yoiquin isca huanifo, —Dios tsoa cuscarama. Fasi sharacoin. Non oinyomisima cuscara non oianran, —ishon yoinifo.

Jesús Leví cunani

Mt 9.9-13; Mr 2.13-17

²⁷ Nansacaini caaquin Jesús oian Roma anoa niaifo pui fishomisi tsoa ini. Nan nocofunun ahuun anu Leví. Ascaiton Jesús yoini, —U fu cahuun, —huaino.

²⁸ Funina cahuatan nantifi potafaini afu cani.

²⁹ Ascashu afu cai ahuun pushu ano nocoquin Leví Jesús yoini, —Nuno uhuun pushu muran iquí ohuu. Uhuun yorafo yoimanashu un ato futan mia fuusishonon, —huani. Ascaino yorahuanrasi aqúi funifo. Roma anoa niaifo pui fishomisifo yafi futsaforifi aqúi funifo ato futan pishcaquin.

³⁰ Ascaifoan Fariseofo futan Moisés yononi cuscan tapimamisifoan Jesús fu rafumisifo yoini, —¿Ahuuscain man pui fiimisifo yafi yora chacafo futan man piyain? —ato huanifo.

³¹ Ascaifoan nicaquin Jesús ato cumani, —A isinincaifomacai caya huamitsamisi yopacanima. Asca nan isinincaifofin fasi caya huamitsamisi yopacaniquin.

³² Nanscarifi aqin, “Uncai ahua chaca huamisiwaran,” icaifocai un ato chaca soashotiroma. Asca tsoan yoiqin isca huai, “Unfin fasi chaca huamisiqin. Un Numamisi yopacoinran,” icaifofin un ato chaca soashotiromo, —ishon Jesús ato huani.

Piqi tunuaihuonoa

Mt 9.14-17; Mr 2.18-22

³³ Ascaiton futsan Jesús yocani, —¿Ahuuscai mifu rafuafoan piqi tunumisimamun? Juan fu rafumisifoan piqi tunufain Dios cufimisifo. Nanscarifi Fariseofo yafi afu fomisifoan huamisiqin. Ascan manfin pifain ayafain huamisiqin, —huaifoan.

³⁴ Ato cumani, —Nocofunu fu ainfo fianainnoricai unimai fusicuquin tsoan piqi tunutiroma. Nanno funu anocai ato chani huaifoan piqi tunutiromo unimamain acaquin.

³⁵ Ascafiaino funu amaqui rutuafono shinancaquin piqi tunutiromo, —ishon Jesús ato yoini.

³⁶ Ascashon afanan Jesús ato yoiqin isca huani, —Tsoancai sahuuti shuni fashnucun potu funapan icushtiroma. Asca huashon potu funapan icushuano ustui futsuashu chancanai finatiro. Aquirifi sahuuti shuni anaitiriscatiro. Afanancai funa cuscara itiro. Nanscarifiai un mato yosiai cuscan nicacoinshocai man apaoni cuscan afanan man huatiroma. Tsoan ua tanacoinshon ipaoni cuscan cachiquiri huacointiro. Ascashu funa cuscara shara iishquin.

³⁷ Ascashon tsoancai fichi tutso shuni muran vino funa nanutiroma. Fichi tutso toshacainaino vino funa cuyofoi chancanai futsutiro. Nanscarifiai maton shunifoan mato yosimisi cuscan yafi un mato yoiiai cuscaai nan rafu ositiroma. Un mato yosiain cuscaoin nannori Diospan tsain shara. Ascafia mato shunifoan mato yosimisifo cuscaai anorima. Nan tanashucan man isharatiroma. Nan rafu osishon nicapaiquicai man shinansharatiroma.

³⁸ Ascacun vino funa fichi tutso funa muranri nanua sharacoin itiro. Nanscarifiai ratoranfoan ipaonifo cuscan unucatan un ato yosiain nan fusti tanashu isharacointirofo.

³⁹ Tsoan puti pau ayatiashocai afanan fata ayapaitroma. Nanscarifi aqin yorafoan yoiqin isca huatiromo, “Un ipaoni cuscan un afanan apai. Uhuun shunifoan ua yosia cuscan shara. Nan fusti un tanapai. Ascacun tsain futsan un yopaimaran,” —ishon shinantirofo.

6

Jesús fu rafumisifoan trigo mutusnifo

Mt 12.1-8; Mr 2.23-28

¹ Ascatan Israelifoan tunutitian Jesús yafi afu rafuafo mau mapai focaquin trigo mutuscashon rashoqiri ashon piyaifoan.

² Oinquin Fariseofoan ato yoinifo —¿Ahuuscai Moisés noco yononi cuscan tunutitian trigo man mutusimun? —ato huaifoan.

³ Nicaquin Jesús ato cumaquin isca huani, —¿Davidhuonoa cununi cuscan man man oinmisimun? ¿Fonainquin nocon shuni David ahuun yorafo futan ani cuscan man man nicamisimun?

⁴ Dios fu tsainti pushu iquicaishon a muranno misifo ato piquini fasi fonicoquin. Aho tushu futsa yamaino. A misifofin nan Diosin tsain yoimisifo naasi iniquin. Tsoa futsacai a misi pitiro inima. Nannori yoifianifo fasi fonicoquin David pini. Ascashon afu rafuafori pimani.

⁵ Ascacun uafin uhuun Upa Diosin catonniquin. Ascacun urusu fusti un yoitiro ahuamain tunutitian man huatiromo, —ishon Jesús ato yoini.

Nocofunun mucu musufimua

Mt 12.9-14; Mr 3.1-6

⁶ Ascatan tunuti futsaino Jesús Israelifoan aton ichananti pushu muran iquini. Nanno iquishon ato yosiaino nantianri nocofunun ahuun mucu mumiori musufimuatun arifi nicani.

⁷ Ascaino Fariseofo futan Moisés cunu tapimamisifoanri nannoshon oincaquin shinannifo, —Non tapinon Jesusmain tunutitian nocofunu caya huai iyamarai Moisés noco yononi cuscaoinmain aqin, —ishon Jesushuonoa shinannifo. Ato niaifofoqui chanipaicaquin.

⁸ Ascashon a shinainfo cuscan onanshon Jesús a nocofunun musufimua yoini, —Funinaca huahuun. Mia oinonfo, —ishon yoiaino nan yoiiai cuscaoin ani.

⁹ Ascaiton Jesús ato yoini, —Un mato yocain. ¿Moisés yononi cuscan tunutitian non shara huatiromo iyamarai non chaca huatiromo? ¿Ascayamarai non futsafo nimatiromo iyamarai non namatiromo? —ishon ato yoini.

¹⁰ Ascashon ato oiancutan a nocofunu musufimua yoini, –Mushahuun, –huaino. Nan yoia cuscan huatanaiton oianfo ahuun mucu muma sharacoin ini.

¹¹ Ascaiton oincani Fariseofo yafi Moisés cunu tapimamisifo fasi aqui sinacoincaquin yoinifo –¿Nonmun ahuuscashon Jesús shatumatiroquin afanan isca huanonma? –icashu ahuun yoinannifo.

Jesús doce nocofunifo catonni afu rafunonfo

Mt 10.1-4; Mr 3.13-19

¹² Shafa futsaino Jesús machi ano mapuni Apa Dios cufishquin. Ascano nannoshon yamutishon apa cufishini.

¹³ Ascashu iyoconaino a tanamisifo yoini, –Uqui fucahuun, –ato huaino aqui fuafoan doce ato catonni afu rafunonfo.

¹⁴ Nan docefain ato anufo. Futsa Simonfiacun Jesús ahuun anu tuquihuashoqui, Pedro-ran, huani. Nanton chipocu Andrés. Futsafoan ato anu Santiago non Juan non Felipe non Bartolomé non

¹⁵ Mateo non Tomás non Santiago Alfeopan facu Simón futsari nanton ahuun caifo futsafo futan Romanonfo potapai afanan Israelifo yonononfoma.

¹⁶ Futsan ahuun anuri Judas, Santiago ahuun facu. Futsarifi Judas Iscariote nanton Jesús potashon ato achimani. Nanfosi Jesús ato catonni.

Jesús yora ichapaforasi tapimani

Mt 4.23-25

¹⁷ Machi tununman fotoaino aqui yorahuanrasi funifo. Ascaino a tanamisifo yafi Judea anoafo atirifi fuaino Jerusalén anoafori fuaino ianmanhuan cusumunnoa Sidón yafi Tiro pushurasi anoafori funifo.

¹⁸ Ahuun tsain nicashcaquin fuafoan atirifi a isinincaifo ato cayahuafain a yoshin chacapan ato fucash huaifori Jesús atomaquinoa potapacuni.

¹⁹ Ascashon nan isinincaifo futan nan yoshin chaca atohuun nuafoan shinannifo, –Non ahuunoashu cayanonmun Jesús noco ramanmapainon, –ishon shinannifo. Nanfoan tapinifo Diosin ahuun curushhuunshon Jesús ato caya huapacua.

Tsoa unimatirofo yafi unimatirofoma Jesús ato yosini

Mt 5.1-12

²⁰ Ascatan Jesús afu rafumisifo oinquin ato yoini isca huaquin, –Man ahuuomafishu chipo Dios niaifo icari matonari iishquin.

Ascacun ahuuomafishu unimacahuun.

²¹ Man natian Dios fu rafupaicain ahuun tsainri man tapipaiquin finai a cuscara shara iishcaquin.

Man ascfia Diosin chipo mato imasharai a cuscaracoin man inon.

Natianri man uaifishu chipo man shuchitiro.

Ascacun unimacahuun.

²²⁻²³ Futsafoan uhuunshon mato noिकासquin mato potafain mato roafain mato huunoo tsain chaca yoicani.

Nanscarifi nan Diosin tsain yoimisifo mato shunifo omitsisca huapaonifo.

Ascan matori omitsisca huafiafoanno chipo man Upa Diosqui nocoaitan fasi sharacoin mato inanshquin man afu ipanon.

Ascacun unimacoincahuun, –huani.

²⁴ Ascacun futsafo Jesús yoiqui isca huani,

–¡Ohua! Manfin natian mafo ichapayashu unimaicain.

Ascfia naashu man chipo omitsiscapanaca. Mancai afanan unimanacama.

²⁵ ¡Ohua! Natian man shinanquin isca huaa, “Un ahuara yopaima. Un ica cuscan shara. Uncai ahua futsa shinanpaimaran,” ishon man shinan.

Ascfia ohua. Man chipo mato nomuran shinansharapaifishu man omitsiscapanaca. Man fasi numamisi yopapacunaca. Natian man shuchisharai. Dios shinantama. Ascfia-shu chipo uaiqui man omitsiscapanaca.

²⁶ Nantifi yorafoan mato yoiqui isca huacani, “Na nocofunu fasi ishara. Ahuacai yopaimaran,” ishon mato huunoo yoiafo. Ascfia ¡Ohua! Nanscarifi aquin Diosin tsain yoifiaquin afi shinainfo cuscan yoimisifo. Nanfo mato shunifoan nannori atohuunoo yoipaonifo. Ascan manfin atofu omitsiscapanacaquin, –ishon Jesús ato yoini.

Mato noिकासmaifiafoan atohuun noicahuun

Mt 5.38-48; 7.12

²⁷ –Ascan nan man ua nicaifo un mato yoi. Mato noिकासmaifo atohuun noicoincahuun. Tsoan mato noिकासmai ato shara huacahuun.

²⁸ Tsoan mato chaca huai copitama rau huafain ato yoisharacahuun. Tsoan mato roafiacun ato Dios cufishocahuun.

²⁹ Tsoan mato tapasiai ato copitamarocon nanno nishohuun mato ocuma futsari afaiton tunucahuun. Futsan mato niaifo ano iyocun mato sahuuti mato fiainton mato sahuuti custopari inancahuun.

³⁰ Tsoanran mato ahuaa yocaiton ayashon ato inancahuun. Futsan mato ahuaa fiano shinanchacayamacahuun matori nasoyamafiaino.

³¹ Man futsafo shara huamapaiyai cuscan marifi futsaforifi shara huashocahuun.

³² A matohuun noiaifosi copiquirifi man atohuun noiainoacai acai ahuama. Yora chacafori nanscarifiaifoanno. Man ascainocai Diosin mato yoima, "Man shara huaran," ishon.

³³ A mato shara huafosi copiquirifi man ato shara huaino acai ahuama. Yora chacafori nanscarifiaifoanno. Man ascainocai Diosin mato yoima, "Man shara huaran," ishon.

³⁴ Ascashon man yora ahuaa inanyopaiquin shinanqui isca huai. "Un inanyocun ua nasotiro. Ascan nanscara yorafo fusti un inanyotiroran," ishon man shinain. Acaai ahuama. Yora chacaforanri nannorifi shinantirofo cuscan. Marifi man anori shinainnocai Diosin mato yoima, "Man shara huaran," ishon.

³⁵ Ascacun un mato yoi. Mato noicasmaifo atohuun noicaquin ato shara huacahuun. "Ato ahuaa inanyoshon ua nasoimaran," ishon shinanchacayamacahuun. Mato nasoyamafia, "Nanscanonran," ishon yoicahuun. Man ascacoinnashu Upa Dios ari man nocoaiton matoqui unimaqui ahuaa fasi sharacoin mato inanshquin. Diosi nai muran isharcointsia. Diosin nantifi yorafo shara huaa. Tsoan "¡Aicho! Upa Diosin," huayamafiaifoan nanfohuunri fasi noi. Yora chacafohuuri noi. Marifi nanscarifi aquin man futsafo ismatiro man Diospan facufo.

³⁶ Maton Upa Diosin nantifihuun ramapaia cuscan marifi nanscarifi acahuun.

Futsafohuunoa shinanchacayamacahuun

Mt 7.1-5

³⁷ Futsafohuunoa shinanchacaqui futsafori yoyamacahuun. Man futsafohuunoa yoisharayamaino Diosiricai matohuunoa yoisharashquima. Ascashon yoiquin isca huayamacahuun, "Nanton chaca huaa. Ascacun Diosin iconquin onaintimairan," ishon yoyamacahuun. Nan onaintimainonran, ishon man futsahuunoa shinanyamaino Diosiricai mato onaintimaima. Man futsafo rau huacuri Diosirifi mato rau huashquin.

³⁸ Ascacun yorafo shara huacahuun. Man yorafo shara huacun Diosin matorifi shara huai. Ascacun futsafo inansharaqui finacoincahuun. Matsiquimacoinquin. Maniriqui futsunon. Man futsafo asca huacun Diosin arifi mato nanscacoïn huaashquin, –Jesús huani.

³⁹ Jesús ahuaarafo yoi ai cuscarahuunshon ato yosini, –Fushocai afu fusho raqui iyotiro. Iyopai afu shato muran pacutiro. Nanscarifi aqui futsan Diosin tsain tapishomacai mato tapimatiroma. Matofu afiri funotiro. Mato amaquiri yoitirofoquin.

⁴⁰ Ahuunshon tapiainfoancai tapimamisiton tapian cuscan tapiafoma. Ascafia nan ahuunshon tapiainfoan chipo tapiaino nan tapimamisi cuscara itirofo.

⁴¹ ¿Ascun ahuuscai yora ahuaa pasnanshta fuostamua man futsupaiyain marifi sapa uhuapa fuostamufiashon? Ascashon min chaca huairan futsa huafiaquin mancaifin fasi finacaiquin.

⁴² Ascashon man yoiqui isca huai, "Uhuun yorashtan, un min furo murannoa ahuaa pasnanshta un mia futsunon," man huamisi. Ascafiashocai man tapiama man sapa fuostamufafainna. Man fuparamitsapaimisi. Ascacun sapa futsucumuhuun. Asca huashon oinsharafain marifi man futsa pasnanshta futsutiro. Nanscarifi aquin futsafoan ato chaca shatumapaiquin marifi man chaca hua. Man fasi paran. Ascacun iquisi mato chaca shatucahuun. Ascashon marifi man futsafo chaca shatumatiro.

Ihui ahuun fimihuunshon non onantiro

Mt 7.17-20; 12.34-35

⁴³ Ihui sharafoan ahuun fimicai chaca itiroma. Ihui chacafaan ahuun fimicai shara itiroma.

⁴⁴ Ascano ihuifoti ahuun fimifohuunshon non onantiro ahuu cuscarafomainquin. Ihui moshayafohuunocai shopa foaicun non tuscutiroma. Nanhuafaquisihuunricai uva foaicun non tuscutiroma.

⁴⁵ Nanscarifiai nocofunun sharapan ahuun nomuranshon ahuaa sharafosi shinain cuscan ahuun tsainrifi sharacoin itiro. Nanscarifiai nocofunun chacapan ahuun nomuranshon ahuaa chacafosi shinain cuscan ahuun tsainri chacacoin itiro. Ascashon nocon ointi muranshon non shinain cuscan nannoricoin non yoitiro.

Futsan pushu mutsisipa huaino futsan pushu mutsisipama huatiro

Mt 7.24-27

⁴⁶ ¿Ahuuscai Ifo ua huafiamisishaquin un mato yoia cuscan man aimamun?

⁴⁷ Ascacun un mato yoi ahuu cuscaramain tsoan ua nicasharashu nan un yoia cuscacoin aaiquin.

⁴⁸ Tsoan pushu huaquin ahuun quishi nichishquin iquisi mai puhuuqui mai tuiqui noco. Ascashon pushu anaitiano ananmanri unu foanfiauquica pacutiroma. Fasi pushu mutsisipacoin. Nanscarifiai nan uhuun tsain nicacoiانو nan un yoia cuscacoin acani. Ascashu ahuara ahuuscarafaiacoi umaqui itirofoma.

⁴⁹ Ascac un yoi ai cuscan nicafishu tsoa ascaina ahuuscamaian acanicain un mato yoi. Yoran pushu huaqui ahuun quishi nichifiaquin mai puhuuqui tuiqui nocoama. Fuquinishtacoin huaa. Ascashon pushu anaitiano ananmanri unu fai foanquin pushu paanquin chacana huatiro. Nanscarifiai tsoan uhuun tsain nicafiai ascashuma ahuun unutani nantifi funocani. Omitsiscashcaniran, —ishon Jesús ato yoini.

7

Romano ranushumua niaifoan ahuun oinmati Jesús caya huani

Mt 8.5-13

¹ Yorafo yoiquin anaititan Jesús Capernaum ano cani.

² Nannoa ranushumua niaifoan ahuun oinmati nan ahuun noicoian fasi isininqui finacoin ini.

³ Ascacun Jesús ahuamamishti huatiro nicaquin ranushumua niaifoan shinanquin isca huani, —Uncai Israelima. Ascacun un niaifofo ato yoi ua Jesús yoishonafo oshon uhuun oinmati ua caya huashoyoi onon, —ishon shinanni.

⁴⁻⁵ Ascano ato yonoa focani Jesusqui nocoshon yoinifo isca huaquin, —Ranushumua niaifoan noco yonoa non mia yoi onon. Nan nocofunu shara. Nocon caifohuuri fasi noimisi. Nanton nocon ichananti pushu huamashona. Noco shara huashomisi. Ascacun mirifi asharashoicapun ahuun oinmati caya huashoshquin, —ishon Israeli niaifofoan yoinifo.

⁶⁻⁷ Ascano Jesús atofu cani. Ranushumua niaifoan ahuun pushu chaimashta man fuaifoan afanan ahuun yorahuafo Jesusqui nichini yoiqui isca huanonfo, —Ifon, un mia fucash huapaima. Un cai ahuama. Min nocofunu tsoa cuscaramacoin. Uhuun pushu ari capaiyamaquin. Min tsainmansai uhuun oinmati ua caya huashohuun.

⁸ Ascac uafin uhuun niaifoan ua yonomisiquin. Urifi ranushumuafu un yonotiro. Un-main ato yonoainofin un futsa, “Catahuun,” huaino cariscatiro. Un futsa, “Ohuu,” huaino uqui oriscatiro. Uhuun oinmatiri, “Ua ashoriscahuun,” un huacac un ashoriscatiro. Asca minfin ahuamamishti huatiroquin. Ascacun min tsainmansai yoihuu uhuun oinmati cayanon, —ishon yoini.

⁹ Ascaiton nicaquin Jesús a mufaina yorafo yoiqui isca huani, —¡Aira! ¡Nicacapon! Tsoa futsacai naton acai cuscan ua icoinra huacoinmisima. Israeli anoafonricai ua isca huaqui icoinra huacoinmisifoma, —ishon Jesús ato yoini.

¹⁰ Ascano a ranushumua niaifoan ato nichiafo Jesús tsainqui anaitiano afanan naso furan oianfo ahuun oinmati man cayasharacoian ini.

Ainfomaqui ahuun funu naa ahuun facu man naafiacun Jesús funini

¹¹ Ascano chipo shafa futsa Jesús pushurasi Naín ano caino afu rafuafo yafi yorahuanrasi afu fonifo.

¹² Ascashu Naín ano nocoti chaima oian pushcohuai naa mai huai focani ahuu fu yora ichapa fonifo. Nan pushcohuai ahuan ahuun facu fusticoin. Nan ahuanmaqui funu naani ini.

¹³ Ascashu uaiacaiton oin Jesús ahuun ramapaicoquin yoini, —Uaiyamahuu, —huani.

¹⁴ Asca huatan pushcohuai ahuun ihuaifo aqi racati muuainno nitunifo. Ascaiton Jesús yoini, —Pushcoshtan. Un mia yoi. Funihuu, —huaino.

¹⁵ Pushcohuai tsoainacahuan tsainni. Ascaiton ahuun ahua Jesús yoini, —Naquian. Min facu afanan man nia. Iyosharatahuun, —huani.

¹⁶ Ascaiton oincani yorafo fasi ratucoinnifo. Ratu nishmapacuquin Dios yoisharaqui isca huanifo, —Diosin tsain yoisimi noco muran Diosin nichian. Diosin ahuun yorafo ashoin oaran, —ishon yoinifo.

¹⁷ Ascashon nan Jesús aca cuscan yoifoanfainfo. Judea anoafu futan mai futsa ariafon ahuun nicaquin futsanifo.

Nan yorafo unu muran iquimamupacuni Juanpan afu rafuafo Jesusqui nichini

Mt 11.2-19

¹⁸⁻¹⁹ Juanpan tanamisifoan Jesús ahuafo huaion oianfo cuscan Juan yoi focani cunu muran iquinifo. Ascaiton nicaquin Juanpan a tanamisifo rafu yoini, –Nanmain Diosin catonniquin ointacahuun. Ascashon yocaquin isca huatacahuun, “Nan miamun Diosin catonni nocoqui nichishquin. Ascayamarai futsa raca non manaicai noco Numamisi inon,” ishon ua yocashotacahuun, –Juanpan ato huani.

²⁰ Ascano nan rafutan focashon Jesús yoinifo, –Nan yora unu muran iquimamisi Juanpan noco nichian non mia yocayonon. Ascacun non mia yocai. Nan miamun Diosin catonni nocoqui nichishquin. Ascayamarai futsaraca non manaicain nocon Numamisi inon, –ishon yocanifo.

²¹ Ascaino nantianri Jesús nan isiniqui omitsiscaifo caya huafain yoshin chacafo atohuun nuuafu atomaquinoa potafain fushoforifi oinmasharapacuni.

²² Ascashon nan Juanpan ato nichian rafu Jesús yoini, –Un acaiton man oian cuscan uhuunoa man nican cuscan Juan yoitacahuun. Ascashon fushofo un caya huua oinsharaifo cuscan yoifain pastocoinfori un caya huua nicasharanonfo nanrifi yoifain ato yoratiso coyo cuscara tocoi futsafori caya huafain yora nipaiqui ranainfori un ato caya huua yoifain man nacoinnfori un ato funimana. Ascashon yora ahuuomafori tsain shara un ato yoifafainmisi ahuuscashumain Diosin niaifo fu ipatirofoquin, ishon un ato yoimisi.

²³ Ascana nanto un mato yoi ai cuscan Juan yoitacahuun tsoan ua icoinra huacoinshocai afanan ahua futsa shinainma. Nan cuscara yorafin fasi unimacointirofoquin, –ishon Jesús ato yoini.

²⁴ Ascatan man foafoanno Juanhuunoa Jesús nanno niafo yora huarasi yoini, –¿Ahuuscai istaipama ano Juan oin focani fonifomun? Juancai nan facatahua pui ninhuun focu focu acai cuscarama. Nanscarifiai man man tapia Juancai ointi rananyama.

²⁵ ¿Ascana ahuuscai Juan oinpai man fonimun? Itsairaca nan nocofunun sahuuti shara-capacoin sahuucun oincai man foni. Ma. Juanpacai sahuuti shara sahuumisima. Niafofoanfin ato pushu muranshon sahuuti sharacapacoin sahuutirofoquin.

²⁶ Nan Diosin tsain yoimisiraca oincai man foni. Ascafia nan icon Juanpan Diosin tsain yoimisifia nanton yoimisi cuscaicai tsoa futsan anori yoimisima.

²⁷ Ascacun nanhuunoa Diosin tsain cununi isca huaquin, “Min nai ariashu mai ano fotoatama iquisi uhuun tsain yoimisi nichiqui tau huai mihuunoa ato yoiaino itisharashon mia nicanonfo,” ishon cununi.

²⁸ Un mato icon yoi. Tsoashtacai Juan finoanma. Ascashon Juanpan tsain yoimisi cuscaricai tsoan ascara tsain yoiyomisima. Ascafia Dios niaifo icanoafoan yoisharatirofo cuscaicai Juanpan nicayamafain nanfoan oianfo cuscaricai oinyomisima. Ascashon nantifi Dios icanoafoan Juan finoanfo, –ishon Jesús yoini.

²⁹ Ascashon nan Jesús nicaifo futa Roma anoa niaifo pui fishomisifo Juanpan ato unu muran iquimacuni aton chaca shatunonfo. Ascana nanfoan Jesús yoiatton nicaquin yoinifo, –Jesús noco cayacaficoi yoi. Diosin noco yonoa cuscan nan iconran, –ishon yoinifo.

³⁰ Asca huafiafoan Fariseofo futa Moisés cununi cuscan tapimamisifoancai Diosin ato amapaiyai cuscan nicapainifoma. Ascasho nanfoanri yoinifo, –Juanpan noco yoi ai cuscaicai anorima. Nocoricai unu muran iquimatiroman, –ishon yoinifo.

³¹ –Ascashon afanan un mato tapimai. Natian niyoafo ahuu cuscarafuquin.

³² Nanfofin nan facu cashumisi cuscarafuquin. Facufo cashucaquin afu facu futsafo oi ashcafinin cunatirofo. Nanscarifiai nanfofin nanscarafuquin. Ascana nan facu cashumisi-foan yoitirofo isca huaquin, “Man non shainti manuifainocai monopacanimaran,” ishon yoifain “fanainca omitsiscati cuscara non fanaifainocai man uaipaimaran,” ishon nan facu cashumisifoan yoitirofo.

³³⁻³⁴ Nanscarifi aqui nanfoanrifi Juan yafi uqui tsain chipufafainmisi. Ascafia Juanpacai piqui tunufain fimi unu pau ayamisima. Ascacun ahuunoa yoiqui isca huamisifo, “Juan nisocoin. Yoshin chaca ahuun nuaran,” ishon yoimisi. Asca unfin piisharafain un ayasharamisiquin. Ascafia uhuunoi yoiqui isca huamisifo, “¡Cuu! Jesús pitsicoi fasi ichapari ayatiroan huafain Roma anoa niaifo puifishomisifo yafi yora chacafo furi rafuiran,” ishon uhuunoa chaca yoimisi.

³⁵ Nanscarifi aquin nanfoanri yoiqui isca huamisifo, “Tsoanmain shinansharafain icaquin non onantiro. Nan yorafin isharacoianquin shinansharamain huaifin,” ishon nanori yoimisifo. Nannori yoifiaquicai uhuunoa ascara yoipaimisifoma. Ascatarocon uqui tsain chaca fusti huamisiforan, –ishon Jesús ato yoini.

Jesús Simón pushu muran iquini nan Simón Fariseo ini

³⁶ Ascana Fariseo futsan Jesús yoini, –Tapimamisiton, uhuun pushu ano cahuun un mia pimanon, –huani. Ascaino ahuun pushu ano cashon a futa pini.

³⁷ Nan pushurasani anori ainfo furomacoin ica ini. Ascashon Fariseo pushu muranshon Jesús piaiton nicai arifi nan pushu muran iqui caini.

³⁸ Ininti motica tsmashu Jesús cachiori nitishoni. Nan moticanun ahuun anu alabastro a muran ahuun ininti fasi paratamacoin ahuun pui nua ini. Ascatan amanaon niashu uaiqui ahuun fuonpan Jesús tau muchana huani. Ascashon ahuun foo chainipaton otucuruauqui shara huatan ahuun tau tsoatan ininti ahuun tauqui ocani.

³⁹ Asca huaiton nan Fariseo Jesús piimaiton shinanquin isca huani, —Na nocofunu Diosin tsain yoimisicoishon na ainfoan muai cuscan onancuana na ainfomain ahuu cuscaraquin, —ishon ahuun nomuran shinanni.

⁴⁰ Ascaiton onanshon Jesús Fariseo yoini, —Simón, ⁴⁰ un mia ahudara futsa yoiran, —huaiton. Simón cumani, —Tapimamisiton, ua yoihuu, —huani.

⁴¹ Ascaiton Jesús yoini. —Ato pui inanyomisiton nocofunu rafu pui inancun nan rafutan ahuun rafanan nifinifo. Futsan quinientos denario nifiaino futsan ichapama nifini cincuenta denario.

⁴² Ascafia nan rafutan nan nifian cuscan nasopaiacai tsoa puiya inima. Ascacun nan ato pui inanyomisiton ato yoisharani afanan tsoan a nifinonma. Ascacacun nan ato pui inanyomisiton ato yoisharani afanan tsoan a nifinonma. Ascacacun nan ato pui inanyomisiton ato yoisharani afanan tsoan a nifinonma. Ascacacun nan ato pui inanyomisiton ato yoisharani afanan tsoan a nifinonma. Ascacacun nan ato pui inanyomisiton ato yoisharani afanan tsoan a nifinonma.

⁴³ Simón cumani, —Nan paratama nifatocairaca fasi noi qui finaiquin, —ishon yoiaiton.

⁴⁴ Afanan Jesús cumaqui isca huani, —Min cayacafi yoiran, —huatan ifiacucahuan yoini, —Oinpon. Na ainfoan fasi ua noicoin. Min pushu muran un iquifiaitocai mian ochoama. Asca na ainfoanfin fasi uhuun noi quin ahuun fuonpan uhuun tau muchana huafain ahuun foon ua otucuruacaquin.

⁴⁵ Nocon fuyamisi cuscaricai mian uhuun tamo tsoama. Asca na ainfoanfin min pushu muran un iquiaitian uhuun tauqui ua tsoariaquin.

⁴⁶ Ascan mianricai uhuun mapoqui shuni ocama. Asca na ainfoanfin uhuun tauqui ininti ocaquin.

⁴⁷ Ascacun un mia yoi. Na ainfoan ahudara ichapa chaca huafiamisicun natian ahuun chaca mun soashona. Ascashori mun rau huacoinna uhuun fasi noiaiton. Asca tsoan shinanquin isca huai, “Uncai ichapa chaca huamisima. Ascacun uari uhuun chaca ichapama ua rau huashotiroran,” ishon shinaintocain ua ichapa noimaran, —ishon Jesús Fariseo yoini.

⁴⁸ Ascashon ainfo Jesús yoini, —Natian mun mia chaca rau huashoanran, —huani.

⁴⁹ Ascaino Fariseo pushu murannofo afi ranan yoinannifo, —¿Tsoamun na nocofunuquin? Fasi chaca huamisifo ato chaca soashofain ato rau huatiroran, —icashu yoinannifo.

⁵⁰ Ascashon Jesús afanan ainfo yoi qui isca huani, —Mian icoinra huaitofin un mia numaquin. Caasharatahuun, —ishon Jesús yoini.

8

Jesús futan ainfofoan apaoni cuscan

¹ Asca huatan chipo Jesús pushurasiti ato yoifoanfafaini ahuu cuscaramain Upa Diosin niaifoan ahuun yorafo iquinal cuscaraquin. Ascaino doce afu rafuafori afu fonifo.

² Ascaino ainfofori afu fonifo. Nanfo isinincal yoshin chaca atohuun nuucun Jesús ato caya huapaoni. Nan futsan ahuun anu María Magdalena. Nanhuan siete yoshin chacafu ahuun nuucun Jesús amaquinoa potani.

³ Futsan ahuun anu Juana nan Cuzapan ahuin ini. Nan Cuza niaifo Herodes ahuun niaifo patashari ini. Ainfon futsan ahuun anu Susana. Ascashu ainfo futsaforifi Jesús yafi afu rafuafo fu fonifo. Nan ainfofoan Jesús yafi afu rafuafo pui inannifo ahuun rafanan tushu finonfo.

Jesús fimi ushu saamisihuunshon ahuarafu ato yosini

Mt 13.1-9; Mr 4.1-9

⁴ Pushurasifoti anoashu ahuun tsain nicapaicani yorahuanrasi aqui fuaifoan ahuarafu yoi ai cuscarahuunshon ato tapimani isca huani,

⁵ —Nocofunun ahuun noshati murannoa fimi ushu fishon ahuun mau mamaqui saaca ushufo fai nushmancayan pacucun puamanafanno puiyafuanri piinifo.

⁶ Ushu rananri toquiri camaqui pacua mai ichapamashta anoashu foaifia fari tsasi huani unun muchana huaiyamaino nai cuyoni.

⁷ Ascaino ushu rananri tasha murannoashu foaifiahucai ushu futsa foaisharanima.

⁸ Ushu rananri mai shara ano pacuafo foaisharashu fimi ichapayacoin iniran, —ishon Jesús ato yoitani oi ashcafinin ato yoi qui isca huani, —Manmain ua nicatiroquin ua nicafain uhuun tsainri maton nomuran nanucoincahuun, —ishon ato yoini.

Ahuuscaquimain Jesús futsafo ahuarafo futsahuunoo yoini ato yosinon

Mt 13.10-17; Mr 4.10-12

⁹ –Min ato saamisihuunoo ahuara futsa tapima ato yoia cuscan noco shafacafi tapimahuu, –ishon afu rafuafoan Jesús yocaifoan.

¹⁰ Jesús ato cumani, –Upa Dios a icanoshon ahuun yorafo iquinaí cuscan un mato fusti shafacafi tapimai. Ascán nanfofin ahuarafo cuscarahuunshon fustisi un ato yoiaguin. Ascáshon nanfoancai un ato oinmana cuscan oinfiarquicai tapiafoma. Nicafiarquicai tapisharafoma.

Fimi ushu saamisihuunoo ahuara yoifíashon shafacafi afu rafuafo tapimani

Mt 13.18-23; Mr 4.13-20

¹¹ Un saamisihuunoo ahuara futsa un ato yoia cuscan un mato shafacafi tapimai. Nan ushufo Diospan tsain cuscara.

¹² Nan fai curushu yorafoan aton ointi cuscara. Ascáshon nanfoan Diospan tsain nicafein ato nomuran nanufiafo nan yoshin chaca Satanás atoqui oshon nan nicafo cuscan ato fiantiro icoinra huayamafain Dios fu ipanonfoma.

¹³ Ascán nan toquiri camaqui mai ichapama cuscan nanscarifiai yorafoan Diosin tsain nicaquin tau huai unimacoinyofiahu ahuara ahuuscaraino samamashta cachiquiri huatiro. Nanfoan Diospan tsain icoinra huaqui chai huashoma ahuara chaca finonquin samamashta Dios cachiquiri huatirofo.

¹⁴ Ascán nan ushu futsafo moshafu muran pacuashu foai sharatiroma. Nanscarifiai futsafoan Diospan tsain nicafiashon ahuara nan acai cuscan fustisi shinanfain pui ichapa yafi mafo ichapa noiqui itiasmashtafi Dios cachiquiri huai. Ascaquicai Diosin ato amapaiyai cuscan huacanima. Ahuarafo futsafohuunshosi ato nomuran afi unimamapaicani.

¹⁵ Ascafia ushu futsafo mai shara ano pacuashu foaiquin yoiashu fimi ya itiro. Nanscarifiai futsafoan Diospan tsain nica cuscan icoinra huashu ahuun nomuran sharacoin. Ascaquicai Diospan tsain nicafo cuscan cachiquiri huacanima. Ascáshon nanfoanri futsafo icoinra huamatirofo.

Lamparinahuunoo cuscara Jesús ato yoini

Mr 4.21-25

¹⁶ Tsoancai tapa camaqui lamparina otashon paninranun fupomisima. Asca huatama otashon tapa camaqui huua pushu muran iquiafoan oinsharatirofo.

¹⁷ Nanscarifiai man shinanmisi cuscan ahuara huafíashon man fomanmisi cuscari nantifi mato puashoshquin. Anoshocai ahuashta afanan man fomantiroma.

¹⁸ Ascacón oinfañ. Uhuun tsain nicasharacahuun. Tsoan uhuun tsain nicasharacoian paratamari Dioshuunoo tapisharatiro. Ascán tsoan uhuun tsain nicafiashu ascacoianna ascashu nan nicamisi cuscari funoshqui, –ishon Jesús ato yoini.

Jesús ahua yafi ahuun ushtofo

Mt 12.46-50; Mr 3.31-35

¹⁹ Ascátan Jesús ahua yafi chipocufu aqui iquipai oianfo yorahuanrasi fasi fospiafono iquinifoma.

²⁰ Ascáiton futsan yoini, –Min uhua futan ushto rananun mia oinpai fuafu chifi niaforan, –ishon yoiáiton.

²¹ Jesús cumani, –Nan uhuun Upa Diosin yoiái cuscacoin aafófin uhuun uhuafu yafi uhuun ushtofoquin, –ishon yoini.

Jesús fuuhuan yafi ian fuchomanhuan nishma huani

Mt 8.23-27; Mr 4.35-41

²² Shafa futsa Jesús afu rafuafo yoini, –Non ianmanhuan oquiri fonon focahuun, –ato huaino afu nanufainifo.

²³ Ascáshu foaifono atoqui fuuhuan noconi. Nantian Jesús shasho tsispa camaquinoashu osha ini. Ascáno fuuhuanquin ianmanhuan fuchoquin unu shasho muran iquimani. Fasi musucóin ini.

²⁴ Ascáiton afu rafuafoan moinnifo, –Moihuu, Ifon, man non asai futsuicai, –ishon yoiáifoanno moinacahuatan ninacahuani. Ascáshon yoini isca huaquin, –Fuun nishmahuu huafain fuchomanhuanun nishmahuu, –Jesús huani. Ascaino ian fuchoi nishmafaini. Man asca huano ian pusiquima racani.

²⁵ Ascáiton ato yoini, –¿Ahuuscai un nunofiano ua icoinra huatama man ratuai? –ishon Jesús ato yoini. Ascaino fasi ratucani mustairicatan afi ranan yocanonannifo. –¿Noco ifomun tsoaquin? Fuuhuan yafi ian nan yoiái cuscan man nishma hua, –icashu afu rafuafo yoinannifo.

Gerasa mai anoa nocofunuhuun yoshin chaca nuua ini

Mt 8.28-34; Mr 5.1-20

²⁶ Ascatan ianmanhuan pocufaini Galilea ocuma futsa Gerasa mai ano noconifo.

²⁷ Ascashu shasho murannoashu Jesús fotocainaino nocofunu yoshin chaca ahuun nuua aqúi noconi. Sahuuti sahuu sahuutianima. Pushu muranricai imisima. Mahua quini muransi iitiani. Nan mahua quini muranri naafo mai huamisifo.

²⁸ Jesús fuchitan ratoconun mai chachipacufaan oi ashcafinin yoiquin isca huani, —¿Mian ahuusca huapaimun, Jesús? Diosin nai muran ica nantifi finoncoianton ahuun Facufin minguin. Ua omitsisca huayamapun, —ishon yoshin chacahuunshon nocofunun Jesús yoini.

²⁹ Nannori yoini Jesusmain yoshin chaca amaquinoa potayamaiton. Asca aqúi Jesús nocoatama yoshin chacapan nocofunu achiriapaoni. Ascaiton yorafoan cadenanun munushfain onushushon cushufiafo nanfo tusaquí futsafaini ichopaoni. Ascashon yoshin chacanun tsoan istaipama iyoni.

³⁰ Ascaiton Jesús yocani, —¿Min ahuanumun? —ishon yocaiton. Yoshin cumani, —Nocon anufin ichapaquin. —Anori yoini yoshin chacafomain ichapa ahuun nuucun.

³¹ Ascashon yoshin chacafoan Jesús yoinifo, —Omitsiscapanacafo quininhuan muran noco potayamapun, —huarianifo.

³² Ascaino nantianari machi mananunshon yahua inafoan piinifo. Ascacun yoshin chacafoan Jesús yoicaquin isca huanifo, —Noco yahuarasihuun nichipun, —huaifoan. —Ascaiton yahuafohuun fotacahuun, —Jesús ato huaino.

³³ Nocofunuhuunoashu yoshin chacafo yahuafohuun fonifo. Ascaino yahuahuanrasi ian muran maocofainni asai futsunifo.

³⁴ Ascaifoan oinfaincaini yahua cushumisifo ichonifo pushurasi ano chani focani. Pushu patashari icafo yafi chaima icafoquiri chaninifo.

³⁵ Ascaiton nicacani yorahuanrasi yahua asai futsuaiton oinpaicani funifo. Fucaquin oianfo Jesús naman nocofunu ahuun yoshin chacafo nuumisi tsafo ini. Man amaquinoa Jesús yoshin chacafo potano. Afanarricai imisi cuscan chitoria iyamacain nison inima. Shinansharacoinni.

³⁶ Atirifi atoquí nocoifoan Jesús amaquinoa yoshin chaca potaiton oianfo cuscan futsafoqui chaninifo.

³⁷ Ascaino Gerasa anofoan nicacani ratucoincaquin yoinifo, —Nocomaquinoashu catapun, —huaifoanno Jesús shashon nanucaini cani.

³⁸ Jesús cataima a yoshin chaca amaquinoa potaton yoini, —Uari iyoicapun. Un mifu capaícaí, —huafaiton.

³⁹ Jesús yoiquin, —Ma. Min pushu ano cashon min yorafo mia Diosin ashoan cuscan huafain yoitahuun, —huani. Asca huaino cashon Jesús ashoan cuscan yoifoanfaini. Pushurasi muran yafi patashari icafo chaima icafori yoifoanfaini.

Jairo shotocofacu caya huafain ainfoan Jesús ahuun sahuuti muunni cayashquin

Mt 9.18-26; Mr 5.21-43

⁴⁰ Asca huatan ianmanhuan pocufurannaiton yorahuanrasiton cusumunshon Jesús mananifo. Fasi aqúi unimacaquin —Nocoqui ohuu, —huanifo.

⁴¹⁻⁴² Nannori nocofunun ahuun anu Jairo. Israelifoan ichananti pushu anoa aton niaifo ini. Nanton ahuun shotocofacu fustishtacoin doce fari aya ini. Ascaino Jesús shasho murannoashu foto curanaiton Jairo fuoshopacucahuan yoini, —Uhuun facushta isiningui man naiquin uhuun pushu ano ufu capun. Uhuun facushta ua caya huashoshquin, —ishon Jairo yoiaino Jesús afu caino yorahuanrasi atofu focaquin fasi yuruanifo.

⁴³ Nannori ainfo atofu cani. Nan ainfo imi imitiani doce fari man aqúi caafiano nusuyamacai. Cayapaiquí nan aya cuscan doctorfo ato inanfiacucai tsoanshta caya huamamisima.

⁴⁴ Ascashu Jesús caiton ainfoan acachorishori ahuun sahuuti cupanan muunni. Muuanshu imi shaturiscatani.

⁴⁵ Ascaiton Jesús ato yocani, —¿Tsoan ua muamun? —ato huaiton.

Nantifiton yoinifo, —Non mia muamaran, —ishon futsan yoicun futsan yoicun huanifo. Ascaiton Pedronun yoini, —Tapimamisiton, yorahuanrasiton mia yuruafain mia put-siquinaforan, —huaiton.

⁴⁶ Afanan ato yoini, —Ratoran futsan man ua mua. Uhuun curushhuunoashu nan ratoran man cayaran, —ishon.

⁴⁷ Jesús yoiaino ainfoan tapini Jesús man onan. Ascacun raquicai onutiroma oin ratui taritari iyanan yora huanrasiton ointaifi Jesús nia naman ratoconun mai chachishon nan

ica cuscan yoini, —Un imi imitiani doce fari man uqui caa. Tsoancai ua caya huamamisima. Ascacun min sahuuti muuashu un imi shaturiscaran, —ishon ainfoan Jesús yoini.

⁴⁸ Ascaiton, —Achishtan, ua icoinra huashufin min cayaquin. Caasharatahuun, —ishon Jesús yoini.

⁴⁹ Ascashu Jesús tsaincai muran niaifoan pushu anoashu aqui oshon futsan yoini, —Min facu man naaqui. Natian nocon tapimamisi afanan fucash huayamacahuun, —ishon futsan niaifo yoini.

⁵⁰ Ascaiton nicaquin Jesús yoini, —Ratuyamahuu. Min ua icoinra huaino min facu cayaiquin, —ishon yoini.

⁵¹ Ascatan pushu ano nocoshon Jesús yoini, —Pedro yafi Juan non Santiago non facun ahuun apa non ahuari marusu ufu pushu muran iquicahuun, —ato huani.

⁵² Ato asca huaino iquifainquin oianfo uaicani shorarascanifo. Manocani. Ascaifoan Jesús ato yoini, —Uayamacahuun. Na facuca naama. Oshafinquin, —ishon ato yoiaiton.

⁵³ Jesús osanifo. Man facu naacoina oinfiainfoan.

⁵⁴ Ascashon Jesús shotocofacu mutsoinifoanquin oi ashcafinin yoiquin isca huani, —Facushtan, funinaca huanhuun, —huaino.

⁵⁵ Afanan funinaca huatan shotocofacushta nini. Ascaiton, —Piimacahuun, —Jesús ato huani.

⁵⁶ Apa yafi ahua aton facu funia oincani fasi unimacoinnaifoan ato yoini, —Maton facu naacoinfiacun un funimana cuscan tsoa yoiyamacahuun, —ishon Jesús ato huani.

9

Jesús afu rafua doce nichini Diosi niaifo icanomain ahuu cuscara iishquicai ishon ato tapimanonfo

Mt 10.5-15; Mr 6.7-13

¹ Shafa futsaino Jesús doce afu rafuafo cunaino aqui funifo. Ascano aqui fuafoan ato yoiqui isca huani, —Uhuun curushhuunshon yoshin chacafo yorafohuun nuucun atomaquinoa potafain pau futsa futsatapafori uhuunshon man ato caya huatiro.

² Ascashon uhuun Upa Dios niaifohuunoari ato yoifain isinincaifori ato caya huatacahuun.

³ Ascacun mato ahua foyamacahuun. Mato poquiti non forusa non tushu non puiri foyamafain mato sahuuti futsafori foyamacahuun.

⁴ Ascan ratoran pushurasi ano man nocoano tsoa aton pushu muran mato iquimai nan fusti muran iyocahuun nan man caitian.

⁵ Asca rato pushu futsa iyamarai pushurasi anofoanri mato nicacasmaifoanno atomaquinoashu focaquin maton sapato tatashacahuun. Ascaquifin man ato ismatiroquin mato nicacasmaifain Diosirifi nicacasmaifo cuscan. Diosin tsain icoinra huamaforan, —ishon Jesús ato yoini.

⁶ Ascashon ato yoiquin anaitiano pushurasifoti ano Upa Dios niaifohuunoo yoifain isinincaifori Jesushuunshon ato caya huafanfafainifo.

Niaifo Herodescai nannorisi shinanima

Mt 14.1-12; Mr 6.14-29

⁷ Ascano nan niaifo Herodes a Jesús aca cuscan nicashu, —¿Tsoamun na nocofunquin? —ishon shinanni. Atirifoan yoinifo, —Nanfin Juanqui man afanan funia, —ishon yoinifo.

⁸ Futsafoanri yoicaquin, —Naanfin Eliasquin, —huaino. Futsafoan yoicaquin, —Ma. Nantofin noco shuni caifo Diosin tsain yoimisi ipaoniquin man afanan funiaran, —ishon yoinifo.

⁹ Ascafiaifoan Herodes yoini, —Ma. Nancai Juanma. Munfin Juan tushtumayamaquin. ¿Asca nan nocofunmun tsoaquin? —ishon yoini. Asca nan niaifoanri fasi Jesús oinpaicoinni.

Jesús cinco mil nocofunfo pimani

Mt 14.13-21; Mr 6.30-44; Jn 6.1-14

¹⁰ Ascashu chipo afu rafuafo Jesusqui naso cashon nan acafo cuscan Jesús yoinifo. Ascaiton nicaquin Jesús ato yoini, —Pushurasi Betsaida ano nocotisi non fononfocahuun, —ishon ato yoini.

¹¹ Ascacia yorahunrasi Jesús yafi afu rafuafo nan foafo ano tapicanashu atoqui funifo. Ascashu nocoifoan Jesús ato yoini, —¡Aicho! Man uqui fui. Uhuun Upa Dios niaifo icanomain ahuu cuscaraqui un mato yoinon, —ishon ato yoini. Nannoshori ratoran futsa isinincai fuafo ato caya huapacuni.

¹² Ascashu man fari caino afu rafuafo doce aqui fucashon yoinifo, –Yorafo nichihuun. Pushurasi ano yafi a chaima icafoanno fotanonfo. Fonaincaniquin. Anoshon tushu fifain ranimain oshacanicain shara futsa fuchinonfo. Nuno tsoa yamaiquin, –ishon yoinifo.

¹³ Ascaiton ato cumani, –Ato piimacahuun, –ishon a rafuafo yoiaiton. –Nonfin misi mucu fustiti yafi shiman rafusi ayaquin. Min shinanmun na yorafo pimashquin non tushu ichapa ficaiquin, –ishon yoinifo.

¹⁴ Nanno cinco mil nocofunufosi ini. Ainfofo yafi facufocai tanan huamunima. Ascaiton ato yoiqui isca huani, –Ato yoicahuun futsano cincuenta tsaohuaifono futsa anori cincuenta tsaononfo. Nanscasi anonfo, –ato huani.

¹⁵ Nan ato yoiyai cuscan tsaocunifo.

¹⁶ Ascaino shiman rafu yafi misi mucu fustiti tsomashon nai ari foisinifoantan apa Dios cufinquin isca huani, –¡Aicho! Upan, mihuunshon un ato pimai. Min fasi sharacoincun, –huatan. Misi torupacutan shiman rafu ya oshon afu rafuafo ato inanni ato pashcanan huapanonfo.

¹⁷ Ascashon picani mayancoinnifo. A picaquin tushu huafo afu rafuafoan doce shihuati fospi huanifo.

Pedronun, –Jesús Diospan facuran, –huani

Mt 16.13-19; Mr 8.27-29

¹⁸ Ascatan shafa futsa Jesús afu rafuafo ointaifi apa Dios cufini. Cufinquin anaitatan ato yocani, –¿Yorafoan shinanmun un tsoaquin? –ishon ato yocaiton.

¹⁹ Cumanifo, –Futsafoan yoiafin min Juanquin. Nan yorafo unu muran iquimapacumisi. Asca futsafoanri yoiafofin min Eliasquin. Asca futsafoanri yoiafofin min noco shuni nan Diosin tsain yomisi ipaoniquin man min afanan funiaran, –huaifon.

²⁰ –¿Asca marifi man shinanmun un tsoaquin? –ishon ato yocaiton. Pedronun cumani, –Minfin Cristoquin. Nan Diosin mia catonniran, –ishon yoiaiton.

²¹ –Ascacun tsoashta yoiyamacahuun, –Jesús ato huani.

–Unfin chipo naashquicai, –ishon Jesús ato yoini

Mt 16.20-28; Mr 8.30-9.1

²² Ascatan afu rafuafo yoiqui isca huani, –Un chipo fasi omitsiscashquin. Nocon yorafohuunshon Dios cufimisi niaifono non Dios fu tsainti pushu cushumisifo Moisés cununi cuscan tapimamisifoan futan ua icoinra huashquicanima. Ascashon ua ato rutumafiafo osha rafu non fusti finontan un afanan funishquiran, –ishon Jesús ato yoini.

²³ Ascashon nantifi yorafo yoiqui isca huani, –Tsoan ua tanapai sharaquicai afin apaiyai cuscan huatiroma. Ascataa nan un yoiyai cuscaquin huatiro. Ascashon shafatifi shinanqui isca huatiro, “Ua omitsisca huafiaifoanno uncai uhuun Ifo potapacunacama. Ahuunshon ua rutufiaifoanno un tanaqui unupacunacamaran,” ishon shinantiro.

²⁴ Ascaino tsoan shinanquin isca huai, “¡Ohua! Un Jesús tanaitonraca ua omitsisca huanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoan uhuunoashu omitsiscasai naa. Nanscara yorafofin nacanashu ufu isharapacunacafoquin.

²⁵ Ascan ratoran futsan nantifi manifesti anoafu ahuara fia ahuanacoin ifiashu amaqui naino nantifi ahuanafu funotiro. Ascashu nantifi ahuaa iyopaonifia omitsiscapanacafo muran cainocai ahuashta itiroma.

²⁶ Ascan tsoa uhuun rafipaiquin uhuun tsainri uhuunoa yoicasmaifo. Nanscarafohuun urifi un chipo uhuun Upa Dios cuscaracoin iicaino uhuun Upa Diospan oinmati afu nai muran ica sharafoya chasha curani un fotoaitan un nanscara yorafohuunri un rafipaishqui. “Nacai uhuun yoramaran,” ishon un yoishqui.

²⁷ Ascacun icon un mato yoi. Man futsa nuno ufu niaton naataishoma Upa Dios niaifo icano cuscara man oinyoshquiran, –ishon Jesús ato yoini.

Jesús fianananriscatani

Mt 17.1-8; Mr 9.2-8

²⁸ Ascashu ocho osha finontan Jesús Pedro non Juan non Santiago nan rafu non fusti ato machi ano iyoni. Apa Dios cufi caquin.

²⁹ Ascashon Apa Dios cufiaino ahuan fuso fianananriscatani. Ahuun sahuutiri chashariscatani nan yoa rama furoa ointsas. Fasi osho sharacoin facafacai ini.

³⁰ Ascaino nocofunu rafu aqui niriscatan afu tsainnifo. Nan rafu Moisés yafi Elías ini.

³¹ Ascashu nan rafuri chashariscatishotan nan Jesús Jerusalén anoashu omitsiscacai naashquicai cuscan afi ranan yoinannifo.

³² Ascaiton oincani Pedro yafi afu rafua rafutari oshapafiaquin osha tunucoinnifo. Jesús chashariscatanaiton nan rafutari oinnifo.

³³ Ascashu nan rafu man Jesusmaqui caino Pedronun yoini, —Ifon, nuno non ica shara itiro. Non mia tapasi rafu non fusti huashonon. Mina futsa non Moisésna futsa non Eliana futsari non huashonon, —ishon yoiflashocai Pedronun tapinima raquirimain huaaquin.

³⁴ Ascashu nan tsaincai muran atoqui coin manipacufoannaino coin muran nii futsashu ratucoinnifo.

³⁵ Ascashon nan coin murannoari oi nicanifo yoiqui isca huaiton, —Naanfin uhuun facuquin. Nan un catonni. Ascacun a nicacoincahuun, —Upa Diosin ato huani.

³⁶ Diosin tsainqui anaititanaino oianfo arus fusti Jesús nia ini. Ascafiashocai tsoashta yoinifoma arus fusti aton nomuranshon shinannifo.

Jesús yoshin chaca furonanfacuahuun nuua caya huani

Mt 17.14-21; Mr 9.14-29

³⁷ Ascatan iyoco futsaino machi anoashu fotocaini Jesús caino aqui yorahuanrasi funifo oinpai fucani.

³⁸ Nanno yorahuanrasi muranshon futsan Jesús cunani. —Tapimamison, uhuun facu fusti ua oinshoniyopun.

³⁹ Yoshin chaca ahuun nuushon. Uhuun facu fasi musta musta imayanan fiisimafain ahuun ashfapan facoshurasi atsispomamisi. Yoshin chacacai uhuun facumaquinoashu capaima. Nanscaquisi man rutui.

⁴⁰ Un mifu rafuafo yoia isca huaqui, “Na yoshin chaca uhuun facumaquinoa ua potashocapun,” un ato huafiacai tsoan atiro icamaran, —ishon nocofunun Jesús yoini.

⁴¹ Ascaiton Jesús afu rafuafo yoini. —¡Ohua! Mancai ua icoinra huacoinnama. Man fasi amaquiri shinanmisi. ¿Ahuuttia un matofu icamun man ua nicayamacaiyai? —ishon ato yoini. Ascan facun ahuun apa yoini, —Min facu ua ihuushohuun, —huani.

⁴² Ascashon furun ihuushonaino yoshin chacanun afanan musta mustaimainifoanaino pacuni. Ascaiton Jesús yoini, —Minfin yoshin fasi chacacoinquin. Na facumaquinoashu catahuun, —ishon Jesús curushcai yoiaino facu cayani. Ascaiton Jesús apa yoini, —Naquian min facu. Iyosharatahuun, —huani.

⁴³ Ascaino oincani mustairicatan, —Diosin ahuamamishti huatiroran, —icashu yoinan-nifo.

Jesús nashquiai cuscan afanan yoi futsani

Mt 17.22-23; Mr 9.30-32

⁴⁴ Nan acaiton oian cuscan shinansharaifoan Jesús afu rafuafo yoiqui isca huani, —Un mato yoiai cuscan nicacoincahuun. Futsafin ua ato achimashquiquin, —ishon Jesús ato yoini.

⁴⁵ Ascashon ato yoiai cuscacai tsoan tapinima. Diosin ato nomuran ato shinantima huaino. Ascacucacai yocapaifia ratucaqui yocanifoma shafacafi ato tapimanon.

Tsoacaimun fasi shara finacaiiaqui

Mt 18.1-5; Mr 9.33-37

⁴⁶ Ascashu chipo afu rafuafo afi ranan fochishmanantanannifo. Ascan non rato futsacaimun non fasi shara finacaiiaqui ishon yoipacunifo.

⁴⁷ Ascashon nan shinainfo cuscan onanshon Jesús facu mutsofuran yoiqui isca huani, —Facushtan, nuno ufu niyohuu, —ishon yoini.

⁴⁸ Asca huatan afu rafuafo yoiqui isca huani, —Tsoan uhuunshon na facu shara huaifin nan uari shara huai cafisca huaiquin. Nanscarifiai tsoan ua shara huaquifin nan ua nichini uhuun Upa Diosiri shara huaqui. Ascan ratoran man futsa oinmati cuscara ahuuamafiasho man yora shara huamisi nanfin fasi shara finacaiiaquin, —ishon Jesús ato yoini.

Tsoan noco chaca huapaitama noco shara huai

Mr 9.38-40

⁴⁹ Ascaiton Juanpan yoini, —Tapimamison, non oian nocofunun min anuhuunshon yoshin chacafo atomaquinoa potaiton. Nancai no fu rafumisima. Ascacun nan non yoiquin isca huaa, “Asca huayamahuu. Min no fu rafumisimaquin. Asca yoshin chaca yorafomaquinoa min potatiromaran,” ishon non yoiaran, —Juanpan huani.

⁵⁰ Ascaiton Jesús cumani, —Asca huayamahuu. Tsoan noco chaca huapaitama noco shara huaifin sharaquin, —ishon Jesús Juan yoini.

Jesús Santiago yafi Juan, —Asca huayamahuu, —ato huani

⁵¹ Afanan Apa Dios icari cati chaima Jesús Jerusalén ano cayoni. Ascaitocai tsoashta nitun huatiro inima. Manmain topicufin a Jerusalén anoashu noco nashoyoi Apa Diosin yonoa cuscan.

⁵² Ascacun a rafuafo rafu rucun nichini. Nan pushurasi Samaria ano focashon itishara huashononfo.

⁵³ Ascfia nannoafoan ato yoiquin isca huani, —Nuno iquiyamacahuun. Non mato oinpaimaquin, —ishon ato yoinifo.

⁵⁴ Ato asca huaifoan nicashon afu rafuafo rafu Santiago futan Juanpan Jesús yoinifo, —¿Ifon, min noco yonopaimun atohuunshon non Upa Diosin cufinon nan pushurasi nai muranshon chii atoqui pota nai cuyononfo? —ishon yoiiafoan.

⁵⁵ Jesús ato cumani, —Asca huayamacahuun. Man shinain cuscacai un shinanpaima, —ishon Jesús ato yoini.

⁵⁶ Asca huatan pushurasi futsa ano cani.

Jesús tanasharapaiyifo

Mt 8.19-22

⁵⁷ A fu caquin nocofunu futsan Jesús yoini, —Ifon, min raquiria caino urifi un mifu cahuacacainon, —huaiton.

⁵⁸ Jesús cumaquin, —Marifi quiniyaquin puiafiori naa yafofiano uncai pushu yama, —ishon yoini.

⁵⁹ Ascashon nocofunu futsa Jesús yoiquin isca huani, —U fu cahuun, —huaiton. Cumaquin, —Ifon, ua manayohuu. Nan uhuun upa naitian iquisi mai huayotan un mia tanasharashquinon, —huaiton.

⁶⁰ —Ascaquima ua tanafafainhuun. Ua ifoamafofin nan yora naa cuscarafuquin. Ascashon nanfoan ato yora naacun mai huatirofo. Ascan minfin uhuun Upa Dios niaifohu-unoa ato yoifafaincain, —ishon yoiaiton.

⁶¹ Futsan yoini, —Ifon, un mia tanapai. Ascfia iquisi uhuun pushu ano un cayotanon uhuun yorafo ato yoioicai, —huaiton.

⁶² Jesús cumaquin, —Tsoan ua yonoshofiaquin apaoni cuscan afanan huapai, nanscara yorafocai itisharafoma uhuun Upa Dios niaifo ano iquishcaquin, —ishon Jesús yoini.

10

Jesús setenta y dos nocofunufu nichini

¹ Ascatan Jesús setenta y dos nocofunufu catonni. Ascashon rafurasi ato nichipacuni. Nan pushurasi patasharifo ato rufofo nichini nanno chipo arifi atoqui caashquin.

² Ascashon Jesús ato yononi isca huaquin, —Yora ichapafaon uhuunoa nicataiyamafishon ichapamaton ua yonoshocani uhuunoa ato yoishcaquin. Ascacun fasi Upa Dios cuficahuun ahuun yonoshomisifo catonon uhuunoa ato yoinonfo.

³ Ascacun fufacahuun. Un mato yonoa cuscan chashoanfo masharonun pipaitiro cuscan nanscarifi huaquin uhuunoashu man isharafiacon yora chachafoan mato chaca huapaicaniquin.

⁴ Ascashori a muran pui huati yafi forusa non mato sapatoti foyamacahuun. Focaquin yorafo finonfaincahuun. A fu tsainyoashu man funa nocotiromaquin.

⁵ Pushu futsa muran iquishon ato yoicahuun, “Diosin mato shara huacoinnon. Isharacahuun,” ishon ato yoicahuun.

⁶ Asca nan pushu muran ica futsa isharacoincun naanfin “Diosin shara” huacoinnaquin nan man yoia cuscan. Asca man yoiai cuscan a pushu muran icafoan mato nicacasmaifocai Diosin ato ointi unimamatiroma. Ascashu funocani. Ascfia man ato yoiai cuscaicrocofin Diosin matoqui unimaiquin.

⁷ Ascatan pushurasi muran nocoashu pushu fusti muransi oshacahuun. Nannoshon mato pimafain mato ayamanaifoan acahuun. Diosinhuunoashu yonomisifo nan yopaifo cuscan nan nicamisifoan ato inantirofo.

⁸ Ascashu man pushurasi muran man nocoaiton mato ihui sharafain mato pimafain mato ayamanaiton acahuun.

⁹ Nannoshon isinincaifo uhuunshon ato cayahuamacahuun. Ascashon ato yoicahuun isca huaquin, “Natian Diosin niaifoan ahuun yorafo iquinai cuscan chaimashtaran,” ishon ato yoicahuun.

¹⁰ Ascan mato nicacasmaifoanno ato fai ano fotocahuun nannoshon ato yoicahuun isca huaquin,

¹¹ “Maton chaca nocohuun nuama. Matohuunfin nuaquin. Ascfiaino Diosin maton Ifo ipairan,” ishon ato yoicahuun.

¹² Un mato yoinon. Diosin Sodoma anoafo ato namaqui cuyoni. Ascan nan mato nicacasmaifofin ahuutiaran nan Sodoma anoafo ani finonmacaifain ato omitsisca huaquin finacoinshquin.

*Pushurasi anoafo yoitimacoinfo**Mt 11.20-24*

¹³ ¡Ohua! Man Corazín anoafo yafi Betsaida anoafoan man chipo fasi omitsiscái. Tsoan oinyomisima cuscara shara un mato ismafiano mancaí chaca shatupaima. Ascan nan Tiro anoafo yafi Sidón anoafo un mato isma cuscan un ato ismaiton nanfoan ato chaca shatucuanafa. Ascashon yoicuanafa isca huaquin “¡Ohua! Non fasi chaca huamisi. Ascacun natian Diosiqui nasoshon non nicasharanoncahuun,” ishon yoicuanafa.

¹⁴ Ascáfia Diosin nantifi icoinra huamafo onaintimaitian nan Tiro anoafo yafi Sidón anoafoari onaintimafiaquicai mato onaintimaquin finacoinshquin.

¹⁵ Ascan man Capernaum anoafoan man shinanmun man nai muran Dios ari foicai. Ma. Omitsiscapanacafo muranrocon mato potai, —Jesús yoini.

¹⁶ Asca huatan Jesús ahuun tanamisifo afanan ato yoiqui isca huani, —Tsoan man yoiái cuscacoin mato nicaquin nan uacoin nicái cafisca huaquin. Ascan tsoan mato nicacasmaquifin uarifi nicacasmaquin. Ascan tsoan ua nicacasmaquifin nan ua nichini uhuun Upan Diosiri nicacasmaquin, —ishon Jesús ato yoini.

Setenta y dos nocofunfo Jesús yonoa cuscan afanan naso furanifo

¹⁷ Ascano chipo nan setenta y dos ahuun tanamisifo afanan aquí naso furacani fasi unimacoincani fucashon yoinifo isca huaquin, —Ifon, yoshin chacafoanfin min anuhuunshon noco nicacointirofoquin. Ascacun yorafomaquino non mihuunshon potaran, —huaifoan.

¹⁸ Jesús ato cumani, —Aifain. Dios icanoashu nan cana piishicai cafiscái Satanás mai ano pacutanaiton un oian.

¹⁹ Ascano un mato yonoainocai uhuunshon mato ahuaraton ahuusca huatiroma. Rono paupan futan inapapiaton mato ahuusca huanonma un mato cushutiro. Ascashon nan Satanás noco noicasmamisi uhuunshon man finoncointiro mato ahuusca huanonma.

²⁰ Ascacun nan man yoshin chaca potahuunoashu unimayamacahuun Diosifin nai muranshon mato anu ahuun libro muran cunuaquin man ahuun facufocun ato ismashquin. Nan shinainfin man unimatiroquin, —ishon Jesús ato yoini.

*Uqui fucahuun. Un maton ointi unimamatiro**Mt 11.25-27; 13.16-17*

²¹ Ascano ato yoiqui anaititan Diosin Yoshin Sharahuunoashu unimacoinquin Apa Dios yoiquin isca huani, —Upa Diosin, min fasi sharacoin. Nantifi nai murannofo futan mai anoafoan aton ifofin minquin. Ascano nan mapo sharayafo yafi cunu tapiafocai min tsain shara min ato tapinama. Ascáfia nan cunu tapisharafoma nan facu cuscarafoqui. Ascashon nanfoan un ato isma cuscan yafi un ato yoiái cuscan ua icoinra huafo. Nanfofin min ato tapimanaquin. Icon, Upan, minfin nanscara fuchipaquin, —ishon apa yoini.

²² Ascashon cufinquin anaititan Jesús nantifi yoini, —Uhuun Upa Diosin tapia cuscan uarifi nantifi tapimani. Unfin Diospan facuquin. Diosin fustitofin ua onancoianquin. Nanscarifi aquin urus fusti Upa Diosin un onancoian. Nanscarifi huaquin urifi un futsafo Upa Diosihuunoa tapimani cuscan nanfoanri Upa Dios tapitirofoquin, —ishon Jesús yoini.

²³ Ascashon ifacucahuan ahuun tananmisifo fusti yoini, —Diosin matohuun noiquin ahuun yono mato isma. Ascacun mato shara huacoinna.

²⁴ Man oiain cuscan Diosin tsain yoimisifo futsafo futan niaiffoanri oinpaifiaquicai oinpaonifoma. Man nicái cuscari nicapaifiaquin tsoan nicapaonimaran, —ishon Jesús ato yoini.

Samaritanon sharahuunshon Jesús ato ahua futsa tapimani

²⁵ Ascano nocofunu futsa Moisés cununi cuscan tapicoian Jesusqui oni yocayoi. Tapi-paiquin Jesusmain cayacafi cumaiquin ishon. Ascashon yocani, —¿Tapimamiton, unmun ahuuscatiroquin Dios fu ipashquin? —huaiton.

²⁶ Jesús cumani, —¿Raquiri Moisés cununimun? —ishon yoiaiton.

²⁷ Cumani, —“Nocon Ifo Dios nocon ointi muranshon fasi noifain, nocon nomuranshori fasi noifain, fasi curushcai Dios noifain nocon shinanfoyashori Dios noihuu. Ascatan nan mifiri min noiái cuscan aquin mia chaima icafori noicoinhuun,” ishon Moisés cununiran, —huaiton.

²⁸ Ascaiton Jesús yoini, —Min ua cayacafi cumashara. Nanscacoian atahuun. Ascashufin min Dios fu ipatiroquin, —ishon yoini.

²⁹⁻³⁰ Asca huaiton cumani, —¿Ascan tsoafomun ua chaima icafoquin afohuun un noiái? —ishon yocani. Ascan nantocai atifihuun noinima. Ascacun Jesús a nocofunun shinain cuscan onanshon cumaquin isca huani, —Nocofunu Jerusalén anoashu Jericó ano caiton. Yomutsofoan achicashon sahuuti shoriquin futsatan sutuquin futsacaquin nama cuanifo. Ascashon fai cusumun ratafaini yomutso ranan ichonifo.

³¹ Ascano ahuun caifohuunshon Dios cufimisi oquin oian fai cusumun racacun oinfi-aquin fai ocuma futsa caquin tanafainima.

³² Ascano nocofunu futsa Levita arifi oquin oian racacun nantorifi rahuinfainni.

³³ Ascaino nan fainri chipo Samaritanon oquin fuchitan ahuun ramapaitoshini.

³⁴ Ascashu chipacopacucahuatan ahuun yoratishon shuni ya cayati futsa osishon ahuun ratucuraquin futsatan. Ahuun ina camaqui ratainfoantan iyoshon pushu muranshon cushushoni.

³⁵ Ascatan iyoconaino ahuun rafanan toro paratamacoin ahuun pui nua rafu inanni. Ascashon pushu ifo yoiquin isca huani, “Na nocofunu ua cushusharashohuun. Afanan oshon un mia rafuri inanyoshquinon. Min cushusharaiton finonmafaintan afanan oshon un mia pui inanyoshquinon,” huani.

³⁶ ¿Ascán rato nocofunu rafu non fusti caimun a chaima icafo cuscaracaquin a nocofunu omitsiscapishtai? –ishon yocaiton.

³⁷ Nan Moisés tsain tapimamisiton cumani, –Ahuun ramapaiyaifin a chaima ica cuscaracaquin, –ishon yoiaiton. Jesús yoini, –Caashon mirifi nanscarifi huatahuun, –ishon yoini.

Marta futan María ahuun pushu ano Jesús ini

³⁸ Ascatan Jesús cai pushurasí muran noconi. Nanno ainfoan ahuun anu Marta ica ini. Nanton ahuun pushu muran Jesús iquimasharani.

³⁹ Ascano nan Marta chipocufin María iniquin. Nanton Jesús tsain yoiaiton nicashquin icashu Jesús naman tsaotoshini nicasharashquin.

⁴⁰ Ascafiaitocai Marta nicanima nan tushu huaisi shinanni Jesús pimashquin. Ascacun nan Martan Jesús yoini, –¿Ifon, mian shinainmamun? Urusu fusti un tushu huai. Uhuun chicocai u futan apaima. Ua yoishohuun u futan aqiyuonon, –huaiton.

⁴¹ –Martashtan, minfin tushu fusti shinanquin. Ahuarafo futsa huaquicai mian nicaima. Nan uhuun tsain sharafin María catoanquin. Ua nicaquin.

⁴² Uhuun tsain fusti shinanquin. Nan fusti yopaiquin. María ahuun nomuran uhuun tsain nanushon aqumashquimaran, –ishon Jesús yoini.

11

–Raquirimain non Upa Dios cufiqui huatiroquin, –ishon Jesús ato yosini

Mt 6.9-15; 7.7-11

¹ Ascano shafa futsa Apa cufiqui anaitiano afu rafua futsan yocani, –Ifon, raquirimun non Upa cufiqui huatiroquin. Noco tapimahuun. Juanpan afu rafuafo tapimani cuscan nocorifi tapimahuun, –ishon yoiaiton.

² –Isca huacahuun, –ishon Jesús ato yosini,

“Nocon Upan nai murannoaton min fasi sharacoin.

Manifotiton aton niaifo iishquin mia ifoannonfo.

³ Shafatifi nocon tushu non yopai cuscan noco inahuun.

⁴ Nan noco chaca huaifon non ato rau huaa cuscan huafain

nocon chacafori noco rau huashohuun, Upan.

Satanás yoshin chacapan noco chaca huamapaifaiton

nocoqui cumatima huahuu.

Nansca huaquiquian,”

ishon Jesús ato yosini.

⁵ Ascatan afanan ato yoiquin isca huani, –Manmun mato yorahua yamunacucahuaino mato ano nococun maton yora futsa yoa yocashoquin isca huaquin,

⁶ “Ua yoa rafu non fusti inanpun. Un mia nasonon. Un natian yopaicai uhuun yorafo chaicunoashu uqui nocoano un ahuashta pimaimacain,” ishon yocaiton.

⁷ ¿Ascaiton cumaquimun isca huatiro, “Mun uhuun facufo ya iquia caincaitiri man fupoa. Asca ua fucash huayamahuu,” ishomon anori cumatiro?

⁸ Ma. Ascacai huatiroma. ¿Raquiri huatiromun? Un mato yoi. Ahuun yorahuaton inanyamai shafai fasi manariaiton inanyamacuatan inantiro. Funinaca huatan nan yoca cuscan inantiro.

⁹ Afanan ahuaara futsa un mato yoiai cuscan nicacahuun. Ahuara yopaquin Upa Dios yocacahuun mato ashonon. Man yocain cuscan funaquima manasharacahuun nan Diosin mato ashoaitian. Ascacun Upa Dios cufifafaincahuun man cufiai cuscan mato inanon.

¹⁰ Tsoan Upa Dios yocariai fiishquin. Ascán tsoan ahuaara shara fasi fuchipaiyai cuscan Diosin ato fuchimatiro. Ascán tsoanri Upa Dios cufriaiton ashoshquin.

¹¹ ¿Ascán maton facun mato shiman yocaiton man rono inantiro mun? Ma. Mancai maton facu asca huatiroma.

¹² ¿Maton facuri mato tacara to yocaiton man inapapia inantirumun? Ma. Mancai maton facu asca huatiroma.

¹³ Ascacun tapicahuun. Man chaca huamisifiashon maton facufo man inansharamisi. Man ascaiton finacaiya maton Upa Diosin nai murannoaton man yocai cuscan ahuun Yoshin Shara mato inanshquin, —ishon Jesús yoini.

—*Yoshin chaca ato niaifoan ahuun curushhuunshon Jesús yoshin chacafo potatiroran, — huanifo*

Mt 12.22-30; Mr 3.20-27

¹⁴ Ascano yoshin chaca nocofunuahuun nuushon tsainmatiroma Jesusqui ocun. Amaquinoa yoshin chaca potano tsaiinnaca huanaiton oincani mustairinifo. Ascashon atirifiton, —¡Aicho shararan! —huaifoanno.

¹⁵ Futsafoan yoinifo, —Satanás curushhuunshon Jesús yoshin chacafo yorafomaquinoa potatiroran, —ishon.

¹⁶ Futsafoan Jesús yoiquin isca huani, —Dioshuunshon nai murannoa noco ahuaara futsan ismahuu non mia icoinra huanon Diosin mia catoanquin, —huaifoan.

¹⁷ Ascano nan shinainfo cuscan onanshon Jesús ato yoini, —Mani futsafo afi ranan rutunain cuyotirofo. Nanscarifiai pushu fusti muran icafori afi ranan chaca huatananfafaicani pashcanantirofo afanancai tsoa anosi itiroma. Ascashuricai afanan tsoa yorahuatanantirofoma.

¹⁸ Nanscarifiai Satanás niaifoan afu yoshin chacafo potaquin ahuun yono chacana huatiro. Asca huaquin ahuun yono cuyocointiro afu yoshinfocai afanan afu itiroma. Un nannori yoia manmain yoiquin isca huayamacun, “Satanashuunshon yoshin chacafo potaran,” ishon man uhuunoo yoia.

¹⁹ Ascafia manfin uhuunoo yoimisiquin. “Satanás curushhuunshon yoshin chacafo potaran,” ishon man yoisimi. ¿Un asca huaino tsonhuunshon mato yorafoanri yoshin chacafo atomaquinoa potafomun? Ascacun nanfohuunshon man tapitiro man uhuunoo amaquri shinanchacai cuscan.

²⁰ Ascafia Diospan Yoshin Sharahuunshon un yoshin chacafo atomaquinoa potaiton man tapitiro maton Numamisi Diosin catonni man matoqui noco.

²¹ Ascan nocofunu mutsisipacoinin tucuti yashon ahuun pushu cushuanocai tsoan ahuun ahuashta muntiroma.

²² Ascafia nan finoncaia fasi mutsisipacoin aqui nocoshon achifain ahuun cunoti mu-fishon ahuun ahuafo cuyonfiatocai ahuusca huatiroma. Ascashu ahuun ahuafo pashcanain futsutirofo.

²³ Tsoa ufu rafucasmaquifin uhuun tsain nicacasmaquin. Nanfoan futsafo ua icoinra huamapaicanima. Ascaquifin Diosimaqui ato imacanicuin.

Yoshin chaca yoraqui afanan nasotiro

Mt 12.43-45

²⁴ Yoshin chaca nocofunumaquinoashu cai tsoa istaipama ano cani shara futsa funai cai anoshon tunushquin. Ascafia fuchiamacaiqui yoshin chacanun afanan shinanqui isca huani, “Unfin nan nocofunuahuun ipaonicuin. Ascacun un afanan aqui nasoiran,” ishon shinanni.

²⁵ Aqui nocoshon oian tsoa futsacai afu rafua inima. Nan pushu matsomua shara oints.

²⁶ Ascacun nan yoshin chacanun afu yoshin chacafo siete ato ihuuni nan fasi chaca finacai. Ascashon ato yoiqui isca huani, “Nocofunun un mato ismaicai non ahuun nuifonon,” ishon ato yoini. Ascatan aqui foshon iquinaifoanno nan nocofunu fasi mimacai chacacoin ini. Manmain aqui rananri focun, —ishon Jesús ato yoini. —Asca huaifoanno nan nocofunu afanan finacai pacucahuani. Mimacai fasi omitsiscas finacoincun, —ishon Jesús ato yoini.

Nicafo cuscan unimacoicani

²⁷ Ascaiton ato yoiaino ainfonan nan yorahunrasi muranshon oi ashcafinin Jesús yoiqui isca huani, —Min uhua mia cainshon mia shoma amani. Ascacun min uhuaquimun Upa Diosin unimasharapainon, —ishon yoini.

²⁸ Ascatan Jesús cumani, —Ai, nan min yoi ai cuscan iconfiashu tsoan Diosin tsain nan nica cuscaicoin Diosin nan unimamatiro finacoian, —ishon cumani.

—*Tsoan atiroma cuscan noco ismahuu non mia icoinra huanon, —ishon yoinifo*

Mt 12.38-42; Mr 8.12

²⁹ Ascatan fasi paratama yorahunrasi Jesusqui fuaifoan. Ascaiton ato yoini, —Natian niafo fasi chacacoinfo. Ascashon ua yoisimifo isca huacaquin, “Tsoan atiroma cuscan noco

ismahuu min Dios ariashu oa non mia icoinra huanon,” ishon ua yoimisifo. Ascafia nan Diosin tsain yoimisi Jonás ani cuscaoin un chipo mato ismaiton nan fusti man oinshquin.

³⁰ Ascan Jonás tsainhuunshon Nínive anoafoan Dios icoinra huanifo cuscan nanscarifi huaquin natian niafo un mato yoi marifi man icoinra huanon.

³¹ Ascashon Diosin nantifi yorafo ichanan huaitian ato yoipacushquin ratofomain afu ipatiro iyamarai omitsiscapanacafo muran foshcaniquin. Nantianri nan ainfo Sabafoan ato niaifo ipaoniton matohuunoa yoiquin isca huashquin, “Salomón tapicoian cuscaoi tsoa futsan tapipaonifoma. Ascacun ahuun tsain nicapaicoi un aquí chaicunoashu cani cuscan mancai nan Diospan Fururi asca huapaipaonima. Ascatarocon man nicacasmaoniran,” ishon matohuunoa yoishquin. Nan icon Salomón tapicoian ipaonifia uncaifin fasi Salomón finoncofiacu mancai ua nicapaima.

³² Nanscarifi huaquin Diosin nantifi yorafo ichanan huaitian ato yoi pacushquin ratofomain afu ipatiro iyamarai omitsiscapanacafo muran foshcaniquin. Nantian Nínive ano ipaonifoa matohuunoa yoishcane isca huaquin, “Jonás noco Diosin tsain yoi ai cuscan nicacoinshon non nocon chaca shatucoinfain non Dios icoinra huani. Asca man manfin Diospan furucoi nicafashocai maton chaca man shatupainimaran,” ishon mato yoishcane. Nan icon un Jonás finoncofiacu man ua nicapaimisima.

Nocon ointi sharaquin non shinansharatiro

Mt 5.15; 6.22-23

³³ Asca huatan afanan ato yoiquin isca huani, Tsoancai lamparina ihuashon otayamafain paninaranunri fupoima. Asca huatarocon shafacafi tsaoni nan iquiaifoa oinsharanonfo.

³⁴ Nanscarifi ai nocon furo rafu noco cayan lamparina cuscara. Nan rafu sharano non oinsharatiro. Ascashon nocon caya cushusharatiro non ahuuscanonma. Nanscarifi ai mato nomuranshon man shinansharai man isharacointiro. Ascafia maton furo chacacocai man oinsharatiro. Ascashu nan faquish muran ica shinantsain. Nanscarifi ai maton nomuranshon man shinanchacaicain man isharatiro. Man funocointiro.

³⁵ Ascacun oinfain. Tapicahuun mato nomuranshon man shinansharai cuscan chaca shinantama.

³⁶ Ascashu shafacafi man icafin nan chashamatatin mato chashama cuscaroquin. Nanscara ano man icacai faquish itiro. Nanscarifi ai maton nomuranshon man Dioshuunoa fusti shinansharaino man ahuaara chaca shinantimaran, —ishon Jesús ato yoini.

—Manfin chacafoquin, —Fariseofo yafi Moisés cunu tapimamisifo Jesús ato yoini

Mt 23.1-36; Mr 12.38-40; Lc 20.45-47

³⁷ Ato yoiqui anaitiano Fariseonun Jesús yoimani pimashquin. Ascano ahuun pushu muran oashu tsaoni. Ascaino pishcaquin Fariseofo ato shunifoa ato tapimani cuscan ahuun mucu chocayoni. Asca Jesuscai Fariseo imisifo cuscan anima.

³⁸ Ascaiton oinquin Fariseon ahuun nomuran shinanni, —¡Aja! Nocon shunifoa noco tapimani cuscaoi Jesús aimaran, —ishon shinanni.

³⁹ Ascaiton Jesús ahuun nomuran onanshon yoiqui isca huani, —Ua nicahuu. Man Fariseofoancai maton mucu chocafiaquicai man maton nomuran ahuaara shara shinainma. Yora futsafahuunoa shinantama. Man ahuaara futsa futsa tapasi noicoi. Maton nomuran chaca futsa futsatapafo fospicoianran, —ishon ato yoini.

⁴⁰ —Manfin fasi amaquiri shinanmisiquin. ¿Man tapimamun tsoan noco caya fumanayan onihuafain noco nomuranri onihua?

⁴¹ Ascacun ahuuomafahuun ramapaicain ato inansharacahuun. Man ascaiton tapitirofo Diosin maton chaca mato soashotiro man sharacoin onon. Ascashu man shinain cuscan shara fustisi iishquin.

⁴² ¡Ohuashta! Fariseofoan mato Diosifin onaintimashquiquin. Mato fanafo atirifi man Dios inanmisi. Man asca huafiaquicai man futsafo shara huamisima. Ascaquifin man Diosiri noicoianmaquin. Man mato fanafo atirifi Dios inanmisi cuscan shara futsafo shara huafain Diosiri noicoiancahuun.

⁴³ ¡Ohua! Fariseofoan Diosin mato onaintimai. Ichananti pushu muran iquitan shafacafi man tsaofafaini mato oinquin, “Sharacoinforan,” mato huanonfo. Yorafoan mato finonfoancaquin, “Noco tapimamisiton,” mato huaifoanno man unimanon.

⁴⁴ ¡Ohua! Ascafia Diosin mato onaintimai. Manfin naan yora naa cuscarofoquin. Yora mai huafo manaon cahuaqui futsafoan tapishoma puamafoantirofo. Nanscarifi ai yorafo matoqui nocoflashocai tapiafoma maton nomuran man chacacoinfiacu, —ishon Jesús Fariseofo yoini.

⁴⁵ Ascaiton nicacaquin Moisés cununi cuscan tapimamisi futsan cumani, —Tapimamisiton, min anori yoiquifin nocori min roaiquin, —huaiton.

⁴⁶ Jesús cumani, —¡Ohua! Moisés cununi cuscan tapimamisifoan matori Diosin onaintimai. Man maton caifo yoiqui isca huamisi, “Moisés cununi cuscan nantifi huacahuun. Fustishta finonmayamacahuun,” ishon man ato yonofiahucai marifi man ascacoinyama. Ascatarocon Moisés yononi cuscan finonmafain man ato huama. Ascano apaifiaquicai tsoan atiroma. Ascafiafoancai maton mucuman ahuashta ato futan man huapaiyama. Ascashu aton nomuran omitsiscafiafoancai man atohuun ramapaiyama.

⁴⁷ ¡Ohua! Diosin mato onaintimacoin. Man mato shunifo nan Diosin tsain yoisimifoi maiafo ano man ahuara toquiri onihuamisi ato shinanshqin. Man asca huafia mato shunifoan ato rutupaonifo.

⁴⁸ Mato shunifo Diosin tsain yoisimifoi rutunifo. Man amisi cuscan huaquin man yorafo ismai nan maton shunifoan apaonifo cuscan huaquin marifi atofu niyoshon man asca huacuana. Ascashufin marifi man rutumitsamisi cuscaraquin. Diosin tsain yoisimifoi maton shunifoan rutunifo. Ascacun maiafo ano man toquiri onanti huaquin fufoa.

⁴⁹ Ascacun Diosin onancoinshon matohuunoa yoiqui isca huani, “Uhuun tsain yoisimifoi yafi uhuun facu fu rafuafo ato yoisharanonfo un ato nichishqui. Ascafia atirifi ato rutufain atirifi ato omitsisca huashcaniran,” ishon Diosin matohuunoa yoini.

⁵⁰⁻⁵¹ Ascacunan icon un mato yoi. Nantifi Diosin tsain yoisimifoi ato rutupaonifo nan Diosin ato onihuacui tau huanitian yafi natian. Ascacun atohuunshon Diosin matoqui nutashquin. Nan Abel rutuqui tau huafain ahuun unutaqui Zacarías nan Dios fu tsainti pushu muranshon cufiti chaimashon man rutunifo. Ascashon nantifi Diospan yorafo chaca huapaonifo cuscan natian man niyoano matoqui nutashon mato omitsisca huaqui finacoinshqui.

⁵² ¡Ohua! Moisés yononi cuscan tapimamisifoan Diosin tsain cununi cuscan onui cafisca man huaa futsafoanri tapisharanonfoma. Mancai Diospan tsain iconra huacoinnoma. Ascashon futsafoanri tapipaifaiton man ato shutia iconra huanonfoma. Ascacufin Diosin fasi mato onaintimaquin finacoinquin, —ishon Jesús ato yoini.

⁵³⁻⁵⁴ Nicacanasu Fariseofo yafi Moisés cunu tapimamisifori fasi aqui sinacoincaquin aqui tsain chipunifo. Fasi ichapafain yocanifo. Ahuarashta amaquiri ato cumaiton nicapaicaquin. Amaquiri ato yoitainano niaifofoquin chanipaicaquin Jesús cunu muran iquimanonfo.

12

—*Fuparamitsapaimisi iyamacahuun, —Jesús ato yosini*

¹ Ascaino yorahunarasi aqui fucani yurui furanifo. Ascaino Jesús afu rafuafo yoiqui isca huani, —Oinfain. Fariseofoan, “Sharaforan,” mato huampaicani. Sharafomafinquin. Sharafa shafain man ica sharafoyamafiacun. Nanfo fuparamitsamisifo. Ascacun ato cuscara iyamacahuun.

² Ascafia ahuarashta onupaifiamisifo nantifi Diosin ato puashoshquin. Ahuarari fomanpaimisifo nanfori ato puashoshquin.

³ Futsafo fomanfain arusu fusti shinanfiamisifo nanfori Diosin ato puashoshquin. Cunu muranshon onushta yoiyafai nanfori ato puashoshquin nantiffain tapinonfo.

Tsoquimain man ratutiroquin

Mt 10.26-31

⁴ Uhuun yorafoan un mato yoi. Mato rutupaiyifoanno ratuyamacahuun. Mato caya fusti rutucaniquin. Asca maton yoshinfocai tsoan ahuusca huatiroma.

⁵ Ascacun atoqui ratuquimarocon Diosiqui ratucahuun. Nantofi mato rutufain maton yoshinfori omitsiscapanacafo muran potatiroquin. Nanno chi urumanhuan matsinacama. Naan icon un mato yoi. Dios fustiquifin man ratutiroquin.

⁶ Ascano tsitsipio mucu fustiti inanmitsashonraca toro rafu fitirofo. Ascafia Diosicai fustishtahuun ointiaquimanima.

⁷ Nan icon un mato yoi. Diosin nantifi tapicoian. Mato foori man tanan huani. Ascasho Upa Diosin tsitsipiofo shinanmisi cuscan fasi mimacaia matohuunoa shinanfafaini. Ascacun ratuyamacahuun. Matocainfin tsitsipio aca finonmacafain Diosin matohuun noiquin.

Tsoan yorafoan ointaifi, —Jesús uhuun Iforan, —huua

Mt 10.19-20, 32-33

⁸ Ascano tsoan yorafoan ointaifi, “Jesús uhuun iforan,” ishon ato yoiyafin uhuun Upa Diosin ahuun oinmatifoan afu nai muran icafoan ointaifi, “Nanfin uhuun yoraquin,” ishon un yoisquin.

⁹ Asca tsoa yorafoan ointaifi, “Jesús uhuun ifomaran,” ishon yoiya nantocai ua iconra huamisima. Nanscarifi huaquin Diospan oinmati afu nai muran icafo ointaifi, “Nancai uhuun yoramaran” un yoisquin.

¹⁰ Tsoan ua chaca huafin Upa Diosin rau huashotiroquin. Asca tsoan Diospan Yoshin Sharaqui tsain chaca huacai rauhuanacama. Aton chaca atohuun nuupacunaca.

¹¹ Ascano ichananti pushu muran mato iyocashon niaifofaan ahuun ointaifi raquirira mato huafiaifoan shinanchacayamacahuun.

¹² Nantianfin Diosin ahuun Yoshin Sharapan mato shinanmatanaino mato tsain chaca huafifo Diospan Yoshin Sharaahuunshon man ato cumasharanon, –ishon Jesús ato yoini.

Yora mafo ichapaya musucoinquin

¹³ Nannoa nia futsan Jesús yoini, –Tapimamisiton, uhuun yora ua yoishohuun nocon upan noco inan cuscan uari pashcashonon, –huaiton.

¹⁴ Jesús cumani, –Uhuun yoran. Uncai tsoa yoimisima futsa pashcashonon. Tsoanricai ua catoanma un ato pashcanan huanon, –ishon yoitan.

¹⁵ Afanan ato yoiqui isca huani, –Ua nicacahuun. Matonama fuchipaiyamacahuun. Ahuara ayafiasion afanan finonmafain fipairiyamacahuun. Mafo ichapayahuunoashucal non unimatiroma. Nocon mafocai nocon ointi unimamatiroma. Nocon mafohuunoashucal non isharatiromaran, –ishon ato yoini.

¹⁶ Ascashon nocofunun ichapayahuunshon Jesús ato ahuara yosini isca huani, –Nocofunu futsa mafo ichapaya ahuun mau ano ahuun yono sharafori ichapaya ini.

¹⁷ Ascacun nan nocofunu mafo ichapayaton shinanqui isca huani, “¿Umun uhuun yonofu ahuusca huaiquin? Uhuun tasha pushufo murancai uhuun yonofu icoinama.

¹⁸ Ascacun uhuun tasha pushufo pucashon un afanan uhuapacoin huai. A muran uhuun yonofu yafi uhuun mafofu icoinon.

¹⁹ Uhuun nomuran un shinanqui isca huai, ‘Uhuun ahuara ichapa iquisi mucushon chipo un tunusharafain ayafain aqui pifain monocain un unimasharacoinniran,’ ” ishon ahuun nomuran shinanni.

²⁰ Ascashon anori shinanfaiiton Diosin yoini, “Mincai ahua tapiama. Na yamutafin min naicain. ¿Min naanomun na min mucuafo ahuuscaiquin?”

²¹ Nanscafin yora ahuara ichapayashon Diosin shinantama imisishaquin. Naashucal afanan ahuaia iquima. Nan ahuuoma cuscara iishquin, –huani.

Diosin ahuun facufo cushushara

Mt 6.25-34

²² Ascaino Jesús afu rafumisifo yoiquin isca huani, –Afanan un mato yoisharanon. Ua nicasharacahuun. Isca huaqui shinanyamacahuun, “Non ahua pimara,” ishon shinanchacayamacahuun. Ahuaricai non sahuuimaran iyamacahuun.

²³ Non ahua pifain non sahuuatocai noco imashatiroma.

²⁴ Shinanapon. Nan puiyafocanai ahua fanayamafain ahua chitunmisifoma ahuaricai fotsuyamafain ahuamafofacun Diosin ato pimamisi. Nanscarifi aquin Diosin matohuun noiquin nan puiyafu aca finonmafain mato cushushara.

²⁵ Ascacun shinanchacayamacahuun. ¿Non shinanchacatocai shafa fusti noco nimayotiromun?

²⁶ Asca shinanchacahuunshoncai ahuaton noco nimayotiroma. Asca ahua futsari shinanchacahuunshon noco imatiroma. Asca ahua shinanchacayamacahuun.

²⁷ Ascashon shinanquiri isca huayamacahuun, “¡Ohuashta! Raniamun un sahuuti finanti sahuushqui,” ishon shinanyamacahuun. ¡Shinanapon! Salomón sahuuti sharashtacoin sahuufiapaoncaicai nan charo sharashtacoinfo cuscarama. Charofoancai yonoyamafain sahuuti icushuima.

²⁸ Diosin charo sharashatacoinfo onihua. Foaisharafia supashon samamashta tsasicun coatirofo. Nanfo finonmacaifain mato noiquin mato sahuuti sahuumashquin. Ascafia mancai icoinra huasharacoinnama.

²⁹ Ascacun shinanquin isca huayamacahuun, “¡Ohuashta! Unmun ahua piishquin uhuun tushuyamaino. Unricai ahua sahuuimaran,” ishon shinanchacayamacahuun.

³⁰ Ascannannori nan icoinra huamafoan shinanchacamisifo. Ahuara pifain sahuupaiyafu fustisi shinanmisifo. Ascannan maton Upa Diosinfin tapiaquin man yopai cuscan. Ascacun mato inanshquin.

³¹ Ascacun Diosicairocon shinanchahuun. Mato yonomapaiyafu cuscan nan fusti shinanfafaicahuun. A cuscara shara ipaicahuun. Nancai shinanquin tau huafafaincahuun. Man ascaiton ahua futsa man yopai cuscan Upa Diosin mato inanshquin.

Diosin icarishon ahua sharafoinfo noco mucushotiro

Mt 6.19-20

³² Ascano uhuun yorafoan ratuyamacahuun. Maton Upa Diosin mato cushushara. Nantifi ahuuna matori inain. Unimacai mato inanshquin.

³³ Maton mafo inanmitsacahuun ahuun rafanan pui fishon yora ahuuomafo inan-shcaquin. Man ascaiton Diosin nan icanoshon mato ahuaara sharacoinfo mucushoni. Nanfocai cuyopacunacama. Coroisin nanfo piquin chacana huayamainocai yomutsori ano iquitiroma ahuaara mato fianshquin.

³⁴ Asca man mafo fusti shinanfainquifin nan fusti man noicain. Ascan man Dioshu-unoa fustisi shinanfainquin nanrifi man yonoshosharafaintiro ahuun noicoingquin. Ascashu man afu isharapacupaitiro.

Iquisi itisharacahuun

³⁵ Ascacun itisharacahuun. Un mato anoashu un chipo nai muran caiquin. Ascafiashu ratoran shafatan iyamarai yamu un matoqui afanan nasoshquin. Yamu yora futsa nocoaiton manaquin lamparina otatiro itisharashon. Asca nanscarifiai itisharacahuun.

³⁶ Oinmatifoan aton ifo fusititan mai futsa ari cano futsafoan a pushu anoshon manasharatirofo. Ascano ifoan nocoshon ato cunaiton yoitirofo, “¡Aicho! Iquiyohuu,” huatirofo.

³⁷ Ascaino Ifoan nocoshon oian ahuun oinmatifo itisharafaanno unimacointiro. Nanforifi a unimatirofo. Ascan un mato icon yoi, Nan ifoan atoqui nocoshon ato pimaquin yoiqui isca huai, “¡Aicho! Fucahuun. Un mato pimapaiquin,” ishon ato yoitiro.

³⁸ Ascashu man rama osha pacuaino iyamarai yamunacucahuanaino iyamarai shafa matsi matsicaino ifo nocoaiton oin ahuun oinmatifo itisharashu fasi aqui unimacointirofo.

³⁹ Ua nicasharacahuun tapishcaquin. Pushu ifoan iquisi itisharashon yomutso yamu ahuuscaraino ahuun pushu muran iquiai tapishocai iquimatiroma.

⁴⁰ Nanscarifiai marifi itisharacahuun. “Iscaino nocon ifo oimaran,” ishon shinanyamacahuun. Ahuuscara atanaino un matoqui nocoriscaiquin, —ishon Jesús ato yoini.

Oinmati rafu futsa ifoan yonoai cuscacoin aino futsa nan yonoai cuscacoin aima

Mt 24.45-51

⁴¹ Ascaiton Pedronun yocani, —¿Ifon, min ahuaarafo yoiai cuscan noco fusti min tapimapai iyamaraimun nantifi yorafori min tapimapaiquin? —ishon yocaiton.

⁴² Jesús cumani, —Man tapinon un mato yoi ahuu cuscaramain oinmati shara itiroquin. Niaifocoin mai futsa ari caquin niaifo patasharinoaton yoitiro isca huaquin, “Uhuun oinmati futsafo ato tushu shafatifi inanhuun. Nanticoin rafu aton pashcanan huahuun,” huafaini catiro.

⁴³ Ascatan niaifocoin afanan nocoshon oinquin ahuun niaifo patasharinoa nan yoia cuscacoin aano fasi aqui unimacointiro. Ascashon nan shara huacointirori.

⁴⁴ Ascacun un mato icon yoi. Nan niaifoan ahuun oinmati yoi, “¡Aicho! Natian nantifi uhuunafo min ua cushusharashotiroran,” ishon yoitiro.

⁴⁵ Ascafia nan niaifo patashari chacapan ahuun nomuran shinanqui isca huatiro, “Uhuun niaifo funa nasoimaran,” ishon shinanquin oinmatifo futsafo nocofunufu yafi aifofofori ato chaca huaqui futsani. Ascashu shafatifi pauncain monoi.

⁴⁶ Ascaino ahuun niaifocoin samamashta nocoriscatiro. Nan oinmati chaca itishararmano ahuun niaifo nocoshon a onaintimai. Ascashon niaifoan oinmati futsafo yonoqui isca huai, “Nan oinmati chaca icoinra huamafoanno potacahuun omitsiscapashanon,” ishon yoishqui.

⁴⁷ Ascan nan oinmati ahuun niaifoan yoia cuscan man tapifiashu ascayamacai itisharayamacun ahuun niaifoan nocoshon a fasi curushcain coshaquin futsai.

⁴⁸ Asca nan oinmati futsa ahuun niaifoan yoia cuscan tapishoma chaca huacun nan icoquin ahuun niaifoan ichapama coshashquin. Nanscarifiai tosa Diosin ichapa tapimana aqui nococun yocaqui isca huai, “¿Un mia ichapa tapimana cuscan man mian nanscacooin aamun? ¿Ascashon futsafori un mia yoia cuscacoin min huashoamun?” ishon yocashquin. Ascacoin huaiyamashu funotiro.

Yorafaancai Jesushuunoa nannorisi shinantirofoma

Mt 10.34-36

⁴⁹ Un nantifi manifesti chaca shatuman yoi un oa. Atirififoan ua icoinra huaifoanno futsafoan ua icoinra huacanima. Nan icoinra huamafo Diosin ato onaintimai. Uhuun Upa Diosin ua mai ano yonomai cuscan natian cuyoa shara icuana.

⁵⁰ Ascafiacun matohuunoashu naashqui un oni. Un nataima iquisi un omitsiscacoinsquin. Ascashu u omitsiscacaini naashquin.

⁵¹ Ascan man shinanmun nantifi manifesti anofo uhuunoashu unimanonfo un oni. Ma. Ascaramafiqui. Un mato yoiai cuscacai tsoan nannorifosi shinancanima. Asca nan ua icoinra huafoan sharafosi shinainfoanno nan ua icoinra huamafoan ahuaara chaca futsafosi shinancani.

⁵² Ascashu pushu fusti muran mucu fustiti icafoan rafutasi ua icoinra huaifoannocai nannorisi atrifiton tsoan shinantiroma. Nanscarifiai rafutan iyamarai rafu non fustifain ua icoinra huaifoannocai nannorifosi atrifiton tsoan shinantiroma.

⁵³ Apa ua icoinra huaino furumun ua icoinra huashma apaqui sinatiro. Ahuan ua icoinra huaino ainfacu ua icoinra huashma ahuahui sinatiro. Ahuun yayan ua icoinra huaino ahuun raru ua icoinra huashma ahuun yayaqui sinatiro, —ishon Jesús afu rafuafo yoini.

Nai foisquin non tapitirohuunoa

Mt 16.1-4; Mr 8.11-13

⁵⁴ Ascaino nannori yorahuanrasi mapoafon afanan ato yoiquin isca huani, —Fari iquiai anori nai choshtacoin foancauaiton oinquin, “Oi fuiran,” man huano. Oi futiro.

⁵⁵ Ascasho manri yoimisi, “Fuu fari cai istafari fasi shana iishquiran,” man huamisi. Ascan nan icon fasi shanacoin itiro.

⁵⁶ Ascafia manca man yoia cuscacoin amisima. Nai foisquin man tapitiro oi fui iyamaraimain fuimacai. Ascafia manca Diosin mato yoia cuscan icoinra huapaima. Natian ahuara ahuuscarai cuscacai man tapiamia.

Tsoan mia chaca huamapaiyai shara huarisca huahuu

Mt 5.25-26

⁵⁷ ¿Ahuuscain mafiri man cayacafi shinansharaimamun?

⁵⁸ Tsoara futsan mato yoiqui isca huai, “Min ua chaca huua cuscan. Un miqui niaifo yoicairan,” ishon mia yoicun. Niaifo ari cataima rufoco shara huacahuun. Man asca huayamacun niaifon mato cunu muran iquimatiro.

⁵⁹ Mato iquimananocai man cainritiroma nifian cuscan nantifi inanshu man caintiro. Nanscarifiai man Dios chaca huamisiquin. Oataima iquisi mato yoia cuscan acahuun mato omitsiscahuanoma, —ishon Jesús yoini.

13

Nocon chaca shatushon Jesús noco amapaiyai cuscan fusti non yopacoin

¹ Nantianri futsafo Jesusqui fucashon yoiqui isca huafu, —¿Tapimamision, man min tapiamun Pilatonun Galilea anofo rafu rutua? Ascashon Dios fu tsainti pushu muran aton imi yafi inafon ahuun imi osia Dios cufiti camaqui huaran, —ishon yoiaifon.

² Jesús ato cumani, —¿Man shinanmun nan Galilea anoa rafutan chaca huaqui fina ahuun caifofon acama cuscan huaquin?

³ Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanaca.

⁴ Man shinanrimun nan dieciocho yorafoqui pushu cuyacoin ahuun anu Siloé atoqui paoinquin atoti rutuni. Nanfoanmun fasi chaca huaquin finacaimisifo nan Jerusalén anofoan acama cuscan finonmafain.

⁵ Ma. Ascaramafinquin. Marifi maton chaca shatutama nan man shinanpaoni cuscasi shinanriaqui Dios icoinra huashuma marifi man omitsiscapanacaran, —ishon Jesús ato yoini.

Huiguera fana fimiomahuunoa Jesús ato yoini

⁶ Ascashon ahuara futsahuunoa ato yoiquin ato tapimanon isca huani, —Nocofunon ahuun mau mamaqui fimi fanani ahuun anu huiguera. Ascan chipo fimimision fii capaiquin oian fimiamia ini.

⁷ Ascacun nan mau ifon ahuun mau cushumisi yoini, “Rafu non fusti fari na huiguera fimiataima. Un ahuun fimi fipaifaino fimiamia. Ascan natian rurahuu. Non ahuara futsa nanno fananon,” ishon yoiaiton.

⁸ Nan mau cushumision yoini, “Ifon un afanan mana futsayononhuun. Afanan na fari fusti non manayonon. Un natian cushusharafain ahuun tapo ano un ahuara futsafo huayonon fimisharanon.

⁹ Nan un asca huainomain fimiqui non oionon. Ipaishoma na fari anaitiano man fimi ya shara itiroquin. Ascan fimiyamaiton min ua ruramatiro, —ishon mau cushumision yoiniran, —Jesús ato yoini

Jesús tunutitian ainfo putoco caya huani

¹⁰ Ascano chipo Israelifon ichananti pushu muranshon tunutitian ato Diosin tsain yoini.

¹¹ Ascashon ato yoiaino nannori ainfo putoco dieciocho fari isinintiani atofu nanno ini. Yoshin chacanun nan ainfo nansca huua. Cayacaficai nimisima.

¹² Nannoa fuchishon Jesús yoini, —Ainfoshtan, natianfin min cayaiquin, —ishon yoitan.

¹³ Ahuun mucuman manmainno samamashta cayacafi ninacahuani. Ascatan, —¡Aicho! Diosin ua cayahuaquin. Dios fasi shararan, —ainfoan huani.

¹⁴ Ascafiaino ichananti pushu murannoa niaifo fasi sinaquin ato yoini, —Seis shafatan non yonotiro. Ascan na shafata tunutitiancai tsoa cayayotiroma. Cayapai shafa futsan otiro cayashquin, —ishon ato yoini.

¹⁵ Ascaiton nocon Ifo Jesús a cumaquin isca huani, —Manfin fuparamitsamisifoquin ¿Asca marmun tunutitianfiacun maton moi iyamarai burro man tuputiro unu ano iyoquin ayanonfo?

¹⁶ Ascano na ainfofin nocon caifoquin. Abraham ahuun funa. Satanashuunoashu dieciocho fari putocoa. Cayacafi niisharamisima. ¿Asca ahuuscaimun un tunutitian na ainfo cayahuatiromaquin? —ishon Jesús yoiaiton.

¹⁷ Nicacani Jesús noicasmaifo fasi rafipaicaquin tsoan cumanima. Jesús ahuaa sharafo huaiton oincani atirifo aqui unimacoinnifo.

Mostaza ushuuunoo Jesús ato yoini

Mt 13.31-32; Mr 4.30-32

¹⁸ Ascaifoan Jesús ato yocani, —¿Ahuu cuscaramun Diosin ahuun yorafo nantifi ato iquifain ato yonotiroquin? ¿Ascan ahua futsarimain Diosin ahuun yorafo cuscaraquin? Un mato tapimai.

¹⁹ Nocofunun ahuun pushu umainti mostaza ushu fanani. Asca foaica ihui tio ica. Puiyaho ahuun tushpahuu tsoafo. Nanscarifiai Diosin ahuun yorafo tauí fustirasi ifiashu chipo paratama caitioran, —ishon ato yoini.

Misi farashatihuunoo Jesús ato ahuaa futsa yosini

Mt 13.33

²⁰ Afanan Jesús ato yocaquin, —¿Ahuu futsamun Diosin nantifi iquina cuscaraquin? Un mato tapimai.

²¹ Diosin ahuun yorafo nantifi ato iquifain ato yonotiro cuscan un mato tapimai. Ainfoan farashati ichapamashtaya harina osishon camisonano farashuinitiro. Nanscarifiai Diospan yorafo taucani fustirasi ifiashu paratama itirofo. Ascashu icoinra huamafo muran ishon ato shara huaino atirifiton ahuunshori icoinra huatiroforan, —ishon Jesús ato yoini.

Caincaiti atsoshtahuunoo Jesús ahuaa futsa ato yosini

Mt 7.13-14, 21-23

²² Ascashon Jesús pushurasiti ano yoifoni Jerusalén ano nocopaiquin.

²³ Ascaiton futsan yocani, —¿Ifon, fustiraitomun aton chaca soacaniquin Upa Dios fu nipashcaquin? —ishon yocani.

²⁴ Ascaiton Jesús ato cumaquin isca huani, —Uhuun Upa icanocai atirifi iquitirofoma. Ascacun nan un mato yoiai cuscacoin nantifi huacahuun. Nan fai atsoshta tanashcaquin. Ascashon marifi Diosin tsain tanasharacoincahuun iquisharashcaquin. Yora ichapafao iquipaifiacanicai iquitirofoma.

²⁵ Nan pushu Ifo Diosin ahuun cunu fupoti fupoanocai tsoashta afanan iquitiroma. Ascacun chifi nishon yoiqui isca huatirofo, “Ifon, noco cunu fupushohuun. Min icano non canon,” huariacani. Tuyuyun ifiaifoancai ato fupushotiroma. Fuputama ato yoiqui isca huatiro, “Mancai uhuun yorafoma,” ato huafiaino.

²⁶ Yoicaquin “Non mi futan pifain ayafain huamisi. Min noco yosiaino,” ishon yoishquicani.

²⁷ Ascafiifoan afanan ato cumaquin isca huashquin, “Mancai uhuun yorafoma. Uncai matofu rafumisima. Manfin chaca huamisifoquin. Ascacun umaquinoashu fotacahuun,” ishon ato yoishquin.

²⁸ Ato asca huaino nannoashu uaicani omitsiscasai futsushceni. Dios fu rafuafao Abraham non Isaac non Jacob non nantifi Diosin tsain yoimisifo Dios fu icafo oin atoqui capai man fasi uaiqui. Yoishquin isca huaquin, “Ahuuscashucaí non catioma. ¡Ohua! Ahuuscain un Dios nicascamamisishaquin. Un omitsiscapanacaran,” ishon man yoishquin. Man ascafiaiton Diosimaquishon mato potashquin.

²⁹ Ascaino manifesti anoashu Diosin niaifoan ahuun yorafo iquina ano nococanashu afu unimashceni. Ascaifoan Diosin ato yoiquin isca huashquin, “Uqui fucahuun. U fu ipasharashcaquin,” ishon Diosin ato yoishquin.

³⁰ Shinancapon. Futsafocai natian Diosin ahuun yorafoma. Chipó icoinra huacanashu ahuun yora ishquicani. Futsafoan man Diosin tsain nicafiamisishaquin tsoa asca-coinyafoma. Afocai afu itirofomaran, —ishon Jesús ato yoini.

*Jesús Jerusalén anoafohuun ramapai uaini**Mt 23.37-39*

³¹ Nantianri Fariseofo Jesusqui fucashon yoinifo, —Nunoashu mai futsa ari cariscatahuun. Nan niaifo Herodes mia ato rutumapai oiquin, —huaifoan.

³² Jesús ato cumani, —Nan onanya yoitacahuun. “Uncai nunoashu funa caima. Na shafata yafi shafa futsa un yorafo yoshin chaca atohuun nua un ato caya huafain isinin-caifori un ato cayahuayoi. Uhuun yonofono anaítitan nan un nocopai ari un nocoicai.

³³ Un natian uhuun Upa ua yonoa cuscan nan fusti un yonoyoi nan un naitian. Man man tapia Diosin tsain yoimisifo Jerusalén anoshon fusti ato rututirofo.”

Jerusalén anoafohuunoashu Jesús uaini

³⁴ ¡Ohua! Jerusalén ano icafoan. Manfin Diosin tsain yoimisifo rutufain nan Diosin matogui nichian futsafori man toquirinin ato tsacaqui nanonfo. ¡Ohua! Tacaranun ahuun facufo ahuun pui naman onutiro cuscan huaquin un mato yafi mato yorafo cushupaifa mancai ua nicapaimisima. Manricai uqui fumisima un mato cushunon.

³⁵ Ascan natiancai tsoan mato cushuima. Diosiricai afanan mato cushuima. Ascacuai man ua afanan oinnacama Diosin matogui nichian un nai murannoashu oaitian. Man yoiqui isca huaino, “Diosin nocoqui nichian fasi shara finacaia. Upa Diosin a shara huapanacaran,” ishon man uhuunoa yoishquin, —ishon Jesús ato yoini.

14*Jesús nocofunun ahuun poyan rafu yafi ahuun quishi ocuma rafuri quiharashica caya huani*

¹ Man ascano chipo Fariseo niaifoan ahuun pushu muranshon Jesús tunutitian pimani. Ascaino yora futsafori afu pushu muran iquinifo. —Jesusmain ahua huaicain non oinnon, —icanashu.

² Ascaino nannori nocofunu poyan rafu farashicain quishi rafuri farashiqui futsua. Ato fu iquia oincaquin atirifoan shinannifo, —Jesusmain cayahuaicain non oinnon, —ishon.

³ Ascaiton Fariseofo yafi Moisés cunu tapimamisifo Jesús ato yocani, —¿Tunutitianmun non ahua ahuusca huatiroma? ¿Moisés cununi cuscan tunutitian non yora caya huatiromanmun? —ishon.

⁴ Ato yocafianocai tsoa puusinima. Ato asca huatan a isinincai Jesús mutsoano cariscan. Ascacun Jesús a nichini.

⁵ Ascashon Jesús ato yocani, —¿Rato man futsamun tunutitian maton facu futsa iyamarai maton moi mai quini muran pacucun man ihuirisca huatiromaquin? —ishon ato yocaino.

⁶ Tsoa puusinima.

Nocofunun yafi ainfo fianaintian piitirofohuunoa ato yoini

⁷ Ascashon Jesús oinni shafacafi tsaopaiyaifoan —Noco oinsharanonfo, —icanashu. Ascaifoan oinquin Jesús ato yoini, —Ua nicasharacahuun un ahuara futsa mato yoi man tapinon.

⁸ Tsoan mato piimaino pushu ifo tsoano tsaoyamacahuun. Un tsoa cuscaramaran ato huamapaiyacahuun. Min pushu ifo fu tsaoaiton mia yoitiro, “Nuno min tsaotioma yora futsa nuno tsaoyoi. Nan mia finoncoian. Ascan minfin futsano tsaotiroquin.”

⁹ Aton ointaifi pushu ifoan mia anori acaino min fasi rafipaicai. Shararcoai min pasotain tsaotiro.

¹⁰ Ascan ifoan mia tsaopaiquin a chaima mia cunatiro. Mia asca huaiton oinonfo a mia shara huai cuscan.

¹¹ Ascan tsoa oinanpaimisi chipo Diosin ismashquin acai ahuacuma. Ascan tsoa oinanpaimisima naanfin yorafoan ointaifi Diosin yoitiro isca huaquin, “Ua chaima tsaoyohuu. Ufu nipashquin,” ishon yoishquin, —Jesús ato yoini.

¹² Ato asca huatan nan pimai Jesús yoiqui isca huani, —Min yorafosi yafi yora mafa ichapayafo pimapaiquin nanfosi cunayamahuu. Nanfoanri mia copiquiri aton pushu anoshon mia piimacani.

¹³ Ascatamarocon man yorafo man pimapaiyai cuscan a yora ahuomafo yafi yora nipaiqui ranainfo non a fushofori piimacahuun.

¹⁴ Nanfoan mato copiquiri shara huapaifaquicai atirofoma. Ascashu man Dios icari nococun man ato shara huaiton oian cuscan Diosin nantian mia shara huacoinshquiran, —ishon Jesús Fariseo yoini.

Nocofunun tushu sharacapacoin yorafo pimapaiyaihuunoa Jesús ato ahuara futsa yosini
Mt 22.1-10

¹⁵ Futsan sapa ano tsaoshon Jesús yoini, –Ifon, Upa Diosin nantifi yorafo iquinaí ano atofu iquishu fasi ipasharashquiran, –ishon yoiáiton.

¹⁶ Jesús cumani, –Nocofunu futsan tushu ichapa itishara huashon yora ichapafo chani huani a futan piishquin.

¹⁷ Ascano man itishara huashon ahuun oinmati nichini ato yoitanon. Yoiqui isca huani. “Nan un chani huafó ato yoi foanfaintahuun isca huaquin, ‘Man nantifi itishara huaqui. Fucahuun,’ ishon ato yoitahuun,” huani.

¹⁸ Asca huano caashon ato yoiáiton, “Un cayotiromaran,” ishon yoipacunifo. Futsan yoiquin isca huani, “Un rama mau fia. Natian un mau ari capai oincai. Ascacun un mia yoi un ari cayotiromaran,” ishon yoini.

¹⁹ Futsanri yoiqui isca huani, “Un rama moi rafurasi nushua mucu fustiti un fia. Un natian ato yonomapai yonosharacanimainquin un ato oinpai. Ascacun un ari cayotiroma mi futan piishquin,” ishon yoini.

²⁰ Ascano futsan yoiquiri isca huani, “Un rama ainfo fia. Ascacun un ari cayotiroma mi futan piishquin,” ishon yoini.

²¹ Asca huaifoanno oinmati ahuun ifo ano nasoshon nan yoiáifo cuscari yoini. Ascaciton nicai pushu ifo atóqui sinacoinni. Afanan ahuun oinmati nichiqui yoini, “Natian pushurasi ano fáifoti ano cariscatahuun yora ahuuomafó yoifain nípaiqui ranainfo yoifain fushofori yoiriscatahuun un ato pimanon,” ishon yoini.

²² Asca huano afanan cashon nan yoiá cuscacoin ahuun oinmatinin huashotani oi. Naso cura ahuun ifoquí oshon yoini. “Ifon, mian yoiá cuscan mun ato yoiá. Ascacac natian man fucani. Ascafia min pushu fospicanima. Tushufori tushuiran,” huaiton.

²³ Pushu ifoan afanan yoini, “Afanan fai futsafó ari cariscatahuun ua ato yoishoshquin funonfo. Ato yoihuu isca huaquin, ‘Uhuun ifoan pushu ano nitutama furiscacahuun mato pimapaiquin,’ ishon ato yoitahuun uhuun pushu fospi funonfo.

²⁴ Nan yorafo un tau huaqui ato pimapaiyafóancai u futan pinacafoma,” ishon pushu ifoan yoiniran, –Jesús ato huani.

Cristo tanapaiyora itisharatiroquin omitsiscashoshquin

Mt 10.37-38

²⁵ Yorahuanrasi afu foaifoan. Ifiacucahuan ato yoini,

²⁶ –Tsoan ua finonmacaifain apa yafi ahua non ahuin non ahuun facufo non ahuun yorafo non poifo afiri noiashucaí ua tanamisi itiroma.

²⁷ Ascacac unfin mato ihui coyán iquinanqui nashoshquicain. Ascafia tsoan yoiqui isca huaima, “Natian un Jesús tana. Ascacac nai omitsiscafiaquicai un shinanchacaimaran,” ishon tsoan anori yoicasmái acái ua tanamisi itiroma.

²⁸ Nanscarifiai tsoan pushu huapaiquin iquisi shinanyotiro ahuun pui itiromainquin.

²⁹ Ascano pui iyamaitocai pushu huatiroma. Quishifo fusti nichiano yorafo aquí cashutiofo.

³⁰ “¡Cuul! ¡Oincapon! Na nocofunun ahua huatiroma. Ahuun quishifo fusti nichian. Pushu anaitima. Ascacaracai sharamaran,” icashu aquí cashutiofo. Nanscarifiai nan man naitian ua tanacahuun. Nan man naitian ua tanapaiyamaquin “Un Jesús tananon,” iyamacahuun.

³¹ Nanscarifiai niaifo rafu noconain aton ranushumuafó rutunanonfo. Futsa diez mil ranushumuafó aya icaino futsa veinte mil ahuun ranushumuafó ya. Ascacac nan diez mil ranushumua ayaton iquisi fasi shinainyotiro ahuuscamin acanicain.

³² Ascacac afu niaifo tsain fomayotiro isca huaqui, “Non rutunainmaquin. Nanscanon. Min noco rutuyamacun min fipaiyai cuscan mia inantiroran,” icashu raunantirofo.

³³ Nanscarifiai ratoranfoan uhuunshon nantifi ahuunafo potayamashucaí ua tanamisi itiroma.

Sao sharacunma non fipaitiroma

Mt 5.13; Mr 9.50

³⁴ Ascacac shinacahuun. Sao sharacun non tototiro. Asca sao sharamacai non tototiroma. Chacacac.

³⁵ Nanscaracai tsoanshta yopaima. Potacani. Nanscarifi aquí tsoan uhuunshon ua tanasharayamacai uhuun nuusharaima. Chacacoin iqui. Tsoanmain man pafiqui sharayaquin ua nicasharacahuun, –ishon Jesús yoini.

15

Chashoan cushumisitón ahuun chashoan funoa fuchiahuñoa Jesús ato ahuara futsa yosini

Mt 18.10-14

¹ Asca nantiantanri niaifo puifishomisifo yafi yora chaca huamisifo aqui funifo ahuun tsain nicai fucani.

² Ascaino Fariseofo yafi Moisés cunu tapimamisifo Jesusqui tsain chaca huaquin yoinifo isca huaquin, —¡Oincapon! Jesús yora chacafo fu rafutiro ato futan piaiton, —ishon yoinifo.

³ Ascaifoan onanshon Jesús ato yoiqui isca huani ahudara futsa ato tapimanon,

⁴ —Ratoran man futsa cien chashoan ayafiano fustishta amaqui funoano atirifi nan noventa y nueve fasi fununun man potayofaintio. A fusti funoa funaiyoicaqui nan man fuchiaitian.

⁵ Ascano fuchishon unimacain chishtoinifoan man iyafaintiro ahuun pushu ano foi caquin.

⁶ Asca huatan ahuun pushuano nocoshon man atoti chanihuai a chaima icafo yafi afu rafuafo ato cunaqui isca huatiro, “U fu unimai fucahuun. Uhuun chashoan funoa mun fuchiaquin,” ishon man ato yoitiro.

⁷ Ascacun un mato yoi nanscarifiai futsan ahuun chaca shatucoianshu afanan ipaoni cuscan atama Dios ifoacoinna oincani nantifi Dios icanoafo fasi unimacoinceni. Noventa y nueve yora sharafo nanfocai tsoa Diosqui nasoima manmain tanasharacanashufin. Ascan nanfoqui unimafacani nan chaca huamison Diosin icoinra huanocaifin fasi aqui unimai finacoincaniquin.

Ainfoan ahuun toro funoa fuchiahuunoa Jesús ato ahudara futsa yosini

⁸ Nanscarifiai yainfo futsa mucu rafuti toro paratamacoin ahuun pui nuua aya ini. Pushu muran fusti funoni. Ascano lamparina otani ahuun tapa ano matsoyanan funashquin. Ascashon funariaquin fuchini.

⁹ Fuchishon ahuun yorahuafo yafi a chaima icafo cunashon ato yoiqui isca huani, “Uhuun yorafoan ufu unimacahuun. Uhuun toroshta mun funofashon natian mun fuchiaran,” ishon ato yoini.

¹⁰ Nanscarifiai tsoan ahuun chaca shatuashma man funoa. Ascafashon Diosin icoinra huaino Diospan oinmatifo nai murannoashu fasi aqui unimacoincaniran, —ishon Jesús ato yoini.

Apa furu rau huaa cuscahuunoa Jesús ato ahudara futsa yosini

¹¹ Afanan Jesús ato yoiqui ahudara futsa ato tapimaquin isca huani, —Nocofunu futsa facu rafu ya ini.

¹² Ascano chipocuton apa yoini, “Upa, nan naaquin mian inanfainonpacoai natian iquisi ua inanhuun,” huani. Ascaiton apan ahuun pui cashcu futsa ahuun facu chipocu inanni.

¹³ Ascano shafa ranan finontan ahuun facu chipocuton nan apa inan cuscan nantifi ahuun rafanan pui fiananan huani. Asca huatan mai futsa chaicoi ari cani. Nanrishon ahuun pui shafatifi potani monocain pauncaiyainfo furomafo fu icaí.

¹⁴ Asca huaqui nantifi ahuun pui potaquin anaitini. Ascashon nantianri a mai ano tushu yamacoin ini. Ascashu arifi chipo tushu yamaino fasi fonicoinni.

¹⁵ Ascano nan mai ariashu nocofunu futsa ano cashon yono yocaqui isca huani, “Un mia yonoshopairan,” ishon yocani. Ascaiton pushu ifoan nichini yahuarasi faasi funununshon pimanon.

¹⁶ Ascashon yahuarasi maropa ahuun shacafo pimani. Ascaino nantian fasi fonicoi-quin arifi piqiu rashquini. Tsoancai a pimanima.

¹⁷ Ascaquicai nan chaca shinanpaoni cuscan afanan shinanpainima. Nantian piyacafi shinanquin isca huani, “¡Ohua! Uhuun upa ahuun oinmatifoan natian man piisharafo. Aton tushufori man tushu huafo. Asca unfin nunoashu fonicoi naicain.

¹⁸ Asca natian un afanan uhuun Upa ari cai. Nocoshon uhuun upa un yoitiro isca huaquin, ‘Upa, un Dios chaca huafain miari chaca huamisi.

¹⁹ Ascan uncai natian min facu cuscara itiroma. Natian min yonoshomisi cuscara un itiroran,’ ishon uhuun upa un yoishquin.”

²⁰ Nannori shinantan apa ari cani.

Ascashu caiton chai cunoa apan ahuun facu fuchini. Fuchitan fasi ahuun ramapaicoi aqui ichoni. Aquí nocoshon icoacufoan tsoatoshini.

²¹ Ascaiton apa yoiqui isca huani, “Upa, un Dios chaca huafain miari un chaca huamisi. Asca un afanan natian min facu cuscara itiromaran,” ishon yoifaino.

²² Apan ahuun oinmati yoini, “Ichoriscatahuun. Sahuuti sharacapacoin yafi anio fifain sapatori firiscatahuun. Uhuun facu ua sahumashoshcaquin.

²³ Ascashon moipan facu shoa sharari ua rutushocahuun uhuun facu un pimanon. Noco sharano non fasi aqui unimanon.

²⁴ Uhuun facu man naa shinantsa amisishaquin afanan man nasoaquin. Natian afanan ufu nuno nia. Man funofiani natian afanan man non fuchiaquin. Non ichananon nantifi aqúi unimaquin pifain non mononon. Noco manutifo non manunon,” ishon apan yoini.

²⁵ Ascaino iyoa mau ano yonofaiashu nasoaqui pushu chaimashon nicani fasi manuti manuaino monoaifoan.

²⁶ Ascaiton nicaquin ahuun oinmati cunashon yocani, “¿Uhuun upa pushu anoshon ahuá huacanimun?” ishon yocaiton.

²⁷ Ahuun oinmatinin yoini, “Min ushto rama nocoano min upa fasi unimacoinquin ato ichanan huáa moipan facu shoa shara ato pimafain manuti manufain ushto ahuuscatama noco sharano unimaquin upa aquiran,” ishon yoini.

²⁸ Ascaiton nicai iyoa fasi sinacoin pushu muran iquinima. Ascaino chifi catan apa ahuun facu iyoa yoini, “Upashtan, pushu muran iquiyopun. Min ushto rama noco sharaquin,” ishon yocaiton.

²⁹ Cumatama apa yoini, “Shinanpon. Un fari ichapa min oinmati cuscara un mia yonoshomisi. Ascashu min ua yoiai cuscacoin un huamisi. Uncai yoitimamisima. Ascafi-acucai mian chashoanun facu rutushomisima uhuun yorafo fu un ichanashon unimaqui un pinon.

³⁰ Asca min facu chipocu min inan cuscan nantifi man pota. Ainfo furomafo fu iqui. Ascafiashu afanan miqúi nocoaino unimaqui min a moipan facu rutushonaran,” apa huaiton.

³¹ Apan yoini, “Upashtan, miancai potamisima. Min ufu iitiani. Nan uhuunafofin minariquin.

³² Ascafia min ushto man naa shinantsa amisishaquin natian man noco shara. Man funofiani man non afanan fuchia. ¿Asca ahuuscacumun non ichanainmacain aqúi unimashquin?” ishon apan furu iyoa yoini, —ishon Jesús yoini.

16

Niaifo patashari ahuun niaifocoinin yoia cuscacoin anima

¹ Ascatan Jesús afu rafuafo yoiquin isca huani, —Nocofunun futsa mafo ichapayaton ahuun oinmati futsa niaifo patashari huani. Ascashon chipo nica ahuun oinmatinin ahuunafo cushusharashocuma.

² Nicaquin cunashon yocani, “¿Ahuuscái uhuunafo min cushusharamisimamun? Natian min afanan uhuun niaifo patashari iquima. Asca nantifi uhuun cunufu ua nifiafo ati shara huashohuun. Ahuutimain ua nifiafoquin ua ismashquin,” ishon ahuun niaifoan yoini.

³ Asca huaiton nicaquin ahuun oinmatinin shinanni, “¡Ai timafin! ¿Unmun natian ahuuscaiquin? Uhuun niaifoan ua pota. Uncai afanan a yonoshonima. Unfin nan papio fusti yonoqui fuya huamisiquin. Uncai curushcain yonotiroma un mau huapanan. Unricai yocacamisí ipaima. Un fasi rafiapaitiro.

⁴ ¡Airai! Natian mun shinanshara. Ratoran futsafoan uhuun niaifo ichapa nifiafo un aton shucashopacufoanni ichapama nifinonfo. Un ascaino uqui unimanonfo. Uhuun niaifoan ua potafiaino nan futsafoan ua shara huatiroforan,” ishon shinanni.

⁵ Ascatan nan niaifo nifiafoti cunani. Ascaino futsa taui aqúi ocun yocani, “¿Uhuun niaifo ahuuti min nifiamun?” ishon yocaiton.

⁶ “Ocho cientos galones de shuni un nifiaran,” huaiton. “Min papio futsaqui ahuu. Cuatro cientos galones de shuni cunuhuu,” ishon niaifoan ahuun oinmatinin futsa yoini.

⁷ Ascaino nan nifian futsari aqúi ocun yocani, “¿Uhuun niaifo ahuuti min nifiamun?” ishon yocaiton. “Cien forusa trigo un nifiaran,” huaiton. “Min papio futsaqui ahuu. Ochenta forusa un nifiaran, ishon cunuhuu,” huani.

⁸ Ascano niaifoan ahuun oinmatinin acai cuscan oinquin yoini, “Minfin fasi onaian-coianquin. Min aca cuscan futsafoan mia shara huacanimun,” ishon yoini. Ascán nan icon nan icoinra huamafoan fasi tapicoianfo yorafo parashcaquin. Nanfoan tapia cuscaí nan ua icoinra huafaan tapiafoma. Ascafia nan icoinra huafaancaí tsoa parapaitirofoma icocoin fusti yoitirofo.

⁹ Un mato yoinon isca huaquin. Man pui ayashon nan Diosin tanamisifo yopaifoan ato inancahuun. Man ato shara huacun mato noinonfo. Ascafia naashucaí afanan man pui yopaima man Dios ari nocoaiton nan man pui inannifoan mato yoiqui isca huatirofo, “¡Aicho! Min ua shara huamisi. Natian min nocofu Dios ari nocoá. Noco fu ipahuun,” ishon mato yoitirofo.

¹⁰ Ratoran futsa ichapama ayafiashon nanshtahuunshon nan icaiti ahuunshon fisharashori ichapayashon nanscarifi huatiro ahuun fisharaquin. Parashquima. Ascan ichapamayafiashon ahuun rafanan fisharashoma parain. Nanscarifi huaqui ichapayafiashon fasi finacaiqui ahuun rafanan fisharashoma paratiro.

¹¹ Ascacun nuno mai anoashu man aya cuscan afohuunshon man shara huamaqui man pota. Diosiri mato inanpaiyai cuscacai mato inantiroma. Matoricai icoinra huatiroma. Mato inanpaiyai cuscan nanfori man potatiro.

¹² Nanscarifi futsana man cushusharayamaiton. Tsoan mato inancointromun matonacoin inon.

¹³ Ascano oinmatincai ahuun ifo nanno rafu nantian yonoshotiroma. Futsa noifain futsa noicasmatiro iyamarai futsa nan yoia cuscacoin huashotiroma. Ascashon futsa, "Nacai ahuamaran," ishon shinantiro. Tapicai huatiroma ratocaimain nicasharaiquin. Nanscarifi Diosin yonoshopaiquicai man pui noitiroma maton ifo inon, —ishon Jesús yoini.

¹⁴ Nan Fariseofan pui noiaifohuunoa Jesús ato yoiaiton nicacani aqui cashupaiqui yoinifo. —¡Cuul! Ahuomafiahon noco yoiran, —icaifoan.

¹⁵ Onanshon Jesús ato yoini, —"Nafotin sharafoquin" man yorafo huamapaifaiton Diosin man mato onan. Manfin yorafo paratiroquin "Nafotan shara huacaniquin," ishon yorafo man shinanmapaifaiton Diosin man mato onancoinshon ahuun nomuran shinain, "Nafotan fasi chaca huacaniran," ishon Diosin matohuunoa shinain, —ishon Jesús ato yoini.

Moisés cununi cuscan yafi Diosin nantifi ahuun yorafo iquinaí cuscan

¹⁶ —Moisés Dioshuunshon cununi cuscan yafi Diosin tsain yoimisifoan cununifo cuscacoin Juan nocoaitian futsafoan mato yoimisi. Juanpan tsain shara futsa noco yoiquin tau huaquin isca huani, "Diospan Furun matoqui chipo oi. Ascacun maton chaca shatuhahuun. Man ipaoni cuscan afanan ascayamacahuun. Natian Dios fusti shinancahuun," mato huamisi. Urifi un mato nannori yoimisi. Asca tsoan ascaran shinancanashu Dios niaifo ari iquitirofo. Nan fusti shinanshu Diospan yora itirofoquin.

¹⁷ Diosin yonoa Moisés cununi cuscacoinashu non icoinsharanon. Noco yononi cuscacai non unutiroma ahua sharafo huaquin. Mai yafi nai cuyotirofiashucai Diospan tsain cuyopacunacama.

*—Funun ahuin unuyamaino ainfoanricai funu unutiromaran, —ishon Jesús ato yoini
Mt 19.1-12; Mr 10.1-12*

¹⁸ Ratoran futsan ahuun ahuin unuquin futsan fiishquin man chaca huai ahuun ahuincoinnafu icaino. Ainfon ahuun funu man unuquin futsan fiishquin arifi man chaca huai ahuun funuconnafu icaiton, —ishon Jesús ato yoini.

Nocofunu mafo ichapa yafi Lázaro ahuuomashta ini

¹⁹ Ascashon afanan Jesús ato yoiqui isca huani, —Nocofunu futsa mafo ichapayatton sahuuti mapash sharacoin sahuufain tushu sharacapafo shafatifi pisharamisi.

²⁰⁻²¹ Asca futsan ahuun anu Lázaro nocofunu mafo ichapayatton ahuun cunu caincaiti ano tsaoni. Yoratishon coyoashu tsaocun pashnan aqui oshon ahuun coyo ano tashoni. Ascaino Lázaro ahuuomaton shinanni, "Na nocofunu mafo ichapayatton man tushu huua ua inanpainonrati," ishon shinanni.

²² Ascashu Lázaro naani. Naacun Diosin oinmati afu nai muran icafoan ahuun yoshin Dios icari iyonifo. Nannori Abraham ica ini. Ascashu nan mafo ichapayari arifi naacun mai huanifo.

²³ Ascano omitsiscapanacafo muran cashon nan mafo ichapayatton Abraham yafi Lázaro foisquin oian icafo ini. Arishon chii isin tunuyamacaquin cunani.

²⁴ "Uhuun Upan, Abraham, uhuun ramapaihuu. Ua Lázaro nichishohuun. Ahuun mutotinin ua ana muchana huanyonon. Un nunoshon chii isin tunuimaquin," ishon cunaiton.

²⁵ Abraham cumani, "Upan, min shinainmamun min mai anoashu isharapaoni. Asca Lázarofoin omitsiscapanaiquin. Asca natianfin Lázaro man isharaquin fasi unimasharacoinquin. Asca minfin natian fasi omitsiscaquin.

²⁶ Mia ari capaifiaicai non ahuuscashu catiroma. Mirificai min ahuuscashu nuno nocoqui otiroma. Manhuanhuan rafutan noco naquihua. Tsoan finontromaran," ishon Abraham yoiaiton.

²⁷⁻²⁸ Afanan cumani, "Upa Abraham, unfin mucu fustiti yora yaquin. Asca Lázaro ato ano nichihuun ato Diosin tsain yoiaiton nicacoinonfo nuriashu omitsiscacai futirofoquin," ishon yoiaiton.

²⁹ "Nanfofin man ayafuquin Moisés futan Diosin tsain yoimisifoan cununifo cuscan huafainfin afi ointirofoquin," Abraham huaiton.

³⁰ “Ma. Upan, yora naashu funiaton uhuun yorafo yoiaitofin nicatirofoquin. Ahuara chaca huamisifo cuscan shatutiro Dios icoinra huashcaquin,” ishon yoiaiton.

³¹ “Ascan nan Moisés cununi cuscan nicayamafain Diosin tsain yoimisifoan yoiaiton nicayamashomun nan ratoran futsa naashu funiaricai icoinra huatirofomaran,” ishon Abraham yoiniran, —ishon Jesús ato huani.

17

Non chaca huaino fasi musucoin

Mt 18.6-7, 21-22; Mr 9.42

¹ Asca huatan Jesús afu rafuafo yoini isca huaquin, —Ahuarafoan mato chaca huama-paifafainshcani. Ascafia nan futsa chaca huamafocafin fasi omitsiscai finacoinshe-caniquin.

² Ascashon ua icoinra huafuna futsan chaca huamai nancaifin fasi onaintimaquin finacoinquin. Ascacun chaca huamataima toquiri ya tunushushon noacoin muran potafin shara icuanaquin.

³ Asca oinfain. Tsoan futsa chaca huamaino fasi musucoin. Mi futan tanamisi futsan mia chaca huaiton rauhuahuu afanan mia asca huanonma. Ascashon min yoiaiton nicaquin yoinon isca huaquin, “¡Ohua! Ua rauhuahuu. Un afanan ascaran chaca huanonma,” ishon mia yoiaiton a rauhuahuu.

⁴ Nan shafata fusti mia chaca huaquin ichapa huafishon nan chaca huati mia rauhua-pairiaiton rau huafafaincahuun, —Jesús ato yoini.

Non icoinra huaiton Dios noco ahuamamishti huashotiro

⁵ Asca huatan afu rafuafoan Jesús yoinifo, —Ifon, non mia fasi icoinra huapaiquin noco finonmafain icoinra huamahuu, —ishon yoiaifoan.

⁶ Jesús ato cumani, —Nan mostaza ushu uhuapamashatocoinfiashu foaicano uhuapacoin yositiro. Nanscarifiai tui man ua icoinra huashon uhuun tsain man tapisharayotiroma. Chipo uhuun tsain maton nomuran man nanucoinshon ihui uhuapa ahuun tapofoya tsucucain “Ununhuan muran pacuhuu,” man huaino a muran afanan fanainacahuan man yoia cuscan atiro.

Ahuun oinmatinin ifoan yoia cuscacoin ashotiro

⁷ Ascacun tsain futsa un mato yoinon. ¿Man oinmati yashomun mato maumamaqui oro yamaraquin chashoanfo cushuashu yatashta pushu ano nasoaitomun ahuun ifoan yoitromun? “Piyohuu,” huatromun.

⁸ Ma. Ascarama. Asacatarocon man yoitiro isca huaqui, “Ua pichashoniyohuu. Ascan man icun mian yoitiro un picanon. Mun piqui anaitiano min chipo pitroran,” ishon man oinmati yoitiro.

⁹ ¿Asca ahuun oinmati nan yoia cuscacoin aino ahuun niaifoan yoitiro “¡Aichoran! Min fasi shara huaran,” ishon yoitromun? Ma. Afi tau huafaincai acama. Ahuun ifoan yonoa cuscan huua.

¹⁰ Nanscarifiai Diosin mato yonoa cuscacoin aquin marifi yoicahuun isca huaquin, “Noncai ahuama. Nofi tau huafaincai non acama. Nocon Ifoan noco yonoa cuscan non acaran,” ishon yoicahuun, —Jesús ato huani.

Jesús mucu rafuti nocofunufu aton nami tocoi futsua cayahuani

¹¹ Jerusalén ano caaquin Jesús nan fai Samaria yafi Galilea shatsocamun rafu finonfaini.

¹² Ascashu pushurasi ano nocoano mucu rafuti nocofunufu aton nami tocoi futsuafo aqui noconifo.

¹³ Ascatan ato chaima caiton oi ashcafinin cunanifo, —Nocon Ifo Jesús, nocohuun ramapaihuu, —huaifoan.

¹⁴ Ato oinquin Jesús ato yoini, —Diosin yoimisifo ano fotacahuun. A man cayashara ato ismashcaquin, —ato huaino focani cayariscatanifo.

¹⁵ Ascaino fustiton mua man caya sharashu afanan Jesusqui naso curan oi ashcafinin yoini, —¡Aicho! Dios shara. Ua cayahua shararan, —ishon yoini.

¹⁶ Ascatan Jesús naman fuopacucahuan, —¡Aicho! Jesús, min ua cayahua. Min fasi sharacoinran, —ishon yoini. Naanfin Samaritanon iniquin.

¹⁷ Ascaiton Jesús yoini, —Un mucu rafuti nocofunufu cayahuafia na fustiton ua shinanquin ua yoishara yoa.

¹⁸ ¿Ahuuscaimun na nocofunu uhuun caifomafishu nan fusti uqui nasoa Dios shara huapai futsafo uqui nasoyamafiaino? —ishon Jesús yoini.

¹⁹ Asca huatan a Jesús yoini, —Funicaitahuun. Min ua icoinra huashufin min cayasharaquin, —ishon Jesús yoini.

*Ahuuscashumain Diosin nantifi iquinai cuscan iishquicain**Mt 24.23-28, 36-41*

²⁰ Ascano Fariseofoan Jesús yocanifo. —¿Ahuutianmun manifotiton ato niaifo Dios iishquiquin? —ishon yocaifoan. Jesús ato cumaqui isca huani, —Ahuuscashocai Diosin yorafo iquinai cuscan man ointiroma.

²¹ Ascashu Upa Diosin mato nomuran mato niaifo itiro mato yonoshquin. Ascacuai tsoan yoitiroma isca huaquin, “Diosin niaifo nuno noco mai ano icaraca,” tsoan huatiroma. Futsaricai yoitiroma isca huaquin, “Diosin mai futsaria niaifo icaran,” ishoncai tsoan yoitiroma, —ato yoitan.

²² A fu rafuafori yoiqui isca huani, —Chipo un mato anoashu matomaqui caano fasi man ua shinancoinquin yoishquin isca huaquin, “Nocon Ifo no fu ipainon. Fasi non oinpaicoiran,” ishon yoifiaquicai man ua oinshquima.

²³ Ascano futsafoanri mato yoishqui isca huaquin, “Nanfin Cristoquin. Oa ono icaran,” ishon futsafoan yoiaino futsafoanri, “Nuno icaran,” ishon yoiaino. Ari foyamacain atori tanayamacahuun.

²⁴ Uficoin un oaiton man ua oinshquin. Caná facaicaiton shafacafi non oinriscatitiro. Nanscarifiai un oaiton shafacafi man oinshquin.

²⁵ Ascafiashu tauri un fasi omitsiscacoishquin. Natian nia yorafoancai ua niaifo huapicainima.

²⁶ Noé niyoano inifo cuscacoinrifiai un afanan oaitian nanscarifi ashcani.

²⁷ Ascan nantian Dios shinantama pisharafain ayafain fianansharacainoaitoan faitahuan noconi. Nanscasi ariaino. Noé ahuun shashohuan muran iquitapaiyaino oinhuarasi furiai unuyamacaiyaino faitahuanun nantio manifoti unuhuan marafumuni. Ascaino asai futsunifo.

²⁸ Nanscacoindirifi nan nocofunu Lot niyoano nanscacoindifo. Dios shinantama pisharafain ayafain inanmitsashon ahuafo fifain mau fanafain pushu huapaino.

²⁹ Nanscarifi ariaino Lot Sodoma anoashu caani. Diosin yonoo cuscan. Nantianri Diosin yononi nai murannoashu chihuan atoqui pacunon. Ascaino Sodoma anofo cuyocoinnifo.

³⁰ Nanscacoindirifi aashqui un afanan oaitian. Ua shinantama ari apaiyaino cusca huariaifano.

³¹ Ascan tsoa pushu fomancayan niashucái afanan ahuun pushu muran iquitiroa ahuun ahuaa fiishquin. Ascataa ichoriscatahuun. Nanscarifiai tsoacai mau yonofiai afanan pushu ano nasotiroa ahuun sahuuti fiishquin.

³² Ascacun Lotpan ahuihuunoo shinancahuun. Naanton ahuun ahuafofosi shinain ifacucahuan oinpa nariscani cuscan marifi ascayamacahuun.

³³ Ascan tsoan shinanqui isca huai, “¡Ohua! Un Jesús tanaiton raca ua omitsisca huacanicati,” ishon shinanquin uhuun tsain cachiquiri huaa. Nanscara yorafo naashu omitsiscapanacafo. Ascan tsoa uhuunoashu omitsiscacai naa. Nanscara yorafofin nacanashu ufu isharpacunacafoquin.

³⁴ Ascacun un mato yoinon un oaitian yora rafu mosquitero muranfashu fusti ufu cariscatanaino futsa nitushquin.

³⁵ Nanscarifiai yaino rafu nanincani futsa ufu uari cai yamariscatanaino futsa nitushquin omitsiscashquin.

³⁶ Ascaino nantianri nocofunu rafu mau ano yonocani futsa uari cai yamariscatanaino futsa nitushquin omitsiscapanacafo muran caashquin, —ishon Jesús ato yoini.

³⁷ —¿Ifon, raqui focanimun? —ishon yocaifoan. Jesús ato cumaqui isca huani, —Ahuara naa nanno cotocotofo nocoriscatiro. Nanscarifiai un nocoaitian ua tanamisifo uqui furiscatashcaniran, —ishon Jesús ato yoini.

18*Niaifo yafi ainfomaqui funu naahuunoo Jesús ato ahuaa futsa yosini*

¹ Afanan Jesús ahuaa futsahuunoo ato yoini ato tapimashquin, —Upa Dios unutama cufiriai atsananonfoma.

² Pushurasi futsa ari niaifo ini. Nan niaifo Diosqui ratutama yorafohuunri noinima.

³ Ascafiaino ainfomaqui funu naa aqui oshon yoiriapaoni, “Ua noicasmamisiton ua chaca huaiquin ua yoishohuun ua afanan asca huanonma,” ishon yoifiaino

⁴ niaifo ahuun ramapaitama. Puusinima. Asca huafiaino aqui ihuan ihuanpaoni. Ascaiton niaifoan yoini isca huaquin, “¡Cuu! Na ainfo funuoma fasi ua fucash huariai. Uncai Diosqui ratuima. Na ainfohuuricai un ramapaiyamafiaino

⁵ fasi ua fucash huariai. Ascacun afanan ua fucash huanonma un aroshoniran,” ishon niaifoan yoini.

⁶ Ascana a niaifo chacapan yoini cuscan nicacahuun. Chacafashon nan ainfo funuoma yoiriaiton man aroshoni.

⁷ Asca Diosicai a niaifo chaca cuscarama. Ascatamarocon fasi noco nicapai. Noco nicaicain atsanatiroma. A catoanfoan shafatishon yafi yamutishon cufiaifo cuscan ato nicacasmaima.

⁸ Ascacun un mato yoi nan manamisifo mato aroshoriscatashquin. Ascan nan mato noicasmamisifo onaintimashqui. Ascafia un chipo afanan uhuun Upa Dios icariashu mai ano oaino fustirasiton ua icoinra huacaniraca, –ishon Jesús ato yoini.

Fariseo yafi niaifo pui fishomisihuunoa Jesús ato ahuara futsa yosini

⁹ Ascان afanan ato ahuara futsa yoini ato tapimashquin, –Unfin sharaquin. Uncai chaca huamisima. Yora futsafo ua cuscaramaran, –ishon shinanmisifohuunoa Jesús ato yoiquin isca huani,

¹⁰ –Nocofunu rafu Israelifoan Dios fu tsainti pushu muran iquinifo Dios cufishcaquin. Futsan Fariseo icaino futsan niafo pui fishomisi ini.

¹¹ Nan Fariseo ninacahuan cufiqui isca huani, “Uncai tosa cuscarama. Unfin nocofunu sharaquin. ¡Aichoran! Upa Diosin, uncai na nocofunu niaifo pui fishomisi cuscarama. Uncai yora chacafo cuscarama. Unricai yomutsoma. Uncai tosa paratiroma. Unfin yora futsa shara huatiroquin. Uncai uhuun ahuinma furi imisima.

¹² Nan semantifi un piqui tunuquin rafu huafafaini. Nan un flaishtafin un mia pashcashofafainiquin, Upa Diosin,” ishon Fariseo yoini.

¹³ Ascafiainocai nan niaifo pui fishomisiton anori yoitama. Mananquiri foistamari. Tutipacutishon shochi sutu sutuaquin yoini, “¡Ohua! Diosin, un mia fasi chaca huamisi. Uhuun ramapaihuu. Un chacaquin,” huani.

¹⁴ Un mato cayacafi yoi. Nan pui fishomisi Diosin ahuun chaca soashofain ahuun yora ima. Ascafiarquicai nan Fariseo ahuun chaca soashonima. Ascan tsoan ahuunoa yoiqui isca huai, “Un shararan,” ishon futsafo shinanmapai nanscara yorafa chipo Dios ismashquin arifi chaca huamiscun. Ascan tsoan yoiqui isca huua, “Unfin chaca huamisiquin,” ishon yoiquin nanscara yorafofin Diosin aton chaca soashotiroqui afu ipanonfo, –ishon Jesús huani.

Jesús Apa Diosihuunshon facufo shara huani

Mt 19.13-15; Mr 10.13-16

¹⁵ Ascaino yorafaon aton facumishti Jesusqui ihuunifo ato manmanpacuquin Apa Dios cufishonon. Asca huafiaifoan afu rafuafuon ato yoini, –Maton facufo ihuutan nocon Ifo fucash huayamacahuun, –ishon yoinifo.

¹⁶ Asca huafiaifoan Jesús facufo cunani, –Uqui fucahuun, –ato huatan afu rafuafu yoini, –Unucahuun uqui funonfo. Ato nitun huayamacahuun. Uhuun Upa Dios niaifo icariafofin nan facumishti cuscaraforiquin.

¹⁷ Ascacun un mato icon yoi. Nan facumishtifoan Dios icoinra huacoinnafo cuscan tsoan icoinra huashmacai Dios icari iquinacafomaran, –ishon Jesús ato yoini.

Nocofunu mafo ichapaya Jesús fu tsainni

Mt 19.16-30; Mr 10.17-31

¹⁸ Ascaino Israelifoan aton niaifo futsa Jesusqui oshon yocaquin isca huani, –Tapimamisiton, minfin sharacoquin. Ua tapimahuu. ¿Unmun ahuuscatiroquin Dios fu ipashquin? –ishon yocaiton.

¹⁹ Jesús cumani, –¿Ahuuscaquin mian “shararan,” huaimun? Dios fusti sharaquin.

²⁰ Diosin yononi cuscan man min tapian. Yonoqui isca huani, “Min ahuinma fu iyamahuu. Futsa rutuyamahuu. Ahuara onuyamahuu. Chaniri yoiyamahuu. Ascashon upa yafi uhuari nicasharafain ato shara huahuu,” –ishon yoiaiton.

²¹ –Nantifi mian yoi ai cuscan facushon un nicainifoannaran, –huaiton.

²² Afanan Jesús cumaquin, –Fustiricai min nicataima. Nan yoiqui isca huua. Ahuarafo inanmitsashon ahuun rafanan pui fihuu ahuuomafo inanshquin. Min ascaitofin Upa Diosin nai muranshon mia ahuara sharacoin mucushoniquin. Asca huatan ua tanasharahuu, –ishon Jesús yoiaiton.

²³ Nicai puusinima. Mafo ichapayacoinshon ahuun mafofo potacasmai.

²⁴ Ascaiton oinquin Jesús ato yoini, –Yora mafo ichapaya Uhuun Upa Dios niaifo ari nocopaifacani nocotirofoma. Fustirasifin nocotirofoquin.

²⁵ Nan ina camellocai acoya shoi muran finontiroma. Mimacafi nocofunu mafo ichapaya Diosin niaifo ari iquitiromaquin, –ishon Jesús ato yoini.

²⁶ Ascaiton nicacaquin —¿Ascan tsoa Dios fu nipatiromun? —ishon yocaifoan.

²⁷ —Nocofunucái afinri numamutiroma. Diosin fustitofin yorafo numatiroquin. Diosin fin ahuamamishti huatiroquin. Nocofunufocanai asca huatiroma cuscan Diosin huatiroquin, —huaiton.

²⁸ Pedronun yoini, —Ifon, nonfin nocon ahua-rafo nantifi nocon yorafo potafurani mifu non oquin, —ishon yoiaiton.

²⁹ Jesús afu rafuafo yoiqui isca huani, —Un mato icon yoi. Tsoan Dioshuunshon ahuun pushu yafi ahuin non ahuun yorafo non apa yafi ahua non ahuun facufori potashon ua tanapaisharai.

³⁰ Nanscara yorafofin Upa Diosin finacaiqui ato shara huaiquin. Ascano naashu Dios fu ipasharashcani, —ishon Jesús ato yoini.

Nashquiai cuscahuunoa afanan Jesús yoi futsani

Mt 20.17-19; Mr 10.32-34

³¹ A fu rafuafo doce futsano atosi iyonin nannoashu atofu tsainquin iscani, —Ua nicacahuun uhuun yoramishtichin. Non Jerusalén ano fononfocahuun. Nan Diosin tsain yoisimisifoan uhuunoa cununifo cuscan nanscacoín aiquin.

³² Nannoshon nocon caifoan futsafo ua ato inancani. Nanfoan ua cashu mutsama huafain fasi ua chaca huacani. Uqui cumo michofain fichi cunoqui tuchiaton ua coshacani. Ascatan ua rutucani.

³³ Ua asca huafiafo osha rafu non fustitan un afanan funiran, —ishon ato yoini.

³⁴ Ato asca huafaitocai tsoa tapinima ato yoiái cuscan. Man nicafiaquiricai tapisharanifoma. Diosin ato tapimanataima.

Jesús Jericó anoshon fusho caya huani

Mt 20.29-34; Mr 10.46-52

³⁵ Ascaino Jesús Jericó ano nocoataima fusho fai cusumun tsoa ini. Nannoashu pui yocacamisi.

³⁶ Ascano nan fai cusumun tsaoshon yorahunrasi foannaiton nicaquin ato yocani, —¿Tsoafo na iscai foancanimun? ¿Ahua huacanimun? —ishon ato yocaiton.

³⁷ Yoinifo, —Jesús Nazaret anoa cahuaniran, —huanifo.

³⁸ Ascaiton nicaquin yoini, —Jesús, minfin David ahuun funaquin. Uhuun ramapaipun, —ishon cunani.

³⁹ Ascano Jesús fu foaifoan asca huanifo afanan tsainonma. Asca huafiaifoanno fasi oi ashcafinin yoiriani, —Minfin David ahuun funaquin. Uhuun ramapaipun, —huariaino.

⁴⁰ Jesús nituacucahuan ato yoini, —Nuri ua ihuushocahuun, —ato huaiton aqui ihuunifo.

⁴¹ Ascaiton Jesús yocani, —¿Un mia ahua ahuusca huashotiromun? —ishon yocaiton. Cumani, —Ifon, un fasi oinpaicoiran, —huani.

⁴² Ascaiton afanan Jesús cumani, —Ua icoinra huashon natian min oinshairan, —huani.

⁴³ Ascaino nantian oinsharariscatan yoini, —¡Aicho! Man mian caya huaa shara. Dios sharan, —icashu afu caiton oincaquin futsafoan arifi, —¡Aicho! Dios fasi sharacoiran, —ishon yoinifo.

19

Jesús yafi Zaqueo

¹⁻² Asca huatan Jesús Jericó anoashu cahuanaino nanno nocofunu ahuun anu Zaqueo ini. Nantofin ahuun niaifo pui fishomisi iniquin. Pui fishomisi futsafoan aton niaifo ini. Nanrifi ahua yopatanaimacoin ini.

³ Jesús yorafoan naqui huano cahuanaiton ahuuscashoma oinpaiquin fuai mishtoshtaoianshu, —¿Ranishomain un oinnanti? —ini.

⁴ Ahuuscashoma oinpaiquin ranin. Ascacun rusoatori ichoni finoantaima. Ichotan fai cusumun ihui niahuun ichoinacahuani. Inainacahuatan ahuunshon Jesús cahuanaiton oinshquin icashu inacun.

⁵ Nan ihui nia naman finonfainquin foisinifoantan fuchishon, Jesús yoini

—Zaqueo, fotoriscahuu. Un min pushu ano osha fusti yoi canon, —ishon yoiaiton.

⁶ Nicai Zaqueo fotoriscani. Fasi unimasharacoinquin ahuun pushu ano iyonin. —¡Aichoran! Min uhuun pushu ano oiquin. Iquiyohuu, —Zaqueo huani.

⁷ Ascaiton oincaquin yorahunrasiton yoinifo, —¡Ajaa! ¡Oincapon! ¿Ahuuscaimun Jesús yora chacapan ahuun pushu ano caiquin? —icashu afi ranan yoinannifo.

⁸ Ascafiaifoanno Zaqueo Jesús yoini,

—Ifon, natiantafin un yora ahuuomafu cashcu futsa un ato inanpacuicain. Nan un finonmafaintan fia cuscan onushori un ato finonmafaintan ato inanpaquiquin. Un diez soles fianshonfin cuarenta soles un ato inainquin. Ascane veinte soles ato fianshonfin

ochenta soles un ato inaincain. Un ato onuyofiamisishaquifin un ato asca huapaiquin, –ishon Zaqueo yoini.

⁹ Ascaiton Jesús Zaqueo yoiqui isca huani, –Zaqueo, na shafata min chaca un mia soashona min Diospan facu ica afu nipanonran, –ishon yoini. Ascan nannoa pushu murannoafori ato yoini, –Na nocofunu Zaqueo arifi Abraham ahuun funa. Abraham Dios icoinra huaa cuscan arifi natian icoinra huaa.

¹⁰ Ascan tsoa funoa un ato fai shara ismayoi uhuun Upa Dios anoashu un oni nanfo Dios fu ipasharanonforan, –ishon ato yoini.

Puihuunoa Jesús ato ahua futsa yosini

Mt 25.14-30

¹¹ Nan nicatan focani Jerusalén chaima nocoshon shinanfo, –Nan Diosin niaifo ahuun yorafo iquinai cuscan nocoti chaimaran, –ishon shinannifo.

¹² Ascaifoa Jesús ahua futsahuunoa ato yoiqui ato tapimaquin isca huani. –Nocofunu niaifo cuscara ini. Nan nocofunu mai futsa ari caani niaifo huashu afanan naso curashquin.

¹³ Cataima ahuun oinmatifo mucu rafuti cunashon yoiqui isca huani, “Un mato pui paratamacoin inanfainicai. Nan puihuushon ahua fiashu inanmitsashon finonmainifoa ahuun rafanan man finon nan un nasoaitian,” ishon ato yoini.

¹⁴ Ascaiton ahuun caifo futsafoan nan noicasmacoinnifo. Ascashu caiton yorafo achon nichinifo. Nan niaifocoin yoiqui isca huanonfo, “Nan nocofunu non niaifo huapaimaran,” huanonfo.

¹⁵ Asca huafiaifoanno niaifocoinin catoan niaifotan afanan ahuun mai ano naso curani. Ascashu nocotan ahuun oinmatifo cunatoshini ahuuti pui man fiafomainquin tapipaiquin.

¹⁶ Ascaino futsan aqui oi taushon yoiqui isca huani, “Ifon, mian inan cuscan mucu rafuti finonmainifoa un mia fishoaran,” huani.

¹⁷ Ascaiton niaifoa yoini, “¡Aicho! Minfin oinmati sharaquin. Mian yonoshon shara. Un mia ichapama inanfia finonmafain mian fishoano un miqwi fasi unimai. Un mia yoia cuscaoin min aano. Ascacun pushurasifo mucu rafuti anoafoa ato niaifo min iquiran,” ishon yoini.

¹⁸ Ascaino futsanri aqui oshon yoini, “Ifon, mian pui inan cuscan mucu fustiti finonmainifoa un mia fishoaran,” ishon yoiaiton.

¹⁹ Nicaquin nanrifi yoini, “Mirifi mucu fustiti pushurasi anoafoa ato niaifo min iquiran,” ishon yoini.

²⁰ Ascaino oinmati futsari aqui oshon arifi yoini, “Ifon, naquin min pui. Un mia rashushon huashoan. Min ua inan cuscan finonmafain fiamafishuca un funoama.

²¹ Un miqwi ratuqui un mia mucushona. Mun tapia mincai tsoa shinainma. Minricai nocohuun ramapaima. Non mia yonoshofiatocai min noco ahua inantiroma. Mina fusti itiroran,” ishon yoini.

²² Ascaiton nicaquin ahuun ifoa yoini, “Min fasi chacacoin. Minfin shanishuniquin. Min tsainhuunshon un mia onaintimai. ¿Min shinanmun un futsafo shinainmaquin? ¿Uaraca futsafoan yonoshofaiton un ato ahua inanma? Un fimisi ua mian huaa.

²³ ¿Ascaino nannori shinanfaiquin ahuuscaquin min rashushon huamun? Asca huatarocon nan pui huamisifoanno min huaa shara icuana paratama finonmainifoa fishquin,” ishon niaifoa yoini.

²⁴ Asca huatan nanno niafo niaifoa ato yoiqui isca huani, “Nan oinmati chaca ahuun pui fiashon nan mucu rafuti finonmainifoa firocon inancahuun,” ishon ato yoiaiton.

²⁵ Cumanifo “Ifon, nanfin ichapayacaiquin,” huaifoa.

²⁶ Afanan niaifoa ato cumani, “Un mato icon yoi. Nan ratoran futsan ua icoinra huacoinafin un fasi paratamacoinri inainqui. Ascan nan ua icoinra huamafin nan ichapama aya cuscan futsa fiainquin.

²⁷ Ascashon nanfoanfin ua noicasmacaquin yoiifoquin, ‘Noncai mia niaifo huapaimaran,’ ishon uhuunoa yoiifo. Ascacun ato ihuacahuun uhuun ointaifi ato rutushcaquin,” ishon yoiniran, –Jesús ato huani.

Jesús Jerusalén ano cani

Mt 21.1-11; Mr 11.1-11; Jn 12.12-19

²⁸ Asca huatan Jesús Jerusalén ano caino. Achon ahuun tapimisifo fonifo.

²⁹ Machi ahuun anu Olivo tunanman pushurasi rafu Betfagé yafi Betania ini. Nanno chaima noconifo. Nocoshon afu rafua rafu nichini.

³⁰ –Pushurasi ano fotacahuun. Nocoshon man burro cahuashara nushucun man fuchi-caicain. Tsoacai na burro camaqui cayomisima. Tupushon nuri ua ihuushotacahuun.

³¹ Futsan mato yocaiton, “¿Ahuuscaquin man burro cahuashara tupuimun?” yocaifoan ato yoiquin. “Nocon Ifo yopaiton non tupuyoaran,” ishon ato yoitacahuun, —Jesús ato huani.

³² Ato nichiafocatan nococashon Jesús ato yoia cuscan nanscacoín huaquin fuchitoshinifo.

³³ Man tupuafoanno muropan ifofoan ato yocani, —¿Ahuusca huashquimun man nocon burro cahuashara tupuaquin? —anoa ifofoan ato yocani.

³⁴ Ascaiton cumacaquin, —Nocon Ifo yopaiton non tupuyoaran, —huanifo.

³⁵ Nan burro cahuashara Jesús ihuushonifo. A fu rafuafoan aton sahuuti muropan catu camaqui fucashonafoanno acamaqui Jesús tsaoinifoannifo. Ascaino cani.

³⁶ Cahuanaiton fai naman cayan afofori sahuuti fucashonifo. Niaifo cahuanaiton apaonifo cuscan Jesusrifi cahuanaiton afofori sahuuti fucashonifo.

³⁷⁻³⁸ Machi Olivo tusirimucaitan ahuunshon tapimisifo aqui noconifo. Unimacaquin oi ashcafinin Jesús yoinifo,

—*¡Aicho! ¡Diosin shararan!*

Dioshuunshon ahuamamishti min huaiton non oian. ¡Aicho! Nocon niaifo nocoqui oaquin. Diosin shara huamafafainni. Diosin yononi Jesús nocon Niaifocoin inon. Ahuunshon Diosin nantifi shara huanon. Ascarifiatan ahuun nai oinmatifoan nai muranshon yocani, “Diosifin sharacoinshon yorafoqui ahuun Furun nichiniquin ato numanon,” man huaicain —ishon oi ashcafinin yoinifo.

³⁹ Asca huacatan Fariseofoan yorahuanrasi muranshon Jesús yoini, —Tapimamisiton, minhuunshon tapimisifo yoihuu ascanonfoma, —huaifoan.

⁴⁰ —Un mato yoinon. Ua yoisharayamaifoan na toquirifoan ua oi ashcafinin tsain shara ua yoiucanaforan, —ishon Jesús ato yoini.

⁴¹ Machi tusirimupacuquin nan pushurasi Jerusalén anoa icafo oin atohuun ramapai Jesús uaini.

⁴² Ascashon yoiquin isca huani, —¡Ohua, Jerusalén icanoafoan! Ua icoinra huashufin man isharapacucuaquin. Mancai tapiama natian Diospan Facu nocoa. Mancai ua niaifo huapaima. Un mato numapaifiaiton man ua tanacasmai. Natiancai un afanan mato numatiroma. Man fasi finoan.

⁴³⁻⁴⁴ Mancai tapiama un mato cushunon Diosin ua catonfiacun, tsoancai mato noicasmamisifoan mato ahuuscara huaiton mato numatiroma. Mato chituacufo nantia iqui furancatan mato rutuquin anaitishocani. Matofu yafi maton facufo rutuqui cuyoshceni. Maton pushufo paoinquin futsui. Diosin ua matofu nichifiacun man ua nicacasmaiton mato asca huashcaniran, —ishon Jesús ato yoini.

Jesús Dios fu tsainti pushu muranshon ahuara chacafo potani

Mt 21.12-17; Mr 11.15-19; Jn 2.13-22

⁴⁵ Asca huatan Jesús Israelifoan Dios fu tsainti pushu muran iquitoshiquin oian a murannoashu ahuarafo inanmitsaifoan fuchitan ato chifi cainmaqui futsani.

⁴⁶ Ascashon ato yoiqui isca huani, —Diospan tsain cunuquin isca huani, “U fu tsainti pushu muranshon man ua fusti cufitiroran,” ishon cunufianicun nan yomutsofoan ichananti cuscara man huapairan, —ishon ato yoini.

⁴⁷ Asca huatan shafatifi Israelifoan Dios fu tsainti pushu muranshon Jesús ato yoini. Ascafiaiton nocon yorahuunshon Dios cufimisi niaifofu futan Moisés cununi cuscan tapimamisifo non Israeli niaifo futsafoanri Jesús rutupainifo.

⁴⁸ Asca huafiaifoan ato caifo futsafoan nan Jesús yoiai cuscan nicapaicoinnifo. Ascacuai a rutupaifiaquin tsoan tapinima ahuuscashomain rututirofoquin.

20

Jesús noco yonotiro

Mt 21.23-27; Mr 11.27-33

¹ Ascatan shafa futsaino Jesús Israelifoan Dios fu tsainti pushu muranshon ahuun tsain shara ato yoifain ahuuscashumain Dios fu ipatirofoquin ato yoiaino nocon yorafohuunshon Dios cufimisi niaifofu Moisés cununi cuscan tapimamisifo non Dios fu tsainti pushu cushumisifoan Jesús yocanifo.

² —¿Tsoan mia yonoamun min isca huanon? —ishon yocaifoan.

³ Jesús ato cumani, —Urifi un mato yocai. ¿Juanpan yorafo unu muran iquimapacuni tsoan yonoo asca huanimun?

⁴ ¿Diosin iyamarai nocofunufuon yononifomun? —ishon ato yocaino.

⁵ Afi ranan yocanonannifo. —“Diosin Juan nichiniran,” non huaiton Jesús noco yoitiro. “¿Ascán ahuuscaquin man Juan icoinra huamamun?” —noco huatiro.

⁶ Ascan —“Juan nocofunfoan nichiniran,” non huaino yorafo nocoqui sinatirofo. Nantifi yorafoanmain yoimisifocun “Juanpan Diosin tsain yoimisiran,” ishon yoiafo. Ascan “Juan Diospan yonoamaran,” non icaiton toquirifoan noco rututiroforan, —icashu yoinan-nifo.

⁷ Ascashon Jesús yoinifo, —Noncai tapiama tsoanmain Juan yonoaquin, —huaifoan.

⁸ Jesús ato yoini, —Urificai un mato yoima tsoanmain ua yonoa un ahuarafa huaiquin —ishon ato yoini.

Yonomisi chacafohuunoa Jesús ato yosini

Mt 21.33-44; Mr 12.1-11

⁹ Ascashon Jesús ato ahua futsan tapimani isca huaquin, —Nocofunu futsan ahuun mau fanafaini mai futsa ari caano. Futsafoan cushushonifo. Nasoshon ahuun fana atirifi pashcashoshquinon.

¹⁰ Fimimisitian mau ifoan ahuun oinmati nichini ahuun fana fimifo fishotanon. Mau cushumisifoan a oinmati sutucashon ahuuoma nichinifo.

¹¹ Ascashon futsari nichian nanrifi sutunifo. Sutuafono maisi cani.

¹² Ascashon afanan futsari nichini. Nanri nanscari huacashon. Maumamaquishon potanifo.

¹³ Ascashon mau ifoan shinan futsani, “¿Un ahuusca huaimun? Uhuun facucoin nan un ahuun noiai un nichicai. Nanraca nicacointirofo,” huani.

¹⁴ Ascano ahuun facucoin mau ano oaiton fuchinifo, “Ahuun facucoin oiquin. Non rutucoino. Apa naano naafo ahuun facu ifoaiquin. Non rutunoncahuun. Afin aton apa fiama noncairocon non fianon,” ishon yoinannifo.

¹⁵ Asca ocun achicashon mau pasotain iyoshon rutucoinnifo. ¿Asca a mau ifoan nicatamun ahuun facu rutuafo ato ahuusca huaiquin?

¹⁶ Oshon mau cushumisifo ato rutuquin anaitishon futsafoan ahuun mau cushumaniran, —ishon Jesús ato yoini. Nicacatan, —Ascanacama ipainonran, —inifo.

¹⁷ Ascaifoan Jesús atosi oinquin ato yocani. —¿Asca ahuuscaquimun Diosin tsain nunori yoiquin?

“Pushu yonomisifoan, ‘Ahuun quishi chacaran,’ ishon potafiacun ifoan afanan shara catonshon nichiano pushu onitiro.”

Nanscarifiai man Diospan Furun pota. “A chacaran,” huafo. Ascafiacun Diosin man catoon ahuunoashu fustisi yorafo Upa Diosin fu nipatirofoquin.

¹⁸ Ratoran futsa a nicacasmaifo omitsiscatiro. Asca ratoran futsanfoan nicacasmariamiscun naitian a omitsiscapanacafo muran potashquinran, —ishon Jesús ato yoini.

¹⁹ Nicacanashu Moisés tsain tapimamisifo yafi nocon yorafohuunshon Dios cufimisi niaifofoan Jesús achipainifo cunu muran iquimashcaquin. Atohuunoa yoiaiton nicacani aqui sinanifo. Ascafiashocai a nicapaiyaifoqui musucaquin tsoan achinima.

Niaifofoan ato caifofo pui yocamisifohuunoa

Mt 22.15-22; Mr 12.13-17

²⁰ Ascacun nan fuparamitsamisifo Jesús fu foanfainmisifo ahuun tsain nicapaicani ahuarashta amaquiri yoiaiton ato niaifoqui chanishcaquin Jesús achinonfo. Asca nanfo Jesusqui nichinifo cuncun huaqui yocatanonfo.

²¹ Ascano nanfoan focashon Jesús icon tsainman yocanifo, —Tapimamisiton, ahuaa icocoin fusti min noco yoifafainmisi. Nan atirifi min yoiai cuscan nannoricoinrifi min noco yoifafainmisi. Ascashon icon fustisi min nantifi yorafo Diospan tsain yoifafaini. Minricai ahuaa yoipai ranomisima. Nantifi min ato cayacafi yoia.

²² Asca sharamainquin noco yoihuu. ¿Norifimun non Romanonfoan aton niaifo Cesari non pui inainquin? —ishon yocaifoan.

²³ Nan fuparamitsamisifoan yoiafo cuscan onanshon Jesús ato yoini.

²⁴ —Ua mato toro fusti ismacahuun, —ato huaiton. Ismaifoan ato yocani, —¿Tsoa ointsatorohuun nuuamun? ¿Tsoan ahuun anuri nuuamun ua yoicahuun? —ishon ato yocaiton.

²⁵ —Niaifo Cesarnaran, —huaifoan.

—Ascan Cesarnacun nan inancahuun. Ascan Diosinacuri Dios inancahuun, —ishon ato yoiaiton.

²⁶ Nicacani fasi mustairicatan yoinifo, —Nan yoiai cuscaai tsoan tafitiroma. Fasi tapisharacoianran, —icashu ahuun yoinannifo. Ascacuai yorafoan ointaifi, —Jesús amaquiri noco cumaran, —ishon tsoan yoitiroma. Ascashu afanan tsoa pusinima.

Yora naashu afanan funitirofohuunoa yocanifo

Mt 22.23-33; Mr 12.18-27

²⁷ Ascano nannori Saduceofo ini. Nanfoan shinanquin isca huamisifo, —Yora naashucaí afanan funinacamaran, —ishon yoimisifo. Ascan nanfo Jesusqui fucashon yocanifo.

²⁸ —Tapimamisiton, Noco shuni Moisés noco cunushoqui isca huani, “Ratoran futsan ahuin futan facu acashma naano afu nanua futsan ahuun facahua fitiro a futan facu aashquin,” ishon cununi.

²⁹ Ascacun un mia yoinon. Siete nanupacuafo ini. Nan iyoacoinnin iyoacaichin ainfo figui tau huani. Ascafiashon a futan facu acashma naani.

³⁰ Ascano chipocu futsan arifi ahuun facahua fini. Arifi aqui facu acashma naani.

³¹ Ascano chipocu futsanri arifi fiini. Nanrifi afutan facu acashma naani. Nanscasiai amaqui nai cuyonifo. Aqúi facu acashma.

³² Ascatan ahuun unutaní arifi ainfo naani. Facu nanuashma.

³³ ¿Ascán ratotocaimun nai muranshon nan yorafo naashu funiaifotian fiishquiquin nan fusti fipashu amaqui nai cuyoafo? —ishon yocaifoan.

³⁴ Jesús ato cumani, —Yorafo nuno mai ano niyoashu nocofunifo yafi ainfofo fianan-misifo.

³⁵ Asca ratoranfoan Diosin tsain icoinra huacun Diosin ato imasharatiro afu ipanonfo. Asca nanfo naashu afanan funiashu Dios icari nocotan afanan fianantirofoma.

³⁶ Afananricai tosa natiroma. Nanfo Diospan oinmati afu nai muran ica cuscarafu. Ascashu Diospan facufo. Naashu funicatan Dios fu nipanacafu.

³⁷ Ascan Moisésirifi noco yoini yora naashu afanan funitiro nipashashquin. Ascashon noco yoiquin isca huani, “Chofu uru manhuain murannoa Diosin oi un nicaní. Ua yoiqui isca huaiton, ‘Unfin Abraham non Isaac non Jacob non afoan aton Diosiquin natian ufu niafo,’” ishon Moisés yoini.

³⁸ Yora naashu afanan funiyamaino ahuuscashumun Dios fu itirofoquin. Ascafia ascarama. Yora man naafianishaquin afanan nanfofin Dios fu ipatirofoquin. Ascacun Upa Diosifin ato Diosiquin. Diosinafin nantifi niafoquin, —ishon Jesús ato yoini.

³⁹ Ascaiton nicacani Moisés cununi cuscan tapimamisifoan yoinifo. —Tapimamisiton, min ato cayacafi yoiran, —huanifo.

⁴⁰ Ascashocai afanan tsoan yocapainima. Ato cumasharaino aqui ranonifo.

Tsoan funamun Cristo

Mt 22.41-46; Mr 12.35-37

⁴¹ Ascatan Jesús ato yocani, —Asca ahuuscaimun “Cristo David ahuun funaran,” huamisi-foquin.

⁴² Nan Davidcoinin fanainti cunuqui isca huani,

“Upa Diosin uhuun Ifo Cristo yoini isca huaquin, ‘Minfin ufu niaifocoinquin.

⁴³ Mia noicasmaifoan min ato finoncoian. Un ato shatumashquin mia afanan ahuusca huaitiroma. Min ato iquiniran,” ishon Diosin yoini cuscan David cununi.

⁴⁴ ¿Criston David Ifono ahuuscashuon ahuun funa itiromun? —Jesús ato yoini.

Moisés cununi cuscan tapimamisifoan chaca huamisifo cuscan Jesús yoini

Mt 23.1-36; Mr 12.38-40; Lc 11.37-54

⁴⁵ Ato asca huatan afu rafuafori ato yoiáiton yora huarasafain arifi nicanifo ato yoiqui isca huaiton.

⁴⁶ —Oinfain. Moisés cununi cuscan tapimamisifoan sahuuti chainipafo sahuusho ato oinmafoanfafaicani fasi tapicoianforan ato huamapaicani. Yora ichaparasi ano foansca-cani “Sharacoinforan” ato huamapaicani. “Nanfoan fasi Diosin tsain tapicoianran” ato huanonfo. Ichananti pushu muran iquitán shafacafi tsaotiofo ato oinonfo. Ichananshon piyainfoannori shafacafi tsaopaicani.

⁴⁷ Ascasho ainfomaqui funu naafo parashon pushu ato fianceni. Ascatan fasi chaicoinri cufriatirofo atohuunoa shinansharanonfo. Ascafia nanfo fasi fuparamitsamisicoifo. Nanfocaifin Dios ato onaintimaquin finacoinsiquiquin, —ishon Jesús afu rafuafo yoini.

21

Ainfomaqui funu naa ahuuomashtacoinfiacun Dios inansharani

Mr 12.41-44

¹ Ato yoitan fuhuunina cahuan Jesús oinni yora mafo ichapayafoan pui ichapa nanuti muran nanuiniyaifoanno.

² Asca huaifoanno ainfo funuoma otan arifi nanuni. Toroshta rafusi a muran nanuni.

³ Ascashu oiainfoan Jesús ato yoini, —Un mato icon yoi. Na ainfo funuoma ahuuomashtafashon inancoian. Ahuun toroshta rafu cuyoina. Ascacun na ainfo funuomashta fasi Dioshuun noicoinquin inanshara.

⁴ Asca ichapayafoancai Dios inanfiacaquin atirifi tsoan inanqui cuyoafoma tushu huafo. Na ainfoan Dios inain cuscaai ichapa yafoan inansharacoianfoma. Ascafia na ainfo funuoma ahuuomafashon nantifi ahuun pui man inanquin cuyoina. Man inanqui anaitia afanancai ahuahuunshon ahuun tushu fitiromaran, —ishon Jesús ato yoini.

Jesús yoini, —Dios fu tsainti pushu paoinshquiran, —ishon ato yoini
Mt 24.1-2; Mr 13.1-2

⁵ Ascano afu rafafo afiranan yoinancaqui yoinifo, —Nocon Dios fu tsainti pushu toquiri putsamuashu cunuacua fasi sharashtacoin. Yorafoan ahuaa sharashta Dios inancoianfo cuscan nutamuacua, —icashu yoinannifo.

⁶ Ascaiffoan Jesús ato yoini, —Nan man oiain toquiri putsamuashu cunua Dios fu tsainti pushu chipo paoinshquin. Afanancai toquirifo putsamushquimaran, —ishon ato Jesús yoini.

Nan cuyoaitian ahuafo ishquiai cuscan
Mt 24.3-28; Mr 13.3-23

⁷ Ascaiton cumanifo, —Tapimamison, ¿Nan min yoiyai cuscamun ahuutian iishquiquin? ¿Ahuuscashomun non tapitiroquin a ishquiai cuscan? ¿Diosimun noco ahua futsa ismaiquin non tapinon? —ishon yocaiffoan.

⁸ Jesús ato cumani, —Oinfain. Mato parapaicaniqui. Yora ichapafoan, “Un Cristoran,” ishon mato parapaishcani. Ascashon nanfoanri yoishcani, “Un mato yoiyai cuscan Cristo samamashtacoin oiran,” ishon mato yoiyai foan ato tanayamacahuun.

⁹ A man nica yorafo rutunainfoanno ratuyamacahuun. Man nica futsafoan aton niaifo potashu arifi niaifo ipaiyaiton nicali ratuyamacahuun. Nan un yoiyai nanscacoian aashquiquin. Ascafia nantifi cuyoaitian nocoataima.

¹⁰ Iquisi mai futsa fu yorafo rutunainfoanno mani futsafori mani ya futsafori rutunainfoanno.

¹¹ Ascaino mai futsafoari fasi mai nayanaiyaicaino mai futsafoariri yora tushuomafu icaiffoanno. Mai futsafoariri pau isininpacoinfoan ishquicani. Ahuaa chaca futsa futsa-tapafo icaino yorafo fasi ratucoinshcani. Nai ari tsoan oinyomisima cuscara oincani fasi ratucoinshcani.

¹² Ascaatima achicashon mato ichananti pushu muran iyoshcani niaiffoan mato yocanon. Ascashon chipo mato cunu muran iquimashcani. Asca huatan niaifo futsafoan ointaifiri afanan mato asca huashcani. Uhuunshofin mato asca huashquicani.

¹³ Mato asca huafiafoan man ato uhuunoa yoitiro.

¹⁴ Ascaino man niaiffo ano cataima shinanchacayamacahuun nanfoan mato huunoa tsain chaca yoishcani.

¹⁵ Ascafia unfi mato cayacafi yoimamaicain man ato cumasharanon. Uhuun tsain shara un mato nomuran nanumashquin. Ascaino nan mato noicasmaiffoan tsoan mato cumayamafain matori tafitirofoma. Ascashori tsoancai anorimaran mato huaima.

¹⁶ Ascashon mato upafo futan uhuafu non mato yoracoinfo non man yorahuan futsafoanri mato achimashon atirifi mato rutumashcani.

¹⁷⁻¹⁸ Ascaino uhuunshon nantifi yorafoan mato noicasmaiffoan Upa Diosin mato cushusharafainshquin. Ascashon mato rutufiafocai ahuashta man funotirofoma.

¹⁹ Ascaino omitsiscafiaquin man ua potama nan man naitian uhuun tsain tanasharashu Upa Dios fu man ipasharashquin.

²⁰ Mato noicasmaiffo aton ranushumuafoan Jerusalén chituacuaiffoan oinquin man tapitiro man samamashta Jerusalén cuyoi.

²¹ Nanscara oincani Judea mai anoaffoan machi ari ichotacahuun Jerusalén anoafomaqui. Patashari icafo Jerusalén muran fuyamacahuun.

²² Nantifi Diosin tsain cununi cuscan Jerusalenuunoa nanscacoian aiquin. Nantian Jerusalén anoaffo Diosin ato onaintimai.

²³ Ascacun ohua. Ainfo facu nanuafo yafi aton facu yomumishti shoma acaiffoa nantifi Israel anoaffo fasi omitsiscaashcani. Yora futsafo fasi atoqui sinacoincaquin ato asca huashcani.

²⁴ Ato rutufain atirifi achicashon mai futsafoari ato nichishcani. Ato asca huatan a Israelifoma Jerusalén ano iyoshcani. Nan Diosin ato nasopaiyaitian Israeliffo afanan Jerusalén ano fushcani. Yora futsafo afanan aton niaifo inonma.

Diospan facu nasoaiffoan
Mt 24.25-35, 42-44; Mr 13.24-37

²⁵ Ascaino nantianri fari yafi oshu non fishifo nan imisima cuscaian futsushcani. Ascaiton nuno mai anoaffoan oincani fasi ratucoincaquin yoishcani, “¿Ahuuscaimun unuhuan fasi

fuchoaino ahuun oi achacoinquin? Noncai iscara oinyomisimaran,” icashu ratucani afiranan yocanonanshcani.

²⁶ Ascaiton oincani yorafo ato ratupan naiyoshcani. Nai ari yafi mai ano ahuaa chacafo tsoan oinyomisima cuscarafu oincani.

²⁷ Ascaifoanno nantianri un nai ariashu coin camaqui mai ano fotoshqin. Ascaiton nantifiton ua oinshcani. Un Diospan facuashu uhuun curushhuunoashu un fotoaiton ua oinshcani. Un nantifi iquinau cuscan.

²⁸ Ascacun nan un mato yoiái cuscacoin tau aino nan ua icoinra huafo unimacain ua manasharayanan itisharacahuun. Nanscacoin aino un matoqui oti chaimaquin mato numayoi, –ishon Jesús ato yoini.

²⁹ Ascashon afanan ato yoiqui isca huani, –Nan fana higuera yafi nii futsafohuunoari shinancahuun. Nanhuunshon mato ahuaa futsa tapimanon.

³⁰ Nan nii pui risquisi futsuaiton man tapitiro manmain fariaitonfin.

³¹ Nanscarifiai nan un mato yoiái cuscacoin aiton tapicahuun Diosin niaifoan ahuun yorafo iquinau cuscan man nocoti chaima.

³² Ascacun un mato icon yoi. Ahuarafu un mato yoiái cuscacoin aiton nataishoma oinyoshcani.

³³ Ascaino nai yafi mai cuyoshqui. Uhuun tsain cayacafi iconcain. Fiananancái apanacama. Un mato yoiái cuscacoin aashquin.

³⁴ Ascacun oinfain. Un matoqui nocoriscatashquin. Man itisharayamano ahuarafu ahuuscarai futsui. Ascacun ahuaa chaca huayamacahuun. Paunyanan monofafainyamacahuun. “¡Ohua! Un ahuuscarairan,” ishon shinanfaiyamacahuun. Nanscafin nan ua icoinra huamafofo aquin. Afo itisharafomano un nocoriscatashquin. Afo icai cuscan ayamacahuun. Oinfain. Masharo nicatsashu cunu muran iquitiro cuscan ayamacahuun.

³⁵ Ahuarafu ahuuscarai futsuaino nan maitio omitsiscái futsushcani.

³⁶ Ascacun itisharayanan Upa Dios cufifafaincahuun omitsiscaitian ahuun curushhuunshon mato amapaiyai cuscacoin huashcaquin. Ascashu man chipo uqui nocoitian un matoqui unimatiroran, –ishon Jesús ato yoini.

³⁷ Ascatan shafatifi Israelifoan Dios fu tsainti pushu muranshon ato yoini. Yamutifi machi ahuun anu Olivo ano oshani.

³⁸ Funamanritifi aqui fupaonifo Dios fu tsainti pushu muranshon nicashcaquin.

22

Jesús rutushcaquin afi ranan yoinannifo

Mt 26.1-5, 14-16; Mr 14.1-2, 10-11; Jn 11.45-53

¹ Nan noco caifo Israelifoan ato fusititian shinanpaonifo Diosin nai oinmati ato facu iyoafofosi finonmani futuquima. Ascan nan fusiti shafa anunifo pan farashati maisiran ishon anunifo man nocoti chaima.

² Ascan nantianri nocon yorafohuunshon Dios cufimisi niaifofo yafi Moisés cununi cuscan tapimamisifo ichanancashon shinanqui isca huanifo, –¿Ahuuscashomun non Jesús ato rutumatiroquin? ¿Ahuaa chaca ahuunoa non yoitiro ato rutumashquin? Non cashman rutuaino yorafo fasi mucacani noco raca asca huatirofo, –icashu yoinannifo.

³ Ascaino nantianri Judaspan ahuun nomuran Satanás shinanchacamariscatani. Nan Judaspan ahuun anu futsa Iscariote nanrifí Jesús fu rafua futsa ini.

⁴ Ascashu niaifofo ano caní atofu tsainquicái. Ascano cashon ato yoini, –Unmun ahuuscashon Jesús ato achimatiroquin matoqui ihuunonfo, –ato huaiton.

⁵ Nicacani fasi unimacoincaqui yoinifo, –¡Aicho! Non mia pui inain min noco Jesús ato achimashocun, –ishon Judas yoiáifoan.

⁶ Judas ato cumani, –Ai. Man ua yoiá cuscan un mato Jesús achishotiroran, –ishon yoini. Ascacun nantian Judaspan shinanni ahuuscashomain un Jesús ato achishotiroquin. Yorahuanrasi yamaino achimapai.

Ahuun unutaqui Jesús afu rafumisifo futan pini

Mt 26.17-29; Mr 14.12-25; Jn 13.21-30; 1Co 11.23-26

⁷ Asca noco fusititian non misi farashati maisi pimisi. Diospan nai oinmatinon nocon shunifoan ato facufo rututamarocon Diosin ato yononi cuscan chashoanun facufo rutunifo. Ascacun nocon fusititian norifi chashoanun facu rutumisi nocon shunifoan ani cuscan shinanshqin.

⁸ Ascacun Jesús Pedro yafi Juan nichiqui ato yoini isca huaquin, –Itishara huatacahuun. Non chashoanun facu picanon, –ato huaiton.

⁹ Cumanifo, –¿Rato pushu muran caashon non ati shara huaicaimun? –ishon yocaiifoan.

¹⁰ Jesús ato cumani, —Jerusalén ano nocoshon man oian nocofunun unu tutsaomushon foaiton nan mufaitacahuun. Ascashu nan iquiaino afu iquifainshon pushu ifo man yoiqui isca huatiro,

¹¹ “Nocon tapimamisiton mia yocaqui isca huua, ‘¿Rato cunu muranshon ufu rafuafo futan non chashoanun facu picaimun?’ ” ishon man yoiaiton.

¹² Mato cunu uhuapa fomancayan ismai. Nan cunu muranfin nan non yopaiti mato ismaiquin. Nannoshon atishara huacahuun, —Jesús ato huani.

¹³ Ascaino nan rafu Jerusalén ano focashon nan Jesús ato yoia cuscacoin oinnifo. Nannoshon chashoanun facu pichashonifo.

¹⁴ Ascashon man itishara huashoafono Jesús yafi afu rafuafo ari fonifo. Nococatan nantifi sapa ano tsaonifo.

¹⁵ Ascashu tsaofaon Jesús ato yoini, —Un matomaqui nataima un fasi mato futan chashoanun facu piyopaimisi.

¹⁶ Ascacun un mato iquisi icon yoiyoi uncai afanan mato futan piyoima. Nan man Upa Dios niaifoan nantifi iquina ano nocoaitian yafi natian un acai cuscan ahuu cuscaramainquin man tapishquin, —ishon ato yoini.

¹⁷ Ascatan cucho finifoan Apa Dios cufiyoni, —¡Aicho! Upan —huatan. Ato cucho inanqui yoini, —Ayapacahuun.

¹⁸ Un afanan mato futan na fimi unu ayaima nan un nasoaitian uhuun Upa Dios fu nantifiton niaifo un iishquiran, —ato huani.

¹⁹ Asca huatan Jesús misi finifoan afanan Apa cufiyoni, —¡Aicho! Upan, —huatan. Torupacushon atoti inanqui afanan ato yoini, —Naafin uhuun caya cuscaraquin. Un nantifi yorafuhoanoashu nai. Ascacun nan man piaitian ua shinanfafaicahuun, —ishon ato yoitan.

²⁰ Nanscarifi huaquin cucho finifoantan ato ayamapacuquin yoini, —Na ayatihunshon un mato ahuara funa shara yoi isca huaquin, “Uhuun imi foaino un matohuunoashu nai man ufu uhuun Upa Dios ari ipanoni,” —ishon ato yoini.

²¹ Ascashon Jesús afu rafuafo yoiyoi isca huani, —Nuno ufu sapa ano tsaofan futsan ua ato achimai.

²² Ascan Upa Diosin tsain inon pacoai uhuunoa cununi cuscacoinfin un naicain. Ascafia nan nocofunun ua ato achimanai cainymanifin shara icuanaquin, —ishon Jesús ato yoini.

²³ Ascaiton nicacani afu rafuafo yocanonannifo, —¿Rato futsacaimun non achimaiquin? —icashu afi ranan yoinannifo.

Tsoacaimun fasi shara fnacaiquin

²⁴ Ascatan rato futsacaimun fasi finoinnifoan niaifocoin ishiquin icashu fochishmanantanannifo.

²⁵ Ascaifoan Jesús ato yoini, —Nan icoinra huama niaifofoan ato curushcain yonofafainmisifo. Ato asca huafiaquin yoimisifo, “ ‘Noco shara huashofafainmisiforan,’ ishon nocohuunoa yocahuun,” ato huamisifo.

²⁶ Asca huafiamisifo marifi ato cuscara iyamacahuun. Ascatamarocon facu pushco cuscara icahuun. Nanfo nan iyofafoan ato yonoafo cuscan ato ashotirofo. Ascatari niaifopaicquin futsafo shara huacahuun. Asca nan mato shara huafafainmisi nanfin niaifo iishquiquin.

²⁷ ¿Ascan ratotocaimun futsafo finoanquin? ¿Futsafo yonomafafainmisi iyamarai ato yonoshomisi? Nan icoinra huamafoan yoimisifo nan yonomitsamisitocain futsafo finoanquin ishon yoimisifo. Anori yoifiafo uncaifin mato yonoshomisiquin.

²⁸ Ascafia ahuara chacafo finonfiaqui man ua potama. Man uhuun nuua.

²⁹ Ascacun uhuun Upa Diosin ua catoan un afu niaifo inon. Nanscarifi aquin un mato catoan man ufu niaifo inon.

³⁰ Ascano un mato yoiai cuscan un niaifoanno marifi man ufu niaifofo iishqui. Nocon Upa Dios ari man ichanaintian marifi man ufu tsaoshquin. U futan pifain man ufutan ayashquin. Ascashu nocon caifo Israelifoan aton niaifofo man iishquin. Nan doce shoco noco caifofoan ato niaifo man ishquiran, —ishon Jesús afu rafuafo yoini.

—Pedro min futsafo, “Un Jesús oinmisimaran,” ishon yoiran, —Jesús huani
Mt 26.31-35; Mr 14.27-31; Jn 13.36-38

³¹ Asca huatan Jesús Pedro nan ahuun anu futsa Simón yoini, —Simón, Satanás Dios yocashon mia chaca huamapai. Umaqui mia imapaiquin.

³² Ascafia un mia Upa Dios cufishona min ua icoinra huafain afanan ua tanasharanon. Ascan min afanan uqui nasoaino ufu rafua futsafori min ato yoisharatiro ua tanasharanonfo, —ishon yoiaiton.

³³ Pedronun cumani, —Ifon, mia cunu muran iquimanaifoanno urifi un mifu iquitiro. Ascashon mia rutuaifoannori urifi un mifu natironan, —huaiton.

³⁴ Afanan yoini, —Pedro, un mia yoi. Tacara cuoataima min ato yoiquin, “Un Jesús oimisiraran,” ishon min ato yoiqui rafu non fusti huairan, —ishon Jesús yoini.

³⁵ Asca huatan Jesús ato yocani, —¿Un mato nichiyamuatian pui non forusa non sapato futsan maisi nichiano man ahuara futsari yopaiyamuamun? —ishon ato yocaiton.

Cumanifo, —Noncai ahuara futsa afanan yopayamuama, —huaifoan.

³⁶ —Asca natian pui ayashon mato pui fofain maton forusari fotacahuun. Asca nupu yopaiquin maton sahuuti shochiquirinoa futsahuunshon nupu ficahuun.

³⁷ Ascacun uhuunoa cununifo isca huaquin, “Arifi yoicaquin ‘man chaca huamisirán,’ huashquicani,” ishon uhuunoa cununi. Uhuunoa icon yoiamafiaquin nan icocoin yoi cafisca huaafo. Ascano uquin cununi cuscan samamashtacoin aiquin, —ishon ato yoiaiton.

³⁸ A fu rafuafoan yoinifo, —Oinpon. Na nupu rafu, Ifon, —huaifoan.

—Un mato yopaiyai cuscaai man tapiama. Ascacun non afanan aya tsainquimaquin, —ishon ato yoini.

Jesús Getsemaní anoshon apa cufini

Mt 26.36-46; Mr 14.32-42

³⁹ Nan camisi cuscan machi Olivo ano caino afu rafuafo achon fonifo.

⁴⁰ Nanno nocoshon ato yoini, —Upa cuficahuun Satanás mato chaca huamapaiyai cuscan huashcaquima. Ascacun ua potashcaquima cuficahuun, —ato huani.

⁴¹ Ato asca huatan chaimashta atomaqui caashon Apa cufinquin isca huani ahuun ratoconun mai chachipacufoan Apa cufini.

⁴² —Upa, min ahuara futsa yorafo numashqui atiramamainquin nan min apaiyai cuscan huahuu. Unfi mun itisharaquin atohuunoashu omitsiscacai naashquin, —Apa huaino.

⁴³ Ahuun oinmati afu nai muran ica aquí niriscatan mutsismainifoanni.

⁴⁴ Asca huaino fasi curushcain Jesús Apa cufini fasi ahuun nomuran nan omitsiscacai cuscan shinanquin. Ascaino imi foya niscan maiiqui futosomuni.

⁴⁵ Ascacaini afanan afu rafuafo ano caaquin oian man oshafo ini. Fasi aton Ifon omitsiscaiton shinancani oshafainnifo.

⁴⁶ Atoqui nocoshon oian oshafoan ato yoini, —Ahuuscain Upa cufitama man oshariai. Ascaquima Upa cuficahuun yoshin chacapan mato chaca huamapaiyai cuscan huashcaquima. Ua potashquimari cuficahuun, —ato huani.

Jesús achinifo

Mt 26.47-56; Mr 14.43-50; Jn 18.2-11

⁴⁷ Nan ato yoi ai muran yorahuanrasi nocotoshinifo. Nan afu rafumisi futsa Judascaifin rufobo oaino acho yora huanrasi funiquin. Nocotan Judaspan tamo tsoacatoshini.

⁴⁸ Ascaiton Jesús Judas yoini, —¿Judas, nan Diosin ua catoancaimun ua tamouqui tsoacaihuunshon mian ato achimaicai? —huani.

⁴⁹ Asca huaiton oincaquin afu rafuafoan Jesús yocanifo, —¿Ifon, non ato nupu rurapacutimomun? —ishon yocanifo.

⁵⁰ Asca huatan futsan nupu fifaitan nocon yorafohuunshon Dios cufimisi niaifocoinin ahuun oinmati pashtufain rurani.

⁵¹ Ascaiton Jesús yoini, —Unuhuu, —huatan afanan ahuun pafiqui funa futsa panichirishcatani.

⁵² Ascashon Jesús nocon yorafohuunshon Dios cufimisi niaifofu yafi ranushumuafu yafi Dios fu tsainti pushu cushumisifo yocani, —¿Ahuuscain nupu yafi coshatifo ya man uqui fuamun?

⁵³ Shafatifi Dios fu tsainti pushu muran un matofu icanocai man ua achipaiti huama. Asca na yamu man uqui fua Satanás maton ifoanno, —Jesús ato huani.

—Un Jesús oimisiraran, —ishon Pedronun yoini

Mt 26.57-58, 69-75; Mr 14.53-54, 66-72; Jn 18.12-18, 25-27

⁵⁴ Ascafiaiton achicashon nocon yorafohuunshon Dios cufimisi niaifocoinin ahuun pushu ano ionifo. Ascaino chipo achon Pedro cafiakin fishtanima.

⁵⁵ Umainti chii cutuhuashu yooaifoanno Pedrori atofu yooni.

⁵⁶ Ascaiton niaifoan ahuun oinmati shomayatón Pedro fuchini. Chii uruquin fuchashaiton ahuun fuso onanshon yoini, —Naafin nan Jesús fu imisiquin, —huaiton.

⁵⁷ Pedronun cumani, —Ma, ainfon. Uncai Jesús oinmisima, —huani.

⁵⁸ Man ascano futsanri afanan onanshon yoini, —Minfin nan Jesús fu imisi futsaquin, —huaiton. —Ma. Unmafinquin, —Pedronun huani.

⁵⁹ Man ascano chipo afanan futsanri onanshon yoini, —Nancoinfinquin. Jesús fu cahuacacaimisi. Nanrifi Galilea anoaran, —ishon nocofunu futsan yoiaiton.

⁶⁰ —Min yoiái cuscaí un tapiama. Uncaí Jesús oinmisimaran, —itapaiyaino tacara cuoni.

⁶¹ Nanscatanaino ifiacucahuan Jesús Pedro fuistani. Fuistanaiton nan Ifoan yoiái cuscan shinanriscatani, —Tacara cuoatama min yoiquin rafu non fusti huái, “Un Jesús oinmisimaran,” —Jesús huacun Pedro shinantani.

⁶² Umaintinoashu chifi caicaintan fasi uaicoinni.

Jesúsqui cashupainifo

Mt 26.67-68; Mr 14.65

⁶³ Ascaino nan cushuafo Jesúsqui cashu mutsamái taunifo.

⁶⁴ Ascano fufoposhon sutucashon yocanifo, —¿Mia tsoan acamaínquin? Oinyamafíashon noco yoihuu, —huanifo.

⁶⁵ Asca huashon roaqui futsanifo.

Niaifofoan Jesús yocanifo

Mt 26.59-66; Mr 14.55-64; Jn 18.19-24

⁶⁶ Shafatapaiyaino Israeliffoan niaifofosi nan yorafohuunshon Dios cufimisi niaifofo non Moisés cununi cuscan tapimamisifoan ichanannifo atoqui Jesús iyoafoan yocashcaquin.

⁶⁷ Ascashon atoqui iyoafoan yocanifo, —¿Mimmun Criston? ¿Diosin mia catonni? Noco yoihuu, —ishon niaifofoan yocaiton.

Jesús ato cumani —Un mato, “Ai,” huaitocai man ua icoinra huaima.

⁶⁸ Ascashon un mato yocaitoricai man ua cumaima.

⁶⁹ Ascacun natian yafi nantishon tapiquin uhuun Upa Diosin ahuamamishti huatiro futan un nantifi ato iquipacunacaran, —ishon yoiaiton.

⁷⁰ Afanan yocanifo, —¿Ascán mimmun Diospan facu? —ishon yocaifoan.

—Nan man yocain cuscafin unquin, —ato huani.

⁷¹ Ascaiton nicacaquin yoinifo, —Nicacapon. Afanancai ahuuoa tsain chaca huaifoan non yopaima. Naan yoiái cuscan nofocoin man non nicairan, —icashu yoinannifo.

23

Jesús Pilato ano iyonifo

Mt 27.1-2, 11-14; Mr 15.1-5; Jn 18.28-38

¹ Ascatan Israeli niaifofoan Jesús aton niaifocoin shinanmaqui iyonifo. Nan Pilato niaifofoan Romanonfoan ato niaifo iniquin.

² Ascano niaifofoan Jesús tsain paranacaquin yoinifo, —Na nocofunun fasi noco yorafa fucash huaquin ato yoiái, “Romanon niaifofoan mato pui yocaiton inanyamacahuun,” ishon yoiáfain “Un Diospan facu un mato niaiforan,” noco huaran, —ishon Pilato yoinifo.

³ Ascaiton Pilatonun yocani, —¿Mimmun Israeliffoan niaifo? —ishon yocaiton.

Jesús cumani, —Nan mian yoiái cuscafin unquin, —huani

⁴ Ascaino Pilato nocon yorafohuunshon Dios cufimisi niaifofo yafi nanno nia futsafo ato yoini, —Na nocofununcai ahuaara chaca yoima. Ahuashtacái ahuun nuama non iquimanai, —ishon ato yoini.

⁵ Ascafiaiton fasi curushcain cumanifo, —Na nocofununfin ato yoiquin Judea maitio fasi ato fucash huafoanfaini. “Romanonfoan niaifo non potanon,” ishon yoiáquin. Tau huaqui Galilea anoafu yoiqui fucash huatan nunorifi man oaran, —huanifo.

Jesús Herodes ano iyonifo

⁶ Ascaifoan nicaquin Pilato afanan ato yocani, —¿Na nocofunun Galilea ano? —ishon ato yocaiton.

⁷ —Aifain, —huaifoan. —Asca un Herodesqui Jesús nichinonquin. Nan Galilea ano niaifoquin. Ahuuscamaín huaicái afi noco yoinon, —ishon Pilato yoini. Nantianri Herodes arifi Jerusalén ano oni.

⁸ Jesús aquí nocoaiton fuchitan Herodes unimacoinni. Fasi oinpaimisishaquin. —Ahuamamishti noco ismapainonran, —ishon ahuun nomuran shinanni.

⁹ Ascashon fasi ahuafo Jesús yocapaifaitocái cumanima.

¹⁰ Ascaino nocon yorafohuunshon Dios cufimisi niaifofo yafi Moisés cununi cuscan tapimamisifo Herodesqui fasi chanirianifo chaca huacaquin.

¹¹ Ascaino Herodes futan ahuun ranushumuafoanri fasi cashumutsama huaquin roarianifo. Niaifofoan sahuuti sahumatan Pilato ano afanan nichinifo.

¹² Pilato fu Herodes shara huantananyamafiamisishaquin nantian shara huantanannifo. Jesús achicanisi raunannifo.

*Niaifoaŋ ato yononi Jesús rutunonfo**Mt 27.15-26; Mr 15.6-15; Jn 18.39-19.16*

¹³ Ascacun Pilato aŋanan ato cunani. Nocon yorafohuunshon Dios cufimisi niaifofo yafi niaifofo futsafori ichanan huashquin.

¹⁴ Ascano ato ichanan huashon ato yoini,

—Man uqui na nocofunu ihuua. Man ua yoia naton yorafo tsain chaca yosian Romanonfoan aton niaifo non potanon, icaran ishon man ua yoia. Ascafiacai ascarama. Maton ointaifi un yocafiaitocai man ua yoiai cuscan ua cumaqui chaca huama.

¹⁵ Herodesricai ahuunoa ahua chaca nicama nan man yoiai cuscan. Ascacun Herodes nocoqui aŋanan Jesús nichian. Na nocofununci ahua chaca huamafinquin naashquin.

¹⁶ Ascacun un onaintimaiyoi catanon, —ishon ato yoini.

¹⁷⁻¹⁸ Ascaino mucainifoannifo. —Na nocofunu rutuhuu. Barrabás noco cainmashohuun, —huaifoaŋ. Fuusititiansi Pilato a cunu muran iqiafo fusti ato caimapaoni. Faritifi nan yorafoan cainmapaiyaifo Pilaton ato cainmashopaoni.

¹⁹ Nan Barrabásfin yora rutumisi iniquin. Nantori yoini, —Romanonfoan niaifo non potanon, —ishon yorafo yoini. Ascaiton cunu muran iquimanifo.

²⁰ Ascaifoaŋ aŋanan Pilatonun ato yoini Jesús nichipaiquin.

²¹ Ascafiaino aŋanan mucainifoan yoinifo,

—Mastahuun, —huarianifo.

²² Ascaifoaŋ aŋanan Pilato ato yoini, —Ahuuscacufin. Ahuacai chaca huamafinquin. Ahuashtacai chaca huatananma napanan. Unfin onaintimashon nichiqui catanon, —ishon ato yoini.

²³ Ascafiaino oi ashcafinin, —Mastahuun, —huarianifo. Yoiquin unuyamacaiyaifoaŋ Pilato shinantani ascaiton, —Mafin acahuun.

²⁴ Man fasi yoiriaicai asca nan man apaiyai cuscan huacahuun, —ato huani.

²⁵ Nan Barrabás yora rutufain niaifo potapaifiamisicun nancai cunu murannoa cainmafain Jesúsrocon at inanni nan apaiyaifo cuscan huanonfo.

*Jesús ihui coyan iquinanqui mastanifo**Mt 27.32-44; Mr 15.21-32; Jn 19.17-27*

²⁶ Jesús iyocaquin oianfo Simón pushurasi patasharinoashu oaiton fuchitan Simón Cirene anoa yononifo, —Ihui coyan iquinan noco foishoicahuun, —ishon iyamafainifo. Jesús rucacaino achon iyashon foni.

²⁷ Ascaino yorahunrasifo ya ainfori achon fonifo. Nan ainfofo uaifonifo aton Ifo manocani.

²⁸ Ascaifoaŋ ifiacucahan Jesús ato yoini, —Jerusalén anoa ainfofoan, uhuunoashu uaiyamacahuun. Mafiri uaicain maton facufohuunoashu uacahuun.

²⁹ Manfin chipo omitsiscaquin yoishquiquin isca huaquin, “Non facuomafofi shara icuanaquin no fu omitsiscanonfomaran,” ishon man yoishqui.

³⁰ “Machi nocoqui maocoano non nai futsuafin shara itiroquin. Omitsiscashquima,” ishon nannori man yoishqui.

³¹ Un ahua chaca huayamafiamisicun ua isca huacani. Ascans tsoan ahua chaca huaquin unuyamacaiyaifofin fasi finacaicani omitsiscamashcaniquin, —ishon Jesús ato yoini. Ascashon Jesús iyonifo mastafocaquin.

³² Ascashon yomutso rafuri iyonifo Jesús ya mastafocaquin

³³ Ascatan anoshon mastaifoanno noconifo. Nanno ahuun anu mapo shao ini. Nanonshon Jesús mastanifo. Ascashon nocofunu chaca rafuri ocuma futsa futsafain ocuma futsari futsa mastanifo.

³⁴ Ascashon mastaifoan Jesús Apa cufini,

—Upan, ato rau huahuu. Ua isca huaifo cuscan tsoan tapiamaquin. Un min facufiacun tapiafoma, —ishon Jesús apa cufini.

Mastacatan ahuun sahuuti pashcananshaquin. Aya cashuti ya cashunifo nan finonmanaton ahuun sahuuti fiqui tau huani.

³⁵ Nanno yorahunrasi mapo cashon oinnifo. Ascashon niaifofoanri roaqui futsacaquin yonifo,

—Non oinon. Futsafo numamisi cuscamain afiri numaiquin nan Diosin catonni Cristo huashuforan afiri numaicain futsafo numamisi cuscan, —ishon yoinifo.

³⁶ Ascaino ranushumuafu aqui cashupainifo. Fimi unu focashcoin muran mishan pocotan inanpaicaquin.

³⁷ Ranushumuafoaŋ yoinifo, —Minmain Israelifoan niaifoquin mifiri numahuu, —huanifo.

³⁸ Ascashon ahuun mapo manaonri aqui cununifo.

ISRAELIFOAN NIAIFORAN

ishon.

³⁹ Ascaino afu masta futsan Jesusqui tsain chaca huani.

–Minmain Cristoqui mifiri numacain nocori numahuu, –huaiton.

⁴⁰ A fu masta futsan yoini, –Asca huayamahuu. ¿Minmun Diosqui ratuimacai?

⁴¹ Non chaca huamicicufin noco mastafoquin. Asca Jesuscai ahua chaca huayamafi-amicicun mastaforan, –ishon futsan yoini.

⁴² Ascashon nantori yoini, –Ifon, Dios niaifo ari nocoshon ua shinanhuun, –huaiton.

⁴³ Jesús cumani, –Icon un mia yoi. Na shafatan min ufu ari iquicaiquin. Nanno fasi sharacoin. Min ufu unimacoin sharapacunacaran, –huani.

Jesús nani cuscan

Mt 27.45-56; Mr 15.33-41; Jn 19.28-30

⁴⁴ Asca huatanaino fari masafinin racafiashu nan maitio faquishpacucahuani.

⁴⁵ Ascainocai fari chashayonima. Ascashu man fari caino afanan shafani. Ascaino nantianri Dios fu tsainti pushu murannoa Dioshuunoashu panomanhuan pochimua aficoín nushmancayan fashnupacucahuani.

⁴⁶ Ascaino Jesús Apa cunainifoanni oi ashcafínin,

–Upan, miari ua ihuicoínhuun, –huatan shacaica unufaini naani.

⁴⁷ Ascaiton ranushumua niaifoan yoiquin. –Icocoínfinquin na nocofununcai ahua chaca huayomisima. Fasi sharacoin. Nan non oian cuscan nantifi Diosin acarán, –ishon ranushumua niaifoan yoini.

⁴⁸ Ascaiton oincani fasi manocoincáni fonifo.

⁴⁹ Ascaiton ahuun yorahuafo yafi nan ainfofo Galilea anoashu afu foafoan chai nishon oinnifo.

Jesús mai huani

Mt 27.57-61; Mr 15.42-47; Jn 19.38-42

⁵⁰ Nannori nocofunun ahuun anu José Israelifoan aton niaifo ini. Nan nocofununfin Dios tanasharapaicoinniquin.

⁵¹ Nantoricai niaifo futsafoan shinainfo cuscan shinannima. A niaifofin Arimatea mai anoa iniquin. Arimatea nan pushurasi Judea muran ini. Nantorifi Cristo nan Diosin catoan manapaoni aton niaifo inon.

⁵² Ascashu cashion José Pilato yocani. –Un Jesús ahuun caya toquirininhuan quini muran mai huapairan, –ishon.

⁵³ Ascano yocafaini cashion a ihui coyan iquinanqui mastafo fotomapacuafoan ahuun yoratishton racoshon toquirininhuan quini muran mai huani. Jesús naataima quini puhuunifo nan murancai tsoa maiyomisima muran Jesús mai huani.

⁵⁴ Tunutitian man nococuanaino Jesús mai huani. Nan shafatan itishara huamisifotian ini.

⁵⁵ Ascaino nan Galilea anoashu ainfofo Jesús fu fuitafoan José Jesús mai huaiton oinsh-caquin mufainifo. Ahuuscashomain rataicain oinsharanifo.

⁵⁶ Ascashu nan ainfofo afanan aton pushu ano nasofainifo. Ininti shara itishara huai focani. Unupa yafi mutopa inin shara fii focani fonifo. Jesús ahuun caya camaqui ocashcaquin. Ascaffaino tunutitian nasoyonifoma. Finonyocani. Israelifoan yononi cuscan tunutitian tsoa raqui cayotiroma ini. Ascacun nan nicacoinnifo.

24

Jesús funini cuscan

Mt 28.1-10; Mr 16.1-8; Jn 20.1-10

¹ Israelifoan tunutitian iyoco futsaino funamanrishta aton ininti rafu ya Jesús maia ano fonifo. Iquisi ininti ati shara huafaincáni.

² Nococaquin oianfo quini ahuun fupoita toquirininhuan tocoro man fupucua ini.

³ Ascaino iquifainpaiquin oianfo aton Ifo Jesús ahuun cayacai ano inima.

⁴ Ascaiton oinquin aton nomuran shinannifo, –¿Raquimun ahuun caya foafoquin? –ishon shinanpaiaifoanno nocofunu rafu ato sahuutifoya chashatanaino atoqui niriscatanifo.

⁵ Ascaino ainfofo fasi ratuocincani fuoi futsunifo. Ascaifoan Diospan oinmati rafutan aton yoini, –¿Ahuuscaquimun yora nia man funaicain nan yora naacun mai huamisifo murannoa?

⁶ Afanancái nunomafinquin. Manfin funiaquin.

⁷ ¿Galilea ano matofu iyoshon mato yoimisimun man shinainmacai? Mato yoimisi isca huaquin, “Chacafoan ua achishon ua mastafo un naafishu osha rafu non fusti finontan un afanan funishquiran,” mato huamisi nanmun man shinainmacai, —ishon ato yoinifo.

⁸ Ascaiton nan Jesús ato yoimisi cuscan shinanriscatanifo.

⁹ Ascatan ainfofo nasofaincani nan once nocofunufu Jesús fu rafumisifoquin chani-toshinifo. Nanna futsaforifi nan rama oinfainafu cuscacoin ato yoinifo.

¹⁰ Nanfofin María Magdalena non Juana non Santiago ahua María non ainfo futsafori nanfo atoqui chanitoshinifo.

¹¹ Ascafiaifoancai ato icoinra huanifoma. —Icon yoicanimaran, —ato huanifo.

¹² Ascaiton nicafaini Pedro ichoni toquirinin huaa quini muran oincai. Nocotan tucupacucahuan quini naisquin oian ahuun racoita fusti nanno mania ini. Ascaino Pedro —¿Ahuuscamun aaquin? —icaini cani.

Jesús Emaús fain cani cuscan

Mr 16.12-13

¹³ Nan shafatanri Jesús tanamisi rafu pushurasi Emaús ano fonifo. Emaús Jerusalén chaima ini.

¹⁴ Nan rafu focaquin Jesús aquitafo cuscan afi rafu yoinanfonifo.

¹⁵ Ascaifoanno Jesuscoin afanan atoqui nocotan.

¹⁶ Ato fu cafaitocai tsoan onannima. Diosin ato onantima huaino.

¹⁷ Ascaiton Jesús afincoin ato yocani,

—¿Nocofunu rafutan, raquiri man yoinanfoi caimun? —ato huaino. Pusitama nituriscatanifo.

¹⁸ Ascaiton naan Cleofas fustiton cumani,

—Mirus fusti Jerusalén ano min icatoracafin min tapiamaquin na rama iquitan cuscan, —huaiton.

¹⁹ —¿Ahua ahuuscaitamun? —ishon ato yocaiton.

—Jesús Nazaret anoaya non tsainquin. Nanfin Diosin tsain yoimisiquin. Diosin ahuun curushhuunshon noco yoimisi. Dioshuunshon ahuamamishti noco huashomisi. Ahuun tsainman yora caya huafain ahuaa sharafo noco huashomisi. Nan acai cuscan nantifi man non oian. Diosin yafi nantifi man non oian. Nocofunu sharacoinfin non oinmisi.

²⁰ Ascafiaiton nocon yorafahuunshon Dios cufimisi niaifofo non nocon niaifofoan achishon mastaitafo.

²¹ “Nancairocon nocon caifo Israelifo nocon Numamisi ipainonran,” non huamisi. Ascanatian man naita shafa rafu non fusti man finoan.

²² Na funamanri ainfofoan no fu focashon man funatanafo ahuun caya quini muran yamaiton.

²³ Ascashon naso furan noco yoirafo ahuun caya anocuma. “Ahuun oinmati afu nai muran ica rafutan yoirafo Jesús man afanan niaran,” noco huafo. Ascacun non shinan “¿Ahuuscamun aaquin?” ishon.

²⁴ Ascaino nocomaguinoashu rafu ichocashon oiancai ano Jesús ahuun caya icama. Naan ainfofoan yoirafo cuscan iconcoinran, —ishon non yoi.

²⁵ Ascaifoan ato yoiqui isca huani, —¡Ohua! Manfin tatimacoinfoquin. Diosin tsain yoimisifoan yoinifo cuscan mancai icoinra huacuanama.

²⁶ Man cununi isca huaquin, “Diosin yonoa nan catoan Cristo omitsiscayotan. Apa Dios fu niaifofoan iishquiran,” icashon ahuunoa cununiran, —ishon Jesús ato yoini.

²⁷ Ascacun tau huaquin ahuunoa Moisés cununi cuscan yoifain Diosin tsain yoimisifoanri ahuunoa cununifo yoifain nantifi Diosin tsain ahuunoa cununi cuscan atofu cafoquin shafacafi ato yoi foni.

²⁸ Ascano Emaús ano man nocoti chaima nan rafutan shinannifo, —Noco finonfaini cairan, —ishon shinannifo.

²⁹ Ascatan nan rafutan yoinifo —Cayamahuu. Man fari caiquin. No fu iyopun, —huariaifoanno atofu caani.

³⁰ Ascatan piaifoanno Jesús misi finifoantan Apa Dios yoiqui isca huani, —¡Aicho! Upan, non yopai cuscan min noco inanmisiran, —huatan. Misi torupacushon aton inanni.

³¹ Ato inainton Dioshuunshon Jesús onanriscatanifo. Onantapaiyaifoanno atomaguinoashu yamariscatani. Afanancai tsoan oinnima.

³² Ascano afi rafu yoinannifo, —Noco fu fain oquin Diosin tsainhuunoa cununi cuscan noco yoi fuaino non mua nocon ointi fupuisharatanaiton. Ahuun tsain sharacoinran, —icashu yoinancatan.

³³⁻³⁴ Ascashu Jerusalén ano nasoriscafuraniño nan Jesús fu rafuafo once funashcaquin. Ascashon ato fuchinifo ichananshu nan once yoinainfoanno, —Icon, nocon Ifo funia. Pedro man oinmanaran, —ishon yoinifo.

³⁵ Ascaifoanno nan rafu Emaús anoashu fua rafutari yoinifo, —Noficoiri Jesús man non oian Emaús fain non caino noco ahuunoa Diosin tsain yoia. Ascatan noco misi torupacushaiton man non onanriscatanaran, —ishon nan rafutari ato yoinifo.

A fu rafuafoqui Jesús niriscatani

Mt 28.16-20; Mr 16.14-18; Jn 20.19-23

³⁶ Nan yoiriaifo muran Jesús afanan atoqui niriscatani. Ascashon ato yoini, —Maton ointi unimacain isharacoincahuun, —ato huani.

³⁷ Ascaino —Yoshiran, —icashon shinannifo. Fasi mustairitan ratucoinifo.

³⁸ Ascaifoan Jesús ato yoini, —¿Ahuuscai man ratuain? ¿Ahuuscai maton nomuran man icoinra huaimamun?

³⁹⁻⁴⁰ Ua oincahuun. Uhuun mucun yafi uhuun tau oincoincahuun. Pirico tohua. Nan uncoinfiquin. Yoshincai ua cuscara namiyacain shaoyamafinquin. Man manfin oincain shao yacain un nami yaran, —ishon ato yoini. Ato yoiquin asca huatan ahuun mucun tohua yafi ahuun tau ato ismani.

⁴¹ Ascaiton oincaquin ato nomuran shinannifo, —Namaparaca non oincatin, —ishon shinannifo. Icoinra huacuatama fasi aqúi unimacoinnifo. Ascaiton nan iconcainran huacacainonfo ato tushu yocani.

⁴² Ascaiton shiman shoi inannifo.

⁴³ Ascano aton ointaifi pini.

⁴⁴ Ascashon afanan ato yoini, —Munfin mato yoiyomisiquin. Uhuunoa Moisés non Diosin tsain yoimisifoan non fanainti uhuunoa cununifo cuscan nanscacoifin un aiquin, —ishon Jesús ato yoini.

⁴⁵ Ahuun shinanpan aton nomuran nanumana aqúi cununifo cuscan tapisharanonfo.

⁴⁶⁻⁴⁷ Ato yoini, —Diospan tsain cununi isca huaquin, “Cristo nan Diosin catoan naafiashu afanan osha rafu non fusti finontan funishquin.” Ascacun uhuunshon ato yoifoan-fafaintacahuun aton chaca shatucashon shinansharaifoan un ato chaca soashonon. Jerusalén ano ato yoiqui tau huatacahuun. Ascashon nan manifoati ato yoifoanfafaishcaquin.

⁴⁸ Ascashon un mato yoiaiton man oian cuscan yafi man nica cuscan futsafori yoipacushacahuun.

⁴⁹ Ascafia nuno Jerusalén ano oinyocaquin. Upa Diosin yoiyotiani cuscan un ahuun Yoshin Shara matoqui nichishqui. Ascano matoqui nocoshon ahuun curush mato inain. Nantian un mato yonoa cuscan man futsafo uhuunoa ato yoitiro, —ishon Jesús yoini.

Jesús nai muran cani cuscan

Mr 16.19-20

⁵⁰ Ascashon Jesús Jerusalén anoshon Betania pasoato ato iyoni. Betania pasoato nocoshon Jesús mushainacahuan yoini, —Upa Diosin, fasi uhuunshon tapimisifo cushusharapacahuun,

⁵¹ —huatan atomaquinoashu Jesús nuinacahuan Apa Dios icano ari cani.

⁵² Ascaino nanno amaquinoashu naso furanifo. Yoinifo, —Jesús, min nocon Ifo fasi sharacoin. Non minhuun noiran, —ishon yoinifo. Yoicatan Jerusalén ano naso furancatan fasi unimacoinnifo.

⁵³ Dios fu tsainti pushu muranshon Dios yoisharariapaonifo. Nanti.

Juan Jesushuunooa Cununi

Jesucristohuunooa Juanpan cununi

¹⁻² Natian Jesucristohuunooa un mato yoicain man tapinon. Ahuashta oniataima Cristo Apa Dios fu iyopaoni. Arifi Diosin. Apa Diosin shinain cuscari arifi shinanmisiquin. Nannori fusti ahuun tsain.

³ Ahuunshon Upa Diosin nantifi onihuaniquin. Cristohuunooamacai ahuashta onihuanima. Arusu fusti Apa futan nantifi onihuaniquin.

⁴ Ahuunooashu fusti yora nitirofoquin. Aafin chashamati cuscaraquin. Upa Diosin ahuu cuscaramainquin arus fusti yorafo oinmatiro.

⁵ Faquish muran chashamatinin noco oinmasharatiro. Nanscarifiai yora chacafo murannoari Cristo noco oinmatiro non Dios tanasharanon. Nan chacafoancai Cristo unumatiroma.

⁶⁻⁷ Ascano Upa Diosin Juan nichini Jesucristohuunooa yorafo yoinon. —Jesushuunooashu yorafo Dios fu ipatiro. Upa Diosin mato tapimapaiyai cuscan Jesushuunshon mato tapimatiroiran, —ishon Juanpan ato yoini. Nannori ato yoini icoinra huanonfo.

⁸ Juanpacai yorafo Dios ya imapacutiroma. Diosifin man Juan nichiniquin ato yoinon. —Jesucristo fustichifin noco Dios ya imapacutiromoquin, —ishon ato yoinon.

⁹ Yoiyoni cuscan atoqui noconi. Criston iconquin Dioshuunooa tapimatiro. Diosin nantifi yorafoti imapaiyai cuscan ato tapimamisi.

¹⁰ Nanton mai yafi yorafoti onihuafricanicucai atoqui nocoaiton tsoan onannifoma.

¹¹ Ahuun mai ano nocofiaitocai ahuun yora Israelifoan oinpainifoma.

¹² Asca huafianfoanno, nan noiaifoan icoinra huanifo. Ascaiton ato yoini isca huaquin, —Man ua icoinra huaashu Upa Diosin Facu man itiroran, —ishon ato yoini.

¹³ Yorafoancai Diosin Facu huatirofoma Diospan Facu inon. Ascashon tsoancai yoiqui isca huatiroma, —Uhuun ahuin un facu nanumatiro. Caianshu Diospan Facu inon, —ishoncai tsoan anori yoitiroma. Diosin fustiton ahuun facufo cainmatiro. Noncai asca huatiroma. Upan Diosin apaiyai cuscan Jesús icoinra huafoti aton nomuran fiananantiro ahuu facufo ishcaquin.

¹⁴ Ascan Criston Apa Dios icanoashu mai ano oni yoracoin ishquin. Nocoashu no fu iyopaoni. Nantifi yorafo noimisi. Nocoahuun ramapaicoin. Ahuun tsain iconcain. Arusu fustifin Upa Diosin facucoinquin. Apa Dios shara imisi cuscan arifi nanscacoimmisiquin. Man non oinpaoni.

¹⁵ Ahuunooa Juanpan yoini isca huani, —Ua nicacahuun. Nanhuunooa un mato yoimisisiquin. Un mato Diospan tsainhuunooa yoioyofiamisi natian aficoim man matoqui noco. Un mato yoimisi cuscan nanfin Diospan facu oinquin. Unmaquian. Un caiantaima Apa Dios fu iyopaoniquin. Ascan ua fasi finoncoian, —ishon Juanpan ato yoiniquin.

¹⁶ Jesús nantifi noco shara huamisisiquin. Nocoahuun noiquin noco shara huafafaini. Nantiffain man non mumisisiquin.

¹⁷ Upa Diosin noco yonopaiyai cuscan Moisés nocon shunifo yoiniquin. Ascaiton ahunshon norifi non tapitiroquin. Moisés nanfo noco tapimafaino Jesucristo nocoqui oni nocoahuun ramapaicain aafin iconmiscoinquin noco ismapaoni.

¹⁸ Tsoancai Upa Dios oinmisima. Ascafia ahuun Facu fu rafumisiton ahuunooa noco yoimisisiquin. Ahuunshon non tapitiro ahuu cuscaramain Upa Diosiquin.

Juanpan yorafo unu muran iquimapacumisiton Jesucristohuunooa ato yoiniquin *Mt 3.11-12; Mr 1.7-8; Lc 3.15-17*

¹⁹ Ascano nocon caifo Israeli niaifofoan Jerusalén anoshon nan nocon yorafohuunshon Dios cufimisifo non ato fu niaifo patasharinofo Juan icano nichinifo. —Juan yocatacahuun, “¿Min tsoamun?” ishon yocatacahuun, —ato huaafo focashon.

²⁰ Juan yocaifoanno pusitama shafacafi ato cumani, —Uncai Diospan Furunma. Unricai Cristoma, —huaiton.

²¹ —¿Ascan min tsoamun? ¿Minmun Elías? —huaifoan. —Ma. Uncai Eliasma, —huaiton. —¿Ascan minmun Diosin tsain yoimisi nan nocoqui oiran Moisés noco huamisi? ¿Nan non manamisi minmun? —huaifoan. —Ma. Unmafinquin, —huaiton.

²² —¿Ascan min tsoamun? Noco yoihuun noco nichiafo non ato tapimanon. Mihuunooa noco tapimahuun, —huaifoan.

²³ Isaiás cununi cuscan nannoricoin Juanpan ato yoini isca huaquin, —Diosin mato yoipaiyai cuscan ua tapimana un mato yoinon. Tsoan istaipamashon un oi ashcafinitin yoimisi isca huaquin, “Nocon Ifo nocoqui oshquiquin. Nocoataima itisharacahuun.

Man ipaoni cuscan afanan ayamacahuun. Nantifi maton chaca potacahuun. Cayacafi isharashcaquin,” —ishon ato yoini.

²⁴⁻²⁵ Nicacashon nocon caifo Fariseofoan ato Juanqui nichinifo yocanonfo, —¿Min Cristo iyamacain, min Elías iyamacain nan non manamisi Diosin tsain yoimiscal min ahuuscashocon min yorafo unu muran iquimapacuamun? —ishon yocaifoan.

²⁶ Ascaiton Juanpan ato cumaquin, —Unfin ato unu muran iquimapacuaquin. Ascafiano nuno noco muran futsan nocoa. Mancái onanma.

²⁷ Un natian mato Diosin tsain yoifafaini. Ascafia afincoin chipo mato yoishquin. Fasi ua finoncoian. Un ahuaa shara huaa rafanancái un ahuun oinmatima. Uhuun ramapaiyamainocái un ahuun oinmati icuanamaran, —ishon Juanpan ato cumani.

²⁸ Nan pushurasi Betania unu Jordán oquirishtashon Juanpan nannoshon ato unu muran iquimapacuni. Nannoashuri atofu tsainni.

Jesusfin Diospan Chashoan Facu cuscaraquin

²⁹ Ascatan iyoconaino Juanpan Jesús aquí oaiton oinni. Ascanshon yorafo yoini isca huaquin, —¿Oincapon! Nan Diospan Chashoan Cahuashara cuscaracoin oi. Nanton nantifi yorafo nan icoinra huafotisi aton chaca soashonpacunaca.

³⁰ Un mato ahuunoa yoimisi cuscan, un mato yoiqui anaítiano nocofunu shara matoqui nocoi. Un caiantaima iyomisi. Ascan ua fasi finoncoian.

³¹ Unrifi un onansharayamafishon un yorafo unu muran iquimapacuaquin a nocon caifo Israelifoan a onanonfo, —ishon Juanpan ato yoiniquin.

³² Jesushuunoa Juanpan ato yoini isca huaquin, —Diospan Yoshin Shara nai murannoashu ruhui cuscara Jesusqui fotopacucahuanaiton. Uficoin un oian.

³³ Un onantaima Upa Diosin ua yoia isca huaquin, “Tsoan ua icoinra huai fo min unu muran iquimapacutiro. Futsa miqui oaino uhuun Yoshin Shara nan nocofunuhuun nuupacucahuashquin. A fu nitushquin. Nan oinquin min tapitiro uhuun Yoshin Shara matoya rafumashquin ahuun shinanshara maton nomuran shinanmaniran,” ishon ua yoia. Upa Diosin ua anori yoiyamacucái Jesús nan Diospan Furun urifi un onancuanama.

³⁴ Ascafashon mun oian. Ascan un mato iconcoin yoiquin nancaifin Diospan Furunquin, —ishon Juanpan ato yoini.

Jesús icoinra huaquin tau huanifo

³⁵ Iyoconaino afanan nanno Juan yafi ahuun tananmisifo rafu.

³⁶ Niafoanno Jesús ato finonfainaiton Juanpan oinquin ato yoini, —¿Oincapon! Nan Diospan Facu Chashoan Facu cuscara, —ishon ato yoini.

³⁷ Nicacatan nan rafutan Jesús mufainifo.

³⁸ Ascaiton Jesús ifiacucahan ato oinquin yoini. —¿Ahua man funaimun? —ishon ato yocaiton. —¿Tapimamisiton, rani min iquimun? —huaifoan.

³⁹ —Fucahuun un mato ismanon, —ishon ato yoini. Ascatan afu focaquin oianfo ica ini. Nanno afu yatapacunifo.

⁴⁰ Nan rafu Juanpan ato yoia cuscan nicacatan Jesús mufainifo futsan ahuun anu Andrés. Nan Andrés ahuun ochi Simón Pedro.

⁴¹ Jesús icano nococatan Andrés samamashta ahuun ochi Simón funai cani. Aquí nocoshon yoini, —Upa Diosin noco yoiyoni, “Un maton Numamisi matoqui nichishquiran,” ishon noco yoiyoni. Nan man non fuchia. Nanfin Cristoquin. Oinyohuu, —huani.

⁴² Ascantan foaifoanno Andrés Simón Jesusqui iyoní. Aquí nocoshon Jesús Simón oinquin yoini, —Minfin Simonquin Juanpan facu. Natian un mia anu futsa tuquihuanon. Non mia Cefas huairan, —ishon yoini. Cefas nahua tsainmanfin Pedro.

Jesús Felipe yafi Natanael cunani afu fononfo

⁴³ Ascan iyoconaino Jesús shinanni isca huaquin, —Un Galilea ano cairan, —ishon shinanni. Caquin Felipe fuchitan yoini, —U fu cahuun, —huani. Nicatan afu cani.

⁴⁴ Felipe non Andrés non Pedrori pushurasi ahuun anu Betsaida ano inifo.

⁴⁵ Ascatan Felipe Natanael fuchishon yoini, —Moisés Diosin yononi cuscan cununi isca huaquin, “Un Numamisi matoqui nichishquiran,” ishon Diosin yoini cuscan Moisés aquí cununiquin. Nannorifi Diosin tsain yoimisi futsafoan yoinifo. Nancai man non fuchiaran. Jesusfin José ahuun facu Nazaret anoquin, —huaiton.

⁴⁶ —¿Ahuatomun noco Nazaret ano shara huashotiroquin? —Natanael huaiton. —Ohuu, Oinshquin, —Felipe huani.

⁴⁷ Natanael aquí nocoaiton Jesús ahuunoa yoini, —Naafin Israelicoinquin. Diospan yora ipaicoin. Nantofin iconcoin shinanfaimisiquin. Paracái huamisisaran, —ishon Jesús ahuunoa yoini.

⁴⁸ Nicatan Natanael cumani, —¿Ahuuscashomun ua oinyamafiamisishaquin min ua onantiroquin? —ishon yocaiton. —Felipe mia cunataima un anoyamafiashton ihui huiguera namannoa un mia oian, —Jesús huaiton.

⁴⁹ Ascaiton, —Tapimamisiton. Felipe ua yoia cuscan iconcain. Minfin Diospan Furunquin. Nocon caifo Israelifo min nocon niaifoquin, —huaiton.

⁵⁰ Jesús cumani, —Min fimi huiguera ihui naman raca. Un ano yamafiashton un mia oian. Un anori mia yoiaiton mian icoinra huua. Min ahua shara finacaia min oinshquin.

⁵¹ Iconcain un mia yoionon. Min Upa Diosin nai muran icano oinshquin. Uhuunoashu Upa Diosin ahuun oinmati afu nai muran icafo mai arishon nai muran Diosin icano funishquin. Ascaiton min oinshquin. Upa Diosin icanoashuri mai ano fotoaino min ato oinshquiran, —ishon Jesús Natanael yoini.

2

Jesús ahuun tsainmansi unucoin fimi unu onihua

¹⁻² Man osha rafu ano Caná ano Galilea muranshon nocofunun ainfo fiaino yorafo anosi ichanannifo. Jesús non ahua non norifi afu rafumisifori noco yoimanifo. Ascano non cani.

³ Fimi unu man nutsoafono Jesús ahuan yoiquin, —Na focai afanan fimi unu yamafinquin, —huaiton.

⁴ Ascaiton, —Uhuashtan, funayamahuun. Uhuun yono un ato ismataimacai, —huani.

⁵ Ascaiton ahuan oinmatifo yoiquin, —Nan mato yonoai cuscan huashocaquin, —huani.

⁶ Nanno mai cutimahuan seis funupafu chaimashta tsaonifo. Fasi funupafu bidóntirofo. Treinta galones a muran iquitiro. Nocon caifo Israelifoan aton muchoquimuti anoashu muchoquimui futsunifo. Shinanpaoni, —Non iscain muchoquimuaino Upa Dios nocoqui unimatiroan, —ishon shinanpaonifo. Nocon shunifoan nannori noco yonopaoni.

⁷ Ascashon Jesús oinmatifo yonoqui, —Na cutimahuanfo muran unu fospi huacahuun, —huaiton. Fospi huacahuin cufirisacoinnifo.

⁸ Ascantan Jesús yononi, —Ichananfo cushumisi fuafaintan mumatahuun, —huaiton.

⁹ Nicaquin oinmatinin ichananfo cushumisi fuashon inainton muacai unuma. Fimi unucoin ini. Ichananfoan cushumisitocai Jesús aca cuscan onannima. Oinmatifoansi Jesús aca cuscan huaquin onannifo.

¹⁰ Ichananfoan cushumisiton Jesús fimi unu onihua onanshoma nan rama ainfo fian cunashon yocani, —Na fimi unufin sharacoinquin. Nan ichananfoti aquifin rufofo shara nutsocashon chipo onanshta ichapama shara amisifo. Ascan huafiainfoan minfin nan sharacai ahuun unutaquin fasi sharacapacoin noco amaiquin, —huani.

¹¹ Ahuamamishti yora atiroma cuscan huatiroshaquin Jesús nanno nan pushurasi Caná ano tau huaquin noco ismanquin. Ato ismani aamain Diospan Facucoinshofin ahuunshon ahuamamishti toan oinmisima cuscara huatiroquin. Ascano oincashon non afu rafumisifoan man non icoinra huani. —Icoifin Jesús Diospan Facucoinran, —ishon non shinanniquin.

¹² Ascatan Jesús ahua non ahuun ushtofu norifi afu rafumisifo nan pushurasi ahuun anu Capernaum ano non cani. Nanno osha rananyoni.

Jesús Dios fu tsainti pushu muranshon ahua chacafo potani

Mt 21.12-13; Mr 11.15-18; Lc 19.45-46

¹³ Diosin ahuun oinmati afu imisiton nocon shunifoan aton furun iyoafofosi finonmani rutunonma. Faritifi nanfohuunoa shinanpaonifo. Israelifoan noco fustitian. Nan fustiti nocoti chaima Jesús nan pushurasi Jerusalén ano cani.

¹⁴ Nannoashu Dios fu tsainti pushu murannoashu moifo non chashoanfo non ruhuifo ya inanmitsacashon ahuun rafanan pui fishcaquin. Nannori pui fiananan huamisifo tsaonifo.

¹⁵ Ascaiton Jesús ato fuchitan fichi coshatiqui tuchia atoqui sannaino. Chashoanfo non moifo non aton ichonquin futsani. Sapa camaqui aton pui machiafori arasaquin futsani. Sapari cushca huaiacufufoan potani.

¹⁶ Nan ruhui inanmitsamisifo potashon ato yoini, —Nafu ya Uhuun Upa Diosin pushu murannoashu fotocahuun. Ahuuscainun uhuun Upa pushu murannoashu man ahuafo inanmitsaicain ahuun rafanan pui fishcaquin. Afanan uhuun Upa pushu murannoashu ahuafo inanmitsayamacahuun. Uhuun Upa Diosin ahuun pushuca a murannoashu inanmitsati pushumafinquin, —ishon ato yoini.

¹⁷ Oincatan non afu rafumisifoan non shinanni isca huaquin, —Icon Diosin tsain nannori ahuunoa cununiquin isca huaquin, “Upa Diosin un min pushu cushusharapai a muranshon mia fusti shinanonfo. Ahua futsa a muranshon anonfoma. Ahua futsacai min pushu murannoa un oinpaيران,” —ishon cununiquin.

¹⁸ Jesús ascaiton Israelifoan nocon niaifofoan a yocanifo, —¿Ahuuscain Dios fu tsainti pushu muranshon min ato potamun? Diosin mia yonoaiton ahuaara tsoan atiroma cuscan noco ismahuu non mia icoinra huanon, —ishon yoiainfo.

¹⁹ —Man na pushu paonhuaca afanan osha rafu non fusti finontan un afanan mapoinni-foanshquin. Ufin ashquin, —ishon Jesús ato cumani.

²⁰ —¡Cuu! Nocon shunifoan cuarenta seis fari afianifo. ¿Ahuuscashocon osha rafu non fustisi min aquimun? —ishon cumanifo.

²¹ Ascafiatocai tapinifoma Jesús Dios fu tsainti pushuhuunoacai yoinima. Ahuun cayahuunoa afiri yoimuni.

²² Ascan chipo Jesús naafishu osha rafu non fustitan funiano noco yoiyoni cuscan non shinanni, —Icon Jesús yoini, “Nan pushu paonhuaca unfin shafa rafu non fusti un afanan funimashquicain,” ishon yoini. Nantian man non tapia ahuun cayahuunoa yoiran, —ishon non shinanni. Ascano Diosin tsain cununi cuscan huafain Jesús yoini cuscarí non icoinra huani.

Jesús nantifi yorafo onancoinni

²³ Ascan tsoanshta atirofoma cuscan huaquin Jerusalén anoshon Jesús ani. Ascan nanfo oincatan yorahuanrasifoan, —Nan Diospan Facucoinran, —ishon icoinra huanifo.

²⁴ Ascanfashon afoan shinainfo cuscan Jesús ato onancoinni. Icoinra huaiyamaifoan.

²⁵ Yorafoan aton nomuran shinainfo cuscaicai tsoan Jesús yoitiroma. Afincoinnmain nantifi onancoiainton. Aton nomuran shinainfo cuscan onancoinni. Icoinra huayofian-ishaquin tapini samamashta shinan futsaifoan.

3

Jesús Nicodemo tapimaniquin

¹ Nan nocofunufin Fariseo iniquin ahuun anu Nicodemo. Nanrifi Israelifoan aton niaifo patashari.

² Nantori Jesusqui yamu oshon yoini, —Tapimamisiton, non tapiafin Upa Diosin mia nichiniquin min noco tapimanon. Man nonfin tapiaquin tsoan atiroma cuscan min huaiton Dios fu rafuamatocai asca huatiroma cuscafin min huaaquin, —ishon yoini.

³ Ascaiton cumani, —Unfin iconquin mia yoicain. Nocofunu afanan cain futsanyamacai Diosin niaifo ano nocotiromafinquin, —huaiton.

⁴ Ascaiton afanan yocaquin, —¿Ahuuscashumun afanan nocofunun cain futsantiroquin? ¿Man anifofishu ahuscashucon ahuan shaqui muran afanan nanutiromun cain futsashquin? —huaiton.

⁵ Ascaiton afanan Jesús cumani, —Unfin iconquin mia yoicain. Yora unu muran iquimamutama ahuun chaca shatutama afanan Diospan Yoshin Sharahuunoashuri cain futsanyamashuricai Dios niaifo ari nocotiroma.

⁶ Futsafin futsa cainmatiroquin ahunfin canon. Nanscarifi aquin Diospan Yoshin Shara fustiton nocon cainma futsatiroquin. Norifi non ahuufin canon.

⁷ Un mia yoiái cuscarifi, cain futsatiroquin, huaiton. “¡Aira! ¿Ahuuscashucon non cain futsatirokun?” iyamahuu.

⁸ Fuufin nan fopaiyaiquiri fotiroquin. Fuun nicaflaquicai man tapitiroma raquiriashu futanmain raquiri foicain. Nanscarifiái yorafo Diospan Yoshin Sharapan ato cainma futsatiro. Ahuscashomain cainma futsatiroquin tsoancai tapitiroma. Manricai tapitiroma ahutianmain cainma futsaicain, —huaiton.

⁹ —¿Ahuuscashucon ascatirokun? —Nicodemo huaiton.

¹⁰ —¿Min Israelifoan tapimamisiflashomun na un mia yoiái min tapimacain?

¹¹ Un mia iconquin yoi. Nan un nica cuscan huafain un oian cuscan un mia yoi. Ascafiacai un mato yoiái cuscan man icoinra huama.

¹² ¿Nuno mai anoa ahuafo icai cuscan un mia yoiái icoinra huayamashu ahuscashon Diosin nai muran icariafo un mia yoiáiton min icoinra huatiromun?

¹³ Tsoacai nai muran camisima. Urus fustifin un nai murannoashu fotoaquin nocofunucuin iquiyoi. Un afanan chipo nasocainicain.

¹⁴⁻¹⁵ Nocon caifo Israelifoan tsoan istaipamashon chaca huapaonifo. Ascaiton oinquin Diosin rono paupan atoqui nichini ato nasanon. Ascanori Moisés Diosin yononi ihuiqui rono ointa huashon yayomashon nimainifoanni a oincanashu cayanonfo. Nanscarifi aquin uarifi ihui coyan iquinanqui nimainifoanshcaniquin nan ua icoinra huafu uhuunoashu Dios fu isharapacunonfo.

Upa Diosin nantifi yorahuun fasi noiquin

¹⁶ Unfin Upa Diosin Facu fustiquin. Ascafiashu nantifi yorafohuun fasi noiquin ua nichini atohuunoashu un nanon. Nan ua icoinra huafoti omitsiscapatamarocon Upa Dios fu ipasharanonfo.

¹⁷ Ua mai ano nichini un ato onaintimatama un aton chaca soashonon uhuunoashu nipanonfo.

¹⁸ Ua icoinra huafocai Upa Diosin ato omitsiscamapacunacama. Ascan tsoan ua icoinra huayamacun Upa Diosin ato onaintimai yoiyoni cuscan. Unfin Upa Diospan Facu fustiquin. Tsoan ua icoinra huayamashucaí omitsiscái unupacunacama.

¹⁹ Isca huaquin mato tapimai. Shafa yafi faquishcaí ositiroma. Nanscarifiai unfin Diospan Facu sharaquin. Ahua chacacai ufu itiroma. Upa Diosin ua nichini nan maitio shafa cuscara un imanon chaca shatunonfo. Ascafiacai yorafoan aton chaca potacasmacaniñin uqui fucasmacani isharashcaquin. Ascan Upa Diosin ato onaintimai. Aton chaca noicanicai uqui fupaicanima chaca shatucanashu isharashcaquin.

²⁰ Faquish noiquicai tsoa shafa oinpaitiroma. Nanscarifi aquin chaca noicanicai uqui fupaicanima. Uqui ranocani uqui oshon chaca huaifo cuscan tapicasmacani. Chaca huaifo cuscan ato oinmacasmacani.

²¹ Tsoa icoinsharapaiyaifofin uqui fucaniquin Upa Diosin ato amapaiyai cuscan aquifin futsafoti oinmacaniquin, —ishon Jesús yoini.

Juanpan nan yorafo unu muran iquimapacumisiton Jesushuunoa ato yoini

²² Ascatan chipofin Jesús yafi afu rafumisifo Judea mai ano non cani. Nanno atofu iyoni. Nannori aton chaca shatupaiyafoan non ato unu muran iquimapacuniquin.

²³⁻²⁴ Juan cunu muran iquimanataifoma arifi futsafo unu muran iquimapacuniquin. Nan Enón pushurasi chaimashtari Salim ini. Ano unu noa sharacoin. Anoshon ato unu muran iquimapacuni. Nanno furi furiaifoan ato unu muran iquimapacuni.

²⁵ Nantianri Juanpan tanamisifo ya nocofunu nocon caifo futsa fu fochishmanantanannifo. Ahuuscashucaimun unu muran iquimamutiroquin icashu fochishmanantanannifo.

²⁶ Ascatan Juan ano fonifo. Nococashon yoinifo, —Tapimamisiton, non mia tapimapai. Unu Jordán oquirishon min na nocofunu Jesusqui nocotan, “Nan Diospan Facu. Nocoqui nocooan,” ishon min yoita. Arifi natian yorafo unu muran iquimapacui. Nantifi yora aqui focaniran, —inifo.

²⁷ Nicaquin Juanpan ato cumani isca huaquin, —Diosin fustitofin catontiroquin ahuuscamañin huaicain.

²⁸ Uncai Cristoma. Upa Diosin ua yonoa un Cristohuunoa yorafo tapimanon aton chaca shatunonfo Cristo nocoaiton icoinra huashquin. Nannori un mato yoiaiton man nicamisi.

²⁹ Afanan un mato yoi ua nicahuun. Man man tapia nocofunun afu rafua yoitiro isca huaquin, “¡Aicho! Na ainfo min ua fuchimana natian un rama fia uhuun ahuin inon. Un aquí unimacoinran,” ishon funun yoiaino afu rafuan aqui unimatiro. Nanscarifiai un Cristo yamafiacun futsafoan nan Cristo Jesús nicacoainfoanno un fasi unimacointiro.

³⁰ Aafin Cristocoinquin. Uncai Cristoma. Ascan afanan un yoiqui chaihuaima ua tanatama Cristo fusti shinancoinonfo.

Nan Upa Dios icariashu oai

³¹ Criston Dios icariashu mai ano fotoni. Nantonfin tsoamamishti finoanquin. Un na mai anoashu caiantonfn na mai anoa ahuu cuscaramainquin un tapiaquin. Nan fustihuunoasi un yoitiroquin.

³² Ascafia Jesús oinmisi cuscan nicamisi cuscan noco yoiñaiton fustirasiton icoinra huaafo.

³³ Ascafia tsoan ahuun tsain icoinra huacashofin nanfoanfin tapitirofoquin Diosin tsain fasi iconcoin.

³⁴ Upa Diosin ahuun Yoshin Shara Jesusqui nichini afu rafupacunon. Nantifi ahuun curushu inanni. Diosin yoia cuscan nantifi nocori tapimani.

³⁵ Upa Diosin ahuun Furun fasi noicoiquin. Yonoa nantifi nai murannoa yafi mai anofoan aton ifo inon.

³⁶ Ascan tsoan Diospan Facu icoinra huashu afu ipatiro. Ascantarifi tsoan Diospan Facu icoinra huayamashu Diosin aqui sinaquin omitsiscamapacunaca. Ascan nan Jesús icoinra huafoma naacanashu afu ipatamarocon faquish muran omitsiscapanacaforan, —ishon Juanpan ato yoiniquin.

¹⁻³ Ascano isca huaquin yoinonannifo, —Nan Jesús yorahuanrasifoan icoinra huaifoan ato unu muran iquimapacui. Juanpan aca finonmafain iquimapacuiran, —icashu yoinannifo. Nan yorafoan Jesushuunooa yoini cuscan Fariseofoan nicafiacaquin aririma. Jesuscai afincoi ato unu muran iquimapacunima. Nonfin afu rafumisifoquin non ato iquimapacuni. Nan yorafoan ahuunooa yoini cuscan tapiashu no fu Judea anoashu Galilea ano nasoni.

⁴ Galilea anoashu Samaria mapaicaini.

⁵ Ascatan Samaria ano mapaicaini nanno pushurasi ahuun anu Sicar ano non noconi. Nanno chaimashta nan mai nocon shuni Jacob ahuun facu José inanni.

⁶ Nannori Jacob mai poquini a murannooa unu fishqui. Ascaino fari masafinin racano Jesús arusu nanno noconi. Fasi chai cunoashu oashu atsanacoin. Ascashu nanno tsaoyoni.

⁷⁻⁸ Non afu rafumisifo nantianri pushurasi ano cashon non tushu fini. Jesús nomifi aquicai ahuacui unu fitiro inima. Ascaino nantianri ainfon Samaritanon shafo nan pozo ano noconi ahuun cuti muran unu fiishquin. Ascan Jesús yocani, —Ua unu inanpun, —huaiton.

⁹ Nocon caifo Samaritanon oincasmanifo. Ato futancai piinifoma. Ascan nan ainfoan cumani, —Minfin Israelifoquin. Unfin Samaritanonquin. ¿Ascano ahuuscain mian unu yocaimun? —huaiton.

¹⁰ —Diosin mia inanpaiyai cuscan onanfain tapishonfin min ua unu yocacuanaquin. Na unun mia nimapacutiro, —Jesús huaiton.

¹¹ —Min cuti yafi rusfi yamai. Na pozo fasi noacoin. ¿Ascaiton ahuuscashomun min na unun yora nimapacutiro min fitiroquin?

¹² Nocon shuni Jacob pozo non a murannooa unu finon. Arifi nan unu ayani. Ascaino ahuun facufoanri ayannifo. Ahuun inafori ayamani. ¿Min nocon shuni Jacob finoanmun? —huaiton.

¹³ —Tsoan na pozo murannooa unu ayafishu chipo afanan nomitiro.

¹⁴ Ascafia tsoan na unu un ato ayamacai afanan nomipacunacama. Iconcoi na unu un inanquin a muran unu tsoi shara fuchoi cafiscái. Ayashu nan unuhuunooashu ipasharacointiro, —huaiton.

¹⁵ —Min nocofunu shara. Na unu shara ua inanhuun un afanan nomipacunonma un afanan nuno unu fiyononma —huaiton.

¹⁶ —Min funu ihuitahuun afanan nasoshquin, —huaiton.

¹⁷ —Uncai funuyamafinquin, —huaiton.

—Icon mincai funu fustiyama. Minfin funu rananyaquin.

¹⁸ Min funu mucu fustiti mia fimisifo. Natian min futsa fu ica. Min funucoioma fu. Icon min ua yoia, —huaiton.

¹⁹ —Natian un tapia min Diosin tsain yoimisi.

²⁰ Nocon shunifoan nuno machi anoshon Dios cufimisi inifo. Ascafiano min caifo Israeli-foan yoimisi isca huaquin, “Jerusalén anoshon non Dios cufitiroran,” ishon yoimisifo, —huaiton.

²¹ —Un mia yoinon ua icoinra huahuu. Chipo ahuutiaran tsoan afanan shinainma isca huaquin, “¿Ranishomun un Upa Dios cufitiroquin na machi anoshon iyamarai Jerusalén anoshon?” ishon afanan anori shinanshcaquima.

²²⁻²⁴ Non ranishora cufiainocai non chipo ascaran shinainma. Na machi ano iyamarai Jerusalén anocai non ascainocai ahuama. Ahuuscashomian non Dios cuficain, nan Diosin tapipai. ¿Nocon nomuran non Dios cuficoiunmun? ¿Ahuun Yoshin Sharahuunshon non Dios cuficoiunmun? Nan Diosin nicacoiunpai. Aafin Yoshin Sharaqin. Non Dios cuficoiainton ahuun Yoshin Shara fustiton noco tapimatiro non cufisharanon. Ahuun Yoshin Sharahuunshon non Upa Dios cufiainton nanscara Upa Diosin fuchipai.

Ascafiahu manfin Samaritanonfoquin cufipaifaiquicai nocon Upa Dios man tapisharafoma. Asca nonfin Israeliifoquin non nocon Upa Dios tapicoian. Man non tapiari nan Numamisi arifi Israeli iishquin, —huaiton.

²⁵ —Mun tapia Upa Diosin chipo nocofunu nocoqui nichishquin. Aafin chipo nocoquin ooshquin. Ahuun anu futsa Cristo. Afin nocoshon noco nantifi shafacafi tapimashquin, —afanan ainfoan yoini.

²⁶ —Unfin Cristoquin, —ishon Jesús cumani.

²⁷ Ascan Jesús ainfo fu tsaincaino non afu rafumisi aqui noconi. Jesús ainfo fu tsaincaiton oin non mustairini. Ascafiahu non yocanima, —¿Ahuuscain min ainfo fu tsainquinmun? —ishoncai non yocanima. —Min ainfo yoia cuscan noco tapimahuu, —ishoncai non anori yoinima.

²⁸⁻²⁹ Ascantan nan ainfo ahuun cuti potafainicai ahuun pushurasi ano cani. Nocoshon ahuun yorafoti yoini, —Nocofunun uqui nocoshon un amisi cuscan nantifi ua yoiacquin. Nanraca Cristo. Oin fucapon, —ishon ato yoiniquin.

³⁰ Nicacatan nan pushurasi anoashu Jesusqui funifo.

³¹ Nantianri non afu rafumisifoan non yoini, —Tapimamisiton, piyohuu, —non huaino.

³² —Unfin tushuyaquin. Un tushu ya cuscacai man ahuunoa tapiama, —ishon noco yoini.

³³ Ascaiton nicai non yocanonanni, —¡Airal! ¿Tsoancainco tushu fishoamun? —ishon non yoini.

³⁴ —Uhuun Upa Diosin ua nichini un ahuun yono ashonon. Afin ua amapaiyai cuscan nantifi un ashoin. Nanfofin uhuun tushu cuscarafuquin.

³⁵ Man yomisi isca huaquin, “Yono noco mau ano fanafu cuscara oshu rafu non rafuri finontan non chitutiroran,” ishon man yomisi. Nanscarifiai man shinan raca chipo non yora Dioshuunoa yoitiro a Ifo huua afu ipashcaquin. Oinyocahuun. Yora ichaparasi natian itisharacani Diosin icoinra huashceni.

³⁶ Futsan yonoshotanfin chitushotiroquin. Nancai mau ifoan inansharatiro. Nanscarifi aquin futsan Diosin tsain icoinra huamano Upa Dios fu ipasharatiro. Nancafin ahuun ointi muran unimasharatiroquin. Upa Diosin a inansharacoinsquin. Icoinra huataima futsan yosiyomisi. Nan yosimisiri ahuun ointi muran unimashquin. Upa Diosin arifi inansharashquin. Ascaiton Diosin tsain yosimisifo yafi icoinra huamamamisifo nanscaracoin rafu. Upa Diosin ato inansharashquin aton ointi muran unimanonfo.

³⁷ Ascano iconcoin yomisisifo isca huaquin, “Futsan fanano chipo futsan nan yono chitutiroran,” ishon yoisimisifo.

Nanscarifiai futsan Diosin tsain yoiquin tau huano futsanri chipo yoiaino nantocafin icoinra huamaintiroquin.

³⁸ Mancai mai futsa ano yosiamafaiton un mato nichian nannoa man ato icoinra huamanon. Futsafoan nannoshon fasi curushcain yonoa Diosin tsain ato yosicaquin. Mancai nanno yonoama. Ato yosiqui chai huayamafishon man ato icoinra huama. Futsafoan aton yonohuunshon man ato icoinra huamaran, —ishon Jesús ato yoini.

³⁹ Ascaino nan ainfon Samaritanon ahuun caifoan pushurasi ano nocoshon ato yoini, —Un imisi cuscan nantifi ua puashon. Ua oinyamafiamisishaquin ua onancoianran, —ishon ato yoiaiton Jesús icoinra huanifo.

⁴⁰ Ascano nan ainfoan ato yoiaiton nicacani Jesusqui funifo ahuun tsain nicai fucani. Aqúi nocoshon, —No fu nuno iyopun, —huanifo. Ascaiton nicai Jesús atofu osha rafuyoni.

⁴¹ Ahuun tsain nicacaquin futsafoan icoinra huanifo.

⁴² Ascano icoinra huacashon ainfo isca huanifo, —Min noco yoifiaitocai non icoinra huama. Noficoin non ahuun tsain nicashon non icoinra huai nanton nantifi yorafu manifesti nocon Numamisiran, —ishon yoinifo.

Jesús niaifoon ahuun oinmatinin facu cayahuamani

⁴³ Ascano nan osha rafu yotan Jesús no fu nan Samaritanonfoan pushurasi anoashu Galilea ano cani.

⁴⁴ Jesús arifi Galilea anoashu pushconi. Nannoashuri yonopaoni. Ahuun yoraforifi nanno inifo. Ascano Jesús yoini, —Diosin tsain yoisimisiton ahuun pushurasi ano ahuunoa isca huaquin shinanfo, “Acái tsoamaran,” —ishon shinanfo.

⁴⁵ Ascatan Galilea ano noconi. Atirifi Galilea ano Jerusalén ano fusititlan fonifo. Nannoshon tsoan atiroma cuscan Jesús Diosihuunshon huani. Nantifi Jesús acái cuscan oinnifo. Ascán atoqui nocoano aquí unimanifo. —¡Aicho! Man min oaquín, —ishon Galilea anofoan yoinifo.

⁴⁶ Ascano pushurasi ahuun anu Caná Galilea ano Jesús nasoni. Nanno fari futsan Jesús ahuun tsainmansi uucoinfiacun fimi unu onihuani. Nantianri afanan nanno noconi. Nanno niaifon futsa ica ini. Pushurasi futsan ahuun anu Capernaum ano furun isininni.

⁴⁷ Ascaiton niaifoon nica Jesús Judea anoashu Galilea muran Caná ano oaiton nicai aquí oshon yoini, —Ifon, uhuun facu isininqi man nai. Uhuun facushta ua oinshoyopun ua cayahuashoshquin, —ishon yoini.

⁴⁸ —¡Ohuashta! ¿Ahuuscain yoran atiroma cuscan un huaiton man oinfiacaquicai man ua icoinra huaima? —ishon Jesús ato yoini.

⁴⁹ Ascán afanan nan niaifoon Jesús yoini, —Ifon, U fu cayoicapun uhuun facu nanonma, —ishon yoini.

⁵⁰ Ascaiton Jesús cumani, —Min facu ano catahuu. Min facucaí naima. Niifinquin, —ishon Jesús yoini. Jesús yoia cuscan icoinra huafaini cani.

⁵¹ Nanscatan caino ahuun oinmatifo aquí nococashon yoinifo, —Min facu man caya. Naima man niaran, —ishon niaifo yoinifo.

⁵² Ascaiton ato yocani, —¿Ahuutia farimun uhuun facu cayafaitaquin? —ishon ato yocaiton. —Fari masafnin racano ahuun yona matsifaitanran, —huanifo.

⁵³ Yoiaifoan nican apan shinanni, —Icon Jesús fari masafnin racano ua yoita, “Min facucaí naimafinquin. Niifinquin,” ua huaitaran, —ishon shinanni. Ascano ahuun yorafo yashon nantifiton Jesús icoinra huanifo.

⁵⁴ Ascano Jesús Judea anoashu Galilea ano nocoshon afanan tsoan atiroma cuscan ato oinmaniquin. Ato oinmaquin rafu huani.

5

Jesús nocofunu isininmisi Betzata anoshon cayahuani

¹ Ascano chipo Jesús Galilea anoashu Jerusalén ano no fu caní nocon caifo Israelifo fu fuusicai.

² Nanno chashoanfoan aton iquiti cunu ini. Nanno chaimashta ianman facushta ini. Cusumun pushu cahuan sharamishti mucu fustiti tsaocuafo.

³⁻⁴ Nannori isinin imisifo ichaparasi racanifo. Fushofo non chatofo non yoratisho quicurushui futsuafori racanifo.

Ascaino Diospan oinmati afu nai muran icaton nanno ian man facushta ano oi fustirasi ipaoni. Nanno nocoshon Diospan oinmatinin ianman facu fuchomapaoni. Nan ianman facushta fuchoai muran isinin icai futsa iqui tauashu cayapaoni. Ascan nantifi isinin imisifoan manaifono Diospan oinmatinin ian fuchomanaino ian muran iquitaunon.

⁵ Ascano Jesús nanno nocotoshiqui oian nocofunu treinta ocho fari isinin itianiquin noconi. Yoratisho quicurushui futsua nipaíqui ranainton fuchini.

⁶ Futsan Jesús yoishoni na nocofunu treintiocho fari isinin imisiran. Huaiton yocani, —¿Min cayapaimun? —ishon Jesús yocaiton.

⁷ Nicaquin cumani, —Tsoancai ua ianman facushta muran iquimamisima Diosin nai oinmatinin ian fuchoaino. Un iqui taupaiyaiton ua shutimisiforan, —ishon yoiaiton.

⁸ Ascaiton Jesús cumani, —Funinaca huahuun. Min oshati ya catashquin, —ishon yononi.

⁹ Ascaiton nicai funinaca huan ahuun oshati ya caní. Nan sabadoai shafatan yoratishon quicurushui futsua Jesús caya huani.

¹⁰ Ascano nocon caifo niaifofoan oian nan nocofunun ahuun oshati foaiton oincaquin yoinifo, —¿Ahuuscain min oshati Sabadoaino min foain? ¿Min tapiamamun nocon shuni Moisés noco yononi non Sabadoaino ahuashta huatiroma? Ascan min oshaticai na Sabadoaino min fotiromaran, —ishon yoinifo.

¹¹ Ascaiton ato cumani, —Na nocofunun ua caya huamashon. Ua isca huaa “Min oshati fotahuun,” ishon ua yonoaran, —ato huaiton.

¹² —¿Tsoamun na nocofunuquin anori mia yonoo? —ishon yocanifo.

¹³ Yoratisho quicurushui futsuatocain tapinima tsoanmain caya huamaquin. Asca huafainicai Jesús samamashta amaquinoshu yorahunarasi muran caní. Ascaitocai afanan tsoan oinnima.

¹⁴ Man ascano chipo Jesús nan nocofunu caya huama Dios fu tsainti pushu anoa fuchishon yoini, —Shinanhuun. Min afanan isinin iquimaquin. Man min cayasharaquin. Ascan min chaca huamisi cuscan afanan ayamahuu. Min chaca nantifi shatuhuu. Min chaca shatuyamashu ahuara chaca finacaia min ahuuscaratiroquin, —ishon Jesús yoini.

¹⁵ Ascaiton nicafainicai nan nocofunu Jesusmaquinoshu caní. Caya huamano nocon caifo Israelifoqui chanicai caní.

¹⁶ Ascano Jesús sabadoaino yora caya huamana nicacani nocon niaifofo Jesusqui sinainifo. Sinaquin Jesús fucash huanifo. Aqi tsain chaca huarianifo.

¹⁷ Ascaiton Jesús ato yoini. —Uhuun Upa Diosin shafatifi yora shara huafafainmisi. Nanscarifi aqi urifi uhuun Upan acai cuscan un huafafainiran, —ishon ato yoini.

¹⁸ Ascano amaquiri shinainifo. Shinancaquin Jesús yoiti huanifo. —Nocon shuni Moisés yononi cuscan non Sabado ahua huatiroma. Jesús Moisés yononi cuscan aquima. Yoiari Dios ahuun Upacoin. ¡Cuu! Jesús shinanmun afi Upa Dios cuscaracoin. Ascan ahuuscashomain non Jesús ato rutumatiroquin. Non shinanoncahuun, —icashu nocon niaifofoan ahuun yoinainifo.

Jesusfin Diospan Facuquin. Ascacufin nan yonopaiyai cuscan atiroquin

¹⁹ Nan shinainfo cuscan Jesús onanniquin. Onanshon ato yoini isca huaquin, —Un mato icon yoinon. Ua nicacahuun. Uficai un ahuashta huaima. Uhuun Upa Diosin acai cuscan mun oinmisi. Nansacoin urifi un huai. Ahuunshon fusti un aquin.

²⁰ Unfin Diospan Facuquin. Ua noicoian. Afin acai cuscan ua oinmai urifi un anon. Ahuara futsa fasi finacaia chipo ua ismashquin. Ascaiton man oin man mustairishquin.

²¹ Upa Diosin yora naacoinfiacun funimapaiquifin afanan nimasharatiroquin. Un ahuun Facu. Nanton acai cuscanrifi un huatiroquin.

²²⁻²³ Upa Diosin uhuunoo nan yorafoti shinansharamapai unfin ahuun Facuquin. Nahuunoo yorafoan shinansharamisifo cuscarifi uhuunooari ato shinansharamapai. Ascan Upa Diosin afincal yoima ratocaimain afu ipatiro iyamarai ratofomain faquish muran omitsiscapanacaquin. Ua yononi. “Min yorafoti yoitiro ratofomain afu nipayamarai faquish muran omitsiscapanacaquin,” ishon ua yononi. Nannori ua yononi. Upa Diosin nicapai uhuunoo shara yoiaifoan. Ua nichini. Ascan tsoan “Min Diospan Facu Shararan,” ishon ua yoicasmaiton Upa Diosihuunooari yoisharama.

²⁴ Un mato iconcoin yoinon. Tsoan uhuun tsain nicasharafain Upa Diosin ua nichini icoinra huafin Upa Dios fu ipasharapacunaquin. Un nan cuscara yora onaintimaima. Afanancal Satanás ahuun yora itiro. Omitsiscapatamarocon natian afi Upa Diosin ahuun yoracoquin afu ipashquin.

²⁵ Un ahuara futsa iconcoin mato yoinon. Natian nan naa shinantsain uhuun tsain nicacoianshu ufi Diospan Facu icoinra huashu afanan Diosimaquin itamarocon afu nipasharatiro.

²⁶ Tsoan futsacal Upa Dios nimama. Afi nipamisi. Nanscarifiai Upa Diosin un ahuun Facucun ua yononi cuscan ufin nipamisiquin. Tsoa futsacal ua nimama.

²⁷ Unfin Diospan Facuquin. Ascan ua yoiqui isca huani, “Min yorafoti yoitiro ratofomain afu nipatiro iyamarai aton chaca shatuashma omitsiscapanacafoquin,” ishon ua yononi.

²⁸⁻²⁹ Un mato yoia cuscan mustairiyamacahuun. Chipo nafoan uhuun oi nicashcani. Nicacani funishquicani. Ratoranfo niyoashu isharamisifo funiashu nipasharashcani. Ascanrifiai ratoranfoan niyocashon chaca huamisifo funiashuri omitsiscapashcani.

Jeshuunooa yoimisi

³⁰ Urus fusticai un apaiyai cuscan un shinainma. Upa Diosin nanton ua nichini. Ascan afi ua amapaiyai cuscan un huapai. Ascafiacal ucai urus fusti un ahuara huatiroma. Upan Diosin ua tapimana cuscan un nicaquin un yorafo yoitiro. Nantifi onancoianquin. Ascan ua tapimana cuscan un cayacaficoin yorafoti yoitiro ahuu cuscarafomainquin. Urus fusticai un apaiyai cuscan un shinainma. Uhuun Upa Diosin ua nichini afi amapaiyai cuscan ua huamashquin.

³¹⁻³³ Uficoin uhuunoo un yoisharaitocai tsoan nicasharapaima. Ascafiacal aririma. Urus fusticai uhuunoo un yoimisima. Juanpan arifi uhuunoo yoisharamisiquin. Manfin Juanqui yorafo nichiaquin. Nanton uhuunoo icon fusti yoisharamisi. Un Cristocun nanton mato tapimana. Futsanrifi uhuunoo yoisharamisi. Nan Upa Diosiri uhuunoo yoisharamisi. Nan uhuunoo yoimisi cuscan iconcoin mun tapia.

³⁴⁻³⁶ Juanpan uhuunoo iconcoin yoifiamisi unfin tsoan atiroma cuscan un huaiton man man oinmisiquin. Tsoan uhuunoo yoiamaiton oinquin nanfohuunoo man tapitiro un mato iconcoin yoimisi. Ascafia Juanpan uhuunoo yoimisi cuscan un afanan mato shinanmai maton chaca man shatunon omitsiscapatamarocon Upa Dios fu ipasharashquin. Juan nocofunu fasi sharacoin. Ahuunshon Diosin mato yoipaiyai cuscan nanton mato tapimayoni. Chashamatinin man chashashon man faquish muran fai ointiro casharashquin.

Nanscarifiaquin Juanpan mato tapimana ahuuscashomain man chaca shatuashu Dios fu ipatiroquin. Mato yoimisi cuscan man shinanquin isca huai, “¡Aicho! Juanpan noco cayacafi Diosin tsain yoiaiton. Non nicasharanon,” ishon man anori shinanyomisi. Juanpan uhuunoo yoimisi iconflashu uhuun Upa Diosin Juan fincoian. Afincal ua yonoa. Uhuun Upa ua nichini ua amapaiyai cuscan un anon. Ua amapaiyai cuscan cuyocointan un unutiro. Natianri ua yonoa cuscan un aquin. Ascan un acai cuscan oinquin man tapitiro Upa Diosin ua nichini ahuunshon un yononon.

³⁷ Upa Diosin matoqui ua nichini arifi uhuunoo yoimisi. Mancai Upa Diosin ahuun oi nicayamafain man oinmisisima.

³⁸ Diosin ua nichifanicucai man ua icoinra huaima. Ascan ahuun tsaincai maton nomuran man nanumisima.

³⁹⁻⁴⁰ Man Diosin tsain fasi oinfafainmisishaquin man Dios fu nipatiroran ishon man shinanmisiquin. Anori man shinanfiaquical Diospan tsain uhuunoo cunufiacashon mancai uqui fupaicanima un mato nimapacunon.

⁴¹⁻⁴² Un mato onancoian. Mancai maton nomuran man Upa Dios noima. Ascacun man uhuunoo shinansharai iyamarai man uhuunoo shinain chacafainocai un shinainma.

⁴³ Uhuun Upa Diosin ua matoqui nichini ahuu cuscaromainquin uhuun Upa uhuunshon man onancoion. Ua matoqui nichifiani mancai ua icoinra huatamarocon ua oincasmacani. Uacairocon icoinra huatama futsan matoqui oshon mato parapaiiaiton nancaifin

man icoinra huashquiin, “Unfin Cristoquin,” icaiton nancai man icoinra huai. Upa Diosin nichiamafiacun nancaifin man icoinra huashquin.

⁴⁴ Mafi ranan futsan tsain sharasi man nicapai. Asca Upa Diosin matohuunoa yoypaiyai cuscacai man shinainma. Ascacufin Upa Diosin ua nichini mancai icoinra huamisima.

⁴⁵ Man ua icoinra huayamafiacun uhuun Upa Dios ointaifi un mato puashoshquin. Man shinanmisi isca huaquin, “Moisés tsain nicashu non Upa Dios fu nipatiroran,” ishon. Man anori yoifiaino Moisés aficoin matohuunoa Upa Dios yoishquin isca huaquin, “Nafoan uhuun tsain icoinra huamisifomaran,” ishon matohuunoa yoishquin.

⁴⁶ Moisés uhuunoa cununi cuscan icoinra huashon ahuun tsainri man icoinra huacua-naquin. Uarifi man icoinra huacua-naquin.

⁴⁷ Ascafiashocai Moisés cununi cuscan man icoinra huama. Asca un mato yoia cuscaricai man icoinra huamaran, —ishon Jesús nocon niaifofa yoini.

6

Jesús cinco mil nocofunifo ahuun tsainmansi ato pimani

Mt 14.13-21; Mr 6.30-44; Lc 9.10-17

¹⁻² Ascano ato yoiquin anaititan Jesús afanan no fu ian ahuun anu Galilea pocufaini cani. Ahuun anu futsa Tiberias. No fu cusumunri noco ano yorahuanrasi aqui funifo. Isinin imisifo aqui fuafoan ahuun tsainmansi ato caya huani. Ato caya huaiton oincani aqui funifo.

³⁻⁴ Nocon caifo Israelifoa nocon fusititan Diosin ahuun nai oinmatinin nocon shunifo aton furu iyoafofosi finonmani nanonfoma. Nan shafan necoti chaima. Nantianri Jesús cusumunri nocoshon nonfin afu rafumisifori machi ano caashu nanno non tsaoyoni.

⁵⁻⁶ Nanno non tsaooano yorahuanrasi funifo. Aqui fuaifoa atoquiri fusoshon Jesús oinni. Ato oinquin shinantani nan yorafo fonicoincani. Ahuuscashomain ato pimaicain affin tapiniquin. Ascashon Feliperifi icoinra huamapaini ahuuscashomain ato pimaicain. Ahuun tsainmansi ahuamamishti atiro tapimapaini. Ascano Jesús Felipe yocani, —¿Raniamun non tushu fiicai na yorahuanrasi pimashquin? —ishon yocaiton.

⁷ Nicaquin Felipe cumani, —Ifon, non siete oshu yonoshon pui fiyonon. Aticai itiro-maquin na yorahuanrasi non piimaino, —ishon yoini.

⁸⁻⁹ Ascano non Jesús fu rafumisifo futsan Andrés nan Pedronun ushton yoini, —Ifon, oinpon. Nuno furonafacu misi uhuapamashta mucu fustiti yafi shiman rafuri uhuapamashta. Ascacia nuno yora ichaparasi. Ahuun tushu itiro-maran, —ishon yoini.

¹⁰ Ascaino Jesús noco yononi isca huaquin, —Ato yoihuu tsaononfo, —ishon yoini. Nannorifi faasifo ini. Ascaino Jesús ato yoia cuscan faasi camaqui tsaohuacunifo. Cinco mil nocofunufocuaana tsaohuacunifo.

¹¹ Ascano tsaofono Jesús mucu fustiti misi fitan Apa Dios yoiquin isca huani, —¡Aicho! Upan, min ua nicaran, —ishon Apa Diosin yoini. Yoitan misi yafi shiman rafu tucupacutan noco inani. Anoshon non ato pashcashonpacunon. Ficashon picani maiancoinnifo.

¹² Ascano nantifi yorafo maiancoianfono Jesús noco yononi, —Nan misi yafi shiman tushu huafo fiitacahuun. Shihuati muran nanutacahuun ahuashta funononma, —ishon noco yoini.

¹³ Ascaiton nicashon misi yafi shiman tushuafo non fini. Doce shihuati non fospi huani.

¹⁴ Ascan Jesús ahuun tsainmansi shiman rafu non mucu fustiti misi nantifi cinco mil nocofunifo piimaiton oincashon yoinifo, —Iconcain Jesús Diosin ahuun tsain yoisimi. Nanton Upa Diosin noco yoiyotiani cuscan nancoin nocoqui nichiaran, —icashu yoinan-nifo.

¹⁵ Ascaiton Jesús nan shinainfo cuscan onanshon ahuun nomuran shinanniquin isca huani, —Na yorafoan ua curushcain aton niaifocoin ua imashcaniran, —ishon onanni. Ascatan atomaquinoashu arusu machi ano cani.

Jesús ian fumancayan cani

Mt 14.22-27; Mr 6.45-52

¹⁶⁻¹⁷ Ascano man fari caino non afu rafumisifo non afu shashon nanufaini ian pocufaini foi. Pushurasi Capernaum ano non nocopaini. Faquishiaino Jesús nocoqui nocoataima.

¹⁸ Fuuhuan nocoano ian fuchoquin.

¹⁹ Ian mahuan naisti chainhuan nushmancayashon fuchomanhuaquin oquiri cusha futsan noco catima huani. Jesús ian fuman cayan ofiaintocai non onannima. Onantama non mustairicoinni. Ascashu non fasi ratucoinni.

²⁰ Ascaiton, —Unquin. Ratuyamacahuun, —Jesús noco huani.

²¹ Ascaiton nicaquin, —¡Aicho! Shasho muran nanuyohuun, —non huani. Jesús nanuano samamashta nan non nocopaiyaiquiri ian cusumunri non noconi.

Yorafoan Jesús funanifo

²² Ascano iyoconaino yorahuanrasifoan nan Jesús ato pimaitafoan shinannifo Jesús arus fusti nituaiton. Oinnifo Jesús no fu shasho muran nanuyamaiton. Tapinifoma arifi chipo yamu nocoqui noconi. Nantianri shasho fustiton non afu rafumisifo non foni. Ahuuscashucon Jesús caimun ishon shinannifo.

²³ Nantianri Tiberias chaimanoashu shashorasi muran fuafo. Nan Jesús yorahuanrasi pimaita anoashu funifo.

²⁴ Ascan nan yorahuanrasifoan Jesús norifi non afu rafumisi anoma tapicanashu shasho muran nanuinfoancatan Capernaum ano Jesús funai fonifo.

—*Unfi tushu cuscaraquin. Urus fustifin un yora nimapacutiroquin, —ishon Jesús ato yosiniquin*

²⁵ Fuchicashon yoinifo, —¿Tapimamisiton, ahuitiancon min nuno nocoamun? —ishon yocanifo.

²⁶ Ascaiton ato cumani, —Iconcoin un mato yoi. Tsoan atiroma cuscan un mato ismafaiaton mancai afohuunoa shinainma. Ascacuai man ua funaima. Uaricai man icoinra huataima. Nan un mato tushu pimafaita nantifi man mayancointan. Ascano man afanan ua funai fua un mato pimanon.

²⁷ Shinacion. Manfin tushuhuunoasi shinanfainicain. Nan tushu chacanatiro manmain cuyoifin. Ascan nan cuscara tushu fusti fuchipaiquimarocon nan cuscara futsafin unquin. Unfin Diospan Facuquin, un mato inantiro nancai fuchipaicahuun. Nan cuscara cuyopacunacama. Nan piashu man nipasharatiro. Uhuun Upa Diosin ua catoanshu uqui unimamisi. Matoquirifi ua nichini na tushu cuscara un mato inanon, —ishon ato yoiatton.

²⁸ Nicacaquin yoinifo, —¿Ahuuscashomain norifi non yonoshotiroquin Upa Diosin nocoqui unimanon? —ishon yocaifoan.

²⁹ —Upa Diosin ua matoqui nichini. Ascan man Upa Diosin unimamapaiquin ua icoinra huacahuun, —ato huaiton.

³⁰⁻³¹ Diosin tsain cununi isca huaquin, —Tsoa futsan atiroma cuscan huafain Moisés ato tushu fariña cuscara fatan shara ato pimani. Nan tushu shafatifi nai murannoashu pacupaoni. Nan tushu ahuun anu nocon tsainman manán. Nanfo nocon shunifoan tsoa istaipamashon piinifo. Ascan mirifi tsoan atiroma cuscan noco ahumamamishi ismahuu Upa Diosin mia nichini non mia icoinra huanon, —huaifoan.

³² —Un mato iconquin yoi man tapinon. Moiséscai nan tushu ahuun anu manán nocon shunifo inannima. Upa Diosin nai muranshon tushu ato niriashoni picanashu niisharanonfo. Ascan natian Upa Diosin ahuun tushucoini nai muranshon mato inanpai.

³³ Nocofunu Upa Diosin nai muranshon mai ano nichini manifotifi ato nimapacunon. Nanfin tushucoinquin, —huaiton.

³⁴ —Ifon, nan tushu noco inanfafainpun, —huaifoan.

³⁵ Ascaiton Jesús ato cumaquin, —Unfin nan tushucoinquin. Tsoan fonicoini cafiscasai ua onancoinpaquin ua tanaino aton nomuran fucashtamarocon isharpacunaca. Nanscarifai tsoan nomicoini cuscara ua fasi fuchipaitan ua icoinra huacun un ato nimapacunaca. Acai afanan funopacunacama. Isharpacunaca.

³⁶ Ascfia un mato yoia cuscan ua oinfiashocai man ua icoinra huaima.

³⁷ Nan ratoranfo uhuun Upa Diosin uqui nichiafin uqui fucaniquin. Ascan nanfofin un ato cushusharpacunacaquin. Un ato potapacunacama.

³⁸⁻³⁹ Uhuun Upa Diosin ua isca huaniquin, “Tsoan un mia ya imapaiyai mifu ishqui funopacunacama. Nan mia icoinra huafo namisifo min afanan nai ariashu mai ano fotoaino funishcani no fu ipashquin. Nanscara un fuchipairan,” ishon Upan Diosin ua yoini. Ascan uficai un apaiyai cuscan un huaima. Un mai ano fotoni Upa Diosin ua amapaiyai cuscan huashquin.

⁴⁰ Nan ratoranfoan un Diospan facun ua icoinra huaashufin no fu Upa Dios icari ipasharatiroquin. Un afanan mai ano oaitian a namisifo un ato funimashquin ufu nipasharanonfo. Ascarafin uhuun Upa Dios fuchipaiquin, —ishon Jesús ato yoini.

⁴¹⁻⁴² —Unfin tushu cuscara un nai murannoashu oniquin. Un yora imapacushquin, —ishon yoini. Ascaiton nocon caifo Israelifoan nicafiacashocai icoinra huanifoma. Jesusqui tsain chipunifo. —¡Cuu! ¡Nicacion! Aafin Jesusquin. Apa José ahuari non oinmisi. Ascan aacai ahuama. Galilea anoashufin cainniquin. Ascanfiashon, “Un nai murannoashu Diosin icariashu fotoaran,” noco huaiquin. Tsoancai na tsain icoinra huatiroma, —ishon yoinifo.

⁴³ Ascaifoan Jesús aton nomuran shinainfo cuscan onanshon ato yoini, —Uqui tsain chipuyamacahuun.

⁴⁴ Icon Upan Diosin ua nichini. Ascanfiacai tsoan Upa Diosin aton nomuran shinanmayamainocai ua icoinra huatirofoma. Ascan un afanan nai murannoashu mai ano nasoaitian ua icoinra huafoti un funimashquin Upa Dios fu ipanonfo.

⁴⁵ Diospan tsain yoimisiton ahuun tsain cununi isca huaquin, “Upa Diosin afincoi yorafa ato tapimashquiran,” ishon cununi. Ratoranfoan Upa Dios nicaifoanfin ahuunshon tapicaniquin. Upa Dios nicacashonri uarifi icoinra huashcaniquin.

⁴⁶ Tsoancai Upa Dios oinmisima. Urus fustifin un Upa Dios oinmisiquin. Nanton ua nichini.

⁴⁷ Unfin mato iconcoi yoicain. Tsoan ua icoinra huai Upa Dios fu nipashquin.

⁴⁸ Unfin nan tushu cuscara. Ua icoinra huafoti un ato nimapacushquin.

⁴⁹ Nocon shunifo Moisés fu tsoan istaipama ipaonifo. Nan tushu ahuun anu manán fipaonifo pishcaquin. Pifiapaonishacaquin fari futsa nai cuyonifo.

⁵⁰⁻⁵¹ Ascafia un nai murannoashu Uhuun Upa Diosin icariashu un oni. Unfin na tushucoiquin. Tsoan ua icoinra huashu nipanaca. Nan tushu ahuun anu manán nai murannoashu pacua nocon shunifoan pifianicai ato nimapacumisima. Nantian Upa Diosin afanan tushu nai muranshon mai ano fotomani. Nan tushu piashu yora nipatiro. Unfin nan tushuquin. Un nantifi yora manifoti ano ato nashoshquin nipasharanonfo, —ishon Jesús ato yoini.

⁵² Ascaiton nicacani nocon caifo Israelifo fochishmanantanannifo. —¿Ahuuscashomun na nocofunun ahuun nami noco inantiroquin non pinon? —icashu yoinannifo.

⁵³ Jesús ato yoini, —Iconcoi un mato yoi. Unfin Diospan facuquin. Man uhuun nami piyamafain uhuun imi ayayamashu man nipatiroma.

⁵⁴ Ratoranfoan uhuun nami pifain uhuun imi ayafain ufu nipashcaniquin. Ascan un afanan nai murannoashu oaitian un ato funimashquin Upa Dios icari nipasharanonfo.

⁵⁵ Uhuun nami tushucoi yafi uhuun imi ayaticoi.

⁵⁶ Ratoranfoan uhuun nami pifain uhuun imi ayai ufu rafupacunaca.

⁵⁷ Nan uhuun Upa nipanacaton ua nichini. Urifi ahuunoashu un nipanon. Ascano tsoaran ufu rafucacaini uhuunoashu ipasharatiroquin.

⁵⁸ Afanan un mato yoi. Nocon shunifoan nan tushu ahuun anu manán piinifo. Nan pifiapaonishacaquin nai cuyonifo. Ascan Upa Dios ariashu un matoqui oni. Unfin ahuun tushucoiquin. Tsoan ua piashuca nanacama. Uhuunoashu nipasharatiroquin, —ishon Jesús ato yoini.

⁵⁹ Nocon caifo Israelifoan nocon ichananti pushu muranshon ahuun anu Capernaum anoshon nan tsain noco yosini.

Jesushuunoashu yora nipatiro

⁶⁰ Atirifi tanamisifoan yoini, —¡Ohua! Jesús noco yoia cuscacai tsoan tapitiroma. Noncai na cuscara tsain nicapaitiromaran, —ishon yoinifo.

⁶¹⁻⁶² Ascaiton Jesús onanni rama noco yoia cuscan atirifi a tanamisifo nicacasmaiton. Ascan noco yoini, —¿Un rama mato yoia cuscan man nicapaimamun? ¿Afanan man ua icoinra huaimamun? ¿Nan nicaí man umaqui ipaiquin raquiri man shinanshquimun ua afanan oinquin un nai muran Upa Dios icari un funicainaiton?

⁶³ Diospan Yoshin Shara fustifon yora nimapacutiroma. Mafricai man nimapacutiroma. Uhuun tsainri Diospan Yoshin Sharahuunshon un mato yoimisi. Ascacufin uhuun tsain icoinra huashu man ufu nipatiroquin.

⁶⁴ Ascafia man futsacai ua icoinra huaimaran, —ishon Jesús noco yoini. Noco catoaintian afincoi tapiyoni ratotomain achimanicain.

⁶⁵ Ascan afanan noco yoini, —Ascacun un mato yoiqui isca huai, “Upa Diosin tsoan ahuun nomuran shinanmayamaitocai ua icoinra huatiromaran,” —ishon noco yoini.

⁶⁶ Ascano Jesús noco yoiaí cuscan nicatan a tananmisi futsafoan potacashon afanan tanannifoma.

⁶⁷ Ascano Jesús nocori doce catonni non afu foanfainnon noco yocani, —¿Marifi man umaqui capaimun? ¿Man ua potapaimun? —noco huaiton.

⁶⁸ Pedronun cumani, —Ifon, non rato futsacai non catiroma. Mirus fusti min noco yoitiro ahuuscashumain non nipasharatiroquin.

⁶⁹ Minfin Dios ariashu nocoqui oniquin. Min Dios cuscara shara. Nan non icoinra huairan, —huaiton.

⁷⁰ —Un mato doce catonni. Un mato catonfiani matofu rafumisi futsan Satanás yoshin chaca ahuun nuumisiton, —ishon noco yoini.

⁷¹ Nan Simón Iscariote ahuun facu Judashuunoa noco yoini. Jesús noco doce catonni. Judasrifi catonfianicun Jesús ato achimaniquin.

7

Jesús ahuun ushtofaan icoindra huanifoma

¹ Ascashu chipo Jesús Galilea maitio cahuancacaini ato tapimafoanfaini. Norifi non afu cani. Judea ano non cayonima. Nocon caifo Israeli nocon niaifofoan Jesús rutupaiyaifono.

²⁻⁵ Nocon caifoan fusititian tapaspaonifo. Nan fusiti nocoti chaima Jesús Judea ano catama Galilea ano nituni. Ahuun ushtofori nanno Galilea ano afu ini. Ahuun ushtocoinfofiacashon Jesucristofiacuncai tsoan icoindra huanifoma. Ascanshon yoinifo isca huaquin, —Nunoashu Judea ano catahuun. Nantifi minhuunshon tanamisifo min ato ashomisi cuscan oinonfo. Min acai cuscan min ato oinmayamaino atirifoancai minhuunoa tapitirofoma. Min ahuamamishti atiro nantifi yorafoti ismafotahuun —huaifoan.

⁶ —Uncai ari cayoataima. Uhuun Upa ua nichiataima. Ascafia ahuutianran man capaiyaitian man catiro.

⁷ Nan icoindra huafoama nan ua noicasmái. “Manfin chaca huamisirán,” un ato huamisiquin. Ascacun ua noicasmacani. Ua noicasmafiacaquicai mato noicasmatirofoma.

⁸ Ascacun natian fositacahuun Jerusalén ano fotacahuun. Ucai cayoataima. Uhuun Upa Diosin ua nichiataimaran, —ishon Jesús ahuun ushtofa yoini.

⁹ Ato yoitan Galilea ano nituyoni.

Jesús fusititian nannori ini

¹⁰ Ascafiaino ahuun ushtofa nan fusi ishcaquin Jerusalén ano foaifoanno. Ascaino arifi chipo caani. Tsoa yoiaishuma Jerusalén ano nocoaitocai tsoashta tapinima.

¹¹ Nanno nocon caifo Israelifo niaifofoan Jesús funacaquin yoinifo, —¿Ranimun na noco-funu? —huanifo.

¹² Nannori yorahuanrasi. Atirifoan isca huanifo, —Jesús nocofunu sharacoinran, —ishon yoinifo. Ascafiainfoan atirifoan yoiquin isca huani, —Ma. Na nocofunucai sharama. Yorafa paramisirán, —icashon yoinifo.

¹³ Ahuunoacai aton ointaifi yorafaon yoisharanifoma. Nocon niaifofoqui musucaquin oinomashta yoinannifo.

¹⁴ Fusiti anaitiatimano Jesús Dios fu tsainti pushu muran iquini a muranshon ato yosicai.

¹⁵ Nocon caifo niaifofoan nicashon yoinifo, —¡Aira! ¡Niacapon! ¿Ahuuscainun na nocofunu cunu tapicoianmashon tsain fasi tapicoianquin? —icashu yoinannifo.

¹⁶ Yoiaifo cuscan onanshon Jesús ato yoini, —Un mato yosiain cuscan uhuun nomuran-shoncai un mato yoima. Ascatarocon Upa Diosin ua nichini, nanton ua shinanmana cuscan nannoricoin un mato yosiaquin.

¹⁷ Tsoan Diosin yoia cuscan apaquin afi tapitiroquin ufi shinain cuscan un mato yosi iyamarai Upa Diosin afi ua shinanmanaino un mato yosia.

¹⁸ Tsoan ahuun nomuran shinain cuscan yosiquin nanton yorafa ahuunoa shinanmapai isca huaquin, “Na nocofunun fasi tapicoian. Afin fasi sharacoinquin,” ishon ahuunoa ato shinanmapai. Ascanfiatan uncai ascarama. Un mato yoiqui isca huai. “Nan uhuun Upa Dios ua nichini. Nancafin fasi sharacaiquin.” Anori un mato yomisi ahuunoa man shinansharanon. Nanscacufin man icoindra huatiroquin un mato iconcoi yoi un yorafocai paramisima.

¹⁹ Nocon shuni Moisés mato Diosin tsain yonofiani tsoashtacai nicasharamisima. Ascacufin ahuuscain man ua rutupaiyain un nocofunu tunutitian cayahuafiacun, —huaiton.

²⁰ —¡Cuul! ¿Tsoantsi mia rutupaiquin? Minhuunfin yoshin chaca nuuaquin, —huaifoan.

²¹ —Un nocofunu tunutitian caya huaiton man oinquin. Ascan “¡Ajaa! Ahuuscaín Jesús tunutitian nocofunu caya huamamun,” ishon uhuunoa man yoia.

²² Un tunutitianfiacun ahuaara shara huaa cuscan marifi tunutitian ahuaara man huamisi. Moisés noco yononi cuscan manfin maton furonanfacufo rama caian ocho osha finoanno maton furonanfacufo man ato foshqui rupa shatumisiquin.

²³ Ascan tunutitianfiacun maton furonanfacufo man ato foshqui rupa shatumisi. Ascafia Moisés yononi cuscan man aima. ¿Ascacufin ahuuscain man uqui sinai tunutitianmain un nocofunu caya huasharacunfin?

²⁴ Afanan un ahuaara shara huaiton oincaquin, “Chaca huarán,” ua huayamacahuun. Cayacafi shinansharacahuun, —Jesús ato huani.

—Jesús nocon Numamisi Cristomun, —ishon yocaifoan

²⁵ Ascatan atirifi Jerusalén anoashu yoinannifo, —¿Naamun nocon niaifofoan rutupaiyafo?

²⁶ Ascanfiacanashu yorahuanrasi aton ointaifi ato yoifiaquicai tsoan ahuun tsain shatumanama. Ascacuri natian niaifofoan man shinanraca aafin nocon Numamisi Cristoquin.

²⁷ Ascafiancai Jesús nocon Numamisi itiro. Nocon Numamisicoín oaiton non tapi-tiroma raniashumain oicón. Ascan nan nocofunu Jesús raniashu oamainquin man non tapiaran, —ishon yoinifo.

²⁸ Jesús Dios fu tsainti pushu muranshon ato yosifiatan ahuunoa yoiáfo cuscan onancoinshon ato cumani isca huaquin, —¿Iconmun man ua onan? ¿Un raniashu oamainquin man tapiamun? Ufi shinanfaincai un oama. Ascafia uhuun Upan ua yonoa un oa. Nantofin ua nichiniquin. Manfin iconcoinquín. Mancai uhuun Upa onanmisima.

²⁹ Un ahuunoashu oni. Ua nichini. Ascan un Dios onancoianran, —ishon ato yoini.

³⁰ Nicacani aquí sinanifo. Ascashon achipainifo cunu muran iquimashquin. Ascafi-aquicai tsoan ahuusca huayonima. Nantiancai achiaifotian nocoatai inima.

³¹ Nan yorahuanrasi Jerusalén anoafano yoinifo, —Tsoa futsan atiroma cuscan Jesús Diosinhuunshon ahuamamishti shara noco isma. Nan nocofunun tsoan asca huatiroma cuscan huatiro. ¿Nocon Numamisi oshon finonmafain ashquimun? —ishon yoinifo. Ascan anori yoiáfoan icoinra huanifo.

Fariseofoan Jesús achipainifo

³² Nan yorahuanrasiton Jesushuunoa tsain shara yoiáfoan Fariseofoan nicanifo. Ascan nocon caifohuunshon Dios cufimisi niaifofoan futan ranushumuáfo nichinifo Jesús achicashon cunu muran iquimanonfo.

³³ Ascan Jesús ato yoini, —Un matofu ichaipacuima, Un samamashta uhuun Upa Dios ari cai. Nantofin ua nichiniquin. Un samamashta aquí cai.

³⁴ Un mato anoashu caitocai man ua funafiaquin ua fuchishquima. Un cai aricai man catiromaran, —ishon ato yoini.

³⁵ Ascaiton nicacani nocon caifo Israeli niaifofo yoinannifo, —¿Ranimun na nocofunu caiquin noncai fuchitiroma? ¿Nocon yorafo Grecia pushurasi ano pashcaifainnifo ano caimun? ¿Nanno Greciafo tapimaicairaca?

³⁶ ¿Raquiri noco yoinun isca huaquin? “Man ua funafiaquicai man ua fuchishquima. Uncai aricai man catiromaran,” ishon noco yoiá. ¿Raquiri noco yoipaimun? —icashu yoinannifo.

Diosin Yoshin Sharapan yorafo nimapacutiro

³⁷⁻³⁹ Ascano fusitin ahuun unutaquin Jesús yorahuanrasi muran ninacahuan oi ashcafinin ato yoiquin isca huani, —Nicacapon. Un mato yoinon.

Diosin mato yonomapaiyai cuscan man huashopai uqui fucahuun. Ua icoinra man huacun un mato Diospan Yoshin Shara mato ya rafumapacunaca. Tsoan ua icoinra huaiton Diospan tsain cununi cuscan ahuun shaqui muran unu tsosia shara cuscara a muran foiran, —ishon Jesús ato yoini. Unucoinhuunoacai yoinima Diospan Yoshin Sharahuunshon ato tapimani isca huaquin, —Tsoan ua icoinra huaiton Upa Diospan Yoshin Shara afu rafupacunaca. Ascan Diospan Yoshin Sharahuunshon ahuun nomuranshon yorafo yoishquin afoanrifi icoinra huacanashu nipasharanonfo, —ishon ato tapimani. Jesús apa Dios ari nasoatima yorafoan aton niaifo inon. Ascan nan icoinra huafoti Diospan Yoshin Shara atoqui nichiatama.

Jesushuunoacai nannorifosi shinannifoma

⁴⁰ Nicacashon atirifoan yoinifo, —Iconcoín na nocofunu Diospan tsain yoisiran, —ishon yoinifo.

⁴¹ Atirifoanri yoinifo, —Naanfin Cristoquin, —ishon yoinifo. Ascafiaino futsafoan yoini, —Ma. Nacai Cristoma. Cristocai Galilea anoashu cainshquima.

⁴² Diospan tsain cununi cuscan, “Cristo David funa inon. David ipaoni nannoashuri Cristo cainshquiran,” ishon Diospan tsain cunushoni. Ascan Cristocai Galilea anoashu caintiromaran, —ishon yoinifo.

⁴³ Nanscafiacun nan yorafoan Jesushuunoa nicafiacashocai anorifosi shinannifoma.

⁴⁴ Atirifoan Jesús achipainifo cunu muran iquimashcaquin. Asca huapafiaquicai tsoan Jesús ahuusca huaiyonima.

Israeli aton niaifofoan Jesús icoinra huanifoma

⁴⁵ Ascatan ranushumuáfoan aton niaifofo yafi Fariseofoqui nasocashon ato yoinifo. Nocoafono nanfoan ranushumuáfo yocani, —¿Ahuuscaquimun man Jesús achiamaquín noco ihuushoshquin? —ishon ato yocanifo.

⁴⁶ Cumacaquin, —Na nocofunun ahuun tsain shara cuscara tsoancai anori yoiyomisimaran, —ishon yoinifo.

⁴⁷⁻⁴⁹ Ascaiton ato nicacashon niaifofoan ato yoini, —¡Cuu! Ascan Jesús matori paramisi. Shinancapon. Nonfofin Fariseofo yafi maton niaifofoanri Moisés cununi cuscan fasi non tapicoianquin. Nonfoancai tsoashtan Jesús icoinra huamisima. Na yorafoan man

rama Jesús nica nanfoan Moisés Diospan tsain cunushoni cuscan tapiafoma. Diosin ato onaintimainonran, —ishon ato yoinifo.

⁵⁰⁻⁵¹ Asca huafiaifoanno Nicodemon nan shafa futsa Jesús ano cani ahuara yocaicain. Arifi Fariseonfiashon afu Fariseofo yoini, —Uhuun yorafoan, nocon shuni niaifoan yononi cuscan non ratoran nocofunon nicasharayoatama non yoitroma isca huaquin, “Naton chaca huaa. Non onaintimanonran,” ishoncai non ascatiroma, —huaiton.

⁵² —Min tsain Galilea anofoan tsain cuscarari. Shinanhuun. Tsoashtacai Galilea anoashu Diosin tsain yoimisi fuafoa. Nannoricoin Diosin tsain noco yoicoinni. Oinyotahuun tapinon, —ishon Nicodemo cumanifo.

⁵³ Anori yoicatan aton pushufoanri fonifo.

8

Ainfun ahuun funuma fu icaiton niaifofoan achinifo

¹ Asca huafaini Jesús machi ahuun anu Olivo ano cani.

² Shafaino Dios fu tsainti pushu muran Jerusalén ano nasoni. Nanno yorahuanrasi afanan aqui funifo. Nicai fucani. Ascatan tsaoshon ato yosini.

³⁻⁵ Ato yosiaino Moisés cununi cuscan tapimamisifo yafi Fariseofoanri ainfo ahuun funuma fu icaiton fuchicashon Jesusqui ihuutan yorahuanrasifain ointaifi ainfo nimainifoannifo nantiffain oinonfo. Asca huacashon Jesús yoinifo, —Tapimamisiton, na ainfoan fasi chaca huaa. Ahuun funuma fu icaiton fuchiafo. Moisés isca huaquin noco yononi, “Ainfo ahuun funuma fu icaiton fuchicashon toquirinin a tsacacahuun nanon,” ishon Moisés noco yononi. ¿Mirifi min nannori noco yonopaimun? —Jesús cuparananshon yocaifoan.

⁶ Raquirirashta icaiton ahuun chaca inifoan niaifofo ano iyopaicaquin. A yocaifoanno Jesús tutishon ahuun mutotinin mai cununi.

⁷ Yocariaifoanno Jesús atoqui fuhuuni inacahua yoini isca huaquin, —Man ratotonmain man ahuara chaca huamisiamaquin na ainfo toquirinin tsacaqui tau huahuun, —Jesús ato huani.

⁸ Ascan ato yoitan afanan ahuun mutotinin mai cununi.

⁹ Ascano ato yoia cuscan nicacatan nantifi nan ainfoqui tsain chaca huafo fustirasi foriforinifo. Nan iyoafofo fosi rufoto foriforinifo. Chipa atirifi cuyo fonifo. Jesús fusti nanno ainfo aqui nituano.

¹⁰ Ascan Jesús afanan fuhuuninacahuan ainfo yocani, —Uhuun shafoshta. ¿Na nocofunufufoan mia chaca huaa man foafomun? ¿Tsoa fusti nituamamun afanan mia tsain chaca huai? —ishon yocaiton.

¹¹ —Ifon. Fustishtacai nituamaran, —ishon yoiaiton. —Unricai mia tsain chaca huaima. Natian min catiro. Ascafiashu min chaca huamisi cuscan afanan asca huayamahuu, —ishon Jesús ainfo yoini.

—Unfin chashamati cuscaranquin —ishon Jesús ato yosini

¹² Ascatan ainfomaqui caashon Jesús afanan yorahuanrasi yosini isca huaquin, —Unfin chashamati cuscaranquin. Un manifoto anofo un ismasharatiro nipasharanonfo. Tsoan ua tanamisi icashucaí funotiroma. Uhuunshon fai oinsharatiro Upa Dios ari noco sharashquin. Faquish muran ipashquima, —ishon Jesús yoini.

¹³ Ascaiton nicacaquin Fariseofoan yocanifo, —Min noco yoiaí cuscaí tsoa futsan mihuunoa noco anori yoimisisima. Mirus fusti minhuunoa min noco yoiaí cuscaí tsoa icoinra huatiroma, —huaifoan.

¹⁴ Jesús ato cumani, —Un tapian raquiashumain un oaquin ascatai raquimain un caicain. Ascacun uhuunoa un yoitiro uhuun tsain iconcoin. Ascafia mancai tapiama raquiashu oashumain raquiriri un caicain.

¹⁵ Tapishoma un yosiaiton man icoinra huama. Uncai tsoaquin shinanchacaima tsain chaca huashquin.

¹⁶ Ascafiacun uhuun Upan shinain cuscan nannoricoinrifi un mato yoi. Ascan un iconcoin yoimisiquin. Uhuun Upan ua nichini. Un futsahuunoa yoiquicai unrusu un yoima. Uhuun Upan ua tapimana cuscan un yoi. Ascan un futsahuunoa yoia cuscan iconcoin.

¹⁷ Moisés mato yononi cuscan isca huaquin cununi. “Nocofunu rafutan nannorisi yoiaiton man icoinra huatiroran,” ishon mato yononi.

¹⁸ Ascan ufoicoín uhuunoa un mato yoimisi. Ascafiacun uhuun Upan ua nichini nanton uhuunoa nannorisi yoimisi, —huaiton.

¹⁹ Nicacashon yocanifo, —¿Ranimun min Upa? —huaifoan.

—Mancai ua yafi uhuun Upa man onanmisima. Ua onanshon uhuun Upari man onancuana, —ishon ato yoini.

²⁰ Jesús Dios fu tsainti pushu muranshon yorafo yosini. Nan cunu muranri nocon pui nanuti. Diosin tsain yonomisifo inanonfo. Nanno ato yoifiani tsoancai Jesús achinima cunu muran iquimashcaquin. Jesús rutuafotaima. Ascan rutushquiaifon shafan no-coataima tsoan ahuusca huayonima.

Un cai aricai man catiroma

²¹ Ascan tsoancai achinifoma Jesús afanan nocon caifo aton niaifofo yoini. —Un chipo chai cai. Un caino man ua funafiaquicai man ua fuchishquima. Maton chaca potayamashu nanscasiai man nai. Ascaiton un cai anori cai man catiroma, —ishon ato yoini.

²² Nicacani yoinannifo, —¿Afirmun rutushquiquin? Ascashori noco yoi, “Un cai anoricai man catiromaran,” noco huaiquin, —icashu nocon niaifofoan yoinannifo.

²³ Ascaiton Jesús ato cumani, —Manfin na mai ano itianiquin. Ucai mai ano ipaonima. Ufin nai muran itianiquin.

²⁴ Un mato yoi ai cuscan maton chaca potayamashu nanscasiai man nai. Un mato uhuunoa yoi ai cuscan icoinra huayamashu maton chaca ya man nai. Man naino maton chaca mato ya ipanaca, —ishon Jesús yoini.

²⁵ —¿Ascan minmun tsoaquin? —ishon yocaifoan. —Nan un mato yoimisi cuscafin unquin.

²⁶ Matohuunoo un ichapa yoitiro. Man chaca huaa cuscan huafain un mato yoifiatiro nan ua nichinicai man icoinra huatiro. Afi ua yoimisi cuscan un nantio maifoti un ato yoifoanfafainon, —ishon Jesús ato yoini.

²⁷⁻²⁸ Apa Dioshuunoo ato yoifiatocai tsoan tapinifoma. Ascan Jesús ato yoini, —Man ua ihui coyan iquinanqui funinifoanshquiaitian man ua tapishquin umain tsoaquin. Nantianri man tapitiro uhuunoo fusticai un mato yoimisima Upa Diosin ua yoimisi cuscan nan fusti un mato yoi.

²⁹ Nan ua nichini ufu imisi. Uacai potamisima. Afi ua amapaiyai cuscan un amisiquin. Ascacun uqui unimacoin, —ishon ato yoini.

³⁰ Yoi ai cuscan nicacashon atirifoan a icoinra huancoinnifo.

Diospan facufo Diosin aton ifo. Yora chaca huamisifo chaca fustisi aton ifo

³¹ Ascano Jesús nocon caifo nan icoinra huafo yoini, —Un mato yoi ai cuscan nicacoian-shufin uhuun tanamiscocin man itiroquin.

³² Uhuun tsain nicashon iconcoin tapishon maton nomuran man isharacointiro. Ahuara iconma afanan maton ifo inonma, —ishon Jesús ato yoini.

³³ Ascan Jesús icoinra huamisifoan ato yoi aiton niaifofoan nicacashon yoinifo, —Nonfin Abraham ahuun funafoquin. Tsoa futsacai nocon ifo imisima. Noncai tsoan oinmati imisima. Ascacufin ahuuscain, “Ahuara iconma maton ifo itiro ma man icoinsharanon,” noco huaran, —huaifoan.

³⁴ —Iconcoin un mato yoinon. Tsoan chaca huamisifin ahuaa chacafoan aton ifo iishquiquin. Nanrifi chacafoan aton yonoshomisi iishquiquin.

³⁵ Man man tapia ahuun yonoshomisciai ifoan pushu muran ipanacama. Pushu ifoan ahuun facu pushu muran ipatiro.

³⁶ Ascan unfin Diospan Furunquin maton chaca soashonano afanan ahua chaca futsa maton ifo itiro ma. Man Dios fu isharapashcaquin.

³⁷ Mun tapia maton shuni Abraham. Man ahuun funafoshon uhuun tsain man nicacasmai. Ascashon man ua rutupai.

³⁸ Uhuun Upan amisi cuscan mun oinmisi. Nanfohuunoo un mato yoimisi. Ascan marifi maton upa mato yoimisi cuscan nannori man huamisi, —huaiton.

³⁹ —Nocon shunifin Abrahamquin, —huaifoan. —Man Abraham funafoshofin nanton apaoni cuscan marifi nanscarifi man huacuanquin.

⁴⁰ Upa Diosin ua yoimisi cuscan un mato icon yoifiaino man ua rutupai. Abrahamcai ascapaonima.

⁴¹ Maton upa acai cuscan marifi man amisiquin, —ato huaiton. —Noncai upa icha-payama. Nocon upacoin fustifin Diosiquin, —huaifoan.

⁴² —Unfin Upa Dios fu imisiquin. Un Dios icanoashu un oni. Ufi shinanfaincai un mai ano onima. Uhuun Upan ua nichiano. Ascan maton upacoin Diosicunfin man uarifi noicuanquin.

⁴³ Ahuuscain uhuun tsain man shafacaffiacucai man tapiama. Futsanfin mato nicatima huaquin.

⁴⁴ Nanfin maton upa Satanasquin. Ascan maton upan apaiyai cuscan marifi man huapaiquin. Aafin tau rutumitsamisi ipaoniquin. Iconcai yoimisima. Atocai ahuaa icon

yoimisima. Ahuun nomuran chani fusti shinantiro. Nanscashori chani fusti yoitiro. Afin chanimisicoinquin. Chanimisifoan aton apacoin.

⁴⁵ Uncai a cuscarama. Un mato iconcoiñ yoifiaiton mancai ua icoinra huaima.

⁴⁶ ¿Ratoran futsamain un chaca huua yoitiroquin? Uncai chaca huamisima. ¿Un mato icon yoifiaitocai ahuuscaquin man ua icoinra huaimacain?

⁴⁷ Ratoranfoan Diosin ahuun yoracoin ahuun tsain nicatiro. Mancai Diosin ahuun yorama. Ascan uhuun tsain man nicaimaran, —ishon Jesús ato yoini.

Abraham Caiantaima Cristo iyoni

⁴⁸ Nicacashon nocon caifo Israelifoan cumanifo, —Icon man non yoimisi. Minfin Samaritanonquin. Yoshin chaca mihuun nuumisi, —huaifoan.

⁴⁹ —Yoshin chaca uhuun nuumisima. Un uhuun Upa Diosihuunoa tsain shara fusti yoimisifin unquin. Manfin uhuunoa tsain chaca yoimisiquin.

⁵⁰ Ascanfiatan mancai uhuunoa yorafo tsain shara yoipaimisima. Upa Diosin fusti iconcoiñ yorafohuunoa tsain shara yoitiro. Uhuunoa yorafo yoisharamapai. Nantonri yoitiro ratofomain shara iyamarai chacafoquin.

⁵¹ Iconcoiñ un mato yoinon. Tsoan uhuun tsain nicacoianfin nacointamarocon nipaquin, —huaiton.

⁵² —Natian man non tapicoiñ minfin yoshin chacayaquin. Abraham non Diosin tsain yoimisifori man naafianicun min noco yoia, isca huaquin, “Tsoan uhuun tsain nicacoian-shu nacointamarocon nisharapacuncaran,” ishon min noco yoia.

⁵³ Nocon shuni Abraham non Diosin tsain yoimisifori man nani. ¿Ascan min Abraham fincoianmun? ¿Min shinanmun min nantifi finoan? —huaifoan.

⁵⁴ —Unfincoiñ un uhuunoa yoisharainocai ahuama. Upa Diosin fustitofin uhuunoa yoisharamisiquin, “Nanfin nocon Uparan,” man huamisiquin.

⁵⁵ Mancai uhuun Upa Dios onanmisima. Ascafiacun unfin uhuun Upa onancoianquin. Uhuun Uparan un iyamafin Un mato cuscara chanimisiri icunaquin. Ascatamarocon un Upa Diosin onancoian. Ua yoiai cuscan un huamisi.

⁵⁶ Maton shuni Abraham, yoini, “Un chipo Cristo ointiro. Oianshu un fasi unimashquinran,” ishon yoini. Ua oinni ascan fasi unimani, —Jesús huaiton.

⁵⁷ —Mincai cincuenta fari icataima. ¿Ascan ahuuscashomun min Abraham oinmisiquin? —huaifoan.

⁵⁸ —Iconcoiñ un mato yoinon. Abraham caiantaima unfin iyopaoniquin, —ishon Jesús ato yoini.

⁵⁹ Ascaiton nicacani nocon niaifofa fasi sinacoianquin toquiri ficatan Jesús tsacapainifo rutupaicaquin. Ascan huapayiafona Jesús ato murannoashu cani. Dios fu tsainti pushu murannoashu atomaqui cafaiatocai tsoan oinnifoma.

9

Nocofunu fusho cainfianicun Jesús caya huamani oinsharanon

¹ Jesús caaquin oian nocofunu fusho nanscarapan caini oinni.

² Ascaiton non afu rafumisifona yocatoshini. —Tapimamisiton, ¿Ahuuscaimun na nocofunu fushoquin nanscarapan caini? Ahuara chaca huamishishaquinraca fusho cainni. ¿Ascayamarai apa futan ahuan chaca huamishianoraca fusho cainimun? —ishon non Jesús yocani.

³ Ascaiton Jesús noco yoiquin isca huani, —Ahuara chaca huayamafiamishishaqui afincoiñ fusho cainni. Apa futan ahuan chaca huanocai fusho cainnima. Nanscarapan cainnicun chipo Diosin ahuamamishiti huatiro cuscan ahuunoa ismashquin.

⁴ Diospan ua nichiniquin non yonoshononcahuun. Non shafata fusti yonoshotiroquin. Yamucái non yonoshotiroma. Nanscarifiai ratoran shafatan nocoqui nocoano afanancái tsoanshtan na mai anoshon Dios yonoshotirofoma.

⁵ Un na mai ano iyoashufin un shafa cuscaraquin. Un ato oinmani ahuuscashumain isharatirofoquin, —ishon noco yoini.

⁶ Asca huatan maiguin cumo michotan. Miscoacufoantan ayashon futucurani.

⁷ Asca huatan, —Siloé carayanun nashitahuun, —huani. Carayan ahuun anu futsa —Nichiaran —yoimisifo. Asca huua caashu nashianan fuchocomutan oinsharacufainiquin. Ascatan naso curani.

⁸ Nan oinmisifona isca huanifo, —¿Nan fusho tsoashu ahuara yocacaiton non oinmisimun? ¿Na nancaimun? —huaifoan.

⁹ —Ainfain. Nanfinquin, —atirifiton huanifo. Atirifiton yoicaquifin, —Aamafinquin. Nan ointsacoifinquin, —huanifo. Afiri ato yoini, —Unfinquin. Unfin fusho imisiquin. Ascafiashofin natiantan un oinsharaiquin, —ato huaiton.

¹⁰ —¿Ahuuscashomun min natian oincain? —huaifoan.

¹¹ —Na nocofunu Jesusran huaafoanfin ua maiqui cumo michotan a yashon ahuun mucuman ua futucuracaquin. Ascashufin “Siloé naquinoashu nashitahuun,” ua huaano. Siloé carayanun nashianan un fuchoquimushofin un oinshara acufainnaquin, —ato huaiton.

¹² Ascaiton, —¿Ranimun na nocofunu Jesusquin? —ishon yocaifoan. —Un tapiama. Raquiran man caaran, —ato huani.

Nan fusho cainnito oinsharaiton Fariseofoan yocanifo

¹³ Ascano Fariseofo icano nan nocofunu iyonifoquin.

¹⁴ Jesús nan nocofunu tunutitian cayahuano.

¹⁵ Fariseofoan nan nocofunu yocacaquin, —¿Ahuuscacai ashumun min furo cayaquin? —huaifoan. —Ua maiquin cumo michotan ayashon ua futucuraca. Nashianan fuchoquimushofin un oinshara acufainnaquin, —ato huaiton.

¹⁶ Nicacaquin Fariseo atirifoan isca huanifo —Acaico Dios ariashu ocfun tunutitian yora cayahuama, —huanifo. Ascaiton atirifiton yoiquin isca huani —Yora chacapancai naton acai cuscan huacuanamaran, —ishon atirifiton yoififo. Ascaiton atirifoan shinancaquin, —Jesuscai sharama, —huaifono. Atirififain, —Jesusfin sharaquin, —huanifo. Jesushuunoacai nannorisi shinannifoma.

¹⁷ Ascaiton afanan a nocofunu fusho cainni yocacaquin. —¿Minmun ahuuscacai aaqi na nocofunun mia cayahua? ¿A mia furo cayahuamamun tsoanquin? —huaifoan. —Naantofin inon pacoai cuscan huafain Diosin tsain yoimisiquin, —ato huaiton.

¹⁸ Ascaitoncai nocon niaifofoan icoinra huanifoma nan fusho nanscarapan cainni. Ascaiton fushon apa yafi ahua cunashon yocanifo.

¹⁹ —¿Nan na aamun min facu fusho caini? ¿Ascafiamun ahuuscashon natian oinquin? —huaifoan.

²⁰ —Nanfin nocon facuquin. Nanscarapan cainni. Nan non tapiafin nocon facuquin.

²¹ Ahuuscashomun oinquin noncai tapiamafinquin. Ahuuscashumain cayaquin. Facumafinquin. Manfin nocofunuaquin. Afin mato yoitiroquin ahuuscashumain cayaquin. Nan yocacahuun, —ahua futan apan ato huani.

²² Nocon niaifofoquin musucaquin anori yoififo. —Tsoan “Diosin Jesús catonniran,” huacai nocon ichananti pushu muran afanan iquitirofomafinquin, —niaifofu icaiton nicai ahua yafi apa atoqui musunifo.

²³ —Afanan facumaquin, Nancoin yocacahuun, —huanifo.

²⁴ Ascano afanan a nocofunu fusho ipaoni yoimashon yoini, —Yoihuu. “Diosin ua cayahuaran,” ihuu. Jesusacon sharacufin. Chacafinquin. “Diosinfin sharaquin,” huahuu. “Jesús shararan,” huayamahuu. Non tapiafin Jesús chacaquin, —huaifoan.

²⁵ —Utsan. Uncain tapiama chaca iyamarai sharamainquin. Un tapia fustifin un fusho iyofiamisishaquin natian un oinsharaicain, —huaiton.

²⁶ —¿Ahuusca huafainmun mia cayahuaquin? —ishon yocaifoan.

²⁷ —Munfin mato yoififashuacai mato yoia cuscan man nicapaima. ¿Ahuuscaquin man afanan ua yocainmun? ¿Marifimun ahuun tanamisi man ipaicain? —ato huaiton.

²⁸ Fasi roaquin futsanifo. —Minfin ahuun tanamisiquin. Nonfofin Moisés tsain tanamisi-foquin.

²⁹ Non tapiafin Diosin Moisés fu tsainpaoniquin. Noncai a Jesús tapiamafinquin. Tii ahuu cuscaranfinquin a nocofunucái non tapiama, —huaifoan.

³⁰ —Choon. Mancai tapiamafinquin raniashumain Jesús oshon. Un fushofiacun ua cayahuamaquin.

³¹ Non tapiafin yoran chaca huamicai Diospan nicapaitiroma. Ratoran Diosin tanasharafain yoia cuscan aitonfin nanscarafu Diosin nicatiroquin.

³² Nan Diospan mai onihuani chaincai ascaran nocofunun fusho caya huaa non nicaiy-omisimafinquin.

³³ Upa Diosin na nocofunu Jesús nichiyamanicai ahua ahuusca huacuanama, —huaiton.

³⁴ Nicacani fasi aqui sinanifo, —Minfin chacacoin cainiquin. ¿Ascán ahuuscaquimun min noco tapimapaicain? Min chacashunifashon. Nocon ichananti pushu muran min afanan iquitiroma. Nunoashu cariscatahuun. Noncaicon mia afanan oinpaipayaintonfin. Afanan nuno iquicuranyamahuun, —huanifo.

Ratoranfoan Jesús icoinra huayamacanashu fusho cuscaracoiffo

³⁵ Ascaiton fusho ipaoni aton ichananti pushu muranshon potaifoan Jesús nicani. Ascashon funaquin fuchini. Fuchishon yoini, —¿Minmun na nocofunu Dios ariashu oni icoinra huaicai? —ishon Jesús yocaiton.

³⁶ —¿Tsoanmun na nocofunuquin? Ua yoihuun urifi un icoinra huanon, —huaiton.

³⁷ –Nan min ufu tsaincaifin unquin, –Jesús huaiton.

³⁸ Nicatan, –Ifon, unfin mia icoinra huacain. Min fasi sharacoin. Un mia noi. Un mia Ifoai. Min Diospan Facuran, –ishon yoini.

³⁹ Ascano nanno niafo Jesús ato yoini, –Uhuun Upa Dios icariashu un nuno mai ano oni ratofanmain ua icoinra huayamaino ua icoinra huacanicain un puashoshquin. Ascan toa Upa Dios fu ipaifaquin tapiama ahuuscamin atiroquin nanfo fusho cuscarafishon ua icoinra huaashucaí afanan fusho cuscara itirofoma oinsharatiro Upa Dios fu ipashaquin. Futsafoan shinacaquin tapisharafishocai tapisharafoma. Ua icoinra huayamaifo. Nanfo fusho cuscaracoin. Funoshcaquin, –ishon Jesús yoini.

⁴⁰ Nanno Fariseofo Jesús yoiai cuscan nicacashon a yocanifo, –¡Cuul! ¿Min noco yoimun non fushocun? –huaifoan.

⁴¹ Ato yoiquin, –“Nonfin fusho cuscarafóquin. Man non funoa. Non chaca huamisiran,” ishon man yoiaiton un maton chaca soashocuana. Mancai ascatarocon, “Nonfin oinsharatiroquin. Noncai funoama. Nonfin sharaquin. Noncai chacamaran,” man imisi. Ascan maton chaca soatama man funocoianshu Upa Dios icano nocopacunacamaman, –ishon Jesús ato yoini.

10

Chashoanfo cushumisihuunoa afincoín ahuunoa Jesús ato yosini

¹ Ascatan Jesús ato tapimani nanmain aton cushumiscoinshofin. Chashoan cushumison ahuun chashoanfo cushutiro. Nanscarifi aquin Jesús ahuunshon icoinra huafo cushucointiro. Nannori Jesús ato yoini isca huaquin, –Iconcon un mato yoinon. Pasoatoshon yoran chashoanfo cunushotiro iquimashquin raqui fononfoma. Nan cunu caincaiti ya. Ascan toa caincaiti murannoashu iquitama pochinnnoashu iguiafin nan yomutsoquin.

² Ascan nan toa caincaiti cunu muran iquimamisifin nancaifin ato cushumisiquin.

³ Caincaiti ano nocoaiton nan nocofunun caincaiti cushumison fupushotiro chashoan cushumison iquimapacunon. Ascan chashoan cushumisi iquiaiton ahuun chashoanfoan ahuun oi onanti huanifo. Nantifi ahuun chashoanfo anu futsapacuni. Aton anun cunapacuaino chashoanfoan mufainifo.

⁴ Aton cushumisi rucun caino chashoanfoan cunu muranshon mufainifo. Ahuun oi onanincashon mufainifo.

⁵ Futsan cunafiatocai chashoanfoan ahuun oi onannifoma. Ahuun oi onainyamacani amaqui ichotiroran, –ishon Jesús ato yoini.

⁶ Jesús ahuunoa ato yoifiaiton tsoan tapinima.

Jesús nocon cushusharamisi

⁷ Ascano Jesús afanan ato shafacafi yoini, –Un mato iconcoín yoinon. Nan chashoanfo cunu muran iquipaicani shoi fusti muran iquitirofo. Unfin nan shoi cuscaracoin. Tsoa Upa Dios icano iquipai uhuunoashu fusti ari iquitirofoquin.

⁸ Un matoqui nocoataima futsafoanri yoia isca huaquin, “Un mato tapimatiro ahuuscashumain Upa Diosqui man nocotiro afu nipashquin,” ishon yoifiamisishacaquin afoancaifin paramisifoquin. Yomutso cuscarafó. Diospan yora parapaicani ato yonomapai. Asca huapaifainfoan Diospan yorafoancai na cuscarafó nicapaicanima.

⁹ Unfin na shoi caincaiti cuscaracoin. Tsoa Upa Dios icano ipapaiquin uhuunoashu fusti ari iquitirofo afu ipashquin. Natianri uhuunoashu isharafofo ahuatocai aton nomuran fucash huatiroma.

¹⁰ Futsafoan uhuun yorafo parapaicani. “Ua tanacahuun. Un mato tapimasharonon,” ishon ato yoifaquicai nanfoanfin uhuun yorafo umaqui imapaicani. Yomutso cuscarafó. Ua icoinra huafo shara huapaicanima. Ato shara huatamarocon ato chaca huapaifain ato rutupaicani. Asca ato huafainfoancai un ascarama. Ua tanamisifo un ato imasharafain un ato unimashquin. Nanscaifin un oniquin.

¹¹⁻¹³ Ua icoinra huafo chashoan cuscarafó. Cushumisi yopacani. Unfin nan chashoanfo cushumisi shara cuscaracoin. Ascan na nocofununcai chashoanfo ifoshomacai ato cushusharama. Chashoanfo futsan cushumashofin ifoan aton pui nantiroquin. Ascan chashoanfohuunoa shinantamarocon pui fusti shinain. Ascaino masharo chashoanfoqui nocoaino nan cushumisi futsan ato cushusharatama ato potafaini ichotiro. Shinanquin isca huatiro, “Na masharo fasi musucoin. Nan chashoanfocai uhuunacoínmafinquin. Ascan na masharonun ato piquin nanscanon. Uncai ahuusca huatiroma un ato numapanan. Unfin atomaqui ichoicaicain masharonun ua ahuusca huanonma,” ishon shinantiro. Chashoanfoan aton ifocoincai ascatiroma. Affin ahuun chashoanfo cushusharatiroquin masharonun ato pinonma. Shinantiro isca huaquin, “Uhuun chashoanfohuunoaahucaifin un natiroquin. Nanfocairocon ahuuscanonma,” ishon shinantiro.

¹⁴⁻¹⁵ Unfin na chashoanfo cushumisi shara cuscaraquin. Cushumisinin ahuun chashoanfo onancoin ato cushusharamisi. Urifi ua icoinra huafo un ato cushusharamisi. Uhuun Upa Diosin ua onancoin. Urifi uhuun Upa un onancoian. Nanscariffai ua icoinra huafo un ato onancoin. Nanfoanrifi ua onancoicaniquin. Un atohuunoashu naashquin.

¹⁶ Yora futsafoanri ua icoinra huashquicani. Afocai Israelifoma. Nanforifi un uhuun Upa icano iyotiroquin. Nanfoanri mai ano niyocashon ua nicasharayoshcani. Ascan Israelifo yafi mani futsafoanri ua icoinra huacanashu fusti cuscaracoin iishcaniquin. Nantifi nan icoinra huafoti Upa Diosin yorafo iishcaniquin. Urusu fusti un aton cushumisi un iishquin.

¹⁷ Un ato cushusharashu un atohuunoashu naashquin. Ascan uhuun Upa Diosin ua noiaino naashu un afanan funishquin nipashquin.

¹⁸ Ua icoinra huafohuunoashu napaiyamainocai tsoan ua namatiroma. Uhuun Upa ua yononi cuscan un atohuunoashu naicain. Uhuun Upa Diosin ua yononi cuscan un atohuunoashu nayoflashu un afanan funitiro nipashquin, —ishon Jesús ato yoini.

¹⁹ Nicacashon atirifi nocon caifoa icoinra huaifoanno atirifoancai tsoan icoinra huanima.

²⁰ Atirifoan yoiquin isca huanifo, —Aafin nisocoinquin. Yoshin chaca ahuun nua. ¿Ahuuscaquitsi non na nocofunu nicatiro? —ishon yoinifo.

²¹ Atirifoanri yoini, —Aacai yoshin chaca ahuun nuama. Yoshin chacanuncai nocofunu fusho afanan oinmatiromaran, —ishon yoinifo.

Israelifo aton niaifofoancai Jesús icoinra huanifoma

²²⁻²⁴ Ascano Jesús nocon caifo Dios fu tsainti pushu Jerusalén ano non cani. Oi pacutian non cani. Nanno tapasi uhuaparasi muran fonifo. Nantianri nocon caifo Israelifoan nocon fusitin ahuun anu tuqui huani isca huaquin, —Dios fu tsainti pushu onihuashararan, —ishon anuni. Nanno pushun facu ahuun anurifi tuquihuani, —Salomonran, —huanifo. Nannori Jesús ini. Nocon caifo niaifofo aqui funifo a yocacani. —Minmain Cristoquin nocon shafacafi yoihuu. ¿Ahuuscaimun min noco shafacafi yoiyamacaiquin? ¿Ahuuatiatsi min noco shafacafi yoicain? —huaifoan.

²⁵ —Un mato yoifiamisicun man ua icoinra huaama. Uhuun Upahuunshon un yorafo tsoan atiroma cuscan un huafafaini. Nanfo un mato isma unmain Diospan Facushofin.

²⁶ Ascacia mancai Upan Diosin ahuun yorama. Man ua icoinra huama.

²⁷ Ua icoinra huafoan ua nicasharatio. Un ato onancoioan un a tanafo.

²⁸⁻³⁰ Omitsiscapanacafa muran focanima. Ua tanaifocai ari fonacafoma. Ascamarocon un ato Upa Dios ya imapacunaca. Upa Diosin ato ua inan. Upan nantifi finoncoian. Upa Dios fu un fusti cuscaracoin. Ascancunfin tsoancai ua tanamisifo unmaqui yafi Upamaquiri imapacunacamaran, —ishon Jesús ato yoini.

³¹ Nicacani afanan Israeli niaifofoan toquiri uhuapa ficatan Jesús tsacapainifo rutupaicaquin.

³² Asca huafiafoan Jesús ato yoini, —Upa Diosihuunshon tsoa futsan atiroma cuscan un mato ismafiamisi. ¿Ascan ahuanhunshocaimun man ua toquirinin tsacaicain? —huaifon.

³³ —Nanfohuunshocai non mia toquirinin tsacaima. “Tsoa futsacai Diosima,” anori Diosin tsain cununi. Minrifi nocon cuscara nocofunuquin. Ascanshahuun mian yoi mirifi Diosiran min icaquin. Ascan min Dios chaca huai. Ascacufin non mia toquirinin tsacaicain, —huaifoan.

³⁴⁻³⁶ —Diospan tsain mato cunushoni isca huaquin, “Un mato yoi manfin Dios cuscaracoinfoquin,” ishon ato yoini. Diosin yoini cuscaai tsoan, “Chaniran,” huatiroma. Ascan nan Diosin anori yoiaino ahuuscain man yoi ai “Un Dios chaca huaran,” ishon. Nantofin ua catonshon nai arishon nuno mai ano ua nichiniquin. Ascancunfin un icon yoitiro unfin Diospan Facuquin.

³⁷⁻³⁸ Mancai ua icoinra huaima. Uhuun Upan Diosin aca cuscan un huayamaiton ua icoinra huayamacahuun. Ascaciaquin uhuun Upa acai cuscan urifi nanscasi huaiton ua icoinra huacahuun. Uhuun Upan acai cuscan urifi nanscasi un huaiton man tapitiro Uhuun Upa ufu ica. Unrifi uhuun Upa fu un icaran, —ishon Jesús ato yoini.

³⁹ Nicacashon afanan Jesús achipaifainfoanno atomaquinnoashu caitocai tsoan achinima.

⁴⁰ Atomaquinoashu cai unu Jordán ari cani. Nannoshon Juanpan tau huaquin yorafo unu muran iquimapacuni. Nanno chaimashta Jesús iyoni. Unu cusumunri iyoni.

⁴¹ Ascaino yorafo aqui fucashon. Yoinifo isca huaquin, —Jesús Diosihuunshon ahuamamishti noco isma. Juanpacai asca huamisima. Ascashashon Juanpan Jesushuunoo iconcoian. Yoia cuscan nanscacoian huamisiran, —icashu yoinannifo.

⁴² Asca huacanashu nanno yora ichaparasion, —Icon Jesusfin Diospan Facuquin, —icashon icoinra huanifo.

11

Lázaro nani cuscan

¹⁻² Ascatan nocofunu Lázaro isinin icai. Ahuun pushu Betania ano ini. Nan Lázaro isinin icaiton ahuun poi rafu María yafi iyoa Marta nannori inifo. Nan María Jesusqui motica murannoa ininti sharacapa Jesús tau pumancayan ocatan ahuun foon otucuru aniquin.

³ Nan poi rafutan Jesús tsain fomaquifin, —Ifon, nan min ahuun noiaifin isinin iquiquin, —ishon yoimanifo.

⁴ Jesús nicatan yoiquifin, —Nan Lázaro isinincaicain naimafinquin. Isinin icafin yorafoan oicaniquin Dios sharacun. Unmain Diospan Facuquin un ahuamamishti huaiton tapicashon icoinra huanonfo, —ishon Jesús ato yoini.

⁵ Jesús Lázaro yafi poi rafu atohuun noicoinni.

⁶ Lázaro isinincaiton nicafiai nanno osha rafuyoni.

⁷ Ascaiton —Non Judea ano afanan nasononcahuun, —ishon noco yoini.

⁸ Ascaiton non cumaquin, —Tapimamisiton, nocon niaifofo Judea anoshon ramashita mia rutucuanafu. ¿Ascán ahuuscain min afanan ano capaimun? —ishon non yocaiton.

⁹ —Shafatan non oinsharatiro. Farin chashaino non oinsharatiro pacushquima. Nanscarifiai shafatifi uhuun Upa Diosin ua amapaiyai cuscan ua tapimamisi. Ua cushuano un funotiromaquin. Uricai un musutiroma.

¹⁰ Ascafia faquishiano chashamatiyamaino yora pacutiromo. Nanscarifiai tsoan Dios fu rafuyamatocai tapisharatiroma ahuuscashumain isharatiromoquin. Ascái funotiromo, —ishon noco yoini.

¹¹ Nannori noco yoitan Jesús afanan yoini isca huaquin, —Nocon yorahuan Lázaro oshafiacun un moimanicain, —huaiton.

¹² Non afu rafumisifoan nicashon non yoiniquin, —Ifon, oshacoianfinquin naama. Chipo cayasharatiroman, —huanifo.

¹³ Man nacoinfiacun, —Osharan, —ato huaiton. Chipo moiran ishon shinannifo. Jesús man arusu onanfiashon ato yoicoinnima.

¹⁴⁻¹⁵ Ascán noco shafacafi yoini, —Lázaro man nacoinfiacun un unimai naino un ano icama. Ascán man chipo oinquin man fasi ua icoinra huashquin. Ascafia natian non Lázaro ano fononfocahuun, —ishon Jesús noco yoini.

¹⁶ Ascán nicatan Tomás nan rafanacani Jesús fu rafumisi futsan noco yoini, —Non canon. Norifi afu non nannon, —ishon noco yoini.

Jesús fustiton naafo funimatiro nipanonfo

¹⁷ Ascatan Betania ano nococashon Jesús nica man Lázaro naita. Osha rafu non rafuri finoan ini mai huaitafo. Mahua quini muran mai huaitafo ini.

¹⁸ Betania Jerusalén chaima ini.

¹⁹ Nocon caifo Israelifo ichapa María yafi Marta icano funifo aton ointi shinanmasharashapai poi naano.

²⁰ Martan Jesús oaiton nicai aqui nocoicai cani. María pushu muran nichifaini.

²¹ Jesusqui nocotan yoini, —Ifon, min nuno anocai uhuun ushton ua nashocuanitamafinquin.

²² Un tapiafin natianri min ahua futsa Dios yocaitofin mia ashonrisca huatiromoquin, —huaiton.

²³ —Ushtofin afanan funiquin, —huaiton.

²⁴ —Un tapiafin ahuun unutani nan naafo funiaifoannorifi funitiroquin, —huaiton.

²⁵ Ascaiton Jesús cumaquin, —Nanfinquin uhuunoashu naafoti funicani. Uhuunoashufin nantifi niafoquin. Nan ua icoinra huaafin nafiashu afanan funiashu ahuuscanaacamaquin.

²⁶ Niyoshon ua icoinra huashucaí nanacama. ¿Nan mianmun icoinra huaicai? —huaiton.

²⁷ —Ai, Ifon, unfin mia icoinra huaicai. Minmain Cristocufin Diospan Facu. Nocon caifoon mia manamisi. Nocon shunicaifoanrifi mia manapaonifoquin, —huani.

Lázaro mahua quini muran maia anoashu Jesús uaini

²⁸ Yoitan Martan chipocun María yoicai cani. Nocoquin oian afu rafuafo María fu uaicaifoan oinquin Marta chipocun fusti mushannantan yoiquin, —Nocon tapimamisifin oquin. Mia yoimana, —ishon yoini.

²⁹ María nicatan funinaca huantan cai aqui nocoricani.

³⁰ Jesuscai pushurasi muran nocoatai inima. Nan Marta fu tsaincanoashu oataima ini.

³¹ María fu uaicaifoan oin atofu uafifin funinaca huatan caiton oincaquin María poi maia anoashu uaiqui cairafain nocon yora Israelifo mufainifo.

³² María Jesusqui nocotan taucopacufoan yoini, —Ifon, min nuno anocai uhuun ushto ua nashocuanitamafinquin. Iscaifon uhuun ushto ua nishoan icuanaquin, —huaiton.

³³ Jesús María oian uaicaiton nocon caiforifi María fu fucanashu afu uaicaiffoan ato oinfin Jesús arifi atohuun ramapaitan ato shinantaquin.

³⁴ Ato yocani, —¿Ranimun man mai huaitanquin? —ato huaiton. Cumacaquin, —Ifon, oinyopon, —huanifo.

³⁵ Oinyopon huaifono, Jesús uaini.

³⁶ Uaicaiton oincaquin nocon caiffoan, —¡Oincapon! Lázaro fasi noi ahuunoashu uaiquin,

³⁷ ¿Nan fusho cayahuani cuscarifi huaquimun nunoshon Lázaro cayahuacuanitan? —huanifo.

Jesús Lázaro funimani

³⁸ Ascatan afanan Jesús ahuun ointi muran fasi shinancoinquin maia ano nocotan. Maiano toquirininhuan quini ano nocoshon yoiquin,

³⁹ —Toquiri fupucahuun, —huaiton. Nicaquin poi Marta yoiquin, —Ma, Ifon, manfin osha rafu non rafuri finoanquin a naita. Natianfin man pisiaquin, —huaiton.

⁴⁰ Nicaquin Jesús yoiquin, —¿Un mia yoiaiton min nicamamun? Mian icoinra huafin Diosin ahuaara shara tsoan atiroma cuscan huaiton min ointiroquin, —huani.

⁴¹ Ascaiton nicacaquin fupunshonifo. Fupushonafoanno nai foisinifoantan, —Upan, un mia cufia cuscan mian nicai. Un mia aicho huai.

⁴² Un tapiafin mian nicafafainmisiquin. Ascan nuno niafoan mia icoinra huacashofin un mia cufiai cuscan mia huacaniquin, —Jesús apa cufini.

⁴³ Asca huatan Jesús yoiquin oi ashcafainin, —Lázaro, quini murannoashu funicurahuum, —huaino.

⁴⁴ Funicurani, —Ahuun rashuafo pucacahuun cainshara curanon —Jesús ato huani.

Israelifo aton niaiffoan Jesús rutupainifo

Mt 26.1-5; Mr 14.1-2; Lc 22.1-2

⁴⁵ Ascaiton a nocon caifo María fu rafuafoan oincaquifin Jesús icoinra huanifoquin.

⁴⁶ Ascaiton oincanifin atirifi Fariseoqui chani focani fonifoquin.

⁴⁷ Ascaiton nicacashufin Fariseofo yafi nocon yorafohuunshon Dios cufimisi niaiffofo ichanannifoquin. Ichanancashon yoiacquifin, —¿Nonmun ahuusca huaicai? Jesús tsoan atiroma cuscara ahuaara huaiquin.

⁴⁸ Non ahuuscara huaiyamafin nantiffain icoinra huacaniquin. Ascano Romanonfoan noco asca huatirofo. “Mancai afanan niaiffofoya itiomaran,” ishon noco yoitiro. Nocon ichananti pushuri paon huatiro, —nocon caifo Israelifo niaifo inifo.

⁴⁹ Ascaiton nocon yorafohuunshon Dios cufimisi niaifocoinchi Caifás ato yoiquin, —Mancai ahua tapiamafinquin.

⁵⁰ ¿Man tapiamamun na nocofunu fusti nocon yorafohuunoashu naashquin? Nancaifin sharaquin. Arus fusti nashquin tsoashtamaquin, —ishon yoini. Ascacufin Caifás inon pacoai cuscan yoiniquin.

⁵¹ Caifás yoiquicai afin shinanfain yoinima. Diosin ahuun shinanpan shinanmanainofin yoiniquin. Nocon yorafohuunshon Dios cufimisi niaifocoinchi Diosin ahuun shinanpan shinanmana Jesús nantifi ahuun caifohuunoashu nanonpacoiran, ishon yoini.

⁵² Jesuscai nocon caifo fustihuunoashu naimafinquin. Nantifi maniftichin icoinra huafohuunoashufin noco naashoshquiquin. Ascano nantifi Diosin facu inonfo. Noinancoincani. Nan yora fusti cuscara ishcaquin.

⁵³ Nan Lázaro funiatianfin shinanquin tau huanifoquin, —¿Ahuuscashomain non Jesús ruturoquin? —icashon nanscasi huaquin shinanriapaonifo.

⁵⁴ Rutupaiyafno tapiashu Jesús afanan nocon caifo ichapafo icano cayonima. Yorahuanrasi ano catamarocon pushu fustirasi ano cani. Nan pushu fustirasi Jerusalén chaimashta ahuun anu Efraín. Nanno non afu rafumisi.

⁵⁵ Nocon caifo Israelifo nocon fusiitin shafatan Diospan oinmati nan afu nai muran imisiton nocon shunifoan aton furonanfacufo iyoafofosi finonmani shinanshaquin nocoti chaima. Nantianri yora ichapafo pushurasi ano chai icanashu Jerusalén ano funifo. Jerusalén anoafo Moisés aton shunifo yononi cuscan atorifi huamapai aton chaca soamapai ichananti pushu muran iquifino.

⁵⁶ Ascaiffoanno nocon caifo niaiffoan Jesús funanifo. Dios fu tsainti pushu ano chifi niafo yocananannifo, —¿Ranimun Jesús? ¿Man shinanmun nocon fusiitin Jerusalén ano oimamun? —ishon yocananannifo.

⁵⁷ Asca huacashu nocon yorafohuunshon Dios cufimisi niaiffofo yafi Fariseofoanri ato yononi isca huaquin, —Jesús fuchishon noco tapimacahuun non achinon cunu muran iquimashquin, —ishon ato yononi.

12

Ainfoan Jesús shinanquin inintin shara ahuun tau pumancaya ocani

Mt 26.6-13; Mr 14.3-9

¹ Ascano seis osha fusitin nocoti chaima Jesús no fu Betania ano cayoni. Nanno Lázaro ica ini. Nan Lázaro naacun Jesús funimani.

² Naannoshon Jesús pimapaquin tushu pichashonifo. Ascan Lázarorifi nanno atofu ini. Marta ato pimani.

³ Piaifono María Jesusqui oano ahuun ininti shara moticaquinoa Jesús ahuun tau pumancaya ocani. Ocashion ahuun foon otucurani. Asca huaiton nan pushu murannofoan nan ininti sharacoin shutunifo.

⁴ Ascan Jesús afu rafumisi futsan nan Judas Iscariote nan Simonpan facu nanton chipo Jesús achimashquin yoini,

⁵ —¡Cuu! ¡Ahuuscaquimun na ainfoan ininti shara potaquin? Ahuun rafanan pui ichapa fishon noco inancun ahuuomafo non inancuana. Ascan shara icuanaran, —ishon Judaspan yoini.

⁶ Anori shinanfiaquicai ahuuomafo shinancoinnima. Afi yomutso iniquin. Nocon pui nanuti cushupaoni. Cushucoipaonima. Ahuara fipaiquin nanhoa pui onupaoni.

⁷ Ascano Jesús Judas yoini, —María fucash huayamahuu. Un samamashta nai tapishon uqui ininti ocaquin.

⁸ Nan yora ahuuomafo matofu ipanaca. Ascacufin ato afanan inansharatiroquin. Ucai matofu nuno mai ano ipanacama. Ascaiton María natian ua shara huaran, —ishon Jesús yoini.

Nocon caifo nocon niaiffoan Lázaro rutupainifo

⁹ Ascano Jesús nicafuracani nocon caifo Israelifo ichapa aqui funifo. Lázaro funia nicacani yora ichapa aqui funifo. Jesús fusti oinpaicanimaquian Lázaro nacoñfiacun Jesús funimana oinpaicani funifo.

¹⁰⁻¹¹ Lázarohuunoo nicacaquin nocon caifo ichapafoan afanan nocon yorafohuunshon Dios cufimisi niaiffo tanatama Jesús fusti icoinra huanifo. Ascaino nocon niaiffo yoinannifo, —Nan rafu non rutunon. Jesús fustimaquian. Lázarori non rutunon, —icashu yoinannifo.

Jesús Jerusalén ano nocotoshiniquin

Mt 21.1-11; Mr 11.1-11; Lc 19.28-40

¹² Man ascano iyoconaino nocon caiffo nocon fosititan yorahuanrasi Jerusalén ano inifo. Jesusrifi nocoaiton nicacani aqui funifo.

¹³ Upufo ya aqui fucaquin oi ashcafinin isca huanifo,

¡Aicho! Nocon Numamisi oiquin. Nonfin Israelifoquin. Minfin nocon niaiffoquin. Nocon Ifo Diosin mia nocoqui nichini. Min fasi sharacoin. Upa Diosin mia shara huapapainonran

ishon yoinifoquin.

¹⁴⁻¹⁵ Nannori yoiaino Jesús burro cahuashara camaqui tsainacahuatan cani. Diosin tsain yoini cuscaín iscani,

“Jerusalén ano icafoan ratuyamacahuun. Maton Niaifo matoqui oshquiquin. Burro cahuashara camaqui matoqui oshquiran,”

ishon cunuyoni cuscan.

¹⁶ Nantian nanfohuunoo oinfiaquicai icai cuscan non tapiyonima. Chipo Jesús afanan Apa ari nai muran cani afu niaifocoin iguicai non shinanni isca huaquin, —Jesús mai anoshon amisi cuscan nannoricoin Diosin tsain ahuunoo cunuyonifo. Nocon shunifoan Jesús caiantaima inonpacoai cuscan aqui cunuyoniforan, —ishon nocon nomuran non Jesús shinanni.

¹⁷ Jesús Jerusalén ano nocoaiton nicacaquin nantianri yorahuanrasifoan a mananifo oinpaicaquin. Atriffoan Jesús Lázaro naafiacun funimanaiton oinnifo. Oincanifin futsafoqui chaninifoquin arifi oinnonfo.

¹⁸ Nocofunu man nacoñfiacun funimana nicacaquin nanfoanri oinpainifo. Ascashion fai anoshon Jesús mananifo.

¹⁹ Ascano Fariseofo aqui yoinannifo, —¡Cuu! ¡Shinancapon! Noncai ahuusca huatiroma Jesús isca huanonma. Tsoancai noco nicapaicanima. Nantifi yorafoan Jesús nicapaicaniran, —icanashu yoinannifo.

Jesús inon pacoai cuscan yoiyoni isca huaquin, —Ua rutushquicaniran, —ishon yoini

²⁰ Nantianri Jerusalén ano yorahuanrasi muran nocon caifomafori nocon yora futsafo fusitin ano funifo.

²¹ Nococatan Felipe ano fonifo yocain focani. Nan Felipe Galilea mai ano nan pushurasi ahuun anu Betsaida anoashu cainni. —Non Jesús fu tsainpai. Noco ihuushohuun non afu tsainon, —ishon Felipe yoinifo.

²² Nicashon yoiafo cuscan Andrés tapimani. Ascan nan rafutan Jesús yoinifo.

²³⁻²⁴ Nicaquin Jesús ato yoini, —Unfin samamashta uhuun Upa Diosin nai muran icano un caicain afu niaifo iqui cai. Ascanfia uhuun Upa ari cataima un yorafotihuunoashu un nayoshqui. Isca huaquin un mato tapimashquin man tapinon. Shuqui furo fusti non fanayamacai foatiroma. Ascatamarocon nan shuqui furo fusti fanano ahuunoashu furo shara ranan caintiro. Nanscarifai un matohuunoashu nayamacai tosa futsa un nimapacutiroma. Urus fusti un nipatiro.

²⁵ Tsoan iscatiro “Diosin ua imapaiyai cuscaai un apaima. Ufi apaiyai cuscan fustifin un shinaincani,” ishon anori shinanshu funocointiro. Ascafia tsoan isca huaquin shinain, “Un nuno mai ano niyoshon ufi apaiyai cuscan un shinanpaitamarocon Diosin ua imapaiyai cuscan fusti un shinanpairan,” ishon yoitan Upa Dios fu ipasharatiro.

²⁶ Ascan tosa uhuunoa yonomisi ipaiqui uhuun tsain nicacointan un yoia cuscan huatiro. Ua tanashu un icano arifi nannori ufu ipatiroquin. Uhuun yonomisi un yonoa cuscan ua ashoinquin Uhuun Upa Diosin futsafo aton ointaifi ahuunoa yoishquin isca huaquin, “¡Aicho! Min uhuun Facu Jesús nicamisi sharacoin. Min shara huamisirán,” ishon Upa Diosin ahuunoa yoisharatiro.

Jesús rutushquiaifo cuscan yoini

²⁷ ¡Ohua! Natian uhuun nomuran un fasi omitsiscai. ¿Un raquiri huatiromun? Ucai yoitiroma isca huaquin, “Upa, ua numahuu un natian omitsiscanonma,” ishoncai un anori yoitiroma. Upa Diosin ua nichini un natian ato omitsiscanon.

²⁸ Upan, Uhuunshon ato oinmahuu min fasi shara, —ishon Jesús yoini.

Yoiaiton nai muranshon oi ashcafinitin Apa Diosin cumani, —Un minhuunshon un ato ismafafaini un shara. Nanscarifi un afanan huai, —ishon yoini.

²⁹ Nan yorahuanrasi nannoshon nicacani atirifoan yoinifo, —Man turuicaran, —inifo. Atirifoanri yoinifo, —Upa Diosin ahuun oinmati afu nai muran icaton Jesús yoian, —ishon yoinifo.

³⁰ Ascan Jesús ato yoini, —Nan oi nai murannoa man rama nicaicain ua tapimanama matofin nicamapaiaquin.

³¹ Natian nan icoinra huamafoti Diosin ato onaintimaicoinni. Aton ifonri nan yoshin chaca Satanás arifi nantiantari Diosin potashquin afanan aton niaifo inonma.

³² Ascafiatan ihui coyan iquinanqui ua mastashon uaya finifoanshcani. Nanhuunshon un nantifi yorafo uqui omashquin, —ishon ato yoini.

³³ Nannori ato yoini ahuuscashumain nashquicai tapinonfo.

³⁴ Nicacashon yorahuanrasifoan nanno nishon yoinifo, —Diosin tsain cununi cuscan noco yoimisi isca huaquin, “Cristo, nan Diosin catoanfin nipanacaquin. Nanacamaran. Ascacufin ahuuscashomain, Diospan Facu ihui coyan iquinanqui uaya finifoanshcanicain,” min noco huaran. Tsohuunnoamun min yoicain, —ishon yoinifo.

³⁵ Jesús ato yoiquin, —Uncai mato chashamashoriaima. Un mato yoia cuscan nicasharacahuun funoshcaquin. Chashamati yamaino faquish itiro yora funonon. Tsoa faquish muran caquin fai funomatiro. Rani caimancai tapitiroma.

³⁶ Un matofu icano ua icoinra huacahuun funoshcaquima. Man ua icoinra huacun un mato chashamashotiro man shafacafi inon. Unfin chashamati cuscaroquin. Ua tanashon manrifi futsafo chashamashotiro matohuunshon uari tananonfo, —ishon Jesús ato yoini. Ahuun tsain yoiqui anaititan atomaquinoashu cani. Ascaitocai afanan oinnifoma.

Israelifoan Jesús icoinra huanifoma

³⁷ Jesús aton ointaifi yoran atiroma cuscan ato oinmafiacun tsoan icoinra huanifoma nan Diospan Facucoinfacun.

³⁸ Nannori Isaías atohuunoa inonpacoai cuscan yoiyoni isca huaquin,

“Ifon, non min tsain ato yoifianocai tsoan noco icoinra huama. Yoran atiroma cuscan min ato ismafiacun tsoamun mia icoinra huaiquin,”

ishon Isaías inonpacoai cuscan cunuyoniquin.

³⁹ Diosin ato yoipaoni cuscan nicacasmanifo. Ascashon icoinra huapainifoma. Ascacufin afanan atohuunoa inonpacoai cuscan cunuyoni isca huaquin.

⁴⁰ “Icoina huayamaifoan Upa Diosin fusho ointsa ato imapacushquin. Diosin tsain iconcain oinfiacashon icoinra huaiyamaifoan Diosin aton shinantimahuatani shinansharanonfoma. Diosin tsain oinfiacaquin oianma shinantsacani. Nicafiacashon shinansharatirofoma tapishcaquin. ‘Muafo aton chaca shatucasmacani uqui funonfo un ato cainmasharanon,’ ishon Diosin yoini.”

Nannori Jesushuunoa Isaías inaca cuscan cunushoni.

⁴¹ Jesús fasi sharacoin inon pacoai cuscan Isaías oinquin tau huani. Ascacufin nannori ahuunoa yoiyoni.

⁴²⁻⁴³ Nocon caifo Israeli niaiffo atirifoan Jesús icoinra huayamafaino atirifoan icoinra huanifo. Icoinra huafiacani Fariseofoqui musunifo. Fariseofoan yoinifo, –Tsoan Jesús icoinra huaicai nocon ichananti pushu muran afanan iquitiromaran, –ishon yoinifo. –¡Ohua! Jesús icoinra huaran non icaiton nocon ichananti pushu muranshon noco potashcani afanan atofu non ichanannonma, –ishon yoinifo. Ratucoinnifo. Ascacuncai non Jesús icoinra huaran inifoma. Upa Dios ato yoishara icai fuchipaitama atohuunoasi fuchipainifo.

Jesús ahuun tsainhuunshon yorafoti tapimatiro chaca huayamaraquinmain shara huaquin

⁴⁴ Ascatan Jesús oi ashcafinin ato yoiquin isca huani, –Tsoan ua icoinra huaquin nan ua nichiniri man icoinra huatiro.

⁴⁵ Nanscarifi aquin ua oinfain nan ua nichiniri man oian.

⁴⁶ Nuno mai ano faquishihuan cuscara. Ascacufin Uhuun Upa Dios icanoashu un nuno mai ano oniquin chashamati cuscara iquiyoi. Ascan un mai ano oni afanan yorafoan chaca huafafaintamarocon ua icoinra huashon Upa Dios tanasharanonfo shafacafi icoinsharashcaquin.

⁴⁷ Tsoan uhuun tsain nicafiaquicai un yoia cuscan aima uncai ato onaintimaima. Un mai ano oni yorafo onaintimatamarocon ato numaiyoi un oni.

⁴⁸ Ascafiacai tsoan ua ifo huapaimisima uhuun tsainri nicacasmacaquin nanscarafu onaintimaitian Upa Diosin ato yoipacushquin isca huaquin, “Min niyoshon uhuun Facun ahuun tsain min nicacasmamisi. Min omitsiscapanacafu muran ipanacaquin,” ishon yoishquin.

⁴⁹ Uhuun Upa Diosin ua yonoa cuscan nannoricoin un mato yoimisiquin. Ufi shinan-faincai un mato yoima uhuun Upa Diosin ua shinanmanai cuscan un mato yoimisiquin.

⁵⁰ Mun tapian Upa Diosin yonoa cuscan icoinra huashu man nipatiro. Ascacufin un mato yoimisi cuscan uhuun Upa Diosin, “Nannori ato yoihuu,” ua huamisi, –ishon Jesús ato yoini.

13

Jesús afu rafumisifo ochonpacuni

¹ Diosin oinmati nan afu nai muran icaton nocon shunifoan aton facu iyoafofosi finonmani ato rutunonma nan fustin chaima. Jesús onanni iyoconaino rutuaifo. Mai anoashu Apa ari caanon. Non afu rafumisifo nuno mai ano niyoshon noco noiyoaponi cuscan natian noco isma nocohuun noi finacoquin.

² Jesús futan non afu rafumisifoan fari caino non pini. Non piataima Satanás yoshin chaca Simón futsan ahuun facu Judas Iscariote ahuun nomuran yoini isca huaquin, –Ato tapimahuu ahuuscashomain Jesús achitirofoquin, –ishon ahuun nomuran yononi.

³ Ascatan Upa Diosin ahuun Furun yoini, –Nantio nai murannoa non mai anoafori min ato yonotiro. Min ato iforan, –ishon Upa Diosin yoini cuscan Jesús tapiyoni. Upa Dios ariashu oni afananri aqui nasoshquin nanri tapiyoni.

⁴ Ascacufin piquin anaititan Jesús funinaca huan ahuun sahuuti pucatan ahuun turuitin piracomuni.

⁵ Ascatan unu tasoqui manushon non afu rafumisifo noco ochonpacushquin. Ochontan ahuun turuiti piracomuaton noco otucuruapani.

⁶ Ascatan Pedrori apaiyaiton, –¿Ifon, ahuuscain min uhuun Ifoflashon mian ochonpaiyain? –huaiton.

⁷ –Un mato acai cuscan natian min tapiama. Ascafia min chipo tapishquin, –huaiton.

⁸ –Ma, Ifon. Miancai ochonpacunacama, –huaiton. –Un mia ochonyamainocai min ufu rafutiroma, –huaiton.

⁹ –Ascaiton, Ifon tauquisimaquian ua muchofain ua machonhuun, –huaiton.

¹⁰ –Rama yora nashia ahuun tau fusti non ochotiro. Mantsi chostanayamacun. Ahuun caya afanan chostanama. Nantificai man choshtama. Ascafiashu atifincoinmaquian, –ishon Jesús noco yoini.

¹¹ Mantsi tapiamashon ratotomain achi mashquicain. Ascacun nannori noco yoini.

¹² Man noco ochopacutan nasocain ahuun sahuuti sahuuni. Sahuutan afanan tsaoti camaquai tsaoni. Ascashon noco yoini, –¿Man man tapiamun un mato ashoan cuscan?

¹³ “Tapimamison,” huafain “Uhuun Ifon man ua huaaquin.” Iconquiquian. Unmainquifin.

¹⁴ Ascatan unmain maton Ifocain maton tapimamisishofin unmain mato iquinhofin. Ascashon un mato ochopacua maton oinmati cuscara iishquin. Ascan un mato ochonpacua cuscari mafi ranan oinmati cuscara huaa tananshu ochononancahuun.

¹⁵ Un mato oinmana un aca cuscari marifi man anon. Ua cuscara icahuun.

¹⁶ Un mato icon yoi. Yonomisitocai ahuun ifo finontiro. Nanscarifiai futsan futsa nichian ahuun tsain ato tapimashon. Nan tsain fomisioncai nichimisi finontiro.

¹⁷ Un aca cuscan man man tapia. Ascan man man tapia cuscan aaquin unimacointiroquin.

¹⁸ Uncai nantifi matohuunoa yoima. Un tapian ahuutimain un catoanquin. Ascafiacun Diosin tsain yoia cuscacoin non iconra huatiro.

“Nuno u futan piyai futsan ua chaca huaashquin.”

¹⁹ Icataima un mato yoiyomisi. Ahuutiaran icai cuscan un mato yoiyomisi. Chipa icai cuscan un Cristo Diospan Facu man iconra huanon.

²⁰ Un mato icon yoi. Nan un nichian uhuun tsain ato yoinon. Nanrifi iconra huashofin uarifi man iconra huatiroquin. Ascatari ua iconra huashofin un nichiaru man iconra huaicai, –ishon Jesús ato yoini.

Jesús Judaspan ato achimashquiai cuscan ato yoini

Mt 26.20-25; Mr 14.17-21; Lc 22.21-23

²¹⁻²² Yoiquin anaitan Jesús fasi afiri shinanmucoinni. Ascashon fasi shafacafi nichifain noco yoini, –Un mato iconcoin yoi. Ratoran man futsafin ua ato achimashquiquin, –icaitan nicaquin non oiancufainni nofi ranan fuuisinan acufainni. Tapitsi non huaashu.

²³ Unquian afu potasinanshu tsoan. Fasi uhuun noicoian.

²⁴ Ascaiton Pedronun oi nomashta ua yoini. –Tsoanmain achimashquicain yocahuun, –ua huani.

²⁵ Ascaiton aqui tasicain un yocani, –¿Ifon, tsohuunoa min yoimun? –ishon un yocaiton.

²⁶ Jesús ua cumani, –Nan misi torushtan pocotan un futsa inaintonfin man tapicain nantofin ua ato achimashquiquin, –ishon ua yoini. Ascano nanscacoïn huaquin Simón futsan ahuun facu Judas Iscariote inanni.

²⁷ Inantanaino Judashuun yoshin chaca Satanás nuuriscatani. Ascaiton Jesús Judas yoini, –Nan min acai cuscan ariscahuu, –huani.

²⁸ Non tsaoshon piiranannuncai non tapinima ahuuscain huaicanicain.

²⁹ Ascaiton atirifoan shinannifo Jesús Judas nichian shafain funitian non yopai cuscan fificaishafain. Atirifoanri shinannifo Jesús ahuuomafo yopai cuscan ato inantahuun huaashafain non ini. Nan Judasfin pui cushumisi iniquin.

³⁰ Nan Jesús misi pocotan Judas inantapaiyaino funinaca huan caicainni. Man yamuaino.

Tsain funa shara noco yononi cuscan

³¹⁻³² Ascatan nomaquinoashu man caano Jesús noco yoini, –Un naitian Upa Diosin mato ismai unmain ahuun Facu sharacun. Un acaiton man oian cuscan Upa Dios fasi shararan huashcaini. Samamashta Upanri ato tapimai unmain ahuun Facu sharacufin. Unmain a cuscaracoincunfin.

³³ Uhuun facufoan uncai nuno matofu iqui chaima. Man ua funashquin. Un nocon caifo Israelifo yoia cuscan natian un matoru yoi un cai aricai man catiroma.

³⁴ Tsain funa futsa un mato yoicain, “Noinancahuun. Nan un matohuun noiai cuscari huafain marifi noinancahuun.”

³⁵ Man noinainno nantifi yorafoan tapitiro man ufu rafuaiton man uhuunshon tapishara, –Jesús noco huani.

Pedronun, –Un Jesús oinmisimaran, –ishquiai cuscan Jesús yoini

Mt 26.31-35; Mr 14.27-31; Lc 22.31-34

³⁶ Ascaiton Pedronun yocani, –¿Ifon, raqui min caimun? –yocaiton. Yoiquin, –Uncai aricai natian min ufu cayotiro. Chipa min ua mufaintiro, –huaiton.

³⁷ –¿Ahuuscain natian un mifut catiromamun, Ifon? Natianfin mun itisharaquin mihuunoashu naashquin, –huaiton.

³⁸ –¿Iconmun min itishara uhuunoashu naashquin? Iconquin un mia yoi. Na yamu tacaranun acataima, “Uncai Jesús oinmisimaran,” ishon min ato yoiquin rafu non fusti huairan, –ishon Jesús yoini.

14

Jesúsfin fai cuscaraquin. Nan fustihuunoashu non Upa Dios ari nocotiroquin

¹ —Maton ointi fucashniyamacahuun. Upa Dios icoinra huafain uarifi icoinra huacahuun.

² Uhuun Upa icanofin cunu ichaparasiquin. Un mato itishara huashoin caicain. Ascarayamacucain un mato yoicuanama.

³ Cayoshon un mato itishara huashoicaicain. Itishara huatani un afanan matoqui nasoshquin un icano mato ihuiyoi. Ari ufu man ipanon.

⁴ Man manfin un cai ari fai tapiaquin, —ato huaiton.

⁵ Ascaiton Tomás cumani, —Ifon, noncai a min cai ari fai tapiamafinquin. ¿Ahuuscashomun non tapitiroquin? —huaiton.

⁶ Ascaiton Jesús cumani, —Unfin na faiquin. Unfin iconmisiquin. Uhuunoashufin yorafo nipatirofoquin. Tsoacai ari uhuun Upa icano nocotiroma. Uhuunoashu fustifin uhuun Upa ari nocotirofoquin.

⁷ Ua onancoinshofin uhuun Upari man onantiroquin. Natian non chipori man uhuun Upa onancoin cai. Nan ua oinquinfin man uhuun Upa oianri man huaicain, —huaiton.

⁸ Ascaiton Felipe cumani, —Ifon, noco Upan Dios ismapun. Min noco Upa Dios ismaino non unimacointiro, —huaiton.

⁹ Ascaiton Jesús cumani, —Felipen, Un fasi matofu ipaifiamisicun. ¿Ahuuscain mian onanyomisimamun? Nan tsoan ua oinquifin uhuun Upari oinquin. ¿Ahuuscain ua “Upa oinmahuu” mian huaimun?

¹⁰ Un uhuun Upa fu imisi. Non fusti cuscaracoquin. ¿Nan min icoinra huaimamun? Un mato yoiyai cuscaai uhuunoacoin un mato yoima. Uhuun Upahuunoafin un mato yoicain. Nai arishon Upa Diosin mai ano apaiyai cuscafin ua huamaiquin.

¹¹ Un mato yoi uhuun Upa fu rafuaino urifi uhuun Upa fu un rafumisiquin. Ua icoinra huacahuun. Uhuun tsaincoicin icoinra huayamaquima. Un acaiton man oian cuscan ua icoinra huacahuun.

¹² Iconquin un mato yoi. Tsoan ua icoinra huashon un acai cuscan arifi huashquin. Uhuun Upa ari un caiyoano. Ascacufin un aca cuscan finonmacaifain ashquicani.

¹³ Ahuara uhuun anuhuunshon Uhuun Upa man yocaiton un mato ashotiro. Ascaiton yorafoan “Upa Dios shararan,” huanonfo.

¹⁴ Ahuara futsa uhuun anuhuunshon man yocaiton un mato ashotiro.

—Upa Diosin ahuun Yoshin Shara un matoqui nichishquin, —ishon Jesús ato yoini

¹⁵ Ua noifin un mato yonoai cuscan man aicai

¹⁶⁻¹⁷ Un Upa Dios yocain mato futsan nichishonon maton ointi fucash huanonma man isharanon. Maton tapimamisi inon. Amain Diosin Yoshin Sharashofin. Aafin iconmisiquin. Mato fu ipashquin. Icoindra huafoanmacai a onantirofoma. Ascarifi atacai ahuamain huaincai tapitirofoma. Ascan manfin onanmisiquin mato fumain icufin. Ascadari maton nomuran matofu rafui.

¹⁸ Uncai matomaqui iquima. Un mato potacoinma. Un matoqui afanan nasoshquin.

¹⁹ Un nuno igui chaima. Ua icoinra huafoma ua oinyoshcanima. Ascan manfin ua oinshquicai. Nan un nipaino marifi man nipanaca.

²⁰ Un funiaiton man tapitiro unmain Upa Dios fu ipanacacufin. Ascarifi atan marifi man ufu icaquin. Urifi un matofu icaino.

²¹ Un mato yonoa cuscan ua nicacoinshonfin ua fasi noicoquin. Ua noicoiainton uhuun Upari ahuun noi. Ascaino urifi un ahuun noi. Un shinain cuscan u ato tapimairan, —ishon Jesús noco yoini.

²² Ascaiton Judas futsan Iscariotemaquian yoini, —¿Ifon, ahuuscain mia icoinra huafoma min shinain cuscan yoitama noco fusti min tapimai? —ishon yocaiton.

²³ Jesús cumani, —Tsoan ua noi un mato yosiain cuscan ua nicacointiro. Uhuun Upa ahuun noiaino urifi un ahuun noi. Non afu rafupacushquin.

²⁴ Ua noiamacai un yosian cuscan ua nicaima. Na tsainfo man nicaicain uhuunacoinma. Uhuun Upan tsain un mato yoi.

²⁵ Un matomaqui cataima un mato yoiyofaini.

²⁶ Ascan Upan Diosin ahuun Yoshin Shara uhuunshon matoqui nichii mato futan afaian maton ointi fucash huanonma man ishara. Nantifi un mato tapimafain un mato yoiyai cuscan un mato shinanmai man ointiaquimanonma.

²⁷ Un matomaquinoashu cafiquin un maton ointi mato unimamashquin man isharanon. Icoindra huafoanmacai maton ointi mato unimamatiroma mato imasharanon. Mato anori yoifiaquin ipaitis mato yoi. Uncai ato cuscarama un mato icon yoi. Ascacun shinanchacayamafain ratuyamacahuun.

²⁸ Un mato yoia cuscan man man nica, “Un matomaquinoashu caicain. Ascafiashu un afanan matoqui ooshquin.” Ua noicoianshu man uqui unimatiro umain Upa ari caiton. Upanmain ua fasi finoncoincufin.

²⁹ Nan un mato rama yoia cuscacoin aiton man icoinra huatiro. Ascacun un mato yoiyomisi.

³⁰ Yoshin chacafaoan aton niaifo Satanás uqui oi. Ofiashocai ua iquintiroma. Ascacun un matomaquinoashu cai. Afanan un mato yoiquin chai huaima.

³¹ Un Upa Diosin fasi noicoin ascacun nan ua yoia cuscan un acoinmisi. Ascaiton nantiffain tapicani un fasi ahuun noiaiton. Funicahuun. Nunoashu non canon, –ishon Jesús noco yoini.

15

Jesús nan fimi ahuun anu uva ahuun caya cuscaracoin

¹ –Unfin fana uva ahuun caya cuscaracoinquin. Uhuun Upafin uva fana ahuun Ifo cuscaracoinquin.

² Manfin uva ahuun poyan futsan cuscarafuquin. Rato poya futsanmain fimiofuoquin Uhuun Upa nanfo poshtushon potashquin. Ascafia poyan futsa fimiafo aton tushpa futsafo chacamishti poshtutiro poyan sharafo mutininon fimi sharashquin.

³ Nanscarifi aquin manfin uhuun tsain nicaquin maton chaca potaquin isharashcaquin.

⁴ Umaquin pashcayamacahuun. Nan un matofu ica cuscariái. Poyan fustisicai fimitiroma ahuun cayamaisi. Nanscarifiái umaqui icashucaí un mato imapaiyai cuscan man atiroma.

⁵ Unfin nan fana ahuun caya cuscarafuquin. Ascan manfin ahuun poyanfo cuscarafuquin. Tsoa ufu rafucoincacainaino urifi un afu rafucoiaino ua cuscaracoinri itiro. Ua maisicai marusu man ahuuscatiroma.

⁶ Ahuun poyan futsa chaca fimiofua poshtushon potashquin tsasinon. Tsasicun poyafu ica huatiro coashquin. Nanscarifiái tsoa ufu rafutama umaquin icun nanscarafu chipo ica huashon chi urumanhuan muran ato potashquin.

⁷ Man ufu rafucoinshon uhuun tsain maton nomuran shinanfainquin man ahuarashta cuffa cuscan Upa Diosin mato ashotiro.

⁸ Un mato imapaiyai cuscan man afafainnifin man ufu rafumisi itiroquin. Man ascaitonfin mato ointirofoquin Upa Diosimain sharacoincunfin.

⁹⁻¹⁰ Uhuun Upa Diosin ua noicoian cuscan nanscarifi huaquin un matohuun noi. Nan shinanfafaicahuun. Unuyamacahuun. Uhuun Upa Diosin ua yonoa cuscan un amisi. Ascan ua noia cuscan un shinanfaini. Nanscarifiái un mato yonoa cuscan man aiquin un mato noiaiton man shinanfafaifiro.

¹¹ Un mato yoia cuscan man aino un matoqui unimatiro. Marifi fasi man unimacointiro.

¹² Isca huaquin un mato yonoi, “Un matohuun noiaí cuscan noinancahuun.”

¹³ Tsoan afu rafua futsan noicoinfin ahuunoashu natiroquin. A noiaí cuscaí tsoan finontiroma.

¹⁴ Un mato yonoaí cuscan man aifin ufu rafumisi man itiroquin.

¹⁵ Nan ufu rafuafosi un shinain cuscan un ato tapimatiro. Manfin ufu rafumisiquin. Ascan nantifi uhuun Upan ua yomisi cuscan un matori tapimana. Ascacuai man afanan uhuun oinmatiforan un mato huaima. Man ufu rafumisiran un mato huashquicain.

¹⁶ Man ua catonyamafaiton ufi un mato catoan ua cuscara man inon matohuunshon futsafoanri ua icoinra huanonfo. Nanfoan ua tanapacunacafo ufu ipashcaquin. Asca huaino man ahuarashta Upa Dios uhuun anuhoashon yocaiton mato ashotiro.

¹⁷ Afanan un mato yononon. Noinancahuun.

Icoindra huamafoan Jesús fu rafumisifo noicasmacani

¹⁸ Icoindra huamafoan mato noicasmaiffoan shinancahuun. Uacaifin noicasmaquin tau huanifoquin.

¹⁹ Marifi man ua icoinra huayamaiton matori noicuanafu. Afi ranan noinanfo cuscan matori noicuanafu. Ascafiacai man ato cuscarama. Un mato catonni icoinra huama cuscarafu man inonma. Ascacun icoinra huamafoan mato noicasmacani.

²⁰ Un mato yoia cuscan shinancahuun. Un mato yoia isca huaquin, “Yonomisitocai ahuun ifo finonmatiroma.” Ua omitsiscamacaquin matori omitsisca huashquicani. Un ato yosian cuscan acashon marifi man ato yosiaiton matori nicacoinceni.

²¹ Man ua tanaiton ua amisifo cuscan matorifi huashceni. Upa Diosin ua nichifianicai tsoan onancoinmisima. Ascan matori asca huashceni.

²² Un atoqui oyamani Diosin tsain un ato yoiamaino tapicuanafoma. Ascan chaca huafiquicai tapicuanafoma. Tapiyamaifoannocai atohuun nuama. Ascafiacun un oni un ato

Diosin tsain yoishquin. Ascacuai natian tsoan yoitiroma isca huaquin, “Uncai nicataima. Ascacun a chaca huama,” ishoncai anori icon yoitirofoma. Man nicafiamisishaquin aton chaca shatuafoama. Ascan aton chaca atohuun nua.

²³ Tsoan ua noicasmal uhuun Upari noicasmal.

²⁴ Diosihuunshon tsoa futsan atiroma cuscan un ato ismamisi. Ascafiacai aton chaca shatuafoama. Un ato ismayamaino aton chaca atohuun nuucuanama. Tsoa futsan atiroma cuscan un ato ismafafaini. Man oinfiacashon ua noicasmafain uhuun Upari noicasmafo.

²⁵ Diosin tsain cununi cuscan mun acoinna. Diosin tsain uhuunoo cununi isca huaquin, “Un ahua chaca huayamafiacun ua noicasmacanian,”

ishon uhuunoo cununi.

²⁶ Matori noicasmafiaifoan uhuun Upa Diosin arishon ahuan Yoshin Shara matoqui nichishquin. Nanton maton ointi unimamatiro isharashcaquin. Afin iconmisiquin. Uhuunoo mato yoishquin.

²⁷ Un aton Diosin tsain yoiqui tau huanitian marifi man ufu imisiquin. Ascashonfin marifi uhuunoo nantishon tapiquin man ato yoitiroquin, —ishon Jesús yoini.

16

¹ Ascano Jesús noco yoini isca huaquin, —Man omitsiscataima un mato yoiyoa man nunori shinanonma. “¿Ahuuscainun Jesús uhuun Numamisifiano un omitsiscal?” ishon man anori shinanquin man ua potapaishquin afanancal man ua iconra huashquima.

² Tapicahuun. Maton caifo nan ua iconra huamafoan chipo yonoi man nocon ichananti pushu muran afanan iquinonma. Un mato icon yoinon. Chipo amaquiri shinancani isca huaquin, “Diosin apaiyai cuscan non huashonon. Non Jesús iconra huafo rutunon,” ishon anori shinancani.

³ Uhuun Upa onanyamafain uarifi onancoianfoma. Ascacun mato asca huashcani.

⁴ Man ua tanaquin tau huanitiancal man chipo omitsiscashquiran un mato huanima. Un matofu iyofishocai un mato yoiyonima. Natian un matomaqui caiyoicai. Ascan man omitsiscaitian un mato yoiyomisi cuscan huaquin man shinantaniran, —ishon Jesús noco yoini.

Diosin Yoshin Sharapan acal cuscan

⁵ Afanan Jesús noco yoini isca huaquin, —Uhuun Upan ua nichini. Natian un afanan aqui caicain. Ascafiacai man ratoran futsan ua yocama, “¿Min raqui caimun?” man huama.

⁶ Un mato yoia cuscan maton ointi muran man fasi nocol.

⁷ Un mato icon yoinon. Un mato shara huahuunshon matomaqui caiyoicai. Un caya-mainocai Diospan Yoshin Shara matoqui otiroma mato cushusharafain mato ashoshquin. Ascafia matomaquinoashu caquin uhuun Yoshin Shara un matoqui nichifainicai.

⁸ Afi oshon a iconra huamafoan chaca huamisifo ato tapimai oshquin Diosin amapaiyai cuscan huafain tapimai oshquin. Diosin iconra huafoma ato onaintimai cuscan ato tapimai oshquin.

⁹ Ua iconra huatama chaca huafo cuscan ato tapimai oshquin.

¹⁰ Unfin uhuun Upan ua amapaiyai cuscan un huamisiquin. Ascan uhuun Upa icano un caicain ua afanan man oinonfoma. Nanri Diospan Yoshin Sharapan ato tapimai oshquin.

¹¹ Nantianri iconra huafoma aton niaifo Satanás Diosin man onaintima afanan ahua yoinonma. Nanri Diosin Yoshin Sharapan ato tapimai oshquin.

¹² Un mato fasi paratama tapimapaifaintocai man natian tapitiroma.

¹³ Ascafiatan Diospan Yoshin Shara matoqui oshon mato ahuarashta Diosin tsainhuunoo mato tapimashquin. Aafin iconmisicoquin. Ahuunshon mato yoiyoma uhuun Upan yoia cuscan nannoricoin mato tapimai. Inonpacoai cuscari mato tapimai.

¹⁴ Un yoiai cuscan Diospan Yoshin Shara mato tapimai uhuunshon man uhuunoo shinansharanon.

¹⁵ Nan uhuun Upanaforifi uhuunariquin. Un mato yoimisi cuscan uhuun Upa Diosin ahuan Yoshin Sharapan mato tapimashquin.

¹⁶ Ascan uncain matofu iyoima. Uacai man oinyoshquima. Ascafia ahutishomatan man afanan ua oinshquiran, —ishon Jesús noco yoini.

Jesús fu rafumisifoan aton ointi nocoyoftacanashu chipo unimacoinnifo

¹⁷⁻¹⁸ Nicacatan atirifi non yoinanni, —Ahuuscain noco isca huaimun, “Uhuun Upa ari un cai. Ascan uncai matofu iyoima. Uacai man oinyoshquima. Ascafia ahutishotama man afanan ua oinshquiran,” ishon noco yoi. Noco yoiai cuscacai non tapiamaran, —icashu non yoinanni.

¹⁹ Nanfohuunoo non yocapaiyainton Jesús onanni. Ascanshon noco yoini, —¿Un mato yoiai cuscan man tapiashma man yocanonaincain?

²⁰ Un mato shafacafi yoinon. Un omitsiscaino ua icoinra huamafo fasi unimashcani. Mancai ascashquima man ua manoshquin uaiquin. Uaiflashu chipo fasi man unimashquin.

²¹ Ainfon facu cainti chaima tau isin huaino isinyotiro. Chipo ahuun facu cainshon afanan ahuun isin shinantiroma. Unimacointiro ahuun facu cainsharashu.

²² Nanscarifiai un matomaquinoashu caitian maton ointi muran man omitsiscaiyofishu un afanan matoqui oano ua oin man fasi unimashquin. Man unimaitocai tsoan mato umaqui imatiroma man unimanonma.

²³ Un funiaitian un afanan matofu iyamano man afanan ahuara ua yocaima. Un mato icon yoinon. Uhuun anuhuunshon man Upa Diosin yocatiro. Ahuarashta uhuun anuhuunshon man Upa yocaiton mato inanshquin.

²⁴ Uhuun anuhuunshoncai man Upa yocayomisima. Ascan uhuun anuhuunshon Upa yocacahuun. Man yocaiton Upan mato inanshquin. Mato inainno man fasi unimashquin.

Jesucristo fustitofin nantifi chacafo finconcoian

²⁵ Un mato yoiyaifo tapiflashocai atirifi man tapiataima. Un mato shafacafi yoicoiantaima. Ascafia un chipo mato yoicoian Upa Diosihuunoa shafacafi man tapinon.

²⁶⁻²⁷ Man ua noi. Un Diosin ariashu matoqui oni man ua icoinra huamisi. Ascan Upa Diosin matori noicoian. Ascacufin un matomaquinoashu caitian un matohuunshon Upa yocainmacai mafincoin uhuun anuhuunshon Upa yocashquincahuun.

²⁸ Un Upa ariashu oni nocofunucain mai anoashu cainshquin. Natian un mai anoashu afanan Upa ari caicain, —ishon Jesús noco yoini.

²⁹ Yoiaiton non afu rafumisifoan non cumaniquin, —¡Aicho! Natian min noco afanan fomainma. Natian min noco fasi shafacafi puashoan.

³⁰ Natian man non tapia min nantifi tapicoian. Mia yocataima min rufoto onanyoi mia yocapaiyai cuscan. Ascacun min Dios ariashu onicun non mia icoinra huai, —ishon non yoiaiton.

³¹ —Inoncai man ua icoinra huai.

³² Ascafia chipo umaquinoashu man pashcafaincai. Maton pushu ano man cai. Icon natian man ua potafaincai. Tsoacai ufu nituima. Man ascafainocai urusu un nituima. Man umaqui cuyofoiaino uhuun Upa fu un patanain.

³³ Un mato yoiafo uhuunshon maton ointi man unimamafain man isharanon. Nuno icoinra huafoma murannoashu omitsiscafiaquin shinanchacayamacahuun. Un Satanás yafi icoinra huafomati finconcoianquin. Ascan un mato cushuicai, —ishon Jesús noco yoini.

17

Jesús ahuunoa Apa Diosi cufini

¹ Asca huatan Jesús nai foisinifoantan yoini,

“Upan, natian un nanon ato tapimahuun un min Facu sharacoinquin. Min uqui unimai ato tapimahuun. Min anori ato tapimanaino urifi un ato tapimatiro min fasi sharacoincun.

² Mian yonoa un atoti yonopacunon. Mian inanti un ato nimapacunon.

³ Mirus fusti min Diosincain. Unfin Jesucristoquin nan mian nichini. Tsoan noco onancoianfin nipanacafoquin.

⁴ Min ahuu cuscara sharamainquin nuno mai ano niyoshon un ato puashoan. Nan mian yonoa cuscan mun aca.

⁵ Ascan Upan, un mifu iyopaoni cuscan afanan ua imahuu. Non mai oni huataima u mifu niaifo shara iyopaoni. Afanan nanscara mia ya ua imahuu un min Facu shara nantiffain ua tapinonfo.”

Jesús a fu rafumisifo cufishoni

⁶ “Nuno mai ano ufu rafumisifo mian inanni un ato ismanon min ahuu cuscara sharamainquin. Na ufu rafumisifo minafociacun mian ato inanni. Min tsain mia nicacacoianfo.

⁷ Mian yoia cuscan nantifi un ato yoimisi. Nanfo tapicoianfo.

⁸ Mian yoia cuscan un ato yoiaiton ua icoinra huacoinnafo. Un miariashu fotoniri tapicoianfo. Mian nichinicun icoinra huacoinnafo.

⁹ Un mia ato cufishofafaini. Uncai a icoinra huafoma ato cufishonima. Nan mian inannifosihuunshon un mia cufifafaini. Un mia ato cufishofafaini nanfomain minafocufin.

¹⁰ Nan uhuunaforifi minaquin. Ascan nan minaforifi uhuunaquin. Ua icoinra huafohuunshon onantirofo unmain ahuu cuscara sharaquin.

¹¹ Uncai afanan na mai ano iyoima. Unfin miqui caicain. Afofin na mai ano nitucaniquin. Upan, min fasi sharaquin ato cushusharahuu. Min curushhuunshon ato cushusharahuu. Mian inanfoti ato cushusharahuu. Nonfin nan fusti cuscaracoquin. Nanfori no fu nan fusti cuscararifi ato imahuu.

¹² Un atofu iyoshon un ato cushushara. Minhuunshon un ato cushushara. Un tsoanshta funoama. Nan Satanás ahuun facu fusti funoa. Min tsain yoiyoni cuscan nan fusti funoa.”

¹³ “Natian un mi ari caicain. Un cataima un yoiyoi nan un icai cuscari unimacoin-nonfo.

¹⁴ Mian yoia cuscan un ato tapimamisi. A icoinra huafoanma ato noicasmaifo. Ato cuscarafocutsi ascacun ato noicasmafo. Ascarifi atan unricai ato cuscarama. Ascan uarifi noicasmafo.

¹⁵ Uncai mia yocama mai anoshon min icari min ato ihuion. Ascatarocon un mia yocain nuno mai anoshon min ato cushushara nan yoshin chaca Satanás ato ahusca huanonma.

¹⁶ Nanfoancai icoinra huafoama aton yorama. Unrifica un aton yorama.

¹⁷ Min tsain iconcoin. Min tsainman ato shara huamahuu mia cuscara shara inonfo.

¹⁸ Mian yorafoqui nichini cuscan nanscarifi aquin un ato yorafoqui nichicain.

¹⁹ Mian yoia cuscan mun atohuunshon aca afoanri ascarifi huanonfo.”

Jesús nantifin a icoinra huafo cufishoni

²⁰⁻²¹ “Uncai ato fustihuunshon cuffafainima. Nantifi aton tsainhuunshon ua icoinra huanonfo un ato cufishofafaini nan non shinain cuscarafosi arifi shinanonfo. Min ufu icacainai cuscan aforifi no fu ifafaincani mian nichini icoinra huamafoan icoinra huanonfo.

²² Min ufu imisi cuscan urifi un atofu imisi. Ascan non shinain cuscarafosi arifi shinannonfo.

²³ Min ufu icacainai cuscan urifi atofu icacaini. Ascan min ipaiyai cuscan nanscarafosi non shinantiro. Min ointi cuscarafosi non itiro. Nan oincaquin icoinra huamafoan tapitirofo mian nichinicun mian noia cuscarifi ua icoinra huafohuunri min fasi noicoi.”

²⁴ “Upan, nan mian inanfo un mifu icano un atorifi iquinpai un mifu ishara cuscan oiononfo. Non nan mai oni huataima min ua noicoinyopaoni. Ascan min yononi cuscan un mifu imisi nantifi min iquinon.”

²⁵ “Upan, min shara fustisi imisi. Icoinra huamafoancai mia onanfoma. Ascan un mia onancoi. Min ua nichini ufu rafumisifoan tapiafo.

²⁶ Min ahuu cuscaramainquin un ato ismamisi. Nanscasi aqui un ato ismafafaini min ua fasi noimisi cuscan afoanrifi munonfo un atofu icacainaiton,” ishon Jesús Apa cufini.

18

Jesús achinifo

Mt 26.47-56; Mr 14.43-50; Lc 22.47-53

¹ Ascatan Apa cufinquin anaitiano non afu rafumisifo shushan Cedrón yamu pocu-fainiquin. Nanno fanafoan ahuun anu olivo. Nan fanafo muran non iquitoshini.

² Nannorimain Jesús noco iyomiscunfin. Ascano Judas nanton Jesús ato achimaniton tapini raquimain non foaquin.

³ Nannori Judaspan ranushumuafo non nocon yorafohuunshon Dios cufimisi niaifofoan futsafo afu nichini non Fariseofo iyoni Jesús achimaicaquin. Chiifo ya nopol non coshatifo non ashifo yari funifo.

⁴ Ascaiton Jesús onanni ahuscamain huacanicain. Onanshon ato yocani, —¿Man toa funaimun? —ishon yocaiton.

⁵ —Jesús Nazaret anoa non funairan, —huaifoan. —Unfinquin, —ato huaiton. Nan ato achimaicai Judas nanno atofu ini.

⁶ —Unfinquin —Jesús ato huatanaino chitucuri ifainpai cani pacui fustunifo.

⁷ Ascashon Jesús afanan ato yoca futsani, —¿Tsoan man funaimun? —huaiton. —Jesús Nazaret anoa non funairan, —huaifoan.

⁸ —Munfin mato yoiyaquin. Unfinquin. Ua funacaquin na ufu icafo ato nichicahuun, —ato huani.

⁹ Inonpacoai cuscan Jesushuunoa cunuyoni isca huaquin, —Uncai mian inan un fustishta funoamaran, —ishon cununi. Nan cununi cuscan Jesús rama Dios cufini.

¹⁰ Ascaino Pedronun ahuun noppu chinushumua ahuun ona murannoa tsucainifoantan nocon yorafohuunshon Dios cufimisi niaifocoinin ahuun oinmati pashtufain rurani. Nan oinmati ahuun anu Malco ini.

¹¹ Ascaiton, —Min noppu ahuun ona muran huahuu. Upa Diosin ua amapaiyai cuscan un aicai, —Jesús Pedro huani.

Jesús Anás ano iyonifo

Mt 26.57-58; Mr 14.53-54; Lc 22.54

¹²⁻¹³ Ranushumuafo aton niaifofoya nocon caifo Israelifo niaifofoyashon osicashon Jesús munushnifo. Munushushon Anaspan pushu ano iyonifo. Nan Anás Caifás ahuun raisi anifo ini. Caifás nantian nocon yorafohuunshon Dios cufimisi niaifocoin ini.

¹⁴ Nanton nocon caifo Israelifo yoini, —Nocofunu fusti nantifi yorafohuunoashu naafin shara itiroquin, —huani.

—Uncai Jesús oinmisimaran, —ishon Pedronun yoini

Mt 26.69-70; Mr 14.66-68; Lc 22.55-57

¹⁵ Jesús iyoaifono Pedro yafi afu rafumisifo futsanri acachori fonifo. Pushu ano unmainti nocotan afu iquifainnifo. A fu rafua futsa niaifoan onanshon iquimainti Jesús iquicainaino.

¹⁶ Pedron shoi caicainti ano nituni. Ascano nan niaifoan oinmisishaqui nasocura shomayatón caincaiti cushua yoini, —Pedrori iquimahuu, —huani.

¹⁷ —¿Mirifi min Jesús fu rafuamun? —ishon shomayatón Pedro yocaiton. —Ma. Uncai afu rafumisimafinquin, —huani.

¹⁸ Matsinacoincani nantifi chiin yoonifo. Niaifofo yafi oinmatifori yoonifo. Pedrorifi ato fu yooni.

Nocon caifoan aton niaifoan Jesús yocani

Mt 26.59-66; Mr 14.55-64; Lc 22.66-71

¹⁹ Ascatan nocon yorafohuunshon Dios cufimisi niaifocoinin Jesús yocani. —Mi fu rafumisifohuunoa ua tapimahuu. ¿Ahuua min ato yosiamun? —huaiton.

²⁰ —Uncai onuyoiaa. Nantiffain ua nicanonfo un yoimisi. Un nocon ichananti pushu murannafo yafi nocon Dios fu sainti pushu murannoari un nocon caifo yosimisi. Uncai uhuun tsain fustishta un fomanmisima.

²¹ Ahuuscaín mian yocain. Ua nicamisifo yocahuun. Un yoimisi cuscan nanfoan tapicoianfoquin, —Jesús huaiton.

²² Ascaiton ranushumua afu niaton tapastan. —¿Ahuuscain nocon niaifo min anori aquimun? —huaiton.

²³ —Ahuua un amaquiri yoiainmainquin ua yoihuu. Ascán uhuun tsain iconfiacun ahuuscaín mian tapasain, —huani.

²⁴ Anori icaiton nicaquin Anás ahuun raisi Caifás ano Jesús nichini. Caifás nocon niaifocoin ini. Ahuun munushumua ya nichini.

Ascano Pedron afanan yocani, —Uncai Jesús oinmisimafinquin —ishon yoini

Mt 26.71-75; Mr 14.69-72; Lc 22.58-62

²⁵ Ascaino afanoashu Pedro atofu yooriani. Ascaiton afanan Pedro yocanifo, —Miriffin min afu rafumisi futsaquin, —ishon yocaiton. —Unmafínquin. Uncai afu rafuamaquin, —huaiton.

²⁶ —¿Un mia oianmamun? Nan miafin un oianquin. Fanafo mapoa murannoa Jesús yafi un mia oian. Min racafínquin, —nan nocon yorafohuunshon Dios cufimisi niaifocoinin ahuun oinmati pashtuatón ahuun yoran Pedro huaiton.

²⁷ —Ma. Unmafínquin, —Pedron huaino tacara cuoinacahuani.

Ascano niaifon Pilaton ano Jesús iyonifo

Mt 27.1-2, 11-14; Mr 15.1-5; Lc 23.1-5

²⁸ Ascano funamanrishta Caifás ahuun pushu anoshon Pilato niaifo ano Jesús iyonifo. Nanfin Romanon iniquin. Ascashiashcai Pilato ahuun pushu muran iquifoma aatsi Israelicun. Shinanpaonifo, —Non a muran iquiashu non chaca itiroran, —icashu ascashu iquicasmanifo. Afocai Israelifomaran icashu. Diosin oinmati nan afu imisiton nocon shuninfoan facu iyoafofo ato finonmani nan fusiñin icaitian shinantacani. Nanscacun Pilato ahuun pushu muran iquicasmanifo. A muran iquiashu non chacacoin itiroran fusi muaimuran non iquitiroma. —A muran iquishocai nocon caifo futan non chashoanun facu pitiromaran, —ishon shinannifo.

²⁹ Ascaino chifi cainacahuan Pilato ato yocani, —¿Ahuua chaca huacunmun na nocofunu uano man ihuuaquin? —ishon ato yocaiton.

³⁰ —Ahuua chaca huayamacucai non miqúi ihuucuanamaran, —ishon huaifoan.

³¹ —Mafi iyotacahuun. Maton shunifoan yononi cuscmain chaca Israelifoan huaquin. Nanfin maton fuyamisiquin. Ahuamain chaca huaquin mafi ahuuscara huacahuun, —huaiton.

—Maton yorafoan yononifo cuscacai non tsoa mastatiroma naanon —icashon yoinifo.

³² Jesús yoiyoni cuscan nanscacoïn huaquin. Mastashquicani naanon.

³³ Ascaito Pilato cumani, —¿Iconmun un niaifo? —ishon yocaiton. —Mian yocain cuscacafin unquin. Niaifo icain iconcain yoiyacushaquin un cainni. Tsoan iconcain nicapainquin ua nicamisifo, —Jesús huaiton.

³⁴ —Mifimun min anori shinaincai. Futsanfoanraca mia uhuunoa yoirafo, —huaiton.

³⁵ —¿Min shinanmun urifi un Israeli? Min yorafo futan maton yorafohuunshon Dios cufimisi niaifofoan mia uqui ihuafa. ¿Min ahua chaca huacunmun mia uqui ihuafafoquin? Ua yoihuu, —huaiton.

³⁶ —Uhuun yorafocai na mai anoafoma. Un nuno mai ano niaifocun ua numacuanafu Israelifo ua achinonfoma. Uhuun yorafo futsa ari icafo —huaiton.

³⁷ Ascaito Pilato cumani, —¿Iconmun un niaifo? —ishon yocaiton. —Mian yocain cuscacafin unquin. Niaifo icain iconcain yoiyacushaquin un cainni. Tsoan iconcain nicapainquin ua nicamisifo, —Jesús huaiton.

³⁸ —¿Ahuamun iconquin? —Pilato cumani.

Niaifoan ato yononi Jesús rutunonfo

Mt 27.15-31; Mr 15.6-20; Lc 23.13-25

Asca huatan chifi cainacahuani Israelifo yoishquin, —Un na nocofunu yocafiagai un ahuunoa ahua chaca nicama.

³⁹ Natian maton fuyamisi nocoano man imisi cuscan maton caifo cunu murannoa iquiafo fusti cainmafainmisi. Maton shunifoan aton facu iyoafofo finonmani shinantaquin nantianri fusti mato cainmafainni. ¿Ascan Israelifoan, maton niaifo Jesús un mato cainmashotromun? Casharanon, —Pilaton ato huaiton.

⁴⁰ Oi ashcafinin cumanifo, —Ma. A caimatama Barrabás caimahuun, —huanifo. Nan Barrabás nocon caifo shinanchacamanaino mucai futsucashon futsa rutunifo.

19

¹ Ascashon Pilaton ato yonoa Jesús iyonifo fichiqui cuno tuchiaton coshanonfo.

² Ascano ranushumuafufoan mosha chainipafo maiti huacashon maimanifo. Aqui cashuipaiqui sahuuti nanhuainqui pocoa oïntsa sahuumanifo.

³ Ascashon aqui cashucaquin. —¡Aicho! Minfin Israelifoan aton niaifoquin. Min chai niyopacupainon, —huatan fupasiriani.

⁴⁻⁵ Ascano Pilato Jesús chifi cainquifainni oïnonfo. Jesús sahuuti nanhuainqui pocoa oïntsa sahumatan mosha chainipafo maiti huashotan sahuumanifo. Ascashon Pilato, —Oïcapon na nocofunu. Ucai ahuunoa ahuashta nicayomisima un chaca huapanan, —huaiton.

⁶ Ascafiaiton nocon yorafohuunshon Dios cufimisi non niaifo futsafoanri oïnquin Jesusqui tsain chipunifo. Ascashon oi ashcafinin —¿Mastahuun! —huarianifo. —Ascaiton mafi iyoshon mastatacahuun. Uncai ahuunoa ahuashta nicayomisimafinquin un chaca huapanan, —Pilaton ato huani.

⁷ Ascaiton nocon caifoan cumanifo, —Ma. “Unfin Diospan Facuquin,” Jesús noco huamisi. Ascacun nocon niaifofoan yonoa, “Tsoa anori icafin naiquin. Nayamacaiyaima,” —huaifoan.

⁸ Ascaifoan nicai Pilaton fasi ratui finacoinni.

⁹ Ascashon Jesús ahuun pushu muran afanan iyonni. Iyoshon yocani, —¿Raniamun minquin? —ishon yocani. Yocafiainocai Jesús pusinima.

¹⁰ —¿Mian cumaimamun? ¿Min tapiamamun un mia caimayamaraquin un mia mastamatiro? —huaiton.

¹¹ —Diosin mia yonoyamainocai mian ahuusca huacuanama. Ascacun nan mian chaca huanon mi ano ihuafafo nanfoancaifin ua chaca huaquin finacaniquin, —huani.

¹² Ascaiton nicaquin Pilatonun Jesús caimapairiani. Ascafiaino nocon caifo Israelifoan tsain ininpaton yoinifo, —Tsoa, “Unfin niaifoquin,” icafin niaifoquin,” icafin Romanonfoan niaifocoin Cesari chaca huaiquin. Ascan min na nocofunu Jesús caimanacai nocon niaifocoin Cesari min ahuun yorahuanocinma, —icashon oi ashcafinin yoirianifo.

¹³⁻¹⁴ Nicatan afanan Pilatonun Jesús chifi cainmani. Nantianri nocon caifo Israelifo fusiti iyocoshquin icaino. Nan Diosin oïnmati nan afu imisiton aton shunifoan facu iyoafofo finonmani shinantanfafainpaonnifo. Fari masafin racano Pilatonun Jesús iyonni anoshon aton shara aroshofafainmisi. Ano tsashon yocanshquin chaca huayamaraquin shara huacun. Nannoshon ato yonotiro onaintimayamaraquin nichimisi. Nanno anuni —Toquiri sapanan, —huapaonifo. Nocon caifo Israelifoan ahuun tsainman, “Gabataran,”

huanifo. Pilaton tsaoshon aton ointaifi Jesús cainmani. Cainmashon, —¡Oincapon! Naafin maton niaifoquin, —Pilaton ato huaiton.

¹⁵ Ascafiaiton, —Iyoshon mastatahuun nanon. Ihui coyan iquinanquin mastahuun, —oi ashcafinin huaifoan. —¿Comun unmun maton niaifo mastaicai? ¿Mammun mastanpaicai? —Pilaton ato huaiton. —Cesari fustifin nocon niaifoquin. Nocon niaifo futsa yamai, —ishon nocon yorafohuunshon Dios cufimisi niaifofoan yoinifo.

¹⁶ Asca huatan inoncai Pilaton atoque Jesús cainmani. Ranushumufoan iyocashon ihui coyan iquinanquin mastai focaquin iyonifo.

Jesús ihui coyan iquinanquin mastanifo

Mt 27.32-44; Mr 15.21-32; Lc 23.26-43

¹⁷ Ascano iyoaifoanno afincoin ihui coyan iquinan iyashon foni. Anoshon mastaifoanno noconi. Nanno ahuun anu mapo shaoran huanifo. Israelifoan tsainmanfin Gólgotaran huapaonifoquin.

¹⁸ Jesús yomutso rafu yafi mastanifo. Yomutso rafutan naquihuano Jesús mastanifo.

¹⁹ Ascán mastacashon Pilaton yonocun Jesús ahuun mapo manaonrishta aqui cununifo.

JESÚS NAZARET ANOA ISRAELIFOAN ATON NIAIFOCOINRAN

ishon Pilato ato cunumani.

²⁰ Jerusalén anoashu mani futsafo ya osiafo ichapacoin inifo. Jesús nanno chaimashtashon mastanifo. Ascánofin Pilatonun aton tsain futsa futsatapafo ato cunumani isca huaquin, — Jesús Israelifoan aton niaiforan —ishon tapinonfo. Nocon tsain cunufain Griegofoan aton tsainri cunufain Romanonfoan aton tsainri cununi.

²¹ Nan oincatan nocon yorafohuunshon Dios cufimisi niaifofo Pilato ano fonifo. Yoifocani, —“Jesús nocon niaifocoinran,” huacaquima “Unfin Israelifoan un mato niaiforan, Jesús icaran,” ishón cunuhuu, —huaifoan.

²² —Un cunumana cuscan nannoricoin un cunua. Uncai ahua futsan afanan tuqui huaimaran, —ishon Pilaton ato cumani.

²³ Ranushumufoan Jesús mastaifono ahuun sahuuti fianpacunifo. Pashcananpacushon mani rafu non rafuri machinifo. Ascano ahuun sahuuti chainipa ashcapari chichia tushu huayonifo.

²⁴ —Fashnuyamacahuun. Nanscara muma shara non finon. Non aya cashutihuan aqui numero nuupacua potashon futsa shuhuianton ahuun sahuuti ashcapari chichia fitiroran, —icashu yoinannifo. Nannori Diosin tsain Jesushuunoa inonpacoai cuscan aqui cunuyoni isca huani,

“Uhuun sahuutifo aya cashutihuan aqui numero nuupacua potashon futsa shuhuianton uhuun sahuuti finonran,”

ishon inon pacoai cununi. Ascano ranushumufoan nanscacoín huaquin.

²⁵ Jesús mastafa chaimashta ahua non ahuun achin nan Cleofaspan ahuin non María Magdalena non afo nanno chaimashta ninifo.

²⁶ Un non Jesús ahuari chaimashta non nia ini. Jesús noco oinquin yoini, —Uhuashtan, natian Juan min facu iquiran, —ishon yoini. Ua noiquifin anori huaniquin.

²⁷ Asca huatan —Naafin min uhuaquin, —ishon ua yoiaiton nicaquin uhuun pushu ano un iyoni cushusharashquin.

Jesús nani cuscan

Mt 27.45-56; Mr 15.33-41; Lc 23.44-49

²⁸ Jesushuunoa Diosin tsain cunuyonifo cuscacoin acoincun onanshon Jesús yoini, —Un nomicoínran, —ato huani.

²⁹ Ascano fimi unu focash muran nanupacuoantan faca tahua shatun finifoantan Jesús inanpaini.

³⁰ Jesús muushon yoini, —Natian uhuun Upan ua yonoa cuscan mun acoinna, —huani. Ascatan nai fupopacuhuan.

Ranushumuaton Jesús ashin pishi chachini

³¹ Iyoco futsaino nan fusititian Diosin oinmati nan afu imisiton nocon caifo Israelifo aton shunifoan facu iyoafofo finonmani shinantanfafainpaonifo ini. Ascano Jesús yafi yomutso rafu ihui coyan iquinanqui nanno mastaifoanno nocon niaifofoancai fusititian oinpainifoma. Ascánofin Pilato ano fonifoquin, —Funamanri nocon fusititian. Jesús yafi yomutso rafu ato fitucucahuun nariscanon. Mai huariscanonfo nocon fusititian mastafa ano ninonma, —ishon nocon niaifofoan Pilato yoinifo.

³² Ascán Pilato ato yonocun ranushumufoan yomutso rafu aton fitash shao tucunifo nariscanon.

³³ Ascano Jesusqui fucaquin oianfo man naacoinna ini. Ascaitocai fitucunifoma.

³⁴ Ascaiton man naa oinquin ranushumuaton ahuun ashin pishi chachiaino imi focain unu foni.

³⁵ Unfin nan oinni cuscan un mato yoiaiton marifi man icoinra huanon. Unfin icon yoiquin.

³⁶ Diosin tsain yoimisiton inonpacoai cuscan cunuyoni isca huaquin, —Ahuun shaocai tucushquimafinquin, —ishon cununi.

³⁷ —Pishi chachiaitonfin oinshcaniquin, —Diosin yoimisi futsan inonpacoai cuscan Jesús naiyoataima cunuyoni.

Jesús mai huanifo

Mt 27.57-61; Mr 15.42-47; Lc 23.50-56

³⁸⁻³⁹ Ascano José Arimatea anoashu cainni nan Pilato ano cani, —Jesús ihui coyan iquinanmaquinoa un fotomapai mai huashquin —ishon Pilato yocani. Ascaiton, —Ahuu, —Pilato huani. Nan José Jesús icoinra huatanafashocai tsoashta yoinima. Nocon caifo niaifofoqui musuquin ato yoipainima. Nan Nicodemo futan José Jesús ihui coyan iquinanmaquinoa fotomani mai huashcaquin. Nan Nicodemo arifi Jesusqui yamu oni yocacain. Afi ininti shara ichapa treinta kilo cuana funi Jesús ahuun caya raishashquin funa payocononma. Nan ininti rafu osinan huani tuipa yafi ofucoin. Nan ininti ahuun anu rafu mirra yafi aloes.

⁴⁰ Ascano José yafi Nicodemo inintinin pano osho shara ahuun raishashon ahuun raconifo. Nocon caifo Israelifo nocon yora mai huaquin amisifo cuscan huanifo.

⁴¹ Nii funuamamishti mapoa anoshon afi ano chaimashtashon Jesús mastanifo. Nannori mahua quini funa tsoacai a muran maiyomisima.

⁴² Nocon caifo nan Israelifo nocon tunutitian iyocoshquin icaino fari iquiataima Jesús mai huariscapainifo. Ascan nan mahua quini chaimashtacun a muran Jesús mai huariscanifo.

20

Jesús mahua quini muran man mai huafiafo afanan funini

Mt 28.1-10; Mr 16.1-8; Lc 24.1-12

¹ Ascano Domingoaino shafataimashta María Magdalena Jesús maia mahua quini ano cani. Caquin oian mahua quini ahuun fupoitan man fupucua ini. Nan toquirininhuan man fupucua ini.

² Ascaiton oinfainnicai María ichoni Pedro yafi ua chanihuaicai, Jesús uhuun noimisi noco chani huaicai ichoni, —Nocon Ifoan ahuun caya quini murannoa man raquiran onuafo noncai tapiama, —icaiton nicai.

³ Pedro fu non maia ano ichoni. Mahua quini muran oincai.

⁴ Un Pedro shononfaini un rufofo noconi. Chipa Pedro nocotoshini.

⁵ Rufofo nocotan mahua quini tucupacucahuatan un naistoshini. Naistoshiquin oian ahuun racoitan pano mania ini. Ascaifiancai iquitoshinima.

⁶ Ascaino Pedro ucachiori nocotoshitan mahua quini muran iquicaintan oinquin oian ahuun rashuitafo mania ini.

⁷ Ahuun foraconitafo fosoitaquiri mania ini.

⁸ Ascaino unfincoin quini muran iquicaini. Iquicaiquin oinquin un icoinra huani Jesús funia.

⁹ Oinyoshomacai Diosin tsain yoia cuscan, —Jesús funishqui ain, —non tapiyonima.

¹⁰ Ascaiton ointan nocon pushu ano non nasocurani.

Mariaqui Jesús niriscatani

Mr 16.9-11

¹¹ Non cafiainocai María canima. Mahua quini cachiori niashu uaiqui arifi quini tucucain naisquin oian.

¹² Diosin oinmati rafu afu ica sahuuti oshopa sahuucanashu tsoafo ini Jesús rataintanfoanno futsan fosoitaquiri icaino futsan ahuun tau iquitaquiri tsoafo inifo.

¹³ —¿Ahuuscain min uaicain? —oinmati Dios fu imisiton rafutan huaifoan. —Uhuun Ifo man ahuun caya raqira onuafo uncai tapiama ahuuscara huaforan, —huatan.

¹⁴ Ifiacucahuaquin oian Jesús acachori nifiacucai onannima.

¹⁵ Jesús arifi yocaquin, —¿Ahuuscain min uaicain? ¿Min tsoa funaimun? —huaiton. Afía fasi oromisi shafain, —Minmain uhuun Ifoan ahuun caya rani huaquin ua yoihuu. Un afanan nuno mai huanon, —huaiton.

¹⁶ Jesús, —María, —yoini. Ascaiton foisini foanquin oian nan Jesús ahuun fusocoincun. Israeli tsainman, —Rabuni, —huani.

¹⁷—Ua muyamaquin. Uhuun Upari un cataimacai. Ascan ua muquima. Uhuun yorafo ua ato yoishotacahuun isca huaquin, “Uhuun Upa ari un caicain. Nan uhuun Uparifi maton Upaquin. Nan uhuun Diosifin mato Diosiquin,” ato huatahuun, —huani.

¹⁸ Ascashu cai María nocoshon yoiquin, —Munfin nocon Ifo un oianquin, —ishon. Noco yoini nan Ifoan yoia cuscan huafain noco yoipacuniquin.

Jesús afu rafumisifoqui niriscatani

Mt 28.16-20; Mr 16.14-18; Lc 24.36-49

¹⁹ Asca huatan tunutitian iyoconaino man fari caino non afu rafumisifoan nocon niaifofoqui musuquin non cunu fupoti futaonshacanashu non ichanan ano noco nushmancayan Jesús niriscatani. Ascaiton noco yoiquin, —Maton ointi fucashcaquima isharacahuun —ishon noco yoini.

²⁰ Yoitan noco ismaquin a piriconun mastaitafo tsuhuu ismaquin mushanshotan ashin pishi chachitan noco ismaniquin. Noco ismaiton non oinni fasi nocon Ifoqui unimacoinni.

²¹ Afanan Jesús noco yoiquin, —Maton ointi fucashcaquima isharacahuun. Nan uhuun Upan ua nichini cuscan huafain natian un matorifi nichiran, —ishon yoini.

²² Ascashon nocoqui ashaintaquin, —Uhuun Upa ahuun Yoshin Shara ficahuun.

²³ Ratoran futsan man aton chaca rauhuacufin Diosin aton chaca soashoshquin. Man aton chaca rau huamafin atohuun nuaquin, —ishon Jesús noco yoini.

Jesús afanan atoqui niriscatanaino Tomasri atofo ini

²⁴ Ascashon noco yoiainocai Tomás fusti ano inima. Nan Tomás arifi Jesús fu rafumisi futsa ini. Ahuun anu futsa Gemelo huapaonifo.

²⁵ Ascanshon Tomás Jesús oinshoma yoini, —Un ahuun mucu natan pirico tsuhuu uhuun mutotinin muifain ahuun pishi tsuhuu pimuishofin un icoinra huatiroquin. Un asca huayamashocai man Jesús oincoian un icoinra huashquimaran, —ishon Tomás noco yoini.

²⁶ Asca huatan ocho osha finontan non afanan cunu muran ichananfono Tomasrifi nanno no fu ini. Cunu fupoti futaonshacafono afanan Jesús nocoqui niriscatani. Ascashon afanan noco yoiquin, —Maton ointi fucashcaquima isharacahuun, —huaiton.

²⁷ Jesús Tomás isca huani, —Ua min mutotinin uhuun mucu natan muifain ua piiimuihuu. Afanan ua icoinmaran huaquima. Ua icoinra huahuu, —huaiton.

²⁸ Ascaiton Tomás cumaquin, —Minfin uhuun Ifoquin. Minfin uhuun Diosiquin, —huaiton.

²⁹ —Ua oinquisifin mian icoinra huaicai. Ascan ua oianmfianquin ua icoinra huafofin fasi unimashcaniquin, —ishon Jesús yoini.

Ahuuscashomain Juanpan Jesushuunoa cunushoniquin ato tapimani

³⁰ Ascatan ahuamamishiti tosa futsan atiroma cuscan ahuara futsafo Jesús noco oinmani. Afohuunoacai un mato cunushonama.

³¹ Upan Diosin Jesús catonni. Afin Diospan Facuquin. Un mato cunushona cuscan nan man icoinra huanon. Icoinra huaashu man Dios fu ipanon.

21

Ian cusumun Jesús afu rafumisifoqui noconi

¹ Ascano Jesús afanan nocoquin noconiquin. Ianmanhuan Galilea cusumun noconi. Un mato yoinon ahuuscashumain Jesús nocoqui oniquin.

² Pedron yafi Tomás nan ahuun anu futsan Gemelo non Natanael nan Canan murannoa Galilea anoa non Zebedeo facufo nonri afu rafumisi non ichananni.

³ —Unfin nushuicaicain, —Pedro icaiton. —Non mifu cairan, —non huani. Ascashu focani shasho nanufain nushushifiaquin non shiman fustishta finima.

⁴ Shafa cuaino ian cusumun Jesús nia ini. Nifiacun non onannima.

⁵ —Uhuun facufoan man shiman achiamamun, —noco huaiton. —Ahuashta non fiamaran, —non huaiton.

⁶ Ascaiton noco yoiquin, —Shashon rushti cayacafi potacahuun. Ascashonfin man fitiroquin, —noco huaiton nicacaquin. Nan noco yoia cuscan non potani shashon rushti cayacafi potashon non mua fospicoian ini. Shimanoanfo ihuucocin shasho muran nanupaiquin non rananni.

⁷ Unfinquin ua Jesús noicoimisi. Ascacun un Pedro yoini, —Nanfin nocon Ifoquin, —un huani. Ascaiton nicaquin Pedron samamashta ahuun sahuuti sahuacufoantan shasho naquinoashu ian muran fotocaini ahuun Ifoqui nocoriscapai.

⁸ Ascaiton atirifiton non shashon mufaini. Nocon nushuti fospicun shashoqui nushashon non aya tohuufoni. Ian cushan chaima shara. Cien metrocuana.

⁹ Non cusumun nocoquin oian chi cutuai ini shiman shoi yoa chi cusumun raca ini.

¹⁰ Ascatan Jesús noco yoiquin, —A man rama shiman fia futsan fucahuun, —huani.

¹¹ Ascaino Pedro shasho naqui nanupacucahuan noco nushuti cusumun sharashon. Non oian shimanoanfo nushuti fospicioian. Ciento cincuenta tres shimanoanfo fospicoifishocai nushuti fashnunima.

¹² Ascaiton Jesús noco yoiquin, —Piyoi fucahuun, —noco huaiton. Nicacaquin. —¿Min tsoamuncaí? —non huanima. Man nonmain tapishofin nocon Ifocun.

¹³ Ascanshon Jesús noco pimaquin noco nantifi yoa yafi shiman inanni.

¹⁴ Man funitashaquin nocoqui oi rafu non fusti ya ini.

Jesús Simón Pedro fu tsainni

¹⁵ Piquin anaititan Jesús Pedro yocani, —Pedron minfin Juanpan facuquin. ¿A mifu rafuafoan ua noicoiainfo finonmafain mian noicoianmun? —huaiton. —Aifain Ifon. Man minfin tapiaquin un minhuun noicoiain, —huaiton. —Ua noisharashon ua rama icoinra huafori ato cushusharahuu ua tanasharanonfo, —huani.

¹⁶ Afanan Jesús Pedro yoini, —Pedron, minfin Juanpan facuquin. ¿Iconmun mian fasi noicoiain? —huaiton. —Aifain Ifon. Man minfin tapiaquin un mihuun noicoiain, —huaiton. —A ua noisharashon ua tanamisifori ato cushusharahuu ua tanasharanonfo, —huani.

¹⁷ Ascaiton afanan yoca futsani, —Pedron, minfin Juanpan facuquin. ¿Mianmun noiquin? —huaiton. Yocariaiton Pedronun fasi ointi noconi.

Ascashon afanan cumani, —Ifon, minfin ahuamamishti tapiaquin. Man min tapiari un mia fasi noicoiain, —huaiton. —Ascan ua tanamisifo cushusharahuu ua tanasharanonfo.

¹⁸ Pedron, iconcoiain un mia yoinon. Pushcoshon nan min apaiyai cuscan min huua. Ascatare nan min capaiyaiquiri min camisi. Ascan min anifo ano futsafoan mia yonoshquicani. Min capaiyamaiquiri mia iyoshquicani, —huani.

¹⁹ Jesús Pedro tapimayoni ahuuscamain naiyaicain. Pedro ahuun Ifohuunoashu naicain tapishquin, —Upa Dios shararan, —huashquicaniquin. Ascano Jesús Pedro yoini —Ua tanasharahuu, —huani.

²⁰ Asca huaino Pedron ifiacucahuan ua oinni un ato mufainaiton. Ua fasi Jesús noimisi, Jesús nataima no futan yamu piyoaquin un Jesús yocani, —¿Ifon, tsoancaí mia achimashquimun? —ishon un yocani. Nan ucaifin yocaniquin.

²¹ Ascaiton Pedron ua oinquin yocani, —¿Ifon ahuuscamain Juan naiyaicain? —huaiton.

²² —Un nimapaiyaino niyoi nan un nasoaitianri. Inon. Shinanyamahuu. Ascatare ua tanacoinfafainhuun, —huani.

²³ Ascano afu rafumisifo yoinannifo, —Juancaí nayoimafinquin, —uhuunua huanifo. Ascaciai Jesús anori yoinima. Yoini isca huaquin, —Un Juan nimapaiyaino niyoi nan un nasoaitianri. Inonpun shinanyamahuu, —ishon nan fusti Jesús anori ani.

²⁴ Unfin Jesushuunua yoimisiquin. Jesús ahuarafa huai cuscan mun oinmisiquin. Nanfo un mato cunushoni. Ascacun uhuun tsain man icoinra huatiro. Nantifain man man tapia un ahuunua yoiatton nan iconcoiain.

²⁵ Ahuarafa Jesús ani cuscacai non afoqui cunuqui nocotiroma. Unquian Juan un mato cunushoni. Nanti.

Jesús Fu Rafuafoan Apaonifo Cuscan (Hechos)

Jesús ato yoiyoni cuscan, –Diospan Yoshin Shara matoqui oshquiran, –ishon yoinei

¹⁻² Unquian, Lucas, un afanan mia cunu fomai min tapinon. Uhuun yora Teófilo, Jesús mai ano iyoshon ani cuscan huafain yosini cuscari Apa Dios ari cainitian nanfohuunoa un mia cunushoni min tapinon. A fu rafuafo catonni ato Diospan Yoshin Sharahuunshon tapimashquin. Apa Dios ari caiyoataima ato tapimaiyofafainpaoni.

³ Atohuunoashu nayoaitian cuarenta oshatan Apa ari cani. Cayoataima atofu iyopaoni. Ato ahuamamishti oinmayoni afanan funia cuscan icoinra huanonfo. Nantianri Diosin nantifi ato iquinai cuscan ato tapimani.

⁴ Ichanancashon piyaifoan ato yoinei,
–Un mato yoimisi cuscan uhuun Upa Diosin mato tapimayoni ahuun Yoshin Shara matoqui nichishquin. Nocoataima Jerusalén anoashu foriyamacahuun. Manayocahuun.

⁵ Juanpan ato unu muran iquimacuni aton chaca shatushon oinmanonfo. Ascano samamashta Upa Diosin ahuun Yoshin Shara mato ya imapacunan, –ishon Jesús ato yoinei.

Jesús Apa ari nai muran cani

⁶ Ascatan chipo afanan afu ichanancashon yocanifo, –¿Ifon, min natian yonoimamun nocon caifo Israelifo nocon niaifo fusti inon Romanofaan aton niaifoan afanan noco yonononma? –huaifoan.

⁷ –Ahuutian iquimancai mancai tapitiroma. Nocon Upa Diosin fustiton yonotiro ahuutianmain ishquicain.

⁸ Ascafia Diospan Yoshin Shara matoqui oshon ahuun curushu mato inanshquin. Ahuun shinanhuunshon uhuunoa man ato yoifoanfafainon. Un amisi cuscan huafain un yoimisi cuscari man man oinmisi man nicamisi cuscan nantifi uhuunoa man ato yoitiro. Nuno Jerusalén anoa yoifain nantio Judea muran yoifain Samaria ano yoifain nantifi manifotiton uhuunoa man yoifoanfafainon, –ishon ato yoinei.

⁹ Yoiquin anaititan aton ointaifi nuinacahuani. Oiainfono nai coin muran ihuacainaiton afanan oinnifoma.

¹⁰ Foiscaquin oianfo nocofunu sahuuti oshopacoin sahuua rafu atoqui niriscatanifo.

¹¹ Ascashon ato yoinei, –Galilea anoafoan, ahuuscain man nai ari foisain. Jesús man nai muran caa nansacoin acurani afanan oshquiquin, –ishon Diosin oinmati afu imisiton rafutan Jesús fu rafuafo yoynifo.

Matías catonni Judas imisi cuscari anon

¹² Ascatan machi Olivo anoashu Jerusalén ano nasofainifo. Nan machi Olivo Jerusalén chaimashta ini.

¹³⁻¹⁴ Nococatan pushu osa futsa fomancayan inacashon Upa Dios cufinifo. Nanno Pedro non Jacob non Juan non Andrés non Felipe non Tomás non Bartolomé non Mateo non Jacob futsa Alfeopan facu non Simón nanton ahuun caifo futan Romanonfo cachiquiri huapainifo, non Judas Santiagon facu non Jesús chipocufu non ahua María non ainfo futsafori nanno inifo. Ichanancashon shafa rananun Dios cufinifo.

¹⁵ Cufiaifono nanno ciento veinte yorafa atofu ichanannifo. Ichananfono Pedronun ato nastui nishon yoinei.

¹⁶ Isca huaquin, –Uhuun yoramishtichin ua nicacahuun. Judaspan ato tapimaita ahuuscashomai nocon Ifo Jesús achicanicain. Nocon shuni David Diospan Yoshin Sharahuunshon inonpacoai cunuyoni cuscan Judaspan man aca.

¹⁷ No fu rafupaoni. Nocon Ifoan noco yonoai cuscarifi huaquin nan Judasri yonopaoni.

¹⁸ Nocon Ifo tanayopaonifiafashon fasi chaca huani. Nocon Ifo ato achimacuan ahuun rafanan pui inannifo. Nan puihuushon mai fitan nanno fomancayan inashu aficoin tunushumutan pacucuranpai ari rononi. Chipu ahuun posto farashutan musiriquicahuan pacuni. Pacuaino ahuun posto toshatani. Ascaino ahuun poco arasiqifutsuni.

¹⁹ Nantiffain Jerusalén anoshon nicafo. Ahuun imi focun nanno anunifo, “Imi mairan,” huani. Yora futsan aton tsainman Acéldama. Nocon tsainman imi mai.

²⁰ Nocon shuni David Judashuunoa inaca cuscan aquin cunuquin isca huani,
“Ahuun mai ano tosa afanan ano inonma, Ahuun yono nocofunu futsan finon cushumisi inon,”

ishon David ahuunoa inonpacoai cuscan cununi. Ahuun cunu anunifo Salmos, huanifo.

²¹⁻²² Ascacun non futsa catononcahuun. Judaspan ahuun yono finon. Nan Juanpan yorafo unu muran iquimapacontinian non Jesús nomaqui Apa ari canitian no fu itiani non catononcahuun. Nan no fu cahuascapaoni non catontiro. Non Jesús nican cuscan huafain non oinyomisi cuscan arifi huamisi ahuunoari yoinon. No futan yorafo yoinon, “Jesús funia mun oincoianran,” ishon ato yoinon, —Pedro huani.

²³ Nicacashon nocofunu rafu catonnifo. Nan fusti anu rafu non fusti ya ini. José Barsabás ahuun anu futsa Justoran huashon anunifo. Nocofunu futsa catonnifo ahuun anu Matías.

²⁴ Aton catoncashon Upa Dios cufinifo, —Ifon, nantifi nocon nomuran non shinain cuscan min tapicoian. Noco tapimahuun ratocaimain nan nocofunu rafu min catonpaicain mifu rafumisi no fu inon.

²⁵ Judas min yononi cuscan man pota faquishihuan muran canon. Nanno ipanon. Ascan futsan ahuun yono fianon mifu rafua inon, —ishon cufishonifo.

²⁶ Cuficatan toqiri tocoro rafuhunu anu nutanifo. Ascashon motica muran nanushon napacuoani. Ascashon oianfo ratocaimain Jesús fu rafumisi iquicain. Ascashon oianfo. Matías ahuun anu nuucun. Nan catonnifo Jesús fu rafumisi atofu inon.

2

Upa Diosin ahuun Yoshin Shara atoqui oni cuscan

¹ Ascano Israelifoan aton fusitian ahuun anu Pentecostés ini. Nantianri Jesús tanamisifo pushu fusti muran ichanannifo.

² Ichanancatan pushu muran tsacashon nicafo samamashta nai ariashu fuhuan nicatsain nicanifo. Pushu muran fuhuan rupifurannaiton nicanifo.

³ Nocotoshaiano ana ointsa chi rucun maratamufafainafo oinnifo.

⁴ Ascaino Diospan Yoshin Shara aton nomuran nanutanaino nantifi tsain futsanman ipaitama inifoannifo. Nantifi ascai futsunifo.

⁵ Ascaino nantianri Israelifoan Dios tanasharapaicani manifoti anoashu Jerusalén ano funifo. Fusitian Jerusalén ano funifo.

⁶ Ascan fuuhuanun oi cuscara nicafuracani Jesús tanamisifo ichananfo ano ichotoshinifo. Yorahuanrasi nocotoshinifo. Nococatan yoinannifo, —¡Aira! ¿Ahuuscashucon iscaimun? ¿Ahuuscain na yorafo nocon tsainman icanimun?

⁷⁻⁸ Na yorafo Galilea anoafocashon nocon tsainman noco shafacafi yoi. Nan noco tsainman noco yoicani.

⁹ Nonfin tsain futsa futsatapa yafo. Atirifi Partia anoashu caiyainfono, atirifi Media anoashu caiyainfono, atirifi Elam anoashu caiyainfono, atirifi Mesopotamia anoashu caiyainfono, atirifi Judea anoashu caiyainfono, atirifi Capadocia nan Ponto muran anoashu caiyainfono, atirifi Asia anoashu caiyainfono.

¹⁰ Atirifi Frigia anoashu caiyainfono, atirifi Panfilia anoashu caiyainfono, atirifi Egipto anoashu caiyainfono, atirifi Africa nan Cirene orima futsa anoashu caiyainfono, atirifi Roma anoashu caiyainfono, atirifi Israelifo yafi mani futsafoan Diosin tanapainifo.

¹¹ Atirifi Creta anoashu caiyainfono, atirifi Arabia anoashu caiyainfono. Nonfin manifoti anoashu nuno ichanain fuaquin nan Galileafoan nocon tsainman noco yoicani. Ahuara sharafo Diospan huua noco yoiáfo, man non nicai.

¹² ¿Ahuuscai na yorafoan nocon tsain tapiamafishon noco tsainman noco yoicanimun? —inifo.

¹³ Ascano futsanfoan ato cashu mutsama huaifoan, —Na yorafo pauncaniran, —ato huani.

Pedro ato yoini cuscan

¹⁴ Ascan Jesús fu rafuafo once ato nastui nishon Pedronun oi ashcafinin isca huaniquin. —Uhuun yoramishtichin Israelifoan nunoa Jerusalén anoáfo futan ua nicasharacahuun. Un mato cayacafi yoinon.

¹⁵ Atirifiton man shinan raca non pauin. Ma. Noncai pauinma. Man shuni cuyainano nocon yorafo paunmisima.

¹⁶ Non pauntamarocan man oiain cuscan nocon shuni Joel inonpacoai cuscan yoiniquin. Diosinhuushon isca huaquin yoini,

¹⁷ Upa Diosin noco yoi isca huaquin,

“Uhuun facu oti chaima un manifoti anoáfo uhuun Yoshin Shara atoqui nichishquin. Ahuunshon maton facufo nocofunufu non ainfofori inonpacoai yoishcaquin. Maton pushcoáifo namapan cuscara un ato ahuafo ismai. Maton anifofoanri uhuunshon aton namapan cuscara ahuafo shara oinshcaini.

¹⁸ Ua yonoshonafori nocofunufu yafi ainfofo uhuun Yoshin Shara un nantianri atoqui nichishquin inonpacoáifoanri uhuun tsain yoishcaini.

¹⁹ Ahuamamishti tsoan oinyomisima cuscara un nai aria yafi mai ano un ato ismai. Imi yafi chi urumanhuan non coimahuan ishquin.

²⁰ Uhuun facu nan maton Ifon fasi sharastacoin matoqui oaiton man oinshquin. Oataima faquishihuancoin ishquin. Oshuri imi ointsa oshicoín ishquin. Afanan oaitian ahuamamishti tsoan oinmísima cuscara nantifiton oinshcani.

²¹ Ascanfiashon ratoran futsan isca huaquin, 'Ifon, Jesús, uhuun ramapaihuu. Ua numahuu,' huaiton Diosin numaiquin," ishon Joel Diospan tsain inonpacoai cuscan yoini.

²² Uhuun yora Israelifoaun ua nicasharacahuun. Jesús nan Nazaret anoaton Upa Diosin aqui unimani mato isma. Tsoan atiroma cuscan huafain tsoan oinyomisima cuscara huafain ahuamamishti futsafori ahuunshon Upa Diosin mato isma. Man man tapia non iconcoin.

²³ Ascafia Upa Diosin inon pacoai cuscan shinanni cuscan mato ahuun Furun inanni man rutunon. Manfin nocofunu chacafo futan ihui coyán iquinanqui mastaitaqui nanon.

²⁴ Naafiacun Upa Diosin funimana afanan omitsiscacai nanonma. Jesuscai tsoan nama-pacutiroma.

²⁵ Nocon shuni David niaifoaun Jesushuunoa yoini isca,

"Mun tapian uhuun Ifo ufu ipanaca. Ua potapacunacama. Ua cushui. Ascan tsoancai ua ahuasca huatiroma ua ratupaiquin.

²⁶⁻²⁷ Ascacufin uhuun nomuran un fasi unimacoin. Un nantifi ato yoitiro uhuun Ifoan ua cushuaino un unimai. Uhuun Ifo ua isca huaa, 'Uhuun Ifon, Diosin, un nacuncaí uhuun yoshin namisifo muran mian potaima. Mincai uhuun caya payocomaima. Ascan mun tapi un niyoano mian cushusharayoí' ishon ua huani.

²⁸ Ahuuscashumain un nipasharatiroquin mian tapimana. Un miqúi nocoano mian unimamacoinshquin," ishon nocon shuni David cununi.

²⁹ Uhuun yoramishtichin, un tapicoín cuscan mato yoi. Nocon shuni David nani. Man maifiani nanno natianri non ointiro.

³⁰ Ascafiano David inonpacoai cuscan Diosin tsain yoiyopaoni. A Diosin yoiyotiani cuscan tapia ini. Diosin yoiyoni chipo ahuun funari niaifocoin ishqui oi. Nocon caifo Israelifo a cuscarari nocon niaifo inon. "Un mia icon yoi min funa chipo mia cuscarari min caifoaun aton niaifocoin inon," ishon Upa Diosin David yoini. Diosicai tsoa paratiroma David tapini.

³¹ Ascano David chipo fari ichapa inaca cuscan yoini. Cristo funinonpacoai cuscarari yoini. "Naacucaí Apan naafo muran potanonpacoínma. Ahuun cayaricai payoconacamaran," ishon yoini.

³² Icon, Upa Diosin Jesús funimaita nipanon. Nantiffain man non oian.

³³ Natian Apa Dios fu niaifocoin nantifi iquina. Apa yoiyotiani cuscan Jesús ahuun Yoshin Shara nocoqui nichian. Ascacufin natian man oian cuscan huafain man nica cuscan Diospan Yoshin Sharapan aca.

³⁴⁻³⁵ Ascan nocon shuni Davidcai Dios ari ahuun cayafo ya nai muran canima. Ascashorifi yoini,

"Ifon uhuun Ifo yoini isca huaquin, 'Min ufu niaifo itiro nantifi iquinshquin. Mia noicasmaifori min ato finoncointiro afanan mia chaca huanonfoma. Atorifi min iquini. Un mia amashquinran,'" ishon yoini.

³⁶ Ascacufin nantifi Israeli anoafoaun maton nomuran tapisharacahuun. Jesús man ihui coyán iquinanqui mastaitafo Diosin yonoa nocon Ifo Cristo inon. Nan Apan catonni, — ishon Pedro yoini.

³⁷ Nicaquin aton ointi noconifo, —¡Ohua! Non chaca huaita, —ishon shinannifo. Pedro non Jesús fu rafuafo futsanfo yocanifo, —Nocon yoramishtichin, non mato nica. ¿Non ahuuscatiromun? —ishon yocaifoan.

³⁸ —Man chaca huamisi cuscan shatucahuun. Afanan chaca huatamarocon Dios shinancahuun. Jesucristo Ifo huacahuun. Man Ifo huaino mato unu muran iquimacutiromo maton chaca soafain Upa Diosin mato numanon. Asca huano Diosin ahuun Yoshin Shara matoqui nichishquin matofu rafucoinon.

³⁹ Jesús yoiquin isca huaita, "Ratoran futsan nuno nocon Ifo Diosin catoan ahuun Yoshin Shara mato ya rafumashquin. Maton facufo ya chai manifoannafori ato ya rafumashquin," —ishon Pedronun ato yoini.

⁴⁰ Yoitan afanan Pedronun ato tsain ichapa yoini. Ato yoiquin isca huani, —Maton chaca shatucahuun, uhuun yoramishtichin. Nocon caifo futan mani futsanfoanri man fasi chaca

huamisifo. Ascarafo iyamacahuun. Jesús icoinra huacahuun mato numanon, —ishon Pedronun ato yoini.

⁴¹ Nicaçaquin tres mil yorafoan icoinra huanifo. Ascano ato unu muran iquimapaçuni.

⁴² Ascatan Jesushuunoa tapipaiyaifoan Jesús fu rafuafo ya ichanancashon ato tapimafain ato futan pifain Upa Dios cufinifo. Asca huapaonifo.

Jesús icoinra huaquin tau huanifo cuscan

⁴³ Nantiffain Jesús shinancoinnifo. Ahuun tsain noiquicai ahua futsan shinanpainifoma. Nantianri Jesús fu rafuafoan atofu inifo. Doce Jesushuunshon afu rafuafoan tsoan atiroma cuscan huafain oinyomisifoma cuscarafo ato oinmanifo.

⁴⁴ Ascatan Jesús icoinra huamisifo shafatifi ichanannifo. Nantifi aton ahuarafoya cuscan pashcananpacunifo.

⁴⁵ Aton mafo non ahuarafon inanmitsacashon ahuun rafanan pui ficashon yopaifo ato inanschaquin.

⁴⁶ Shafatiffiri Dios fu tsainti pushu muran ichanannifo Dios cufincani. Aton pushu muranri fasi unimacoinyanan ichananshon pishcaquin. Picaquin, —¡Aicho! Upa Diosin min noco shara huafafainiran, —ishon yoinifo.

⁴⁷ —Upa Diosin min shararan, —ishon huapaonifo. Nantiffain atohuunoa yoinifo, —Jesús icoinra huafoan shararan, —huanifo. Ascatarinocon Ifohuunshon shafatifi futsafoanri ato futan Jesús icoinra huanifo. Ato fu ichanannifo.

3

Chato chatotiani cayani cuscan

¹ Ascatan Dios fu tsainti pushu ano Pedro yafi Juan yatapacu Dios cufin focani fonifo. Yatatifi Dios cufi focani fopaonifo.

² Nocofunu chato chatotiani nanscarapan cainni nan anosi shafatifi tsaotiani. Atrifiton iyopaonifo anoashu pui yocacanon. Ascano Dios fu tsainti pushu shuinshcaian tsaoshon iquifurafainaifoan ato pui yoca yocatiani. A caincaitinin ahuun anu sharashta.

³ Pedro yafi Juan iquifainpaiyainfoan oinquin, —Ua pui inancapun, —ato huafaiton.

⁴ Pedro futan Juanpan fuuiscaquin Pedronun yoini. —Noco fuuisihuun, —huaiton.

⁵ —¡Aicho! Ua pui inancaniran, —ishon ahuun nomuran shinanni. Ascanshon ato foisini.

⁶ —Uncai pui yamafinquin. Ascafiquin un aya cuscan un mia inanon. Jesucristo nan Nazaret anoahuunshon funinaca huahuun. —Pedronun huani.

⁷ Mananquiri mutsoinifoannaino funinaca huatan. Mua ahuun oposhco yafi ahuun tau muma curushu shara ini. Pedronun funaiquimashta mutsoinifoanpaiyaino afin fianshinacahuani.

⁸⁻⁹ Ascatan man chaima catan. —¡Aichoran! —icashu, fia flashuita unimani. Ichotiritiritan. Dios fu tsainti pushu muran atofu cani. Ato fu cashon, —¡Aichoran! Diosin muan caya huaquin. Dios shararan, —icashu ichotiritirini. Nantiffain Israelifoan ichananti pushu anoshon oinquin futsanifo.

¹⁰ Onancashon, —¡Aira! ¡Oincapon! Nan chato chatotiani caincaiti ahuun anu sharashtaran ano tsaoshu pui yocacamitsamisi. ¿Ahuuscashumun cahuacacainniquin? Noncai ascara oinyomisimaran, —icashu ahuun yoinnanifo.

Cunu futsan ahuun anu Salomón anoshon Pedronun ato yoini

¹¹ Ascano nanno cunu futsan ahuun anu Salomón muranshon nocofunu chato chatotiani Pedro yafi Juan poyatani. Nantiffain a oinpai atoqui ichonifo. Nocotoshiqui oianfo, —¡Aira! ¿Ahuuscainmun? —icashu yoinannifo.

¹² Atoqui ichoaifoan Pedronun ato oinquin. Yoini, —Nocofunu Israelifoan ua nicacahuun. ¿Ahuuscain man mustairimun? ¿Ahuuscaquimun man noco shararan ishon oincain? Na nocofunu chato chatotiani caya huaran ishon. Non sharacucai nocohuunoashu cayama. Nocon curushhuunshocai cayama.

¹³ Noncai acama. Nocon Upa Diosin ahuun oinmati Jesushuunshon caya huua. Nocon shunifo Abraham non Isaac non Jacobori Upa Dios aton Dios. Nan nocon Diosin mato oinmapai ahuun facu Jesús sharacoin ahuamamishti huatiro. Manfin Jesús achimanitaquin futsafoan rutunonfo. Niaifon Pilaton a nichisharapaifaiton “Nacai nocon niaifomaran,” man Pilato huaita.

¹⁴ Jesuscai ahua chaca huamisima. Sharacoinfiacun mancai caimapaitama. “Jesuscai caimatamarocan rutumitsamisi Barrabás caimahuun,” man iquita.

¹⁵ Jesús fustichin yora nimatirofiacun man rutuita. Man rutufiata Upa Diosin funimanita. Non ointa Jesús funiaiton.

¹⁶ Man man tapia na nocofunu chato chatotiani imisi. Natian muma shara. Non Jesús icoinra huano ahuunoashu man caya. Man man oian.

¹⁷ Uhuun yoramishtichin, mun tapia man Jesús onanshoma rutua. Mato niaifofoanricai onanfoma.

¹⁸ Man aca cuscan tapiamafiaquin Upa Diosin nocon shunifo nan ahuun tsain yoishomisifoan inon pacoai yoiquin isca huanifo, “Cristo Diospan Furun omitsiscairan,” ishon inonpacoai cuscan yoinifo.

¹⁹ Ascacun man chaca huamisi cuscan shatucahuun. Chaca huatamarocon Upa Dios shinancahuun maton chaca soashonon.

²⁰ Man ascaiton Upa Diosin mato unimamatiro. Ahuun Furun Jesús catonni maton numamisi Cristo inon. Matoqui afanan onon.

²¹ Ahuun yonoshomisifoan nan inon pacoai Jesushuunoa yoinifo isca huaquin, “Upa Diosin yoiyotiani, ‘Un chipo nantifi funa shara imai. Afanan ahua chaca inonma. Un asca huayoai chain uhuun facu ufu nai muran iyoiran,’ ” inonpacoai cuscan Diospan tsain yoinifo.

²² Nocon shuni Moisés arifi yoini, “Nocon Ifon Diosin noco caifo futsa catonshquin noco inon pacoai yoimisi inon. Ua cuscara inon. Nantifi mato yoiái cuscan a nicasharacahuun.

²³ Tsoan a nicacasmai afo amaquishon potatiro ariashu omitsiscapanon,” yoini.

²⁴ Samuel Diosin tsain yoiquin tau huani. Nan inonpacoai cuscan. Ascano chiporifi Diosin tsain yoimisifoan nannoricoinri yoinifo cuscacoin man aa. Nantiffain Jesushuunoasi yoinifo.

²⁵ Manfin aton funafoquin. Ascan Diosin nocon shunifo yoiyotiani cuscan matori ashoshquin. “Min funahuunshon nantifi manifoti anofo un ato shara huairan,” ishon Upa Diosin Abraham yoini.

²⁶ Ascan ahuun Furun Jesús matoqui nichini ahuun oinmati inon. Matoqui nichiqui tau huani mato shara huanon maton chaca man cachiquiri huapanon, –ishon Pedronun ato yoini.

4

Israeli niaifofoan Pedro yafi Juan cunanifo ato yocashquin

¹ Ascatan Pedro futan Juanpan ato yoiifoanno yorafohuunshon Dios cufimisifo Dios fu tsainti pushu cushumisifoanri aton niaifo non Saduceofori atoqui funifo.

² Upa Diosin Jesús funimanaran ishon Juan futan Pedronun ato yoiaino aton nomuran shinanchacanifo.

³ Ascano man fari caino ato achinifo nan yamutan cunu muran ishinifo.

⁴ Ascashiashon ato Jesushuunoa yoiifoan yorahuanrasifoan icoinra huanifo. Cinco mil nocofunfoan nantian icoinra huanifo.

⁵ Iyoconaino Israeliofan aton niaifofo non Moisés cununi cuscan tapimamisifo Jerusalén ano ichanannifo.

⁶ Nannori aton yorafohuunshon Dios cufimisi niaifocoin Anás yafi Caifás non Juan futsa non Alejandro non aton yorafori nanno inifo.

⁷ Pedro yafi Juan caincurannaiton niaifofoan cusutumushon yocanifo. –¿Tsoan mato yonoamun man aca cuscan man huanon? ¿Tsohuunshon man acaya huamun? –ishon niaifofoan yocanifo.

⁸ Asca huaifoan Pedronun Diospan Yoshin Sharahuunshon ato cumani, –Niaifofoan un mato yoisharanon.

⁹ Man noco yoca tsoa na chato chatotiani shara huamainquin. Man tapipai ahuuscashu-main cayaqui.

¹⁰ Un mato cayacafi yoinon. Man nantiffain uhuun caifo nan Israelifo yashon tapisharacahuun un mato yoinon. Jesucristo nan Nazaret anoahuunshon man caya muma shara inon. Manfin Jesucristo ihui coyan iquinanqui mastaitaquin. Man naafiacun Upa Diosin funimana.

¹¹ “Pushu yonomisifoan toquiri quishi shara potano pushu oni sharatiroma. Man potafiafo pushu ifoan catonni toquiri quishi shara nichishquin pushu mutsisipacoin inon,”

ishon Diosin tsain cununi. Jesucristo nan toquiri quishi cuscara. Manfin pushu yonomisifo cuscara man man potafia Upa Diosin a catonni ahuunoashu man ahuun yorafo inon.

¹² Tsoa futsacai noco numatiroma. Manifotifoan tsoa futsahuunoashucaí non ipatiroma. Jesucristo fustitofin nocon chaca soatiroquin non Upa Dios fu nipanon, –ishon Pedronun ato yoini.

¹³ Ascan nicacani mustairinifo. Niaifofo yoinannifo, –¿Ahuuscaquimun na rafutan ahuamafishon ranotama noco yoiquin? Cunu tapiamafiamisishaquin noco shafacafi yoi. Jesús fu rafumisishaqui noco anori yoiquin, –icashu yoinannifo.

¹⁴ Ascano chato chatotiani cayasharashu atofu nia ini. Ascaitocai niaifofoan, —Cayamaran, —ishon yoitioroma ini.

¹⁵ Ascashonrifi Pedro yafi Juan cunu futsa muran nichinifo atohuunoa yoishcaquin.

¹⁶ —¿Non ahuusca huaimun na nocofunu rafu? Nantifi Jerusalén anoafon tapiafo na rafuhuunoa nocofunu chato chatotiani man caya. Ascara tsoan oinyomisima. ¿Nonmun ahuusca na nocofunu rafu huaicai? Noncai futsafo fomantiroma. Cayamarancai non huatiroma.

¹⁷ Ascanshon non ato yoinon afanan Jesushuunoa tsoan yoiyamacahuun. Ascan fut-safoanricai Jesushuunoa nicatirofomaran, —icashu yoinnanifo.

¹⁸ Ascatan ato cunu futsa murannoa cunani funonfo. Fuafoan ato yoinifo, —Afanan Jesushuunoa tsoan yoiyamacahuun. Ahuunoa yosiyamacahuun, —ato huaifoan.

¹⁹ Asca huafiaifoan ato cumanifo, —¿Non mato nicayamaraquin Upa Diosin noco yonoa cuscan non nicatromun? ¿Rato sharamun? Mafin shinancahuun. ¿Non mato nicaino Diosin nocoqui unimatiro iyamarai afin noco yonoa cuscan non yoiaino unimatiromain-quin?

²⁰ Non oinmisi cuscan huafain non nicamisi cuscari non mato yoitioran, —ishon Pedro futan Juanpan cumanifo.

²¹⁻²² Nicacani ato onaintimapaifiaquin nica nantifi yorafo, —¡Aicho! Upa Diosihuunshon chato chatotiani cuarenta fari aqui caa nanscarapan caini man cayahuamaforan, —ishon yoinifo. Ascan niaifofoan ato onaintimatamarocon ato yoinifo, —Man afanan Jesushuunoa yoiaiton non mato asca huatioran, —ishon yoinifo. Yoicatan ato nichinifo.

Jesús icoinra huafoan Upa Dios cufini ahuun curushu ato inannon

²³ Nocon yorafohuunshon Dios cufimisi niaifofo non Dios fu tsainti pushu cushumisi-foan ato nichiano Pedron yafi Juan Jesús tanamisifo fu ichanannifo. Ichanancashon niaifofoan ato yoya cuscan chanipacunifo.

²⁴ Nicacaquin Dios cufinquin isca huanifo. —Nocon Ifon, min nantifi iquinaquin. Min nai onihuafain mai onihuafain ununhuan min onihuani. Nantio nai murannoa yafi mai anoa non unuhuan murannoa min onihuani.

²⁵⁻²⁶ “¿Ahuuscaimun nan Israelifoma manifoti Diosqui fiishquicaniquin? Ipaitsi ichanancani chaca huapaicani. Manifoannati aton niaifofo ichanancani nocon Ifo Dios yafi Furun Cristo cuyopaicaniran,”

ishon nocon shuni nan min oinmati David min Yoshin Sharahuunshon yoini.

²⁷ Nanscarifi atan nan niaifo rafu Herodes yafi Poncio Pilaton Israeliyamafishu nocon caifo Israelifo fu ichanaintafo min Furun nan min oinmati Jesús min catonni chaca huashcaquin.

²⁸ “Uhuun facun nantifi yorafo omitsiscashoshquin ato nashonon,” ishon min shinanni. Min ahuamamishti huatiro. Ascan min shinanyoni cuscan huaitafo.

²⁹ Ascan nocon Ifon, shinanhuun. Nonfin min oinmatifoquin. Noco ati ati huacaniquin. Min curushu noco inanhuun non min tsain ranotamacoin ato yoinon.

³⁰ Min oinmati sharacoin nan Jesushuunshon tsoan atiroma cuscan huahuu. Ahuunshon isinin icaifo caya huafain tsoan oinyomisima cuscara sharafo ato oinmahuu, Upan, —ishon cufinifo.

³¹ Cuficatan ichananfono mai naiyanaiyaini. Ascatan nantifi nanno Diospan Yoshin Sharapan ato iquini ahuun tsain cayacafi ranotama yoinifo.

Nantifi ahuarafa nantifina ini

³² Nantiffain Jesús icoinra huamisifoan aton nomuran nannorisi shinannifo. Tsoan ahuara futsa shinantanima. —Nan uhuunarifi matonaquin. Un aya cuscan man yopaiton un mato inantioran, —icashu yoinannifo.

³³ Ascatan nan doce Jesús fu rafumisifoan, —Nocon Ifon Jesús noco nashoashu funiaran, —ishon Diospan Yoshin Sharapan ahuun shinansharahuunshon aton caifo yoinifo. Ascatari nantifi nan icoinra huafo Upa Diosin ato shinanmashara unimacoinonfo.

³⁴⁻³⁵ Aton mai inanmitsafain aton pushu inanmitsanifo ahuun rafanan pui ficashon a Jesús fu rafumisifo doce pashcashoshcaquin. Yopaifoan pashcashonifo. Ascanrifi atan tsoa ahuua yopatanima.

³⁶ Nantianri nanno nocofunu aton caifoan ahuun anu José. Nanton aton shuni Levipan funa. Unu nushmancayan rafu mai tomahuan ahuun anu Chipre anoashu cainni. Jesús fu rafumisifoan anu futsa tuqui huani Bernabé. Onicoinnin tsainman yorafo aton fupihuan-mapaimisi shinansharamapaimisiran.

³⁷ Ahuun mau inanmitsashon pui fishon Jesús fu rafumisifo inan yopatanaifoan pash-cashopacunifo.

5

Ananías yafi ahuin Safira chaca huani cuscan

- ¹ Ascano Ananías futan ahuin Safira mai inanmitsacashon ahuun rafanan pui finifo.
- ² Nanscatanfin atirifi pui tushu huafiahocai cuyoinanima. Atirifi Jesús fu rafumisifo foshoni. Ato fomaní, —Nantifi pui un mato cuyoinaran, —ishon ato shinanmapaini. Aca cuscan ahuinin arusu tapini.
- ³ Ascaiton Pedronun yoiquin isca huani, —¿Ananías, ahuuscaimun Satanás min nomuran yonoaino min Diospan Yoshin Shara paraincain? Min mai inanmitsashon pui fia atifincái min noco inanma. Atirifi min mucua mina inon.
- ⁴ Min inanmitsataima minacoin iyoa. Min atirifi mucupaiquin min noco yoia shara icuana. Ascatamarocon min noco fomanpai. Mincai noco fuparanima. Minfin Dios fuparanicai, —ishon yoini.
- ⁵ Asca huatapaiyaino Ananías nayacucahuani. Ascaino nantifi anofo ratucoiniffo.
- ⁶ Ascano pushcofoan rashunifo mai huai foshcaquin.
- ⁷ Man ascano tapiamaino ahuinri nocotoshini.
- ⁸ Nocotoshiaiton Pedronun yocani, —¿Man mai inanmitsashon rafanan pui fiamun? ¿Man man nantifi noco inanmun? —ishon yocaiton. —Ai. Mian yocai cuscafin iconquin, —ishon yoiaiton.
- ⁹ —¡Ohua! Ahuuscain min funu futan tsoan tapimaran ishon “Diospan Yoshin Shara man fomanpaiyain. Tsoan tapimaran,” ishon man shinan. Man shinan raca Diospan Yoshin Sharapan tapiama. ¡Oinpon! Na pushcohuaifoan min funu mai huatacani fucani miarifi mai huacaniran, —ishon Pedronun yoini.
- ¹⁰ Asca huatapaiyaino Safira Pedro nia naman pacuriscatani. Ascatan charish acucahuani. Ascatapaiyaino iqui furapaiquin oianfo man naa fuchitoshitan ihuifainifo funu patashari mai huai foshcaquin.
- ¹¹ Ascaiton nicacani Jesús icoinra huafo yafi futsafori ratucoiniffo.

Jesús fu rafumisifoan doce isca huani, —Iscaracai tsoan oinyomisimaran, —huanifo

- ¹² Ascano ichananti pushu ahuun anu futsan Salomón Jesús icoinra huafo nantifi nanno ichanannifo. Nannori afu rafumisifo doceton Diospan Yoshin Sharahuunshon tsoan atiroma cuscan huanifo. Yorafoan aton ointaifi.
- ¹³ Icoindra huamafoan ato oinquin yoinifo, —Jesús icoinra huafo yora shararan, —ifacatan Jesús icoinra huayamashu atofu rafunifoma. Musunifo.
- ¹⁴ Ascafiaino nocofunufu yashon ainfofoanri shafatifi icoinra huarianifo. Ascashu atofu ichanannifo.
- ¹⁵ Ascano yora isinin icaifo ato shuhua naratashon ihuunifo. Ascashon nanfo fai cusumun ratani cahuaquin, —Pedron ahuun yora faquishi ihuafainaino raca cayatiroati, —ishon shinannifo.
- ¹⁶ Yorahuanrasi Jerusalén patashari icafo isinicaifo ato ihuunifo. Atirifi yoshin chaca atohuun nushon ato fucashni huaiton ihuunifo. Ascanshon nantifi ato caya huamapacunifo.

Jesús afu rafumisifo doce omitsisca huanifo

- ¹⁷ Jesús fu rafumisifoan acaifo cuscan huafain yoiaifo cuscan, —¡Aicho! Na yorafo shararan, —icashon yoinifo. Ascano Israelifoan aton yorafohuunshon Dios cufimisi niaifocoin yafi niaifo futsafoan nicacaquin shinannifo, —Atohuun noiai cuscacai nocohuun noima. Atohuunoa yoisharai cuscacai nocohuunoiari yoisimimaran, —ishon shinannifo. Curafiamisifo Jesús fu rafumisifoqui fiishquinifo.
- ¹⁸ Ascano ato achimacashon cunu muran iquimanifo.
- ¹⁹⁻²⁰ Iquifiafoan yamu nacucahuanaino Diospan oinmati afu nai muran icaton atoqui nocoshon ato yoini, —Dios fu tsainti pushu anoshon ato yoitacahuun. Ahuuscashomáin nocon Ifo Jesús ato nimapacutiroquin ato yoitacahuun, —ato huani. Yoitan ato cunu fupotifo fupushoni. Fupushonano cain furanifo.
- ²¹ Shafaino Dios fu tsainti pushu muran iquitoshicashon ato yosiacufainifoquin. Israelifoan aton niaifofo ichanancashon cunu cushumisifo aton niaifofo ato nichinifo Jesús fu rafumisifo doce ihuitanonfo.
- ²² Ascano cushumisi niaifofo nococashon oian tsoa anoma oincani. Ascan naso furan niaifofoqui chaninifo.
- ²³ —Non ato matoqui ihuupaifia cunu fupotifo fupocoian. Nannoshon ranushumuafon ato cushua. Non fupotifo fupushon cunu muran oian. Anon tsoa yamairan, —icashu cushumisi ranushumuafon aton niaifo uhuapafocui chaninifo.

²⁴ Nicacani nocon yorafohuunshon Dios cufimisi niaifocoin non ranushumua aton niaifocoin non nocon yorafohuunshon Dios cufimisi naifofo futsafori mustairinifo, — ¡Ohuashta! ¿Ahuuscain ascamun? ¿Ahua finoanmun? ¿Non ahuuscatiromun? —ishon fasi shinanchacatanifo.

²⁵ Shinainfoanno futsan atoquei nocoshon yoini, —¡Oincapon! Na nocofunufu man cunu muran iquimafia natian Dios fu tsainti pushu muranshon yorafo yosicaniran, —ishon ato yoini.

²⁶ Nicacani ranushumua niaifon yafi niaifo patasharifo ato ihui focani. Fofiacashon curushcain ihuunifoma. —Non ato curushcai ihuaiton yorafo sinatirofo noco toquirinin tsacatiroforan, —ishon yoinifo.

²⁷ Ato ihuunifo Israeli aton yorafohuunshon Dios cufimisi niaifocoin ato yocanonfo,

²⁸ —Non mato cayacafi yoita Jesushuunua man yosinonma. Ascafia man Jerusalén anoafu atoti man yoiacufaina. Man ato shinanmapai nonmain na nocofunu Jesús rutumaitaquin. Noco rafancaniran, —huaifoan.

²⁹ Ascan Pedro futan Jesús fu rafumisi futsafoanri cumacaquin. —Nocofunun noco yonoa cuscan nicatamarocon Upa Diosin noco yonoai cuscan non nicacointiro.

³⁰ Manfin Jesús ihui coyan iquinanqui mastaitaquin rutushquin. Man asca huafia nocon shunifoan aton Diosin Jesús funimaita.

³¹ “Ua cuscara onihuafofi iquihuun aton Ifo inon,” ishon Apa Diosin Jesús yoini. Ascano Israelifo nocon Numamisi inon non chaca shatunon a ifo huashquin nocon chaca noco soashonon.

³² Non mato yoiyai cuscan non afohuunua yoimisi. Diospan Yoshin Sharapanri nannori yoimisi. Tsoan Dios nicacoianfin ahuun Yoshin Shara aqui nichishquin afu nipanon, —ishon yoiainfoan.

³³ Nicacani fasi atoquei fiishquinifo. Ato rutupaicani.

³⁴ Ato rutupaifiaifoan Fariseo ahuun anu Gamaliel ato nastui nishon ato yoini, —Oinfain. Ato chifi nichiyocahuun un mato yoinon, —ishon yoini. Nan Gamaliel Moisés cununi cuscan tapimamisi. Nantiffifan ahuunua yoimisisifo, —Gamaliel fasi nocofunu sharacoin. Fasi tapicoianran, —ishon ahuunua yoinifo. Ascashu nanno ichanannifo a nicapaicani.

³⁵ Ato yoiquin isca huani, —Uhuun yoramishtichin Israelifoan ua nicasharacahuun un mato yoinon. Man nocofunufu rutupaicain. Oinfain.

³⁶ Shinancapon. Fari futsan nocon caifo futsan ahuun anu Teudas, “Unfin mato niaifo itiroquinran,” ishon noco shinanmapaipaoni. Ascano cuatrocientos nocofunufu a tanapaonifo. Ascafia futsafoan Teudas rutunifo. Ahuun tanamisifo pashcafainnifo. Ahua finontama.

³⁷ Chipu nocon caifo futsa Galilea anoashu noconi. Ahuun anu Judas. “Non niaifofo potanoncahuun,” noco caifo huani. Nanrifi rutunifo. Ascan nantifi ahuun tanamisifori pashcafainnifo.

³⁸⁻³⁹ Ascacufin un mato yoicain ua nicasharacahuun. Jesús tanamisifoan apaiyai cuscan anaitiriscatiroquin. Diosin shinan cuscan yositamarocon nocofunun afi shinan cuscan yoiquin ipaitsi yositirofo. Ascayamaiton Diosin ato yonoaitocai tosa ato shatumatiroma. Man ato shatunapaquin Dios fu chaca huan tanain cafiscain man huaicain. Ascacufin ato ahuusca huayamacahuun. Ato nichicahuun, —ato huani.

⁴⁰ Nicacani, —Ahuun tsain cayacaoni. Noco yoia cuscan non anon, —huanifo. Ascano Jesús fu rafumisifo iquifuranifo. Iquifuranaifoan fichiqui tuchiaaton ato fasi coshaqui futsanifo. Coshatan, —Afanan Jesushuunua tosa yoiyamacahuun, —ato huanifo. Yoitan ato nichinifo.

⁴¹ Atomaqui focatan —¡Aicho! Upa Diosin nocoqui shinansharaquin non Jesushuunuaashu non omitsisca. Ahuunshon niaifofoan nocohuunua shinanchacaran, —icashu unimanifo.

⁴² Ascano shafatifi Dios fu tsainti pushu ano yafi pushufotirifi tsain shara yoinifo, —Nocon Ifo Jesusfin nocon Cristonquin. Diospan Furunmun, —ato yosiaino. Ato yoiquin unupaonifoma.

6

Siete ato futan yonoafo catonni

¹ Ato yosiainfoanno yora ichapafoan icoinra huacashon Jesús tanamisicoinfo inifo. Yora ichapafoan icoinra huariapaonifo. Nantianri nanno Israelifo Griego tsainman inifo. Shoco futsafo Israeli tsainmansin inifo. Nan Griego tsain yoimisifoan tsain chipunifo. —Nocon caifo aton tsain fusti yoimisifoan shafatifi tushu pashcanan huacashon aton ainfo funuomafu inain cuscaicai nocon ainfo funuomafu atori ati inanmaran, —ishon tsain chipunifo.

² Ato nicacani Jesús fu rafumisifo doce nantifi Jesús tanamisifo ichanancashon ato yoinonfo. —Non mato Diospan tsain yoifafaini. Noncai unutiroma mato tushu pashcashoshquin.

³ Ascan nocon yoramishtichin, maton murannoa nocofunufu siete catoncahuun mato tushu pashcanan huanonfo. Man tapia ratofomain Diospan Yoshin Shara fu rafucain shinansharamisiquin. Nan cuscarafu catonhuun non ato yononon mato tushu pashcanan shara huanonfo.

⁴ Ascan nonfin shafatifi Upa Dios cuffafainicain ahuun tsainri yoishquin, —ishon yoinifo.

⁵ Nicacani nantifi unimanifo. Ascashon Esteban catonnifo. Nanton fasi icoinra huamisi. Diospan Yoshin Sharapan a iquina ini. Felipe non Prócoro non Nicanor non Timón non Parmenas non Nicolás afo catonnifo. Nan Nicolás Israelifomafishon nanfoan Diosin icoinra huua cuscan arifi anorisi acaifo cuscan shinanni. Antioquia anoashu cainni.

⁶ Aton catoncashon Jesús fu rafumisifo ano iyonifo. Ascan nan doce ato manmancashon Upa Dios cuffishonifo.

⁷ Ascatan Diosin tsain mai futsafoanriri yoifoanfafainifo. Jerusalén anoshon samamashta icoinra huanifo Jesús tanamisifo ica ini. Israelifoaon aton yorafohuunshon Dios cufimisifo ichapafoaonri Jesús icoinra huacashon ahuun tsain nicacoinnifo.

Esteban achinifo

⁸ Esteban Upa Diosin shinanmasharani ahuun curushu inanni. Ascan ahuunshon ahuamamishti yora atiroma cuscan ato ismani.

⁹ Ascano Israelifoaon aton ichananti pushu futsa nanno ichananshon ato anunifo. —Apaiyai cuscan huatiroforan, —ishon atohuunooa yoimisifo. Nanfocai afanan oinmatifoma. Nanfoan aton mai Cirene anoashu non Alejandría anoashu non Cilicia anoashu non Asia anoafori. Nanfo Esteban fu fochismanantanannifo.

¹⁰ Fochismanantanapaifiafoan Diospan Yoshin Shara Esteban shinansharamani. Caya-caficoan ato yoiaino tsoan cumanima.

¹¹ Ascano fustirasi yoinanpacunifo. Tsoa futsa nicanonma. —Estebanhuunooa tsain chaca yoitacahuun. Nanton Moisés yafi Diosqui tsain chaca huaaran, —ishon ato yoitacahuun. Estebanhuunooa chani yoinifo.

¹² Ascan ahuunooa chani nicacani yorahuanrasi Estebanqui fiishquinifoqui. Ascano niaifo patasharifo non Moisés tsain tapimamisifoanri Esteban achinifo niaifofu ano iyoshcaquin.

¹³ Ahuunooa chani yoinifo, —Na nocofunun nocon Dios fu tsainti pushuhuunooa yafi Moisés noco yonon cuscahuunooari tsain chaca huariai.

¹⁴ Man non nicamisi yoiatun, “Jesús Nazaret anoaton nocon Dios fu tsainti pushu paoanshquin. Moisés noco yononi cuscari fiananan huairan,” —ishon chani yoinifo.

¹⁵ Ahuunooa chani yoicashon niaifofoaon fuiscaquin oianfo ahuun fuso. Diospan oinmati afu nai muran ica ointsa fupishtacoin ini.

7

Esteban ato cumasharani cuscan

¹ Ascatan Israelifoaon aton yorafohuunshon Dios cufimisi niaifocoin yocani, —¿Mihuunooa chaca huafo cuscan iconmun? —huaiton.

² Esteban cumaquin isca huani —Uhuun yorafoan ua nicacahuun. Nocon shuni Abraham Harán ano icataima Mesopotamia ano ini. Nantianri Upa Diosin fasi chashacoinshon oinmaquin yoini isca,

³ “Min mai anoashu non min yorafo anoashuri catahuun. Un mai futsa ari mia ismaicai. Nanno un mia iyoiran,” ishon Upa Diosin Abraham yoini.

⁴ Ascatan Caldeamaquinoashu canishaquin Harán ano ini. Anoashu apa nani. Naacun non icano Upa Diosin nichini.

⁵ Nuno nichifiashocai maishta inantaima. “Chipo min non min funafori un na mai inain matona inon,” ishon Upa Diosin yoiyotiani. Anori yoiyai cuscacai Abraham facu yatai inima.

⁶ Yoiari “Min funafo yora futsafoan mai ano iishquicaniquin. Aton maima ano iishquicaniquin. Nanno cuatro ciento fari aton yonomisifo iishquicani. Ato fasi curushcai yonomashcaquin. Fasi omitsiscashceni.

⁷ Ascacufin un nan yora futsafo onaintimai. Ascatan chipo aton mai anoashu focani nuno nocoshon ichananfafainshcaquin ua cufishcaniran,” ishon Upa Diosin nocon shuni Abraham yoini.

⁸ Ascan Upa Diosin Abraham yononi isca huaquin “Min furonanfacufo ato foshqui rupa shatuhuu. Ascan huatanfin min tapitiroquin. Unfin maton Upa Dios ipanacaquin. Un mato cushufafaini min funafo ichaparasi inon.” Ascacufin Abraham ahuun facu Isaac caintan ocho osha finontan facu ahuun foshqui rupa shatuni. Ascan Isaac nocofunuaitian man facu yari anuni Jacob. Ascan Jacob nocofunuaitian ahuun facu furonanfacufo doce. Nanfo nocon shunifo. Afohuunshon nocon caifo anumisi.

⁹ Nocon shunifoan aton ushto José noicasmacaquin yora futsa inannifo ahuun rafanan pui fishcaquin. Ascan José Egipto ano iyonifo nanno aton yonomisi inon. Asca huafiainfoan Upa Diosin José potanima. A fu imisi.

¹⁰ José omitsiscafiaton Upa Diosin numani ahuun nomuran shinansharamani. Ascano Egipcio niaifoan Faraón fasi José fuchipaipaoni. “Min niaifo patashari itiro. Nantifi uhuun yorafa non uhuun caifo min ato nantifi yonotiroran,” ishon Egipcio niaifoan José yoini.

¹¹ Asca huatan nantifi Egipto anoafao non Canaán anoafori fonicoín omitsiscapaonifo. Nocon shunifo tushuoma inifo.

¹² Nantianri nocon shuni anifoshta Jacob arifi tushu yamaino nica Egipto anoafao man shuqui ichapa ya inifo. Asca ahuun facufo nanfo nocon shunifo nichini Egipto ano shuqui finonfo.

¹³ Asca huatan chipo afanan Egipto ano fonifo tushu ficani. Nantianri José ahuun ochifo futan chipocuton onannifoma. Onainyamafiaifoan “Uquian, José un maton ushto,” ishon ato yoini. Ascatan Egipciofo aton niaifo Faraón arifi José ahuun yorafohuunoo nicani.

¹⁴ Chipó José apa tsain fomani, “Upashtan, uqui ohuu. Un nunoshon mia cushusharanon. Nocon yorafari uqui ihuuhuu. Nan setenta cinco yora uqui ihuuhuu, upashtan” ishon José yoini.

¹⁵ Ascatan Jacob yafi ahuun yorafari Egipto ano fonifo. Nannoashu nocon shunifo ya nai cuyonifo.

¹⁶ Naacun aton caya Siquem ano iyonifo mai huanonfo. Nocon shuni Abraham mai fiini. Nocofunu ahuun anu Hamor mai inanni pui finon. Nanno mahua quini muran nocon shunifo mai huanifo.

¹⁷ Ascan Upa Diosin Abraham yoiyoni cuscan ato Egipto anoashu cainti chaima. Nantianri nocon shunifo Egipto ano fasin ichapacoín ini.

¹⁸ Nantianri Egipciofoan aton niaifo funapacai nocon shuni Joséhuunooa nicayomisima.

¹⁹ Nanton nocon shunifo parafafaini. Ato omitsiscamani. Fasi curushcain ato yonomani. “Maton facufo rama caincun potacahuun nanonfo,” ishon ato yononi.

²⁰ Nantianri nocon shuni Moisés cainni. Caianshu rato facu futsacai a cuscarama. Upa Diosin aqui unimai. Oshu rafu non fusti apa yafi ahua pushu muran onunifo Egipciofoan fuchinonfoma.

²¹ Oshu rafu non fusti finontan facu chifi cainmafiashon shihuatinin fuposhon unu cusumun tsaoni a murannoashu uaicaiton niaifoan facu shomayatón fuchishon ihuini ahuun facucoin cuscara inon. Ascanshon pushconi.

²² Ascatan Egipciofoan tapiafo cuscan Moisés yosinifo. Fasi ahuun mapo shara. Egipciofoan tapini cuscan arifi tapiniquin. Ahuun tsainri cayacafi shara. Niaifo sharapan atiro cuscan arifi asca huapaoni.

²³ Ascan Moisés cuarenta fari aqui caano ahuun nomuran shinanni isca huaquin, “Un natian uhuun caifo nan Israelifo ato oin cai atohuunooa tapishquin,” ishon shinanni.

²⁴ Atoqui nocoshon nocofunu Egipción Israeli coshaiton oinni. Ahuun caifo numapauquin curushcain Egipcio coshaquin namani.

²⁵ Asca huatan ahuun nomuran shinanni “¡Aicho! Un aca cuscan uhuun caifoan nicacauquin tapitiro Diosin ua yonoo un ato numanon,” ishon shinanni. Anori shinanfiaino ahuun caifoanacai anori shinannifoma.

²⁶ Nan ifainaca shafatan oinpaquin oian ahuun caifo rafu sutunainfoan oinquin. Ato numapauquin, “Unucahuun. Manfin yorahuan tananquin. ¿Ahuuscaimun man sutunaincain?” ishon yoini.

²⁷ Ato numapafiaiton ahuun caifo futsan sutuaiton cumaquin chaca huani. “Mifin ihuu. Mincai ahuama. ¿Tsoan mia yonoamun min nocon niaifo inon min noco iquinon?

²⁸ ¿Min Egipcio nocofunu rutuita cuscan uarifi mian rutupaimun?” ishon yoini.

²⁹ Nicatan Moisés mai futsari ichoni. Nan mai Madián ano ichoni ato muran iyoni. Nannoshon ahuun facu furonanfacu rafu ani.

³⁰⁻³¹ Ascano cuarenta fari finoanno Diosin ahuun oinmati afu nai muran ica Moisésqui nichini. Nantianri Moisés machi ahuun anu Sinain chaimashta cani. Nanno pushu yamacain nii yamai. Fasi yafi chofo uhuapama fusti nanno. Nii cuyamamishti urufiainocai coonima. Moisés oinni. Oiainno mustairini. Ascan tapipai ahuuscain nii cuyamamishti urufiashuca

nocaima chaimashta cashon. Oinni nii cuyamamishti uruai muran Upa Diosin ahuun oi nicani.

³² “Unfin min shunicaifoan aton Diosiquin. Abraham non Isaac non Jacobori un aton Diosiran,” ishon yoini. Nicatan Moisés ratui taritarini. Afanan uru oinyamafiain aquri ratuni.

³³ “Unquian un nuno ica. Ahuara chaca ufu itiroma. Ascan min sapato pucahuu un mia yoinon.

³⁴ Uhuun yorafo Egipto ano omitsiscaí cuscan mun oian. Man pashapaiyaifoan mun nica. Ascan un fotoa ato caimashquin. Natian un mia Egipto ano afanan nichicai.”

³⁵ Nan Moisés nocon shunifoan a nicacasmanifo. “¿Tsoan mia yonoamun min nocon niaifo inon noco iquinshquin?” ishon yoifiafo Upa Diosin Moisés catonni nocon shunifoan aton niaifo inon ato numanon. Nan nii cuyamamishti uruai anoshon Upa Diosin Moisés afanan Egipto ano nichini nocon shunifo numanon.

³⁶ Nanno Dioshuunshon ahuarashta tsoan oinyomisima shara ato ismani yoran atiroma cuscan ato ismani. Unuhuan ahuun anu oshin anori tsoan atiroma cuscan Dioshuunshon ato ismani. Tsoan istaipamashon nanscasi huapaoni.

³⁷ Nocon shunifo Israelifo yoini “Chipo Upa Diosin nocofunu ua cuscara matoqui nichishquin. Nocon caifo ishquiquin. Inon pacoai cuscan mato yoishquin a nicasharacahuun,” ishon Moisés ato yoini.

³⁸ Moisés tsoan istaipama ano nocon shunifo fu ipaoni. Machi Sinain anoshon Diospan oinmati afu nai muran icaton a yoini cuscari nocon shunifo tapimani. Nan Diospan tsainman noco nimapacutiro ishon ato yoini.

³⁹ Yoifiaiton nocon shunifo Moisés nicacasmanifo. “Min nocon yonotiromaran,” ishon shinanni. Aton nomuran Egipto ano nasopaicani.

⁴⁰ Ahuun ochin Aarón yoinifo “Dios futsan cuscara noco rami huashohuun. Nanton noco tapimatiro non raqui caimancai. Moisés noco Egipto anoshon iyoafiacun ahua finoanmun noncai tapiama. Machi mamaqui inacun non afanan oianmaran,” ishon yoinifo.

⁴¹ Nantian Aarón ato moipan facu cahua shara ointsa rami huashoni aton Dios inon. “¡Aicho! Nan moipan facu cahua shara ointsa non rami huaa. Nan nocon Dios. Non ichananshotiro moi futsa rutushoshquin a fufori ratashoshquin nocoquin unimanon. ¡Aicho! Non rami huaa cuscan shararan,” ishon yoinifo.

⁴² Ascano Upa Diosin afanan atoquei unimanima. Ato potayoni “Ua afanan tanapaicanima. Ascacuncai un ato numaima. Aton diosicoinma ipaitsi aton nomuran shinantirofo. Fishifo ipaitsi shinantirofo aton diosiran,” ishon Diosin yoini. Nocon shuni Amós inonpacoí cuscan Diosin tsain yoimisi ini. Diosin atohuunoo yoini cuscan cununi isca huaquin,

“¿Man cuarenta fari pushu yamai ano cahuacacainnai ua yoina rutushon ua inanpaicani. Ahuara futsari ua inanpaicanimun?”

⁴³ Ma. Mancai maton nomuran ua shinancoianma. Man yoimisi isca huaquin, ‘Nocon dios Moloc yafi nan fishi Refán,’ man huamisi. Ahuara futsan man rami huashon. Noco diosiran man huamisi. Ascan un mato caifo futsa ano mato nichicai. Mato achinonfo aton yonomisifo man inon. Babilonia mai orima futsa ano fasi chai un mato nichicain.”

⁴⁴ Nocon shunifo tsoan icamano foanfainpaonifo pano pushu fonifo a muranshon Dios cufinifo atofu inon. Ascan man isma Upa Dios aton Dios aforifi ahuun yoraquin. Upa Diosin nocon shuni Moisés oinmani cuscan pano pushu onihuani.

⁴⁵ Ascatan fari ichapa finontan nocon shunifoan nan pano pushu fonifo. Nantianri aton niaifo ahuun anu Josué ato iyoni mai futsa finonfo. Diosihuunshon caifo futsafo nan mai anoafopotanito aton mai inon. Nan Josué niaifo taupaonino man fari ichapa finontan Davidrifi yositirofo pano pushu muran ichanapaoonifo Upa Dios cufishcaquin.

⁴⁶ Upa Diosin David fasi noi aquri unimaicoinni. David Upa Dios cufinquin yoini, “Upa Diosin, min nocon shuni Jacob ahuun Dios nocon Diosiri, un mia pushu futsa shara huashon. Ihui yafi toquiri pushu un mia onihuashopai a muran un non uhuun yorafo mifu inon mia cufishcaquin,” ishon yoini.

⁴⁷ Anori cufiaintan furun Salomón pushu huanshoni.

⁴⁸ Ascanfiacai Diosin yora pushu huaa muran itiroma. Diosin nai muran icanoshon nantifi finoncoian. Diosihuunshon nocon shunin inonpacoai cuscan yoini isca huaquin.

⁴⁹ “Nai muran un ica. Nannoshon un nantifi oni huati un iquini. Nan mairi un onihuani. Nai muranshon un mai oinfafainni. Nanri uhuuna. Nantifi onihuafoti nai murannoo yafi mai anoafoti uhuuna. ¿Ascan ahuuscashocon man ua pushu huashotiromun un a muran fusti inon futsa ano cayamashquin?”

⁵⁰ ¿Un nantifi onihuanimamun?” ishon Diosin yoini.

⁵¹ Manfin maton shunifo cuscaracoinquin. Fasi nicayosmashunifo. Upa Diosin tsain nicapaicoinanima. Man icoinra huacoinmisima. Diospan Yoshin Shara mato yoimisi cuscaai man nicacoinmisima.

⁵² Maton shunifoan nantifi Diosihuunshon inon pacoai yoimisifo man ato omitsiscamapaoni. Inonpacoai yoimisi futsafoan yoinifo, “Nocon Numamisi isharamisi nocoqui oshquiquin,” ishon yoipaonnifo. Nanfoanri nocon shunifo man rutunifo. Man yoinifo cuscan nocon Numamisi shara nocofiacun nanrifi man rutuafo.

⁵³ Upa Diosin ahuun oinmati afu nai muran icafo nichini ahuun tsain mato inanfiafocai man nicapaimaran, —ishon Esteban ato yoini.

Esteban nani cuscan

⁵⁴ Nicacani fasi fiishquunifo. Aqi sinacoinceni.

⁵⁵ Ascano Diospan Yoshin Shara Esteban rafuquinaino nai muran foisini Diosin chashamanaiton ointapaiquin oian Jesús Apa fu nia ini. Nan rafutan ahuamamishti huaifoan oinni.

⁵⁶ Oinshon yoini, —¡Oincapon! Un nai muran oin. Nanno Jesucristo Diospan furun nocoqui nichini afu nia. Un oinran, —ishon ato yoini.

⁵⁷ Nicacani aqi sinacoinceni. Mucanifo. Ahuun tsain nicacasmacani pafopomunifo. Aqi ichonifo.

⁵⁸ Achicashon pushurasi pasotainri sharafonifo. Aton sahuuti pucashon ointiaca ahuun anu Saulo nia naman machinifo. Ascacatan toquirifoan Esteban tsacaquin futsanifo.

⁵⁹ Toquirinin tsacaifoanno Esteban iscani, —Ifo Jesús, uhuun yoshin mi ari ihuihuun, —ishon yoini.

⁶⁰ Yoitan ratoconun mai chachishon oi ashcafinin yoini, —Ifon, ua chaca huafiafoan ato numahuu. Ato rau huahuun, —ishon yoini. Yoitan nani.

8

¹ Naacun Saulo ato yoini, —Manfin shara huaqui rutuaquin, —ato huani.

Saulo icoinra huafo omitsiscamani

Nan shafatanri icoinra huamafoan Jesús icoinra huafo Jerusalén anoshon fasi ato omitsisca huanifo. Ascano Judea ari non Samaria mai ariri pashcafainnifo. Nan doce Jesús fu rafumisifocai atofu fonifoma. Jerusalén ano nitunifo.

² Ascano nan Dios tanasharapaiyaifoan Esteban mai huanifo. Noicani fasi uainifo.

³ Ascantan Saulon Jesús icoinra huafo fasi ato noicasmani. Ato cuyopaiquin. Fasi ato omitsisca huani. Pushuti iquichahuacacaini ato achishon cunu muran iquimashquin. Ainfofo yafi nocofunufori ato asca huani.

Tsain shara Jesushuunoa Samaria anofo yoinifo

⁴ Ascatan nan Jerusalén anoashu pashcafainnifo. Diosin tsain Jesucristohuunoa ato yoifoanfafaini.

⁵ Nocofunun ahuun anu Felipe Samaria mai ano cani. Nanno pushurasi futsan anoshon ato Cristohuunoa yoini.

⁶ Yorahuanrasifoan nicanifo. Dioshuunshon tsoan atiroma cuscan ato ismani. Ascaiton oincani fasi nicapaicani aqi taisinifo.

⁷ Yoshin chacafo yorafomaquinoa potani. Atomaqui potaino fiisifainifo. Yoratishon charishi futsafo non chato chatotianifo Felipe Jesushuunshon ato caya huani.

⁸ Asca huano nantifi pushurasifoti unimacoinnifo.

⁹ Ascan nanno Samaria mai ano nocofunu ahuun anu Simón. Nanton yoshin chacahuunshon yoran atiroma cuscan huapaoni, —Tsoa futsacai ua cuscarama. Unfin fasi uhuapa sharaquin, —ishon cacapaimisiton yoini.

¹⁰ Ascano nantifi yorafoan nan niaifofo yafi yora ahuamafo a nicacoinnifoquin. —Nan nocofunu Simón fasi ahuamamishti huatiro. Diosihuunshon yora atiroma cuscan noco ismairan, —ishon yoinifo.

¹¹ Yoshin chacahuunshon yora atiroma cuscan huaiton oincaquin ahuamamishti acaiton nan fusti farí ranan tanannifo.

¹² Ascafiainfoan Felipe ato tsain shara Jesucristohuunoa yoiaiton Upa Diosin yorafo iquinai cuscan a icoinra huanifo. Icoinra huaifoan ato unu muran iquimacacuni. Nocofunufo yafi ainfofori iquimacacuni.

¹³ Nan Simón arifi icoinra huacun unu muran iquimani. Ascano Felipe Jesucristohuunshon ahuamamishti yoran atiroma cuscan huaiton oin fasi mustairini. Ascashon Simón Felipe mufoanfafainni acaiton oinquin.

¹⁴ Ascano Jesús fu rafumisifo doce Jerusalén anofoan Samaria anofo Diospan tsain icoinra huaifoan nicacaquin Pedro yafi Juan ato ari nichinifo.

¹⁵⁻¹⁶ Nococashon nan rafutan oian Samaria anoafoan nocon Ifo Jesús fusti icoinra huanifo. Ahuun Yoshin Sharahuunoa tapiataifoma. Ato iquinataima. Unu muran iquimapacuano Jesús fusti ifoancoinnifo.

¹⁷ Ascano Pedro futan Juanpan manmanyanan Upa Dios cufishonifo ahuun Yoshin Shara ato iquinon.

¹⁸⁻¹⁹ Jesús fu rafumisifo rafu Pedro futan Juanpan ato manmanni Diospan Yoshin Shara ato iquinaiton Simón oinni. Oinshon yoini isca huaquin, —Uarifi tapimahuun man aca cuscan un ratoran yora mayatashon Diospan Yoshin Shara ya un ato imanon. Man ua tapimacun un mato pui inanon, —ishon ato yoini.

²⁰ —Ma. Min shinan raca non puihuushon Diosin noco inanpaiyai cuscan non fitiro. Anorimafinquin. Ascano minfin min pui ya min maicain.

²¹ Min nomuran min Diosihuunoa shinansharama. Ascacucain non Dios yonoshonai cuscan min no futan atiroma.

²²⁻²³ Min nomuran min shinanchaca cuscan mun onan. Mincai Diospan yonomisifoan atiro cuscan min atiroma. Ascan min chaca mimuran fospicoian. Chaca min ifo. Ascan nocon Ifo Jesús cufihuun min nomuran min shinanchaca cuscan rau huanon, —ishon Pedron yoini.

²⁴ —Ua Ifo Jesús cufishohuun min ua yoia cuscan ua Diosin onaintimanonma, —ishon Simón cumani.

²⁵ Ascatan Pedro futan Juanpan Samaria anoafo nocon Ifo Jesús tsain ato yoicatan Jerusalén ano nasofainifo. Focaquin pushurasifo ano ato tsain shara Jesushuunoa yoi-fonifo.

Felipe yafi Etiopía niaifo patashari

²⁶ Nantianri nocon Ifo Jesús ahuun oinmati afu nai muran icaton Felipe yoini, —Na fai tapiaquiri nii yamai Jerusalén yafi Gaza nushmancayan catahuun, —huani.

²⁷ Caquin nocofunu Etiopía anoa oaiton oinni. Nan nocofunun ahuun caifo aton niaifo patashari. Ahuun niaifoncoin ainfoan. Ahuun caifo aton pui cushushomisi iniquin. Jerusalén anoshon catani Upa Dios cufitani.

²⁸ Nasocurani oi ahuun inapan aya ninifoaino ahuun taramuti chinutamuashu cayacafi cani. Tsaoshon Diospan tsain Isaías cununi cuscan oinfony aya caino.

²⁹ Oinfoicai Felipe fu noconanni. Noconanshon Diospan Yoshin Shara Felipe yoini, —A taramutiyaahuun aqoi catanhuun —huani.

³⁰ Aqoi ichotan nican Isaías nan inonpacoai Diosin tsain cununi cuscan anufoaiton. Nicaquin yocani, —¿Min oiain cuscan min tapiamun? —yocaiton.

³¹ —Ma ¿Ahuuscashorocon un tapiafin? ¿Tsoan ua yosiamaiton? —huaiton. Ahuun iyomisi nitumatan. —Mapuinifoanhuun. U fu tsaoinacahuahuun, —huani.

³² Mapuinifoantan oinni Isaías cununi cuscan oinquin. Cunuquin isca huani, “Nan chashoan iyoshon rututirofo cuscan arifi iyonifo rutushcaquin. Chashoanun facu ahuun rani shatuaifanno furoitiroma cuscarifiai arifi pusinima.

³³ Rafini huanifo ahua chaca huaa nicayamafiashon niaiffoan numapainifoma. Numatamarocon rutunifo. Chaca huacoinnifo cuscacai non cainmatiroma, tsoancai atirifi noco tapimatiromaran,” ishon Isaías cununi cuscan oinni.

³⁴ Ascashon Felipe yocani, —¿Isaías cununi cuscan ahuunoa cununi iyamaraimun futsahuunoa cununi? Ua yoipun, —ishon Etiopía niaifo patashari yocaiton.

³⁵ Cumaquin, —Isaías Jesushuunoa cununiran, —ishon cumani. Nan tau huaquin yoiaiono Diospan tsain futsafori ismani a Jesushuunoa cununi. Diosin tsain shara ahuunoa oinmani.

³⁶ Caino atoquei unu noconi nocofunun etiope yoini, —Oinpon unu. ¿Mian na unu muran iquimatiromun un Jesús icoinra huacoinnai cuscan un ismanon? —ishon yocaiton.

³⁷ —Jesucriston Diospan Furun min ointi muran min icoinra huacoinnaiton un mia iquimatiromun, —ishon Felipe yoini.

³⁸ Asca huatan ahuun iyomisi nitun huani. Nitun huano Felipe fu fotocani unu muran iquimanon. Ascano iquimapacufoantan cainmani.

³⁹ Unu cusumun nocoafono Diosin ahuun Yoshin Sharapan mai futsari Felipe iyoriscatani. Nocofunun oinni Felipe yamariscatanaiton afanan oinnima. Ascafishu fasi unimai ahuun mai ari cani.

⁴⁰ Ascanrifiatan Felipe mai futsa ahuun anu Azoto ano nitariscani. Nanno yafi nantifi pushurasi Cesarea fai anori cashon tsain shara Jesushuunoa ato yoifoanfaini.

9

Saulo Jesús ifoanquin shinan futsacurfoanni

Hch 22.6-16; 26.12-18

¹⁻² Nantianri Saulo nantifi Jesús icoinra huafo rutupaiyai. —Un nantifi Jesús tanamisifo un rutuicain, —ishon yoini. Ascan Israeli aton yorafohuunshon Dios cufimisi niaifocoin ano cashon yoini, —Ua cunushohuun un nantifi ichananti pushu Damasco ano ismanon min ua yonoa un Jesús icoinra huafo nocofunufu non ainfori fuchishon Jerusalén ano un ato cunu muran iquimanon, —ishon yoini.

³ Ascanofin Jerusalén anoashu cai Damasco ano nocoti chaima samamashta nai arishon chashatanaino pacuni.

⁴ Pacuquin ahuun oi nicani, —Saulo, Saulo, ¿Ahuuscaquimun mian omitsisca huaiquin? —huaiton.

⁵ —Ifon, ¿Minmun tsoaquin? —ishon yocaiton. —Unquian Jesús. Mian omitsisca huai.

⁶ Funiuu. Pushurasi Damasco ano catashquin nannoshon min ahua huaimancain un mia yoinon, —huani.

⁷ Yoiaino afu foafo puusinifoma. Ahuun oi nicafiaquin tsoan oinnifoma.

⁸ Saulo funinaca huapai fushoacucahuaiton mutsoinifoannifo. Ascashon Damasco ano iyonifo.

⁹ Nannoshon osha rafu non fustitan oinyamafain ayayamafain piqui tununi.

¹⁰ Asca huatan nanno Damasco ano Jesús tanamisi futsan ahuun anu Ananías namapan cuscara Jesús yoini, —Ananías, —huaiton —Unquian, Ifon, —huaiton.

¹¹ —Fai Cayacafiran huamisifohuun catahuun. Ari cai Judaspan pushu ano catahuun. Nocoshon min ato yocatiro nocofunu Saulo Tarso anoashu cainni nanno pushu muranquin. Nannoshon Saulo ua cufinquin.

¹² Ahuun namapan cuscara mia oian min manmainno afanan oinsharanon, —huaiton.

¹³ —Ifon, tsain ichapa ahuunua mun nicamisi. Nantonfin mia icoinra huafo Jerusalén anoafo ato chaca huamisiquin.

¹⁴ Natianri mun nica Jerusalén anoashu nuno oi. Nocon yorahuunshon Dios cufimisi niaifofoan a yonoa nantifi mia icoinra huafo cunu muran iquimaniran, —huaiton.

¹⁵ Yoifiaiton, —Un mia yoia cuscan catahuun. Un na nocofunu catoan Israelifoma non aton niaifofo non Israeliforifi uhuunua ato yoinon.

¹⁶ Uhuunoashu fasi omitsisca un oinmacoinshquiran, —ishon yoini.

¹⁷ Ascatan nicafainicai Ananías cani. Cai pushu muran iquini. Iquicain Saulo fuchitan manmantoshini. —Mun oa. Uhuun yorashan, min fain oquin nocon Ifo Jesús oian. Nanton ua nichin min afanan oinsharafain ahuun Yoshin Sharapan mia iquinan, —ishon yoini.

¹⁸ Yoiaino ahuun furo murannoashu pusu cuscara fupacumuni. Ascashon oinsharacufaini. Ascatafin Jesús icoinra huashu unu muran iquitan funinaca huaniquin.

¹⁹ Iquitan cainnacahuan pini. Pitan muacai afanan shaca fuanima. Ascatan mutsisinacahuani. Shafa ranan Jesús tanamisifo fu Damasco ano iyoni.

Saulo Damasco anoshon ato yosini

²⁰ Anoashu ichananti pushu ano nocoshon ato yoini isca huaquin, —Jesús Diospan Furunquin, —ishon ato yoini.

²¹ Nicacani mustairinifo. —Ahuuscaquitsi Jerusalén anoa Jesús tanamisifo ato chaca huafain. Nunoari ahuun tanamisifo munushushon nocon yorafohuunshon Dios cufimisi niaifofoqui ano iyonon natianrifi, “Jesús Diospan Furunquin” noco huaiquin, —icashu yoinannifo.

²² Ascano Saulo Jesushuunua fasi tapiquin finacoinni. Ahuun curushu Jesús inanni ahuunua ato yoinon. Ascan cayacaficoan ato yoini, —Jesús Diospan Furun nocoqui nichiniran, —ishon tsoa futsacai anori yoiaiton nicayomisifoma. Ascaiton shinancaquin, —¿Ahuuscashocaicon na nocofunun tapicoianmun? —ishon ahuun caifoan Israelifoan shinnannifo.

Saulo ato rashquimafainni

²³ Ascano shafa rananun ichananshon Israelifoan shinanpainifo ahuuscashomain Saulo rutumatirofoquin.

²⁴ Ascano futsan Saulo yoini, —Mia rutupaicaniran —ishon tapimani. Yonoafono shafatishon yafi yamutishon cushushinifo Saulo oaiton rutushcaquin. Pushurasi aton caincaiti anoshon cushunifo.

²⁵ Asca Saulo caicuranaiton rutupaifiaifoanno fomancayan pochinin tshuu anori futanmanhuan muran nanushon yamutan tanamisifoan fotomapacufoannifo.

Saulo Jerusalén ano ini

²⁶ Fotomafo Jerusalén ano caní Jesús tanamisifo fu iquicai. Iquicafaiton aquí musunifo. —Nacai Jesús tanamisicoimaran, —icashu yoinannifo.

²⁷ Ascafiaino Bernabé icoinra huacoinni Saulo tanasharacun. Ascashon Jesús fu rafu-misifo doce ano yoni ahuunoa shara ato tapimanon. —Damasco fain caquin Saulo ano caiton nocon Ifo Jesús oian. Ascano Damasco anoshon noco Ifohuunoa ranotama ato yoifafainiran, —ishon ato yoini.

²⁸ Nicacaquin icoinra huanifo Saulo atofu Jesús tanamisi ica. Ascano atofu iyopaoni. Jerusalén anoafori ranotama nocon Ifo Jesushuunoa ato yoini.

²⁹ Ahuun caifo Israelifofashon Griego tsain tapinifo ato Jesushuunoa yoiaino fochish-manantanannifo. Ascashon a rutupainifo.

³⁰ Nannori Jesús icoinra huafoan nicacatan Cesarea ano iyonifo. Anoshon Tarso ano nichinifo.

³¹ Ascaino Jesús icoinra huafoan Judea anoafon Galilea anoafon Samaria anoafori isharanifo. Nantian tsoan ato omitsiscamanima. Diospan Yoshin Sharapan ato mutsis-mana Jesús tanasharashu aton nomuran fupi huamani. Nanscaino paratamafain Jesús icoinra huanifo. Icoinra huacashon Dios nicasharapainifo.

Eneas caya huamani cuscan

³² Nantianri Pedronun ato yosifoanfaini. Icoinra huafo Lida anori oinmitsai caní.

³³ Nannoa nocofunu ahuun anu Eneas fuchini. Charishi futsua ini. Ocho fari aquí caa funitiroma ini.

³⁴ Fuchishon Pedronun yoini, —Eneas, Jesucristo mia caya huamaquin. Funihuu min oshati shara huahuu, —ishon yoini. Asca huaino samamashta funina cahuani.

³⁵ Nantifi Lida anoafon Sarón anoafonanri oincashon nocon Ifo Jesús icoinra huanifo.

Dorcas man nacoinfiacun Jesushuunshon Pedro funini

³⁶ Ascatan Jope mai futsari ano ainfo ahuun anu Dorcas ica. Ahuun anu futsa Tabita. Nan ainfo Jesús tanasharamisi. Shara huamisi ahuomafori ashomisi.

³⁷ Nantianri isinin ipapacuhuanashu naani. Nacun rashucashon pushu fomancayan ratanifo.

³⁸ Ascano Jesús tanamisifoan nicafo Pedro Lida chaimanoa. Nicacaquin yora rafu Pedroqui nichinifo yoinon, —Oinrisca huayonon, —Pedro huanifo.

³⁹ Nicatan atofu caní. Nococatan pushu fomancayan mapufainifo. Nanno ainfo funuo-mafo uainifo. —Oinpon. Nocon yora yamashtan nocon sahuutifo icushushomisi. Niyoshon noco shara huamisan, —icashu uaiquin Pedro yoinifo.

⁴⁰ —Chifi cainfaintacahuun, —Pedronun ato huani. Foainfono ratoconun mai chachipacufoantan Dios cufini. Ainfo yamashta oinquin yoini, —Tabitan, funinaca huahuun, —huaino. Fupuinacahuatan Pedro oinni. Ointan tsaoinacahuani.

⁴¹ Ascaitan Pedronun mutsoinifoanni. Mutsoinifoantan Jesús tanamisifo yafi funuo-mafo cunani Tabita man funia ato oinmashquin.

⁴² Oincani nantifi yorafo Jope ano chanifoanfainifo. Ascaitan nicacani yora icha-foan nocon Ifo Jesús icoinra huanifo.

⁴³ Ascatan Pedro Jope pushurasi ano nituyoni. Nocofunun ahuun anu Simón nan fichi shinan huamisi ahuun pushu muran yoni.

10

Pedro yafi Cornelio

¹ Nantianri nocofunun ahuun anu Cornelio mai futsa Cesarea ano ini. Afin ranushu-mafoan aton niaifo. Nan ranushumuafoan anumisi —Italianoran, —huamisifo.

² A non ahuun yorafori Diosquiri shinansharamisifo. Nocofunu fasi shara. Ahuomafo ato inanmisi. Dios cuffafainmisi.

³ Ascan shafa futsan fari nai pochinin racano oshashoma namapan cuscara Diospan oinmati afu nai muran ica aquí oaiton oinni, —Cornelion, —huaiton.

⁴ Fasi ratucoinquin oinni, —¿Ahua min ua yoipaimun Ifon? —huaiton. —Diosin mia oian min shafatifi cufiainton min yora ahuuomafo pui inanmisi.

⁵⁻⁶ Ascan nocofunufo Jope ano nichihuun. Nanno nocofunu Simón ahuun anu futsa Pedro ihuion. Nan fichi shinan huamisi ahuun anuri Simón ahuun pushu muran ica. Ahuun pushu unuhuan cusumunriran, —ishon Diosin nai oinmatinin yoini.

⁷ Yoitan amaquinoashu caní. Ascan Cornelio ahuun oinmati rafu non ranushumua ahuun cushumisi nanton Dios shinanmisi cunani.

⁸ Diospan nai oinmatinin yoia cuscan nantifi ato tapimani. Tapimashon ato Jope ano nichini.

⁹ Ascan iyoconaino fari masafinin racano Jope chaimashta noconifo. Nantianri Pedron pushu manmancaya cashon Upa Dios cufi caicani.

¹⁰ Fonaincaiton futsan pichashoni. Pichanqui anaitiataima Pedron oshashoma nama-pan cuscara ahuara futsa oinni.

¹¹ Nai fupuicano pano putanmanhuan cushtocoin nai murannoashu fotopacucahuani.

¹² A muran yoina futsa futsatapafo non ronofu non mai ano sharatirofo non puiafori.

¹³ Oinquin ahuun oi nica isca huani, —Pedron, funihuu. Rutushon piishquin, —huaiton.

¹⁴ —Ma, Ifon. Ascaracai un pimisima. Moisés noco yononi na cuscara non pitiroma. Suya chacaran, —huaiton.

¹⁵ Afanan ahuun oi nica, —Diosin na cuscarafu imashara. Ascan afanan nan chacaran huayamahuu, —huani.

¹⁶ Rafu non fusti nanscaracoin oinni. Ahuun unutaqui afanan nan pano putanmanhuan nai muran cani.

¹⁷ Ascano Pedronun ahuun nomuran fasi shinanpaini, —¿Ahuu ua Diosin yoipaimun? —ishon shinanni. Anori shinanquin nan nocofunufu Cornelio nichian Simón pushu caincaiti ano nococashon yocanifo.

¹⁸ —¿Nocofunu Simón ahuun anu futsan Pedro nunomun? —ishon yocanifo.

¹⁹ Nantianri Pedro namapan cuscara shinainno Diospan Yoshinin yoini, —Nocofunu rafu non fustiton mia funai fuaforan. Un ato miqúi nichian. Ascan shinanchacayamahuu.

²⁰ Fotopacucahuatan atofu catahuun, —huani.

²¹ Ascaino Pedro atoqui fotoni. —¿Man ua funai fuamun? ¿Ahuuscaquimun man ua funaicai? —huaiton.

²² —Nocon niaifo ranushumuaton noco nichian non mia ihuunon. Nanton nocofunu shara. Diosquiri shinanfafaimisi. Cornelio nocofunu shararan min caifo Israelifohan huamisifo. Diospan oinmati sharapan afu nai muran icaton yonoa, “Pedro min pushu ano ihuitahuun mia yoisharanon,” ishon yoitan. Ascan “Ua ihuishotacahuun,” noco huaiton. Non mia ihui oaquin —huanifo.

²³ Nicaquin, —Iqui fucahuun. Non pinon. Nuno oshayoshcaquin, —ishon Pedro ato yoini. Iyoco futsaino atofu cani. Icoinra huafu Jope anoafori atofu fonifo.

²⁴ Focanashu iyocofutsaino Cesarea ano noconifo. Nannoshon Cornelio ato cunano ahuun yorafo ahuun pushu ano ichanannifo Pedro manacani.

²⁵ Pedro pushu muran iquiano Cornelion fuopacucahuatan, —Min fasi shararan —ishon yoini.

²⁶ —Funihuu. Uncai Diosimafinquin. Urifi un nocofunuquin. Min icai cuscarifiai un nocofunuquin, —huani.

²⁷ A fu tsainquincai cunu futsan muran caashon yorafo ichanancashon manacaquin oinni.

²⁸ Ato yoini, —Man man tapian nocon shunifohan yonoa non Israelifoma fu rafutiroma. Non matofu oinmitsatiromaran, ishon noco yoini. Ascafiacun uhuun namapan cuscara Upa Diosin ua tapimaita un tsoahuunoa shinanchacatiroma. Atofin nantifi manifoannati noicoquin.

²⁹ Man ua iyopaiyai nocai un cacasmama. Ascataमारocon un samamashta oa. Natian un tapipai ahuuscaquimain man ua ihuipaiquin, —ishon Pedro yoiaiton.

³⁰ Cornelion cumani, —Osha rafu non rafuri finontan nantianri un Upa Dios cufiaino nocofunu ahuun sahuuti chashaino uqui niriscatana.

³¹ “Cornelion, min cufiain cuscan Upa Dios nica. Min ahuuomafo inainton oian.

³² Ascashon nocofunufu Jope ano nichihuun Simón miqúi ihuunon. Ahuun anu futsa Pedro. Simón futsan nanton fichi shinan huamisi ahuun pushu muran ica. Ahuun pushu unuhuan cusumunri icaran” ishon ua yoita.

³³ Ascano un samamashta nocofunufu nichian mia ihuunonfo. ¡Aicho min noco shara huaa! Samamashta min nocoqui oa. Ascashon man non ichanan nocon Ifon minhuunshon noco yoipaiyai cuscan nantifi non nicanon, —ishon Cornelion yoiaiton.

Pedronun Cornelio pushu muran icafo ato yoini

³⁴ Ascaiton Pedronun nishon yoini, —Nantian mun tapia iconquin. Upa Diosin nantifi yorafo nan manifoti anoafo noicoian. Upa Diosincai toon huatan noima nanscasi huaquin noicoian.

³⁵ Manifoti ahuun tsain nicapaicani shara huan tananmisifofin Upa Diosin ahuun facufo itirofoquin.

³⁶ Diospan Furun Jesucristo manifoti anoafoan aton Ifo. Ahuunshon Upa Diosin afanan noco onaintimaima. Man nicaino fasi unimacoincaquin. Nannori Upa Diosin uhuun caifo Israelifo tapimani.

³⁷ Judea mai anoa ica cuscan man man nicamisi Galilea ano ato yoiquin tauhuani. “Maton chaca shatucahuun Dios icoinra huacahuun un mato unu muran iquimanon,” ishon Juanpan ato yoini.

³⁸ Ascan man man nicamisi Juan cachiori Jesús oni. Upa Diosin ahuun Furun Jesús ahuun Yoshin Shara nichian afu rafunon ahuunshon ahuamamishti yora atiroma cuscan anon. Ahuara sharafo huafoanfaini. Upa Diosin afu imisi nantifi yora yoshin chaca ato yonoaiton atomaquinoa potani.

³⁹ Nantifi nan aca cuscan uhuun caifo Israelifo mai anoa yafi Jerusalén anori man non oinmisi. Ihui coyau iquinganqui mastayamuafu.

⁴⁰ Asca huafiafo osha rafu non fustitan Upa Diosin mai murannoa funimaita noco oinmana.

⁴¹ Atirifoancai oinyamuama. Ratoranfo nan Upa Diosin catoanfoansi oinyamuafu. Mai murannoa funiano non a futan pifain ayayamua.

⁴² “Manifoti anoafu uhuunoo ato yoitacahuun. Upa Diosin ua catonni nantifi yorafoti nan niafo nan naafori un ato yoitiro ratofomain un icano nipatiro iyamarai omitsiscapanaca muran focanicain. Ato yoifoanfaincahuun,” Jesús noco huayamua.

⁴³ Diosin tsain yoishomisiko isca huani ahuunoo cununifo. “Tsoan a icoinra huacun ahuunshon Upa Diosin aton chaca soatiro rau huanon,” ishon cununifo. —Pedronun ato yoini.

Israelimafoan Diospan Yoshin Shara finifo

⁴⁴ Yoiaifono nantifi ahuun tsain nicaimisifo Diosin ahuun Yoshin Sharapan ato muran nanucoinni.

⁴⁵⁻⁴⁶ Ascano anori tsain nicayamafiamisishacaquin Diosin Yoshin Sharahuunooashu tsain futsanman igui futsunifo. Ascaifono nicacani Israelifoan nan icoinra huafo nanno mustairinifo. —¡Aira! Nan yorafo nocon caifomafiashu Upa Diosin ahuun Yoshin Shara atoti nanumanaran, —ishon yoinifo. Ascano Pedron ato yoini.

⁴⁷ —Non Diospan Yoshin Shara fia cuscan afoanrifi fiafo. ¿Ascan ahuuscaimun unu muran iquimamutiromaquin? —ishon Pedro yoini.

⁴⁸ Ascano, —Jesucristo icoinra huafo ato unu muran iquimapacucahuun, —ato huani. Ascatan, —No fu iyopun, —Pedro huanifo.

11

Pedronun icoinra huafo Jerusalén ano ato tapimani

¹ Ascano Jesús fu rafumisifo doce non icoinra huafo anoafanri nicanifo Israeli anoamafoanri Diospan tsain icoinra huanifo.

²⁻³ Ascano Pedro Jerusalén ano noconi ahuun caifo nan Israelifoan aqui tsain curushu yoinifo, —Min mani futsa muran cashon aton pushu muran iquia ato futan min piaran, —ishon yoinifo.

⁴ Ascan nantifi ahuaa finoan cuscan ato shafacafi yoiquin isca huani.

⁵ —Un Jope anoshon Dios cufiaino namapan cuscara un oian. Panomanhuan ronoashu nai murannoashu uqui fotoaiton un oian.

⁶ A muran yoina futsa futsatapafo non shafo cuscara mai ano sharatiofo non puiyafori mun oian.

⁷ Un oiainno un ahuun oi un nica ua yoia, “Funihuu. Rutushon piishquin,” ua huua.

⁸ “Ma, Ifon. Uncai ahua chaca pitiroa. Moisés noco shunifo yononi cuscacai na cuscara non pitiroa. Ascan afocai un pimisima,” huani.

⁹ Nai muranshon afanan ua yoia, “Nan Diosin shararan huaafin nan sharaquin. Acai sharaman min huatiroma,” ua huua.

¹⁰ Nai murannoashu panomanhuan fotoi rafu non fustia. Ascatan afanan nai muran caa.

¹¹ Nantianri nocofunu rafu non fusti Cesarea anoashu pushu ano nocofo.

¹² Ascano Diospan Yoshin Sharapan, “Min caifoyamafiacun shinanchacayamahuu. Natian atofu catahuun,” ua huua. No futan icoinra huafo seis ufu foafo. Non Cornelio pushu muran iquia.

¹³ “Uhuun pushu muran Diospan oinmati afu nai muran ica uqui nocoita. ‘Min yorafo Jope ano nichihuun Simón ahuun anu futsan Pedro miqui ihuunon.

¹⁴ Aafin mia tsain shara yoinon. Ahuun tsain nicaino min non min yorafori Dios fu nipatiroran,’ ishon ua huaitaran,” ishon Cornelio ua yoita.

¹⁵ Un ato yoiafano Diospan Yoshin Shara nocoqui nocoyamua cuscan atoquiri noco.

¹⁶ Ascano nocon Ifo Jesús noco yoini cuscan un shinanpacutana, “Juanpan mato unu muran iquimapacuni maton chaca shatushon man oinmanon. Ascfia Upa Diosin ahuun

Yoshin Shara matoqui nichishquin mato ya imapacun,” ishon noco yoini cuscan uhuun nomuranshon un shinan.

¹⁷ Upa Diosin ahuun Yoshin Shara noco inanni cuscan atorifi inainta. Ascacunain ahuuscaquin “Ato inainyamahuu” un Diosin huatiroma. Uncai anori yoitiroma, –ishon Pedron ato yoini.

¹⁸ A nicacashocai afanan tsoan –Min aca cuscan afanan huayamahuu, –huanifoma. Ascatarocon, –¡Aicho Upa Dios sharan! Nocon caifomari ato shinan futsamana afu nipanonfo, –ishon yoinifo.

Icoindra huaafo Antioquia ano ichanannifo

¹⁹ Ascano Esteban rutuaifotian ato omitsiscamaifoanno Jesús icoindra huaafo pash-cafaifafainifo. Atirifi Fenicia ano foaino atirifi Chipre ano foaino atirifiri Antioquia ano fonifo. Nococashon aton caifo Israelifo fusti tsain shara Jesushuunoo yoifoanfainifo.

²⁰ Ascafiacanashu atirifi Chipre yafi Cirene anoashu Antioquia ano fonifo. Tsain shara Jesucristohuunoo Israelifomari yoifocani.

²¹ Upa Diosin ahuun Yoshin Shara atofu ini. Aton tsainhuunshon Israelimafoan ichapar-asiton nocon Ifo icoindra huanifo.

²² Ascano Jesús icoindra huafo Jerusalén ano nicacaquin Bernabé Antioquia anoshon nichinifo.

²³ Nocoshon Diosin ato shara huaa cuscan atohuun ramapaiyaiton oinni. Oin ahuun nomuran fasi unimani. –¡Aicho! Natian man Jesús icoindra huaa. Ascan nocon Ifo tanasharacahuun. Maton nomuran ahua futsa shinanyamacahuun, –ato huani.

²⁴ Nan Bernabé nocofunu fasi shara. Diospan Yoshin Sharapan rafuquimisi. Fasi Jesús icoindra huani. Ascacufin ahuunshon yora ichapafoan nocon Ifo Jesús icoindra huanifoquin.

²⁵ Ascatan chipo Bernabé Antioquia anoashu Tarso ano cani Saulo funaicai.

²⁶ Aquí nocoshon Antioquia ano ihuuni. Ascano nanno fari fusti nan rafu Jesús icoindra huafo ichapa fu ichanannifo ato Diosin tsain tapimanifo. Antioquia ano Jesús tanamisifo ato anu futsaqui tau huanifo, –Cristoforan –ishon ato anunifo.

²⁷ Ascaino nantianri Diosin tsain inon pacoai cuscan yoimisifo Jerusalén anoashu Antioquia ano funifo.

²⁸ Ascan icoindra huafo ichanancanashu ato nicapai futsan ahuun anu Agabo Diospan Yoshin Sharahuunshon ato yoini isca huaquin, –Nantifi maitio Romanofoan ato yonoafo tushu cuyoiran, –ishon ato yoini. Icon nan Romano Claudio niaifotian tushu cuyocoinni.

²⁹ Nicacatan icoindra huafo Antioquia anofoan pui ichanan huacashon icoindra huafo Judea mai ano yopafoan fomanonfo. Nan inainton inannifo.

³⁰ Asca huacatan Bernabé yafi Saulo inannifo Jerusalén ano fomanonfo. Nanno Jesús tanamisifo aton niaifofo inanno pashcananfo.

12

Santiago rutufain Pedro cunu muran iquimanifo cuscan

¹ Ascatapaiyaino Herodes niaifoan atirifi Jesús icoindra huamisifo achimani cunu muran iquimashquin ato omitsiscamanon.

² Ascashon Juanpan iyoa Santiagori achimani nopun tushtunon.

³ Tushtumana nicai Israelifo aqui unimanifo. Ascanori Israelifoan aton fuusititian ahuun anu misi farashati maisi pimisiforan huanifo nantianri Herodes yonocun Pedro achinifo.

⁴ Achimashon cunu muran iquimani. Ascashon ranushumua dieciseis cushuriapaonifo. Nantianri Israelifoan aton fuusititian Diosin nai oinmatinin aton shunifoan facu iyoafo-fosi finonmani shinanshcaquin. –Nan fuusititian cuyoano un Pedro cunu murannoo cainmayoshquin ahuun caifoan oinonfo. Ascano un yoishquin nanton chaca huaquin rutucahuun un ato huashquinran, –ishon Herodes shinanniquin.

⁵ Ascano Pedro cunu muran iquimanaiton Jesús icoindra huafoan fasi Upa Dios cufishon-ifo.

Diosin cunu murannoo Pedro cainmani

⁶ Herodes iyoco futsaino Pedro rutupai. Nan yamutan Pedro fasi osha murancoian ini. Cunopan munushushon ocuma rafutan ranushumu rafushon aton mucu rafuqui nushashon cushushinifo. Atiri ranushumuafo ahuun cunu caincaiti anoshon cushushi-naifoanno.

⁷ Ascantapaiyaino Diosin ahuun oinmati afu nai muran ica cunu muran niriscatani. Faquishfiashu punariscatani. Ascaino Pedro moimpaiquin pipasni, –Funiriscahuun, –huaino ahuun cuno mupucumuriscatani.

⁸ Ascashon, —Min sahuuti yafi min sapato sahuufain min nanushumutinin nanushu-muhuu ufu cashquin, —ishon Diosin oinmati afu nai muran icaton Pedro yoini.

⁹ Ascaino cunu murannoashu afu caicainni. Caicainquin ahuun nomuran shinanni, —Uncai cacoinnima. Uhuun namapan raca un caicatin, —ishon shinanni.

¹⁰ Ascanshu cunu rafu mapai cainni. Ranushumua cushuafo finonfaini. Ascatan ahuun cuno fupoti ano nococaquin oian man fupucua ini. Ascaino cainnacahuatan fai tanafainifo. Chaimashta afu catan Diosin oinmati afu nai muran ica amaqui yamariscatani.

¹¹ Ascaino Pedronun shinanni, —Iconfinquin. Uhuun Ifo Jesús ahuun oinmati nai muran-shon ua nichian ua numaquin. Herodes yafi uhuun caifo Israelifoan ua rutupaifiafoan ua numaran, —ishon ahuun nomuran shinanni.

¹² Ahuun nomuran tapicoinfaini cani Diosin ashoan cuscan. María pushu ano cani. Nan María ahuun facu Juan. Ahuun anu futsan Marcos ini. Nanno yora ichapa ichanancashon Upa Dios cufiaifono.

¹³ Caincainni ano nocotan Pedronun cunu fupoti tooto huani. Ascaino oinmati shomaya ahuun anu Rode fupoti ano caquin.

¹⁴ Pedro ahuun tsain onantan fasi unimacoinquin samamashta nasocain ato chani huani. Cunu fupuyotama. —Pedro man oashu. Caincainni ano niaran, —ishon ato yoini.

¹⁵ —Ma. Mimun nison, —huaifoan. —Ma. Nancoinfinquin, —iriani. —Man rutuafoano ahuun oinmati Diosfu imisi nocoqui oaran, —ishon shinannifo.

¹⁶ Ascafiainfono afi Pedronun tooto huariani. Fupuacufoan oianfo nancoin ini. Fasi mustairinifo.

¹⁷ Fasi tsaincaifoan, —Tsainyamacahuun. Nocon Ifoan ua cunu murannoa caimana cuscan un mato tapimanon, —ato huani. —Un mato yoiái cuscan Santiago yafi nocon yora a futan icoinra huamisisifo ato yoitacahuun, —ato huani. Yoitan pushu futsa ari cani.

¹⁸ Ascatan man shafaino Pedro yamaino fuchicanashu ranushumuafoan fasi mucanifo. —¿Ahuuscashucon Pedro yamaimun? —icashu yoinannifo.

¹⁹ Herodes nicatan, —Funariscahuun, —ahuun ranushumuafo huani. Fuchiyamaifoan Herodes cushumisifo fasi yocariani. Tsoancai tapinima raquimain Pedro caquin. Ascaton ranushumua futsafo ato yononi a nantifi nan cushumisifo rutunonfo. Ascano Herodes Judea anoashu Cesarea ano cani. Nanno osha rananni.

Herodes niaifo nani cuscan

²⁰ Nantianri Tiro anoafu yafi Sidón anoafuqui Herodes atoqui sinacoinni. Ascafiaino rau huapaicani aficoín aqui fonifo yoisharapaicani. Herodes ahuun oinmatinin ahuun anu Blasto yoiái cuscan fasi icoinra huani. Ascano yoicaquin, —Blaston, niaifon Herodes noco yoishohuun non afu tsainon. Nocoqui sinaquin. Non afu ipaisharaicai afanan nocoqui sinanonma. Nocoqui sinaquin ahuun yorafo yonotiroquin afanan noco tushu yafi non yopai cuscan noco inanonma, —ishon Tiro anoafu non Sidón anoafonri Blasto yoini. Nicatan yoiáifo cuscan ahuun niaifo tapimani.

²¹ Ascaiton, —Ato yoihuu un samamashta atofu tsainnon, —ishon yoini. Chipu aqui funifo. Sahuuti sharacapacoin niaifoan sahuumisi cuscara sahuuashu tsaon ini. Ahuun tsaoti ano tsaoni ato yoishquin. Tsain ichapa ato yoini.

²² Yoiquin anaititapaiyaino nantiffain oi ashcafinin isca huanifo, —Nacai nocofunuma. Nafin Dioscoinqin. Diosin ahuun oi cuscaracoinran, —ishon yoinifo.

²³ Herodescai, —Un Diosinma. Dios fustifin shararan, —inima. Asca huaifoannocai Diosin oinmatinin afu nai muran ica yonoa isinin imariscatani. Noinmanhuarasi ahuun shaqui muran fospitanaino nariscani.

²⁴ Ascafiaino Diospan tsain shara Jesushuunoa manifoti yoiacunifo. Paratama yorafoan icoinra huanifo.

²⁵ Ascaino Bernabé yafi Saulo icoinra huafo Jerusalén anoafu ato shara huani Jerusalén anoashu Antioquía ano nasofuranifo. Juan ahuun anu futsan Marcos arifi atofu cani.

13

Bernabé futan Saulo Diosin tsain yoiquin tau huani

¹ Ascatan Antioquía anoashu Jesús icoinra huafo ichananfafainifo. Atirifi Diosin tsain inonpacoai cuscan ato yofain. Atirifi ato yosipacunifo. Nanfo futsa Bernabé non Simón ahuun anu futsa Negro non Lucio nan Cirene yafi Manaén nan Herodes niaifo fu pushconi non Saulo.

² Ascan shafa futsaino nanfo ichananshon piqui tununifo nocon Ifo Jesús cuficani. Asca huaifono Diospan Yoshin Sharapan yoini, —Un Bernabé yafi Saulo catoan ua yonoshon-onfo. Ato cufishocahuun. Ascan un ato tapimatiro un ato yonomai cuscan, —ishon ato yoini.

³ Ascatan piqui tununifo Upa Dios cufinquin anaiticashon Bernabé yafi Saulo manmanshon cufishonifo. Ascashon ato nichinifo futsafo Diosin tsain yoitanonfo.

Bernabé yafi Saulo Chipre ano ini

⁴ Asca huatan Diospan Yoshin Shara ato Seleucia ano nichini. Anoashu shashon pocufainifo Chipre mai ano ocuma rafu unu tapia rafu nushmancayan mai mapaifainifo.

⁵ Nanno Salamina pushurasi ano noconifo. Nococatan Israelifoon aton ichananti pushu muran iquinifo ato Diospan tsain yoishquin. Juanpan ahuun anu futsa Marcos atofu cani. Ato futan ashoicai.

⁶ Nannoashu nantifi nan mai natoroti ocuma rafu unu tapiano foanfainifo. Ascano pushurasi ahuun anu Pafos ano noconifo. Nanno Israeli shointian Barjesusran, ishon anuniquin. Inaca cuscan yoipaifiaquin icon yoinima.

⁷ Nan niaifo Sergio Paulo fu imisi. Niaifoon ahuun mapo fasi shara. Shinansharamisi. Bernabé yafi Saulo nicapaiquin ato cunani Diospan tsain nicashquin.

⁸ Ascafia Barjesús ahuun anu futsan Elimas nan shointian ahuun niaifoon Diosin tsain nicatima huani, —Niaifo Sergio Paulo, nan Bernabé yafi Saulo aton tsain nicayamahuu. Mia amaquiri yoitiroquin, —ishon yoini.

⁹ Ascaiton Saulon ahuun anu futsa Pablo Diospan Yoshin Shara iquinano aasi oinquin yoini,

¹⁰ —Min nan yoshin chaca Satanás ahuun facu. Nan sharafoti min noicasmai. Minfin chanimisiquin. Min fuparapaimisi. Nocon Ifoan yorafa cayacafi tapimafiatiro afohuunoa min ato amaquiri yoimisi. ¿Ahuatian min unuimun?

¹¹ Natian nocon Ifoan mia onaintimai. Ipaitama min fusho acucahuani. Fari chashaino min afanan oinyoimaran, —ishon Pablonun yoini. Asca huatapaiyaino fushoriscatani. Ascashon cunacufaini, —Ua mutsoyopun ua iyoshquin, —ishon yoini.

¹² Ascaino niaifo mustairini nocon Ifoan tsain fasi curushcoin oin. Ascaiton oinquin arifi nocon ifo Jesús icoinra huani.

Pablo yafi Bernabé pushurasi ahuun anu Antioquía ano ini nan Antioquía Pisidia mai ano ini

¹³ Ascashu Pafos anoashu Pablo yafi afu rafuafoan unu pocufaini Panfilia mai mapaifainifo. Nanno pushurasi ahuun anu Perge ano noconifo. Nannoashu Juan Marcos atomaqui nituni. Nituuashu Jerusalén ano nasoni.

¹⁴ Perge anoashu Pablo yafi Bernabé Antioquía futsa ano fonifo. Nan Antioquía Pisidia muran ini. Nanno Israelifoon aton tunutitian ichananti pushu muran iquicanashu tsaonifo.

¹⁵ Moisés Diosin tsain cununi cuscan yafi inon pacoai yoimisifoon Diosin tsain cununi cuscan yoicatan niaifoon atori yoimanifo, —Nocon yoramishtichin, man nocon ointi fupi huamatiro noco yoicapun, —ato huanifo.

¹⁶ Ascatan Pablonun ninacahuan ato mushanshon yoini, —Uhuun yorafa Israelifo futan imafoon no futan Upa Dios cufipaiquin ua nicayocahuun unu mato yoisharanon.

¹⁷ Nonfin Israelifokuin. Upa Diosin nocon shunifo catonni ahuun yorafa inonfo. Egipto ano iyoshon ato shara huani. Ahuun curushhuunshon Egipto anoshon ato iyoni.

¹⁸ Tsoan istaipamashon cuarenta fari ato cushusharayopaoni.

¹⁹ Siete mani futsafo aton mai muranshon ato potani. Nocon shunifo inanni atona inon.

²⁰ Nocon shuni Abraham ahuun mai anoashu cainitian yafi nocon mai ano nocon shunifo funifotian cuatrocientos cincuenta fari finonni.

Ascano Diosin yononi nocon shunifo futsan nocon caifo aton niaifo inon. Samuel niaifoataima nocon shunifoon aton niaifofo ichaparasi iyopaoni. Samuel inonpacoai cuscan yoimisi ini.

²¹ Ascatan nocon shunifoon Samuel yoinifo, “Caifo futsa niaifo cuscara noco inanhuan,” huanifo. Ascano Diosin Cispan ahuun facu Saulo catonni aton niaifo inon. Aafin cuarenta fari Israelifoon aton niaifo ipaoniquin. Saulofin Benjamín ahuun funa iniquin.

²² Upa Diosin Saulo unumashon nocon shuni David tuqui huaniquin. Ahuunoa yoini isca huaqui, “Isaipan facu David ua noicoin. Uhuun ointi muran un fuchipaiyai cuscan arifi fuchipaiquin. Un yonoo cuscafin atiroquin,” ishon yoini.

²³ David ahuun funafo futsahuunshon Upa Diosin Jesús cainmani nocon numamisi inon. Noco yoiyoni cuscan Israelifo muran nocoqui nichini.

²⁴ Jesús nocon caifo Diosin tsain yoiataima Juanpan noco caifoti yoini isca huani, “Maton chaca shatucahuun. Ascano un mato unu muran iquimanon,” ishon ato yoini.

²⁵ Ahuun yono anaiticuantan Juanpan ato yocaquin, “¿Man shinanmun un tsoanquin? Uncai maton Numamisima. Ascafia Upa Diosin samamashta nocoqui ahuun Furun nichishquin. Ua fasi finoan. Un ahuun oinmati ipaiflashucaí Upa Diosin uhuun chaca soayamanocai un itiomaran,” ishon ato yoini.

²⁶ Uhuun yoramishtichin, manfin Abraham ahuun funafoquin. Uhuun caifomafashion Dios icoinra huatan marifi ua nicacahuun. Upa Diosin ahuun Furun nichini nocon Numamisi inon. Na tsain shara Jesushuunooa manifoti Upa Diosin yoipai.

²⁷ Diosin tsain inonpacoai yoimisifoan cununifo isca huaquin, “Nocon numamisi rutushcaniran,” ishon cununifo. Tunutitiansin na cunu noco yoifafaini. Ascafiacaí nocon Numamisi nocoano Jerusalén anoa icafo futan nocon niaifofanri a onannifoma. Ascan Diosin tsain inonpacoai yoimisifoan cununifo cuscan nansacoin huaquin. Nocon Numamisi Jesús rutunifo.

²⁸ Ahuashta chaca huaiton oianmafiaquin, “A rutucahuun,” niaifofa futan yorahuan-rasifoan Pilato huanifo.

²⁹ Ahuunooa nocon shunifoan cununi. Nantifi ahuunooa cununifo cuscan huacashon ihui coyán iquinanmaquinshon fotomashon mahua quini muran mai huanifo.

³⁰ Asca huafaintafo Upa Diosin mai murannooa funimani nipanon.

³¹ Ascano man samaño Galilea anoashu Jerusalén ano afu foafoan oinnifo. Nanfo ahuunooa natian nocon yorafo yoitiro.

³²⁻³³ Nan tsain shara ahuunooa non mato yoi. Upa Diosin nocon shunifo yoyoni cuscan nonfin aton funafoquin noco ashoan. Jesús funimana. Diosin tsain nan Salmo rafu yoini isca huaquin,

“Min uhuun facu. Natian un nantifi un ismai un mihuun noiai cuscan oinonfo un min Upacun,”

ishon cununi.

³⁴ Diosin ahuun Furun yoini cuscan Isaías inon pacoai cunuquin isca huani, “Ahuara shara tsoan oinyomisima un mia ashoshquin. Nannori un David yoyoni cuscan un mia inanon,”

ishon yoini. Ascan cununi cuscan Upa Diosin ashoni. Ahuun Furun naafiacun mai murannooa funimani afanan nanonma.

³⁵ Nanscara Diosin tsain futsan aqui cununi,

“Upa Diosin ahuun Facu shara cushusharani payocononma,”

ishon cununi.

³⁶ Davidhuunooacai cununima. Man non tapia Diosin yonomani cuscan David ahuun yorafo ashoquin. Anaititan naani. Ahuun shunifo maini ano arifi maini. Ascano ahuun caya payoconni.

³⁷ Ascafiacun Upa Diosin Furun funimayamua payocononma.

³⁸⁻³⁹ Ascacufin uhuun yoramishtichin, un mato tapimapai Jesushuunshon Upa Diosin nocon chaca soashotiro noco rau huanon. Nan mato yoi. Moisés noco yononi cuscaí nocon chaca soatiroma. Ascafiashu tsoan Jesús icoinra huaiton Upa Diosin ahuun chaca soashotiro.

⁴⁰ Oinfain nan inon pacoai yoimisifoan cununi cuscan man anonma.

⁴¹ “Nicapcon. Man niyochaín un ahuaara sharacoin mato ashoicain. Ahuaara un mato ashoai cuscan futsan mato yoiaton mancai icoinra huaima. Man yoishquin, ‘¿Cuu! ¿Tsoan na tsain icoinra huatiromun? Nonmaquian,’ ishon man yoishquin. ‘Ascan nanonquin,’”

—ishon Diospan tsain cununi.

⁴² Ascatan tsainqui anaititan ichananti pushu murannoashu Pablo yafi Bernabé fonifo. Focashon, —Man noco tapimapaiyai cuscan afanan tunuti futsaino no fu ichanancahuun noco afanan tapimashquin, —ishon yoinifo.

⁴³ Ascano nantifi ichananti pushu murannoashu fonifo. Israelifo yafi futsafoanri Upa Diosin tana cuscan afoanrifi tanapaicani atofu fonifo. Pablo yafi Bernabé mufainifo. Ascashon ato yoini, —Nocon yoramishtichin, Diosin mato shara huashoiaín cuscan shinancahuun. Unuyamacahuun, —ato huani.

⁴⁴ Ascatan semanan futsan aton tunutitian nantifi yorafo nan pushurasi anoafo ichanan-nifo nocon Ifoan tsain nicashcaquin.

⁴⁵ Fasi yorahuanrasi ichanannifo ato nicacani. Israelifoan oincani Pablo yafi Bernabéqui sinanifo. Ascano yoiáfo, —Pablonun noco yoiái cuscan chacacoin. Jesuscaí Diospan facumaran, —ishon yoinifo. Ato roanifo.

⁴⁶ Asca huafiainfoanno ranotama ato cumanifo, —Non Diosin tsain Jesushuunooa mato yoiqui tauhuai yoi non oa. Ascfaiaiton man nicacasmai. Nicacasmashucaí man Upa Dios fu ipatiroma. Ascacun non nocon caifoma yoicai.

⁴⁷ Nocon Ifoan noco yononi isca huaquin,

“Un mato yonoi man chashamati cuscara man inon. Man manifestifo oinmai ahuuscashumain man ufu ipatiroquin,”

—ishon yoini.

⁴⁸ Nicacani Israelifoma fasi unimanifo. —¡Aicho! Nocon Ifoan ahuun tsain fasi shararan, —inifo. Tsoan Upa Diosin catoan afu nipashquin icoinra huanifo.

⁴⁹ Ascano nan mai anoafon nocon Ifoan tsain Jesushuunooa yoinifo.

⁵⁰ Yoifiafoan Israelifon atoqui tsain chaca huanifo. Pablo yafi Bernabé omitsisca-manifo. Atoqui tsain chaca huacatan nan ainfofo Dios tananpaiyaifo non niaifofonri Antioquia anoshon aton nomuran Pablo yafi Bernabequi shinanchacashon aton mai anoshon ato rafu potanifo.

⁵¹ Ato potaifoanno aton sapato potapota saquin Jesushuunooa nicacasmaifoan ismaifo. Ascatan Iconio ano fonifo.

⁵² Nan Antioquia ano icafo rama Jesús icoinra huacanashu fasi unimanifo Diospan Yoshin Sharapan ato iquinano.

14

Pablo yafi Bernabé Iconio ano ini

¹ Iconio anoshon Pablo futan Bernabé amisifo cuscan pushurasi futsa anoshori ato yoinifo aton ichananti pushu muranshon. Ato shafacafi Jesushuunooa yoiainfoan Israelifo non yora futsafoan ichaparasion icoinra huacoinnifo.

² Ascanaiffoan Israeli atirifon icoinra huafoma atoqui tsain chaca huanifo. Ato chaca huaifoan yora futsafoanri aton nomuran atoqui shinanchacanifo.

³ Ato asca huafiainfoanno Pablo yafi Bernabé nanno iyopaonifo. Nocon Ifohuunshon ranotama ato Jesushuunooa yoinifo. —Nocon chaca soashotiro Dios fu ipanon, —ishon ato yoinifo. Ahuunshon ahuarafa fasi sharafo tsoan oinyomisima cuscara fusti ato ismanifo. Asca huaifoan Diosin ato oinmani ahuunshon ato yoinonfo.

⁴ Ascfaiaiffoan Iconio anoafon anorisi shinannifoma. Ascashon Pablo futan Bernabé ato yoiái cuscan atirifon icoinra huanifo. Ascfaiaiton Israelifo nan icoinra huamafoan ato yoishonai cuscan icoinra huannifoma.

⁵ Ascano Israelifo yafi futsafo aton niaifofori ichanannifo yoinanshaquin, —Non Pablo yafi Bernabé omitsisca huanon. Non ato toquirinin tsacanon rutushquin, —icashu yoinannifo.

⁶⁻⁷ Ascaiffoan nicacani anoashu Licaonia mai ari ichonifo. Nanno pushurasiffoan aton anu rafu Listra yafi Derbe anoshon. Ato tsain shara Jesushuunooa yoinifo.

Pablo Listra anoshon toquirinin tsacanifo

⁸ Listra ano nocofunu chato chatotiani nanscarapan cainni cahuascamisima.

⁹ Pablonun ato yoiaino arifi nicacoinni. Ascaiton fuisquin Pablonun ahuun nomuran shinanni, —Na nocofunu Jesús caya huamatiro icoinra huanon, —ishon shinanni.

¹⁰ Ascashon yoiquin, —Funihuu, —huaino. Nicatapái aficoínma fianshinachuani.

¹¹ Ascaiton oincani yorahuanrasi tsain futsan man inifo. Licaonia tsainman inifo.

—¡Aicho! Diosifo nocoqui fotoa. Nocofunu ointsafishu dios rafu nocoqui fotoaran, —icashu yoinannifo.

¹² Bernabé anu futsa tuqui huaquin Zeusran huanifo. Pablonri aton tsain ichapa yoiaiton anu futsaqui Hermes huanifo.

¹³ Pushurasi patashari pushu huanifo Zeus aton dios cufishcaquin. A muranshon Zeus yonoshomisiton Pablo yafi Bernabé shinanmaqui charofo ya moi funufo ihuunshoni. —Man diosiran, —ishon ato moi rutushpainifo ato inanshquin.

¹⁴ Man acái cuscan nan rafutan oincaquin aton sahuuti fashnunifo aton nomuran ointi isincoinaquin ato oinmapaiquin. Ato muran ichotanonfo,

¹⁵ —Nocofunfoan. ¿Ahuuscain man noco isca huashopaiyain? Noncái Diosimafinquin. Nonrifi maton cuscara nocofunu rafuquin. Non mato tsain shara yoi oa. Non mato yoimisí Dioscoínma shinanyamacahuun. Ahuarafa Dioscoínma potacahuun nan Dioscoínfin niaquin. Nan icoinra huacahuun. Nanton nantifi onihuaniquin. Nantifi nai muran onihuaifain maitio onihuaifain yorafoti onihuaifain unuhuanri nantifi a murannoari onihuaniquin.

¹⁶ Ipaoni maifoti anoafon man apaiyai cuscan Upa Diosin ato shatumanataima.

¹⁷ Ascafiashu afincoin ahuu cuscaramainquin ato ismamisi. Tsoacai “Diosin ahuu cuscaramainquin ua ismamaran,” itiroma. Diosin nantifi manifoti anoafo shara huapai ato isma. Ascan maton mai ano oi fumamisi maton fanafo foaisharanonfo. Mato tushu ichapa inanmisi maton ointi unimanonfo, –ishon ato yoini.

¹⁸ Pablo futan Bernabé ato yoisharapaifahton ina rutushopainifo. Nocon Diosiran huapaicaquin.

¹⁹ Ascatapaiyaino Israelifo Antioquia yafi Iconio anoashu atoqui funifo. –Pablo yafi Bernabé fasi chacafo. Mato amaqiri yoipai, –ishon ato yoinifo. Nicacaquin shinan futsa acufoantan ato chaca huanifo. Pablo toquirinin tsacaquin futsanifo. Ascan huacashon, –Man naaran, –huanifo. Ascashon pushufo pasoato shara fonifo ratai focaquin.

²⁰ Jesús tanamisifoan Pablo naqui huanifo. Ascano funinaca huan pushurasi ano naso curani. Iyoco futsaino Bernabé fu Derbe ano cani.

²¹ Naannoshon tsain shara Jesushuunoo ato yoinifo. Ascaiton nicacani yorahuanrasiton Jesús icoinra huanifo ahuun tanamisi ishcaquin. Ascano Listra non Iconio non Antioquia anori nasonifo.

²² Nanno Jesús tanamisifo Diosin tsain yoinifo aton ointi fupihumashquin Jesús tanaquin finacoionnonfo. –Diospan tsain cachiquiri huayamacahuun. Jesús fusti icoinra huacahuun. Upa Diosin nantifi iquina ano non nocoataima non niyoashu non fasi omitsiscatiroran, –ishon ato yoini.

²³ Ichananti pushuti anoshon Pablo futan Bernabé Upa Dios icoinra huafohuunoo cufffain piqui tununifo aton cushumisifo catonshcaquin. Ascaino, –Upa mia icoinra huacaniquin ato cushusharahuu, –ishon cufnifo.

Pablo yafi Bernabé Antioquia ano nasonifo nan Antioquia Siria mai muran ini

²⁴ Ascano anoashu focani Pisidia yafi Panfilia mapaifainifo.

²⁵ Anoashu Perge ano nococatan nanno nituyonifo Diosin tsain yoishcaquin. Ascatan anoashu Atalia ano fonifo.

²⁶⁻²⁷ Atalia anoashu uuhuan pocufaini focani Antioquia ano nasonifo. Nococashon icoinra huafu Pablo futan Bernabé ato ichanan huani. Atomaqui cataima ato Upa Dios cufishonifo Diosin ato mutsismafain ahuunshon yoisharanonfo. Ascan nantian Diosin ato yonoo cuscan anaiticashon nantifi acafo cuscan ichanancashon ato yoinifo. –Nantianri nocon caifoma yora futsan icoinra huafu Upa Diosin atorifi ahuun yorafa imaran, –icashon ato yoinifo.

²⁸ Ascano Pablo yafi Bernabé Jesús tanamisifo fu iyopaonifo.

15

Jerusalén ano icoinra huafu ichanannifo

¹ Ascano nocofunufu Judea anoashu Antioquia ano funifo. Nococashon yoinifo, –Nocon shunifo ipaonifo cuscan non amisi. Nocofunufu foshqui rupa shatuama Dios fu ipatromaran, –ishon Moisés noco tapimani cuscan yoinifo.

² Ascaiton nicacani Pablo futan Bernabé, –Ariramaran, –icashu atofu fochishmanantanannifo. Ascano icoinra huafoan Pablo yafi Bernabé non futsafori catonnifo. Ascashon ato Jerusalén ano nichinifo. Jesús fu rafumisifo doce non cushumisi futsafori ato yocanonfo iconmainquin.

³ Ascano icoinra huafoan ato nichiafo. Focani Fenicia mai ano yafi Samaria mai anori mapaifainifo. Ascashon ato yoinifo, –Israelimafoan Jesús icoinra huashon ato chaca shatuaforan, –ishon ato yoinifo. Icoinra huafu anofoan nicacani fasi unimanifo.

⁴ Ascatan Jerusalén ano nocoafono Jesús fu rafumisifo doce non cushumisi futsafori nantifi Jesús icoinra huafoti iscanifo, –¡Aicho! Man nocoqui fuafoquin, –ishon yoinifo. Ato fu ichanancashon Diosihuunshon afoanfainnafo ascato yoinifo.

⁵ Nicacashon atiriffoan icoinra huafu Fariseofoan yoinifo, –Nocon caifomafashon Moisés yononi cuscan aton nocofunufori non foshqui rupa shatupacutiro, –ishon yoinifo.

⁶ Asca huaifoan Jesús fu rafumisifo doce yafi icoinra huafu aton cushumisifoanri tiri futsan ichanancashon nanfohuunoo yoinanshcaquin.

⁷ Tsain ichapa yoinainfoanno Pedron ninacahuanaino nishmapacufoanaifoan ato isca huani,

–Uhuun yoramishtichin, ua nicacahuun. Man man tapia noco futsan Diosin ua catonni mani futsanfo muran ua nichishquin ahuun tsain shara Jesushuunoo un ato yoinon icoinra huanonfo.

⁸ Diosin yorafaon aton nomuran shinain cuscan tapicoian. Nanton noco ismani nocon caifoyamafiacun ato iquina ahuun yorafa inonfo. Ahuun Yoshin Shara noco inan cuscan atorifi inan. Ascan non tapitiro Diosin atorifi fuchipai.

⁹ Nan non icoinra huaiton nocon chaca soashona cuscari afoanri icoinra huaifoan atori chaca soashona. Nanscarasi huaquin noco fuchipai.

¹⁰ Nan iconquin. Moisés noco yononi cuscaai nocon shunifo non norifi non ascatiroma nipashquin. ¿Ascacufin ahuuscain norifi non atiroma cuscan man Jesús tanamisifo yonomapai? Asca huaquin man ato ointi ihuumatiro.

¹¹ Ma. Aririma. Nocon Ifo Jesús nocohuun ramapaiyaino non Upa Dios fu ipatiroquin. Nan non icoinra huai. Afoanri icoinra huacanashu Dios fu ipatiroran, —ishon Pedro ato yoini.

¹² Asca huatan Bernabé yafi Pablonun ato yoaifono nantifi nanoashu ichanancanashu pusinifoma nicapaicani. Diosin atohuunshon tsoan oinyomisima cuscara ahuarafo fasi shara Diosin fustiton atiro cuscan Israelimafo muranshon huanifo.

¹³ Aton tsain anaitiano Santiago ato isca huani,

—Uhuun yoramishtichin ua nicayocahuun.

¹⁴ Pedro noco rama yoaia cuscan ahuuscashomain Upa Diosin nocon caifoma catoanquin ahuun yorafo inonfo.

¹⁵ Nannorifosi Diosin tsain inon pacoai yoimisifoan yoinifo. Isca huaquin cununi,

¹⁶ “ David ahuun caifoan ua potaino urifi un ato potayoni. Ascafia un ahuun funafo afanan atoqui nasoshquin ato caya huanon uhuun yorafo afanan inonfo.

¹⁷ Ascacun manifotifoanri ua cufishcani uhuun yorafori un ato anupacushquiran, ishon Upa Diosin yoini.

¹⁸ Diosin ahuamamishiti tapian. Icataima inonpacoai cuscan yoioniran,” ishon cununi.

¹⁹ Ascancufin un shinanquin isca. Nocon caifoma Dios tanapaiyaifoan non ato ahuaara curushcai non yonotiroma.

²⁰ Ascatarocon non ato cunu fomatiro yoiquin isca huaquin, “Dioscoinma aton Diosiran huacashon tushu tamanchinafo. A oincaquin tushu piyamacahuun. Man ascara piaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Maton ahuinmari chotayamacahuun. Maton funumari chotamayamacahuun. Yoina yafi ina tumosishon ahuun imi foyamaino ahuun nami piyamacahuun. Imiri ayayamacahuun.”

²¹ Nanfohuunoa nocon ichananti pushu muranshon tunutitian yoimisifo. Afo ascayamacahuun. Nocon shunifoanri nannori yoimisiforan, —ishon Santiago ato yoini.

Israelifoma cunu fomani

²² Ascatan Jesús fu rafumisifo doce non Jesús icoinra huafo non cushumisifo non icoinra huaa futsafori ato futan rafu catonnifo Judas ahuun anu futsa Barsabás yafi Silas catonnifo Pablo yafi Bernabé fu Antioquia ano fononfo. Nan rafu icoinra huafoan nicacoinnifo.

²³ Ato cunu inanquin isca huani,

—Nonquian Jesús fu rafumisifo doce non cushumisi futsafori non nantifi Jesushuunoa yoimisifoan non mato cunu fomai man tapinon. Nocon yoramishtichin Antioquia anofo yafi Siria anofo non Celia anoa man nocon caifoyamafishon no futan man Jesús icoinra huamisi. Non mato tsain shara yoinon.

²⁴ Man non nica futsafo noco anoashu mato ano foitacashon mato yoicaquin maton nomuran fucashmana. Non ato nichiamo. Mato yoaia cuscan noncai ato yonoama.

²⁵ Ascacun non ichanan nannorifosi non shinan nocofunu futsafo catonshquin Pablo yafi Bernabé fu mato ano nichishquin. Pablo yafi Bernabé non atohuun noico.

²⁶ Nan rafutan nocon Ifo Jesushuunoa futsafo yoipaifaifoan atirifoan ato rutupaifaifoancai yoiquin ununifoma.

²⁷ Ascano non Judas yafi Silas matoqui nichian non mato cunushona cuscan nannoricoon mato yoinon. Ato tsainhuunshonri man tapitiro iconcoin.

²⁸ Diospan Yoshin Shara shinan cuscan norifi nannori non shinan. Nanfohuunoa non mato cunushona. Man ahuaara futsa yopaima isharashquin. Nan fusti man yopai.

²⁹ Dioscoinma tushu tamanchinafo piyamacahuun. Imi ayayamacahuun. Yoina yafi ina tumosishon imi foamano ahuun nami piyamacahuun. Maton ahuinma chotayamacahuun. Maton funuma chotamayamacahuun. Nan fusti non mato yopai. Nantisi non mato yoi. Non cunua cuscan aashu man isharacointiroran, —ishon cununi.

³⁰ Ascano Jerusalén anoshon ato nichinifo. Antioquia ano nococashon icoinra huafo ichanan huashon ato cunushoni cuscan inanni oinonfo.

³¹ Oincani fasi unimanifo, —¡Aicho! Noco cunushona cuscan nocon ointi roamaroama sharairan, —icashu yoinannifo.

³² Ascatan Judas yafi Silas nan rafutan Diosin tsain inonpacoai cuscan yoimisi inifo. Jesushuunoo yoiái cuscan icoinra huanifo. Nicacoinmisifo aton ointi fupi huamani ato mutsismanon Jesús tanasharashcaquin.

³³⁻³⁴ Nanno osha ranan atofu ichanannifo. Ascatan Antioquía icanoafoan ato nichinifo, — ¡Aicho! Non fasi unimai noco yoisharamisifo. Natian afanan Jerusalén ano fosharacahuun. Nan icoinra huafo nanno nocoaino ato yoisharashohuun, —huanifo.

³⁵ Ascafiainocai Pablo yafi Bernabé atofu fonifoma. Antioquía ano nitunifo futsafo futan Diosin tsain tapimanifo.

Pablonun afanan cai futsacai Jesushuunoo pushurasifoti ato tapimani

³⁶ Ascaifoan chipo, —Icoindra huafo pushurasi futsa anoafo non oin canon. Non ato nocon Ifoan tsain yoini. Man natian tanasharafomainquin non oin canon, —ishon Pablonun Bernabé yoini.

³⁷ —Ai. Non canon. Juanrifi no fu canon, —Bernabé huani. Nan Juanpan ahuun anu futsan tuqui huani Marcos.

³⁸ —Ma. Noncai Marcos iyoicaima. Noco Panfilia anoshon potani. No fu afanan yonotiroma. Afanan noco potatiroraca, —ishon Pablonun yoini.

³⁹ Fasi fochishmanantanancanashu pashcananfainnifo. Bernabé shashon Marcos Chipre ano yoni.

⁴⁰ Ascano Pablonun Silas catonni afu yononon. Antioquía anoashu foataifoma icoinra huafo atofu ichanannifo. —Nocon Ifon, Pablo yafi Silas cushusharahuu mihuunoo yorafo yoinonfo, —ishon ato cufishonifo.

⁴¹ Ascatan anoashu focashon Siria yafi Cilicia anoafo Jesushuunoo ato yoifoanfainifo. Icoindra huafo pushurasifoti shinanmasharani Jesús tanasharanonfo.

16

Timoteo Pablo yafi Silas fu cani

¹ Ascano Derbe ano Pablo yafi Silas noconifo. Anoashu chaimashta Listra ano fonifo. Nanno Jesús tanamisi futsan ahuun anu Timoteo ini. Ahuari Israeli shafa ini. Arifi Jesús icoinra huani. Apa Griegofo ini.

² Icoindra huafoan Listra anoa non Iconio anoafoan, —Timoteo nocofunu shararan, —huanifo.

³ Ascacun Pablo ato ya Timoteo iyopaini. Iyoatama shinanni, —Nantifi uhuun caifo nan Israelifoanri tapiafo Timoteo apa Griego. Ascan uhuun caifoan amisifo cuscan un Timoteori foshqui rupa shatumatiro ahuunoo shinansharanonfo, —ishon shinanni. Asca huano atofu cani.

⁴ Pushurasiti mapaicainicai Jesús fu rafumisifo doce non cushumisi futsanfori Jerusalén ano yononifo cuscan ato tapimani yoiáfo cuscan huanonfo.

⁵ Ascano nicacashon fasi icoinra huaquin finacoinnifo. Paratama yorafoanri icoinra huanifo.

Pablonun namapan cuscara nocofunu Macedonia anoa oinni

⁶ Asia mai ari Jesushuunoo yoifopaiyaifoan Diospan Yoshin Sharapan, —Asia mai ari foyamacahuun, —ato huani. Ascaino Frigia yafi Galacia ano mapaifaini fonifo.

⁷ Anoashu Misia mai pasoato ano noconifo. Anoashu pushurasi futsan Misia anoashu Bitinia ano fopaiyaifoan, —Ari foyamacahuun, —Jesús ahuun Yoshin Sharapan ato huani.

⁸ Ascano Misia finonfaincani Troas ano noconifo.

⁹ Nococashon nan yamutan Pablonun ahuun namapan oinni nocofunu Macedonia anoaton, —Macedonia ano ohuu. Noco tapimashquin, —ishon yoini.

¹⁰ Moishon Pablonun noco yoini, —Natian Upa Diosin noco Macedonia ano nichipai tsain shara Jesushuunoo non ato tapimanon, —ishon noco yoini. Ascano non ati shara huani samamashta afu cashquin.

Pablo yafi Silas Filipos ano inifo

¹¹ Ascan Troas anoashu shashon nanucaini non cani. Mai ano ocuma rafu unu tapia rafu ahuun anu Samotracia ano cayacafi non pocufaini cani. Anoashu iyoco futsaino non pushurasi Neápolis ano noconi.

¹² Anoashu non pushurasi ahuun anu Filipos ano cani. Nan Macedonia mai ano. Macedoniafoan aton niaifoho nanno icafo ini. Nanno non osha rananyoni.

¹³ Tunutitian pushurasi pasoato non unu cusumunri cashon. Non nica nanno ichanamisi Upa Dios cuficani. Nocoshon man non oian ainfofo nanno ichananfo. Ascan tsaoshon non ato Diosin tsain tapimani.

¹⁴ Nannoshon ainfo futsan noco nica ahuun anu Lidia. Pushurasi ahuun anu Tiatira anoa ini. Pano mapash inanmitsamisi. Dios cufinmiscoin. Pablonun Jesushuunoa yoiaiton nocon Ifohuunshon ahuun nomuran icoinra huani.

¹⁵ Ascaiton icoinra huaino ahuun yorafoanri icoinra huanifo. Icoinra huaifoan ato unu muran iquimani Jesús aton Ifocun ismashcaquin.

—Man tapia unriffi nocon Ifo Jesús un icoinra huaquin uhuun pushu ano fucahuun un mato pimanon. Nanno man itiroran, —ishon Lidia noco yoini.

¹⁶ Ascatan shafa futsan non afanan cufimisi ano foanno shomaya nocoqui noconi. Futsafoan aton oinmati yoshin chaca ahuun nua. Nanton inonpacoai cuscan yoshin chacahuunshon ato onanshopaoni. Onanmafoan ato yoini. Ato yoiaiton ahuun ifofo pui inannifo.

¹⁷ Nanton Pablo yafi noco mufoquin oi ashcafinin yoifoni,

—Nan nocofunufofin nan Diosin nantifi finoanton ahuun oinmatifo. Ahuunscashumain non Dios fu ipatiroquin noco yoi fuaforan, —ishon yoini.

¹⁸ Shafa ranan noco ascasi huafoanfaini. Noco fucash huamisi. Pablonun afanan tunuyamacaiquin ifiacucahuan yoshin chaca shomaya fu imisi isca huani,

—Jesucristohuunshon un mia yonoicai. Na shomayamaquinoashu catahuun, —huani. Ascan huatapayaino samamashta amaquinoashu cani.

¹⁹ Shomayaton ahuun ifofoan oincaquin shinannifo, —¡Ohua! Nocon yonoticaí afanan yoshin chaca afu icama. Afanancai inon pacoai cuscan yoitiroma. Ascan tsoancai afanan ahuunshon noco pui inainmaran, —ishon yoinifo. Ascashon Pablo yafi Silas achinifo. Achishon aton niaifofoan pushu ano ato sharafonifo.

²⁰ —Nan nocofunu rafutan Israelifoan nocon pushurasi ano yorafo fucash huamacoin ato shinanchacamacani.

²¹ Noco amapayai cuscacai Romano niaifofoan noco yonomisima. Noncai afanan ascatiromaran, —ishon aton niaifofo yoinifo.

²² Yorahuanrasifoan nannorisi yoinifo. Ascano niaifofoan yonocun aton sahuuti pucashon ihuin ato coshaquin futsanifo.

²³ Man coshaquin futsatan cunu muran ato iquimanifo. —Na rafu cushusharahuu. Chifi ichofoanno non mia rututiroquin, —ishon niaifofoan ranushumua cushumisi yoinifo.

²⁴ Ascan huaifoan nicaquin fasi ocu murancoin ato iquimani. Ihui rafu oyucurua-mashon aya ato tsaoni.

²⁵ Ascano yamunacucahuanaino Pablo yafi Silas Upa Dios cufinyanan fanainnifo. Ascaiton atofu iquiafoan nicanifo.

²⁶ Ascatanaino fasicoin mai nayanaiyainacahuani. Ascaino a cunu ahuun quishifo tsucu tsucusini. Ascatanaino cunu fupotifo afincoín fupucui futsuni. Ascatapayaino cunopan ato munushafo afincoín oshoriqitan mushorimuni.

²⁷ Ascaino ranushumua moínacahuaquin oian a cunu fupotifo man fupucui futsua ini. Ascaiton oin ahuun nupu tsitsucumutan afiri chachipaini.

²⁸ Ascaiton Pablonun oi ashcafinin yoini,

—Ascayamahuu. Mifiri rutuyamahuu. Tsoa raqui caamaquin, —huani.

²⁹ —Chi otashon ua fushoriscahuun, —ranushumuaton futsa huani. Otafurani Pablo yafi Silasqui ichoni ato naman tsitsaotoshini. Fasi tari tari yanán.

³⁰ Funinaca huan ato rafu chifi caimani.

—¿Ahuuscashomun uhuun chaca un shatutiroquin Upa Dios fu ipashquin? —ishon ato yocani.

³¹ —Nocon Ifo Jesucristo icoinra huashu min non min yorafori man Dios fu ipatiroquin, —ishon Pablo futa Silaspan yoifoni.

³² Asca huacatan nocon Ifo Jesús ahuun tsain a yoifain pushu anoafori ato yoini.

³³ Asca huacashon unu fitan coshafo ano puchoquin futsafoanno a pushu muran icafoti ato unu muran iquimapaquí icoinra huacashon ismanonfo.

³⁴ Asca huanó ranushumuaton ahuun pushu muran iquimani ato pimashquin. A yafi ahuun yorafoti Dios icoinra huashu aton nomuran fasi unimanifo.

³⁵ Ascano man shafano ahuun niaifofoan aton niaifo patasharifo aquí nichinifo, —Pablo yafi Silas caimanonfo ato yoitacahuun, —ishon ato nichini.

³⁶ Ranushumuaton Pablo yoini,

—Niaifofoan yonoa natian man casharatiroran, —ishon ato yoini.

³⁷ Nicaquin Pablonun ranushumua niaifofo yoini, —Norifi non Romanofiacun noco yocashoma yorafoan ointaifi noco coshamanafo. Non ahua chaca huayamafiacun ascan natian tsoa yoishoma noco caimapaicani. Ma. Noncai ascaran tapipaimaficain. Niaifofo aafi funonfo noco caimashquin. Nannori ato yoitacahuun —Pablonun ato huani.

³⁸ Yoiaifo cuscan ranushumuafoan aton niaifofoqui chaninifo. Pablo yafi Silas Romanofori nicacani niaifofo fasi ratucoinnifo. —¡Ohuashta! Nocon niaifofoan anori nicacaquin noco asca huatiroran, —ishon yoinifo. Musucani.

³⁹ Ascano ato ano fonifo ato yoisharapai focani. —Nocon pushurasi anoashu fosharatacapun, —ato huanifo.

⁴⁰ Ascano cunu murannoashu focani Lidia pushu ano fonifo. Nan anoshon icoinra huafu Jesushuunoa yoisharanifo aton ointi fupi huanonfo. Yoicatan atomaquinoashu fonifo.

17

Tesalónica anoashu mucanifo

¹ Ascatan focani Anfípolis yafi Apolonia mapaifainifo. Tesalónica ano noconifo. Nanno Israelifoan aton ichananti pushu ini.

² Ahuun fuyamisi cuscan iquishon tunuti rafu non fustitan Pablonun ato Diosin tsain yoini.

³ —Cristo noco omitsiscashoni. Naafiacun funimani. Jesushuunoa un mato tapimai nanfin Cristoquin. Upa Diosin catonni nocoqui nichishquin, —ishon Pablonun ato yoini.

⁴ Nicacaquin atirifi Israelifoan ato futan icoinra huanifo. Griego ichapafo non ainfofoanri nicacoinpainifo afoanri icoinra huanifo.

⁵ Ascano Israelifoan aton niaifofoan Pablo yafi Silas nicacoiainfoan oincani fasi ato rafuqui sinacoinnifo. Ascashon a inanmitsamisifo anoa focashon nocofunu shanishunifo fuchinifo. —Pablo yafi Silasqui tsain chaca huatacahuun yorafoanri nicashon afori atoqui sinanonfo, —ishon ato yononi. Asca huacatan fonifo yoifocani. Ascashon Pablo yafi Silasqui tsain chipunifo. Yorahuanrasi fasi mucanifo. Mucacatan nocofunu ahuun anu Jasón pushu ano fonifo Pablo yafi Silas achipaifocani. Yorahuanrasi muran caimapaicaquin ato asca huanonfo.

⁶ Ato fuchiyamaquin Jasón yafi icoinra huua futsafo achinifo. Achicashon niaifofo ano ato iyonifo. Iyoshon isca huanifo,

—Pablo futan Silaspan manifoti anoafu shinanchacamamisifo. Natian nuno nocon mai anori man fuafo.

⁷ Nan Jasón ahuun pushu muran ato iquimana. Nan rafu nocon niaifo Cesari noco yonomisi cuscan nicacasmanifo. Ascashon yoiafo, “Nocon niaifo futsan. Ahuun anu Jesusran,” ishon nan rafutan yoiaforan, —ishon oi ashcaffinin yoinifo.

⁸ Nicacani niaifofo yafi yorahuanrasiton aton nomuran fasi shinanchacanifo. Ascashu mucanifo.

⁹ —Noco pui inancahuun mato nichinonran, —ishon niaifofoan Jasón yafi futsafo yoinifo. Ascaitan ato inainfoan ato nichinifo.

Pablo yafi Silas Berea ano ini

¹⁰ Ascacashon icoinra huua futsafoan Pablo yafi Silas yamutan ato Beria ano nichinifo. Nococatan nan rafu Israelifoan aton ichananti pushu muran iquininifo.

¹¹ Iquicaintan ato Jesushuunoa tapimani. Bereafocai Tesalónicafo cuscarafoma. Pablo futan Silaspan ato yoiai cuscan fasi nicapainifo. Nicacatan shafatifi Diospan tsain oinnifo iconmain Pablonun ato yoiaquin.

¹² Ascano Israelifoan icoinra huanifo. Griego ainfofoanri nicacoinpainifo afoanri icoinra huanifo. Griego nocofunufocanri icoinra huanifo.

¹³ Ascaifoan Pablonun Bereafo Diosin tsain tapimani Tesalónica ano nan Israelifoan icafo nicacani. Berea ano focashon aqui tsain chaca huanifo. Yorahuanrasi nicacani aqui tsain chaca huua. Ascano aton nomuran shinanchacamanifo Pablo nicanonfoma.

¹⁴ Ascano Jesús tanamisifo nanno musucaquin Pablo unuhuan cusumunri nichinifo chaca huanonfoma. Cafiahu Silas yafi Timoteori Berea ano nituyonifo.

¹⁵ A fu focani Atenas ano iyonifo. Nannoashu afanan nasofainifo. Pablonun ato cunu inanno Silas yafi Timoteo inanonfo, —Uqui furiscacahuun, —ishon ato cunushoni.

Pablo Atenas ano ini

¹⁶ Nannoshon ato manaquin oian Atenas anoafu ahuarafu fasi ichaparasi rami huacashon, —Nocon diosiran, —huaifoan. Oinquin ahuun ointi fucash huariapaoni, —¡Ohua! Ahuuscaquin Diosicoimmafo icoinra huacanimum, —ishon ahuun nomuran shinanni.

¹⁷ Ascaino Israelifoan aton ichananti pushu muran iquini ahuun caifo yafi Griegofoan Diosin icoinra huapaiyaifoan Jesushuunoa ato yoini. Ichananti pushu muranno fustima chifinoan inanmitsamisifori shafatifi nan nicapaiyaifori ato yosini.

¹⁸ Ato yoiaino futsafo aqui noconifo afu fochishmanantanancani. Atirifoan shinannifo non apaiyai cuscaffin non huatiroquin noco unimamanon. Nanfoan anu tuqui huani

Epicureofo. Atirifoanri shinannifo ahua ahuuscarafiaino non tunutiroran ishon shinannifo. Nanfo anu tuqui huani Estoicos. Nan rafu Epicureofo non Estoicofofori Pablo fu fochishmanantanannifo. Yoinifo,

–Nan tsainmisi fahua cuscara. Raquiri noco yoipaimun, –ishon atirifiton yoinifo.

–Dios futsafo noco icoinra huamapairan, –ishon atirifoanri yoinifo. –Pablonun noco Jesushuunoa yoia. Naafiashu funini noco yoiaran, –ishon yoinifo.

¹⁹⁻²⁰ Yoifiacashon Areópago ano Pablo iyonifo. Nanno ichananmisifo ahuafo futsahuunoa nicamisifo. –Min noco tapimapaiyai cuscan tsoa nicamisima. Non tapipaicain. Min yoiai cuscan funacoin. Tsoacai anori nicayomisima. Ascan afanan noco yoihuu nonri tapinon, –ishon yoinifo.

²¹ Nantifi nan Atenas ano icafo non yora futsafori ichananmisifo yoinanshquin. Ahuafo tsoan anori nicayomisima yoipaicani. Atirifiton nicashon atirifi yoinifo. Ahua futsacai huanifoma.

²² Ascaifoanno nan ichananmisifo ahuun anu Areópago anoashu Pablonun aton ointaifi ninacahuan ato yoini.

–Atenasfoan ua nicacahuun un mato yoinon. Mun oian manfin Diosihuunoa fasi tapipaimisifoquin.

²³ Nuno man icano un cahuacacainquin mun oian man cufimisi anoshon man cunuquin isca huaa,

“Dios futsa tsoancai onanmisima non cufipairan”

ishon man cunua. Mancai nan Dios onanmisima. Ahuunoa natian un mato tapimaicain.

²⁴ Diosin nantifi mai anoafoti non nai murannoati onihuaniquin. Aton ifon inon. A yorafaoan pushu huaa murancai Diosin icama.

²⁵ Atofin yorafoti nimafain noco shacaimaquin. Asca acai ahua yopaimaquin. Non yorafaoancai non ahua Dios ashotiroma ahuaitsi yopaiton.

²⁶ Diosin nocofunu onihuaquin tau huani. Na nocofunuhoashu manifoti caicani. Aafin yononi raquifomain icanicain. Ahuuti farimain itirofoquin arusu fusti tapia.

²⁷ Nantifi asca huani manifoti afu ipainonfo. A funaquin fuchishcaquin. Ascafia nocoti chai huaama.

²⁸ Ahuunoashu fusti non nitiro. Noco nimayamainocai non ahuuscatiroma. Arusu noco nimatiro. Maton tapimamisifoan cununi cuscan, “Non Diospan facuforan,” ishon cununi.

²⁹ Iconcucain nocofununcain afin Dios oni huatiroma. Cuno chashna faca facaitsa iyamarai cuno oshopa iyamarai toquiri nocofunufaoan rami huafatirocain Diosin ascarama.

³⁰ Ascapaonifishocai Dios onanmisifoma. Ascafiifoan ato onaintimapaonima. Ascafia natian nantifi manifoti anoafoti ato yonoa aton chaca shatushon icoinra huanonfo.

³¹ Jesús naafiashu funimani. Ascancunfin non tapitiroquin Upa Diosin a catonni nantifi yorafoti cayacafi shara yoinon afu ipaiyamarai omitsispacunacafo muran focani. Upa Diosin inonpacoai cuscan shinanni ahuutianmain iquicain, –nicacaquin ato huani.

³² Jesús nafiashu funini nicacani atirifi shuchinifo. Atirifoanri yoinifo isca huaquin,

–Shafa futsan afanan noco yoihuu non nicanon, –ishon Pablo yoinifo.

³³ Ascatan ichananmisifo anoashu Pablo cani.

³⁴ Nocofunu fustrasiton Jesús icoinra huacashon Pablo tanacoinnifo. Futsan ahuun anu Dionicio. Nan Areópago ato fufu ichananmisi ato yoi. Ainfo futsa ahuun anu Dámaris. Futsafoanri icoinra huanifo.

18

Pablo Corinto ano ini

¹ Ascano chipo Pablo Atenas anoashu Corinto ano cani.

² Nocoano nocofunu yafi ahuin nantianri mai futsariashu noconifo. Nocofunun ahuun anu Aquila. Israeli Ponto anoashu cainni. Ahuin Priscila arifi Israeli shafu. Nan rafu Italia ano imisifo. Ascan Italiafoan aton niaifon ahuun anu Claudio potani isca huaquin, –Nantifi Israelifo Roma anoashu fotacahuun, –ato potani. Ascancunfin Aquila yafi Priscila Italia anoashu Corinto ano ramahta noconifo. Pablonun atohuunoa nicafaini aton pushu ano cani. Ato onaincai.

³ Nan rafutan pano pushu icushaino. Pablonunrin aton futan icushpaoni. Ascano nanno nituyoni ato futan yonoi.

⁴ Asca huacatan tunutiantifin Israelifo aton ichananti pushu muran iquini Jesucristo icoinra ato huamapai.

⁵ Ascano Silas yafi Timoteori Macedonia anoashu aqui funifo. Nocoafono Pablonun Israelifo Jesushuunoa yoifoanfaini. Nan fusti yoini. Ahua futsan yoinima. –Jesús Diosin catonni, nanton ahuun facuran, –ishon ato yoini.

⁶ Ascafia Pablonun ato yoifaiño nicasimanifo. Aqi tsain chaca huanifo. Ascaifoa aton ointaifi ahuun sahuuti pucatan tatan ani aton fuyamisi cuscara ato oinmaquin. Diosin tsain nicacasmaifoa ato oinmaquin.

—Man ua nicacasmai. Ascan man omitsiscainocai uhuun nuama. Matohuunfin nu-aquin. Diosin ua yonoa cuscan un mato yoifaiño man ua nicacasmai. Ascan un afanan mato yoitamarocon un nocon caifoma un yoi cairan, —ishon ato yoini.

⁷ Yoitan aton ichananti pushu murannoashu chaimashta Ticio Justopan pushu ano cani. Nanton Upa Dios noicoquin cufipaoni.

⁸ Ascan ichananti pushu niaifoa ahuun anu Crispo arifi Jesús icoinra huani. Nantifi ahuun yorafoanri icoinra huanifo. Corinto anofoanri icoinra huaifoa ato unu muran iquimanifo.

⁹⁻¹⁰ Ascano yamu futsan Pablo ahuun namapan nocon Ifo Jesús yoini, —Ratuquima uhuun tsain ato yoifoañafaincahuun. Shatuquima. Un mifu icaquin. Tsoan mia ahuusca huanonma. Nuno nan pushurasi ano uhuun yorafo ichaparan, —ishon yoini.

¹¹ Ascano nanno Corinto ano nituyoni. Fari fusti yafi nushmancayan Diospan tsain ato yosipaoni.

¹² Ascatan Acaya mai ano Galión aton niaifo. Nantianri Israelifo ichanannifo Pablo achishcaquin. Achishon ato niaifo ano iyoshquin.

¹³ —Na nocofunun yorafo amaquiri yosifoañafaini. Nocon shunifoa noco yononi cuscan ato anorima shinanmaniran, —ishon yoinifo.

¹⁴ Pablonun cumapaifaiño niaifo Galión ato yoini,

—Israelifoa man ua yoicun na nocofunmain onanshta chaca iyamarai fasi chaca huacoinnamainquin un mato nicacuana.

¹⁵ Ascatamarocon maton shunifoa yosini cuscahuunoa ua yoifain maton caifoa aton anuhuunoa yoifain maton caifo yonoa cuscan ua yoipai. Uncai afohuunoa nicapaima. Mafin man afo arotiro.

¹⁶ Umaquinoashu fotacahuun, —ato huani.

¹⁷ Foaifoan Sóstenes ichananti pushu ifo achinifo. Achichashon niaifofoa aton ointaifi sutunifo. Asca huafiaifoaño niaifon Galión ato pusanima. Atohuunoa tapipainima.

Pablo Antioquía ano nasoni. Nannoshon afanan Jesushuunoa ato yoifoañafaini, cai rafu non fustini

¹⁸ Ascatan Pablo Corinto mai ano shafa ranan nituyoni. Nanno iyoano Upa Diosin yoiyoni cuscara a cushusharanon ahuun caifoa aton fuyamisi cuscara ahuun fo marucuni. Upa Diosin cushusharano cataima marucuyoni. Ascatan Priscila yafi Aquila fu Pablo cani. Icoinra huafomaquinoashu Corinto anoashu shasho nanufaini fonifo.

¹⁹ Efeso ano nococatan Priscila yafi Aquila shasho naqui nichifaini cai Israelifoa aton ichananti pushu muran Pablo iquini ahuun caifo fu yoinanshquin.

²⁰⁻²¹ —Cariyamahuun. Nuno nituyohuun noco Jesushuunoa paratama yoiyoshquin, —ishon yoinifo. Ascaiton ato yoini. —Ma, Uncai natian nitutiro. Ascafia Upa Diosin ua nichipaiyaino un matoqui afanan otiroran, —ishon ato cumani.

Yoitan Efeso anoashu shasho nanucaini cani.

²² Cesarea ano mapufaini anoashu Jerusalén ano cani. Icoinra huafo fu ichanain ato yoisharani. Ascatan ato anoashu Antioquía ano cani.

²³ Nanno nituyoni. Ascatan nannoashu cahuancacaiquin ato Jesushuunoa yoini. Galacia yafi Frigia mai ano cahuancacaini Jesús tanamisifoti ato yoisharai Jesús tanaqui finasharanonfo.

Apolos Efeso anofo Jesushuunoa ato yoini

²⁴ Israeli futsan Alejandría anoashu cainni ahuun anu Apolos. Nantianri Efeso ano oni. Diosin tsain fasi tapicoinni. Tsain fasi shafacafi yoimisi. Yorafoan nicapainifo.

²⁵ Nocon Ifo Jesushuunoa Apolos nicapaoni. Tapini cuscan fasi cayacafi yosini. Jesushuunoacai atirifi tapishara inima. Juanpan yosini cuscan fusti tapini. —Maton chaca shatucahuun. Diosin icoinra huacahuun, —ishon. Nan fusti ato yoini.

²⁶ Ascatan ichananti pushu muranshon ato ranotama yoisharani. Ascaiton Priscila futan Aquila nicacoinnifo. Ascashon, —Nocon pushu ano ohuu, —huanifo. Oano Jesushuunoa fasi paratama yosinifo.

²⁷ Ascano Apolos Acaya mai ano capaini ato Jesushuunoa yoipai. Icoinra huafo nicacani, —¡Aicho! Min shinan cuscan shara. Non Jesús tanamisifo ano cunu fomatiro mia nicasaranonfo, —ishon yoinifo. Ascatan atoqui nocoshon Diosihuunshon ato Jesushuunoa yoisharapaoni. Ascaiton nicacaquin icoinra huafoa aton ointi unimacoinnifo.

²⁸ Ascafia atirifi Israelifoa, —Jesuscai Diospan furunma. Upa Diosincai nichinima. Nocon Cristomafinquin, —ishon yoinifo. Ascaifoa —Man shinain cuscacai anorima.

Un mato tapimai Diospan tsainhuunshon Jesusfin Diospan Furunquin. Aafin nocon Cristoquin, —ishon Apolos yorafoan ointaifi shafacaficoin ato yoini. Ascaitocai tsoan cumanima.

19

Pablo Efeso ano ini

¹ Ascatan Apolos Corinto ano iyoashu Pablo machi fai tapiaton cai afanan Efeso ano noconi. Nocoshon Jesús tanamisifo fuchini.

² —¿Man icoinra huashon man ahuun Yoshin Shara fiamun? —ishon Pablonun yocaiton. —Ma. Noncai ahuunoa nicayomisima, —huaifoan.

³ —¿Ascashon man unu muran iquipacunitian man raquiri yoiamun? —ishon ato yocaiton.

—Juanpan noco yosiaino noco unu muran iquimani cuscan non yoiaran, —ishon yoinifo.

⁴ —Juanpan yoini isca huaquin, “Maton chaca shatucahuun Diosin tanasharashquin un mato unu muran iquimanon.” Ascatan yoiari “Chipo Jesús oshquiquin icoinra huacahuun,” ishon Juanpan noco yoiniran, —ishon Pablonun ato yoini.

⁵ Nicacatan —Norifi nocon Ifon Jesús non icoinra huairan, —ishon yoinifo. Yoiaifoan ato unu muran iquimani.

⁶ Ascashon Pablonun ato manmainno Diospan Yoshin Sharapan ato imaino tsain futsanman inifo. Diospan tsainri yoipacunifo.

⁷ Doce icuana inifo.

⁸ Ascano Pablonun Israelifoan ichananti pushu muran iquishon ranotama ato Jesushuunoa yoini. Oshu rafu non fusti ato yoipaoni. Upa Diosin ato iquinahuunoa ato yoipaoni. Nicacaquin atirifoan icoinra huanifo.

⁹ Ascafiaino atirifoanri nicacasmanifo. Icoinra huacasmacaquin, —Jesushuunoaahuca non Upa Dios fu ipatiromaran, —ishon yoinifo. Ascaifoan nicai Pablo atomaquinoashu cani. Afanan atofu ichanannima. Pushu futsa ano tapimamisifo ano cani. Nan pushu anu tuqui huanifo Tiranoran, huanifo. Jesús tanamisifo afu iquinifo ato shafatifi tapimanon.

¹⁰ Fari rafutan nan pushu muranshon ato Jesushuunoa tapimani. Ascano Israelifo futan yora futsafoan Asia mai ano icafoan nocon Ifo Jesús tsain nicanifo.

¹¹ Nantianri Upa Diosin Pabluhuunshon tsoan oinyomisima cuscara ato ismani.

¹² Isinin imisifo yafi yoshin chaca atohuun nuufafaina ahuun panuela iyamarai ahuun sahuutifo muncanashu cayariscatanifo. Yoshin chacafo atomaquinoashu cuyofoni.

¹³ Ascaifono Israelifo futsafoan nicacani Jesús icoinra huayamafiamisishaqui pushurasiti foanfainnifo Jesús ahuun anuhuunshon yoshin chaca atomaquinoa potapaicani. Isca huanifo, —Pablonun Jesushuunshon yoimisi. Ahuunshon un mato yonoi atomaquinoashu fotacahuun, —huanifo.

¹⁴ Nocon yorafohuunshon Dios cufimisi niaifo futsan ahuun anu Esceva ahuun facufo sieteton asca huapainifo. —Jesushuunoaahucahuun, —huanifo.

¹⁵⁻¹⁶ —Jesús onanfain. Pablorigo mun onan. ¿Manmun tsoaquin? —yoshin huani. Yoshin chacapan yoiaino nocofunu yoshin chacayatón ato achini. Ato fasi sutupacuní aton sahuuti fashnufain ato imi tohuuni. Ascaino pushu murannoashu chitoria ichonifoquin.

¹⁷ Atohuunoa Efeso anoafu Israelifo non yora futsafori nicacani ratui futsunifo. —Nocon Ifo Jesús fasi shararan, —huanifo.

¹⁸ Ascashon Jesús icoinra huafoan aton ointaifi chaca huafo cuscan yoinifo.

¹⁹ Yofufoan aton yofu shatushon Jesús ifoannifo. Aton libro murannoahuca cununofo ahuuscashomain yoshin chacanun yonotiroquin cunupaoni. Ascán nan cunufu ichanan huacashon aton ointaifi coanifo. Shinaniquin nan cunufu nantifi fasi chicoin. Cincuenta mil aton pui nuua ini. Ascafiacun coanifo.

²⁰ Asca huacashon maifoti anoafon nocon Ifo Jesús tsain nicanifo. Ahuun tsainhuunshon finacoinnifo icoinra huafoan Jesús tanacoinnifo.

²¹ Ascatan Diosin ahuun Yoshin Sharapan Pablo shinanmanaino yoini, —Un natian Efeso anoashu Jerusalén ano cai. Caquin un Macedonia yafi Acaya ano un mapufainicai. Jerusalén ano nituyoshquin un anoashu un chipo Roma ano cairan, —ishon shinanni.

²² Ascano afu yonomisi rafu Timoteo yafi Erasto Macedonia ano nichiyoni. Afincoin Asia muran nituyoni.

Efeso anoafu mucanifo

²³ Nantianri Efeso anoafon Jesús fustihuunoaahuca Apa Dios ari nocotiro nicacani atirifo fasi mucacaquin tsain chipunifo.

²⁴ Isca huaquin. Nanno nocofunun ahuun anu Demetrio. Ahuun yono ahuarafu rami huapaoni. Cuno oshopafu huapaoni. Nan cuno oshopari ainfo ointsa ramihuani. —Nan

nocon diosiran, —ishon, —Ahuun anu Artemisa, —huanifo. Futsafori afu cuno oshopa ainfo ramihuafu uhuapamafori, —Artemisa ointsaran, —huanifo. Ascan inanmitsashon ahuun rafanan pui finonfo.

²⁵ Ascano Demetrio nantifi ascaran yonomisifo ichanan huani ato tapimashquin. —Uhuun yoramishtichin, man man tapia non nocon dios Artemisa rami huua non inan mitsashon ahuun rafanan pui ichapa non fimisi.

²⁶ Ascafa man man nicamisi na nocofunu Pablonun noco yora ichapafo Efeso anoafu amaquiri shinanmana. Non rami huafocai diosima. Ahuamafinquin ato huamisi. Ascan yomisi cuscan atirifiton icoinra huafu.

²⁷ Pablonun yoi ai cuscan musucoin. Nocon yorafoan icoinra huacashocai afanan rami huafu rafanancai non pui fitiroma. Non funotiro. Nocon pui fusticai non funoima. Tsoancai afanan nocon dios Artemisa pushu muran ichananpaitiroma. Nantifi manifesti Asia muran natian Artemisa cufiafo. Ascan Pablonun yosian cuscan icoinra huafu yoitirofo, “Artemisacai ahuama. Nocon diosimafinquin,” ishon yoitirofo. Ascano nocon dios Artemisa non funotiro, —ishon Demetrio ato yoini.

²⁸ Nicacatan fasi sinacaquin oi ashcafinin yoinifo, —Artemisa tsoa futsa cuscarama. Nonfin Efesofo nocon diosinran, —ishon oi ashcafinin yoirianifo.

²⁹ Ascaiton pushuhuanrasi anoafu nicanifo. Samamashta fasi mucanifo fucash tapinifo. Ascashon Pablo fu foanfainmisi rafu Gayo yafi Aristarco achinifo. Ichananti pushu uhuapa ano ato iyoriscanifo.

³⁰ Nicatan Pablo nan pushu uhuapa muran iquipaifiaiton Jesús tanamisifo futsafoan a iquimacamanifo. Pabloqui musucaquin.

³¹ Nan Asia mai ano aton niaifofoanri Pablo noicaquin cunu fomanifo, —Pablonun ichananti pushu uhuapa muran iquiyamapun mia asca huatirofoquin, —ishon cununifo.

³² Ascaino yorahunrasi ichananti pushu uhuapa murannoashu fasi mucai futsunifo. Atirifoan futsanori shinainno fasi shinanquin futsanifo. Atirifi yorafoan, —¿Ahuuscainun non ichananti pushu uhuapa muran non iquiyamaquin? —huanifo.

³³ Israelifoan ahuun anu Alejandro fuchicashon putsiqui putsiqui anifo. —Ato yoi-huu matsipacunonfo, —huanifo. Ascaifoan ato mushanshon inacahua ato yoini, —Pusiyamacahuun. Un mato cayacafi yoisharanon, —ishon Alejandron ato yoini.

³⁴ Ascafia, —Nan nocofunu Israeliran, —huacashon tsoan nicapaima. Tsain chipuquin hora rafu oi ashcafinin oi fusti nicatsa yoirianifo, —Nonfin Efesofoquin. Nocon dios Artemisa ahuamamishti huatiroan, —ishon oi ashcafinin yoirianifo.

³⁵ Ascaifoan niaifo futsan ato, —Tsainyamacahuun, —mushanshoquin huani. Ascaino pusinifoma. —Efeso nocofunufufoan ua nicacahuun. Nantifi manifesti anoafu tapicani nonfin Efesofoquin. Non Artemisa pushu cushushomisi. Ahuun rami huati nai murannoashu pacuaran inifo. Nanrifi non cushushomisiquin.

³⁶ Tsoancai, “Aririmaran” huatiroma. Ascacun ahuuscain man mucain. Puusiyamacahuun. Man mucaquin man chaca huatiroquin.

³⁷ Nan nocofunufufoancai ahua chaca huamisima. Ahua onuyamafain nocon dios Artemisaqui tsain chaca huayamafiamisifoan ato nuno ihuua.

³⁸ Demetrio yonomisifo futan tsoan tsain chaca futsaqui huapai. Nocon niaifofo yoicahuun nicanonfo. Atoqui yonotiro.

³⁹ Ahuara futsan yoipaiqui niaifocoinfo yoitiro afoan arotirofo.

⁴⁰ Man natian chaca huua cuscan niaifofoan nicashon noco asca huatirofo. Na yorafoan ahua chaca huayamafiamisishaquin man tsain chipuquin man mucai. Ascan niaifofoan noco yocaifoan ahuuscain mucacainmun noncai raquiri huatiroma, —ishon niaifoan ato yoini.

⁴¹ Anori yoitan niaifoan ato nichian fonifo.

20

Pablo Macedonia yafi Grecia ano cani

¹ Ascano mucacani matsiaifoanno Pablonun Jesús tanamisifo cunani aqui funonfo. Aqúi fuaifoan ahuun tsainhuunshon aton ointi fupi huamani. —Natian un mato shinan fainicairan, —ishon ato yoitan atomaquinoashu Macedonia ano cani.

² Caashon tsain shara Jesushuunoo atoti yoiaicuni aton ointi unimanon. Asca Grecia mai ano nocotoshini.

³ Nanno oshu rafu non fusti nituyoni. Ascatan Siria ano pocufaini capaifiaquin nica ahuun caifo Israelifoan rutupaiyafufoan nicai shinan futsashu Siria catamarocon Macedonia ano nasocainicani.

⁴ Futsafo afu fonifo. Aton anufo futsan Sópater Berea anoa apa Pirro caino futsanfori Aristarco yafi Segundo Tesalónica anoafo foaino Gayo Derbe anoa caino rafunon fustiri Timoteo non Tíquico non Trófilo Asia anoashu afu fonifo.

⁵ Nanfo rucun Troas ano fonifo nannoshon noco manacani.

⁶ Ascainofin fusititian misi faranshashoma piinifo. Nan fusititian anaititan non Filipos anoashu pocufaini focani mucu fustiri oshan finontan non atoqui Troas ano noconi. Nocoashu siete oshatan nanno oshayoni.

Troas ano oinmitsaicai Pablo cani

⁷ Ascano Domingoaino non ichanan Jesús noco nashoni shinantani non misi toru-pacuashu pashcanain futsunon. Ascaino Pablonun ato Diosin tsain yoini. Iyoconaino cashquin yamunacucahuanaino ato yoiquin ununi.

⁸ Nan pushu cuyacoín ahuun osa rafu non fusti. Nan osa manaon ichananni. Atrifoan aton otatifo funifo. Fomancayanri otai futsuni.

⁹ Ahuun cunu pushfan ano tsaashu pushcohuai ahuun anu Eutico. Pablonun fasi chai ato yoiriaino oshani. Fasi osha muranshu pacuni. Cuyacunoashu osa rafu non fusti anoashu pacuni. Pacuashu naani.

¹⁰ Ascaino Pablonun aquí fotoshon icoancufoanni. Icoacufoan ato isca huani, —Na pushcohuaihuunoa shinanchacayamacahuun. Man niaquin, —ishon ato yoini. —Yoiai cuscan icon afanan man niaran, —inifo.

¹¹ Ascatan afanan Pablonun inacaitan misi torupacushon ato inan pacuni ato futan piishquin. Ascatan afanan ato yoiquin shafa huani. Shafaino atomaquinoashu cani.

¹² Ascano nantifi anoafo fasi unimaquin pushcohuai ahuun pushu ano iyonifo.

Troas anoashu Mileto ano cani

¹³ Ascatan Pablonun noco yoini, —Manfin shashon pushurasi ahuun anu Aso ano foicai. Unfin fain caicain matoqui chipo nocoshquin, —ishon noco yoini.

¹⁴ Aso ano nocotan no fu shasho naqui nanupacucahuani. Nannoashu non Mitilene ano fonifo.

¹⁵ Iyoconaino anoashu pocufaini non Quío cusumunri noconi. Shafa futsari non Samos cusumunri nocoshon nannoashu non Mileto pushurasi ano noconi.

¹⁶ —Non Efeso ano rutiatiroma. Non Jerusalén ano nocoriscapai fusititian ahuun anu Pentecostés icaitian non nocopai. Asca Asia ano non Efeso anori non rutiatirómaran, —ishon Pablonun ato yoini.

Jesús icoinra huafo aton cushumisifo Efeso anoafo Pablonun aton tsain shara yosini

¹⁷ Mileto anoshon Pablonun nocofunifo Efeso ano nichini icoinra huafo aton cushumisifo ihuunonfo.

¹⁸ Nocofoan Pablonun ato yoini isca huaquin, —Un mato muran nocoi tauashu un cani cuscan man man uhuunoa tapian.

¹⁹ Nocon Ifo Jesús un yonoshona. Nocon caifo Israelifoan ua asca huapaifiaifoanno un mato muran isharamisi. “Pablo tsoa futsan cuscaramancai,” un mato huamisima. Uncai mato anori shinanmapaimisima. Uaiyananrocon Upa Diosin ua yonoa cuscan un mato tapimapaoni.

²⁰ Ranotama un Diosin tsain mato tapimapaoni man Jesús tanasharanon. Ichananti pushu muran non pushufoti un mato tapimapaoni.

²¹ Nocon caifo non nocon caifomari un tapimapaoni isca huaquin, “Maton chaca shatucahuun Dios shinanshquin. Nocon Ifo Jesús icoinra huacahuun,” un ato huapaoni.

²² Ascano natian Diospan Yoshin Shara ua yonoa cuscan un Jerusalén ano cai. Anoashu-main un ahuuscai caicain uncai tapiama.

²³ Diospan Yoshin Sharapan ua yoia pushurasiti anoshon ua cunu muran iquimanaifo ua omitsiscamashcani. Nan fusti mun tapia.

²⁴ Ascacia un nocon Ifo Jesús yonoshoyamaino un nipaitiroma. Ua yonomapaiyai cuscan nan fusti un shinain. “Nantifi yorafoti Upa Diosin atohuun ramapai atohuun noicoín nan tsain shara ato yoitacahuun,” ua huani. Ua yononi cuscan un anaitipai.

²⁵ Upa Diosin ato iquina anomain ahuu cuscaraquin un mato tapimamisi. Un mato tapima cuscan nicafashocai man afanan ua oinnacama.

²⁶⁻²⁷ Nantifi Diosin mato amapaiyai cuscan un mato yomisi. Uncai shatumisima. Ascacun un mato Diosin tsain yomisi cuscan nicacasmamisifo omitsiscapanacafo muran fotirofiacai uhuun nuama. Mun ato yoiyomisi.

²⁸ Diospan Yoshin Shara matori yonoa Jesús icoinra huafo yoisharanon. Ascan oinfain. Isharacahuun. Diospan yorafo cushusharacahuun. Jesús ato nashoaino ahuun imi foni ahuun yorafo inonfo.

²⁹ Mun tapia un matomaqui caano amaquri yosimisifo matoqui fucani mato funomacani. Masharo pofupan inafu cuyopaitiro cuscan. Nanscarifi aquin afoanrifi mato funomapaicani.

³⁰ Mato muranshonri mafin ranan chipo Diosin tsain iconquin amaquri yoitirofo aton tanamisi inonfo.

³¹ Ascacun ¡Oinfain! Un mato yosimisi cuscan ointiaquimayamacahuun. Fari rafu non fusti un mato shafatifi yosifafainpaoni Jesús tanasharanon. Uaiyanan un mato yosifafainpaoni man funononfoma.

³² Natian un Upa Dios cufin mato cushusharanon. Mato noiai cuscan ahuun tsain maton nomuran tapimanon. Nanfohuunshon ahuun curushu mato inantiro ahuun tsain tanasharanonfo. Asca huatan Diosin ahuun yorafo catonni cuscan ahuunari man inon. Ato inansharapaoni cuscan matori nanscarifi huatiro man afu ipanon.

³³ Tsain futsari mato yoinon. Uncai maton pui yafi maton sahuutifo un fipaimisima.

³⁴ Man man tapia un non u futan yonomisifo yopamisi cuscan unfin yonocain ahuun rafanan fishquin un yonomisi.

³⁵ Man man tapian mato muran icashu un curushcai yonopaoni mato oinmashquin marifi curushcai yonoshon ahuun rafanan fishon ahuuomafoya isinincalfori man inantiro. Nocon Ifo Jesús yoini cuscan un ointiaquimama. Yoiri isca huaquin “Futsan noco ahuara inainno non unimafiatiro non futsafo inainno non mimacai unimatiroran,” ishon nocon Ifoan yoini. —Nannori Pablonun Efesofo ahuun tsain unutaqui yoini.

³⁶ Ahuun tsain yoiquin anaititan ato futan ratoconun mai chachishon Upa Dios cufinifo.

³⁷ Cufincatan uaiyanan Pablo icocufoannifo.

³⁸ —Mancai afanan ua oinnacamaran, —ato huaiton shinannifo. Fasi aton ointi noconifo. Ascashu afu unu cusumun fonifo. Pablo shasho naqui nanucainaino.

21

Pablo Jerusalén ari cani

¹ Ascano atomaquinoashu pashcapaiyamafiai non atomaqui pashcani. Shashon unuhuan pocufaincani non cayacafi pushurasi Cos ano non cani. Nannoashu iyoco futsaino pushurasi Rodas ano fonifo. Anoashu foi pushurasi Pátara ano noconi.

² Nannoa non shasho uhuapa futsan fuchini Fenicia ari caiton. Ascano ahuun nanufaini-foi non atofu cani.

³ Caquin non oian mai nushmancayan toomanhuan ahuun anu Chipre. Fari oai patashari finonfaini non Siria mai ano noconi. Nanno unuhuan cusumunri pushurasi ahuun anu Tiro. Ascano shasho naquishon aton mafo mapumanifo.

⁴ Mapuinifoan non Jesús tanamisifoqui noconi. Non atofu osha siete nanno non nituyoni. Nanfoan Diospan Yoshin Sharahuunshon Pablo yoinifo, —Jerusalén ano cayamahuu, —huanifo.

⁵ Jesús tanamisifo aton ainfofo ya aton facufori no fu pushurasi murannoashu unuhuan cusumunri fonifo. Nannoshon non nantifain ratoconun mai chachishon Upa Dios cufini.

⁶ Ascatan —Non mato shinanfainnicairan, —ishon yoicatan munininantanannifo. Ascatan shasho nanufainifo. Ascaino aton pushu ari nasofainifo.

⁷ Ascatan Tiro anoashu foi non pushurasi Tolemaida ano noconi. Nanno non Jesús icoinra huaa futsafo fuchitan non atofu osha fustiyoni.

⁸ Iyoco futsaino non Cesarea ano noconi. Felipe pushu ano non afu iyoi. Siete nan futsan catonni Felipe ato futan tushu pashcanan huafafainon. Ascafia ahuun yono cuyoano Felipe Jesushuunoa yoifoanfainmisi inon.

⁹ Ahuun facu shomaya rafu non rafuri Diospan Yoshin Sharahuunshon ahuun tsain yoipaonifo. Nanfo funuomafo ini.

¹⁰ Nanno non shafa ranan ini. Ascano Diosin tsain inonpacoai yomisi ahuun anu Agabo Judea anoashu nocoqui noconi.

¹¹ Nocotan Pablonun ahuun nanushumuti fiantan ahuun munushumucain onushumushon yoini, —Nan nanushumuti ifofin Israeli niaifofoan isca huashcaniquin. Ascashon niaifo futsafoanno iyoshcani. Anorifi Diospan Yoshin Shara ua yoiaquin, —Agabo ato huani.

¹² Noco yoiai cuscan nicacaquin non Pablo yoini, —Jerusalén ano cayamahuu, —non huani.

¹³ Noco cumani,

—¿Ahuuscain man uaiquimun? ¿Uarifi man uaimapaimun? Ua munushfain ua onushtiro. Jerusalén anofoan ua rutufiatiro uhuun Ifo Jesushuunoashu mun itishara apaiyaifo

cuscan ua huatirofo. Munfin itisharaquin uhuun Ifohuunoashu nashquin, —ishon Pablo noco yoini.

¹⁴ Noco nicayamaitocai non afanan ahua yoitiroma.

—Nocon Ifoan mia amapaiyai cuscan min huatiroran, —ishon non yoini.

¹⁵ Ascatan iyoco futsaino itishara huatan non Jerusalén ano cani.

¹⁶ Jesús tanamisifo Cesarea anoafano no fu fonifo. Mnasón pushu ano noco iyonifo. Nan Chipre mai ano ini. Nannoshon Mnasón futsafo futan Jesús icoinra huaquin tau huani. Ahuun pushu muran non iyoni.

Pablonun Santiago oincal cani

¹⁷ Non nocoaino Jesús icoinra huafo nocoqui fasi unimanifo. —¡Aicho! Man man oaquin, —noco huanifo.

¹⁸ Iyoco futsaino non Pablo fu Santiago icano cani. Icoinra huafo aton cushumisifori nanno inifo.

¹⁹ —Uhuun yoramishtichin non fasi unimai matoqui nocoashu, —ishon Pablonun ato yoini. Ascano Diosihuunshon aton caifoma muranshon ato ashomisi cuscan ato tapimani.

²⁰ Ascaiton nicacani, —¡Aicho nocon Diosin shararan! —huanifo. Ascano Pablo yoinifo, —Nocon yorashta non mia yoisharapai. Man min oian nocon caifo Israelifo ichapafaoan Jesús icoinra huafo. Nocon shuni Moisés noco yononi cuscari fasi tanasharapaicani.

²¹ Futsafoan ato yoiafo min nocon caifo Israelifo mai futsa ariafo min ato amaquiri yosi. Min ato yosian Moisés yononi cuscan afanan tananonfoma. “Nocon caifoan fuyamisi cuscara afanan tanayamacahuun. Maton facufo afanan aton foshqui rupa shatuyamacahuun,” ishon min ato yoiaiton nicacani miqumi musuafo.

²² Min nocoqui noco nicashceni. ¿Ascan non ahuuscatromun?

²³ Non shinain cuscan acahuun. Nocon nomuran non shinain isca huaquin. Nocofunufu rafu non rafuri Dios yoiafo isca huaquin, “Upa Diosin min noco yonoa cuscan non airan,” ishon yoiafo.

²⁴ Ascano na nocofunufu Dios fu tsainti pushu muran ato iyotahuun. Nocon fuyamisi cuscara ato futan huahuu nantifi chaca soanon. Min pui inanhuan nocon fuyamisi cuscan ato maruhuan. Min ato asca huaiton oincashon tapinonfo, “Iconma min Moisés yononi cuscan pota. Ascatarocon Moisés nocon shunifo yononi cuscan mirifi min tanairan,” ishon shinanonfo.

²⁵ Tsain futsari Jesús icoinra huafo nan nocon caifomahuunoa mia yoinon. Non ato yoiafa, “Moisés noco caifo yononi cuscan marifi acahuun,” noncai anori ato huaama. Non ato cunu fomani isca huaquin, “Dioscoinma aton diosiran huacashon tamanchinafo. A oincaquin tushu piyamacahuun. Man ascara piyaino futsafoanri mato oincaquin shinantiro marifi ato futan dioscoinma man fuchipai cufishquin. Ascan chaca itiro. Imi ayayamacahuun. Yoia yafi ina tumosishon ahuun imi foamano ahuun nami piyamacahuun. Maton ahuinmari chotayamacahuun. Maton funumari chotamayamacahuun,” ishon non ato cunushoniran, —ishon Pablo yoinifo.

Pablo Dios fu tsainti pushu muranshon achinifo

²⁶ Ascan man yoia cuscan Pablo nan rafu non rafuri nocofunufu Dios fu tsainti pushu muran iyoni ato futan ahuun caifoan fuyamisi cuscan anon. Aton chaca soashcaquin. Dios fu tsainti pushu niaifofo yoini, —Siete oshatan non nuno nituyoi nocon chaca soanon. Anaititan non Dios inanpacushquin. Non Upa Diosin yoita cuscan non anon, —ishon Pablonun ato yoini.

²⁷⁻²⁹ Siete oshano man anaiticuanaino Israelifo Asia anoafano Dios fu tsainti pushu muranno Pablo yafi nocofunufu rafu non rafuri fuchinifo. Fuchicashon aton caifo cunanifo, —Noco caifomishtichin noco futan acapun. Nan nocofunufu Pablonun manifesti ano cahuacacainquin noco yorafoqui tsain chaca yoifain nocon shuni Moisés noco yononi cuscan nicayamacahuun ato huafain nocon Dios fu tsainti pushuhuunoari tsain chaca huamisi. Natian iqia nocon caifoanmari iquimana nocon Dios fu tsainti pushu chaca huairan, —ishon oi ashcaffinin yoinifo. Nan Tróximo Efeso anoafano ini. Pablo futan pushurasi ano oinnifo. —Nocon caifomafiadun Pablo nanton Dios fu tsainti pushu muran iquimanaran, —ishon shinannifo. Ascafiaicai Tróximo ano inima.

³⁰ Ascano nantifi nanno ichanancashon ato Pabloqui tsain chaca huanifo. Fasi tsain fucash huanifo pushurasi anoafoti mucacainquin. Nicacatan pushufotifi aqui maconifo. Pablo achicashon Dios fu tsainti pushu muranshon chifi ninifainifo. Ascatanaino fupoti fuporiscatani.

³¹ Pablo rutupaifiaifono Romano ranushumuafu niaifoan mucaifoan nicani. Nantifi Jerusalén ano icafo mucaifoan nicani.

³² Nicaquin niaifo patasharifo non ahuun ranushumuaforifi mucaifoanno ichonifo. Niaifo yafi ranushumua futsafo fuchicatan Pablo sutufiacaquin unuriscatanifo.

³³ Niaifoan ahuun ranushumuafo yonoano Pablo cuno pono rafutan munushnifo. —¿Na nocofunumun tsoaquin? —ato yocani.

³⁴ Oi ashcafinin futsan futsa anori yoiaino futsanori yoinifo. Fasi mucaifoannocai niaifoan Pablohuunoa ahua tapinima. Ascano ahuun ranushumuafo yononi Pablo aton pushu muran iyononfo.

³⁵ Paiti ano nocotoshiaifoan ahuuscashoma achipaiquin cufuntoshinifo rutupaicaquin. Ascaifoan ranushumuafoan Pablo finifoanni atomaqui iyai inifoannifo atoqui musu huaquin rutunonfoma.

³⁶ Mufaincatan, —Ruturiscahuun, —oi ashcafinin huarianifo.

Pablonun yoini ahuunoa shinanchacanofoma

³⁷ Aton pushu muran iquimapaiyaiton Pablonun niaifo yoini,

—¿Un mia yocatiromun? —huaiton.

—¿Min Griego tsain tapiamun?

³⁸ ¿Minmun Egipcio? Nan nocon niaifo potapai 4,000 rutumitsamisifo tsoan istaipama ano iyoni. ¿Nanmun min? —ishon yocaiton.

³⁹ —Uncai aamafinquin. Unfin Israelifoquin. Un Tarso anoashu pushurasi uhuapa Cilicia murannoashu un caini. Natian ua yoipun un nan yorahuarasi yoinon, —huaiton.

⁴⁰ —Ato yoihuu, —niaifoan huaiton. Pablo paitinin mapuinfoantan ato mushashoni. Ascaino mucafiacani nishmapacufoannifo. Ascano aton tsainman ato yoiniquin.

22

¹ —Uhuun yoramishtichin ua nicacahuun un mato yoinon. Ua chaca huafo cuscan un mato cayacafi yoipai afanan uqui chaca shinanonfoma, —ishon ato yoini.

² Nan Hebreo tsainman ato yoiaiton nicacani fasi puusinifoma. Ascano afanan ato yoini,

³ —Unrifi un Israeliquin. Un Tarso pushurasi Cilicia murannoashu un cainni. Ascano nuno Jerusalén anoashu un pushconi. Nocon yorashtan Gamaliel ua yosipaoni. Nocon shunifoan noco yonopaoni cuscan nanti ua yosipaoni. Manfin fasi Dios tanapaisharai cuscan urifi nansca huapaipaoni.

⁴ Un Jesús tanapaiyaifo fuchishon un ato omitsiscamapaoni namapaiquin. Un nocofunufu non ainfofori achimapaoni ato cunu muran iquimashquin.

⁵ Un mato yoiyai cuscan nocon yorafohuunshon Dios cuffimisi niaifocoin non nocon Dios fu tsainti pushu cushumisifoan mato yoitiro iconquin. Ua cunu inanni ahuun yorafa Damasco ano inannon Jesús icoinra huafo anoashu Jerusalén anoa ihuushon ato cunu muran iquimanon.

Pablonun Jesús ifoa cuscan ato tapimani

Hch 9.1-19; 26.12-18

⁶ Ascashu un Damasco fain caino fari masafinin racano nocoti chaima samamashta nai ariashu chashariscatani.

⁷ Chashamanhuan acucahuanaino un pacuni. Pacuquin un ahuun oi nicani. “Saulo, Saulo, ¿Ahuuscaquimun mian omitsisacahuaicain?” ua huaiton.

⁸ “¿Min tsoamun, Ifon?” un huaiton. “Unquian. Jesús. Un Nazaret ano iyopaoni. Min ua omitsisca huairan,” ua huaiton.

⁹ U fu foaifoancai chashamanhuan oinfiacaquin ua yoiyai cuscan tsoan nicanima.

¹⁰ Ascaino un isca huani, “¿Ifon, un ahuacai huaimun?” ishon un yocaiton. “Funihuu. Damasco ano cayotahuun. Nannoshon min ahua huaimancain futsan mia tapimanon,” ua huani.

¹¹ Chashamanhuanun ua fuiconacai un catiro inima. Un fu fomisifoan ua mutsoshon Damasco ano iyonifo.

¹² Non nocooano nocofunumun ahuun anu Ananías ua oin oni. Nanton nocon shuni Moisés noco yononi cuscan tanamisicoin. Nantifi nocon caifo Israelifo nanno icafoan yoimisifo, “Ananías nocofunu shararan,” huamisifo. Ahuun noiafo.

¹³ Uqui nocoshon ua yoini, “Uhuun yorashtan Saulo, afanan oinhuun,” ua huani. Yoiaino un fupuinacahuani.

¹⁴ Ascashon ua yoini, “Nocon shunifoan aton Diosin mia catoan mia amapaiyai cuscan min tapitiro. Ahuun Furun shara oinfain ahuun tsain nicashquin.

¹⁵ Min oian cuscan huafain min nicai cuscari yorafoti min ato yoishquin.

¹⁶ Ascacun afanan manayamahuu. Funihuu mia unu muran iquimanon min chaca soashonon nocon Ifo Jesús icoinra huashon ismashquin,” ishon ua yoini.

Upa Diosin caifo futsan muran Pablonun ato tapimani

¹⁷⁻¹⁸ Ascatan Jerusalén ano nasocurani nocon Dios fu tsainti pushu muran iquini. Dios cufinquin namapan cuscara un nocon Ifo oinni. “Nuno afoan min ato uhuunoa yoiai cuscan mia icoinra huacanimaquin. Nuno Jerusalén anoashu cariscatahuun,” ua huani.

¹⁹ “Ifon, nuno icafoan tapiäfo un mia icoinra huafoti omitsiscamapaoni. Un ichananti pushufo ano cahuanscapaoni ato cunu muran iquimani ato coshaquin futsunonfo.

²⁰ Ascarifiatan Esteban minhuunshon rutuaifono unrifi nannorisi shinanquin un ato yoini. Futsafoan Esteban rutuaifono un aton sahuutifo cushushoniran,” ishon un nocon Ifo yoini.

²¹ “Cayotahuun. Un min caifo futsa muran mia nichu uhuunoa ato yoinon,” ishon ua yoiniran, –ishon Pablonun ato yoini.

Romano niaifoa Pablo cushuni

²² Nicasharayonifo. –Un caifo futsan muran cairan –ato huaino afanan nicapainifoma. Oi ashcafinin cunanifo, –Nan nocofunun chacashuni. Rutucahuun afanan ninoma. Nanon, –ishon tsain fucashni huanifo.

²³ Asca huacatan aton sahuutifo foman caya potainifoancatan mapori foman caya saanifo. Fasi mucainifoannifo.

²⁴ Ascaino ranushumuafoan aton niaifoa yonoano Pablo aton cunu muran iquimanifo, –Iquimacahuun. Coshaqui futsashon. Fichin coshaquin yocacahuun isca huaquin “¿Ahuuscain miqúi fasi sinacanimun?” ishon yocahuun nonri tapinon, –ishon niaifoa ato yoini.

²⁵ Asca huatan mushanhuanshon puchi coshapaiaifoa Pablonun ranushumua niaifo patashari yoini,

–Unfin Romanoquin. Ua chaca huati huaafishocai tsoan ua yocama iconmainquin. ¿Ascain isca huaquin min niaifoa mato yonoamun ua man isca huanon? –ishon yoini.

²⁶ Nicatan ahuun niaifo ano carisani,

–¿Ahuuscain min na nocofunu coshamamun? Nanfin Romanoquin, –ishon yoini.

²⁷ Nicatan niaifo Pablo ano cani,

–¿Icomun. Min Romanomun? –ishon yocaiton.

–Ainfain, Unfin Romanoquin, –huaiton.

²⁸ –Unfin Romano ipaiquin un pui ichapa niaifo inanni ua Romano imanon, –huaiton. –Ascashiashu uncai tsoa pui inanmisima. Unfin Romano cainniquin, –ishon Pablonun yoini.

²⁹ Nicacani ranushumuafoan fichin coshapaiafacani amaquinoashu foriscanifo. Niaifo arifi ratuni. –¡Ohua! Na nocofunu Romanofiacun un cuno pono rafatan munushua, –ishon shinanni.

Israelifoa niaifoa aton ointaifi Pablonun yoini

³⁰ Ascano Israelifo Pabloqui sinaquin aqui tsain chaca huanifo ahuuscainun iscaiquin ishon ranushumua niaifoa tapipaini. Ascano iyoco futsaino Pablo ahuun cuno pucashon nocon yorahuunshon Dios cufimisi niaifoa yafi Moisés cununi cuscan tapimamisifo yononi, –Ichanancahuun Pablo maton ointaifi man yocanon, –ishon ato yoini. Asca huatan Pablo ato ano iyonifo.

23

¹ Ato oinquin Pablonun ato yoini, –Uhuun yoramishtichin, Upa Diosin ua yonoa cuscan facuashu un tauni cuscan natianri un ascamisi. Un mato yoiai cuscacoin uhuun nomuran un icoinra huai, –ishon ato yoini.

² Ascaiton aton yorafohuunshon Dios cufimisi niaifocoin Ananiasin futsafo Pablo chaimashta niafo yoini, –Apasihuun, –huaiton,

³ –Min fuparapaimisi. Upa Diosin mia coshatiro. Min futsafo shinanmapai Moisés yononi cuscan un aamaran ishon. Ascain mincairocon ascama. Moisés yononi cuscacai chaca huai tapishoma non yora onaintimatiroma. Asca ahuascain min futsa min yonoamun ua apasinon, –ishon Pablonun niaifo yoini.

⁴ Chaimashta niafoan yoinifo, –Ahuuscainun min nocon yorafohuunshon Dios cufimisi niaifocoin min tsain chaca huaquin, –huaifoa.

⁵ –Uhuun yoramishtichin, un onanma nanton nocon yorafohuunshon Dios cufimisi niaifocoin. Diospan tsain cunuquin isca huani, “Maton niaifoa ato tsain chaca huayamacahuun,” –ato huani.

⁶ Ascano Pablonun samamashta shinan futsani. Ahuun caifo nanno ichananfo atirifi Saducefofo non atirifi Farisefofo. Ascano ato yoini,

–Uhuun yoramishtichin, unfin Fariseoquin. Uhuun upa non uhuun shuniforifi Fariseofoquin. Yora naashu funicun un icoinra huaicain. Ascain uhuunoa tsain chaca huai na shafatan ua asca huapaicaniran, –ishon ato yoini.

⁷ Ascaiton nicacانشu Saduceofo non Fariseofo fochishmanantanannifo. Niaifofoancai anoris shinannifoma.

⁸—Non naashucaí non funitiro. Nocon yoshin yamai. Diosin oinmati afu nai muran icafori yamairan, —ishon Saduceofoan yoinifo. Ascaffiaino Fariseofoan yoinifo, —Non naashu non funitiro. Nocon yoshin nipanaca. Upa Diospan ahuun oinmati afu nai muran ica ichaparasiran, —ishon yoimisifo.

⁹ Ascano nanno ichananshu fasi mucanifo. Fariseo futsanfoan Moisés yononi cuscan tapimamisifoan nishon yoinifo,

—Na nocofunu Pablocai ahua chaca huama. Noco ahua chaca yoiama. Itsairaca yoshin shara iyamarai Diospan nai oinmatinin Damasco fai anoshon Pablo yoiniran, —ishon yoinifo.

¹⁰ Ascaino fasi mucariacaquin. Pablo achitan nininain futsunifo. Ascaiton ranushumua niaifoan oin Pabloqui musuni, —¡Ohuashta! Pablo nininain futsucani un numaiyamaino rututirofoquin, —ishon ahuun ranushumuafu yononi. —Numanon. Nocon pushu muran iyocahuun, —ato huani.

¹¹ Nan yamutan nocon Ifo Jesús Pabloqui noconi. —Pablon shinanchacayamahuu. Jerusalén anoafu min ato uhuunooa yoimisi cuscan huafain Roma anoafu nanscarifi huaquin yoihuu, —huani.

Pablo rutushquin itisharanifo

¹² Ascan iyoco futsaino Israelifo ichanancashon yoinifo, —Non Pablo rutuataima non piqui tunufain non ahua ayaima. Non asca huayamaino Diosin noco asca huanonran, —ishon yoinannifo.

¹³ Cuarenta nocofunufuon anori yoinifo.

¹⁴ Asca huacatan nocon yorafohuunshon Dios cufimisi niaifofo non Dios fu tsainti pushu cushumisifo ano fonifo chani huai focani,

—Non yoia non Pablo rutuataima non piqui tunufain non ahua ayatiroma. Non asca huayamaino Upa Diosin noco asca huanon. Non nantiffain anori yoi.

¹⁵ Ascan natian niaifofo patashari matofu ichananfaitafo aton ranushumuafu niaifo fuparashocahuun. Yoicahuun isca huaquin, “Noco Pablo ihuushotacahuun non afanan yocasharanon cayacafi ahuunooa tapicoinnon,” ishon yoihuu. Ascaiton oinquin cahuanaiton achishon non rutunon, —ishon yoinifo.

¹⁶ Ascano yoiaifo cuscan Pablonun ahuun piacan nicatan ahuun cocaqui chanini.

¹⁷ Nicashon Pablonun ranushumua niaifo patashari cunani, —Uhuun piacan ahua min niaifo yoipai. Ascan min niaifo ano iyoriscahuun, —huani.

¹⁸ Ascano niaifo ano iyoní. Nocoano,

—Niaifoan, Pablonun ua cuna. “Uhuun piashan, min niaifo ano iyoriscahuun ahua yoinon,” —ishon ua yoia.

¹⁹ Ascashon niaifoan pushcohuai mutsoinifoan chaimashta iyoní, —¿Ahua min ua yoipaimancain? Ua yoihuu, —huaiton.

²⁰—Uhuun caifofo nan Israelifoan mia fuparapai fucani. Mia isca huacani,

“Noco Pablo ihuushotahuun non afanan yocapaicai ahuunooa cayacafi non tapinon,” mia huai fucani.

²¹ Ato icoinra huayamahuu. Uhuun coca atoqui iyoyamahuu. Cuarenta nocofunufuon fai cusumunshon cushuafoqui uhuun cocan ato finoainton achishon rutushcaquin. “Non Pablo rutupaiyachaincai non ahua piyamafain non ahua ayayoima. Non asca huayamaino Upa Diosin noco rutupainonran,” ishon yoiafo. Natian samamashta miqúi fucani mia yocai fucaniran, —ishon furonanfacun yoini.

²² Nicatan ranushumua niaifoan, —Mian yoia cuscan tsoa futsa tapimayamahuu, —huatan furonanfacu nichini.

Pablo niaifo Félix ano nichinifo

²³ Nichitan niaifo patashari rafu cunani, —Doscientos ranushumuafu nichifain setenta ranushumuafu caballo camaqui nichifain doscientos ranushumuafu ashin ya un nichicain. Ato yoicahuun itisharanonfo Pablo na yamu a las nueve Cesarea ano iyocaniquin.

²⁴ Pablóri caballo inanyohuu niaifo Félix ano iyosharanonfo, —ishon ato yononi.

²⁵ Yoitan ranushumua niaifoan ahuun niaifo cunu fomani isca huaquin,

²⁶—Unquian Claudio Lisias. Un mia cunu fomai min tapinon.

²⁷ Un nocofunu ahuun anu Pablo miqúi nichishquin. Ahuun caifoan Israelifoan achicashon rutucuanafu. Mucaifoan nicaquin uhuun ranushumuafu futan un Pablo numaita.

²⁸ Ahua chaca huamainquin tapipaiquin Israeli niaifofo ichanain ano un iyooa.

²⁹ Afoan yoiai cuscan nicashon mun tapia na nocofununcai ahua chaca huama. “Nocon caifoan yononi cuscacai Pablo amisima,” ishon nan fusti ahuunoa yoiafo. Ascan ahucacai chaca huamafinquin iquimafain rutupananfoan.

³⁰ Futsa uqui chania Israelifoaan ua fuparapaicani Pablo rutushcaquin. Tapishon un miqúi nichirisca. A chaca huafori un yonoa miqúi focani Pablomain ahua chaca huaquin mia yoinonfo. Nanti uhuun niaifon Félix, —ishon cunushoni.

³¹ Ascano aton niaifoaan ato yonoa cuscan yamu Pablo Jerusalén anoshon Antípatris ano iyonifo.

³² Iyoco futsaino atirifi aton pushu ano naso furanifo. Ranushumuafu caballo ya fusti Cesarea ano iyonifo.

³³ Cesarea ano nococashon Pablo niaifo ano iyonifo. Ranushumua niaifo ahuun cunuri niaifo Félix inanni.

³⁴ Cunú oinquin yocani, —¿Min rani icamun? —huaiton. —Unfin Cilicia anoquin, —Pablonun huani.

³⁵ —Mia chaca huafo nocoafotian un mia cunashquin non ichananon man ua yoinon, —ishon yoini. Yoitan nan Herodes niaifo icano nichini, —Pablo cushusharacahuun, —ahuun ranushumuafu yononi.

24

Pablonun Félix niaifo yoini ahuunoa shinanchacanonma

¹ Ascatan osha mucu fustiti finontan Israelifo aton niaifocoin Ananías Cesarea ano cani. Aton ichananti pushu niaifofori afu fonifo. Nocofunu futsa ahuun anu Tértulo arifi atofu cani. Nanton Romano niaifofu yononifo cuscan fasi tapicoinni. Nococashon niaifo Félix nanfo yafi Pablo ichanan huani aqúi tsain chaca huafoan nicanon.

² Ascatan Tértulo yoini isca huaquin,

—Nocon niaifoaan, min noco iquina fasi sharacoin. Min niaifo iyopaonitian non natianri noco tsoan fucash huaama. Min niaifoataimacai non isharamisima. Natian ascatamarocon mihuunoashu non fiananan non ahua yopaima.

³ Ascano non mia aicho huai. Nantifi uhuun caifoti miqúi unimacoin. Min noco shara huamisi.

⁴ Ascafia un mia chai yoiriapaima min fucashnonma. Un mia ichapama yoipai noco nicayopun, niaifoaan.

⁵ Nan nocofunu Pablonun fasi nocon caifo Israelifo fucash huamisi. Icafoti mucamamisi. Nocon caifo amaquiri shinanmapaiyaifoaan aton anufo Nazarenonfo. Pablo aton niaifo.

⁶ Nocon Dios fu tsainti pushu chaca huapayaiton non achitan.

⁷ Nocon caifoaan yononi cuscan non onaintimacuanita ranushumuafu aton niaifoaan Lisias cushuyamacun curushcain yonoano nocomaquishon numaita.

⁸ Mifi yocashon min tapitiro ahuunoa chaca non yoia cuscan iconcoiran, —ishon yoini.

⁹ —Niaifoaan. Nocon yora Tértulo Pablohuunoa yoia cuscan iconcoiran, —ishon Israelifo nannofoan yoinifo.

¹⁰ Yoicatan niaifoaan mushashonaiton Pablonun a yoini,

—Niaifoaan, uhuun caifo futsa chaca huapayiaifoaan min nicamisi. Fari ichapa min ato nicamisi. Icon iyamarai iconma min yomisi. Ascan ranotama uhuunoa un mato yoi min tapitiro uncai ahua chaca huamisima.

¹¹ Futsafoan mia yoitiro osha doce finontan un Jerusalén ano caita nocon Dios fu tsainti pushu muranshon Upa Dios cuficai.

¹² Nunoshon ua chaca huapayiaifoaan Dios fu tsainti pushu murannoashu un tso fu fochishmanantanmisima. Un nocon ichananti pushu muranshon yorafo mucamama. Jerusalén anofoancai un yorafo mucamama.

¹³ Afoancai ahua oinmatirofoma un chaca huacun.

¹⁴ Icon, un ranotama mia yoitiro nocon shunifoaan aton Dios urifi noiquin un cufimisi. Nocon Ifoan noco yosipaoni cuscan un tanamisi. Un non futsafoan tana cuscan amaquiriran man huamisi. Nocon shuni Moisés yononi cuscan nantifi un iconra huaiquin. Nocon caifon Diosin tsain yomisisifoaan cununi cuscan nanfori un iconra huaicain.

¹⁵ Diosin yoini cuscan yora sharafo yafi chacafori funimashquin uhuun caifo nuno nanfo iconra huaifo cuscan urifi un iconra huamisi.

¹⁶ Ascacun un isharapaimisi cuscan uhuun nomuran un tapin un Dios yorafo chaca huamisima.

¹⁷ Fari ranan un Jerusalén ano icama. Ascan natian un nasoita uhuun yora ahuuomafu pui inashquin Upa Dios fu tsainti pushu muranri un iquita Upa Dios ahuafo inanshquin.

¹⁸ Nocon Diosin tsain noco yononi cuscacoin un huua. Un Upa Diosin ahuun ointaifi chaca huatamarocon un iisharaqin. Nanscara uhuun caiffoan Dios fu tsainti pushu muran ua fuchiafo. Yorahuanrasicaí ufu icafo. Tsoacai mucama.

¹⁹ Uhuun caifo Asia anofoanraca un ahuara chaca huaiton oianfo ahuuscain miqui fuafomamun mia yoishcaquin.

²⁰ Uhuun caifo nunofoanri ua oianfo nocon niaiffoan aton ointaifi un ato yoiaiton. ¿Ahuuscain afoanrifi uhuunoa ahua chaca yoiafomamun? Uncain ahua chaca huama. Ascan uhuunoa ahuaacai chaca yoitirofoma.

²¹ Ahuara fustishta nocon caifo niaiffoan ointaifi un ato yoia, Oi ashcafinin un ato yoita, “Yorafoti naacanashu afanan funishcaini.” Ascacun ua miqui ihuuafo min ua nicanon. Afoanri mia yoipaicani mian asca huanon, —ishon Pablonun niaifo yoini.

²² Nicaquin Félixpan nantifi nanno ichananfo ato yoini. —Natian non unuyonon, —ishon ato nichini. Arifi Jesús icoinra huafon amisifo cuscan tapisharamisi.

—Ranushumua niaifo Lisias nocoafono un mia ahuusca huaimancai mia yoitiro, —ishon niaiffoan Pablo yoini.

²³ Ascacun niaiffoan ranushumua yoini, —Cunu muran Pablo iquimafashon ahuusca huanonma. Ahuun yorafon oinpaipayaiton ato iquimahuu Pablo pimasharanonfo. Yopai cuscan inanonfo, —ishon Félixpan ranushumua niaifo yoini. Yoitan Cesarea anoashu mai futsa ano caní.

²⁴ Shafa ranan finontan Cesarea ano nasocurani. Ahuun ahuin Drusila afu oni. Nan ainfo Israeli shafu. Nococashon Pablo cunanifo nicashquin. Ahuuscashomain Jesucristo icoinra huatirofoquin Pablonun Félix yafi ahuin yoini.

²⁵ Futsafoanri ahua futsa ato yoini. Upa Diosin noco imasharatiro yoifain ahuuscashomain non chaca huapayai cuscan non potatiroquin yoifain Upa Diosin nantifi noco yoishquin ratofomain afu ipatiroquin atirifi omitsiscapanacafo muran focani. Pablonun afohuunoa yoini. Nicai Félix fasi ratuni.

—Nanscanon. Nanti. Min natian catiro. Un ahua futsa huayamaquin un mia afanan cunatiro, —ishon yoini.

²⁶ Yoiaifono ahuun nomuran shinanni, —Pablo cunu murannoashu cainpaiquifin ua pui inantiroquin un caimanon, —ishon shinanni. Ascacun cunafainpaoni afu tsaishquin.

²⁷ Israeliffoan ahuunoa shinansharanonfo ishon Félixpan Pablo cunu murannoa caimapaanima. Fari rafu nanscan huapaoni. Ascan fari rafu finonmani niaifo futsa tuquihuani, ahuun anu Porcio Festo.

25

Pablonun Festo niaifo fu fusoiquinanshu yoinanni

¹ Ascaino Festo nocotoshitan niaifoni. Nocoashu osha rafu non fusti finontan Cesarea anoashu Jerusalén ano caní.

² Nocoano nocon yorafohuunshon Dios cufimisi niaiffo non Israeli niaifo futsafoan aqui funifo Pabloqui tsain chaca huai fucani.

³ Festo fuparapaiquin yoinifo, —Niaifo Festo, ranushumuafo yonohuun Pablo nuno ihuunon. Noco ashopun, —huanifo. Fai pochininshon Pablo cushupainifo rutushquin. Rutupaicaquin niaifo fuparapainifo.

⁴ Ato cumani, —Pablo cunu muran Cesarea ano ica. Urifi samamashta un ari cai.

⁵ Ahuara chaca huacun maton niaiffo yoitacahuun ufu canon. Nannoshon na nocofunu man yoiti huatiroquin, —huani.

⁶ Ascan huatan atofu osha mucu rafuti iyoni Cesarea ano nasocurani oni. Iyoconaino ato ichanan huani. —Pablo uqui ihuucahuun, —ishon Festopan ato yononi.

⁷ Nococun ahuun caifo Israeliffoan Jerusalén anoashu fucashon yoiti huanifo. Yoifaitocai tsoan ismacoinnima iconmainquin.

⁸ Ascaiton Pablonun ato cumani isca huani,

—Aririma. Uncai ahua chaca huama. Uhuun caifo Israelifo nocon shunicaiffoan yononi cuscacai un potamisima. Nocon Dios fu tsainti pushu un a muranshon ahua chaca huayamafain Romanoffoan yonomisi cuscaricai un yoitima imisima, —ishon Pablonun yoini.

⁹ Ascatan niaifo Festopan Israelifo ahuunoa shinansharanapaquin Pablo yoini, —¿Min Jerusalén ano catiromun min caiffoan mia yoitihuai cuscan nannoshon uhuun ointaifi min cumatiro? —huaiton.

¹⁰ —Ma. Nuno Romanoffo aton niaiffoan yoitiro un chaca huua iyamarai un chaca huama. Minfin tapisharaqin uncai uhuun caifo Israelifo un chaca huamisima.

¹¹ Un ahuara chaca huacun ua rututirofo. Ascafiashucaí uqui chaca huafo cuscan iconyamaino tsoancai ua atoquí nichitiroma ua rutunonfo. Unfin niaifocoin Cesar ano capaicaín uhuunoa yoishquin, —ishon yoini.

¹² Nicatan Festopan afu niaifofo patashari yoinannifo. Tsainquin anaititan yoini, —Mihuunoa min niaifocoin Cesar yoipai. Ascacufin min Cesar ano catiroquin, —ishon niaifoa Pablo yoini.

Pablonun Agripa niaifo fu fusoiquinanshu yoinanni

¹³ Ascano shafa ranan finontan niaifo futsan ahuun anu Agripa yafi ahuun chico Berenice Cesarea ano funifo niaifo Festo oinfucani.

¹⁴ A futan shafa ranan finoanno Festopan niaifo futsa Pablohuunoa tapimani.

—Nocofunun futsa nuno ica. Nan Félixpan cunu muran iquimani.

¹⁵ Un Jerusalén ano cayamua Israelifoan ahuun yorafohuunshon Dios cufimisi niaifofo non Dios fu tsainti pushu cushumisifo uqui fucashon nan nocofunu ahuun anu Pablo ua yoitihuamanonfo. “A onaintimahuu,” ua huayamuafo.

¹⁶ Un ato yoia non Romanofaan nocon fuyamisicaí ascarama. Nocofunu ahuara chaca yocashomacai non onaintimatiroma.

¹⁷ Ascano ufu fuyamuafo nuno Cesarea anoshocai un ato manayamuama. Iyoconaino un ato ichanan huama. Nocofunun ahuun anu Pablori un iquimani.

¹⁸ Ascaitan ahuun caifofo un yoia, “¿Natian ua yoihuu ahua chaca huamun?” un ato huua. Uhuun nomuran un shinan na nocofunun ahuara fasi chaca huua. Ascafiacaí ua anori cumacanima.

¹⁹ Ascatamarocon atofu Diosihuunoa fochismanantanancani yoifain nocofunun Jesushuunoaí un yoiafo. “Nan Jesús naafiashu man funini,” Pablonun yoia.

²⁰ Afohuunooacai un tapiama. Un mun ahuuscaicaín uncaí tapitiroma. Ascacun un Pablo yocan, “¿Min Jerusalén ano ufu catiro min caifofo muran mia chaca huafo cuscan min ato cumanon?” ishon un yocan.

²¹ “Ma. Unfin niaifo Cesar ano capaicaín uhuunoa yoicai,” ua huaita. Ascan un yonoo Pablo cunu murannoa ranushumuafo cushunonfo Cesar ano un nichiaitian, —ishon ato huani.

²² Nicatan, —Urifi na nocofunu nicapairan, —ishon Agripanun Festo yoini.

—Funamanri min nicai, —huani.

²³ Iyoconaino niaifofo ichanancashon niaifocoinchi Agripa yafi ahuun chico Berenice pushu muran iquiafono manutifo chaan chaan acaino nantifi funinifo nan niaifo tsoaitian. Ascan Festopan yonoo Pablo iquimani.

²⁴ Iquishon Festo yoini,

—Uhuun niaifo Agripa yafi no fu ichananfo na nocofunu ahuun yorafo nan Israelifo Jerusalén anofo non Cesarea anofoan ua yoiafo, “Nan Pablo rutuhuu,” ua oi ashcafinin yonoofo.

²⁵ Asca huafiainfonocai un ahuunoa un tsain chaca yoiaifoan un nicama. Ascashon ahuun tsainri un nica. Tsain chaca huafo cuscan yafi ahuun tsainri nicashon un shinan ahuacai chaca huamafinquin naashquin. Un cunu muran nichipaifia, “Un niaifo Cesari yoipai uhuunoa tapinon,” ishon ua yoia. Ascan un Roma ano nichicain.

²⁶⁻²⁷ Ascafia ahua chaca huayamacucaí un ahuunoa Cesar niaifo cunushotiroma. ¿Nocofunucaí ahua chaca huua non yoitiroma? ¿Ahuuscaí non niaifon Cesar ano nichitiromun? Un shinan un asca huacai sharama. Ascan mato ointaifi un na nocofunu iquimani man non nocon niaifo Agripa man nicaítan man yoitiro ahuarafo raquirimain un niaifo Cesar un cunushonicain, —ishon Festopan ato yoini.

26

Pablonun Agripa niaifo yoini cuscan

¹ Ascatan niaifo Agripan Pablo yoini,

—Min noco yoipaiyai cuscan noco yoihuu, —huaiton. Ascano Pablonun mushainacahuun ato yoini ahuunoa shinanchacanofoma.

² —Niaifo Agripa un shinai uhuunoa un mia yoitiro. Uhuun caifo nan Israelifoan ua chaca huafo cuscan un natian mia yoitiro uhuunoa yoiafo cuscan min icoinra huanonma.

³ Min uhuun caifo imisi cuscan nocon shunifoan noco yonopaoni cuscan nanfo min tapicoian. Ascan niaifoan funaquima ua nicasharapun un mia yoinon.

Pablo Jesús ifoataima ipaoni cuscan

⁴ Un furonanfacu ipaonitian natianri uhuun caifoan uhuunoa tapi sharafo. Un cainni anofoan yafi Jerusalén anofoanri un icai cuscan tapisharafo.

⁵ Fari ichapa ua onanmisifo. Nocon shunifoan noco yononi cuscan un tanasharapaoni. Uhuun caifoan Diosin tsain tanasharacan Fariseoran, huamisifo. Urifi Fariseo ipaoni. Un mia yoiyai cuscan uhuun caifoanri tapiafo. Unmain icon yoicain mia yoipaiyaifo cuscan mia yoiitirofo.

⁶ Upa Diosin nocon shunifo yoyiotiani cuscan un iconra huamisi. Ascancunfin ua chaca huafoquin maton ointaifi na shafatan ua ihuafo.

⁷ Uhuun yorafo nan shoco doce maniafo shafatifi yonofafaincani Diosin nocon shunifo yoyioni cuscan fishcaquin. Uhuun niaifoan, uarifi fuchipaifaition, “Na nocofunun chaca huaran,” ishon uhuun caifoan ua chaca huafo.

⁸ Yora naashu funitiro un iconra huaa. ¿Nan un iconra huaino chacamun? ¿Marifi shinanmamun Diosin nan ahuamamishti huatiro ahuun curushhuunshon naafo funimatiro? ¿Man iconra huatiromamun Upa Diosin naafo funimatiro?

Pablonun Jesús iconra huafo omitsiscamapaoni cuscan

⁹ Ipaoni urifi Jesús Nazaret anoashu pushconi ahuun tanamisifo un fasi chaca huapaoni.

¹⁰ Jerusalén anoashu un ascapaoni. Nocon yorafohuunshon Dios cufimisi niaifofoan ua yonoai cuscan un Jesús iconra huaafo cunu muran iquimapaoni. Ato rutuaifono, “¡Aicho! Ato rutuhuu,” un huapaoni.

¹¹ Nocon ichananti pushuti muran un iquipaoni Jesús tanamisifo omitsiscamai. “Jesús sharamaran,” un ato huapaoni. Anori yoyiamaifoan un ato omitsiscamapaoni Jesús afanan tanapaimaran inonfo. Nocon caifoma anori un capaoni Jesús tanamisifo omitsiscamai.

Jesús ifoan cuscan Pablonun afanan yoini

Hch 9.1-19; 22.6-16

¹² Un Damasco ari cani ato omitsiscamaicai. Nocon yorafohuunshon Dios cufimisi niaifofoan ua cunu inanni un ato achimashon cunu muran iquimanon.

¹³ Uhuun niaifoan, un Damasco fain caino fari masafinin racano nai murannoashu fasi chashariscatanaiton un oinni. Fari chashatiromaquin fasi chashacointani. U fu foainfoanno chashariscatani.

¹⁴ Un pacuriscataquin un ahuun oi nicani. Uhuun tsainman Hebreo ua yoini, “Saulo, Saulo. ¿Ahuuscaquimun mian omitsiscamaquin? Mifi min omitsisca huamuaquin,” ua huaiton.

¹⁵ “¿Ifon, min mun tsoaquin?” huaiton. “Unquian Jesús. Mian omitsisca huamamisi.

¹⁶ Funiuu. Un mia oinmanaquin. Un mia catoan uhuun oinmati min inon. Min uhuunoa natian oian cuscan futsafo yoifain chipo mia oinmai cuscari min ato yoiitiro.

¹⁷ Min caifoan mia rutupaishquin. Yora futsafo muran un mia nichu. Afoanrifi mia rutupaifaino un mia cushusharatiro.

¹⁸ Uhuunoa min ato yoishquin. Natian faquish muran ica shinantsa. Uhuunoa min ato yoishquin afanan faquish itamarocon shafa muran inonfo. Natian Satanás aton ifon ato iquina. Uhuunoa min ato yoishquin afanan ato ifo itamarocon Diosin ato Ifo inon. Ascano ua iconra huacashon aton chaca rauhuatiro Diosin ato catoan ahuun yorafo fu ipanonfo,” ishon ua Jesús yoini.

Upa Diosin ahuun namapan cuscara yoini cuscan Pablo man aa

¹⁹ Asca huatan, niaifon Agripa, ua nai muranshon yoini cuscan cai un yoitimamisima.

²⁰ Maton chaca shatucahuun Diosiquiri shinanshquin. Isharashcaquin mato iconra huanonfo maton chaca shatucainshon Dios tanacahuun. Nannori un Damasco anoafo yoifain Jerusalén anoafo yoifain Judea mai anoafoti yoifain uhuun caifomari un ato nantifi yoisimisi.

²¹ Ascano uhuun caifoan Dios fu tsainti pushu muranshon ua achiafo ua rutushquin.

²² Ua rutupaifaino Upa Diosin ua cushusharamisi un natian nia. Ascano un nantifi yoifainfainmisi. Nocon shuni Moisés yafi Diosfin inonpacoai cuscan yoisimifoan yoipaoni cuscan urifi nannoricoan un yoisimisi.

²³ “Nocon Cristo omitsiscai. Naafishu funi tauniquin. Funishon uhuun caifo nan Israelifo yafi Israelifoma yoishquin ahuuscashumain Upa Dios fu ipatirofoquin,” ishon ato yoipaoni. Urifi nannorisi un yoisimisan, –ishon Pablonun yoini.

Pablonun Agripa shinanmapaini arifi Jesús iconra huanon

²⁴ Yoiatton Festopan Pablo tsainfiatton shutinifoanni.

Yoiquin, –Pablon, min fari ichapa cunu tapifafainmisi. Ascacun natian min nison cuscara, –ishon Festopan yoiatton.

²⁵ –Ma. Niaifo Festo uncai nison cuscarama. Un mato yoiya cuscan iconcain. Yorafoan shinansharaifo un mato yoiya cuscan iconra huatirofo.

²⁶ Un mato yoia cuscan niaifo Agripa nicamisi. Ascan un shafacafi afohuunoa yoitiro. Un shinan arifi afohuunoa nicamisi. Man onan. Un mato yoia cuscacai onutirofoma. Nantifiton nicacuanifo.

²⁷ ¿Niaifo Agripa, min Diosin tsain inon pacoai yoishomisifo icoinra huaimun? Mun tapia min ato icoinra huairan, —ishon Pablonun yoini.

²⁸ —¿Man min shinain min samamashta ua Criston ahuun yora imatiromun? —niaifoan huaiton.

²⁹ —Samamashta iyamarai chipo un icai cuscan min non futsafo nuno ua nicaifori ua cuscara ipainonfo munushumutama. Nannori un mato Dios cufishonaran, —ishon Pablonun yoini.

³⁰⁻³¹ Nicashon niaifon Agripa futan niaifo patashari non Berenice cunu murannoashu cainfuranan yoinannifo,

—Na nocofuncai ahua chaca huama cunu muran iquicain napanan.

³² Na nocofunun, “Un Cesar ano capairan,” iyamaiton non nichisharacuanaran, —ishon Agripan Festo yoini.

27

Pablo niaifoan Roma ano nichini

¹ Ascano niaifoan yononi noco shashohuan muran Italia mai ano nichinon. —Pablo yafi afu cunu muran iquiafo Italia ano iyotahuun, —niaifoan afu niaifo ranushumua ahuun anu Julio yononi.

² Ascaiton non Adramitio anoashu nanufaini Asia mai ano fonifo. Nocofunu ahuun anu Aristarco no fu cani. Nanton ahuun mai Tesalónica Macedonia muran. Unuhuan non pocufaini.

³ Cai iyoco futsaino non Sidón ano noconi. Nocoshon ranushumua niaifo Julionun Pablo shara huapaquin yoini, —Min nuno maputiro min yorahuan nuno icafoan min yopai cuscan mia inantiroforan, —ishon yoini.

⁴ Ascatan chipo Sidón anoashu non unuhuan pocufaini. Fuuhuanun noco catima huaino mai nushmancayan toomanhuan ahuun anu Chipre turocomucaini non cani. Ocuma futsan fuhuanun noco catima huani. Noco mushquihuuri fonifo.

⁵ Ascatan Cilicia mai cutanfoicai Panfilia mai futsari cutancuicai Mira pushurasi ano non noconi. Nan Mira Licia muran ini.

⁶ Nanno ranushumua niaifoan shashohuan fuchini. Alejandría anoashu shasho muran noconifo Italia ano focani. Ascano ranushumua niaifoan shashon ifo yocani. —Non shashohuan muran mifu Italia ano capai. ¿Min noco iyotiromamun? —huani.

⁷ Non caino fuuhuanun noco catima huaino funainquimashta non cafoni. Fasi man shocunashu non Gnido cusumunri nocopaifai non nocotiroma. Ascan fuun afoforinoashu fuaino mai nushmancayan toomanhuan ahuun anu Creta ahuun mushquiori noco catima huani. Salmón pushurasi finonfaini cusumun non foyacuni cusumunri non foyacupaiyaino fuun noco catima huani.

⁸ Ascatan noco catima huafiaino fasi yonocoin cai non pushurasi ahuun anu Buenos Puertos ano noconi. Nan Buenos Puertos pushurasi futsan Lasea pushurasi chaima ini.

⁹ Non nanno osha rananyoni. Oi pacutian capaifiaino fasi unuhuan fuchomanhuain musunicoinni. Ascano Pablonun shasho niaifofo yoini,

¹⁰ —Niaifofoan, mun tapia non natian caino musucoin itiro. Noco mafo non nocon shashori non funotiro. Norifi non asai futsutiroforan, —ishon ato yoini.

¹¹ Yoifiano shasho ifo non chiatamisiton yoinifo, —Ma. Musuma. Non nocosharatiroman, —huaifoan. Nicatan ranushumua niaifoan Pablonun ato numapaiyai cuscan nicatamarocon shasho ifoan non chiatamisi nicani.

¹² Oi pacutiancai Buenos Puertos ano itiroma. Unuhuan cusumun fuchomanhuaitiro. Shasho chacana huaitiro. Atirififoan yoinifo, —Non pushurasi Fenice ano canon. Nanno mahua ocu rafu ahuusca huatacai fuchomanhuaitiroma. Shara itiro. Ascano non oi pacutian ari nituyotiroman, —ishon yoinifo. Nan pushurasi Fenice Creta mai ano ini.

Unuhuan fuchomanhuanni

¹³ Funainquimashta fuu nocoaino, —Non casharanon. Nan fuu sharapan non casharatiroman, —ishon yoinifo. Ascaino Buenos Puertos anoashu non pocufaini Creta cusumunri cutan acuni.

¹⁴ Samamashta fuuhuan furani. Fuuhuan furanquin. —Nocachiorinoashu fuuhuan fuiran, —huaniquin.

¹⁵ Asafia non cusumunri capaifaiton noco catima huani. Ascano fuuhuanun noco iyoai ari non cani.

¹⁶ Mai nushmancayan raca uhuapamashta ahuun anu Clauda finonfain. Nanno finonainfono non fasi yonocain non shasho uhuapama chinutamua shashohuan muran naratainifoannifo.

¹⁷ Asca huashon shasho pinushusho finifoannifo. —Furo itama shara canon. Sumucainicai non Sirte ano minhuanmanhuanquin mai tsacanonma nanno musuni non suotiroran, —inifo. Ascashu nan, —Fuun noco iyoai ari non catiroran, —inifo.

¹⁸ Iyoco futsaino afanan fasi fuuhuan curushpacoin nocon shashohuan fuchomanhuaquin iquimapaiyaiton mafo potaquin futsunifo. Shashohuan shacatanon ishon.

¹⁹ Afanan puna futsan fuuhuan nishmayamacaiyaiton shashohuan murannoa aton ahuamamishti potaquin anaitinifo aton rusfiffo ya.

²⁰ Ascafiainocai fuuhuan nishmanima. Shafa rananun nai faquishihuancoin fari punaiyamaino fishiforicaicainnifoma. Fuchomanhuan unuyamacaiyaino, —Man non nai futsuiran, —icashu ratucoinnifo.

²¹ Man non piqui tunuqi rananhuan. Ascashon Pablonun ninacahuantan yoiquin, —Uhuun yoramishtichin ua nicayocahuun. Un Creta anoshon un mato yoiaiton man nicafin shara icuaquin. Ahuuscauanama. Ascainocai ahuafo nocon shashoricaifocuanama. Manricai omitsiscacuanama.

²² Ascafiya ratuyamacahuun. Man naimacai. Shashohuan fusti funocoin.

²³ Un mato yoiain Diospan oinmati afu nai muran icaton ua yamu tapimana. Unfin Diosin ahuun yoraquin. Un ahuun oinmati. Yamu ahuun oinmati nai muranshon uqui nichian ua yoinon.

²⁴ “Pablon, ratuyamahuu. Min niaifo Cesar ano nicotiro mia chaca huafo cuscan min cayacafi cumashanon. Upa Diosin min cufiain cuscan mia nica. Na mifu rafuafocai nan shashohuan murannoashu ahuuscaima,” ishon ua yoiain.

²⁵ Ascano uhuun yoramishtichin, ratuyamacahuun. Upa Diosin ua yoiain cuscan aiquin un icoinra huai. Tsoacai asaimafinquin.

²⁶ Ascafiya mai nushmancayan toomanhuan racani anoashu nocon shasho tosha-caishquiran, —ishon Pablonun ato yoini.

²⁷ Quince osha finontan nan ununhuan ahuun anu Adriático anoshon fuuhuanun noco iyofoi cai. Yamu nacucahuanaino shashohuan muranshon yonomisifoan yoiacaquin, —Man non mai ano nocoiran, —icashon yoinifo.

²⁸ Anori shinancanashu unuhuan ahuun noa tapipai caquin rusfinquin plomo tuchishon potanifo. Ahuun noa treinta seis metros. Ascashon afanan ori futsa ano ahuun noa tananni veinte siete metros ini.

²⁹ Ascaino man non toquirinin huaquin non nocoicairan ishon. Ratucaquin ahuun cuno ihuu rafu non rafuri rusfipan nushashon rusfipan shashoqui nushashon noa muran potanifo. Nanno shasho nitunon. —Toquirininhuan tsacatani shasho toshatiroran, —icashu. Ascashon ratucoincaquin cufinifo samamashta shafanon.

³⁰ Ascaino shashohuan murannoa yonomisi futsafoan shasho uhuapama naratamua fotomapaiyaifoan. —Shasho nitunon. Non cuno ihuu potapairan, —ishon yoinifo. Fupapaicaquin. Fopaicaquin.

³¹ Pablonun ato fuchishon ranushumua niaifo yoini,

—Na shasho uhuapama man nitu huayamafin nantifi man asai futsutiroquin, —ishon yoini.

³² Anori yoitan ranushumuafoan ahuun rusfin shatuafoano shasho nonocaini cani.

³³ Ascatan man shafano Pablonun ato yoini, —Man osha quince piqui tunua. Man ratucaquin.

³⁴ Ascan pii fucapun. Man piafin shara itiroquin. Non ahuuscaimaran, —ishon yoini.

³⁵ Asca huatan misi tsomashon aton ointaifi Apa Dios cufiyoni, —Upa Diosin, ¡Aicho! Min noco cushusharamisi, —huatan misi pini.

³⁶ Ascashon piyaino afanan ratunifoma oincaquin shasho murannofoanri piinifo. Pablonun oincaquin ato ointi afanan ratunima.

³⁷ Nan shashohuan muran non dos cientos setenta y seis yora.

³⁸ Ascano nantifi misi picani mayancoinnifo. Ascashon ushufo forusafo muran finifo shashohuan muranshon unu muran potaquin futsainifo. Shasho shacainacahuanon.

Shashohuan iquini

³⁹ Shafacuaino mai fuchifiashocai tsoan onannima. Ascashon unuhuan patontana nannori mainfin fuchicatan ano nocopainifo. —Catiro oinquifin non tanafaintiroquin, —ishon aton nomuran shinannifo.

⁴⁰ Tanapaicaquin shinancatan, —Rusfinquin tuchiaquin nushua rafu non rafuri non shatunon cacoinni canon, —icashon shatuafoano aton shashohuan nonoinacahuanaino

fooshcaquin. Ahuun chifishtatinin rusfi shoshan huanifo. Ascatan afanan panomanhuan futsa rushtiquiriri afanan rotanifo. –Fuun iyo sharanon, –icashon. Ascatan tanafainifo.

⁴¹ Chaicushon oianfo unu tapia ointsacun tanafaipaicaquin mai tsacatoshinifoquin. Shasho rushti fasi coraintoshini. Man fuchomanhuanquin chinahuaquin shasho tsispaquiri cuaquin futsani.

⁴² Ascaino ranushumuafoan shinannifo, –Na shasho murannofo ichtirofoquin Non ato rutunoncahuun, –ishon yoinifo.

⁴³ Ascanfianton aton niaifoan Pablo rutupaiquima. Ascacun ato nitun huani rutunonfoma. Shasho murannoafoti niaifoan yonoo, –Atiriton man topiqui tapiaquin topifaifafaincahuun maiqui nocotacahuun.

⁴⁴ Atirifiri ihui sapafo yatacanashu maiqui nocotacahuun. Ahuara futsafo shasho muran nonotiro nonofaifafaincahuun mai ano nocosharashcaquin, –ishon ato yononi. Ato yonoo cuscan nanscasi anifo. Nantifi cusumun nocosharai futsunifo.

28

Pablo toomanhuan ahuun anu Malta ano ini

¹ Ascashon nantifi non unuhuan cusumun nocosharani. Nanno icafoan, –Nocoi mai nushmancayan toomanhuan ahuun anu Malta, –icashon yoinifo.

² Noco fasi shara huanifo. Nannori oi furiapaoni fasi yotannmahuanquin. –Fucahuun chi cutu huashu yooshcaquin, –noco huanifo.

³ Ascaino Pablonun caro ya iconfuranan chi cutu huapaiyaiton shana muuqui a muran-shon shano cuscaraton mucun nasani. Munastan aya rono inacahuani.

⁴ Ascaiton oincani, –¡Uru! Na nocofunu rutumitsamisiraca. Unuhuan ariashu nocosharafaiton Diosin onaintimanan, –unu tupusumuni anoashu yoinannifo.

⁵ Ascaino mutashquiri itaquin chi muran potani. Isinin inima.

⁶ Ascashon, –Farashinacahuantan nairan, –icashon oinquin futsanifo. Manariacaquin paunyamacaiyaiton oinquin yoinifo, –¡Oincapon! Nacai rutumitsamisimafinquin. Naafin dios futsaquin, –ishon yoinifo.

⁷ Ascatan nanno chaimashta niaifo Publio ahuun mai. Ahuun pushu muran noco iquimani. Noco pimasharafain noco shara huani.

⁸ Apa isinin icoinni yonacain imi chishoi. Oshati muran racani. Tapitan Pablonun ahuun cunu muran iquicaini Upa Dios cufishonicai. Cufishotan ahuun mucuman mamanni cayanon. Ascaino cayariscatani.

⁹ Nan mai anofoan nicaacani nan isinin icaifoti aqui funifo ato caya huamanon. Nantifi ato caya huapacuni.

¹⁰ Ascatan noco ahuara ichapa inancoinnifo. Non itisharaquin ato anoashu shashohuanun cashquin non yopai cuscan noco inancoinnifo.

Pablo Roma ano noconi

¹¹ Oshu rafu non fusti finontan non afanan shashohuanun Malta anoashu cani. Shashohuan anunifo Rafanacaran ishon anunifo. Dios rafuran huashon shinannifo. Ascashon ato rafu anu futsanifo. Futsan ahuun anu Cástor huafain futsan ahuun anu Pólux. Ascan shashohuan rushtiquiri aton ointsa rami huani. Alejandria anoshon shashohuan onihuanifo. Oi pacutian Malta ano nan shashohuan iyoni. Nanuinifoan non unuhuanun non cani.

¹² Focani non Siracusa pushurasi ano noconi. Nanno non osha rafu non fustiyoni.

¹³ Anoashu focashon unuhuan cutafain non Regio pushurasi ano noconi. Iyoco futsaino fuaifoquirinoashu fuuhuan furani. Afanan iyoco futsaino non Puteoli pushurasi ano mapuinifoanni.

¹⁴ Nannoo Jesús icoinra huafo non fuchini. –No fu osha siete iyopun, –noco huanifo. Ascaino non chipo atomaquinoashu Roma ano cani.

¹⁵ Jesús icoinra huafo Roma anofoan Pablo oaiton nicaacani nocoqui funifo. Atirifi pushurasi Foro de Apio nocoqui noconannifo. Atirifiri pushurasi futsan Tres Tabernas anoashu nocoqui noconannifo no fu Roma ano foshecaquin. Pablonun ato oinquin, –¡Aicho! Upa Diosin, min ua yorafuqui nichiaran, –huani. Ahuun ointi fasi fupihuacoinni.

¹⁶ Ascaino pushurasi ichapacoin ahuun anu Roma ano nocoafono niaifoan yononi Pablo arusu pushu futsan muran isharatiro. Ranushumua fustiton cushusharanon.

Pablo Roma ano ini

¹⁷ Ascatan osha rafu non fusti finontan Pablonun ahuun caifoan aton niaifofo cunani aqui funonfo. Aqui ichafoan ato yoini.

—Uhuun yoramishtichin, ua nicasharacahuun un mato yoisharanon. Uncai nocon caifo Israelifo chaca huamisima. Nocon shunifoan aton fuyamisifori un chaca huayamafiacun ua Jerusalén anoshon achicashon Romanofu ano ua nichinifo.

¹⁸ Nanfoan ua nicacani ahua chaca huamaran, ishon shinannifo ua nichisharapainifo.

¹⁹ Ascafiaino nocon caifofoan yoinifo, “Nichiyamacahuun. Onaintimahuu,” ua huafiainfoan copiquiri uhuun caifoqui un tsain chaca huama. Ascatarocon un Romano niaifo patasharifo yoini, “Unfin maton niaifo Cesar ano capaicain uhuunoa cayacafi yoishquin un ahua chaca huama tapinon,” ishon ato yoini.

²⁰ Ascacun un mato cuna matofu tsainshquin. Nocon caifo Israelifoan non Diospan facun nan nocon Numamisi non manamisi. Unrifi icoinra huamisi. Un icoinra huahuunshon nocon caifo ua Romanofu ano nichini. Ascashon man oiain cuscan ua munushuafoquin, —ishon Pablonun ato yoini.

²¹ Nicacashon cumanifo, —Mihuunoa tsoan noco cunu fumama. Jerusalén anoashu funifo tsoancai mihuunoa tsain chaca yoimisima.

²² Non nicamisi manifoti anofoan Jesús icoinra huafuqui tsain chaca huafu. Ascan min icoinra huai cuscan non tapipairan, —ishon yoinifo.

²³ Ascatan —Non chipo mifu ichanantiroran, —huanifo. Ascano yora ichaparasi Pablo icano copiquiri nicacani. Funamanri yoitiashon ato yamu huani. Upa Diosin iquinaino ato yoifain Moisés cununi cuscan yafi Diosin ahuun yoishomisi futsafoanri Jesushuunoa cununifo cuscan ato icoinra huamapaiquin.

²⁴ Nicacatan atirifiton icoinra huaino atirifoan icoinra huanifoma.

²⁵ Tsoancai nannorisi shinannifoma. Ato yoiyai cuscan fochismanantanannifo. Amaquinoashu foataifoma Pablonun ahuun tsain unutaquin ato yoini isca huafu, —Nocon shuni Isaiás nanton inonpacoai yoimisi Diospan Yoshin Sharahuunshon nocon shunifo iconquin yoini isca huafu,

²⁶ “Min caifo nan Israelifo ano catahuun ato yoiquin isca huatahuun, ‘Man nicafafaifiaquicai man tapinacama. Ahuara sharafo man oinfiaquicai maton nomuran man nanucoiantaima.’

²⁷ Aton ointi mutocoianfo. Iconcoini nicaifiaquicai nicacoianfoma. Oinfiaquicai tapipaicanima. Iconcoini oinfain iconcoini nicaifoan un ato chaca soashocuana ufu nipanonfo,”

ishon Diosin Isaiasihuunshon nocon caifo yoini.

²⁸ Ascaino marifi Upa Diosin noco numapaiyai cuscan man nicapaiyamaino un caifo futsafo ahuun tsain yoicain. Afoanfin nicacaniquin, —ishon Pablonun ahuun caifo yoini.

²⁹ Yoitan amaquinoashu focanashu fasi fochishmanantanannifo.

³⁰ Ascatan Pablo nanno fari rafu yoini. Pushu ifo pui inanni a muran iishquin. Ascatan tsoa ahuun pushu ano fuafoan ato iquimani yoisharashquin.

³¹ Upa Diosin iquina cuscan huafain nocon Ifo Jesucristohuunoa ranotama ato yosini. Tsoancai ahuun tsain shatumanima. Nanti.

Pablonun Roma Anoafu Cunu Fomani

Jesús icoinra huafo Roma anoafu Pablonun cunu fomani

¹⁻³ Uhuun yoramishtichin, Roma anoafon un mato cunu fomai man tapinon. Unquian Pablo unfin Jesucristo ahuun oinmatiquin. Ua catonni un afu rafumisi un inon. Upa Diosin ua nichini ahuun tsain shara Furunhuunoa un yoinon. Jesús David ahuun funa ini. Caiantaima Diospan tsain shara inonpacoai cuscan ahuunoa cunushonifo.

⁴ Ahuunoa cununi cuscan Diospan Yoshin Sharapan ahuun curushhuunshon nocon Ifo Jesucristo maiya anoa funimani. Funimashon noco tapimani nan Diospan Furun Shara nocon Ifoan ahuamamishti huatiro.

⁵ Non ahuara shara huahuunshocai Upa Diosin noco catonnima. Ahuun Furunhuunoashu nocohuun ramapaiquin noco catonni afu rafumisi inon. Noco nichini nocon caifomari non ahuun tsain yoinon ahuun Furun Cristo icoinra huanonfo.

⁶⁻⁷ Upa Diosin manifoti icoinra huamapai. Mato Roma anoafori noiquin mato catonni maton chaca man shatunon Furun Jesucristo ahuun yorafo man inon. Upa Diosin nocohuun ramapaiquin nocon ointi shinansharacoinon. Furun futan Apamain mato asca huashopainon.

Pablon Roma ano oinmitsai capaini

⁸ Tau huaquin un mato yoisharapai. Man Jesucristo icoinra huacun manifotiton nicamisifo. Ascacun un mato shinanquin un Jesucristohuunshon —¡Aichoran! Upa Diosin, —ishon un yoimisi.

⁹⁻¹⁰ Upa Diosin ua yonomapaiyai cuscan un curushcain yonoshomisi ahuun tsain shara Furunhuunoa un ato yoinon. Upa Diosifin ua oinquin un mato shafatifi cufishofafainaiton. Nan un cufiain cuscmain Upa Diosin mato muran ua nichu huuati ishon un cuffifaini.

¹¹⁻¹² Un fasi mato oinpai mato Diosin tsain yoipaiquin. Ahuun Yoshin Sharahuunshon man icoinra huanon man yoinonansharanon Jesús tanasharashquin. Un icoinra huaino marifi man icoinra huainofin non unimanantanantiroquin.

¹³ Uhuun yoramishtichin tapicahuun. Uhuun caifomari un ato Jesushuunoa yoimisi tanasharanonfo. Nanscarifi un mato huamapai. Mun catacatamisi ifiacuanano ahuara futsa huai un camisima.

¹⁴ Jesús ua yonoo ahuunoa manifoti un yoinon. Ua yonoo cuscan ayamai un yoitima itiro. Ascan nantifi un yoipai. Uhuun caifomari yoifain nahuafori yoifain cunu tapiafori yoifain cunu tapiamafori un yoinon.

¹⁵ Ascashori un mato tsain shara Jesushuunoa Roma anoafu yoi capaimisi.

Nan tsain shara Jesushuunshonfin ahuamamishti huatiroquin

¹⁶ Nan tsain shara Cristohuunoa Upa Diosin ahuun curushhuunshon icoinra huafoti ato numatiro afu nipanonfo. Uhuun caifo Israelifoan nicaquin tauhuanifo. Natiarifi mani futsafoan nicacani Upa Dios fu nipashcaquin. Ascacufin un ranotama manifoti ahuun tsain shara un ato yoicain.

¹⁷ Nan tsain sharafohuunoa Upa Diosin noco tapimana ahuuscashumain non isharatiroquin ahuun tsain tanasharashquin. Nan non Jesús Ifo huaquin tau huanitian non Upa ari caitianri nanscasi huaquin non icoinra huatiro isharacoinshquin. Diospan tsain cununi isca huaquin, —Nan Diosin aton chaca soashonafoanfin icoinra huamisifoquin, —ishon cununi.

Upa Diosin icoinra huamafo ato onaintimashqui

¹⁸ Ascafiacai atirifo ascarafoma. Diosihuunooacai shinanpaicanima. Icoinra huapaicanima. Chacasi shinanmisifo. Chaca fustisi tanapaicaniquin. Diospan tsain iconcain tapificashon nicascasmamisifo. Nantifi nanscarafosi Upa Diosin atoqui sinacoinquin. Nai muranshon ato onaintimaquin finacoinshquin.

¹⁹ Upa Diosin ahuu cuscaramainquin tapipaiquifin tapicuanafuquin. Upa Diosin ato shafacafi ismani.

²⁰ Nantifi onihuaquin tau huanitian natianri ato shafacafi ismamisi. Mai yafi nai onihuanu cuscan nantiffain oinmisifo. Diosin ahuamamishti huatiro oinmisifo. Ascacun, —Uncai tapiama ahuu cuscaramain Diosiquin, —itirofoma. Nan tapiamafofin atohuun nuaquin.

²¹ Ahuunoa tapificashon yoicasmanifo. —Min nocon Diosin. Min fasi shara. Non mia noi. ¡Aicho! Min noco shara huafafainiran, —ishoncai yoinifoma. Ascacun ahuunoa

amaquiri ipaitsi shinannifo. Aton nomuran afanan ahuunoa shafacafi shinantamarocon nisopan shinantiro cuscan shinannifo.

²² —Nonfin fasi tapisharaquin, —ificatan tatimashunifo.

²³ Nocon Diosincai nanacama. Ifiacashocai isca huaquin yoinifoma, —Upa Diosin, tsoa futsacai mia cuscara shara imisima. Min ahuamamishti huatiro. Non mia noiran, — ifiacashon anori yoitama ahuaara futsafo rami huanifo. Na nocofunufu naashu payocofiafo nan ointsra rami huafain puiyafu rami huafain yoinafo rami huafain rono cuscarafori rami huanifo. —Nanfo nocon Diosiran, —ishon yoipaonifo.

²⁴ Ascacun Upa Diosin ato potaquin futsani aton nomuran chaca huapayyai cuscan huanonfo. Afanacai ato numanima. Afi ranan chaca huaa tanannifo futsan namanna ainfo fucashni huaifoan. Ainfori ascariiaifoanno.

²⁵ Upa Diosin tsain icoinra huatama chani fusti catonnifo. Diosin nantifi onihuani. Nan Diosicai cufitama nan onihuafo cufinifo. Ascatama Diosin shararan ishon yoipacupainonfo.

²⁶ Ascacufin aton nomuran chaca huapayyai foan tapishon Upa Diosin ato potani. Afanan ato numanima. Upa Diosin noco onihua cuscan nocofunufu ainfo ya icaino ainfori nocofunufu ya inonfo. Ascatamarocon ainfofo afiranan fuchinanpaicani. Aforanansi iquinannifo. Chaca huatanannifo.

²⁷ Nansarifiai nocofunufu ainfo tanatama afi ranan iquinanpaicani. Ascashu chaca huatanancatan aton nomuran aton cayari omitsisca huapaonifo.

²⁸ Ascatari Upa Dios onanpainifoma amaqui inifo. Ascacurifi arifi ato potani aton nomuran afiranan shinanpayiaifo cuscan chaca huan tananonfo.

²⁹ Chaca fustisi shinancani chaca huan tananonfo aton ahuinma ya icaifoanno ainfori ato funumafo yari ipaonifo. Aton namari fipaifain. Fasi chacafo icain mafo noiri-amisi icain futsafoqui shinanchacamisifo icain fashimitsamisifo icain rutumitsamisifo icain fochishmanantanancatan sinaisi fuyamisifo icain paramitsafoanfainmisifo icain noimati huamitsamisifo icain yoiti huamitsamisifo icain

³⁰ futsafo yoiti huafain Dios noicasmafain roanmitsamisifo icain cacapaimisifo icain aton nomuran chaca fustisi shinanmisifo icain aton apa yafi ahua nicacasmafain

³¹ ahuaara shara shinanpaimisifoma icain tsoashtacai ato icoinra huatirofoma icain tsoanshtahuun noiyamacain chaca huapaimisifo icain rauhuaquin tapiamafo icain tsoanshtahuuncai ramapaimisifoma icain.

³² Upa Diosin ahuun tsain shara yoiquin isca huani, —Futsafoan ascaran chaca huaiton un ato namairan, —ishon. Yoini cuscan man tapificashon aton chaca shatupainifoma. Ascariifatan futsafoanri nan acaifo cuscan huaifoan oincaquin, —¡Aichoran! Nanscarocon chaca huatanacahuun, —ato huanifo.

2

Upa Diosin ato iconquin onaintimai

¹ Ascano man shinanraça, —Nan cuscara yora fasi chacacoin. Upa Diosinmain ato onaintimainonran, —ifiashon marifi man asca huamisiquin. Ascashu, mafri man yoimui cuscaracoin. Matori onaintimatiro.

² Nan non ahuaara chaca huamisi cuscan nantifi Upa Diosin man tapicoian. Ascan man non tapian nan chaca huamisifo iconcain ato onaintimai.

³ Mancai Diosin cuscarama. Marifi man nocofunufiashon man yoiquin isca huamisi, —Nan chaca huamisifomain Upa Diosin ato onaintimainonran, —ifiaquin marifi man asca huamisi. ¿Ascacun man shinanmun Upa Diosin matori onaintimaimaquin?

⁴ Upa Diosin matohuun noiquicai mato funa ahuusca huarima. Man chaca huafaiton mato shara huafafaini. Mato funa onaintimaima. ¿Man tapiamamun matohuun ramapaiquin maton chaca shatupapai man tanasharanon? ¿Nanfohuunoamun man shinanpaimacai? ¿Diosiqui man ointi mutoimun?

⁵ Upa Diosin mato shara huafaiantocai man shinan futsapaima maton chaca shatushquin. Diosiquiricai man shinanmisima. Man chaca huaa cuscan Upa Diosin ointiaquimaima. Ascan chaca huaquin man unuyamaiton Diosin sinaitian mato onaintimashqui.

⁶ Upa Diosin nan niyoshon amisifo cuscan atoti inapacushquin.

⁷ Nan tsoaran Diosin ato imapayyai cuscan amisiton futsafo shara huafafaini tsain shara Upa Diosin atohuunoa yoisharaiton nicapaicani. Isca huaquin, —¡Aicho! Un mia yonoo cuscan min amisi. Un miqun unimai. Min ufufu ipasharatiroan, —ishon nicapaicani. Afu ipashquin. Nan cuscarafo Upa Diosin aya ato imapacunaca.

⁸ Ascafiata ratoranfoan afi apaiyai cuscan fusti shinainfoan aton nomuran fucash huamisifo icain Diospan tsain iconcoin tanatama ahuaa chacafosi tanaifoan. Nan cuscarafocui Upa Diosin ahuun nomuran sinacoinquin ato onaintimashqui.

⁹ Nan ratoran futsa Israelifo iyamarai mani futsafoan chaca huamisishaquin fasi aton nomuran omitsisc'ai finacoinshc'ani.

¹⁰ Ascacun ratoran futsa sharamisicun Diosin sharapan ato yoishquin, —Mian nicamisicun. Un miq'ui unimairan, —ishon ato yoishquin. Aton nomuran unimacaquin ahua fucash huanonfoma. Israelifo iyamarai mani futsafo isharaifoan Upa Diosin ato shara huaiquin.

¹¹ Ascacun Diospan nantifi noco nanscarafosi oin.

¹²⁻¹⁵ Nantifiton chaca huamisicun ato onaintimashqui. Uhuun caifo Israelifoanma atirifiton Upa Diosin tsainquin cununifo cuscan oniyamafiamisishaquin ahuaa shara aton nomuran tapiafo. Tapificashon shara huamisifoma. Chaca huafiacatan aton nomuran shinanquin isca huamisifo, —Un chaca huaran, —iyamarai, —Uncai chaca huamaran, —ishon shinancani. Ascacun chaca huaifoan ato onaintimashqui. Ascashu omitsiscapanacafo muran foshc'ani. Ascac uhuun caifo Israelifoan Upa Diosin yononi cuscan noco cunushoni cuscan non aya. Tsoan man tapificashon chaca huaiton nan yononi cuscan huaquin ato onaintimaicain nan omitsiscapanacafo muran foshc'ani. Diosin tsain cununi cuscan nicafishuca'i ascacoianfoma ato imasharanon. Ascano Diosin yononi cusca'in ato yoishquin, —Min shararan, —ishon ato yoishquin.

¹⁶ Nantiffain aton nomuran shinanmisifo cuscan Upa Diosin tapicoian. Nan shinanmisifo cuscan fomanfainfoan nocon Ifoan nantifi ato puashoshquin. Upa Diosin ahuun Furun Jesucristohuunshon ato onaintimashqui. Nannori Diospan tsain sharahuunoa un mato yoi.

Diosin yononi cuscan Moisés Israelifo tapimani

¹⁷ Uhuun yoramishtichin, Upa Diosin yononi cuscan noco cunushopaoni. Nan noco cunushonicun man shinanraca, —Upa Diosin non Israelifo noco fusti catonni futsafocai catonnima. Non fustifin ahuun yoraquin, —ishon man shinanmisiquin.

¹⁸ Mato amapaiyai cuscan man man tapia. Tapimamisifoan ahuun tsain mato tapimana. Ascac ahuaa shara nicashon, —Iconran, —ishon man yoimisi.

¹⁹ Man yoiquiri isca huaquin, —Nocon caifoma fusho cuscarafocui. Ahuuscashomain Diosin tsain tanasharatiroquin tapiafoma. Nonfin ato tapimatiroquin. Faquish muran ica shinantsa aafocui. Nonfin chashamati cuscarafocui ato chashashotiuroquin Dioshuunoa tapinonfo.

²⁰ Upa Diosin noco yononi cuscan iconcoin. Ahuun tsainhuunshon non tapicoian. Ascacun tsoa futsacai tapiataima aton chaca shatushcaquin non aton facufo ya tapimatiroquin, —ishon man shinanmisifo.

²¹ Man futsafo tapimamisi ¿Ahuuscain mafiri man tapimamuimanmun? Futsafo man yoimisi, —Ahuu oniyamacahuun, —man huamisi. ¿Marifimun man onumisima?

²² —Maton ahuinma fu iyamacahuun. Maton funuma furi iyamacahuun, —man ato huamisi. ¿Ascafiahu marifi maton ahuinma fu man icamun? —Ascac Diosicoianma cufiyamacahuun. Dios fusti noicoianahuun, —man ato huamisi. ¿Manmun Upa Dios fusti tanacoincai?

²³⁻²⁴ —Upa Diosin noco yononi cuscan man non tapicoian, —nan cacapaimisi cuscara man tsainfafaini. Man futsafo yoifiatacai marifi Diosin yononi cuscan man aima. Ascac matohuunshon nocon caifomafocui yoiquin isca huamisifo, —Diosin ahuun yorafocai isharafoan. Ascac arificai sharamaran, —ishon yoimisifo. Ascac matohuunshon Dios chaca huafo. Nannorifi Diospan tsainquin cununi.

²⁵ Upa Diosin noco yononi cuscan non aafin nan Israeli sharafo cuscara noco imatiroquin. Ascafiata noco yononi cuscan ayamashu nan yora chaca cuscarafocui non itiro.

²⁶ Yora futsafo Diosin yononi cuscan amisicun Upa Diosin noco shara huashopaiyai cuscan atorifi shara huashotiro. Noco inanpaiyai cuscari atorifi inanshquin.

²⁷ Nanfo Israelifomafishon Diosin tsain nicasharacoinc'ani. Manfin Israelifoquin. Diosin mato yononi cuscan tapicoianfashu man yoitimamisi. Ascac nanfo isharafoianocai man isharamisima.

²⁸ Diospan yoracoinin ahuun tsain tanasharatiro. Nanfocui Israelicoianfoquin. Futsafo Israelicoianfo cainfanishaquin Diosin yononi cuscaicoian acanima. Afocai Diospan yoracoinfoma. Ascafiahuuca'i Israelifocoinma. Nocon fuyamisi cuscara furonanfacu rama caian non foshqui rupa shatumisi. Ascac tapitirofo nanfo Israelicoian. Ascafiata noco yononi cuscan non ato foshqui rupa shatufiacai ahuun tsain iconra huafomacai Diospan yora itirofoma.

²⁹ Diospan Yoshin Sharahuunoashu nocon nomuran fiananantiro non Diosiquiri shinansharanon. Ascashu Diospan yoracoín iishquin. Non ascaino yorafoan nocohuunoa yoisharashquin.

3

¹ Ascan nonfin Israeliri cainniquin. Ascan non ahuaraya cuscacai futsafo ayama. ¿Non amisi cuscan nocon facufo non aton foshqui rupa shatuainomun shara itiro? Ainfain.

² Uhuun yoramishtichin, shinancapon. Upa Diosin manifoti yoipaiyai cuscan nocon caifo yoiqui tau huani. Noco tapimani cuscari non mani futsafori tapimanon.

³ Icon, atirifi nocon caifocai Upa Diosin yononi cuscacoin acanima. ¿Icoinra huayamafishon Upa Diosin noco yoini cuscaman noco ashoimacai?

⁴ Ma. Ascapacunacama. Nantifi yorafoan noco paratirofiancai Upa Diosin noco parapacunacama. Nanfin iconcoín fustiquin. David cunuquin isca huani,

“Yorafoan Upa Diosin tsain iconra huayamafishon ahuun tsain cayacafi iconcoín manifoti ato tapimashcaniran,”
ishon cununi.

⁵ Futsan shinanquiraca, —Upa Dios fustifin sharaquin. Noncai ascaranma. Ascan non chaca huaiton futsafoan noco oinquin Upa Dios noco cuscarama aafin sharacoínquin. Ascan tapitirofo Upa Dios mimacai sharacoínquin. Nocon chacahuunshon futsan tapitirofo Dios sharacoínquin. Diosincai iconquin noco onaintimatiromaran, —ishon anori shinantirofoquin.

⁶ ¡Ohual Fasi amaquiri shinancani. Upa Diosicai non chaca huaa cuscan ointi-aquimatiroma. Non chaca huafiaiton Upa Diosin noco onaintimayamaitocai ahuuscashon non tapitiroma afanan asca huashquima. Diosin chacafo onaitimayamaino ahuuscashomain yorafoti yoitiroquin afu ipayamarain omitsiscapanacafo muran focanicaí.

⁷ Ascan futsafoanraca shinancani, —Un chani yoimiscun futsafoan tapitirofo Upa Diosin iconcoín fusti yoimisi. “Upa Diosin sharacoínran,” ishon yoishcani. Ascan uhuun chanihuunshon futsafoan mima huaquin Dioshuunoa shinansharashcani ¿Ascain ahuuscain, “Min chaca huamiscun un mia onaintimairan,” ua Diosin huatiromun? —Nannori man shinanraca.

⁸ Nan cuscara yorafoan fasi amaquiri chaca shinanpaicani. Isca huaqui yoipai, —Non chaca huanoncahuun. Ascan Dioshuunoa shinansharatirofoquin, —ishon yoipaicani. —Pablonunri anori yoimisirán, —ishon yoicani. Chanimisifo. Uncai anori yoimisima. Upa Diosin iconquin na cuscarafo onaintimashqui.

Tsoa futsacai non isharamisima

⁹ ¿Ascain yora futsafo chacafaino noncai ato cuscaramamun? ¿Norus fustimun non shara? Ma. Anorima. Un mato tapima cuscan nantifi yorafocai nocon caifomafoan norifi non Israelifoanri man non chaca huamisi.

¹⁰ Nunorifi Diosin tsain cunuquin isca huaniquin,

“Diosin noco yononi cuscacai tsoashta amisima.

¹¹ Diosin noco yononi cuscan tsoancai tapicoínmisima. Mancai Upa Dios onanpaicoínma noco yononi cuscan tapishquin.

¹² Manifoti anofoan Upa Dios cachiquiri huaafo ato isharamapaiyai cuscan atamarocin chacacoin tapiafo. Tsoacai shara tapimisima. Tsoa fusticai isharamisima.

¹³ Yora naacun mai huashon non fupuaíno pisin tohuutiro cuscan nanscarifiaí aton ashfan muranshon tsain fasi chacacoin yoimisifo. Nan rono paupaton noco nasa non mutiro cuscan aton tsainmanri noco omitsiscamatiro.

¹⁴ Roanmitsamisifo icain tsain isinipaton yoimisifo.

¹⁵ Samamashta yora rututirofo.

¹⁶ Nan cahuancacainaitishon yora chaca huafoanfainmisi ato omitsisca huafoanfainmisi.

¹⁷ Diosin nocon ointi shinansharamapaiyai cuscacai afoan mumisima.

¹⁸ Dioshuunoa shinansimisifo. ‘Aacai ahuamaran,’ ishon shinansimisifo. Aquicai ratucanima,”
ishon Diosin tsain inonpacoai cuscan yoimisifoan cununi.

¹⁹ Man non tapia Upa Diosin yononi cuscan Moisés noco cunushoni. Noco yononi non chaca huanonma. Noco yononi cuscacai non amisima. Ascan tsoancai yoitiroma isca huaquin, —Diosin yononi cuscan un amisiran, —ishoncai yoitiroma. Iconquin nantifi noco onaintimatiro.

²⁰ Ascacucái Upa Diosin tsohuunoa yoitiroma isca huaquin, —Un mato yononi cuscan man amisi. Man ahua chaca huamisirán, —noco huatiroma. Diosin noco yononi

cuscan man non tapicoinfiaшон nanhuunshon non shinantiro, —¡Ohual! Upa Diosin yononi cuscacoincai un amisimo. Urifi un chaca huamisiran, —ishon non shinantiro.

Jesús icoinra huaashu non Dios fu ipatiro

²¹⁻²² Upa Diosin noco yononi cuscan Moisés noco cunushoni. Noco cunushoni cuscan non apaifiai non itiro ma Diospan yora iishquin. Ascacia huuscashomain nocon chaca noco soashotiroquin a cuscara shara non inon Upa Diosin natian noco tapimana. Nannori Moisés yafi Diospan tsain yoimisi futsafoanri cununifo. Ratoranfo nocon caifo Israelifo iyamarai nocon caifoma non Jesucristo icoinra huacun nocon chaca noco soashotiro a cuscara noco imasharashquin.

²³ Manifoti anofoan nantiffain man non chaca huamisi. Upa Diosin noco imapaiyai cuscacai tosa acoinmisima.

²⁴ Ascaciaun Jesucristo noco nashoni nocon chaca soashoshquin. Non icoinra huacun afanan chaca nocon ifo itama Jesucristo acoin nocon Ifo inon. Non ahua shara huahuunshoncai noco numanima. Ahuun Furunhuunshon nocohuun noiquin noco numani.

²⁵ Ahua chacacai Upa Dios fu itiro ma. Ascan Furun nichini nococairocon onaintimatama Furun onaintimani nocohuunoashu nashon nocon chaca soashonon. Ascan ahuun imi foyanan noco nashoni non icoinra huaiton Upa Diosin noco onaintimaima. Ascan Furunmun noco nashoantaima iyopaonifoanri chaca huapaonifo cuscan. Tapiyonifo chipo Furun atohuunoashuri nashquiai. Ascano icoinra huafoan aton chaca iconquin Furunhuunshon soashotiro afori afu ipanonfo.

²⁶ Natianri Diosin ato ismapai chaca huafiamisishaquin Jesús icoinra huacun ahuun yorafo ato imatiro. Man raca shinain, —¿Ahuuscain chaca huamisifo ato onaintimama Upa Dios fu ipatirofomun? —ishonraca shinancaniquin. Anorimafinquin. Furunmun ato nashoni aton chaca soashoshquin. Ascan nan icoinra huacatan Upa Dios fu ipatirofo. Iconquin ahuun yorafo ato imatiro.

²⁷⁻²⁸ Non ahua shara huahuunshoncai nocon chaca noco soashonima. ¿Ascan tsoancai yoitiro ma isca huaquin? —Upa Diosin noco yononi cuscan un nantifi amisi. Ascacufin un afu ipatiroquin, —ishon tsoancai anori yoitiro ma. Ascarafo shinainno cacapaimisi itiro. Upa Diosin noco yononi cuscan non nicamisihuunshocai noco numanima. Furun icoinra huaiton noco numatiro. Nannori non mato yoimisi.

²⁹ ¿Upa Dios nocon caifo Israelifoan nocon Dios fustimun? Ma. Caifo futsanfoanri aton Diosiri.

³⁰ Upa Diosin noco nanscarasi huai. Nocon caifo yafi nocon caifomari Jesús icoinra huaiton nocon chaca noco soashotiro afanan noco chacahuunoa shinanonma.

³¹ ¿Ascano non Jesús icoinra huacun Diosin Moiséshuunshon noco yononi cuscan non yopaimamun cununi cuscan aquin? Ascataka non Jesús icoinra huaiton Upa Diosin noco yononi cuscan non atiro. Jesushuunshon fusti non atiro.

4

Abrahamhuunoa Pablo noco ahuaara futsa tapimani

¹⁻² Ascatan natian un nocon shuni Abrahamhuunoa mato yoi. ¿Diosin yononi cuscan aimun ahuun chaca soashoni sharacoin inon? Ma. Anorima. Abraham asca huaiton yoicuana, —Unfin Diosin yononi cuscan un amisiquin, —ishon yoicuana. Ascafiashu nanorica yoimisima. Upa Diosin ahuun ointaificai ascatiroma.

³ Ahuunoa Diospan tsain cununi isca huaquin, —Abraham Upa Dios icoinra huamisi. Ascaino Upa Diosin ahuun chaca soashona a cuscara isharanon, —ishon cununi.

⁴⁻⁵ Non yonoaino ifoan noco cashman inainma. Noco nifishon noco inantiro. Nanscarifiai non ahua shara huatiroma Upa Diosin noco nifinon nocon chaca noco soashonon non afu ipanon. Nonfin chaca huamisifoquin. Ascafashon non Jesús icoinra huacun Upa Diosin noco yoishquin, —Un maton chaca soashona. Man uhuun facuhuunoashu isharanon, —ishon noco yoishquin.

⁶ Nannori nocon shuni David yoini. Noncai ahua shara huatiroma Upa Diosin noco unimamanon. Afin noco yoitiro, —Un min chaca mia soashona. Ascan min ua cuscara shara iquiran, —ishon noco yoiaino non unimatiro.

⁷ David isca huaquin yoini,

“Tsoan ahuun chacafo Upan Diosin rau huaa afanan afohuunoa shinanyamaino fasi unimatiro.

⁸ ¡Aicho! Upa Diosin isca huaquin yoishquin, ‘Min chaca huaa cuscan un afohuunoa afanan shinanpacunacama. Natian min chaca huamisima cuscara min itiroran,’ ishon yoiaino fasi unimacointiro,” ishon David yoini.

⁹¿Upa Diosin Israelifo fusti unimamatiromun? Ma. Israelirifomari aton chaca soashotiro a cuscara shara imashquin. Abraham Diosin icoinra huacun ahuun chaca soashona a cuscara shara imashquin. Nannori non mato yoimisi.

¹⁰Foshqui rupa shatuataima ahuun chaca soashoni a cuscara shara imashquin.

¹¹Abraham foshqui rupa shatuataima Upa Dios icoinra huaqui tau huani. Ascacun ahuun chaca soashoni a cuscara shara inon.

Ascaino chipo fari ranan finoanno Upa Diosin Abraham yononi, —Min non min yorafori foshqui rupa shatucahuun. Nan foshqui rupa shatushonfin min shinantiro isca huaquin, “Icon Upa Dios un icoinra huacun uhuun chaca ua soashona ua shara huapanaca Upa Diosin ua yoyoniran,” —ishon Diosin Abraham shinanmani. Ascacufin tsoafo foshqui rupa shatuataima Dios icoinra huashu Abraham ahuun upa cuscara itiro. Afin foshqui rupa shatuataima Upa Dios icoinra huaquin tau huani. Ascacun ahuun chaca soashoni a cuscara shara inon.

¹²Foshqui rupa shatuafori Abraham cuscara itirofoquin. Aafin foshqui rupa shatuataima Dios icoinra huaniquin. Afoanri arifi Jesús icoinra huacanashu Diospan yora itirofoquin. Ascan Abraham aton upa cuscarari itiro.

Abraham Diosin yoiyoni cuscan icoinra huashon ahuunoa fini

¹³Upa Diosin Abraham yoini isca huaquin, —Min non min funafori nan maitio un mato inannon matonna inon, —ishon yoiyoni. Upa Diosin icoinra huacun aton chaca soashona a cuscara shara inonfo. Ascacufin ato yoiyoni cuscan ato inanshquin.

¹⁴Futsafoan icoinra huayamafiasion shinanquin isca huaa, —Diosin yononi cuscan un aiton uqui unimatiro noco inanpaiyai cuscan ua inanshquiran, —ishon shinantirofo. Nanfo Diosin yoiyotiani cuscan fiaino non ipaitsi icoinra huaa.

¹⁵Ascafiacai anorima. Diosin noco yonoyamaino tsoacai yoitima icuanamafinquin. Ascafia noco yononi cuscan apaifiacai tsoa ascamisima. Diosin chacafoqui sinai yoitimamisifo onaintimashqui.

¹⁶Ascan non ahuara shara huaacuai Upa Diosin noco yoiyotiani cuscan noco inainma. Non icoinra huaiton noco cashman inanshquin. Ascan nan Israelifo yononi cuscan tanaifo iyamarai nan tanaifoanmari Upa Dios icoinra huacanashu ahuun yorafo itirofo. Ato yoiyotiani cuscan cashman inanon. Abraham icoinra huani cuscan afoanri icoinra huashu ahuun funafo cuscara itirofo.

¹⁷Nannori Diosin tsain cunushoni isca huaquin, —Manifoti min aton upa cuscara. Un mia imashquinran, —ishon Upa Diosin Abraham yoiyoni. Abraham tau huaquin Upa Dios icoinra huani. Ascan norifi non chipo icoinra huashu nocon upa cuscara itiroquin. Upa Diosin noco oin non Abraham ahuun facufo cuscaracun. Diosin yora nacun funimatiro ninon. Icataima rufoto Upa Diosin yoiqui tau huani.

¹⁸Ascano Abraham anifoshta afanan facu atromafiasion Dios icoinra huaacun. —Min chipo facu yashquin. Min funafori ichaparasi cainshquiran, —ishon Upa Diosin yoiyoni cuscan icoinra huani. Ascan yora ichapafoan aton upa cuscara ica.

¹⁹Tapini anifoshtacoin cien fari aqui caa. Ahuin Sararifi noventa fari aqui caa afananricai facu nanutiroma. Ascan man tapifiasion Diosin yoiyoni cuscan icoinra huani. Icoinra huaa cuscaai afanan amaqui ipainima.

²⁰⁻²¹—Un anifocoinno uhuun ahuinri yoshafofiasion Upa Diosin ua yoiyoni cuscan ua facu inantiroran, —ishon shinanni. Mimacaiquin icoinra huani. —¡Aicho! Upa Diosin, mian yoiyoni cuscan mian inanshquin. Min curushhuunshon mian yoiyoni cuscan mian ashotiroran, —ishon yoini.

²²Icoinra huaiton Upa Diosin ahuun chaca soashoni a cuscara shara inon.

²³⁻²⁴Upa Diosin tsain yoini isca huaquin, —Abraham Upa Dios icoinra huani. Icoinra huahuunshon ahuun chaca soashoniran, —ishon cununi. Abraham fustihuunshocai cununima. Norifi nan icoinra huafoti noco cunushoni. Nocon Ifo Jesús naacoinfiacun Upa Diosin funimani nipanon. Nan non icoinra huaiton nocon chacari noco soashonon a cuscara shara non inon.

²⁵Nocon Ifo Jesús namani nocon chaca noco soashonon. Nantori funimani Upa Diosin noco rau huanon a cuscara shara non iishquin.

5

Tsoan nocoqui patatiroma

¹Upa Diosin nocon Ifon Jesucristohuunshon noco rau huaa nocomaqui afanan iquima no fu ipashquin. Ascano nan icoinra huashu non afu isharapacutiro.

²Non icoinra huacun Upa Diosin noco noiaino non afu shafatifi rafutiro. Ascano unimacoinquin non tapitiro noco imapaiyai cuscan shara non atiro.

³ Ascatari non Jesushuunoashu omitsiscafiyaquin non shinanchacaquima Jesús tununi cuscan non tunucointiro. Ascatan non unimatiro.

⁴ Non tunuaino Upa Diosin nocoqui unimatiro non Jesús cuscara isharashquin. Non isharaquin non tapitiro non chipo afu ipasharashquin.

⁵ Upa Diosin ahuun Yoshin Shara nocoqui nichini. Ahuunshon non tapitiro noco fasi noicoin. Nan tapishocai non shinanchacatiroma. Noncai iscatiroma, —¡Ohuashta! Un ipaitisi Jesushuunoashu un omitsisca. Ua yoiyoni cuscan ua ashoshquimaran, —ishoncai non anori shinantiroma.

⁶ Shinancapon. Noncai ahuuscashon nocon chaca soatiroma Upa Dios cuscara isharashquin. Non ascara chaca icaino nantianri Cristo oni noco nashoshquin.

⁷ Non isharafiatiro tsoan noco nashotiroma. Itsairaca yora sharahuunoashu fustirasi noco nashoti.

⁸ Ascaciaquin non Diosquiri chaca huafaianton nantianri Cristo nocohuunoashu nani. Ascano Upa Diosin noco ismani fasi nocohuun noicoinquin.

⁹ Ahuun imi foyanan Criston noco nashoni Upa Diosin noco rau huanon a cuscara shara non inon. Ascacun icoinra huamafuqui Upa Diosin sinaquin ato onaintimaitian noco mimacai huaquin numashqui non omitsiscapanacafo muran canonma.

¹⁰ Non Upa Dios noicasmayopaonitian Furunmun noco nashoni noco numano non afu ipanon. Natian Jesús niahuunshon mima huaquin noco numanon Upa Dios fu non ipasharanon.

¹¹ Ascano natian nocon Ifo Jesucristo noco Apa Dios ya imapacushquin non ahuunoashu unimacoinon.

Adán yafi Cristo

¹² Ascatan tapicahuun. Adán chaca huaqui tau huani. Chacahuunoashu nani. Ascacufin ahuunshon nantifi manifatifain chaca huamisifoquin. Ascano nantifi nai futsushquin.

¹³ Moisés huunshon Upa Diosin yorafo yonoatama nantifi manifoti anofoan chaca huapaonifo. Moisés yononi cuscan tapishoma Diosin nanfohuunshoncai ato onaintimaitian nannonfo.

¹⁴ Ascaciaquin Adán niyopaonitian non Moisésianri yorafoti nai futsunifo. Upa Diosin Adán yonofia nicayosmani chaca huani. Adán Dios chaca huani cuscan futsafoan huayamafianashu nai futsunifo. Adán onihuaquin tau huani. Chipo Cristo arifi mai ano oni Adán cuscara nocofunu ishquin. Ascaciahucaí Adán cuscaracoínma.

¹⁵ Nan nocofunun Adán ahuun chacahuunoashu nantifi yorafo nai futsucani. Ascán nan nocofunun Jesucristo fusticai ascánima. Ahuunshon yorafohuun ramapaiquin Upa Diosin ato rau huatiro aton chaca soashquin.

¹⁶ Adán chaca huaahuunshon Upa Diosin nantifi namaqui futsai. Ascacia Cristohuunshon aton chaca soashotiro natamarocon afu isharapacunonfo.

¹⁷ Adán ahuun chaca fustihuunoashu nantifi namisifono mimacaiquin Jesucristo fustihuunshon Upa Diosin noco rau huatiro. Noco rauhuano non afu ipasharanon a cuscara shara iishquin.

¹⁸ Ascano Adán chaca huanihuunoashu fusti nantifi namisifo. Nanscarifiai Jesús ahuun sharahuunoashu fusti nantifi aton chaca soashotiro ato omitsisca huatamarocon ato nimapacunon.

¹⁹ Nan nocofunun Adán Diosin nicacasmaquin tau huanino ahuunshon chaca huapamisifo. Nanscarifiai nan nocofunun Jesucristo fusti Apan yoini cuscaín. Ascano Apa nicacoínshon ahuunshon yora ichapa imasharatiro Apa fu ipanonfo.

²⁰ Upa Diosin yorafo yonopaiyai cuscan Moisés cunushoni a chaca huamisifo cuscan tapinonfo. Nahuunshon non tapitiro non fasi chaca huamisi. Mimacaiquin non tapitiro Upa Diosin nocohuun ramapaiquin noco rau huatiro nocon chaca soashoshquin.

²¹ Ipaoni chaca fustisi yorafoan aton ifo icaino ato namaquin futsani. Ascaciahu natian Upa Diosin nocohuun ramapaiyaino nocon Ifo itiro. Nocon Ifo Jesucristohuunshon nocon chaca noco soashotiro a cuscara shara non inon afu ipashquin.

6

Non Cristo fu nani cuscaracoín afanan chaca nocon ifo inonma Cristo nishon nocori nimapacunon

¹ Ascán atirifoanraca shinanquin isca huacaniquin, —Non chaca huafafainfainoraca Upa Diosin nocohuun ramapaiquin. Nocon chaca noco soashonaran, —ishon amaquiri shinanmisifo.

² ¡Ai timafín! Ascayamapacushapainonran. Jesús noco nashoni nocon chaca afanan nocon ifo inonma. Yoran nashocai afanan futsa nicatiroma a furicai afanan rafutiroma.

Futsan ahuun iforicai itiro. Nanscarifiai non Jesús fu naa cuscaracoin chaca afanan nocon ifo inonma.

³ ¿Man tapiamamun man nonfin unu muran iquimamuaquin Jesucristo ahuun yorashon ato oinmashquin? Ascacun Jesús noco nashoni nocon chaca soashoshquin. Norifi afu naa cuscaracoinshon non afanan chaca huanonma.

⁴ Ascano Jesús maini cuscan norifi non chaca huapaoni afu nani cuscaracoin. Ascashon Upa Diosin ahuun curushhuunshon Furun funimani afu ipasharanon. Nanscarifi aqui nocorifi funini cuscaracoin non afu ipasharanon non chaca huapaoni cuscan afanan non anonma.

⁵ Naino non ahuun yoracoin ini afu yora fusti cuscara iishquin. Nacun afincoin funimani isharapacunon. Norifi ahuun yoracoiashu a cuscara funa shara non itiro.

⁶ Jesús mastaifono norifi afu masta cuscaracoin. Non chaca huapaoni cuscan cuyonon. Non Jesús ifoatima chaca nocon ifo ipaoni. Non afu masta cuscaracoin afanan chaca nocon ifo inonma.

⁷ Shinacapon. Tsoan nashocai afanan chaca huapaitiroma. Marifi Jesús fu naa cuscaracoinshocai man afanan chaca huapaishquima. Afanan chacapan mato yonotiro mato chaca huamapaiyai cuscan anonma.

⁸ Non Cristo fu naa cuscaracoinshon non icoinra huashu non afu ipasharatiro. Nanri non icoinra huai.

⁹ Man non tapia iconcoin Cristo funimani afanan nanonma. Ahuashtatocai afanan Cristo namatiroma. Ahuun ifo itiro mato afanan namanonma.

¹⁰ Nai fustinishaquin nocon chaca noco soashoni afanan chaca nocon ifo inonma. Ascano natian Apa Dios fu isharapacunaca.

¹¹ Nanscarifi aquin natian man shinantiro isca huaquin, —Un chaca ipaoni cuscan man cuyoa. Afanan ua ahuusca huatiroma. Natian un Jesucristohuunoashu Upa Dios fu rafucacaini ua amapaiyai cuscan aashquin, —ishon anori shinancahuun.

¹² Ascacufin afanan chaca maton ifo imayamacahuun mato chaca huamapaiyai cuscan ayamacahuun

¹³ Isca huaquin shinancahuun, —Yoshin chacan, mian chaca huamapaiyai cuscacai mian amatiroma. Uhuun cayacai minama mian chaca huamapanan, —ishon yoicahuun. Man chaca ipaoni cuscan man naa cuscaracoin. Ascafishu natian man funa cuscaracoin Upa Dios fu ipashquin. Ascano Upa Dios yoicahuun isca huaquin, —Upa Diosin, unfin minaquin. Mian shara huamapaiyai cuscan ua huamahuu. Uhuun caya non uhuun nomuranri mina mian amapaiyai cuscan ua huamahuu, —ishon yoicahuun.

¹⁴ Moisés yononi cuscacai non atiroma Upa Dios fu ipashquin. Nocon ifocai itiro mato non nipanon. Ascata Upa Diosin matohuun ramapaiquin arusu mato numatiro mato ifo iishquin. Ascano chaca afanan mato ifo itiro mato.

Upa Diosin mato shara huamapaiyai cuscan man ahuun oinmami inon

¹⁵ Moisés yononi cuscacai non atiroma noco imasharanon Upa Dios fu ipashquin. Ascun Diosin nocohuun ramapaiquin noco imashara. Nan fusti nocon ifo itiro noco numanon. ¿Ascancocai non chaca huafafaintiromun Diosin nocohuun ramapainon noco chaca soashonon? Ascayamapacupainon.

¹⁶ Man tapian mafi man catontiro ratofomain mato ifoquin. Upa Dios man nicacointiro ahuun oinmami ishquin iyamarai chaca catontiro ahuun oinmami ishquin. Chaca catoanshu man omitsiscapashquin. Ascun man Upa Dios nicacoiashu man afu isharapacunaca.

¹⁷ Man chaca catonpaoni ahuun oinmatifashon natian Upa Diosin mato yoimisi cuscan maton nomuran man nicacoi. ¡Aicho! Upa Diosin mato imasharamisi.

¹⁸ Ascancocai chaca afanan maton ifo itiro mato yonoshquin. Natian ahuara shara fusti maton ifo itiro. Manfin ahuun oinmatifoquin.

¹⁹ Man oinmami yafi ifohuunoa man tapicoian. Ascun atohuunoa un mato yoipaiyai cuscan un mato yoi man shafacafi tapinon. Chaca futsa futsatapafo man huapaoni. Ascacun chaca mato ifo ipaoni. —Ua chaca huamapaiyai cuscan un aashquin. Fasi finacaiari un chaca huairan, —ishon man shinanpaoni. Afanan asca huayamacahuun. Natian Upa Diosin yoicahuun man ahuun oinmatifo. Afanan chaca huatama ahuara shara fusti ahuun oinmami man itiro.

²⁰ Ipaoni chaca maton ifo icaino mancai ahuara shara shinanpaonima maton ifo inon.

²¹ ¿Man ipaoni cuscan sharamun? ¿Mato imasharamun? Ma. Ipaoni cuscacai afanan afohuunoa man shinanpaima. Afohuunoa man shinainno man rafitiro. Nan chacafu shatuyamaino man naitian man omitsiscapanacafo muran man catiro.

²² Ascafia natiancai chaca afanan maton ifoma Upa Diosin maton ifo. Manfin ahuun oinmatifoquin. Man ahuun oinmatifocun mato shara huafafaini a cuscara shara man inon man afu ipanon.

²³ Tsoa chaca ahuun ifono ahuunshon ato omitsiscapanacafo muran potashquin. Ascafia nocon Ifo Jesucristohuunshon Upa Diosin noco cashman numano non afu ipanon.

7

Nocofunu fu ainfo fiananfohuuonoa cuscara ahuara futsan ato tapimani

¹ Uhuun yoramishtichin, un mato yoipaiyai cuscan man man tapicoian. Moisés noco yononi cuscan man man tapia. Non niyoano noco yonotiro. Non nano noco afanan yonotiroma.

² Iscara un mato tapimapai. Ainfo funun fianocai nocon caifoan yononi cuscan funu niyoano unutiroma. Ascacun funu nanocai afanan tsoan afanan yonotiroma.

³ Funu nano futsan fitiro. Asca huaquicai chaca huatiroma. Ascafia funu niyoanocai futsa fu fianantiroma. Futsan fiaino furoma chaca itiro. Nannori nocon caifoan yononi.

⁴ Uhuun yoramishtichin, nanscarifi aquin Moisés yononi cuscan maton funu cuscara nan maton ifo ipaoni. Ascafia Jesús mastanifotian marifi man afu naa cuscaracoin. Naashu afanan Moisés yononi cuscan maton funu cuscara itiroma. Cristo naafishu funini cuscan marifi afu funini cuscaracoin funa cuscara iishquin. Natianfin man Cristonaquin maton ifo inon a cuscara shara ishcaquin.

⁵ Jesús man Ifo huataima chaca maton ifon ipaoni. Moisés mato yonopaiyai cuscan atama yoitimacoinshon man fasi chaca huapaoni. Nan chacafohuunoashu non natiro omitsispacunacafo muran noco imatiro.

⁶ Non ascafiapaonishaquin non Jesús fu naa cuscaracoin.

Ascanocai Moisés cununi cuscan nocon ifo afanan itiroma. Nococai shinanmatiroma isca huaquin, —Min Moisés cununi cuscan ayamashu min nipatromaran, —ishoncai noco yonotiroma. Noncai afanan ahuun oinmatima. Natian non Diospan Yoshin Sharahu-noashu non unimacoincain non Upa Dios yonoshotiro.

Chacapan ua ifoahuapai

⁷ ¿Ascano Upa Diosin Moiséshuunshon yononi cuscan chacamun? Ma. Anorima. Amaquiri shinanyamacahuun. Moisés cununi cuscan un oinyamashon un chaca huamisi un tapicuanama. Uhuun nomuran un chaca fuchipaipaoni cuscan uhuun ointi un noconi. Moisés cununi cuscan un oinyamashon uhuun ointi muran un shinancuanama.

⁸ Ascafia Moisés cununi cuscan oinfiaguicai un chaca shatutama un finacaipaoni. Fasi finonmafain un chaca noipaoni. Upa Diosin noco yonoyamanicai non yoitima icuanama.

⁹ Diosin noco yononi cuscan un tapipaonima un chaca huafiaquicai un mupaonima. Ascafia Diosin noco yononi cuscan un nicacoinshon un ahuunshon tapini unfin chaca huamisiquin. Un tapiniri chaca huamisifo omitsiscapanacafo muran focani.

¹⁰ Un shinanpaoni isca huaquin, —¡Ohuashta! Upa Diosin noco yononi cuscaai un aima. Ua yononi cuscan un aiton ua nimapacucuana. Un ascayamacun ua omitsiscapanacafo muran ua camashquinran, —ishon un shinanpaoni.

¹¹ Chacapan ua parapaoni. —Upa Diosin noco yononi cuscan un airan, —ishon un amaquiri shinanpaonima ascafiqui un apaonima. Ascacun un tapipaoni uhuun chacahu-noashu un nai omitsiscai.

¹² Man non tapia Upa Diosin noco yononi cuscan shafacafi sharacoin.

¹³ Sharafiacucai un ascamisima. Ahuunshon ua tapimapaoni non chaca huamisi cuscan fasi chacacoincun. Upa Diosin yononi cuscan sharacoinfiacun ahuunshon mun tapini un ascayamashu un omitsiscacaini nai.

¹⁴ Man non tapian Moisés cununi cuscan Diosin ahuun Yoshin Sharapan shinanmani. Nan sharafianocai un sharama. Chaca uhuun ifo. Unfin ahuun oinmatiquin.

¹⁵ Ahuuscain un iscamisimun uncai tapiama. Un shara huapaiyai cuscaai un aama. Un asca huapaiyamafiaquin un amisi.

¹⁶ Un asca huafiaquin uhuun nomuranshon un shinan, —Upa Diosin Moiséshuunshon noco yononi cuscan sharacoinran, —ishon un shinain. Moisés yononi cuscan nannoricoin un shinain.

¹⁷ Nannori shinanfiaguicai un chaca huai cuscan un shatutiroma. Uficoin un apaiyamafiaquin chaca uhuun ifono uhuun nomuran ua shinanchacamamisi.

¹⁸ Mun tapia Upa Diosin ufu iyamaino un chacacoin. Diosimaisicai un ahuara shara shinanantiroma. Un sharapafiaicai un itiroma.

¹⁹ Un sharapaiyai cuscan atama un chaca huamisiquin. Un chaca huapaiyamafiaquin un amisi.

²⁰ Ascano un tapitiro ufcoin un chaca huapayamafiaquin chaca uhuun ifon icaino ua yonomisi cuscan un shatutiroma.

²¹ Ufi amisi. Un sharapaihaiton chacapan ua amaquiri shinanmapai un shara shinanonma. Un ascamisi.

²²⁻²⁵ Uhuun nomuran, —¡Aicho! Upa Diosin ua yonoa cuscan shararan, —ishon shinanfiai un nicayosmami. Ua yonoa cuscan mun tapiflashu un nicayosmami. Chaca uhuun ifono ufi sharapaiyain cuscan un atiroma. Uncai chaca shatutiroma. Ascano un tapitiro uhuun nomuranshon un Upa Diosin oinmati ipai ua yononi cuscan aashquin. Ascafia un Dios ifo huayamaino un chacapan ahuun oinmati itiro ua yonomapayai cuscan aashquin. ¡Ohuashta! Uhuun nomuran un omitsiscai. Unfin chacaquin. ¿Tsoan ua numatiromun chaca afanan uhuun ifo inonma? Nocon Ifo Jesucristohuunshon Upa Diosin noco numani chaca afanan noco ifo inonma. ¡Aicho! Upa Diosin, min noco shara huamisi.

8

Diospan Yoshin Sharahuunoashu non ica

¹ Ascano Jesucristo nocon Ifono nonfin ahuun yoraquin. Ascacucaí Upa Diosin —Min chacaquin un mia onaintimanon. Umaquinoashu omitsiscapanacafo muran catahuun, —noco huapanacama.

² Jesucristohuunshon Diosin ahuun Yoshin Sharapan ahuun curushhuunshon noco nimashara afanan chaca nocon ifo inonma non omitsiscapanonma.

³ Moisés yononi cuscan non tapificai aton noco isharamatiroma nocon chaca soashquin. Ascan Upa Diosin shinanni cuscan ahuun Furun nai muranshon mai ano nichini arifi noco cuscara yora inon. Noco cuscarafishocai non chaca huamisi cuscan huamisima. Noco nashoni afanan chaca nocon ifo inonma.

⁴ Ascano natian non Diospan Yoshin Shara tanashu Moisés yononi cuscan non atiro. Nocon nomuran chacapan noco shinanmapayai cuscan non afanan nicayamashon non Diosin tsain tanasharatiro.

⁵ Non chaca shatuyamashu nan chacapan noco amapayai cuscan nan fusti non shinantiro. Ascan Diospan Yoshin Shara noco iquinano noco amapayai cuscan nan fusti non shinantiro.

⁶⁻⁸ Diospan Yoshin Shara nocon nomuran iquinano nocon ointi fasi unimacointiro. Ascashu non Upa Dios fu ipasharatiro. Asca ratoranfo chacapan aton ifo icaino Diosihuunoa shinansharatiroma. Aton nomuran shinanchacamisifo Upa Dios noicasmaifoan. Ascan ato yonomapayai cuscan nicacasmamisifo. Chaca shinancaquin Diosin tsain nicitirofoma. Nicayamashu Upa Dios fu ipatamarocon omitsiscapanacafo.

⁹ Ascafia mancaí aton cuscarama. Chaca afanan maton ifoma. Diosin ahuun Yoshin Sharafin mato fuquí. Nantofin mato yonomisiquin. Ointiaquimayamacahuun. Tsoan Jesús ahuun Yoshin Shara fu iyamaino ahuun yora itiroma.

¹⁰ Jesús matofu rafufiaino chacahuunoashu maton caya naashquin. Maton caya nafiacun maton Yoshin Criston fiananan huai shara man inon afu ipashquin.

¹¹ Jesús naafiacun Upa Diosin Yoshin Shara funimani. Nan Yoshin Shara matofu rafuaino matori funimashquin maton caya afanan nisharanon.

¹² Ascacun uhuun yoramishtichin, Diospan Yoshin Shara no fu rafuaino Upa Diosihuunoa non shinantiro noco amapayai cuscan aquin. Non chaca huamisi cuscaí non afanan shinanpaitiroma noco amapai cuscan aquin.

¹³ Chaca nocohuun nuano non omitsiscapanaca nai. Ascafia Diospan Yoshin Sharahuunshon non chaca huamisi cuscan non shatuaino afanan chaca nocohuun nutiroma non Upa Dios fu nisharapacunon.

¹⁴ Diospan Yoshin Shara ato amapayai cuscan nicasharamisi. Nanfofin Diospan yorafoquin.

¹⁵ Ahuun Yoshin Shara noco shinansharamapai non afanan ratunonma. Nonfin Diospan Yoshin Shara fiacun nanton ahuun facufo noco ima. Ahuunshon non yoitiro isca huaquin, —Upa Diosin min uhuun Upashtaran, —ishon non yoitiro.

¹⁶ Nocon nomuranshon Diospan Yoshin Sharapan noco yoi isca huaquin, —Min Upa Diosin facucoinran, —ishon noco yoi.

¹⁷ Non ahuun facufocun Apan ahuun facucoin inantiro cuscan nocori inanshquin. Criston ahuun Furuncoinin noco fasi omitsiscashoni. Omitsiscafianishaquin natian Apa Dios fu isharapacunaca. Nantifi Apanari ahuuna. Ascano norifi ahuunoashu natian non omitsiscafiai norifi chipo non afu Upa Dios ano isharapacunaca. Apan Cristo inan cuscari norifi non ahuun facufocun nocori inanshquin.

Chipo norifi Upa Dios yafi Cristo fu nisharapacunaca

¹⁸ Shinancapon uhuun yoramishtichin. Natian non ahuunoashu omitsiscafiacquin non shinanchacanonma. Non aqúi nocoaino a cuscara shara noco imai. Non omitsiscái cuscan cuyoshquin. Ascan noco imashara cuscacai unupacunacama.

¹⁹ Upa Diosin ahuun facufo funimashquin a cuscara sharacoin imashquin. Ascan nan onihuanifoan manacani fasi oinsharapaicaquin ahuu cuscaramain non chipo ishquicain.

²⁰⁻²¹ Onihuanifocai payocopaiyamañai Diosin yononi cuscan payococani. Ascafiaquicai Upa Diosin noco funimanaitiancai onihuaniti afanan payoconacafoma. Nantianri non afu isharamisi afanan ahuá chaca finontama. Nanscarifiaí onihuanifoti sharashtacoin icani afanan chacanatiroma.

²² Man non tapia ainfoan facu cainquin isin mui pashapaitiro. Nanscarifiaí nan Diosin onihuanifo omitsiscacaini nashcaini. Natianri nanscasi acani.

²³ Norifi non Diospan facufo ahuun Yoshin Shara no fu rafuaino non tapitiro non chipo Dios fu ishariatirofiashu natian non isinin itiro pashapaicain. Ascaquin non manasharatiro Upa Diosin icano noco ihuinoan non ahuun facufocun a cuscara shara noco imanon. Natianri nocon caya funa sharacoin afanan isinin iyamacain nonricai afanan natiroma.

²⁴ Noco a cuscara shara imai cuscacai icataima. Ascáfia non icoinra huaiton noco numatiro a cuscara shara non inon. Icoinra huashon unimayanan non manasharatiro funaquinma non aqúi nocoaitian. Aqúi nocoshocai non afanan manatiroma. Manmain oinquinfin.

²⁵ Ascáfia noco ihuataima funaquinma non manasharayotiro.

²⁶ Nanscarifiaí aqúin Upa Diosin ahuun Yoshin Sharapan noco ashosharafanfainni. Ahuscashomain non Upa Dios cufisharatiroquin noncái tapiama. Ascan ahuun Yoshin Shara nocohuunshon noco cufishotiro. Nocoahuun ramapaiquin noco cufishonai cuscan sharacoin tsoancai aaton cufiaí cuscan huatiroma.

²⁷ Ahuun Yoshin Sharapan shinain cuscan Upa Diosin onancoian. Nantifi nocon nomuranri non shinain cuscan tapicoian. Upa Diosin noco amapayai cuscan nannori ahuun Yoshin Sharapan icoinra huafoti cufishomisi.

Jesushuunshon non nantifi finoncointiro

²⁸ Ascano non tapia Upa Diosin noco catonni noco amapayai cuscan non anon. Non Upa noiaíno ahuarafo ahuuscara afiaíno afohuunshon Upan noco shara huashoin. Norifi non icoinra huai.

²⁹ Non Jesús Ifo huataima Upa Diosin tapiyoni ratfoanmain icoinra huaicain. Icoinra huaafotaima shinanni isca huaquin, —Nanfo uhuun facu cuscara un ato imashquinran, —ishon shinanyoni. Ascashon Furun Jesús funimaqui tau huani. Ascashon nocorifi funimashquin a cuscara non inon ahuun chipo facufo inon icai.

³⁰ Onanyoni non ahuun facufo ishquinon. Ascano noco nomuranshon noco yoini, —Uhuun facu icoinra huahuu. Tsoan anori yoiaiton un ato chaca soashoni isharononfo, —ishon Upa Diosin yoini. Aton chaca soashonano ahuun Furun sharashtacoin cuscara inonfo.

³¹ ¿Noco asca huasharaino non raquiri yoitromun? ¿Upa Diosin noco shara huafafainaino futsafoan noco raquiri huatiromun?

³² Upa Diosin nocohuun noiquin Furun numanima noco nantifihuunoashu nashonon. Ascanishaquin ahuara futsa non yopai cuscan nanfori noco inanshquin.

³³ Upa Diosin noco catonni nocon chaca soashonano Furun cuscara shara non inon. ¿Ascano tsoanmun, —Min chacaran, —noco huatiroquin?

³⁴ Jesucristo noco nashocun Apan funimani. Apa Dios icano ato nantifi iquinon. Natianri Upa Dios noco cufishofafaini. Nan iconcucaín tsoan, —Min chaca huamisiquin. Asca omitsiscapanacafo muran mia potanon, —noco huatiroma.

³⁵ Tsoancai noco Cristomaqui imatiroma noco noinonma. Non omitsiscacain nocon nomuran fucash huafain non Jesushuunoa yoiaiton noco omitsiscamafain non fonicaín nocon sahuuti yopacain noco musumafain noco rutupaifain noco huafiaquicai noco Cristomaqui imatirofoma noco noinonma.

³⁶ Diosin tsain cununi isca huaquin,

“Upa Diosin, shafatifi non itisharai mihuunoashu naashquin. Chashoanfo yosicun Ifoan ato rutumamisi. Nanscarifiaí aqúin nocori rutupaicaniran,”

ishon cununi.

³⁷ Noco asca huafafainfiaífoan Jesús noco noiaíno ahuunshon non ato finoncointiro.

³⁸⁻³⁹ Jesucriston nocon Ifonocai ahuashtaton Upa Diosmaqui noco pashcamatiroma noco noinonma. Nan un icoinra huacoinni. Upa Diosin nocohuun noiaínoicai ahuá ahuuscatiroma nocohuun afanan noinonma. Non nafiancucaí amaqui noco pashcamatiroma. Non niyo anoricaí amaqui noco pashcamatiroma. Ahuun oinmatifoanricai amaqui noco

pashcamatiroma. Yoshin chacafoanricai noco amaqui pashcamatirofoma. Ahuarafo nati-ian icaí cuscaricai noco amaquinoa pashcamatiroma. Inonpacoai cuscaricai noco amaqui pashcamatiroma. Ahuara chacafo aton niaifofoanri amaquinoa noco pashcamatiroma. Nan nai ariafo yafi mai anofoanricai noco amaqui pashcamatiroma. Upa Diosin nocon Ifon Jesucristohuunshon nocohuun noi. Ascano nantifi onihuafoanricai amaqui noco pashcamatirofoma afanan noco noinon.

9

Upa Diosin Israelifo catonni ahuun yorafo inonfo

¹⁻³ Uhuun yoramishtichin un Cristohuunshon iconquin un mato yoi. Un muai cuscan mun tapia uncai mato paraima. Un mato iconquin yoi. Diospan Yoshin Sharan ua shinanmanai cuscan un iconquin yoicain. Uhuun caifo Israelifoanai nocon Numamisi icoinra huafoma. Ascacun uhuun nomuran un atohuunoashu omitsiscacaini. Un ato fasi shinancoinmisi. Uhuun caifo uhuun nomuran un ato shinanmisi isca huaquin, —Upa Diosin uhuun yora Israelifo un ato numapai mifu nipanonfo. Ascano ato Cristomaqui omitsiscapanacafo muran potatamarocon uacai potahuu un ato numanon, —ishon un anori shinanfiainocai Upa Diosin ascatiroma.

⁴ Upa Diosin ato catonni ahuun yorafo inonfo. Ato fu iyoshon ato ismapaoni ahuu cuscaramain aaquin. Ato shara huapayiai cuscan ato yoiyoni. Ascashon ato yononi isharononfo. Ato yosini ahuuscashomain ichananshon cuftitirofoquin. Ascariifi atan ahuaara sharacoín ato ashoain cuscan yoiyoni.

⁵ Maton shunifofoan Upa Dios tanasharafafainpaonifo. Nocon Ifo Cristo arifi Israeliri ini. Nocon shuni Abraham non Isaac non Jacobori aton funa. Aafin natian nantifiton aton ifoquin ato iquina. Ascán Upa Dios fasi shararan non huapanon. Amen.

⁶ Upa Diosin noco yoisharayoni cuscan uhuun caifo Israelifoan icoinra huayamafiafoan ahuun tsain iconcain. Ahuun yorafo yoiyoni cuscan ashquiquin. Ahuun yorafo shara huafainocai atirifi Israelifo Diospan yorama.

⁷ Nanscarifi aquicain Abraham acai cuscan ahuun funa atirifoan icoinra huamisisa. Afocai Diospan yorama. —Abraham ahuun facu futsafoyafiacun Diospan tsain cununi cuscan ahuun facu Isaac yafi ahuun funafo nanfosi Upa Diosin yoiyoni cuscan fitirotan, —ishon cununi.

⁸ Ascano non tapitiro atirifi Abraham funafocai Diospan yorama. Diosin Abraham yoiyoni ahuun facu chipo cainshquian. Yoiyoni cuscan Abraham icoinra huani. Nan icoinra huafosi Diospan yoraquin. Abraham facu cuscarafa.

⁹ Abraham ahuin Sarapan facu nanuataima Upan Diosin yoiyoni isca huaquin, —Fari futsan un miqui nasoshquin. Nantianri min ahuin Sarapan facu furonanfacu cainshquian, —ishon yoini.

¹⁰⁻¹³ Ascano man fari ichapa finontan Sarapan facu Isaac ahuin Rebeca rafañacani. Caiantaima Upa Diosin yoini isca huaquin, —Min facu Esaú cain tauí. Afu rafañaca Jacob. Chipocuton oinmati cuscara iyoa ishquian, —ishon yoini. Caiantaimacai ahua chaca huafain shara huatian inima. Ascafian Diosin yoiquin, —Jacob un noiquin un ashoín. Un iyoa Esaucái un noiquin asca huaima, —ishon Diospan tsain cununi. Ascano non tapitiro Diosin inonpacoai shinanyoni cuscan atiroquin. Esaú futan Jacob amisifo cuscacai shinanyonima. Aafin apayiai cuscan yoiyoni.

¹⁴ ¿Ascano Upa Diosin shinancoinmamun? Ma. Anoricai non shinantiroma.

¹⁵ Upa Diosin yoini isca huaquin,

“Nan un noipayiafin un noitiroquin. Nanscarifiai nan un ahuun ramapayiahuurifi un ramapaitiroquin,”

ishon Upa Diosin Moisés yoini.

¹⁶ Ascano non tapitiro futsan shinanquin, —Diosin ua shara huashopainon, —ishon shinantiro iyamarai, —Un Upa Dios yonoshosharatiro ahuun rafañan ua inansharatirotan, —ishon non shinanfiatirocái anorima. Upa Diosin afín nocohuun ramapaiquin noco catontiro non ahuun yorafo non inon noco inansharashquin.

¹⁷ Ascano Upa Diosin Egipciofo aton niaifo yoini, —Un mia niaifo imashquin nantifi manifesti anofoan un ahuamamishi tuatiro minhuunshon tapinonfo, —ishon yoini.

¹⁸ Ascacun non tapitiro Upa Diosin futsa ahuun ramapayiahuunri ramapaitiroquin. Nanscarifi aquin futsan chaca huafafaina cuscan shatuamashu ointi mutocoin imatiro.

¹⁹ Man futsan ua yoiraca isca huaquin, —Ascacun non chaca huaiton noco shatumanama nocon ointi mutocoin imashquin. ¿Ascafia ahuuscain Upa Diosin nocohuun nuamun? Afín apayiai cuscacai tsoan atima huatiroma, —itsairaca amaquiri yoiquin.

²⁰ Ma. Asca huayamacahuun. ¿Ahuuscain min Upa Dios tafipaimun? Minfin noco-funuquin. Aafin Diosiquin. Ahuara onihuamatocai yoiqui isca huatiroma, —¿Ahuuscain mian iscara onihuamun? —huatiroma.

²¹ Cutin onihuamiton mapo nan apaiyai cuscara shara cutin huatiro. Futsa amuran ahuara chaca nanuti huafain futsa amuran ahuara shara nanuti huatiro.

²² Nanscarifiai Upa Diosin nantifi yora onihuafiacun atirifoan ahuun tsain nica-casmamisifo. Funainquimashta ato yoiyofiaiton nicayamacaiyaifoan inoncai atoqui sinaquin. Ato potatiro chacani fustisi tapiaifoan. Asca huaquin ato ismatiro ahua-mamishti huatiro cuscan.

²³⁻²⁴ Ascafiagai non ato cuscarama. Nocoahuun ramapauquin noco tapimamisi. Ascatarí noco itisharamai unimacoíncai non afu ipanon. Noco Israeli fusti catonnima non afu ipanon. Mani futsafori catonni.

²⁵ Oseas nan inonpacoai yoimison Diosin tsain cununi isca huaquin,
 “Futsafo Israelifomari un catonshquin uhuun yorafori inon. Tsoancai ato noiyo-misimafiacun un ato yoishquin. Un mato noiran,”
 ishón Upa Diosin yoini cuscan Oseas cununi.

²⁶ Afanan ato yoini iscahuaquin,
 “ ‘Mancai uhuun yoramaran,’ ishón Diosin mato yoiaran, huanifo. Ascafia chipo atohuunoa yoishcaquin, ‘Upa Diosin niaton man ahuun facuforan,’ ishón yoishquicani.”

²⁷ Isaías nocon caifo Israelifohuunoa yoini,
 “Israelifo ichaparasi ishquicani tsoan ato tanan huatiromafiafashu fustirasiton icoínra huashquicani Upa Dios fu ipashcaquin.

²⁸ Yoini cuscan iconcoín. Yoiyoni cuscan manifoti anofoan nan icoínra huafoma nocon Ifoan ato onaintimariscashquin. Afanan ato manashquima,”
 ishón Isaías cununi.

²⁹ Ascashón Isaías afanan yoiyoni cuscan nanscacoíain. Isca huaquin,
 “Upa Diosin ahuamamishti huatiro. Nocon caifo Israelifo fustirasi numani atifi cuyononfoma. Asca huayamaino non Sodoma yafi Gomorra cuscarafa icuana. Nonrifi non cuyocuanaran,”
 ishón Isaías cununi.

Israelifo yafi nan tsain shara Jesushuunoa

³⁰ ¿Ascano afohuunoa non raquiri yoitromun? Nan Israelifoanmacai aton chaca shatucasmamisima Upa Diosin icoínra huashquin aton chaca soashonon. Ascafia natian atirifoan Jesús icoínra huafioan Upa Diosin aton chaca soashona a cuscara shara inonfo.

³¹ Ascafia uhuun caifon Israelifoan Upa Diosin Moisés huunshon ato yononi cuscan sharapaicaquin. Ascafiagai Moisés yononi cuscahuunoashu shara inonfoma.

³² ¿Ahuuscain iscaimun? Un mato yoinon. Nanfoancai Diospan Furun Jesús icoínra huaafoma aton chaca soanon. Ascatarocon Moisés ato yononi cuscahuunoashu ishara-paífo aton chaca soashquin. Un mato ahuara futsa nicamapai. Toquiri fasi uhuapa fai naqui raca finonpai aqui oroshcomutiro.

³³ Nanscarifi aquin Jesús finonpaiyaifoancai icoínra huacanima nipashcaquin. Nannori inonpacoai cuscan Isaías Diospan tsain cunuyoni isca huaquin,

“Un Israelifo aton fai naqui toquirininhuan ratáin. Ahuunoashu yorafo pa-cunonfo,”
 ishón cununi.

“Nanscarifi aquin Upa Diosin Jesús Israelifoqui nichino tsoan icoínra huayamashu funocoincáni nipashcaquima,”

ishón cununi isca huaquin,

“Ascafia tsoan icoínra huacoinshon shinanchacanacamaran,”

ishón Diospan tsain Isaías cununi.

10

¹ Uhuun yoramishtichin, uhuun nomuran uhuun caifo un fasi shinain. Un atohuunshon Dios cufifafaini Jesús icoínra huanonfo Dios fu nipashcaquin.

² Mun tapia nanfoanfin Upa Dios fusti fasi tanapaisharafiaquin amaquiri shinanfoquin.

³ —Nonfin Moisés noco yononi cuscan non aino Upa Diosin nocoqui unimatiro noco numanonran, —ishón shinanpaonifo. Ascano Upa Diosin ato Jesushuunshon imasharapaiyai cuscan afu ipashcáni. Ascafia nicacasmaonifo.

⁴ Moisés yononi cuscan Criston mai ano niyoshon nantifi apaoni. Ascano Moisés noco yononi cuscaei non afanan yopatiroma nocon chaca soanon Upa Dios fu ipashquin. Tsoan Cristo icoinra huaiton aton chaca soashotiro afu ipasharanon.

⁵ Moisés isca huaquin cununi, –Upa Diosin noco yononi cuscan nantishon tapiquin non chaca huayamashu Upa Dios fu non nipatiroquin, –ishon cununi.

⁶ Ascafia non Jesús icoinra huashon non isca huaquin yoitiro, –Maton nomuranshocai man isca huaima, “¿Tsoamun nai muran catiroquin Cristo fotomashquin noco numayonon?”

⁷ Iyamarai, “¿Tsoamun mai muran catiroquin Cristo funishquin?” –ishon yoiyamacahuun.

⁸ Anorimaquin. Man Cristo icoinra huaiton mato numatiro. Nannori non mato yويمisi. –Mancái raquí cayotiroma Cristo fu ishquin. Natian man Cristo yoitiro matofu rafunon. Maton nomuranri man icoinra huacun matofu rafutiroran, –ishon Moisés cununi.

⁹ Ascano, –Jesús uhuun Iforan, –huafain man shinanquin isca huai, –Jesús nafiacun Apa Diosin funimaniran, –ishon maton nomuran man icoinra huaiton maton chaca soashotiro afu man ipanon.

¹⁰ Ascan maton nomuranshon man icoinra huacun Upa Diosin maton chaca soashotiro man isharanon. Man futsafo, –Jesucristo uhuun Iforan –ishon yoiaiton mato imapacunaca.

¹¹ Nannorifi Diospan tsain cununi, –Tsoan Criston Diospan Furun icoinra huaashucai raffapacunacafoma, –ishon cununi.

¹² Israelifo iyamarai mani futsafoan icoinra huaifoan aton Ifo itiro. Diosinacai ahua rafuma. Nanscarafosi. Nan icoinra huafoti aton Ifon. Fasi atohuun noiquin ato ya imapacunon.

¹³ Ratoran nocon Ifon icoinra huashon yoiqui isca huaiton, –Ifon, ua numahuu, –huaiton afu ipatiroquin.

¹⁴ ¿Ascafia ahuuscashocon, –Jesús ua numahuu, –huatirofomun icoinra huacatama? Ahuunoa nicamisimashaquicai ahuuscashon icoinra huatiroma. ¿Futsan Jesushuunoa ato yoiamaino ahuuscashocon nicatirofomun?

¹⁵ ¿Ahuuscashocon yoifotirofomun futsan ato nichiamaino? Nannori Diosin tsain cununi isca huaquin, –Nan tsain shara futsafo yoifononfo nan fasi sharacairan, –ishon Isaías cununi.

¹⁶ Ascafia nan tsain shara atirifi Israelifoan icoinra huacanima. Nannori Isaíasin afanan cununi isca huaquin, –¿Ifon, non ato yoia cuscan tsoan icoinra huamun? –ishon yoini.

¹⁷ Ascano tsain shara nicaquin icoinra huatirofo. Nan tsain shara Jesucristohuunoa.

¹⁸ ¿Uhuun caifo Israelifoan nan tsain shara Jesushuunoa nicamisimun? Ai, man nicamisifo.

“Manifoti anofoan nan tsain shara man nicafo,”
ishon David cununi.

¹⁹ ¿Uhuun caifoan tapinimamun nan tsain shara Cristohuunoa nicacasmaifoan Upa Diosin caifo futsafo yoitiro ato numaquin? Ai, man nicamisifo. Moisés niyoshon ato Diosin tsain yoini isca huaquin,

“Uhuun yora Israelifoan un afanan ato uhuunoa shinanmapai. Ascan un caifo futsafo uhuunoa un shinanmai Cristohuunoa shinanonfo ato numanon. Nan oincani Israelifori uqui nasopaitiroran,”

ishon Diosin yoini cuscan Moisés cununi.

²⁰ Chipó Isaías ranotama yoini isca huaquin,

“Mani futsafoan ua funayamafiacaquin ua icoinra huafo. Uhuunoa yocayamafiamisishaquin un ato uhuunoa onanmanaran,”

ishon Diosin yoini cuscan Isaías cununi.

²¹ Ascafia uhuun caifohuunoa yoini,

“Un shafatishon un ato cuna uqui fucahuun. Un ato huafiacaí uqui fupaicanima. Yoitimamisiforan,”

ishon Upa Diosin yoini cuscan Isaías cununi.

11

Ascan Upa Diosin Israelifo catonni

¹ Ascano un mato yocanon. ¿Upa Diosin ahuun yora Israelifo potapacunacamun? Ma. Anorima. Unrifi Israeliquin. Abraham non Benjamín uhuun shunifo.

² Upa Diosin ahuun yora inonpacoai cuscan onanshocai ato potamisima. Shinancapon. Nocon shuni Elías Israelifohuunoa Upa Diosin yoini isca huaquin,

³ –Ifon, min tsain inonpacoai cuscan yoimisifo rutuafo. Mia a muranshon cufiti choquiaquin futsafo. Uru fusti un tushufiacun uari rutupaicaniran, –ishon Elías Upa Diosin yoini.

⁴ ¿Ascan Upa Diosin raquiri Elías cumanimun? Isca huaquin cumani, –Ma. Mirus fusticai min tushuama. Siete mil min yora futsafoanri ua noiafo ahua futsacai ifoanfoma. “Baalcai uhuun diosiran,” huamisifomaran, –ishon Diosin Elías cumani.

⁵ Nanscarifi aquin natianri Upa Diosin uhuun caifo fustirasi catoan atohuun rama-paquin.

⁶ Ahuara shara huaa rafanancai ato catoanma. Atohuun noiquin ato catoan. Dios non yonoshonaitocai noco catoanma. Ahuara yonoshomacai non cashman fitiroma. Ascanfiacai non Upa Dios yonoshotiroma noco catonon. Noco cashmancoi catoan.

⁷ Ascano uhuun caifo Israelifo Moisés yononi cuscan apainifo aton chaca soanon Diospan yora ipaiflashucai ahuun yorafo icafo. Diosin catoanfosi aton chaca soashona ahuun yorafo inonfo. Nan futsafoan aton ointi mutonifo.

⁸ Nannori Diosin tsain cununi isca huaquin,

“Upa Dios nicacasmafo. Ascan ato oshamana cuscara shinantsa afo ahuunoa shinanonfoma. Oinfiacani fusho cuscarafu. Nicapaicoinnifoma. Ascaiton ahuun tsain shara ato tapimanima. Natianri nanscacani,”

ishon Moisés cununi.

⁹ Nannori nocon niaifo shuni ipaoniton David yoini isca huaquin,

“Nan nicacasmamisifo onaintimapaionon. Tushu ichapayafo futan mafo ichapayafoanriraca shinanfo Upa Diosin atoqui unimai. Ascarama. Amaquiri shinanshu oimitsiscapaiononfo.

¹⁰ Ato fusho cuscara imapaionon. Ato cacoapaionon aton ointi ihuu ipaiononran,” ishon David Dios nicacasmamisifoahuunoa yoini.

Israelifoanmari Jesús icoinra huacanashu afu nipaonfo

¹¹ ¿Ascano uhuun caifo Israelifoan nicacasmamisifoquin Upa Diosin ato potapacunacamu? ¡Mal! ¡Anorimal! Chaca huafoan Jesús nicacasmacani. Ascacun mani futsafo Jesushuunoa yoi icoinra huanonfo afu ipashquin. Nanfoan Jesús icoinra huaiton uhuun caifo Israelifoan oincashon shutitan ifoanpaitirofo. Nannori Upa Diosin ato shinanmapai.

¹² Uhuun caifofoan chaca huapaonifo Jesús ifoanpaquinma. Ascano Upa Diosin manifesti anofo Jesushuunoa tapimanano icoinra huashu nipaonfo. Ascano isharafo. Diosin ato shara huashon. Ascafia uhuun caifori chipo Jesús icoinra huacanashu nantifi manifesti anofo mimacai unimashcani.

¹³ Man uhuun caifoyamafiacun Upa Diosin ua mato muran nichini Jesushuunoa un mato yoinon. Un Jesús fu rafumisi. Ascashon un ahuunoa mato yoi. Un fasi unimai Upa Diosin ua catonni un mato yoinon.

¹⁴ Uhuun caifori un yoimisi Upa Diosin ua matoqui nichini. Man unimaiton oincani afoanri mato shutipaitirofo Jesús icoinra huapaicaquin.

¹⁵ Shinancapon. Afoan Jesús ifoanpaiyamaifon. Mani futsa anofo Upa Diosin ato tapimani. Nicacashon Jesús ifoannifo. Nan sharafishu uhuun caifoanri Jesús icoinra huaifoanno fasi sharacoin iishquin. Yora naashu funia cuscara itiro.

¹⁶ Uhuun caifoan Jesús icoinra huaquin tau huanifo. Ascan nocon funafori chipo Diospan yorafo iishcani. Fanafo ahuun tapo sharano ahuun poyanfori shara itiro. Nanscarifi aquin Upa Diosin Israelifo catonni ato shara huaquin. Ascano aton funafori catonshquin aforifi imasharashquin ahuun yorafo inonfo.

¹⁷ Un mato iscara tapimapai man tapinon. Israelifo ihui fana poyan cuscarafu. Abraham Dios icoinra huaquin tau huano. Ahuun funafori Diospan yorafo ipaonifo. Nanfofin ihui fana poyan cuscarafuquin. Natian Upa Diosin ihui fana poyan fimioa poshtushon potani. Nanscarifi aquin Israelifoan Jesús icoinra huayamaiton ato pota. Manfin nan ihui poyan futsa cuscarafuqui. –Ihui olivoran, –ishon anuni. Nan ihui fana olivo ahuun poyan futsaqui tuchia. Abraham fana futsa poshtushon futsaqui tuchia cuscara. Nanscarifi ai uhuun caifoan man icoinra huayamaiton Diosin mato ihui ahuun facufo man inon. Diosin Abraham yoini cuscan natian marifi man ahuun yorafo inon.

¹⁸ Ihui fanacai ahuun tapomaisi nitiroma. Tsasitiro. Ihui fana ahuun poyanfo non ahuun tapohuunoshu nipatiro. Poyafoancai ahuun tapo nimatiroma. Nanscarifi ai mancai Jesús nimapacutiroma. Nantocai fin mato nimapacutiromoquin. –Noncai futsafo cuscarama. Nonfin Diospan yorafoquin, –iyamacahuun. Cacapaimisi iyamacahuun.

¹⁹ Man shinanraca. Fana poyan chacaran ishon man poshtushon potatiro. Nanscarifi aquin Israelifoan icoinra huayamaifon ato potani. Ascano non ahuun yorafo inon. Ascacun, –Non shararan –ishon man shinanquin.

²⁰ Nan iconfiashu oinfain. Nan Israelifoa icoinra huayamaifoa Upa Diosin ato potani. Man icoinra huashufin ahuun yorafo man iquicai. Ascan cacapaimisi itama, —Non Jesús icoinra huayamashu non funotiroran, —ishon shinacahuun.

²¹ Israelifoa icoinra huaquin tau huafianishacaquin chipo aton funafoan icoinra huayamaifoa Diosin ato potani. Manrifi man icoinra huayamaiton matori potatiro.

²² Ascacun shinacapon. Upa Diosin matohuun ramapaiquin ahuun yorafo mato imai. Israelifoa icoinra huayamaifoa ato onaintimaquin ato potani. Ascan matohuun ramapaiyai cuscan shinanfafaicahuun. Icoinra huafafaincahuun. Man ascayamaiton matori potatiroquin.

²³ Uhuun caifofoan afanan chaca shinainyamaifoa Jesús icoinra huaifoa afanan ahuun yorafo Upa Diosin ato imatiro. Fana poshtushon afanan poyan tuchitiro cuscan atorifi huatiro ahuun yorafo inonfo.

²⁴ Ifoancai ihui olivo fanamisima ahuun poyan shatushon fana futsaqui tuchini foaisharanon. Nanscarifi aquin man Diospan yora ipaonima. Ascan natian Upa Diosin mato ihuia man ahuun facufo inon. Ascacun mimacaiquin uhuun caifo afanan ihutiro ahuun yorafo inonfo. Jesús icoinra huaifoa ahuun yorafo ato imatiro.

Upa Diosin Israelifo numashqui ahuun yorafo inonfo

²⁵⁻²⁶ Uhuun yoramishtichin, tsain futsanhuunoa man shinanmisima un mato tapimai maton nomuran man shinanon. Nan tapianshu cacapaimisi man inonma. Icon natian uhuun caifo Israelifoa aton ointi curushu Diospan tsain shara Jesushuunoa nicacasmacani. Ascfia uhuun caifomafoan ahuun unutaqui Jesús icoinra huaifoa Upa Diosin ahuun yora imashquin. Nantianricai afanan uhuun caifoan nicacasmamisi ishcanima. Ascano nantifi Israelifoa Jesús icoinra huaifoa Upa Diosin ato numai ahuun yorafo inonfo. Nannori nocon shuni Isaías cununi isca huaquin,

“Nocon Numamisi Sión ano icaquin. Afin Israelifo numai oi afanan chaca huanonfoma.

²⁷ Nantianri un yoini cuscan un aton chaca soashoshquran,”
ishon Diosin yoini cuscan Isaías cununi.

²⁸ Uhuun caifofoan tsain shara Jesushuunoa nicacasmacani. A noicasmacaquin. Ascacun Upa Diosin mato shara huashoan. Ahuun tsain shara Jesushuunoa man icoinra huanon. Mato shara huafiano uhuun caifoan nocon shunifo Abraham non Isaac non Jacob yoini cuscan ointiaguimama. Ascacun atohuunshon aton funa Israelifori ato noi.

²⁹ Upa Diosin nocon caifo inanonpacoai cuscan yoyonishaquin afanan shinan futsanpacunacama.

³⁰ Mancai Upa Dios nicapaipaonima. Ascfiacun Upa Diosin uhuun caifo shara huapaiyai cuscan ato shara huatamarocon matohuun ramapaiquin mato shara huai.

³¹ Nan man nicacasmapaoni cuscarifi uhuun caifofo nanscarafosi. Ascfiano matohuun ramapaiyai cuscan aforifi chipo Upa Diosiqui nasoshcani atohuun ramapainon.

³² Upa Diosin yoini cuscan nantifi maniafotiton chaca huamisifo. Ascfiacun atohuun ramapaiquin ato numanon.

³³ ¡Aicho! Nocon Dios fasi sharacoin.

Nantifi yorafohuun ramapai unupacunacama.
Aafin apaiyai cuscan tapicoianquin.

Nantifi tapicoian inonpacoai cuscan tapifain aafin noco ashoai cuscan tapicoian.
Ahuun nomuran yorafohuunoa shinain cuscan non tapipafiaquicai tsoanshta tapitiroma.

Aaton acai cuscan tsoan tapitiroma.

³⁴ ¿Tsoamun nocon Ifoan shinain cuscan tapitiroquin?

Tsoancai Dios tapimatiroma ahuun tapimamisi inon.

³⁵ Tsoancai Dios ahudara inantiroma ato nifinon.

³⁶ Arusu ahuun nomuran shinain cuscan nantifi onihuani.

Ahuun curushhuunashufin nantifi itiro.

Nantifi ahuuna.

Nantifi onihuafofotiton ahuunoa yoisharapacunacafo.

Ascacun, —Diosin sharacoinran, —huapanonfo.

Amen.

12

Ahuuscashumain Diospan ahuun yonomati non itiroquin

¹ Uhuun yoramishtichin un mato yoisharapaiyai cuscan acapun. Upa Diosin matohuun ramapaiquin mato shara huamisi. Ascacun marifi matohuunoa inancahuun mato ifo inon ahuun yonomati ipashcaquin. Man ascaino afanan chaca maton ifo itiroa ahuunacooin

man inon. Shinancapon. Man cayacafi shinansharacoinquifin matohuun noiai cuscari marifi man ahuun noitiroquin. Man ascaino Upa Diosin fasi matoqui unimacoin.

² Ahuarafoan Upa Diosimaqui mato imapaiyaifo cuscan atama shinan futsancahuun Diosin mato imapaiyai cuscan aashquin. Man shinanpaoni cuscan afanan shinaryamacahuun. Natian Diosin maton nomuran shinan futsama sharapaiyai cuscan shinancahuun. Man ascaquin man tapitiro Upa Diosin mato imapaiyai cuscan sharacoin. Mato imapaiyai cuscan man aino matoqui unimacointiro. Ahua futsacai man yopatiroma.

³ Upa Diosin uhuun ramapaiquin ua maton muran nichini un mato tapimanon. Ascan un nantifi mato yoisharapai. Cacapaimisi iyamacahuun. Diosin mato imapaiyai cuscan fusti shinancahuun. Ahua futsa ipaiyamacahuun. Man Dios icoinra huatiro cuscan afin mato shinanmanaino cayacafi shinansharacahuun. Man icoinra huaa cuscan nan fusti Upa Dios ashocahuun.

⁴ Un mato ahua futsa yoipai isca huaquin. Nocon cayan fustifiano non pashcoi futsua. Afocai ascarafosima.

⁵ Nanscarifiai nocon Ifon Jesús fusticoïn. Nonfin ahuun yorafoquin. Non ahuun cayan cuscarafoshu non yopanonainquin.

⁶ Upa Diosin nocohuun noi qui cashman noco imapaiyai cuscan non ahuunshon futsafo ashosharatiro. Noco imapaiyai cuscacai non ascarafosima. Upa Diosin man atirifi catoon ahuun shinanhuunshon icoinra huaa futsafori ahuun tsain yoinon. Mato catoncun man icoinra huashon mato yoia cuscan futsafori ahuun tsain yoicahuun.

⁷ Ratoranfo catoncun ahuun shinanhuunshon futsafori ashosharanon ato shara huashofaincahuun. Ratoranfo catoncun ahuun shinanhuunshon ahuun tsain ato tapimasharacahuun.

⁸ Ratoranfo catoncun ahuunshon futsafo ointi fupi huamafafaincahuun. Ratoranfo catoncun yopaifo inanquin ato unimacain inansharacahuun. Ratoranfo ahuun shinanhuunshon futsafo yononon Diosin shinanma cuscan ato yonosharacahuun. Nan mato catoncun ahuun shinanhuunshon omitsiscaifohuun ramapaiquin unimaquin ato ashosharacahuun.

Futsafohuun noicoïncahuun

⁹ –Un mato noiran, –ificatan parayamacahuun. Atoqui shinanchacayamacahuun. Yorafohuun noicoïncahuun. Ahuara chacafo noicasmacahuun. Ahuara shara fasi noicahuun. Afo potayamacahuun.

¹⁰ Nan man icoinra huafoti noinancahuun. Maton yoracoinfo man noimisi cuscan huafainri futsafo ya noinancahuun. Yoinansharatanancahuun.

¹¹ Nocon Ifo yonoshoni shaniyamacahuun. Diospan Yoshin Sharahuunshon unimacain yonoshosharacahuun.

¹² Upa Diosin mato shara huashoshquiai cuscan shinancahuun. Nanfo shinain unimacahuun. Ascan omitsiscafiain funayamacahuun. Upa Dios cufinquin unuyamacahuun.

¹³ Diospan yorafo yopai cuscan ato inancahuun. Futsafo pimasharacahuun. Pushu yopaifoan maton pushu muran ato iquimacahuun. Ato cushusharacahuun.

¹⁴ Mato omitsiscamaifoan ato copiyamacahuun. Ato roayamacahuun. Asca huatama ato shara huacahuun. –Upa Diosin mia shara huairan, –ishon ato yoicahuun.

¹⁵ Unimaifo ya unimacahuun. Uaicaifo ya uaicahuun. Omitsiscaifoan ato shinancahuun.

¹⁶ Ahuu iquinan tananquima. Upan Diosin mato shinanmapaiyai cuscan nanorisi shinancahuun. Oinanmitsapaimisi iyamacahuun. Niaifofo yasi rafucaquima. Ahu-uomafo yari rafucahuun. –Un tapia cuscacai futsafoan tapiafomaran, –ishon anori shinaryamacahuun. Curafiyamacahuun.

¹⁷ Mato chaca huafiaïnfoan ato copiyamacahuun. Aton ointaifi isharacahuun.

¹⁸ Nantifi yorafo ya rafupaisharacahuun. Man asca shara huapaïfaino futsan matofu isharpaiyamainocai matohuun nuama.

¹⁹ Uhuun yoramishtichin, futsan mato chaca huafiaïnton ato copiyamacahuun. Upa Diosin yoini,

“Mato chaca huafiaïfin unfin ato onaintimaicai,”

ishon Diosin yoini. Diosifin chacafo ato onaintimashquiquin. Mancai ato onaintimaima.

²⁰ “Ato copitama nan mato noicasmaïfo fonaincaïfoan ato piimacahuun. Non-maincaïfoan ato ayamacahuun. Man ascaïton oïncani noco copimaran,” icashu rafipainonfo.

²¹ Ascan futsafoan mato chaca huapaiyaïfoan marifi copiquiri ato chaca huayamacahuun. Chaca ifo huayamacahuun. Ascata ma shara huafafaincahuun. Asca huaquin man chaca potatiro.

13

¹ Upa Diosin yononi cuscan manifoto anofo niaifo catononfo. Ascan nantifi niaifo uhuapafu yafi patasharifori nicacoincahuun.

² Tsoan ato nicacasmaquin Diosinri nicacasmacani. Nan nicacasmaifoan ato onaintimashqui.

³ Non isharashucai non niaifoqui musutiroma. Chaca huashufi non atoqui musuti-roquin. Niaifoqui musushquinma isharacahuun. Man ascaiton mato chaca huatama matohuunua yoisharanonfo.

⁴ Niaifofofin Upa Diosin oinmatifo cuscarafokin mato shara huashcaquin. Ascafia chaca huaashu ratucahuun afocai cashman niaifoanma. Yorafo onaintimatirofo. Nanfofin Diospan oinmatifo cuscarafokin chaca huaifoan onaintimashcaquin.

⁵ Asca mato yonoaifoan nicacoincahuun mato onaintimanonfoma. Maton nomuran isca huaquin shinannonfoma, —¡Ohuash! Upa Diosin yononi cuscan un aamaran, —ishon shinanshcaquima.

⁶ Diospan oinmatifo cuscara mato shafatifi yonoshcaquin man isharanon. Ascacun mato pui yocaifoan ato inancahuun ahuunshon mato shara huashononfo.

⁷ Man ato nifian cuscan inancahuun. Atohuunua shinansharafain yoisharacahuun.

⁸ Tsoa nifiyamacahuun. Ascatama noinancahuun. Noinain unuyamacahuun. Nantifi non noiquin Upa Diosin yononi cuscacoin non huatiro.

⁹ Noco yoiqui isca huani, —Maton ahuinmafo ya iyamacahuun. Ainfofori mato funuma furi iyamacahuun. Rutumitsapaiyamacahuun. Ahuara onuyamacahuun. Futsana fipaiyamacahuun, —ishon noco yononi. Ahuara futsafori noco yoini. —Non yorafo noifin Upa Diosin noco yononi cuscan non aicain, —ishon noco yononi.

¹⁰ Non futsafo noicoishocai non ato chaca huatiroma. Ascan non nantifi noicoishofin Diosin yononi cuscan non atiroquin.

¹¹ Un mato yoiái cuscan acahuun. Nocon Ifo Jesús oti chaima. Non icoinra huaquin tau huani chain. Oshapaimisi cuscara iyamacahuun. Oshapaicai non yonosharatiroma. Nanscarifiai shanicaquima. Jesús yonoshosharacahuun itisharashcaquin.

¹² Shafacuaino samamashta shafatiro. Nanscarifiai man chaca huai cuscan cuyocuanaino natianri nocon Ifo man oti chaimaquin. Ascashu faquish muran ica shinantsa ayamacahuun. Chaca shatucoincahuun. Jesús ica cuscan marifi shafacafi icaahuun. Chaca huaquima.

¹³ Isharacoincahuun. Shafatan non oinsharatiro pacushquima. Nanscarifi aquin Jesús tanashu non isharatiro chaca huatama. Ascan futsafo monoaifo muran atoqui foyamacahuun chaca huashquima. Chaca futsa futsatapafu huayamacahuun. Paunyamacahuun. Ascatari maton ahuinma chotayamacahuun. Ainfofoanri maton funuma chotamayamacahuun. Ahuara chaca futsafo shinanyamacahuun. Fochishmanantananyamacahuun sinashquima. Futsa shutipaimisi iyamacahuun.

¹⁴ Ascatama nocon Ifo Jesucristo icai cuscan acahuun. Ahuarafoan mato chaca huatiro afohuunua shinanyamacahuun chaca huashcaquima.

14

Jesús icoinra huaa futsafo tsain chaca huayamacahuun

¹ Tsain futsari un mato yoi. Tsoan Jesús Ifo huafishocai ahuun tsain shara atirifi tapisharataima matofu ichanainton, —¡Aicho! No fu ichanahuun, —huacahuun. Man shinain cuscan shinanyamaiton afu fochishmanantananyamacahuun. Aqi tsain chaca huayamacahuun.

² Mato muran ishon futsan yoitiro isca huaquin, —Un Jesús icoinra huashon nantifi tushu shara un pitiroran, —ishon yoitiro. Ascan futsan yoiquin isca huatiro, —Unfin Jesús icoinra huaquin uncai nami pitiroma. Yonosifin un pitiroquin, —ishon yoitiroquin.

³ Man nantifi pitiroquin a yonosi pitirohuunua shinanchacayamacahuun. Nanscarifi aquin man yonosi pimisiquin a nami pimisihuunua isca huaquin shinanyamacahuun, —Atofin chaca huaiquin, —ishon yoiyamacahuun. Upa Diosin nantifi nanscarafosi noco imani non ahuun facufo non inon. Ascacun futsaqui tsain chaca huayamacahuun.

⁴ Jesús icoinra huafocai maton oinmatima. Upa Dios fustina. Ascacun atoqui tsain chaca huayamacahuun. Upa Diosin ato tapimatiro cayacafi shinanyamaraquimain amaquiri shinancaniquin. Afin ato tapimatiroquin isharanonfo.

⁵ —Moisés nocon caifo yononi rato shafatamain non ichanantiroquin Upa Diosihuunua shinanshquin, —atiriffain Jesús icoinra huafoan anori shinancani. Ascafia atiriffain anorisi shinancanima. Shafatifi ichananfo Upahuunua shinanshcaquin. Ascacun nantifiton maton nomuran man shinain cuscan acahuun.

⁶ Atirifoan shinanfo rato shafatamain ichananti shafa shara itiroquin Upa Diosihuunoo shinanshquin. Nanfoanri nocon Ifon Jesús shara huapaicani. Ascan futsafoancai anori shinancanima. —Shafatifi nanscarafosi non Diosihuunoo shinantiro. Ascatai nan ratoran shafatafin non nami pitiroquin. ¡Aicho! Upa Diosin min noco nami inanquin non pinon, —ishon shinantirofo. Nanfoanrifi nocon Ifo Jesús shara huapaicani. Ascashon futsafoan nami piyamaifoan yonofosi pitiro. Nanfoanri noco Ifo Jesús, —¡Aicho! —huatirofo. Nan rafutan Dios shinansharapaicani.

⁷⁻⁸ Non niyoshocai nofin non apaiyai cuscan fusti non shinantiroma. Upa Diosin noco amapaiyai cuscan non shinantiro. Nonfin ahuunafoquin. Nanfin nocon Ifonquin. Noncai nofin catontiroma rato shafatamain non naicain. Ascan niyoshon iyamarai non naitianri non nocon Ifonna. Niyoshon non nocon Ifo tanasharapai nocoqui unimanon. Non naitian non nocon Ifo shinantiro non ahuunacoin.

⁹ Criston noco nashoni. Maia murannoashu funicainshquin. Ascan natian man nia. Non niano yafi non nano nocon Ifo iishquin.

¹⁰ ¿Ahuuscain icoinra huaa futsan ahuun ifo man ipaiyai chaca huayamaraquin shara huairan huashquin? ¿Ahuuscain futsahuunoo man shinanchacamun? —Acai ahumarán, —ishon man shinan. Ointiaquimayamacahuun nantifi non chipo Dios icano aqui nocoicain. Nantian noco yoishquin nonmain shara huayamaraquin non chaca huamisiquin.

¹¹ Nannori Diosin tsain Isaías cununi isca huaquin,

“Iconcoiun un niaquin. Iconcoinri nantiffain manifoanna anofo uqui nocoshcaini ua ratoconun mai chachishon yoishcaini, ‘Diosin, icon min Diosinran,’ ishon nantiffain ua yoishcaini.”

¹² Ascan nantiffain non Upa Diosin ointaifi non amisi cuscan noco yoifain non shinanmisi cuscari noco yoipacushquin.

Futsafo chaca huamayamacahuun

¹³ Ascacun afanan icoinra huafohuunoo tsain chaca huayamacahuun. Noncai ahua chaca huaima noco oincashon arifi chaca huanonfoma.

¹⁴ Jesús uhuun Ifocun un mato yoisharapai. Mun icoinra huacoinna nantifi yonosharaho non nami sharari non picucai noco chaca huamaima. Ascafia tsoan ahuun nomuran shinanquin isca huai, —Un na tushu piquin un chaca huatiroran, —ishon shinanquin atocai tushu pitiroma. —Un pishon uhuun nomuranshon un shinanchacatiro, —ishon yoitiro.

¹⁵ Mi futan Jesús icoinra huaton ointaifi a nami min pitiroma piyamacahuun ahuun nomuran shinanchacanonma. A noishocai min ahuun ointaifi min pitiroma. Nocon Ifon Cristo ahuunoashuri nani. Ascan a pitiroma piquin min futsa shinanchacamatiro. Ascacun ahuun ointaifi piyamacahuun Jesús cachiquiri huanonma funoshquima.

¹⁶ Man acai cuscan man shinanraca sharacoin. Ascan futsafoan oinquin shinanchacanonfoma shaturiscacahuun matoqui shinanchacanonfoma.

¹⁷ Ascano shinancapon. Non pifain aqui ayafain non huatocai nocon nomuran noco shinansharamatiroma. Upa Diosin noco iquinano non ahuun Yoshin Sharahuunshon Jesús cuscara isharacain nocon ointi non unimacointiro.

¹⁸ Nocon Ifo Jesús non yonoshosharaino Upa Diosin nocoqui fasi unimasharatiro. Yorafoanri nocohuunoo shinansharatirofo.

¹⁹ Ascacun icoinra huaa futsafo ya icoinsharacahuun. Jesushuunoo shinanmatanancahuun a cuscara shara iishcaquin.

²⁰ Icoinra huaa futsafoan tushu futsa piyamaiton aton ointaifi a tushu piyamacahuun. Diosin yoini nantifi tushu sharafiacun aton ointaifi piyamacahuun. Man piquin aton nomuran man shinanchacamatiroquin. Ascaquin man ato pacumatiroquin afanan Jesús tananonfoma.

²¹ Ascan icoinra huaa futsafoan shinanquin isca huaquin, —Diosin yononi cuscan un nami pitiroma. Un ahuaara paari ayatiromaran, —ishon shinanquin shatucahuun ato pacumashquima. Ahuarafoan ato pacumatiro shatucahuun pacunonfoma.

²² Ascano afohuunoo man icoinra huaa cuscan marusu maton nomuran shinanchahuun. Upa Diosin fustifin man yoitiroquin. Man man tapian nantifi man acai cuscan nanfo sharacoin. Ascafiacai atirifoan tapisharataicanima. Ascano pifain ayafain huaquin mato nomuran man shinantiro man chaca huaa cuscan. Ascafia shatucioianshufin maton nomuran man unimatiroquin.

²³ Ascashon tsoan ahuun nomuran shinanquin isca huai, —Afo piquiraca un chaca huaicati, —anori shinanfiquin piriaquin chaca huatiro. Tapishoma shara iyamarai chacafiacun un pia. Ahuara futsan tapishoma aquiraca, —Un chaca huaicati, —ishon shinantiro. Tapishoma aaqi chaca huai.

15

Mafin man apaiyai cuscan huatama futsan apaiyai cuscan huashocahuun

¹⁻² Non icoinra huaitin Diosin noco yoini non nantifi tushu pitiro. Ascan icoinra huafoma non ato funaiquimashta yositiro atofu fochishmanantanantama. Nofin non apaiyai cuscan fusti non atiroma. Nan icoinra huua futsafohuuri non ramapaitiro shinansharanon nocon Ifo non ato tanamasharatiro.

³ Shinancapon. Nocon Ifon Cristo afin apaiyai cuscan fusti shinanpaonima. Ascano ahuunoa Diospan tsain cunuquin isca huani, —Upa, un mia nicacoin. Ascan mia chaca huapaicaquin uari roacaniran, —ishon cununi.

⁴ Nantifi Diosin tsain cunupacuni noco tapimashquin. Cununiri non icoinra huashon ahuara chaca finonfiaquin non tunucoinnon. Ahuun tsainhuunshon nocon ointi non fupi huamashon non tapitiro nocon Ifo fu nai muran chipo afu ipashquin afanan ahuara chaca finonshquima.

⁵ Upa Diosin non chaca finoainton noco mutsismatiro nocon ointi unimacain nocon Ifon Jesucristo man tanasharaino mato nannorisi shinanmatiro.

⁶ Ascano nannorisi shinanquifin non nocon Ifo Jesucristo ahuun Apa nan oi fusti nicatsa non ahuunoa yoisharatiro.

Nan tsain shara Jesucristohuunoa Israelifoma yoini

⁷ Criston nocoqui unimaquin noco iquina ahuun yorafo non inon. Ascan marifi futsafo ya yorahuatanancahuun. Man ascaino Diosihuunoa futsafoan shinansharatiro.

⁸ Un mato yoicain Jesucristo mai ano oni Israelifoan aton oinmati cuscara iquiyoi. Ascano Upa Diosin nocon shunifo yoini cuscan iconcoincun non tapitiro.

⁹ Mani futsafoanri icoinra huashon yoishcani isca huaquin, —¡Aicho! Upa Diosin noco-huun ramapaquin ahuun Furun nocoqui nichini. Noco numanon. Upa Dios sharanan, —ishon mani futsanfoan yoishcani. Nannori Diosin tsain cununi isca huaquin,

“ ‘Ascan un mani futsafo mihuunoa un yoisharashquin. ¡Aicho Dios sharanan!’
ishon un mihuunoa ato yoishquin. ‘Un mihuunoa shu fanainsharashquiran,’ ”

ishon cununi.

¹⁰ Afanan Diosin tsain cunuquin isca huani,

“Mani futsafoan nan Israelifo ya unimatnanancahuun. Marifi man atofu Diospan yora iishquicai,”

ishon cununi.

¹¹ Afanan cununi isca huaquin,

“Mani futsanfoan, nocon Ifohuunoa yoisharacahuun. Nantifi manifoti anoashu nanscasi aqui fanain ishocahuun,”

ishon cununi.

¹² Isaías arifi isca huaquin cununi,

“Nocon shuni Isaí ahuun funapan manifoti ato iquishquin. Shinanquin isca huashquin, ‘Nan fusti nocon Numamisi inonran,’ ishon yoishquicani,”

ishon Isaías cununi.

¹³ Ascan Upa Diosin fustiton maton nomuran imasharafain mato unimamatiro man afu ipanon icoinra huashu. Ascano ahuun Yoshin Sharapan ahuun curushhuunshon noco yoini cuscan nantifi noco ashonon, ishon man fasi icoinra huapainon.

¹⁴ Uhuun yoramishtichin, un icoinra huai un oianfin man noinantnancoianquin. Jesushuunoori tapishara futsafori ato tapimashquin.

¹⁵⁻¹⁶ Ascacun un ranotama afanan afohuunoa un mato shinansharamana. Diosin uhuun ramapaquin ua catonni Jesucristo ahuun oinmati un inon nan tsain shara ahuunoa un mato tapimanon. Ascan ua nichini un mato Jesús icoinra huamanon. Diospan Yoshin Sharahuunshon maton chaca man shatua a cuscara shara iishquin. Ascano Upa Diosin matoqui unimacoinqui ahuun yorafo mato imai.

¹⁷ Ascacun un fasi unimaicai nocon Ifo Jesucristo ua catonni Upa Dios un yonoshonon ahuunoa uhuun caifomafori un ato yoinon.

¹⁸ Criston ahuun curushu ua inan uhuun caifomafon Diosin tsain nicacoinon. Un ato yoimisi cuscan Upa Dios nicacoinmisifo. Un Cristo yonoshona cuscan fusti un tapia. Futsafoan Criston yonoshonahuunoa uncai tapiama.

¹⁹ Ahuun Yoshin Sharapan ahuun curushhuunshon tsoan oinyomisima cuscara un ato isma. Ascan un nan maitio Jerusalén anoshon yoifainquin Iliria ano un nantifi nan tsain shara Jesucristohuunoa yoiquin rupian.

²⁰ Uncai futsan Jesushuunoa yoimisi anori un capaimisima. Tsoan Jesushuunoa nicayomisima anorifi un capaimisi ato tapimashquin.

²¹ Nannori Isaías Diospan tsain cununi isca huaquin,

“Tsoan ahuunoa nicayomisima nicacaquin tapinonfo,”
ishon cununi.

Pablonun Roma ano cashquin shinanni

²² Ascacun un mato ari capaimisi. Ascafia un mato oin capaifain un camisima. Ahuara futsan finoanshu un nituri niturimisi.

²³ Ascafia natian mun cashcu futsa ato Jesushuunoa yoiqui anaitian. Ascan mun itishara mato ari cashquin. Un fari ichapa camisima. Nantishon tapiquin un mato ari capaimisi.

²⁴ Un España ari caquin mato ano rutiacashu un matofu tsainshquin. Non yoinonansharanon. Mato anoashu un caiton ua tushu inanshcaquin un España ari nocosharanon.

²⁵ Ascafia natian un Jerusalén ano cayoicai. Jesús icoinra huafoan ua nichini icoinra huaa futsafo un ato pui inanon.

²⁶ Macedonia yafi Acaya anofo unimacain icoinra huaa ahuuomafo Jerusalén anofo ato pui inanpainifo.

²⁷ Unimacaquin ato inanpaiquin. Yoinifo isca huaquin, –Jerusalén anofo Jesushuunoa yoisimifoan nocogu nichini. Noco nichiamacun na tsain shara non nicacuanama. Ascacun nan non aya cuscan nofiri non ato inanpai ato shara huaquin, –ishon yoiainfoan.

²⁸ Ascan un ato inanfaini un España ari caquin un mato oinfaini cai.

²⁹ Mun tapian un mato ano nocoshon nocon Ifohuunshon un mato yoisharashqui maton nomuran man unimanon.

³⁰ Tsain futsari un mato yopai. Man nocon Ifo Jesucristo noishon ahuun Yoshin Sharahuunshon uari noiquin ua Upa Dios cufishocahuun un yonosharashonon ahuaton ua nitun huanonma.

³¹ Ua cufishocapun Upa Diosin ua cushunon Judea anofo icoinra huamafoan ua ahuusca huanonfoma. Ua cufishocahuun un icoinra huafo Jerusalén anofo pui un ato inainno unimacoincai finonfo.

³² Nan ato inanquin anaititan Upa Diosin ua nichiano un unimacoin matoqui nocotiro. Ascashu non yoinonansharatiro nocon ointi non unimatananon.

³³ Diosin nocon ointi noco shara huashomisi matofu isharanon. Nanscarari ipainon.

16

Pablon ato tsain shara fomani

¹⁻² Nocon yorahuan Febe Cencrea anoashu matoqui nococun shara huacahuun. Nan ainfoan nocon Ifo tanasharacoianquin. Cencrea anofo icoinra huaafo shara huamisiquin. Yoraho shara huamisiquin. Uari shara huamisi. Fasi nocon Ifohuunoashu yonosharamisi. Ascacun yopai cuscan ashocahuun.

³ Priscila futan Aquila u futan Jesucristo yonoshosharamisifo. Ua ato yoisharashocahuun.

⁴ Futsafoan ua rutupaiyainfoan nan rafutan ua numaifoan ato rutuqui rashquinifo. Uhuun caifomari Jesús icoinra huafoan ichanancashon yoisimifo isca huaquin, –Priscila yafi Aquila non fasi atohuun noiran, –ishon yoisimifo.

⁵ Ato pushu ano ichananshori ua ato yoisharashocahuun.

Uhuun yorashta Epeneto ua yoishocahuun. Nantofin Asia anoshon Jesús icoinra huaquin tau huani.

⁶ María mato yonosharashomisi uo yoishocahuun.

⁷ Uhuun yoran rafuri Andrónico yafi Junias ua yoishocahuun. Nan rafu ufu cunu muran iquinifo. Jesús fu rafumisifoan atohuunoa yoisharamisifo. Un Jesucristo icoinra huataima nan rafutan icoinra huaquin tau huani.

⁸ Ampliatohuun un noi. Arifi nocon Ifon catonni. Ua yoisharashocahuun.

⁹ Urbano u futan Jesús yonoshomisi nanrifi ua yoisharashocahuun uhuun yorashta Estaquiri ua yoisharashocahuun.

¹⁰ Apeles fasi nocofunu shara. Upa Diosin aqui unimai. Atori Jesús yonoshosharamisi. Nanrifi ua yoisharashocahuun.

Aristóbulo yafi ahuun yorafori ua yoisharashocahuun.

¹¹ Uhuun yorashta Herodión ua yoisharashocahuun.

Narciso yafi ahuun yoraforan nocon Ifo icoinra huaafo atorifi ua yoisharashocahuun.

¹² Trifena yafi Trifosa non nocon yorashta Pérsida ua yoisharashocahuun. Nan ainfofoan nocon Ifo fasi yonosharashomisi.

¹³ Nocon Ifoan Ruforifi catonni. Ahua uhuun uhuacoin cuscara. Ua cushusharamisi. Nan rafuri ua yoisharashocahuun.

¹⁴ Asíncrito non Flegonte non Hermes non Patrobas non Hermas non icoinra huaa futsafo atofu icafo ua yoisharashocahuun.

¹⁵ Filólogo non Nereo yafi ahuun poi non Olimpas non nantifi icoinra huaa futsafo atofu icafori ua yoishosharacahuun.

¹⁶ Nantifi noinancanashu munininantanancahuun. Nantifi Jesús icoinra huafoan ichanashon maifoti anoashon mato yoisharanonfo.

¹⁷ Uhuun yoramishtichin oinfain. Mato fu ichananmisifo futsafoan mato shinancha-camapai afanan Jesushuunoa man nannorisi shinanonma. Non mato cayacafi tapima cuscan nanfoan anorima mato tapimapai. Mato amaquiri shinanmapai afanan icoinra man huanonma. Atomaqui icahuun.

¹⁸ Afoancai nocon Ifo Cristohuunshon yonomisifoma. Nanfoan ahuaa fipaiyai fo fustisi shinanfo. Diosin tsain tapisharafoma aton tsain fustihuunshon ato parapaicani ato amaquiri shinanmashcaquin.

¹⁹ Nantifiton nicafo man nocon Ifo tanasharacoincun. Asca un matoqui unimacoinni. Ahuaa sharafohuunoa tapicoincahuun. Manmain ahuaa chacahuunoa tapiyama-painon. Afohuunoa shinaryamacahuun.

²⁰ Upa Diosin nocon ointi isharamai cuscan nanton samamashta matomaquinoa Satanás anaiticoi mato afanan ahuusca huanonma. Nocon Ifo Jesús mato shara huashopainon.

²¹ Timoteo un futan Jesús yonoshomisiton mato yoisharapai. Lucio non Jasón non Sosípater nanfo uhuun yorafoan mato yoisharacani.

²² Unquian, Tercio, un natian Pablo cunushoni. Urifi nocon Ifohuunshon mato yoisharapai.

²³ Un Gayo pushu muran icun ua cushumisi. Icoinra huaa futsafori ahuun pushu muran ichanamisifo. Afoanri mato yoisharafo. Erasto yorafoan aton pui cushushomisi nocon yorahuan Cuartori mato yoisharapai.

Ahuun unutaqui Dioshuunoa yoisharani

²⁴ Nocon Ifo Jesucristo matohuun ramapai. Nanscari ipainon.

²⁵⁻²⁶ Upan Diosin mato cushusharanon. Un Jesushuunoa mato yoimisi cuscan ahi ahuun curushu mato inantiro man tanasharanon. Ipaoni tsoancai Jesucristohuunoa tapiyopaonifoma. Natian nantififain tapitirofo Upa Diosin nan nipanacaton noco nichini Furun Jesucristohuunoa non yoinon. Ishquiai cuscan Upa Diosin ato yononi cuscan nannoricoi cununifo. Manifoannatifoan Jesús icoinra huafain nicasharanonfo.

²⁷ Nocon Diosin fustitofin nantifi tapicoianquin. Nocon Ifo Jesucristohuunshon nantififain ahuunoa yoisharapacunonfo. Nanscasi ipanon. Amen. Nanti uhuun tsain unutaqui un mato yoi.

Pablo

Pablonun Corinto Anoafo Cunu Fomani

Pablonun Jesús icoinra huafu Corinto anoafo ato cunu fomani

¹⁻² Uhuun yoramishtichin un mato cunu fomai. No futan Jesús tanamisi Sóstenes u futan mato cunu fomai. Upan Diosin ua catonpaiquin ua catonni Jesucristo fu rafunon ahuun tsain Jesucristohuunua yoifoanfainon. Ascan Jesucristo ua nichini un ahuun tsain shara nantifi manifoti un ato yoifoanfainon. Corinto anoafoan manfin Diospan yorafoquin. Man ichananfainmisi Diospan tsain tapisharashquin. Diosin mato catonni Jesucristohuunuaahuun man ahuun yora sharafo inon. Ascacun un mato cunu fomai. Mato fustisima un futsafori cunushoni. Nocon Ifo Jesucristo Ifo huacun un atorifi na cunu un ato tapimapai. Nan nocon Ifofin aton Ifoiquin.

³ Un fasi mato shinain. Diosin matohuun ramapaicain, maton nomuran shinanmasharanon. Upa Diosin futan Furun Jesucristo nanfo mato ashoni.

Cristo ahuaara sharafo noco ashotiro

⁴ Mun tapian Jesucristo matohuun noiquin ahuaarafo mato tapimani ahuun ointi cuscara shara man inon. Nanscara tapishon un Upan Dios cufinquin isca huafafainni, —¡Aicho! Upa Diosin, min Corinto anoafo ahuaara sharafo Jesucristohuunshon min ato tapimananan, —ishon un cuffafainni.

⁵ Icon Cristo matofu rafuaino ahuunshon man tapisharacoian. Ascan ahuun shinanhuunshon shafacafi man yorafo Cristohuunua yoisharatiro.

⁶ Non mato Jesushuunua yoini cuscan Diosin maton ointi fiananan huaa ahuun ointi cuscara shara man inon. Ascacun man Jesús icoinra huashon man oinmana.

⁷ Ascashu Upa Diosin Yoshin Sharahuunshon mato imapaiyai cuscan man man iguina. Icoindra huaa futsafoan iguina cuscan marifi man man iguina maton nomuran Diosin shinansharanon. Natianri nocon Ifo man fasi oinpai afanan oaiton.

⁸ Aqú nocoaitan mato cushusharayoshquin. Ahuun curushu mato inanyoshquin man tanasharanon. Ascano nocoshon ratofomain afu ipacanicain yoifain ratofomain omitsiscapanacafo muran focanicai nantifi yoipacushquin. Nantiantari mato yoishquin isca huaquin, —Un maton chaca soashoni. Ascano tsoancai “Manfodin chacaforan,” mato huatiroma. Ua cuscara shara un mato imairan, —ishon Jesús mato yoishquin.

⁹ Upa Diosin mato catonni Furun nocon Ifo Jesucristo fu man rafunon. Upan noco yoia cuscan man aicain.

Jesús icoinra huaa Corinto anoafoancai anorifosi shinancanima

¹⁰ Uhuun yoramishtichin un mato yoisharapai. Nocon Ifo Jesucriston ua yonoaino un mato yoi nannorifosi man shinanon. Shinan futsacaquima Jesucristo mato shinanmapaiyai cuscan nannorifosi shinancahuun.

¹¹ Uhuun yoramishtichin Cloé ahuun yorafo uqui fucashon ua tapimanafo man fochishmanantanafainaiton.

¹² Atirifoan yoiafo, —Nonfin Pablon tanamisifoquin non shinain cuscafin cayacaficoquin. Futsafoancai cayacafi shinancanimaran, —ishon man yoia. Futsafoan yoiafori, —Nonfin Apolos tanamisifoquin, —ishon yoiaifono. Futsafoanri, —Nonfin Pedro tanamisifoquin, —ishon yoiaifonori. Futsafoanri, —Nonfin Cristo tanamisifoquin, —ishon man yoiafaini.

¹³ Uhuun yorafoan ascacai sharama. Cristocai nocon ointi rananya imapaima futsa futsa huaquin non shinanon. Cristo tsain cayacafi fusti. Mato pashcanan huaima futsa futsa huaquin man shinanon. Uncai ihui coyan iquinanhuunuaahuun mato nashonima. Man unu muran iquimamupacunitian Jesús tanacoishon man futsafoan ismashquin chaca shatushon Jesús Ifo huashquin. Uncai tsoa unu muran iquimanama ua tanafain ua ifo huanon.

¹⁴ Un unimai. Uncai tsoa futsa unu muran iquimanama. Crispo yafi Gayo nan rafusi un unu muran iquimani.

¹⁵ Ascacucái tsoan yoitiroma isca huaquin, —Un unu muran iquimamua Pablo tanamisi ishquiran, —ishoncai tsoan yoitiroma.

¹⁶ ¡Aira! Nantian mun shinain. Estéfanas yafi ahuun yorafori un ato unu muran iquimani. Un shinanfin un tsoa futsa unu muran iquimanamaquin.

¹⁷ Cristocai ua yononima un yorafo unu muran iquimacacunon. Ua yonoa un ahuunua tsain shara yoinon. Ufin shinanfaincai un mato yoiaama. Ufi shinanfaincai un mato Jesucristo icoinra huamatiroma. Uhuun shinanpan mato yoiaiton nancai Diosin ahuun curushma Jesucristo mato ihui coyan iquinanhuunuaahuun nashoni maton chaca

soashoshquin. Nan tsain fustihuunshon Upa Diosin ahuun curushhuunshon mato numatiro.

Upa Diosin nantifi tapicoian ahuara futsa apaiquin atiro Cristohuunshon noco oinmapacumisi

¹⁸ Ascashon Jesús ato nashoni nicacani a icoinra huaamafoan isca shinancani, —*z*Tsoanco icoinra huatiromun Jesús ihui coyan iquinanqui noco nashoni nocon chaca soashoshquin? Na tsaincai ahuama, —ishon yoicani. Ascashu nanfo funocoinceni. Omitsiscapanacafu muran focani. Ascan nonfin icoinra huaicai. Ascano noco nimapacunaca non afu ipanon. Diosin ahuun shinanhuunshon Jesús noco nashoni nocon chaca soashoshquin. Ahua futsacai noco nimapacutiroma non afu ipanon.

¹⁹ Diosin tsain cunuquin isca huani,
 “Nan ua icoinra huamafoan shinancaquin isca huacani, ‘Non tapicoian. Nocon mapon shinansharafain non ahuara huatiro nonfin tapisharaqin,’ ishon shinancani. Ascashon ahua tapiafoma. Unfin un ato oinmanicain. Afoan shinainfo cuscacai un ato huaimaima. Ipaitsi shinanforan,”
 ishon Diosin yoini.

²⁰ Ascan cunu tapisharafiachashon Diosin shinain cuscacai huacanima. Nanfofin Diosin atoti oinmaniquin amaquiri shinainfo cuscan. —Nonfin ahuamamishti tapisharaqin, —ifiafoan Diosin ato ismai afoancai ahuashta tapiafoma.

²¹ Tsoanshtacai aton shinanpan Dios onantirofoma. Diosin fustitofin nantifi tapisharacoinquin. Icoindra huamafoan yoiquin isca huafo, —Jesús icoinra huafoan ahuunoa yoirafo fasi amaquiriran, —ishon yoifiafo Diosin nocon chaca soashona non afu nipanon nonfin icoinra huaicai.

²² Ascano uhuun caifo Israelifo iscamisifo, —Diosin nai muranshon noco ahuamamishti oinmanaiton Jesushuunoa yoirafo cuscan non icoinra huatiroan, —ishon shinancani. Nan Israelimafori iscamisifo, —Noco Jesucristohuunoa yoirafo cuscacai non tapitiroma. Ascacun non icoinra huatiroma. Nan ahuara non tapiafin non icoinra huatiroquin, —ishon yoimisifo.

²³ Anori ifiainfoanno non isca huamisi, —Jesucriston ihui coyan iquinanqui noco nashoni nocon chaca soashoshquin, —ishon non yoimisi. Ascaciafocun uhuun caifo Israelifoan yoiquin isca huafo, —Ihui coyan iquinanqui mastancai nocon Cristo itiromanan, —ishon shinancani. Israelimafoan Cristohuunoa nicacani aqui cashupaicani, —Tsoancai nanscara icoinra huatiroma. Futsan noco nashoni nocon chaca noco soashoshquin, —ishon yoimisifo.

²⁴ Ascaciafocun non icoinra huafoti Diosin noco catonni. Israelifo yafi mani futsafo Cristohuunshon nocon chaca soashonano non afu ipanon. Non tapia Cristohuunshon Upa Diosin ahuamamishti huamisi. Ahuun curushhuunshon noco numani. Atofin nantifi tapicoianquin. Cristohuunshon noco numani non afu nipanon.

²⁵ Icoindra huamafoan yoiqui isca huafo, —“Jesucristo noco nashoni,” ishon noco yoifiaquin fasi amaquiricoin icoinra huafo. Yora mapo sharayatocai anori shinantiroa, —ishon icoinra huamafoan yoimisifoquin. Anori yoifiafoan Diosin ahuun shinanhuunoa Jesucristo noco nashoni. Diospan ahuun shinancai a icoinra huamafoan aton shinan cuscarama. Atonfin fasi cayacafi shinanmisiquin. Icoindra huamafoan yoimisifo isca huaquin, —Non fasi tapicoianran, —ishon yoifiaquin icon yoicanima. Fasi amaquiri shinancani. —Non ahuamamishti huatiroan, —ifiamisishacaquin afocai afin numatiroma. Ascaciafocun aforicai afin chaca soamutiromafoma. Upa Diosin fustiton ahuamamishti huatiro.

²⁶ Uhuun yoramishtichin shinancapon. Diosin mato catoantaima ahua cuscaramain man iyomisiquin. Man fustrasiton man cunu tapiaino maton muranri niaifo fustrasi. Nan Jesús icoinra huamafoan yoiquin isca huafo, —Afocai ahuamaran, —ishon matohuunoa yoicani.

²⁷ Nanfoan shinancai man ahuama. Ascacia Diosin mato catoan tapicanashu chipo rafiapaitirofo. Shinainfo isca huaquin, —Nonfin ahuamamishti huatiroquin. Jesús icoinra huafoan futsa futsa huaquin shinantiroforan, —ishon shinainfo. Ascatari yoirafo isca huaquin, —Non shinantiro cuscacai afoanri shinantirofoma, —ishon yoirafo. Anori shinantifacashon chipo tapitiromafoma Dioshuunshon non ahuamamishti huatiro cuscan. Tapicanashu rafiapaitirofo.

²⁸ Ascaciafocun shinancaquin isca huafo, —Afocai sharamafinquin non ato oinpaimaran, —ishon matohuunoa yoifiafocun Diosin mato catonni. Mancai ahuashtamaran mato huafiafocun Diosin mato catoan man ato oinmanon afocairoconfin ahuamaquin.

²⁹ Ascano tsoanshtacai Diosin ointaifi, —Un tsoa cuscaraman, —ishon yoiroma.

³⁰ Dioshuunoashu Jesucristo ahuun yorafo man inon. Cristohuunshon noco cayacafi tapimafain ahuun ointi cuscara noco imashquin noco nashoni nocon chaca soashoshquin non afu nipanon.

³¹ Ascashon non Jesús icoinra huashucaí non cacapaimisi itiro. Diosin tsain cunuquin isca huani, —Tsoancai yoitiroma isca huaquin, “Un ahuamamishti un tapiaran,” ishoncai yoitiroma. Anori itamarocon, “¡Aicho! Nocon Ifo Jesús ua numa. Ascacun natian ahuunshon un tapisharatiroran,” —ishon yoitiro.

2

Cristo ihui coyan iquinanqui mastanifo cuscan yoinifo

¹ Uhuun yoramishtichin un matoqui noco funashon Cristohuunshon Upan Diosin mato ashoni cuscan unfin shinansharafaincai un mato yoiama. Diosin ahuun shinan fustihuunshofin un mato yoiacin. Diosin ua shinanmanaino un mato yoiá.

² Un matoqui nocoataima un shinanquin isca huani, —Uncai ahua futsa ato yoishquima. Jesucristo noco ihui coyan iquinanhuunoashu noco nashoni cuscan. Nanhuunoa fusti un ato yoishquiran, —ishon un shinanni.

³ Ascano matoqui oshon uncai shinanqui isca huama, —Unfincoín un ato cayacafi yoitiro, —ishoncai un shinanma. Diospan Yoshin Sharahuunshon un mato yoiamaquicai un mato cayacafi yoisharacuanama. Un ahuun Yoshin Shara fasi yopacoíain cuscan un mato cayacafi yoinon. Ascano un ratuyamua ua Diosin yonoa cuscan un ayamaishafain marifi man funocuana. Uhuun nomuran un shinanchacatana un ayamai shafain.

⁴ Ascashon un mato Jesucristohuunoa yomisi cuscan uhuun mapon shinanfaini un mato yoitamarocon Diospan Yoshin Sharapan ua shinanmapaiyai cuscan un mato yoiá. Un mato yoiaino ahuun curushhuunshon man icoinra huani maton ointi fiananahuashquin ahuun ointi cuscara iishquin.

⁵ Ascán nocofunun shinanpancai man icoinra huama. Diosin shinanhuunshon man icoinra huaa.

Diosin Yoshin Sharahuunshon non shinansharatiro

⁶ Ascán Diospan tsain nicasharaifoan man tapiafo non Diospan Yoshin Sharahuunshon cayacaficoín yoiáiton. Ascán futsafoanri cunu tapisharafiashon Diosin shinain cuscacái tsoa anori shinainma. Aton shinanpancai non mato yoiama. Aton niaifofaan shinainfo cuscaricái non mato yoiama. Ascashufi afo funocaniquin. Nan shinainfo cuscan man cuyoi futsui. Ipaitsi shinancani.

⁷ Non mato Diosihuunshon yomisi cuscan huafaincai tsoan tapiyopaonima. Cristo yorafotihuunoashu nashoshquíai cuscan Diosincái ato tapimayopaonima. Diosin mai onihuataima shinanquin isca huani, —Uhuun Furumun ato chipo nashoshquin nan a icoinra huafoti ato nimapacushquin, —ishon shinanyoni.

⁸ Un na tsain mato yoiái cuscacái niaifofaan tapiyopaonima. Ascashon Jesús rutunifo. Tapicashocai tsoan nocon Ifo Jesús Diospan furun sharacoin masta cuanifoma.

⁹ Ascán Diospan tsain cunuquin isca huani,

“Tsoan Dios noicoiánton ahuamamishti shara ato ashoin, tsoan oinyomisima cuscara sharafo ato ashofain tsoan nicayomisima cuscarari ashofain. Tsoanshta aton nomuran shinanyomisifoma sharashtacoin ato itishara huashoan,”

ishon Diosin tsain cununi.

¹⁰ Ascashon non Dios noiaiton ahuun Yoshin Sharapan noco tapimai. Ahuun Yoshin Sharapan nantifi tapicoian. Upa Diosin shinain cuscan ahuun Yoshin Sharapan tapicoian.

¹¹ Yorafoan aton nomuran shinainfo cuscacái tsoa futsan tapitiroma. Arusu fusti tapitiro. Nanscarifíai Upa Diosin shinain cuscan ahuun Yoshin Shara fustiton tapicoian.

¹² Nan Upa Diosin ahuun Yoshin Shara nocoqui nichini noco tapimapaiyai cuscan noco tapimanon. Nan icoinra huamafoan Diosin tsain shinancanima. Ascashori afoan shinain cuscacái Diosin noco tapimanima.

¹³ Ascashon yorafoan noco tapima cuscan non mato yositamarocon Diosin ahuun Yoshin Sharapan nocon nomuran noco tapimana cuscan huafain non mato tapimai. Ahuun tsain iconcoín fusti. Ascán norifi ahuunshon non mato iconcoín tapimai.

¹⁴ Ascano ratoranfon Diospan Yoshin Shara atofu iyamaino nanfoanfin Diosin Yoshin Sharapan yoiá cuscan nicacasmacani. Ascashu iscatirofo,

“Tsoantsi nan tsain icoinra huaiquin. Nan tsain fasi amaquiriran,”

ishon shinancani. Diosin Yoshin Sharapan shinain cuscacái tsoan tapiama. Nanscacun atofu iyamainocai yoiá cuscan tapiafoma. Diosin Yoshin Shara fustiton ato tapimatiro.

¹⁵ Ascaino ratoran futsa Diosin Yoshin Shara afu icaino Diosin ato tapimapaiyai cuscan tapitirofo. Ratocaimain chaca iyamarai sharaquin Diosin Yoshin Sharapan ato tapimai. Ascashiashu Diosin Yoshin Shara fu rafuamatocai a Jesús icoinra huaafo onantiroma.

¹⁶ Diosin tsain cunuquin isca huani, —Tsoancai nocon Ifoan ahuun nomuran shinain cuscan huafain tapitirofo. Tsoanricai Dios tapimatiroma, —ishon cununi. Ascafia nan non icoinra huafu Criston shinain cuscan huafainri noco tapimana.

3

Nonfin Diospan oinmatifoquin

¹⁻³ Facu rama caiantocai tsain tapiama. Yosishon tsain nicatiro. Nanscarifi aquin Jesús rama icoinra huafofin facu rama caian cuscarafuquin. Diosin aton Upafiucuai tsoan ahuun tsain atirifi tapisharataima. Manfin nanscarafuquin. Rama Jesús ifo huayamafishu man nanscasi aamisiquin. Diosin tsain man man nicafiaicai a yoia cuscan man aama. ¡huashta! Uhuun yoramishtichin manfin Diospan tsain nicamisima cuscarafuquin. Rama Jesús icoinra huafu cuscara. Nan Diospan Yoshin Shara ato iquinafoanfin ahuun tsain nicasharatirofo. Mancai ascarafoma. Ascan un mato Diosin tsain yoipaiyai cuscaai atirifi un mato yoitiroma. Facushtan shoma fusti aiyotiro namicai piyotiroma. Nanscarifiai atirifi Diosin tsain man nicafiaquicai ahuun tsain man tapiyotiroma. Nanscacun un ichapamashta mato yoiyotiroma. Ahuun tsain futsafori un mato yosipaifia mancai tapisharataima. Ascano mancai itisharama paratama nicashquin. Manfin Diospan Yoshin Shara fu rafuama cuscarafuquin. Ascashu futsafo ahuaraya cuscan man ato fuchipaifain fochishmanantanaini man ica. Nanscarafuocai Diosin tsain nicacanima. Marifi man nanscarafu. Ascashufin Diospan yorama ointsa man aquin.

⁴ Atirifi isca huafu, —Nonfin Pablo tanaquin. Ascan noncai Apolos non tanama, —ishon anori yoiaifoanno. Atirifiton yoicaquin, —Nonfin Apolos tanaquin. Ascan noncai Pablo tanama, —ishon anori yoiafo. Anori yoiquin man ato oinmanaquin nan Diospan Yoshin Shara matoya rafuama cuscarafu.

⁵ Ahuuscainun atirifiton man isca huaquin, —Non Pablo yafi Apolos tanairan, —man ica. Apolos fucai un ahuama. Nonfin nocon Ifo Diosin ahuun oinmatiquin. Nocoahuunshonfin man Jesús icoinra huaniquin. Diosin noco catonni noco yonomapaiyai cuscan noco yonoshquin Furunhuunoa man tapinon.

⁶ Un mato isca huaquin yosipai. Futsan tauhuaquin shuqui fanatiro. Futsari amaqui orotiro foaisharanon. Ascashiashocai nan rafutan shuqui foaimatiroma. Diosin fustitofin shuqui foaimatiroquin. Nanscarifi aquin un mato tauhuaquin Jesucristo icoinra huamani. Chipo Apolos Cristohuunoa mato yosini ahuun tsain man tanasharacoinon. Non asca huafaino Diosin fustitofin maton nomuran mato shinansharamatiro ahuun tsain man tanasharacoinfafainon.

⁷ Ascashon un mato yoia cuscaai un Apolos fu ahuama. Diosin fustitofin yorafo aton nomuran shinanmasharatiro ahuun tsain tanasharacoinonfo.

⁸ Tsoaran futsan tau huaquin ato Jesús icoinra huamafin nan chipo ato yosiaitori ato tsain nannorifosi ato tanamasharanon. Nan rafutan nannori shinancani. Ato Jesushuunoa yoishcaquin a tanasharanonfo. Ascacufin Diosin a yonoshonaifo cuscan futsa paratama inanfain futsa ichapama shara inanshquin. Ahuuscainun yoia afoquin.

⁹ Manfin Diosin ahuun mau cuscarafuquin. Ahuun pushu cuscararifi. Mau ifo fustifiano futsafoanrifi yonoshotirofoquin. Aafin maton ifoquin. Nonfofin ahuun yonomatifoquin a futan non mato yonoshotirofo. Nanscarifiai pushu ifo fustifiano futsafoanri yonoshotirofo. Nanscarifiai manfin Diosin ahuun mau cuscaracoinquin. Ahuun pushu cuscararifi. Diosin fustifin maton Ifoquin. Nonfofin ahuun yonoshomisifoquin. Noco yonoa cuscarini non maton nomuran non mato shinansharamatiro ahuun tsain man tanasharanon.

¹⁰ Pushu yonomisiton iquisi quishi mutsisipa shara fitiro. Chipo futsafoan pushu anaititiro. Nanscarifiai Diosin ua catonpai ua cashman catonni. Ascashon ua tapimashara cuscan un tau huaquin cayacaficoin un mato Jesushuunoa tapimamisi. Un mato tapimayoni cuscan futsanfoan natian nannoricoiri paratama mato yosicani. Ascaiton futsafo un yoishquin isca huaquin, —¡Oinfa! Ato cayacaficoin yosisharacahuun, —ishon un ato yoishquin.

¹¹ Un mato yoiquin tau huani cuscaai tsoa futsan mato yositiroma isca huaquin, —Un mato tsain futsa tapimai man Dios fu ipanon, —ishocai mato icon yoitiroma. Jesucristo fustitofin noco imasharatiroquin non Dios fu ipanon.

¹²⁻¹⁵ Nocofofunun ahuun pushu samamashta coatanfin amurannoashu ichocaintiroquin naashquima. Ascan ahuun pushu coaino amurannoafu ahuun cuno shara cotiroma. Ascan ahuara cunomafo coi anaitimui futsutiro. Pushu huaquin iquisi quishi curushu

shara nichishon ahuun oro amuran nutafain atirifi cuno futsa oshopa sharashta non chicoin cuno mapash faca facaitsa nanfo fasi chicoin ahuun pushuhuun nutatiro. Ascafia coainocai afo cotiroma. Nanfo cotamarocon nuifutsutiro. Ascashon pushu huaquin cano mapofain shupa shuhuafain pishin nutacuano pushu coaino afo cotiro. Afo munoi futsutiro.

Nanscarifiai nantifi Jesús icoindra huafo futsafo yonosharaifoanno atirifi yonosharamisima. Jesús icoindra huafoti nantifi noco ichanan huaitian noco ismaicai non ashomisi cuscan ipayamarain cuyoriscatiromainquin. A yonoshosharafocai aton yono funopacunacama. Ascan a yonoshosharafoma aton yono cuyoi anaitimui futsutiro. Tsoan yonoshoshara ato inansharacointiro. Asca nan yonoshosharama ato inainma. Afu ipatirofiafanashu man maitsisi yonoi futsucani. Man funocani.

¹⁶ ¿Asca man tapiamamun man Diosin pushu cuscaracoin? Ahuun Yoshin Shara matofu ica.

¹⁷ Diosin icanocai ahua chaca itiroma. Mato fu ipashquin Diosin mato catonni ahuun yorafa man inon. Nan icoindra huafoti ato imasharai. Ascan futsan ato amaquiri yoiaiton Diosin copiqui ato onaintimashqui.

¹⁸ Mafiri paramuyamacahuun. Icoindra huamafoan ahuaa tapiafo cuscaraca marifi man tapishara. Anori shinanyamacahuun. Icoindra huamafoan shinanqui isca huafo, —Nan Jesús icoindra huafoan fasi amaquiri shinanfo. Fasi nison cuscaracoinforan, —ishon nocohuunooa yoisimisifo. Matohuunooa anori shinanfiaofoanno Diosin mato cayacafi shinansharamapaiyai cuscan man shinantiro.

¹⁹ Nan Jesús icoindra huamafoan shinanquin isca huafo, —Non cayacafi shinanshararan, —ifiafoan Diosin yoiya, —Afoancai cayacafi shinansharacanima. Ipaitsi shinanforan, —ishon Diosin atohuunooa yoini. Ascashon futsafo shinanmapaicani isca huaquin, —Afoanfin tapisharaqin, —ishon ato shinanmapai. Ascafia afoancai Dios paratiroma. Ascan aton chanihuunshon ato onaintimai funononfo.

²⁰ Diosin tsain cunuqui isca huani, —Nonfin fasi tapisharaqin, —ifiainfoan nocon Ifo Diosin ato onancoinshon yoiquin isca huatiro, —Nafancai ahua cayacafi shinantirofoma. Ipaitsi shinancaniran, —ishon ato yoitiro.

²¹ Ascacun afanan yoiquin isca huayamacahuun, —Na nocofunun nocon tapimamisi ahuun tsain fusti cayacaficoinran, —ishon afanan yoiyamacahuun. Diosin ato shinanmayamainocai tsoan cayacafi shinancuanama. Diosihuunshonfin non mato cayacafi yositiroquin. Ascan Diosin mato inan nantifi man yopai cuscan huafain.

²² Un non Apolos non Pedro nonfin Jesushuunoashu ahuun oinmatifoquin ahuun tsain non mato yosishquin man nicoinsharanon. Naashu man afu ipanon. Nantifi ahuunafin matonariquin. Ahuaa icai cuscan afohuunshon Diosin mato shara huashoi. Nan chipo icai fori mato shara huashoi. Nantifi Diosin onihuani cuscan mato shara huashoshquin.

²³ Manfin Cristonafokin. Cristofin Upa Diosinaquin.

4

Cristo fu rafumisifoan a yonoshomisifo

¹ Ascashon man nocohuunooa shinanquin isca huatiro, —Nafofin Cristo oinmatifoquin, —ishon nocohuunooa shinancahuun. Tsain Cristohuunooa tsoan nicayomisima cuscara Upa Diosin nocon nomuran noco tapimana cuscan non matori tapimanon.

² Ascan non Cristo oinmatifocun Diosin noco yononi isca huaquin, —Un mato yoiyai cuscan huafain ato yoiacahuun. Yoiyamacaquima, —ishon noco yononi.

³ Diosin fustitofin tapicoianquin nan ua yonooa cuscamain un aaquin. Man uhuunooa shinain cuscaai un shinainma. Futsafoanri uhuunooa shinain cuscaai un shinainma. Unricai tapiama.

⁴ Uhuun nomuran un shinain isca huaquin —Ua Diosin yononi cuscan un airan, —ishon un anori shinain cuscan nocon Ifo fustiton ua onancoian. Ascashon yoitiro, —Nan un yonoai cuscaoin airan, —ishon ua yoitiro.

⁵ Jesús icoindra huafoti Upan Diosin noco ichanan huataima. Ascan isca huaquin yoiyamacahuun —Nacai Diosin yonooa cuscan aimaran, —ishon anori shinanyamacahuun. Oinyocaquin. Nocon Ifoan noco ichanan huaitian nantifi noco puashoshquin nantifiton ointaifi ratofoanmain icoindra huaa iyamarai icoinmaran huaquin. Ascatai nan non ichanaintian nantifiton ointaifi nocon nomuran non shinanmisi cuscan huafain nocon Ifon Jesucristo noco puashoshquin. Afanancai nantiantan non ahuashta fomantiro ishquima. Diosinmain nantifi onancoincufin. Nan non ahuaa futsa shara huashopaifain onushta ahuaa non chaca huafiamisi nanfori Diosin noco puashoshquin. Nantianri non

shara huacun Diosin yoiquin isca huashquin, —¡Aicho! Un mia yonoa cuscan min amisi. Min shara huamisirán, —ishon noco yoishquin.

⁶ Uhuun yoramishtichin uhuunoa yafi Apoloshuunoa un mato tapimana ahuara futsa man tapinon. Un mato yosipai man iscanonma, —Pablonun noco tapimana cuscan Apoloscai tapiamaran iyamarai Apolos noco tapimana cuscaai Pablonun tapiamaran, —ishon yoyimacahuun. Diosin tsain noco cunushoni non anori yoinonma. Nan tsain nicaquicai non shinanquin isca huatiroma, —Na nocon yosimisi fasi sharacoin. Futsafocai a cuscaramaran, —ishon non shinantiroma.

⁷ Diosinfin nantifi noco onihuaniquin. Ascanofin Diosihuunshon non ahuara huatiroquin. Ascasho —Un acai cuscaai tsoan huatiromaran, —iyamacahuun. Ascashu curafiapaimisi iyamacahuun.

⁸ Manfin shinanquin isca huaquin, —Non Diosin tsain tapicoian. Non futsafo fasi finoncoian. Ascan noncai tsoa futsa yopaima noco tapimanon. Nonfin niaifo cuscarafuquin, —ishon man shinan. Iconpainon. Man niaifocoin icaino nantian norifi non matofu niaifo icuana. Asca tsoatsi niaifocoin. Nonmaquian.

⁹ Cunu uhuapa cunu acua muran iquimanifo ato rutunonfo. Yora ichapafaoan ointaifi rutumatiro oinnonfo. Nanscarifiai norifi non Jesús fu rafumisifo non ato cuscarafuquin. Diosin noco yonoa non Jesushuunoa omitsiscafiaino nantifi yorafo non ahuun oinmati afu nai muran icafoanricai oincani.

¹⁰ Nonfin Cristo fu rafumisi. Ascacun noco isca huamisi, —Nanfoanfin fasi amaquiri shinanmisifoquin. Mutsisipamaforan, —ishon nocohuunoa icoinra huamafoan yoimisi-foquin. Asca matohuunocai yoiquin asca huamisifoma. Matohuunofin man shinanquin isca huaquin, —Non fasi tapicoian. Nofifin non isharamisiquin. Tsoan noco finontromaran, —ishon maton nomuran man shinanmisiquin. Man non tapia non Jesús maisishocai non ahu huatiroma. Ascafia man shinanquin isca huamisi, —Uffin un ahuara huatiroquin, —ishon man shinanmisiquin.

¹¹ Ascan nonfin foniyanan nomicain sahuuti chocacoin sahuufain noco coshafain pushuomacainri Diosin tsain fusti yoi non cahuancacaimisi. Natianri non omitsiscaí.

¹² Ascashu non curushcai yonotiro non yopai cuscan ahuun rafanan fiishquin. Ascari- fiatán yorafoan noco tsain chaca huafiaiton copitamarocon non isca huamisi, —Jesús mia shara huapainonran, —ishon non yoimisi. Noco omitsisca huafiaifoan non tunucointiro.

¹³ Ascashori noco roaifoan rahuinmafain non tsain shara ato yoitiro. Ascacun natianri noco chaca huafuquin. —Manfin nan tanama cuscarafuquin, —ishon nocohuunoa yoimisi-foquin.

¹⁴ Ascacucái un matoqui cunuai cuscan un mato rafimapaima. Ascan manfin uhuun facucoin cuscarafuquin. Un matohuun fasi noi. Ascacun un mato yoi afanan man amaquiri shinanonma.

¹⁵ Yorafoan mato Cristohuunoa tapimatirofia ascan unfin tauhuaquin mato Cristohuunoa tapimaniquin. Ascanofin man Cristo icoinra huaquin. Uhuunoa shuri man Diospan facufuquin. Ascatan un maton upa cuscaracoin. Futsafoan Cristohuunoa mato tapimatirofia afocai maton upa cuscara itiro. Urus fustifin un maton upa cuscaracoinquin.

¹⁶ Ascacun un mato yoi ua cuscara icahuun. Un Dios tanashara cuscan nanscarifi acahuun.

¹⁷ Ascacun un Timoteo matoqui nichicai. Un Timoteo Cristo icoinra huamaquin tau huani. Ascafín nan uhuun facu cuscarafuquin. Un fasi ahuun noi. Nocon Ifo Jesús yonoa cuscaoiain. Un Jesucristo tanai cuscan Timoteon arifi mato tapimashquin man ointiaquimanonma. Nan icoinra huafo pushufoti anofo un ato tapimai cuscan nannori Timoteo matori tapimai.

¹⁸ Mun tapia man atirifiton shinanquin isca huaa, —Pablonun Timoteo nocoqui nichí. Ascan afinmain nocoqui musuifin. Ascashufin afincoín nocoqui oamaran, —ishon man shinan. Manfofin curafiapaimisifoquin.

¹⁹ Anori man shinanfiaino uficoín samamashta un mato ari caicain. Diosin ua yonoaino un samamashta mato ari cai. Nan un nocoaitian un tapicashquin nan curafiapaimisifoan Jesús ahuun curushhuunshon yoyimamarin afincoínmain yoicanicai. Ipaitsi yoicanimainquin.

²⁰ Diosin nocon Ifo icaino non tsain fustimansi ipaitsi yoitamarocon ahuun curushpan non ishariatiro.

²¹ Ascashu un nocoaitian ahuun curushpan un matoqui nocoshquin. Ascashofin man ica cuscan huafain un tapitiroquin. Man chaca shatuyamacun Diosihuunshon un mato onaintimatiro. Asca maton chaca man shatucun un matohuun fasi noiquin un oi tsii huasharafain mato yoishquin. Ascan mafi catontiroquin ratocaimain un aquicai. Maton tsainhuunshon onaintimai iyamarai oi tsii huasharafain mato yoishquin.

5

Jesús icoinra huafiacashon chaca huafo

¹ Mun nicamisi mafi ranan man fasi chaca huaa tanancun. Apa ahuin ahua futsafia afu icacaini. Nanscara chacafocai nan icoinra huamafoan tsoa ascamisima.

² ¡Ai timafin! Nan tapifiashu man curafiapaimisi. Nan nocofunun mato muranshon chaca huai ahuun rafipaitama, —Non sharacoinran, —man ica. ¿Ahuun rafitama man man tapifiashon nan nocofunun chaca huamisi ahuuscai matofu ichanainton man potamamun?

³⁻⁵ Un matofu iyamafiashton un mato fasi shinain. Un anoyamafiano nan nocofunu ahuusca huaimancai mun tapicoian. Un mato anoshon yoiquin isca huacuana, —Afanan ichanainfoanno Jesucristo ahuun shinanhuunshon na nocofunun apa ahuin ahua futsa fu imisi matomaquinoa potacahuun. Ascacucái afanan Diosin cushuima. Satanás a amapaiyai cuscan aashquin. Man asca huaiton Satanás nan nocofunu omitsiscamatiro. Ascashon omitsiscamaiton mui ahuun chaca shatupaitiro Jesusqui nasoshquin afanan omitsiscashquima. Ahuun chaca man shatuano ahuun yoshin Jesús fu ipatiroan, —ishon un matofu ishon un mato yoicuana.

⁶ Timafin man iscamisi, —Non shararan, —man ifiamisi mancai na nocofunun chaca huamisi mato murannoa man potataima. ¿Man tapiamamun fustiton maton muranshon chaca huaiton man shatumayamaino nanhuunoashu nantifi man chacai futsutiro?

⁷ Ascaiton mato anoshon nan nocofunun chaca huai potacahuun. Ascانofin afanan Jesusqui nasotiroquin tanasharacoinshquin. Cristo Úpan Diosin ahuun chashoan cahuashara cuscara noco nashoni non afanan chaca huanonma a cuscara shara non inon.

⁸ Ascashon non chaca huapaoni cuscacai afanan non shinantama Cristo ahuun ointi cuscara shara non iishquin. Ahuun tsain shara non shinanon. Futsaqui afanan shinan-chacayamafain tsoa afanan parayamafain tsain iconcain fusti non yoinon.

⁹ Ascacun un matofu cunui tsoa ahuun ahuinma fu icain ainfofo nanscarifiaifono aton funuma fu icaino afanan ascarafu rafuyamacahuun.

¹⁰ Jesús icoinra huamafohuunoacai un cunuima. Nanofin Satanás aton ifoquin. Ascashocai aton chaca shatuafoa. Chaca futsa futsatapafa huamisifoquin. Ascashon aton ahuinma fu imisifo. Ainfofo nanscarifiaifoanno aton funuma furi imisifo mafo ichapa fusti fipafain. Atonama fipaicoimisifo yomutsofo non nan diosicoimafofin, —Nocon diosiran, —icafoquin. Noncái atofu pashcanantiroa. Nan icoinra huamafo fu pashcananpai nan maitio non cuyofotiro. Icoinra huamafoan acai cuscacai non ato futan atiroma. Ascafiacon non atofu imisiquin.

¹¹ No futan icoinra huafohuunooa un mato cunushoni. Tsoan yoiquin isca huai, —Urifi matofu Jesucristo ahuun yoraran, —ishon anori yoifiatan ahuun ahuinma fu icaino ainfofori nanscarifiaifoanno aton funuma fu icaifoanno mafo ichapa fusti fuchipaifain atonama fipaimisifo icain diosicoimma tanapaifain yora futsa chaca huamisi icain paunmisi icain yomutso icain. Ascarafu fu rafuyamacahuun. —Un Jesús icoinra huairan, —ifacatan ahuara chaca huariaifo fu rafuyamacahuun.

¹²⁻¹³ Nan icoinra huamafo non ato yonotiroa aton chaca shatunonfo. Ascarafocai Diospan yorama. Diosifin ato onaintimashquiquin. Ascafiaino Diosin noco yonoo nan icoinra huafu futsan chaca huacun non ato yoitiro aton chaca shatunonfo. Ascashon nan nocofunun mato muranshon chaca huamiscun yoicahuun afanan matofu ichananonma ahuun chaca shatucoiaintian matofu afanan ichanantiro.

6

Jesús icoinra huaa futsan mato chaca huaiton nahua niaifo ano iyoyamacahuun

¹ Ahuuscaimun mafi ranan fochishmanantanafiashton man shara huapaimacain. Mafi ranan shara huatanantama nan icoinra huamafoan aton niaifo ano man iyopai, —Noco shara huashononran, —ishon. ¡Ai timafin! Ascaracai sharama.

² ¿Ascان man tapiamamun nonfin Diospan yorafuquin? ¿Ascashon a futan non nantifi yora manifoti chipo yoishquin ratofonmain chaca huamisifoquin ascashon ato onaintimanon? ¿Ascان ahuuscain ichapama man fochishmanantanafiashton mafi ranan man shara huatanantiroamun? Man nanscasi amisi.

³ Man tapiamamun non Dios futan yoishquin ahuun oinmati afu nai muran icafofomain chaca huafu iyamarai shara huafuquin. Non asca huainofin nuno mai anoafu fasi mimacai yoiquin finatiro ratofomain chacafo yafi sharafoquin. Nanscacufin non fochishmanantananshon nofin ranan non arotiroquin.

⁴ Ascacufin man fochishmanantanain cuscan mafiranan arosharacahuun. Ascacun ratoran futsafo catoncahuun a mato futan icoinra huama aquima. Nan mato futan

icoindra huaa acahuun mato arosharashonon. Nan ahua yamafiadun man catontiro mato arosharashonon.

⁵ ¡Jhuashta! Un mato rafimapai man afanan ascanonma. ¿Manmun ratoran futsacai shinansharatiromamun a fochishmanantanainfo cuscan arosharashononfo?

⁶ Ascaquimarocon mafi ranan man fochishmanantananshon man shara huatananyamacun. Ascashu ranushumuafoan aton niaifoqui man chani. Nan ahua ointa man aa. Nan icoindra huamafoan aton ointaifi man Jesús ahuun yora futsa man chaca huaa. ¡Ai timafin! Nan fasi chacacoin.

⁷ Mafin ranan man yoiti huatananshu ranushumua niaifoqui man chaniano. Man ascaifin ato ointaifi man ato oinmana mafi ranan noinantama. Ascashofin man Jesús tanasharamaquin. Man funocoiado. Nan Jesús icoindra huaa futsan mia chaca huacun ranushumua niaifoqui chaniyamacai man puusicama shara icuana. Jesús icoindra huaa futsan ahua mato onunshon nasocasmaiton man ranushumua niaifoquin chaniyamacain man puusicama shara icuana. Futsan mia chaca huafiadun icoindra huamafoan ointaifi min ahua chaca oinmanama.

⁸ Man ascaquifin mafi ranan onunonanguin man chaca huaa. Ascan matofu Diospan yorafiadun man chaca huatanan.

⁹ Man tapiamamun a yora chaca huamisifo Diosin niaifo ari itirofoma. Mafiri paramuyamacahuun. Nan maton ahuinma fu man icaino ainfofori aton funuma fu icaifoanno diosiyamafiadun fuchipaifain nan nocofununri afu nocofunu futsa fu icaino nanscarifiai afu ainfo fu futsa fuchinanpaiquin chaca huatananashu ainfososi afo ranan iquinainfo icain

¹⁰ yomutsofo icain aton nama fipaifain paunmisi icain roanmitsamisi icain yoiti huamitsamisi icain ahuun ahua futsan fiatianshon futsa sutufain. Ascarafocai Dios icano noconacafoma.

¹¹ Atirifi man ascafiapaonishacaquin natian Jesucristo yafi Upa Diosin ahuun Yoshin Sharahuunshon maton chaca soashona. Maton chaca soashonano a cuscara shara mato ima. Ascasho ahuun ointi cuscara shara mato ima. Chaca huamisifoma cuscara man inon.

Mafiri chaca huamuyamacahuun

¹² Ascan man yoiaraca isca huaquin, –Cristo uhuun Ifono un apaiyai cuscan un huatiroquin, –ishon man yoiái. Ai. Nannori. Ahua sharafofi non huatirofiadun ahua futsacai ua amatiro ma nan un acai fusti un atiro. Uncai ahua futsahuunoashu aton oinmati un ishquima.

¹³ Man futsan raca yoiquin isca huaa, –Diosin nocon shaqui onihuashoan non tushu pinon. Ascashon tushuri onihua nocon shaqui muran non huanon, –ishon yoimisifo. Iconfiashu non piyanhuanshuni itiro ma. Chipo Diosin tushu yafi nocon shaquiri cuyoi. Icon Diosin noco onihuanon non afu rafupacunon. Diosicai nocon ahuinma fu non inon ishoncai noco onihuanima. Ainfofori aton funuma fu inon ishoncai ato onihuanima. Ascata ma Diosin nocon caya noco onihuashoni non afu rafupacunon.

¹⁴ Nocon Ifo Jesús man nafiadun Upan Diosin ahuun curushhuunshon funimani. Nanscarifi aquin ahuun curushhuunshon nocori funimashquin.

¹⁵ ¿Man tapiamamun non Cristo icoindra huashu non ahuun yoracoin? Non Jesús ahuun yora mumacoin cuscara. Ascano non ainfo furoma chotashu Cristocai afin aca shinantsan non huamatiro. Asca huapayamacahuun.

¹⁶ Diospan tsain cunuquin isca huani, –Nocofunu ainfo fu icaino nan rafu yora fusti cuscaracoin, –ishon cununi. ¿Man tapiamamun man ainfo furoma fu icaino afu yora fusti cuscara itiro? Fusti cuscaracoin.

¹⁷ Ascafiatan tsoan nocon Ifo fu rafuaino nan rafu fusti cuscara itiro. Diosin Yoshin Shara ahuun shinanpan ahuun nomuran nanumashquin.

¹⁸ Ascacufin maton ahuinma iymaraiyainfofori maton funuma fu ipaiyamacahuun. Ascara shinanyamacahuun. Man ascapaiyamai ichoriscatacahuun asca huashquima. Maton ahuinma fu iymarai maton funuma fu man icun nan chacapanfin. Maton nomuran fucashuni huafain matori omitsicamatiro. Nan chaca futsafocai un yoiái cuscarama. Man ascashufin maton yora mumacoin caya yafi maton nomuran maficoín man chaca huamuaquin.

¹⁹ ¿Man tapiamamun Diospan Yoshin Shara no fu ica? Nocon cayafi ahuun pushu cuscaracoinquin. Nanno ica. Upa Diosin ahuun Yoshin Shara matoqui nichini. Nan pushu ifofin fusticoín. Nanscarifiai Diospan Yoshin Shara fusti maton Ifo. Mafincoíncai man ifohuamutiroma. Manfin ahuunafuquin.

²⁰ Jesucristo mato nashoni maton Ifo iishquin. Ascan manfin ahuunafuquin. Ascano Diosifin nocon Ifoquin. Ascashu nocon caya ahuunari. Nan mato yoiái cuscan acahuun.

Maton cayahuunshon Diosin shara huamacahuun. Man ascaiton futsafoan oincaquifin, –Diosin shararan, –huatirofoquin.

7

Ahuuscashumain funu fu ahuin isharatirofoquin

¹⁻² Man ua cunu fumaita ua yocashquin. Ascason man ua yoca cuscan nanfohuunoa un mato yoisharapai man tapinon. Nocofunun ainfo fiyamashu shara ifiatiro chaicushosi ainfo fu ipaiquin chaca huatiro. Ascashufin nan nocofunuti ahuinyatiroquin. Ainfofori funuyatirofo. Nanscafin sharaquin.

³⁻⁴ Nocofunun ainfo fiainocai afanan ahuun caya ahuuna fustima. Ahuun caya ahuin-nari itiro. Nanscarifiayainfon fununfiainocai afanan ahuun caya ahuuna fustima. Ahuun caya fununari itiro. Ascataricai ahuinin funu afu ipaiyaitocai funu ranintiro. Nanscarifiyai funu afu ipaiyaitocai ahuinin ranintiro.

⁵ Raninonanyamacahuun. Ascashon man chipo shinanquin isca huatiro, –Natian non Upa Dios cufiyonon. Shafa ranan non iyoimacai. Chipo afanan non inon, –icashu man unuyotiro. Ascafiashon chai manariyamacahuun. Man ascariaino Satanás mato chaca huamatiroquin. Funu ainfo futsa fu ipaitiro. Nanscarifiyai ahuin nocofunu futsa fu ipaiquin chaca huatiroquin.

⁶ Un mato, –Fianancahuun, –ishon un mato yoiama. Ascan man fiananpaifin man fianantiroquin.

⁷ Ascatan un shinanquin isca huaa. Nantifi nocofunufu ua cuscara ahuionmafo shara icuana. Diosihuunoashu un ahuionma isharatiro. Un shinanchacaima. Un unimatiro. Ascafia Diosin ua ima cuscacai atifi ato imama. Futsafoan Diosihuunshon ahuin fitiro. Futsafori ahuionmafiashu nan un icai cuscari unimatirofo. Non yopai cuscafin Diosin tapiaquin. Ascashon noco inantiro.

⁸ Ascatan natian un funuomafo non ahuionmafo yafi ainfofoan aton funufo atonmaqui namisifohuunoa un mato ahuara futsa yoipai man tapinon. Ua cuscara icafo shara icuana. Nocofunun afanan ainfo fiyamainocaiyainfoanri afanan funu fiyamashu shara icuana.

⁹ Ascafia man fasi fiananpaimancaiyainfoanri nocofunu fipai fianansharacahuun. Man ahuionmafiashu fasi ainfo fu man ipai ascaracai sharama. Man ahuinya shara icuana. Nanscarifiyai man funuomafiashu fasi nocofunu fu ipai ascaracai sharama. Ascacufin man funuya shara icuanaquin.

¹⁰⁻¹¹ Ascan natian un funuyafohuunoa yafi ahuinyafori un mato yoisharapai. Ufi un mato yonoima. Nocon Ifohuunshon un mato yonoi isca huaquin, –Ainfoancai funu unutiroma. Fununricai ahuin unutiroma. Ascashon funun unuano afanan futsa fu fianantiro. Afanan funucoin aqui nasoano shara itiroran, –ishon un mato yoi.

¹² Ascason natian un mato yoisharapai. Nan na tsain un mato yoiiafocai Diosin ua yonoyamafiacun unfi cayacaficoin shinanfain un mato yoi. Asca man Jesús icoinra huaa futsacai maton ahuinin Jesús Ifo huataiyamafiashocai funu potapaima. Ascatan rahuinmafain funu noi. Nanscarifiyai fununricai ahuin potatiroma.

¹³ Nanscarifiyaiyainfoan Jesús Ifo huafishocai funun Ifo huayamafiacun ahuin potapayamainocaiyainfoanri funu potatiroma.

¹⁴ Nocofunun icoinra huayamafiano ahuinin icoinra huashon ahuinhuunshon Diosin nan nocofunu shara huamatiro. Ascashon funun ahuin oinguiraca ahuunshon Jesús icoinra huatiro. Nanscarifiyaiyainfoan icoinra huayamafiano funun icoinra huashon funuunshori Diosin nan ainfo shara huamatiro. Ahuinin funu oinguiraca ahuunshon Jesús icoinra huamatiro. Ascan nan rafu ununainno aton facufoancai Jesús Ifo huaima. Ascafia nan rafu ununanyamaino aton facufoanri icoinra huatiro Diospan facu sharafo iishcaquin.

¹⁵ Ascashon nocofunun Jesús icoinra huayamacun ahuinin icoinra huashon unupaicoquin unutiroma. Capaicoinyaiton ato nitu huayamacahuun. Catanon. Man nitu huaino fucashni tapitiroquin. Nanscarifiyaiyainfoan Jesús icoinra huayamacun funun icoinra huashon unupaicoquin unutiroma. Capaicoianton nitu huayamacahuun. Catanon. Man nitu huaino fucashni tapitiro. Diosin noco catonni nocon nomuran ahuashtaton fucash huatamarocon nocon ointi noco imasharacointiro.

¹⁶ Ainfoan Jesús icoinra huacun ahuun funu man Jesushuunoa yoiyaitocai tapitiro. Man fununmain icoinra huaicai. Nanscarifiyai funun Jesús icoinra huacun ahuun ahuinin man Jesushuunoa yoiyaitocai tapitiro. Man ahuininmain icoinra huaicai. Ascan mato potapayaiton inonquin ishon. Shinanchacayamacahuun.

¹⁷ Nan nocon Ifo Jesús mato yononi cuscan nanscasi acahuun. Jesús mato yonoaitian Upa Diosin mato catonni. Ascantari nan icoinra huafoti Dios fu tsainti pushurasi anoafu yafi maifoti nanscaracoin un ato yononi.

¹⁸ Isca huaquin. Israelifo Diosin ato yononi cuscacoin aton furonanfacufo foshqui rupa shatupacunifo. Ascatan furonanfacu yosishon Jesús Ifo huatan chipo shinanquin isca huaraca, —Natian un Jesús Ifo huaa. Nan fusti un yopai uhuun chaca ua soashonano un ahuun yora iishquin. ¡ohua! Un foshqui rupa shatumuyama shara icuanaran, —ishon shinanyamacahuun. Asca mia foshqui rupa shatufiani nanscanonquin. Shinanchacayamacahuun. Ascatan man Jesús Ifo huaa man foshqui rupa shatumumisima. Ascashon shinanquin isca huayamacahuun, —Un Israelifo aton shunifoon ato yononi cuscan un yopai. Un foshqui rupa shatumutiro Moisés yononi cuscan un airan, —ishon anori shinanyamacahuun. Mancai ascara yopaima.

¹⁹ Man foshqui rupa shatumisi yamarai man shatumisima nanscara rafufinquin. Man ascaitocai mato shara huamatiroma. Man asca huayamaricai mato chaca huamatiroma. Nan Israelifo imisi cuscacai man yopaima. Ascaquimarocon Diosin mato yononi cuscan aashu nan fusti man yopacoin.

²⁰ Nan Diosin mato catoaintian man ini cuscan nanscasicoin acahuun.

²¹ Diosin mato catonnitian man futsan ahuun oinmati icashu shinanchacayamacahuun. Ascafiatan maton ifoan mato nichipaiyaino amaquinoashu fotacahuun afanan tsoan oinmati ishquima.

²² Man ratoran futsa Diosin mato catoaintian futsafoan aton oinmati man iquin. Ascashiucacai afanan Satanás maton ifo itiro ma mato chaca huamashquin. Atiri mato catoaintian tsoan oinmaticai man imisima. Ascanfiashu natianfin man Jesús ahuun oinmati.

²³ Upa Diosin Furun Jesucristo nichini noco nashonon noco Ifo iishquin. Ascashufin manfin ahuunaquin. Nan fusti maton Ifocoin. Nan fustiton mato cayacafi shinanmatiro. Ascacun futsafoan oinmati iyamacahuun mato yonononfoma. Jesús fusti tanacahuun maton Ifo inon.

²⁴ Ascatan uhuun yoramishtichin Diosin mato catoanno ahuara man yonopaoni cuscan nanscasi acahuun. Upa Diosin mato futan aashquiquin.

²⁵ Ascacun natian afanan ahuara futsan un mato yoipai. Ainfofo nocofunu fu imisifomahuunoa un mato yoi. Un mato yoi ai cuscan nocon Ifoan ua yonoyamafiacun uhuun ramapaicain ua yononi cuscan un amisi. Ascashon un mato yoi ai cuscan man icoinra huatiro.

²⁶ Natian ahuara ahuuscaraqui noco omitsiscamai. Nanscacun man ahuionmafo ica shara icuana. Icoinra huamafoan noco omitsiscamatirofo.

²⁷ Ascacun ahuinyacashon mato ahuin unuyamacahuun. Ascafiatacan ahuionmashon ainfo funayamacahuun fipaiquin. Nanscanon.

²⁸ Ascafiacaifainfo finquin man chaca huaima. Ainfori funuya iyamaflamisishacaquin funuyainocai ahua chaca huaima. Ascafia man funuyafu yafi ahuinyafaan manfin fucashni tapiquin. Nan funuomafo yafi ahuionmafo ica finonmafain man ahuara futsa finoin. Nanscacun un mato yoisharapai man fucashni tapinoma.

²⁹ Ascatari uhuun yoramishtichin un mato isca huaquin yoipai. Nocon Ifo Jesús otichaima. Nocon Ifo yonoshouqui non chai huaima. Nanscacun non nocon Ifo yonoshosharacoinpai. Ascacun maton ahuin shinanfiakin Jesuscairocon fasi finonmafain shinancahuun. Nocon Ifo yonoshosharacahuun.

³⁰ Ascatari ahuara futsafoan mato omitsiscamafaiton nocon Ifo yonoshouquin unuyamacahuun. Omitsiscacaquima nanscasi unimacai nocon Ifo yonoshosharacahuun. Ahuara yopayamafiacuquin nocon Ifo cachiquiri huayamacahuun. Yonoshosharacahuun.

³¹ Nocon Ifo Jesús otichaima. Ascacun nuno mai anoshon yonosharafafaincahuun man yopai cuscan fiishcaquin. Ascashon mafo fustisi shinancaquima. Nocon Ifocairocon finonmafain shinancahuun. Nantifi mai anoafu icai cuscan cuyoshquin. Nanscacufin Jesús shinanquin non finatiroquin noco yonopai ai cuscan ashquin.

³²⁻³⁵ Un mato anori yoi maton nomuran ahuaton fucash huanonma. Un mato ahuinyacain funuyayamacahuun huaima. Un mato cayacafi imapai nocon Ifo fusti finacoinquin man shinanfainon. Ahuaton maton nomuran fucash huanonma.

Un mato yoisharapai. Un mato yoi maton nomuran omitsiscamashquimaquin. Ascaquimarocon un mato shara huapai Dios fusti man yonoshosharanon. Man ahuara futsa shinanonma. Ascashon un mato yoi ai cuscan nocofunun ahuionmaton ahuun Ifo unimamapaishquin. Ascan nocofunun ahuinyashon ahuinri unimamapai. Nan ahuinin ahuara yopai cuscan huafain fununri nannoricoin shinantiro. Nanscarifi aquin ahuun Ifo fustitocai shinantiroma. Ascashofin ahuun Ifo unimamapaifain nantianri ahuinri

unimamapai. Ascacun ainfo funuomaton ahuun Ifo Jesús fusti yonoshosharapai. Ahua futsacai shinainma. Ahuun Ifo fusti tanashquin. Diosin imapaiyai cuscan huafain nan fusti shinainquin. Ascan ainfon funuyashon ahuun funuri unimamapaiquin ahua futsafori shinantiro ahuun Ifo fustisima.

³⁶ Ascatan nocofunun ainfo fu iyamafiamisishaquin fasi afu ipaiquin. Ascashu afu fianantiro. Ascaquicai chaca huacanima.

³⁷ Ascafia nocofunu futsan shinainquin isca huai, —Uhuun Ifo Jesús un yonoshosharapaiyai cuscan un ainfo fishon un huatiroma. Nanscacucai un ainfon fiimaran, —ishon anori shinanshara. Tsoancai curushcai ascahuu huama. Afincoiannannori shinansharashu ica.

³⁸ Ascan nan ainfo tsoacai afu iyomisima nan nocofunu finquin shara huaa. Asca aquin nan ainfo fucai tsoa afu iyomisima nocofunu fiananyamafi nanscaquirocofin fasi shara huaquin ahuun Ifo Jesús yonoshohquin finacointiro.

³⁹ Ascatan tsain futsari un mato yoi. Ahuun funu naamanocaiyainfoan funu unutiroma futsa fu fiananshquin. Ascashu funu naano futsa fu fuchinanpai afu fianantiro. Ascafia-cun ainfoan Jesús Ifo huashon nocofunun a Ifo huacuma fitiroma.

⁴⁰ Ascatari un shinainquin isca huaa. Funu naano afanan futsa fiyamano nanscarafin fasi sharacoin itiro. Un shinain cuscan huafain Diosin Yoshin Sharapan a nannoricoin mato yoi.

8

Diosicoianna onihuacashon cufipaonifo. Nanscarafo yora ointsa iyamarai ahua futsa cuscara ramihuacashon tushu inanpaonifo. Nanfohuunooa Pablon ato yosini

¹ Ascatari tsain futsa mato yoinon. Nan nocofunooan Diosimafiacun yora ointsa iyamarai ahua futsa cuscara ramihuacashon, —Diosiran, —icashon tushu inanfo. Ascashon piyamaiton oinquin afanan nan tushu ficashon inanmitsamisifo. Ascacun natian un mato yosi nan tushu inanmitsafo non pitiroma iyamarai non pitiroquin. —Nantifi man non tapiaran, —ishon man yoisimi. Ascan nan man icoinra huaa futsafoan man yoiquin isca huamisi, —Unfi tapiaquin. Nan un shinain cuscafin un cayacafi shinainquin, —ishon shinancani. Ascarafo shinancanifin curanfiapaimisi itirofoquin. Ascara non shinancucai noco imasharatiroma. Ascaquimarocun non yorafohuun noishonfin non ato Jesús tanamasharacointiroquin a cuscara shara inonfo.

² Ascan tsoan shinainquin isca huai, —Unfi ahuamamishti tapisharaquin, —ishon anori yoifiaquicai atirifi ahua tapiataima.

³ Asca tsoan Dios noicoincunfin nanscarifi aquin Diosin ahuunooa yoitiroquin isca huaquin, —Un na onancoian, Nanfin uhuun yoraquin, —ishon yoitiro.

⁴ Ascashofin non Dios noicoiainton noco tapimatiro nan ahua futsa ramihuacashon tushu inanfo non pitiromainquin. Ascacun man non tapia ahua futsan ramihuafocai ahua. Acai Diosincoianna. Nan aafin ramihuafocai ahua tapiama. Acai ointiya iyamacain ahuun maponricai ahua shinantiro. Nanscarafocai Dios itiro. Diosfin nan fustiquin.

⁵ Jesús icoinra huamafoan yoiquin isca huamisifo, —Dios ichaparasi. Nai murannooa yafi mai ano Dios ichaparan, —ishon yoimisifo.

⁶ Anori yoifiamisifocai anorim. Man non tapia nocon Upa Diosifin fustiquin. Futsa yamai. Nantonfin nantifi onihuani. Nocofori onihuani non ahuun facufo inon. Ascashu non Ifo fusti. Jesucristo fusti. Futsa yamai. Ahuunshon nantifi onihuani. Ahuunooashu non nitiro.

⁷ Nan un mato yoiai cuscan atirifi yorafoan tapiafoma. Shinanfofin nan ahuafo futsa ramihuafocai niaquin. Niamafiacun nannori shinainfo. Nan facushtashon nicainifoannafo nan ahua futsa ramihuafocai nicun. Ascatan isca huaquin shinainfo, —Nan tushu ahua futsafo ramihuashon inanfo. Ascacun un na tushu piatoraca un Diosicoianna chaca huairan, —ishon shinantirofo. Ascatan pishon, —Un chaca huaran, —ishon afi aton nomuran shinanchacatirofo.

⁸ Anori shinainfiafonocai non ahua piatocai Diosimaqui noco imatiroma. Nan tushu ahua futsafo ramihuacashon inanfo non piamatocai noco imasharatiroma. Ascatari non piatocai noco chaca huamatiroma. Nanscara rafu.

⁹⁻¹² Ascafia oinfain. Man shinainquiraca isca huaa, —Unfin nantifi pitiroquin. Ahua ramihuacashon Diosicoianna tushu inanpaiifo nanfori un pitiroquin. Un piquicai un Dios chaca huaima, —ishon man shinain. Man anori shinainfiaino Jesús icoinra huaa futsafoan anori tapiataima. Nan tushu min piaiton oincaquin mihunri caocani. —Nantiro Jesús icoinra huafishon ahua ramihuacashon tushu inanfo pitiro. Asca urifi un

pitiroquin, —ishon shinantiro. Asca man tapiflashon man piaiton oinquin arifi man acai cuscan huaquin pishon nanscarifi huatiro. Ascan man pishonfin chipo ahuun nomuran shinantiro isca huaquin, —¡Ohua! Na tushu mun pishon uhuun Ifo Jesús chaca huaran, —ishon shinantiro. Ascashonfin ahuun nomuran afin shinanchacatiroquin. Man acaiton oinquin arifi aca. Ascacufin matohuun nuuaquin. Man man tapia ahua ramihuacashon tushu inanfo nan pishocai man chaca huama.

Ascano futsafoancai tapiafoma. Afoam shinanfin nan tushu pishon man chaca huatiroquin. Jesusri ahuunoashu nafianicun. Ascan matohuunshon shinanchacaquin. Man piamainocai arifi picuanama. Shinanchacacuanama. Man man tapian piquin man chaca huai shafain futsa arifi shinantiro pishon man ahuun noicoianma shinantsain. Ascan man na tushu piyama shara icuana. Pishon man futsa chaca huamatana. Man asca huaquin Cristorifi man chaca huamai.

¹³ Ascacufin un tushu futsa piquiraca un Jesús tanamisi futsa un chaca huamatiro uncai na cuscara tushu afanan pinacama futsa chaca huamashquima. Un aca cuscan huaquin un tsoa chaca huamashquima. Un futan Jesús tana futsa un ahuun noiquifin un ahua chacashta shinanmapaima.

9

Jesús fu rafumisifoan atirofo cuscan Pablonun ato yosini

¹ Dios fustifin uhuun Ifoquin. Nan ua yonopaiyai cuscan un atiro. Tsoanricai aton shinanpan ua yonotiroma. Jesús ua catonni un afu rafumisi inon. Nocon Ifo Jesús oincoinfain nan ua yono cuscan un mato yomisi man Jesucristo icoinra huanon. Ascacun nocon Ifo yonoshonahuunshon man icoinra huua.

²⁻³ Futsafoan shinanquiraca isca huamisifo, —Diosincai Pablo nichinima Jesushuunshon noco tapimanon, —ishon anori raca shinanfo. Anori futsafoan shinanfiamisicuncai man anori shinanyamapainon. Uhuunshon man nocon Ifo icoinra huua. Ascacun nantifiton tapitirofo Jesús ua catonni un afu rafunon.

⁴ Uhuun yoramishtichin shinancapon. Unrifi Jesús fu rafumisi. Ascan Jesús fu rafumisi futsafoanri amisifo cuscan urifi asca huapaiquifin un acuanquin. Afoan Jesús icoinra huua futsafo ato Jesushuunoa yosiaiton nicacaquin cashman ato pimamisifo.

⁵ Pedro non nocon Ifo Jesús ahuun chipocufon non atirifi Jesús fu rafumisi futsafoanri ainfo Jesús icoinra huafon fu fianancashon Jesushuunoa ato yoifoanfafainaifono aton ahuinfori atofu foanscamisifo. ¿Nanfoan ainfo Jesús icoinra huafon fu fianan cuscariyai urifi ainfo Jesús icoinra huafon fu un finantromamun unfu cahuacacainon?

⁶ ¿Ascain ahuuscain Bernabé futan non mato yosifain nofin uhoacain ahuun rafanan non yopai cuscan non fia? Ascan atirofoan mato yosiquicai ahua yono futsa acanima. Mato yosiafoan man yopai cuscan ato inancoian. Ascacufin non yopai cuscaicai man noco cashman inanmisima. Nan non ahua yopaitihuunshon non yonomisi fiishquin.

⁷ Un iscara mato tapimapai. Ranushumua futsacai cashman yonomisima. Ahuun caifo cushucufin nan yorafoan aton pushurasihuunoa pui niaifoan ato inanmisiquin. Nanscarifi aqui mau fanamisiton ahuun mau foaisharanon afin ahuun yono pitiroquin. Chashoanfo cushumisitori ahuun chashoanfoan shoma ayatiro.

⁸ Un mato yoiai cuscaicai nocofunufon aton tsain fustisima. Nannorifi Diospan tsain cununiquin.

⁹⁻¹⁰ Moisés Diospan tsain cunuquin isca huani, —Moipan tarati huayacuquin mato yonosharashotiro. Shuqui roro cuscara machi acuaño atiri ahuun chacafo fuutan potaino shuqui roro cuscara ahuun shaca nanno manitiro. Ascaiton maton moi runushuyamacahuun nanno tarati huayacuquin acafir pinon, —ishon cununiquin. ¿Diospan nannori yoiaño moihuunoa fusti yoinimun? Ma. Nan yonoshonaifohuunoa yoifain nocohuunoari yoini. Ratoranfoan mau chituquin shinantiro isca huaquin, —Un chitutan un yopai cuscan fitiroran, —ishon shinantiro.

¹¹ Nanscarifiai non mato Jesushuunoa cashman tapimafafainaiton copiquiri non yopai cuscan man noco cashman inantiroquin.

¹² Futsafoan Jesushuunoa mato yosiaiton nicaquin nan yopaifo cuscan man ato inanmisi. Ascacun un mato tau huaquin yosimisi. Nanscacufin nococafin finonmafain iconquin man noco inantiroquin. Man noco inantirofacuncai non mato ahua yocamisima. Ahuafoan noco ahuuscara huafaino non tunucoinmisi man Jesushuunoa nicasharanon. Un mato yosiain rafanan un pui fiaitonraca ua afanan nicapaicanimaquin.

¹³ ¿Man tapiamamun nan Dios fu tsainti pushu muran tushu fuafo nan murannoa yonomisifoan nan tushu cashman pimisisifo?

¹⁴ Nanscarifi aqui Diosin yononi isca huaquin, –Tsoan uhuun tsain shara futsafo yosiaiton nicaquin nan nicafoan ato pimatiroran, –ishon Diosin yononi.

¹⁵ Diosin ua yononi cuscan urifi mato ahuaa yocapaiquin un mato yocacuanaquin. Nan-nori Diosin yononifiacun un mato ahuashta yocamisima. Mato Diosin tsain yoifafainfi-aquin, –Un ato cunu fomai ua pui inanonforan, –ishoncai un shinanmisima. Ascarifi atacai tsoan yoiquin isca huatiroma, –Pablonun aton pui fianpaiquin ato Jesucristohu-unoa yoimisiran, –ishoncai tsoan uhuunoa anori yoitroma. Ascan tsoan uhuunoa anori yoiaino un naafin shara icuanaquin. Nanscacufin tsoanshtacai uhuunoa anori yoinacama.

¹⁶ –Un mato ahua yocatama Jesushuunoa yoimishashaqui un sharaquin, –ishoncai un yoitroma. Diosin ua catoncun ua yononi un Jesushuunoa yoifafainon. Asca un Jesushu-unoa yoifafainyamaiteon Diosin ua onaintimatiro.

¹⁷ Un yoiquin isca huafiacun, –Upan Diosin, min Furunhuunoa un yoipairan, –ishon un yoicun Upa Diosin un inantiroquin. Ascafiacai anorima. Diosifin afi ua catonquin tauhuashon ua yononi Jesushuunoa un yoinon. Nanscacufin nan ua yononi cuscan un aicai.

¹⁸ ¿Asca un Diosin tsain yoimishomun ahua un fiiquin? Ato yoishocai un ahua ato yocamisima. Ascashoricai un ato yoimisima isca huaquin, –Diosin mato yonocun Jesushu-unoa un mato yoifafainaiton un yopai cuscan ua inanforan, –ishoncai un yoimisima. Nonri yoipaiquin un yoisharacuana. Ascafiacai un anori yoipaima. Jesushuunoa yoiquin un tsoa ahua yocamisimashaquin un fasi unimai. Un Diosin tsain yoiquin ahua un mato yocashma un unimai. Ahuun rafananri Diosin fasi uqui unimacoin. Nanscarifi aqui ua unimamafaini.

¹⁹ Uncai tsoa futsan oinmatima. Jesús fustifin uhuun Ifoquin. Uhuun Ifo futsa yamai. Ascafia nantifi yorafo un ato shara huapai ato Jesús icoinra huamashquin. Nanscacufin un nantifi yorafoan aton oinmati cuscaraquin.

²⁰ Uhuun caifobo Israelifo ya un icashu nan icafo cuscan unrifi un ato cuscara ica afoan Jesús icoinra huanonfo. Nocon shuni Moisés nocon caifo yonopaoni cuscaai natian afanan yonotiromafia Moisés yonopaoni cuscan nicamisifo fu icashuri urifi ato futan Moisés yononi cuscain ato Jesús icoinra huamashquin.

²¹ Nanscarifiai nan Moisés yononi cuscan tanafoma fu un atofu icaino un ato cuscararifi un Moisés yononi cuscan aimo ato Jesús icoinra huamashquin. Un nanscafiamiscun Criston ua yononi cuscain un nicasharafaini. Nan fusticai un cachiquiri huatiroma.

²² Jesús icoinra huafo atirifi Jesús yononi cuscaai tsoan tapisharataicanima. –Non Jesús tanasharaino non na cuscarafo atiomaran, –ishon shinancani. Ascafiacucai Jesús noco anori yonoama. Un atofu icashu un ato cuscarari itiro. Jesús noco tapimama cuscan paratama un ato tapimashquin. Ascano ratoran futsafo fu un icashu un aton cuscarari itiro. Nanscashon un ratoran futsafoan uhuunshon Jesús icoinra huashu nipasharacani.

²³ Un asca huaquinfin un ato Jesucristohuunoa tapimasharashquincai. Icoina huaifono urifi un atofu finacai unimacointiro.

²⁴⁻²⁵ Man man tapiari nan pushcoaifo nannorasi ichofiacuquin fustifin shonontiro. Ascaifoaifin yorahuanrasiton ato oiainfono pushcohuaifo ichocani. Shonononpaicani. Nan shonoanfin aqui unimaqui ahuaa shara futsa niaifoan inanmisi. Ascacufin nantifi curushcai ichocaniquin futsafo shononpaicani. Tsoa ichoatama tau afi ranan ichoyofafaino fuyahuashcaquin sumu ichosharashcaquin atanashcaquima. Nanscarifi acquin nocon Ifo Jesús curushcai yonoshosharacahuun. Ahuaa chacafo huayamafain Diosin mato yonoama cuscan ayamacahuun Jesús tanaquin fuyahuashcaquin man aqui nocoaitian mato ahuaa shara inanshquiquin.

Ascatari nan ichoaifoan niaifoan ato inan cuscan cuyotiro. Asca Diosin noco ahuaa inancai cuyopacunacama.

²⁶ Ascacuncai un Jesús yonoshoni un cuparamuima. Un ipaitsi cashman yonoshonima. Pushcohuaifo ichocani shonononpaicani cayacaficoin ichotirofo. Nanscarifiai un cayacafi ica. Uhuun Ifoan ua yonoa cuscaicoian aqui nocosharashquin.

²⁷ Ufin un apaiyai cuscaai un aama. Uhuun Ifoan ua amapaiyai cuscan un aqui. Un tunupaiiaquin un tunuima Jesús tanasharashquin. Un atsanafiaquin un tunuima Jesushuunoa yoifafainquin. Jesús fustifin un ato yonotiroquin. Nanscacufin un futsafo yoifafainicai Jesús Ifo huashon yonosharashononfo. Ascafiashon Diosin ua yonoa cuscan un ayamai ufiri un funotiro. Un afanan Dios yonoshotiroma. Diosin afanan ua yonomatiroama. Un funopaima. Nanscacufin un apaiyai cuscan un aimo. Uhuun Ifoan ua amapaiyai cuscan nan fustisi un aqui.

10

Israelifoa Dios chaca huapaoni cuscan ayamacahuun

¹ Uhuun yoramishtichin tapicahuun. Nocon shunifo Egipto anoashu fonifo. Ascatari Dios atoqui nai coinmahuan cuyama shara fotomapacufoanni tapinonfo atofu ica. Nantifi nocon caifo Israelifo nai coin cai cuscan acho fonifo. Diosin nan coinhuunshon ato iyopaiyaiquiri ato iyoni. Ian mahuanun ahuun anu Oshin ano nocotoshinifo. Ascashori nantifi nocon caifo Israelifo Diosin ato ian mahuan nushmancayan rafu ocuma rafu unufiano nan nushmancayan mai muto huatanaino ahuun pocufainifo.

² Moisés ato rucun tanashoni. Nantifi nocon caifo Israelifo Moisés acho fonifo. Nan Moisés icoinra huacashon nantiffain tanacoinnifo. Nantianri tau Moisés aton niaifoanno nantiffain tanacoinnifo.

³⁻⁴ Ascatari Diosin nai muranshon ato tushu potashoni nantiffain pinonfo. Nannoshori unu yamacoinyaino Moisés toquirininahuan ahuun poquitinin tsacaino unu tsosia shara-coin tohuashu furani nantiffain ayanonfo. Ascano Cristo ahuun Yoshin Shara atofu caino ahuunshon ayanifo.

⁵ Asca huafiainfoanno Upa Diosicai atifiqicai unimanima. Ahuun tsain nicapaiyamaifoan. Ascashufin tsoan istaipama foanfaincanisi nicayosmacani nai cuyonifoquin. Nan tsoan istaipama ato mai huaquin futsanifo. Diosin ato namaquin cuyoano.

⁶ Ascashofin nanfoan chaca fuchipaipaonifoquin. Ascacufin nanfohuunoo Diosin Yoshin Sharapan noco tapimaniquin chacafo fuchipaipaonifo cuscan norifi non ascaran fuchipainonma inifo cuscan omitsiscashquima.

⁷ Afoan chaca huapaoni cuscan huayamacahuun. Ascashon nanfoanri ahuaa futsan ramihuacashon, —nocon diosiran, —ishon yoipaonifo. Asca huacashon fuusi huashofain aqui pifain ayafain icashon ahuaa futsan ramihuafoan ointaifi chaca huacaquin pauncain mononifo.

⁸ Ascan oinfain. Ato cuscara iyamacahuun. Atirifi aton ahuinma fu inifo. Nanscarifiayainfofori aton funumafo fu inifo. Ascaifoan oinquin Diosin veintitres mil ato namariscatani. Nan shafatan fusti ato namariscatani.

⁹ Aton cuscara chaca huayamacahuun. —Diosincal nocoqui funa sinatiroma. Ascan un chaca huafiacucai ua onaintimaimaran, —ishon anori shinanyamacahuun. Nocon shunifoan Dios chaca huariaifoan Diosin afanan tunuyamacaiquin ato onaintimani. Ascashori rono paupafo ato muran nichini nanfoan ato nasano atirifi nani. Ascacun ¡Oinfain! Man Dios chaca huariaiton afanan tunuyamacaiquin matori onaintimatiro.

¹⁰ Ascashon nanfoanri tsain chipuriafoan Diosin nai oinmatinin atirifi ato namani. Ascacun oinfain marifi tsain chipuyamacahuun matori onaintimanonma.

¹¹ Nan nocon shuni Israelifoa chaca huapaonifo cuscan noco cunushoni norifi non aton cuscara inonma omitsiscashquima. Natianri nocon Ifo Jesús oti chaima. Ascacun non itisharanoncahuun nocon Ifo nocoaitian non aton cuscara chaca inonma.

¹² Asca tsoan shinanquin isca huai, —Uncai aton cuscara chaca huatiroma. Unfi cayacafi fusti itiroquin, —ishon anori shinainno oinfain. Marifi man Jesús tanasharayamaino aton cuscara chaca man itiroquin.

¹³ Satanás mato chaca huamapaiyai cuscacai marus fusti man mumisima. Man muai cuscaari nantifi icoinra huafoan man mumisi. Ascafiacun Diosin mato yoimisi cuscan man icoinra huatiro. Matori cushusharatiro man chaca huanonma. Satanás mato chaca huamapaiyai cuscan Dioshuunshon mato atima huatiro man chaca huanonma. Ascashori Diosin mato tapimai ahuuscashomain man chaca huanonma.

¹⁴ Ascacufin uhuun yoramishtichin ahuaa futsa ramihuacashon, —Noco diosiran, —icashon icoinra huaifono atomaquinoashu pashcafaintacahuun.

¹⁵ Man shinansharatiromainquin un mato yoiai cuscan shinancahuun. Un mato iconma yoiamaraquin iconcoin un mato yoicai.

¹⁶ Man man tapia non Diospan tsain nicashquin ichananmisitian nan non ayai cuscan non shinanmisi Jesús noco nashonicun. Nan cucho fustiquinoa non ayapacumisi. Nantifiton ayaquin non shinantiro Jesús noco nashocain ahuun imi foni non afu nipanon.

Ascacun non yoitiro isca huaquin, —¡Aicho! Upa Diosin, min Furunmun noco nashoni non afu min facufo inonran, —ishon non yoitiro. Nanscarifi aqui misi torupacushon nofi ranan non uhuapamashta inanonanpacumisi Jesucristo ahuun caya nocohuunshon mastanifo non afu rafupacunaca shinanshquin.

¹⁷ Misi fusti torupacushon nantifiton pimisifo cuscan. Nanscarifi Cristo fustifiano nantifi icoinra huafo non ahuun yora fusti cuscara ishquin.

¹⁸ Ascashon nocon caifo Israelifohuunoa shinanchahuun. Nanfoan aton inafu rutucashon Dios inanmisifo aton chaca soapaiquin. Aton ichananti pushu murannoa yonoshomisi-foan nan nami pimisifo. Asca huacanifin nan fusti shinantsa acaniquin. Piyanan Dios cuffimisifo.

¹⁹ Ascacun un mato yoi nan ahudara futsa ramihuafocai nancai ahuaa. ¿Ascadari ahudara futsa ramihuacashon tushu inanfomun ato shara huamatiro?

²⁰ Ma. Anorima. Jesús icoinra huamafoan Diosicoïn inantamarocon ahudara futsa ramihuacashon tushu inanpaicaquifin yoshin chaca inanpaicaniquin. Nanscacuai un mato yoshin chaca ya imapaima.

²¹ Man nocon Ifo Jesús fu rafupaicain a yoshin chacafo fu man rafutiroma. Ascashuri nan rafu man ositiroma. Man Jesús icoinra huafo fu ichanancashon man ato futan ayafain Jesús noco nashoni cuscan shinanshquin. Man asca huatacai nantianri aa Jesús icoinra huamafo fu man ichanantiroma nan yoshin chacafo shinanshquinma.

²² Nocon Ifo Jesús fu rafupaifiatan non yoshin chaca fu rafupai non asca huaquifin nocon Ifo Jesús non sinamatiroquin. Non asca huaïton noco onaintimatiro. ¿Asca nonmun Jesús curushcai finontromun noco onaintimanonma? Ma. Anorima. Jesús noco onaintimaitian tsoan noco numatiroma.

Jesús icoinra huafo non noicoianshu nan fustiton yonoo cuscan non atiro

²³ Icon non Jesús icoinra huashon Diosin noco yononi cuscan nantifi non pitiroquin. Nantifi nami shara non pitiro. Nan tsain iconfiacun Jesús icoinra huaa futsafoan shinantiro isca huaquin, —Un na cuscara nami pitioroman, —ishon shinaintonfin ato ointaificai nan cuscara nami non pitiroa ahudara chaca shinanshquima. Non nantifi yorafo Jesusquiri shinanmapai. Non ato shinanmashara fustipai.

²⁴ Ascacun man apaiyai cuscan fusti shinanyamacahuun. Futsafohuunoari shinansharacahuun. Ato shara huafaincachuun.

²⁵ Ratoran futsan mato nami inanpaiyaiton man fitiro piishquin. —¿Rania min fiamun? —ishon yocayamacahuun maton nomuran shinanchacashquinma. Diosin tsain yoia isca huaquin, —Nantifi man pitiroquin, —ishon noco yoini.

²⁶ Nocon Ifoan nantifi onihuan. Nantifiri ahuaa nan onihuaniti noco inanpai norifi non unimacai non aya inon.

²⁷ Ascan Jesús icoinra huamaton mato pimapaiyaiton a futan picachuun. Ascashon isca huaquin yocayamacahuun, —¿Rania na nami min fiamun? Ahudara ramihuacashon, “Nocon diosiran,” ishon ato nami inanfo. ¿Nan cuscara nami mian pimapaimun? —ishon yocayamacahuun. Man yocayamaiton unimacai piron.

²⁸⁻²⁹ Ascafashon ratoran futsafoan mato yoiquin isca huai, —Un na nami mia pimai ahudara ramihuacashon inanqui tau huafo. Un chipo fiaran, —ishon mato yoiatton nan nami piyamacahuun. Ascashon piquin isca huaquin aton nomuran shinantiro, —¡Aja! Na nocofunun Jesús icoinra huafashon ahudara ramihuacashon aton diosin nan nami inanqui tau huafo man piaran. Asca nanton Jesús tanasharamaran, —ishon ahuun nomuran shinantiro. Marifi man pishonraca ahuun nomuran shinan, —Mun chaca huaran, —ishon. Manfin tapiaquin nanfo non pitiro. Ascan futsafoancai tapiataicanima. Afoan shinanraca ascaquin non chaca huatiro.

³⁰ Man yoiquiraca isca huaa, —Un nantifi tushu pishon Dios, “¡Aichoran!” un huatiroquin. Un asca huacun ahuuscain futsan uhuunoa shinanchacatiromun, —ishon man shinanraca.

³¹ Un mato tapimasharanon. Ahudara man pifain ayafain man ahuarashta futsa huai cuscari acafiri futsafoan Diosihuunoa shinansharanonfo.

³² Ascacun man acai cuscan huaquin nan shinanchacamayamacahuun. Nocon caifo Israelifo iyamarai mani futsafo nantifi Jesucristo icoinra huafo ato shinanchacamayamacahuun matohuunshon nocon Ifohuunoa shinanchacanonfoma.

³³ Nanscarifi aquin urifi nantifi yorafo un ato shara huashopai unimanonfo. Ascacunai un apaiyai cuscan fusti un huaima. Futsafoan apaiaifo cuscan un ato huashopai Jesucristo man icoinra huacashon chaca shatucanashu afu ipanonfo.

11

1 Un Cristo tanai cuscan marifi ufutan tanacahuun.

—Ichananshon non Diosquiri shinainno nocofunu yafi ainfomain ahuuscatirofoquin, —ishon Pablon ato yosini

² Man ua shinanfafaïmisicun. Un mato aicho huai. Un mato yosimisi cuscan huafain man nicafafaini.

³ Natian uhuun yoramishtichin un ahua futsa mato shinanmapai man tapinon. Cristofin nantifi yorafoan nocon Ifoquin. Ascatai ainfofoan aton ifofin aton funufoquin. Ascan Cristo ahuun Ifofin Upa Diosiquin.

⁴ Ascashu man icoinra huafo ichananmsitian ratoran nocofunun Dios cuffain ahuun tsain yoipaiquin iguisi ahuun maiti pucatiro. Ascashon maton fuyamisi cuscan ismashcaquin Diosihuunoa shinansharaquin. Ascacun maiti mapacumutan ismatiro Cristo fusti ahuun Ifocun. Ahuun maiti mapacumuyamacun futsafoan oinquin shinantiro, —Natocai Cristo Ifo huapaima, —ishon shinantirofo.

⁵ Ascatai ainfoan Dios cuffipai yamaraquin ahuun tsain yoipaiquin iguisi maiti nutatiro ismashquin nocofunu ahuun ifocun. Ascaqui maton fuyamisi cuscarari ismashcaquin aton funuhuunoa shinansharashcaquin. Ahuun maiti nutancasmaquicai funu ifoancoin-nama cuscara itiro.

⁶ Nan ainfoan Dios cuffipaiquin maiti nutancasmacun nocofunu cuscara marucumutiro. Ascafiashu ainfo marucumuashu rafipaitiro. Nan yorafoan oinquin yoitirofo isca huaquin, —Na ainfoan chaca huaran, —ishon yoitirofo. Ascacufin ainfoan Dios cuffipafain ahuun tsainri yoishquin maiti nutantiroquin.

⁷⁻⁹ Ascafiashu nocofunun Dios cuffain ahuun tsain yoishquin maiti nutantirofo. Diosin nocofunu onihuanani a cuscara inon. Ascacun uhuun yoramishtichin non Dios nicacoianshu ahuun ointi cuscara shara non itiro. Nanscarifiayainfofoan aton funu nicacoianashu Diosin ointi cuscara sharari itirofoquin. Diosifin nocofunu onihuaquin tauhuaniquin. Chipofin ainfo onihuaniquin. Nocofunuhuunoa Diosin ainfo onihuanani. Ainfohuunoacai Diosin nocofunu onihuanima. Nocofunuhuunoa nan ainfo onihuanani afu rafucain afu yonosharapacun unimayan.

¹⁰ Ascacun nocofunufan ainfo iquintiro. Ainfofoanri aton funu nicacointirofo. Ascashu icoinra huafo ichanainno ainfoan ahuun maiti nutatiro ahuun funu nicacoinshon ismashquin. Man asca huaiton Diosin oinmati afu nai muran icafoan oinquin yoitiro isca huaquin, —Diosin yononi cuscan nan na ainfoan ahuun funu nicashara. Nanfin sharacoinquin, —ishon yoitirofo.

¹¹ Ascashon Diosin noco onihuanani ainfofo yafi nocofunufu yopanonanonfo.

¹² Diosin tau huaquin nocofunun ahuun anu Adán onihuanani. Ascashon ahuunoari ainfoan ahuun anu Eva onihuanani. Ascatainaino ahuunoashu nocofunufu yafi ainfofo cainpacumisiquin. Ascafi nan ainfofo yafi nocofunufori nantifi Diosin onihuanani.

¹³ Nanscacun mafin shinancapon iconmainquin. ¿Ainfoan matofu ichananquin Dios cuffipaiquin maiti nutashoma Dios cuffia ascara sharamun? Ma. Ascaracai sharama. Man ascaquicai ato ifo nocofunufu oinmapaicanima.

¹⁴ Man man tapiari nocofunufu aton fo fasi chai huaa chaca itiro. Nannori nantiffain non shinanmisi. Nanscaifin rafipaitiroquin.

¹⁵ Ascatai ainfofoan aton fo chai huafin maiti sharashta ointsa itiroquin.

¹⁶ Un na mato yoiai cuscafin ratoran icoinra huaa futsa ua fochishmapaiyaitocai un ahua futsa yoipaima. Ascashocai non ahua futsa yosimisima. Nan un mato yoimisi cuscafi Jesús icoinra huaa futsafo afi ranan ichanancashon nanfori nannori fusti yoimisifoquin.

Nocon Ifoan noco nashonihuunoa shinain ichanancashon nantianri Corinto anoafan ahuarafo chaca huaifo cuscan Pablonun ato yosini afanan ascanonfoma

¹⁷ Ascashon ahua futsari un mato yoipai. Un nica man atrifi ichanansharama. Ascatamarocon man fasi chaca huai.

¹⁸ Futsafo mato anoashu uqui fucashon ua yoiafo nan man ichanainticai man futsa chaima man tsaopaitirofo. Man ichananshon nocon Ifo Jesús mato nashoni shinanpaifin mafi ranan man noinancasmatanain. Ascacufin un matohuunoa nicai cuscan un shinan atirifiracafin iconquin.

¹⁹ Man shinanra, —Nan man fochishmanantanquin man tapitiro ratofanmain cayacafi shinancanica, —ishon man shinan. ¡Ohuashta! Anorima. Man fasi amaquiricoin shinan.

²⁰ Man ichananshoncafi Jesús mato nashoni man shinainma. Nan shinantamarocon man pifain ayafain nan fusti man shinain.

²¹ Un nica man ichananshon pifiagincafi a tushuomafori man pashcashomisima. Ato pashcashotama mafi ranancairocon ayafain ahuun man paunmisifo. ¡Ai timafin! Ascain fasi chacaquin.

²² Pipaiquin ichananti ano man cataima iguisi maton pushu anoshon piyocahuun. Ascatamarocon Dios fu ichananti pushu ano oshon man ichapa pifafainmisi. Tushuomafo

man rafimaiquin. ¡Ai timafin! ¿Unmun matohuunooa yoisharaiquin? Ma. Uncai matohuunooa yoisharatiroma. Nan mato futan icoinra huaa futsafo man chaca huacun. Ascaraai sharamafinquin.

Jesús noco nashoni cuscan pifain ayaquin non shinantiro

²³⁻²⁴ Ascadari nocon Ifo Jesús afincoi un yoini cuscan un afanan mato yoinon. Ua tapimani cuscan un mato tapimai. Nocon Ifo Jesús Judaspan ato achimanataima afu rafumisifo fu ichananni. Ascashon ato futan piquin. Misi finifoantan Apa Diosin yoini isca huaquin, —Upa Diosin min fasi sharacoin. Mirifi min nantifi tapicoian. ¡Aichoran! —huatan misi torupacushon ato inanni. —Naafin uhuun caya cuscaracoinquin. Unfin matohuunooashu chipo naicain. Nan man ichanaintian man misi piaiti ua shinanfafaicahuun, —ato huatan.

²⁵ Ascashon piyaifoan afanan cuchori finifoantan ato ayamapacuquin yoini, —Na ayatihuuunooa ahuaa funa shara un mato yoiquin isca hua. Uhuun imi foyanan un matohuunooashu nai man ufu Upa Dios ari ipanon. Nan na non acai cuscan chipo nan man ichanainti ua shinanfafaicahuun, —ishon ato yoini.

²⁶ Ascashori man ichanancashon Jesús mato nashoni cuscan shinancahuun. Misi pifain ayafain huacafain atoci huaquin, —Nocon Ifoan noco nashoniran, —ishon shinanfafaicahuun. Nan Jesús afanan oaitian nanscasi huafafaincahuun.

Ahuuscashomain Jesushuunooa nani cuscan shinantaqui non pitiroquin

²⁷ Ascacufin nan man ichanain anoshon misi pifain ayaiti ayafiaquicai maton chaca shatucasmafain manri chaca huaa. Nocon Ifoan noco nashoni ahuun caya fasi omitsiscacain imi foyanan noco nashoni. Nanscarafu man tapifiahocai nocon Ifohuunooa shinantamaroon chaca huaquin man afanan nocon Ifo omitsiscamai.

²⁸⁻³² Ratoranfoan misi pifain ayafain nocon Ifo omitsiscacain ato nashoni cuscan shinanyamaifoan Upa Diosin ato onaintimashquin. Atirifoan nan na un yoia cuscan asca huacani.

Ascashufin nanfo iramannashtafo atirifi isinin icain atirifi onihuanifotifain. Nanscacun man ichanaintian oinfain. Misi pifain man ayataimari ahuaa chaca huashon iquisi Upa Dios yoiyocahuun maton chaca soashonon mato onaintimanonma. Jesús icoinra huamafo Diosin ato onaintimai cuscacai noco onaintimaima. Afocai ahuun facufoma. Ascacun nanfo ato omitsiscapanacafo muran potashquin. Ascan nonfin ahuun facufoquin. Nocon Ifoan noco oinmfiacuicai noco omitsiscapanacafo muran potatamaroon noco tapimashquin non afanan chaca huanonma. Nanscacufin man ichanaintian Jesús noco nashoni shinanshquin pifain man ayataimari iquisi maton nomuran shinancahuun manmain chaca man fomaincai. Ahuaa chaca huashon shinanshquin Upa Dios yoiyocahuun maton chaca mato soashonon. Ascashofin man pifain ayatiro Jesushuunooa shinansharashcaquin.

³³ Ascacufin uhuun yoramishtichin man ichananshon Jesús noco nashonihuunooa shinancahuun oinyocahuun atirifi icafofiacun. Ascashon misi torumishti yafi aqui ayaquin man shinantiro Jesús noco nashonihuunooa.

³⁴ Ratoran futsa man fonainquin iquisi maton pushu anoshon ichananshoma man piyotiro. Man ascaitocai Diosin mato onaintimaima. Ascacun un matoqui nocoshon ahuaa man fucashniaiton un mato shara huashoshquin.

12

Diosin Yoshin Sharapan icoinra huafoti ato amatiro ahuunshon icoinra huaafo futsafo shara huanonfo

¹ Uhuun yoramishtichin natian ahuaa futsa un afanan mato yoisharapai. Nan non ahuaafo Diosin Yoshin Sharahuunshon non atirohuunooa un mato tapimai. Nanfohuunooa iconcoi man tapinon.

² Man manfin tapiaquin Jesús man icoinra huataima ahuaafo rami huashon man icoinra huapaoni. Ascafia afoancai ahua shinantiroma. Ascashocai ahuashta mato yoitiro. Nanscaquin nanfohuunooa man amaquiri shinanpaoni.

³ Ascatan futsafo matoqui nocoshon yoishquin isca huaquin, —Un mato Diosin tsain yoi oaran, —ishon mato yoiquin. ¿Ahuuscashomun man tapitiroquin Diospan Yoshin Sharahuunshon mato yoiyamarahuun afin shinanfain mato yoiatiron? Nanscacun un mato tapimai ahuuscashomain man tapitiroquin. Tsoan Jesusqui tsain chaca huafin acai Diospan Yoshin Sharahuunooashu tsainquima. Ascashon, —Jesusfin uhuun Ifoquin, —ishoncai tsoanshta afin yoitiro Diosin ahuun Yoshin Shara fustihuunshon yoitiro.

⁴Upa Diosin nan icoinra huafoti ahuun Yoshin Sharapan ato amapaiyai cuscan huaquin futsa futsa huashon arusu fusti noco shinamatiro non ahuunshon icoinra huaafo futsafo shara huanon.

⁵Ahuunshon futsa futsa huaquin afaquin nocon Ifo fusti non ashotiro.

⁶Ascano Diosin nan icoinra huafoti nocon ointi muran futsa futsa huaquin noco tapimai ahuunshon non ahuara ashonon. Ascatan nan Diosin fustiton nantifi nocon nomuran noco tapimafafaini non a cuscara inon.

⁷Ascano Diosin Yoshin Sharapan ahuun yono ismatiro isca huaquin. Icoinra huafoti ato amatiro futsafo shara huanonfo.

⁸Futsan Diospan Yoshin Sharahuunshon tsain fasi cayacafi shara noco yoiaino futsanri Diospan Yoshin Sharahuunshon Diosihuunoa noco yoisharaino.

⁹Futsanri Diospan Yoshin Sharahuunshon finonmacaifain icoinra huaquin fina-coiyainno. Futsanri Diospan Yoshin Shara fustihuunshon yorafo caya huamaino.

¹⁰Futsanri Diospan Yoshin Shara fustihuunshon tsoan atiroma cuscan atiro. Futsanri Diospan Yoshin Shara fustihuunshon nan Diosin yoiat cuscan noco yoiaino. Futsanri Diospan Yoshin Shara fustihuunshon tapitiro futsamain noco Diospan Yoshin Sharahuunshon yoiyamaraquimain yoshin chacahuunshon noco yoicain. Futsanri Diospan Yoshin Sharahuunshon nan tsain futsanman yoifain nan tsain futsaman yoiat cuscan huafain futsan nicayoyamafiamisishaqui Diospan Yoshin Sharahuunshon nan tsain yoiat cuscan noco tapimatiro.

¹¹Nanfofin Diosin Yoshin Sharapan ahuun yonoquin. Nan icoinra huafotifin Diosin Yoshin Sharapan ato amapaiyai cuscan acaniquin. Naantofin nan noco amapaiyai cuscan noco huamatiroquin.

Nonfin nocon caya fusti cuscarquin

¹²Nocon caya fustifiano non pashcoi futsua. Nanscarifiai Cristo fustifiano nonfin ahuun yora ichapaquin.

¹³Cristo fustifiano nonfin nantifi ahuun caya cuscarafuquin. Atirifi non Israelifo non mani futsafori non nocofunufaoan aton oinmatifo non atirifi nocofunufaoan tsoa aton ifoma icaino. Nan non Cristo icoinra huafoti Diosin Yoshin Sharapan nocon ointi noco fianananhuano Cristo ahuun yorafo non itiroquin. Non ahuun caya cuscara. Ascafia Diosin Yoshin Sharahuunshon nan icoinra huafoti ahuun cayacoin cuscara noco ima.

¹⁴Nocon caya fustifiano non pashcoi futsua.

¹⁵Ascatari nocon taunca yoiqui isca huai, —Uncai mucuma. Ascan uncai cayan pashcoi futsutiroma, —anori yoifaino nocon cayahuu nuua.

¹⁶Ascataricai nocon pafinquin yoiquin isca huai, —Uncai furoma. Ascan uncai cayan pashcoi futsutiroma, —ishon yoifiai nanri nocon cayahuu nua.

¹⁷Nocon cayahuu furo fustiacumun ahuuscashon non nicacuanaquin. Nanscarifiai nocon cayahuu pafiqui fustiacumun non ahuuscashon shutucuaquin.

¹⁸Ascafiaicai Diosin noco ascara onihuanima. Nanfin apaiyai cuscan noco onihuaniquin. Ascashon nan noco tuchipaiyaino nocon cayahuu noco tuchi qui futsani.

¹⁹Nocon caya ahuara fusti ya icainocai shara icuanama.

²⁰Nan iconcoin. Nocon caya fustifiano non pashcoi futsuaquin.

²¹Ascan furoncai mucu isca huatiroma, —Uncai mia yopaima, —ishon yoitroma. Maponricai tau isca huatiroma, —Uncai mia yopaima, —ishoncai yoitroma. Ascan isca huaquin shinanyamacahuun, —Un mia yopaimaran, —ishon futsa yoiyamacahuun. Diosifin nan icoinra huafoti noco noicoquin. Nanscarifiai nofi ranan non noinanoncahuun.

²²Nocon caya pashcoi futsuafo mutsipamafiashu nanfori non fasi yopacoin.

²³Nan raniran futsan non pashcoashta nan non musu huatiroma futsafoan oinonfoma. Nanfori non ihuasharatiro rafishquima.

²⁴Diosin nocon caya noco onihua cuscan huafain fasi non cushushara. Ascashon non yoitiro isca huaquin, —Un na yopacoinran, —ishon. Nanscarifi aqui ratoran Diosin yorafocacun nacai ahuamaran huafiafo nancaifin Diosin ahuun fasi noiquin. Ascacun atohuunoa non yoisharafain non ato yopacoin.

²⁵—Diosifin noco onihuaniquin nan icoinra huafoti nantifi non yopanancoinran, —ishon shinanonfo. Ascacun nantifi non cushunonansharatiroquin isharashquin. Nan-norisi shinanshquin. Nantifi cushunonansharacani.

²⁶Nofiri raniran non moshauqui chachishon non mutiro nantifi nocon caya non omitsiscacai nanhuun non isincointiro. Nanscarifiai Jesús icoinra huaa futsa omitsiscaiton nantifi nan non icoinra huafoan ahuunshon non mutiro afu omitsiscacai shinantsa. Nanscarifiai

Jesús icoinra huaa futsan futsafori shara huacun non nantifi afu icoinra huafori non afu unimacointiro.

²⁷ Ascashufi non Cristo ahuun caya cuscaracoinquin. Nantifi non ahuun caya pashcoi futsua cuscarari. Nantifi non Diosin yoracoinfo.

²⁸ Ascan nantifi nan Jesús icoinra huafoti Upan Diosin noco catonni ahuunshon ahuara futsa futsa huaquin non ashonon. Cristo nuno mai ano niyoatian futsafo catonni afu rafunonfo. Ascashori ato nichini ahuun tsain ato yosifoanfainonfo. Cristo afu rafumisifo catonquin tau huani. Ascashon chipo Diosin tsain yoimisifo catonfain Diosin tsain tapimamisifo catonfain tsoan oinyomisima cuscara ahuunshon atirofo catonfain Jesushuunshon isinincaifori cayahuamafain futsafo ashofafainmisifo catonfain futsafo yonosharamatirofori catonfain futsafoan nan tsain futsaman ahuun Yoshin Sharahuunshon yoitirofo nanfori Diosin ato catonni. Nantifi catoan ahuunshon yorafo ashonsharanonfo.

²⁹ Diosincai atifi noco yonoama non ascarasi huanon. Nantificai yonoama ahuun tsain yoifoanfainnonfo. Ascashoricai nantifi yonoama tsoan oinyomisima cuscara ahuunshon atirofo.

³⁰ Nantificai yonoama Jesushuunshon isinincaifo cayahuamanonfo. Nantificai yonoama nan tsain futsaman ahuun Yoshin Sharahuunshon yoinon. Nantificai yonoama nan tsain futsaman noco tapimanonfo.

³¹ Ascacun Diosin mato imapaiyai cuscan huafain nan icoinra huaa futsafo man shara huafafainon. Diosin Yoshin Sharapan noco amapaiyai cuscan nanfo fuchipaichuun. Ascan nanfo sharafia un ahuara fasi shara finacaia natian un mato yoinon. Ua nicasharacahuun fasi shara finacaia Diosin noco imapaiyai cuscan huafain un mato tapimanon.

13

Non Diosinhuunshon futsafo noiafin nancai shara finacaiaquin

¹ Un mani futsafoan tsainman yoifain Diospan oinmati afu nai muran icafoan yoia huaquin un yoifiatiro Diosihuunshon un futsafo noiamashucaí un ahuama. Ascashu uhuun tsain achacoin nicatsa itiro. Futsafo fucashni huai cuscara itiro.

² Diosin futsafo yoipaiyai cuscan un tapicoishon yorafoan ahuara tapipaiquiaicai tsoan tapiamaifoan un tapishon un fasi Dios icoinra huaquin finacoian un na machi shucucaitahuun un huaino shucucaitiro un asca huafiashocai un futsafo noiyamainocai nancai uhuuna ahuama.

³ Nantifi un aya cuscan un ahuomafo un inancoinfiaquicai un nan futsafo noiamashu nancai uhuuna ahuama. Un Diospan tsain shara yoiaiton nanscacun nicacasmacaquin ua coaifoanno un naafiashucaí un futsafo noiyamashu nancai uhuuna ahuama. Un ipaiti natiro.

⁴ Non futsafohuun noicoinecai non funatiroma. Non ahuun ramapaitiro. Ascatan futsafohuun non noiricai non futsafo shutiacufoanpaitiashu non sinamisi iyamacain cacapaimisi iyamacain nonricai curafiapaimisi itiro.

⁵ Non futsafohuun noicoinquiricai futsafoan ahuara huapaifaiton non ato shutiacufoantiroma. Ascaquicai non ato rafimapaima. Ascashoricai nofin apaiyai cuscan fusti non shinantiroma. Fushnuicamitsamisi iyamacain futsan noco chaca huafiacuun non shinantafaitiroma. Afo shinantamarocon rahuinmafain non ahuun noitiro.

⁶ Non futsafohuun noicai ahuara chaca oin non unimatiroma. Ahuara icon shara nicai non unimacointiro.

⁷ Ascatan ahuara ahuuscarafiaino Dios noiquicai nocon nomuran non shinanchatiroma. Ascashon non tunucointiro. Futsahuun noicoinquicai ahuunoa ahuara chaca nicafiaquin non icoinra huatiroma. Futsafohuunoa chaca nicafiashon non tapiyoshomacai non icoinra huayotiro. —Ascayamapainonran, —ishon non shinantiro ahuun noiquin. Non Diosin noicoinquicai ahuara ahuuscara afiaiton non tunucointiro.

⁸ Noinain unupacunacama. Ascafianocai Diosin tsain yoimisifoancai ratoran shafatan afanan tsoan yoishcanima. Ascashori tsoancain ascara tsain nicayomisima afanan yoipacunacama. Tapimamisifoanri afanan noco tapimapunacama. Nanfocai nocon Ifo oaitian non afanan yopashquima.

⁹ Ascacun natian Diosin noco tapimapaiyai cuscaí atirifi non tapisharataima. Diosin tsain noco yoimisifoan tapiafo cuscan noco tapimasharafiatirocái atirifi tapiafoma.

¹⁰ Ascaino Jesucristo nocoaitian non a cuscara shara iishquin. Afin nantifi tapiquin. Afin tapia cuscan nocori tapimashquin. Ascano ahuara futsa futsa huaquin Diospan yorafoan noco ashomisi cuscan non afanan yopapunacama. Man nanfo cuyoshquin.

¹¹ Ascano un facuashu uhuun tsain facu tsain cuscara iyopaoni. Facufoan mutiro cuscan unrifi un muyopaoni. Facufoan shinantiro cuscan unrifi un shinanyopaoni. Ascafia un yosinishaquin facufoan shinantirofo cuscan un afanan shinainma. Facufoan ichapama tapia. Ascan un nocofunuaition facufo itiro cuscan un afanan aama. Natian nocofunuofoan shinain cuscan un aaqi. Facufo itiro cuscan mun cachiquiri huacoinna.

¹² Fuisiti matacoiannocai nocon fuso cuscaracoin non ointiro. Nanscarifiai natian Jesús icai cuscacoincai non onancoiaintaima. Chipo aqui nocoshon ahuun fusocoin non oincointiro. Nantiantari aficoimain ua onancoiaintofin urifi un onancoinyaino.

¹³ Ascashon non Dios icoinra huai cuscacai cuyopacunacama. A icoinra huashucai non amaqui ipanacama. Nanricai cuyopacunacama. Nan rafu sharacoinfia Dioshuunshon non futsafo noicoiainno nancaifin shara finacaiquin. Nanricai cuyopacunacama.

14

Diosin Yoshin Sharapan noco yonopaiyai cuscan Pablonun yoini

¹ Ascan Diosin noco noiái cuscan huafairi futsafohuun noifafaincahuun. Nancairocon fuchipaicahuun ascashaquin. Ascashon Diosin Yoshin Sharapan futsa futsa huaquin mato yonopaiyai cuscan nanfori fuchipaicahuun. Diospan Yoshin Sharahuunshon nan Diosin yoia cuscan fasi fuchipaicahuun icoinra huaa futsafo yoishcaquin.

² Ascatan futsan tsain futsaman yoiaitocai nicatirofoma. Dios fustitofin nicatiroquin. Diosin Yoshin Sharahuunshon yoifaitocai tsoa futsan nicatiroma.

³ Ascashon tsoan Diosihuunshon ahuun tsain shara yoiquin noco tapimasharashon Jesús cuscara noco imafain nocon ointiro noco shara huashotiro ahuuscarafiaquin nocon ointi non unimacointiro.

⁴ Ratoranfoan tsain futsaman yoiquin afiri nicamutiro Diosin imapaiyai cuscan aquin. Ascafia nan ratoran futsan Diosihuunshon ahuun tsain yoiaiton nantifi Jesús icoinra huafoan nicatirofo Diosin noco yoipaiyai cuscan nicasharashu Jesús cuscara shara itirofo.

⁵ Manmain nantifiton nan tsain futsaman Diospan Yoshin Sharahuunshon man yoipainon. Nanscara sharafishu tsoan Diosin tsain mato tapimasharai nancaifin fasi shara finacaiquin. Nantifimain man ascapainon. Ratoran futsa nan tsain futsaman yoiaiton. Ascashon ichananshon futsan mato tsain futsanman yoifaitocai man nicatiroma futsan mato yoiyamaiton. Acai ahuama. Ascfiaiton yoia cuscan futsan tapimaino nantifi unimatirofo. Diosihuunoa shinancani.

⁶ Ascacun uhuun yoramishtichin un matoqui nocoshon tsain futsaman un mato yoia cuscan man nicayamacai acai matona ahua itiro. Ascacun Diosihuunshon un mato tsaincoimain un mato yoi Diosin mato yoipaiyai cuscan man nicanon. Maton tsainman un mato tapimanaiton man nicacointiro. Ascashon Diosin mato imapaiyai cuscan man tapitiro.

⁷ Un iscara mato tapimai. Manuti amaquiri manuaition non nicasharatiroma ratocaimain shafacafi manuicai.

⁸ Ranushumua futsan aton cushumisiton ahuun manuti manutiro ato chani huaqui afu ranushumua futsafo itisharanonfo ato noicasmaiffoan ato rutunonfoma. Ascafia manuti cayacafi manuyamaiton tsoancai tapitiroma itisharashaquin ato rutunonfoma.

⁹ ¿Nanscarifi aqui nan tsain futsaman man futsafo yoiaion ahuuscashotsi man yoia cuscan tapitirofo? Man ascara tsain yoiqui ipaitsi man ato yoi.

¹⁰ Icon nan maitio tsain futsa futsatapafa. Nantifi tsain shara. Ascafia nan aton caifoansi aton tsain nicacatiro.

¹¹ Ascan uhuun caiffoan ua tsain futsaman yoiaitocai un tapitiroma. Nan uhuun caiffoma cuscaracoin itiro. Un ahuun tsain nicayamaino un ahuun caiffoma cuscaracoin itiro.

¹² Ascacun Diosin Yoshin Sharahuunshon man futsa futsa huaquin mato yonopaiyai cuscan nanfo man fasi fuchipai. Man fuchipaiyai nan man Diosin Yoshin Sharahuunshon icoinra huafo aton ointi fupi huamatiro Jesús fasi tanasharanonfo. Nan cuscarafu fasi fuchipaicahuun Dios yonosharashoshaquin.

¹³ Ascacufin nan tsain futsaman yoiquin Upa Dios cuffihuun man yoia cuscan mafiri tapifain ichananfori ato tapimashquin shafacafi nicasharanonfo.

¹⁴ Ascashon un Upa Dios cufinquin ahuun Yoshin Sharahuunshon nan tsain futsaman uhuun nomuran cuffiaquicai un cuffia cuscan un tapitiroma.

¹⁵ ¿Ascacun unmun ahuuscaicain? Un isca huai. Un tsain futsaman Diospan Yoshin Sharahuunshon Upa cufifain nan tsain nantifiton nicanonfo un cufiaiton. Ascataru un nan tsain futsaman Diospan Yoshin Sharahuunsho urifi fanainshquin. Nan tsain nantifiton nicatirofoanri un fanainshquin.

¹⁶ Man Diospan Yoshin Sharahuunshon nan tsain futsaman Upa Diosihuunoa man yoifaiton ahuuscashocai matofu ichananfoan yoiquin, —Ascainon, —mato huatirofoma nicatsi huacani.

¹⁷ Man Dios, —¡Aichoran! —huasharafiaquicai futsanfo nicasharatirofoma aton ointi unimashquin. Maton tsaintsi nicaifoa.

¹⁸ Uhuun yoramishtichin un Upa Dios aicho huai. Ascashon un yoi, —Upa Diosin, min Yoshin Sharahuunshon tsain futsaman un yoia cuscan atirifiton yoifiaquicai asca huafoma cuscan. Un minhuunshon tsain futsaman un ato finoinnifoa yoimisi, —ishon un Dios yoimisi.

¹⁹ Ascafia icoinra huaa futsafoya ichananshon un aton tsainman ichapamaton ato yoiaiton nicatirofo. Nanscafin sharaquin. Un ato ichapa tsain futsaman yoiaitocai nicatirofoma. Nanscaquin nicafo.

²⁰ Uhuun yoramishtichin, un mato tapimai cuscan tapisharacahuun. Facushtan ahua tapisharataima. Ascashon nanfoan shinain cuscan marifi shinanyamacahuun. Caya-caffi shinanchahuun. Ascafia iyoafoan shinanchacatiro cuscafi facufoan shinanchacayotiro. Nanscashi ato cuscara icahuun. Chaca tapipaiyamacahuun.

²¹ Isaias Diospan tsain cununi isca huaquin,

“Nan Israelifo un ato yoifaiton ua nicacasmamisifo. Ascacun un ato ipaitsicoin yoimisi. Ascaifoa caifo futsafo un ato muran nichishquin uhuun tsain ato yoishquin nicanonfo. Ato yoifiafoancai ua nicayoshcanimaran,”

ishon Diosin yoini cuscan Isaias aqui cununi.

²² Ascashon tsainmanciai a icoinra huaafo non ato yoima Diosin ahuaamishti huatiro cuscan tapinonfo. Ascatamarocon icoinra huamafo non ato yoitiro Diosin ahuaamishti huatiro cuscan huafain tapinonfo. Ascatan ichanancashon futsan aton tsainman Diosin tsain yoiaino nanfin man icoinra huafiansi Diospan Yoshin Sharahuunshon nicasharatirofoquin. Ascan nan icoinra huamafoancai toan nicasharataicanima.

²³ Ascashu ichanancanashu tsain futsa futsatapafoan tsaincafo man icoinra huamafo iyamarai man tapia cuscan tapiataifoma matofu ichanancashon shinantirofo isca huaquin, —¡Ohuashta! Na yorafo nisoncoinforan, —ishon yoitirofo.

²⁴⁻²⁵ Ascafiquin man ichananshon mato tsainman Diosin tsain yoipacuaino icoinra huama futsan iyamarai man tapia cuscan tapiataifoa mato nicacashon shinantirofo isca huaquin. —¡Ohua! Urifi Diosin tsain cununi cuscafi un aama. Diosin nantifi tapicoian. Noco nomuran non ahuarashta fomanpaimisi nanfori Diosin man tapian. Chipo ua puashoshquin, —ishon shinantirofo. Ascashon shinainfono aton nomuran notiro. Nannori shinancatan ratoconun mai chachitiro Upa Dios cufinquin isca huashquin, —Upa Diosin min fasi sharacoin. Min na icoinra huafu fu ica. Urifi mia yopacoinran, —ishon cufitiro.

Man ichanainno nicatimayamacahuun

²⁶ Uhuun yoramishtichin, un mato tapimapai isca huaquin. Man ichanainno futsan mato fanainmafain futsan mato Diosin tsain yosifain futsan Diosin ahuun nomuran yoia cuscan mato tapimafain futsari Diospan Yoshin Sharahuunshon tsain futsaman mato yoia cuscan huafain futsanri Diospan Yoshin Sharahuunshon mato tapimatiro a yoia cuscan huafain. Ascashon nan un yoiai cuscan non nansa huapaitiro nantifi nan ichananfoanno Diosin mato amapaiyai cuscan man huanon. Ascashu a cuscaracoin man inon.

²⁷ Man ichanainno yora rafutan iyamarai rafa non fustifain tsain futsaman mato yoitirofo. Ascaiton nan futsan maton tsain futsan man yoia cuscan huafain futsan maton tsainman mato shafacafi tapimatiro Diosin mato yoipaiyai cuscan man nicasharanon.

²⁸ Nan tsain futsaman man yoipaiqui toan mato tapimayamaino a ichananfo muran-noashu man pusitiro. Ascatan maton pushu anoashu marus fusti nan tsain futsaman man Upa Dios fu tsaintiro.

²⁹ Ichananshon rafutan iyamarai rafa non fustifain Diosin aton nomuran shinanmanai cuscan huaquin mato yoitirofo. A yoiai cuscan nicacashon nan Jesús icoinra huafan shinantirofo isca huaquin, —Diospan Yoshin Sharahuunshon noco yoiaran, —ishon shinanymaraquin. —Afin shinanfain noco yoia. Diosicai anori noco yoiamaran, —ishon shinantirofo.

³⁰ Ascashon futsan mato Diosin tsain yoiaino futsan ahuun nomuran Diospan Yoshin Shara nanumanaino futsan yoiai cuscan tsaoshon nicayotiro. Ascan na yoiquin tau huatan anaitiro futsan acafiri a ichananfo yoinon.

³¹ Asca huacashon fustirasiton Diosin Yoshin Sharapan ato shinanmanai cuscan futsan yoicun futsan yoicun huapatirofo. Nan ichananfoan nantififain tapinonfo. Ascashon aton ointi fupuanonfo.

³² Nan Diosin tsain yoimisiton ato yoipaiyai cuscan man ahuun tsain yoiquin anaitishon afin ahuun nomuran shinantiro isca huaquin, —Natian un ununon. Futsanri Diosin tsain yoipaiquin un manatiro. Aton yoiqui anaitiano unrifi ato yoitiroran, —ishon ahuun nomuran shinantiro.

³³ Ascashu ichanainfo anoshon futsan ahuun tsain chai yoiriaino futsa mato tsain futsaman yoiai cuscan tsoancai mato tapimaima ipaitsi aton ointi fucash huacani. Ascara cai Diosin fuchipaima. Diosin fuchipai nan ichananfo anoshon aton ointi unimanonfo.

³⁴ Ascatan ahuara futsari un mato tapimasharapai. Nantifi icoinra huaa futsafo ichanainfono ainfofo tsaintiroma. Diospan tsain cununi isca huaquin. Nan ichanainfotiancai Diospan tsain futsan yoiainoicaiyainfofo pusitiroma. Tsaintamarocon Diosin tsain yoimisiton yoiai cuscan nicacointiro nan yoiai cuscan aashquin.

³⁵ Nan nica cuscahuunoa yocapaiquin manatiro nan aton pushu ano nocoshon funu yocatiro funun tapimanon. Ascacun ¡Ai timafin! Man ichanaintian man tsaincacai sharama.

³⁶ ¿Nantifi icoinra huaa futsanfoan ichanancashon amisi cuscan marifi man asca huapaimamun? ¿Man shinamun Upa Diosin yoipaiyai cuscan mato fusti tau huaquin tapimani? ¿Ascán manraca marus fusti Diosin tsain mato fusti tapimanamun? Ma. Ascashon amaqiuri shinanyamacahuun.

³⁷ Ratoranfo man futsan yoiquin man isca huatiro, —Non Diospan tsain yoimisi ascayamarai non Diospan Yoshin Sharahuunshon icoinra huaafo non ahuara ashotiroran, —man icun. Nanscarifi aquin man tapitiro nan nafo un mato cunushonai cuscan nocon Ifoan mato yonoi.

³⁸ Tsoan anori shinanpaiyamai afu ipaiyamacahuun.

³⁹ Ascacufin, uhuun yoramishtichin man ichanain anoshon Diosin tsain ato yoipaichahuun. Nan fasi shara. Ascafia futsan tsain futsaman Diospan Yoshin Sharahuunshon mato yoipaiyaiton shatumayamacahuun.

⁴⁰ Ascatan man ichanannoshon futsan yoicun futsan yoicun huacahuun man yoiai cuscan nicasharanonfo. Man asca huaino ato ointi fucash huatirofoma.

15

Cristo nafianishaquin afanan funini

¹⁻² Uhuun yoramishtichin natian tsain shara Jesushuunoa un mato yoimisi cuscan un afanan mato shinanmapai. Un mato Jesushuunoa yoiaino man icoinra huani. Man icoinra huaiton Jesús maton chaca soashona man afu ipanon. Ascan un mato yoini cuscan mancai nan cachiquiri huamisima. Man cachiquiri huashon nanscaquin ipaitsi man icoinra huacana.

³⁻⁷ Diospan tsain yoini cuscan Cristo noco nashoni nocon chaca soashoshquin. Yoiari Cristo osha rafu non fusti maiyoni. Ascatan afanan funini. Funiashu Pedroqui nocoli tauni. Chipo afu rafumisifo docequi noconi. Ascaiyotan chipori quinientos icoinra huafoqui noconi. Ascan natian nantificuana niyoafo. Fustirasi naino. Ascashu chipori Santiagoqui noconi. Ascashu chipo afanan afu rafumisifo doce noconi. Nannori ua tapimani cuscan urifi matori tapimayoni.

⁸ Ascashu ahuun unutani uqui Jesús noconi. Uncai ahuunoa ahua natiatimano afu rafumisi futsafoan icoinra huaquin tauhuanifo. Facu cainyama cuatan caintirofo cuscan un afaiton. Ascashon uncái icoinra huacuanima. Samamashta ua icoinra huamariscatani.

⁹ Icoinra huaa futsafoancai un acai cuscan chaca huacaicaimisifoma. Un Jesús icoinra huafo omitsiscamayopaoni. Un Diospan yorafo chaca huayopaonificacun Jesús uhuun ramapaiquin ua catonni un afu rafumisi inon.

¹⁰ Diosin uhuun ramapaiyaino unrifi un afu rafumisi. Ascashon ua imapaiyai cuscaai un ayamama. Mun aca. Un nanscaquicai ua ipaitsi catonnima. Un ascashu un afu rafumisifoan yonoshonaifo cuscan uncaifin fasi yonoshoshquin finacoinshonaquin. Ascafia ufcái un ahuun yonoshomisi icama. Uhuun ramapaicai ua catonni un ahuun yonoshomisi inon.

¹¹ Ascacun un iyamarai Jesús fu rafumisi futsafo futan nannorisi non mato Jesushuunoa yoimisi. Non mato yoimisi cuscan man icoinra huaa.

Nan naafo funishquiai cuscan

¹² Non mato yoimisi isca huaquin, —Cristo noco nashofianishaquin man afanan funiniran, —ishon non mato yoimisi. ¿Ascán ahuuscaí atirifiton man yoimisimun? —Yora naashu afanan funitromaran, —ishon man yoimisi.

¹³ Yora naashu funiyamanuncái Cristori funicuanama.

¹⁴ Cristo funiyamicun non mato ahuunoa ipaitsi yoicuana. Funiyamicun marifi man ipaitsi icoinra huacuana.

¹⁵ Ascatan Cristo funiyamicun non mato Dioshuunoa paracuamisi. Non yoimisi isca huaquin, —Upan Diosin Furun Jesús funimaniran, —ishon non mato yoimisi. Yora naashu funiyamainocai Cristoricai Upa Diosin funimacuanama.

¹⁶ A naafo funiyamainocai Cristori funicuanama.

¹⁷ Cristo funiyamainocai man ipaitsi man icoinra huacuana. Maton chaca mato soashocuanama.

¹⁸ Ascashu Cristo funiyamainocai nan icoinra huafo nacanashu funocani. Omitsis-capashcaquin.

¹⁹ Nuno mai ano niyoshon non shinanquin isca huamisi, —Un naashu Cristo funini cuscan uari Diosin funimashquiran, —ishon non shinanfiashu iconyamaino non fasi funocuana. Ascashon non ipaitsi icoinra huacuana. Cristo funini iconyamacun tsoanmamishti aca finonmafain nocohuun ramapaitiro.

²⁰ Ascafia anorima. ¡Aicho! Iconcoi Cristo funini. Aafin funi tauniquin afanan nashquima. Ascan nantifi icoinra huafo funitirofo afu ipashcaquin.

²¹⁻²² Ascashon nocofunu Adán Diosin onihuaquin tauhuani. Adán tauhuaquin chaca huani. Ahuun chacahuunooashu nani. Ascan nan nocofunuhuunooashu nantifi napamisifo. Nanscarifiai nan nocofunu Cristohuunooashu nantifi icoinra huafo funitirofo afu nipashcaquin.

²³ Ascashu Cristo funi tauni nipashquin. Afanan mai ano nasoaitian nantifi ahuun yorafo funimashquin afu nipanonfo.

²⁴ Ascainocai ahuara chacafoan afanan noco fucash huatirofoma nantifi cuyopacunaca. Nantianri nantifi Cristo noicasmamisifo yafi Satanás yoshin chacafoan aton niaifo non nantifi yoshin chacafo ato omitsiscapanacafo muran potai afanan tsoashta yonononfoma. Ascaiton Criston Apa Dios yoiquin isca huashquin, —Upan, natian min yorafo nantifi min ato yonomatiro. Afanancai tsoan mia nicascamapacunacama. Ato iquipacahuun, —ishon Criston Apa yoishquin.

²⁵ Ascashon Criston nantifi nan noicasmamisifo ato finoaintian afanancai a noicasmamisifocai ahuashta ishcanima. Nantifitsi ato iquiyamaiton.

²⁶ Nan ahuun unutaqui a noicasmamisifo ato namaqui cuyoshquin. Ascashucui afanan tsoa nanacama.

²⁷ Ascacufin Diosin Furun Cristo yononi cuscan nantifi ato iquinon. Apa Dios fusticai Furunmun iquinama. Apahuunshon nantifi ato iquina.

²⁸ Man nansca huatan Furunmun Apa yoishquin isca huaquin, —Upan uarifi mian yonotiroran, —ishon. Ascaiton Apa yoiai cuscan fustisi nicapaicoi. Ascashon Apa Diosin funiton nantifi iquinaquin.

²⁹ ¿Ascashu yora naashu funiyamaifoannocai ahuuscain futsafo atohuunooashu unu muran iquimamumisishaquin? ¿Ascán ahuuscamin huacaniquin? ¿Ascashu yora naafo afanan funinacamanocain ahuuscain futsafoan ato unu muran iquimamisifomun?

³⁰ Ascacun nocohuunooari natian non shinanon. ¿Naafo funiyamainocai ahuuscamin shafatifi Cristohuunooashu non musuni tapiaquin?

³¹ Ascacuri un futsafo matohuunoa yoisharamisi man nocon Ifo Jesucristo tanasharaino. Uhuun yoramishtichin iconcoiua Cristohuunshon shafatifi rutupaicani.

³² Nocofunufu Efeso anoafoanri ua rutucuanifo. Un naashu funiyamaicai un ipaitsi nacuani. Un nuno mai ano niyoai chain Jesús ua imasharai ahua musunicai uqui nocoama. Ascatan un naashu afanan funiyamainocai acai uhuuna ahuama. Non naashu non afanan funinacama non apaiyai cuscan non huanoncahuun. Ascatacai chipo non afanan ahua ahuusca huanacama. Noncai tapiama ahuutian non naimancai. Ascashon futsafoan yoia isca huaquin,

“Non pifain aquí ayafain non Dios shinantama non apaiyai cuscan non nataima non unimanoncahuun,”

ishon shinanfo.

³³ Asca anorimafinquin. Ascashon amaquiri shinanfaiyamacahuun. Tsoa anori shinanfainaifo fu rafuyamacahuun. Yora chacafo fu non rafuaino nocori chaca huamatiro.

³⁴ Man amaquiri shinanmisi cuscan afanan anori shinanyamacahuun. Cayacafi shinancahuun. Chaca huaquin shatucahuun. Timafin man atirifitocai man Dios onan-sharataima. Ascashu man rafipaitiro.

Non naashu afanan non funiaitianmain nocon caya ahuu cuscara ishquicain

³⁵ Ascashon futsanraca yoishquin, —¿Ahuuscashumain man naashu non afanan funi-tiroquin? ¿Afanan funiashurimain ahuu cuscara yoraya non afanan iquicain? —ishon yoicaniraca.

³⁶ Anori yocaino fasi amaquiri shinantiro. Non ushu fana payocoyotiro. Chipu ahuun ushu foaifiahuquin payocoyamashu foaitiro.

³⁷ Non ahua fanaquicai non ahuun cayafoya fanatiroma. Ahuun ushushta fusti non fanatiro.

³⁸ Ascashon non ahuun ushu fanafia Diosin foaimatiro. Afi apaiyai cuscan fana futsa futsatapafo huua. Nanscashori ahuun tashofo yafi ahuun caya cuscarafato ato onihua.

³⁹ Nanscarifiai nocon cayacai yoinaton caya cuscarama. Nocon caya futsa cuscarafato. Yoinana futsa cuscarafono. Puiyafonari futsa cuscarafono. Shiman nafori futsa cuscarafono. Nanscarafosicai Diosin noco onihuanima.

⁴⁰ Nai murannoafon ahuun caya futsa cuscarafono. Nuno mai ano non niyoano nocon cayari sharafiacai nan nai murannoafon nan cuscarama. Nanri fasi sharashta finacoiyain.

⁴¹ Nanscarifiai fari non oshu non fishifori sharashtafiahu ascarafosima.

⁴² Nanscarifiai yorafo naino aton caya payocotirofo. Afanan non funiashuca nocon caya payoconacama. Nanscara sharasi non ipanaca afanancai non nanacama.

⁴³ Nocon caya maiyaino chacacoin ishquin. Ascan non funiaitian sharashtacoin ipanaca. Non nuno mai ano niyoashu non iranmannapacuashu non natiro. Non afanan funiashuca nocon ascara itama mutsisipa shara non ipanaca.

⁴⁴ Non naanocai nocon caya nai murannoafon nan cuscara itiroma. Ascan funiashu norifi Dios fu icafoanri non iishquin. Upa Diosin Yoshin Sharapan nocon caya mutsisimafain noco iquipacusharanaca. Non nuno mai ano niyonon ishon Diosin nocon onihuanima. Ascatan non aqui nocoaitian noco caya futsa cuscara onihuashofain nocon furo yoshin afu ipanon.

⁴⁵ Ascan Diospan tsainhuunoa cunuquin isca huani,

“Nocofunun Adán Diosin onihuaquin tau huani. Ahuun cayaqui Diosin ashain tanaino nocofunun ninacahuani. Arifi ninon,”

ishon. Ascan Cristo arifi Adán cuscarafiacun ahuun Yoshin Sharapan noco nimapacutiro.

⁴⁶ Diosin nocofunun Adán onihuaquin tau huani arifi ninon. Chipu Cristo cainmani ahuun Yoshin Sharahuunshon noco nimanon.

⁴⁷ Diosin nan nocofunun Adán onihuaquin tau huani. Mai mapohuunoa onihuanima. Cristori nocofunufiacun afin nai murannoashu nocoqui fotoni. Tsoancai onihuanima.

⁴⁸ Nantifi nuno mai anoashu non caianshu nocon caya Adán caya cuscarari. Ratoranfoan Jesús arifi Ifo huacanashu nan cuscarari ishcani.

⁴⁹ Non nuno mai anoashu caini non Adán cuscaracoinfo. Ascan Jesucristo nanton Dios icariashu fotoni non a cuscaracoinfo.

⁵⁰ Uhuun yoramishtichin un mato tapimai nonmun ahuuscashquicain. Non noco yora mumacoin Diosin niaifo icano non afu itiroma. Nocon caya paiyocotiro. Ascacufin non na cuscara yora yashuca Dios fu non itiroma.

⁵¹ Tsoancai nicayomisifoma cuscara tsain shara un mato yoi. Tapipaiquin ua nicasharacahuun. Asca noncai atifi naima. Ascafia non nantifi fiananain futsushquin.

⁵² Ascatan non fianananriscashquin. Futso itani cafiscas non fianananriscashquin. Nocon mai cuyoaitian Diospan nai oinmatinon ahuun manuti chaan chaan acaino Jesús icoinra huashu namisifo funiriscatanonfo. Ascashuca afanan nanacafoma. Nantianri nantifi icoinra huafoti fianananriscashquin.

⁵³ Non natian naino nocon caya payocotiro. Ascafia Diosin nocon caya fiananan huashoshquin non afanan naima non afu ipanaca.

⁵⁴ Diospan tsain cununi cuscan iconcain iishquin.

“¡Aicho! Afanancai Diospan yorafo nanacama. Cristohuunoashu non afu ishara-pacutiro,”

ishon cununi.

⁵⁵ Ascashu afanancai ahuaton noco namatiroma. Afanancai non nai omitsiscatiroma.

⁵⁶ Non chaca huamishuunoashu non nai non omitsiscatiro. Noco fiananan huatian-cai afanan non chaca huatiroma. Non afanan chaca huayamafain nonricai afanan nashquima. Diospan tsainhuunshon non tapitiro non chaca huamisi. Ascantan non fianananshu Jesús cuscara shara non ishquin afanancai non chaca huatiroma. Diospan tsain afanan noco yoishquima isca huaquin, —Min chaca huaracai, —afanan noco huashquima.

⁵⁷ Noco asca huaiton non yoitiro, —¡Aicho! Upa Diosin, nocon Ifo Jesucristohuunshon nocon chaca non shatutiro a cuscara shara ishquin. Ascashuca afanan non nanacama, —ishon non yoitiro.

⁵⁸ Ascacun uhuun yoramishtichin futsa huaquin shinanyamacahuun. Diosin noco imapaiyai cuscan nan fusti shinansharacahuun. Jesús tanasharacahuun. Nocon Ifo Jesús yonoshosharafaincahuun. Man man tapia nocon Ifo futan yonoicai ipaitsi non yonoshotiroma.

16

Nan icoinra huafoan pui ichanan huashon icoinra huaa futsafo fomani

¹ Natian ahudara futsanhuunooa un mato yoi. Diospan yorafo Jerusalén anoafo ahuuoma. Atohuun ramapaiquin man ato inansharapai. Ascan nan icoinra huafo Galacia anoafo un ato yoi cuscan marifi nanscarifi acahuun.

² Yonoshon ahuun rafanan pui fishon nan man fia cuscan ahuutiran Domingotifin ichananti muranshon pui huafafaincahuun. Chipo un Jerusalén ano nocoshon nan pui un ato foshotiro man ato inanon. Diosin mato inan cuscan atirifi inancahuun. Mato ichapamari inancun atirifi ichapamari man inantiro. Ascan mato ichapa inancun parata-mari inancahuun. Ua manaquima pui ichahuafafaincahuun. Asca huafafainshocai un nocoaino man afanan fipaitiroma.

³ Ascashon mafin nocofunu sharafo catoncahuun aya pui fomashcaquin. Ascan un matoqui nocoshon uficoín un ato cunushoshquin man ato foshotanon. Ascano Jerusalén anoafoan man tapinon tsoan puimain mato foshoofoquin.

⁴ Diosin ua nichipaiyai nocon nocofunufu man catoanfo unfu fotirofo.

Pablon cahuacacainna cuscan ato tapimani

⁵ Macedonia finonfaini cai un matoqui Galacia ano nocoicai.

⁶ Itsairaca un matofu iyotiro. Ascayamarai uraca oipacutian un mato muran iyonon. Ascashon un caiton un aya catanon un yopai cuscan man ua inanqui futsanon. Ascatan man ua nichian un casharanon.

⁷ Un mato atsamaiyofainnicai. Diosin ua nitumayopaiyai un matofu iyotiro.

⁸ Ascafia un nuno Efeso ano iyoí nan nocon fuyamisi ahuun anu Pentecostés icaitian.

⁹ Nunoa yorafoan nocon Ifohuunooa nicapaicani. Ascacun un nunoshon nocon Ifohuunooa yoisharai yoi. Ascano icoinra huanonfo. Un ascafiaton nantianri atirifiton ua shatunapaicani un Jesushuunooa yoinonma.

¹⁰ Ascano un nocon Ifo yonoshona cuscan arifi Timoteo yonoshona. Ascan matoqui nocoaiton cushusharacahuun. Nocoaino aqui unimacahuun. Man ascaiton tapinon a man fuchipaiyai.

¹¹ —Acai ahuamaran, —huayamacahuun. Caiton nichisharacahuun unimai uqui nocon. Icoínra huaa futsafo fu uqui nocoyoi. Un afanan atofu rafusharanon.

¹² Ascatari natian nocon yorahuan Apoloshuunooa un mato yoi. Un yoi isca huaquin —Corinto anoafo oinyotahuun, —un Apolos huamisi. Ascafia ua yoimisi, —Un natian cayotiroma. Diosin ua nichipaiyai un catiroran, —ishon ua yoi.

Pablonun ahuun tsain unutaquin Corinto anoafo ato tsain fomani

¹³ Oinfain. Jesús shinanfafaicahuun chaca huacaquima. Nocon Ifo icoinra huacahuun. Cachiquiri huayamacahuun. Jesús icoinra huashu ahudara ahuusara afaiton oincani ratuyamacahuun. Diosihuunooashu fupuinifoancahuun.

¹⁴ Ahuarafo man acai cuscan nanfohuun noiquin ashosharacahuun.

¹⁵⁻¹⁶ Estéfanas ahuun yorafo Grecia mai anoafoan Jesús icoinra huaquin taucoín huanifo. Man manfin ato oinmisiquin. Man man tapia nanfoan Diosin ahuun yorafo shara huamisifo. Nan cuscarafa nicasharacahuun. Nan atofu yonoafori nicasharacahuun.

¹⁷ Un fasi unimacoin Estéfanas non Fortunato non Acaico afo uqui nocoafono. Mancai ashotiroma man fasi chaicoín ica. Man ua ashotiroma cuscan nan rafu non fustifain ua ashoanfo.

¹⁸ Nan rafu non fustifain uhuun ointi ua fupumafo. Maton ointi man fupuca cuscan uari fupumafo. Ascatan atohuunooa yoisharacahuun.

¹⁹ Nan Jesús icoinra huafo ichananmisifo Asia anoafoan mato yoisharapaicani. Nocon Ifohuunshon Aquila futan ahuin Priscila mato yoisharapaicani. Fasi mato shinancani. Aton pushu muran atofu ichananfoanri mato yoisharapaicani.

²⁰ Nantifi icoinra huafo ufu nunoafoan mato yoisharapaicani. Ascacun yoinonnansharacahuun.

²¹ Unfin Pabloquin uhuun tsain unutaquin rafushtacoín uhuun mucucoinnin un mato cunushoni man tapinon unfincoín un mato yoisharashquin.

²² Tsoan nocon Ifo noiyamashon afin shinantiro, —Ufin un apaiyai cuscan un aicai. Ua Diosin amapaiyai cuscan nanscanonquin, —ishon shinantirofo. Nanscarafa Diosin ato onaintimainon. Omitsiscapanacafo muran potashquin.

Ifo Jesús nocoqui ohuu.

²³Nocon Ifo Jesús matohuun noiai cuscan mafi rananri man noinanpainon.

²⁴Un nocon Ifo Jesucristohuunshon un nantifi matohuun noi. Nanscasi ipanon. Amen.
Nanti.

Pablo

Pablonun Corinto Anoafu Afanan Cunu Fomani

Pablonun Corinto anoafu yoisharani

¹ Uhuun yoramishtichin un mato cunu fomai man tapinon. No futan Jesús tanamisi Timoteo futan un mato cunu fomai. Upan Diosin ua catonpaiquin ua catonni ahuun tsain Jesucristohuunua un ato yoifoanfafainon. Un Jesucristo fu rafumisi. Nantori ua nichini.

Icoinra huafu Corinto anoafu yafi Diospan yorafo Acaya mai anoafori un mato nantifi yoisharai.

² Nocon Upa Diosin futan nocon Ifo Jesucristo matohuun ramapaicain maton ointi unimamanon.

Pablon omitsiscani cuscan

³⁻⁴ Non Upa Dios yoisharanon. Isca huaquin, —Upa Diosin, min noco shara huafafaini. ¡Aichoran! —ishon non Upa yoinon. Nanfin nocon Ifo Jesucristo apaquin. Nanrifi nocohuun ramapai. Non omitsiscafiaiton nocon nomuran shinanmasharatiro. Ascan non mua cuscan huafain futsa omitsiscaiton non ahuun ramapaquin ahuun nomuran non shinanmasharatiro. Ahuara futsan omitsiscamai cuscan non yoisharatiro ahuun nomuran shinanmasharanon.

⁵ Nocon Ifon Cristo no fu rafuano nan omitsiscani cuscan norifi non omitsiscatirofiashu nanton nocon nomuran noco shinanmasharatiro.

⁶ Ascacun non mato yoisharapai nocon Ifo Jesús icoinra huashu afu ipanon. Ascacufin noco omitsiscamafiaifoan noco Ifo Jesús nocon nomuran shinanmasharatiro. Man manfin oinquin Diosin nocon nomuran shinanmasharamisi. Ascacun man man oian nocon nomuran non shinansharaiton. Nanscacun norifi non maton nomuran shinanmascioian. Ascan non omitsisca cuscan marifi man omitsiscafiaquin man funaquima tunucoian.

⁷ Man non tapia non omitsisca cuscan marifi man nofu omitsiscafiaiton Upa Diosin nocon nomuran shinanmashara cuscan matona shara huua man shinansharanon. Ascan non matohuunua shinanmisi cuscan nannoricoin. Man omitsiscafiaquin tunuaiton maton nomuran shinanmashara.

⁸⁻⁹ Uhuun yoramishtichin non Asia mai anoashu omitsisca cuscan un mato yoi man tapinon. Nocon ointi fasi ihuu ica. —Noncai tunutiroma. Non omitsiscai nairan, —ishon nocon nomuran non shinanni. —Nofincai non numatiroma. Upa Diosin fustitofin noco numatiroquin. Nantofin yora nacoinna funimatiroquin, —ishon nocon nomuran non shinanni.

¹⁰⁻¹¹ Ascashu non fasi omitsiscai nacuafiaiton Upa Diosin noco numani. Afananri noco numashqui. Man non icoinra huacun noco numafafainshquin. Noco nansca huaino icoinra huua futsafoan nocohuunua shinanquin isca huashcani, —¡Aicho! Upa Diosin, min Pablo yafi afu rafumisifo min nica ato numashqui. Min fasi sharacoinran, —ishon ichapafu Upa Dios cufishcani.

Pablon shinan futsashu Corinto ano canima

¹² Man non tapia manifoti iconcain yoimisishaquin nocon nomuran non unimacoinni. Non mato murannoashu isharacoinmisi. Non Dioshuunua a cuscara sharacoin non imisi. Noncai mato paramisima. Icon fusti non mato yoimisi. Icoinra huamafoan shinanmisi cuscaai non mato ismamisima. Upa Diosin noco shinanmashara cuscan huafain non mato oinmana.

¹³⁻¹⁴ Un mato cayacafi icon fusti cunushomisi. Un mato cunushona cuscan nannoricoin. Uhuun tsaincai rafuma. Mancai uhuunua atiriffain tapisharataima. Ascashion chipo ua onanconshon man ua shinansharapainon. Ascatan nocon Ifo Jesús nocoaitan man yoitiro isca huaquin, —¡Aicho! Pablonun noco shara huamisiran, —ishon man yoitiro. Nanscarifi aqui un matohuunua nantianri yoisharashquin.

¹⁵⁻¹⁶ Un shinan man ua icoinra huaishafain Jesús ua nichini un mato tapimananon. Ascashon un shinanquin isca huani, —Un Macedonia ano un caitian un mato ano mapuyoshquin afanan un mato yoisharashquin maton ointi man unimamanon. Ascatan afanan Macedonia anoashu un nasoaitian afanan u mato ano maputiro matofu iyoshquin. Chipo ua Judea ano nichitiroforan, —ishon un shinanni.

¹⁷ Nannori un shinanfiacun man shinanquiraca isca huua, —¿Pablonun nannori shinanfiashu asca ahuuscai noco icon yoiashuma oamamun? Noco ahuaa yoiashu ahuun nomuran man shinan futsashon ahuaa huatiro. Icoinra huamafoan noco fomani cuscan arifi nanscarifi huaquin noco fomani. Ointi rananyaran, —ishonraca man uhuunua shinan.

¹⁸ Ascacun anorimafinquin. Man Upa Dios icoinra huaa cuscarifi un mato yoimisi cuscan man icoinra huatiro. Uhuun tsaincai rafuma. Un mato yoimisi cuscan cayacaficoín. Ahuacai un mato parayomisima. Uricai ointi rananyama.

¹⁹ Timoteo yafi Silas futan un mato Jesucristo Diospan Furunhuunoa un mato yoimisi. Nanton tsaincai rafuma. Ahuun tsain cayacaficoín. Icon fusti.

²⁰ Upa Diosin noco yoiyotiani cuscan nantifi Cristo man noco ashomisi. Ascacun non nantifi yoimisi isca huaquin, —Non Jesús icoinra huashon. Noco yoia cuscan aquin non yoitiro. ¡Aicho! Nocon Ifo fasi sharacoinran, —ishon non yoimisi.

²¹ Ascatarifi Upa Diosin mato yafi ua mutsismána non Cristo tanasharanon. Ahuun Yoshin Shara noco ya rafumána.

²² Ratoran futsan aton mafohuun aton anu nutatirofo nanfo ahuunacun futsan tapinon. Nanscarifi aqui Upa Diosin ahuun Yoshin Shara noco ya rafumacun nanhuunshon yora futsafoan noco ointirofo non ahuun yorafocun. Nanmain nocon Ifocun. Noco yoiyotiani cuscan ahuun Yoshin Shara noco ya rafumaquin tau huani. Ascacufin non tapitiroquin ahuaara futsa noco yoiyotiani cuscan iconcoin noco inanshquin.

²³ Ascacun man tapitiro Upa Diosin iconmisiquin. Nanscacun urifi un Diosin oinmaticun man tapitiro un mato icon yoimisi. Un mato yoiamua cuscan mato ari un capaifiain un cataima. Upa Diosin ua onancoiánton un iconyamacun ua onaintimatiro. Un mato ari cacuana. Ascafia un shinan, —Un ato ari cashon un fasi ato asca huatiro, —ishon un shinan. Ascashon un mato ointi ihuumapaima un mato ari caama.

²⁴ Un mato asca huapaitama urocon mato unimamapaisharai. Uncai maton ifo ipaima man mantsi a icoinra huayamacun. Icoinra huashon man man Jesús tanashara. Ascacun un mato futan Jesús yonoshopai man mimacai unimanon.

2

¹⁻² Ascacun uhuun nomuran shinanquin un isca huayamua, —Un Corinto ari capaifiain un caima. Un cashon, “Man chaca huai cuscan shatucahuun,” ishon un ato yoiquicai un ato unimamatiroma unrocon aton ointi ihuumatiroan, —ishon un shinanyamua. ¿Un maton ointi ihuumaiton tsoan futsancaimun ua unimamatiro? Marus fusti Corinto anofoan man ua unimamatiroquin. Ascafia un mato ointi un ihuumaiton tsoa futsacai ua unimamatiroma.

³ Ascacun un mato cunushonai cuscan un matoqui nocoataima man chaca shatunon man afanan uhuun ointi ihuumanonma. Man ua noiquicai uhuun ointi man ihuumaima uarocon man unimamatiro. Iconcoinquin un shinan, —Un unimaino marifi man unimamatiroquin, —ishon un shinan.

⁴ Un mato cunushonaino un muyamua uhuun ointi fasi ihuucuin. Uaiyanan un mato cunushoni. Ucai maton ointi ihuumapainima. Ascatama un mato cunushoni un fasi matohuun noicoiain cuscan man tapinon.

Tsoan noco chaca huaiton non rau huatiro

⁵ Nan nocofunun chaca huatocai ua fusti uhuun ointi ua ihuunmanama. Nantifi man icoinra huafoti matori mimacai maton ointi ihuumana. Ascafia uncai nan nocofunu onaintimaquin finapaima.

⁶ Ascafia man nantificuanaton man tapipaima nan nocofunun a chaca huaa cuscan. Nanscacun man man onaintima. Nanscanon. Man man acaquin.

⁷ Ascatan man aca cuscan afanan huacaquima rau huacahuun. Ascashon yoisharacahuun. Ahuun ointi unimamashaquin afanan omitsiscanonma. Man yoisharayamaino afanan fasi ahuun nomuran omitsiscacai finacaitiro afanancai shinansharatiroma.

⁸ Ascashon un mato yoiai cuscan ua nicasharacahuun. —Non mia noicoiran, —ishon afanan yoicahuun tapinon.

⁹ Nantifi un mato cunufoma cuscamin ua nicacoincai. Tapishquin un mato cunu fomayamua.

¹⁰ Man futsa rau huacun unrifi un nan rau huatiroquin. Ua nantori chaca huaiton Cristohuunshon urifi un rau huatiro. Un asca huaino marifi man unimanon.

¹¹ Non ascainocai Satanás noco fuparatiroma. Ascatan non asca huayamaino nocohuunoashu nan nocofunu funoi omitsiscacuana. Satanás noco amaquiri shinanmapai nan nocofunu rau huanonma. Non rau huayamaino fasi omitsiscatiro.

Pablo pushurasi Troas ano nocofiashon ahuun ointi unimanima

¹² Ascan un mato uhuunoa afanan tapimai. Un pushurasi Troas ano tsain shara Cristohuunoa ato yoicai un cani. Ahuunoa nicapaicoinnifo. Ascano nocon Ifoan nanno ua atoqui nichini un ato yoinon.

¹³ Ascafia non futan Jesús icoinra huaa noco yora Titocai anoa un fuchinima. Fuchiya-mashu uhuun ointi un unimanima. Ascashon un fasi shinanni. Ascatan, —Mun cairan, —ishon Troas anoa icoinra huafo un ato yoita oi Macedonia ano un noconi.

Cristohuunshon non nantifi finontiro

¹⁴ ¡Aicho! Upa Diosin, mihuushocai ahuafoan noco shatumatiroma min noco amapayai cuscan non anon. Un shinanfiaguin uhuun nomuran un shinanni Upa Diosin noco iyofanainai cuscan non Cristo fu rafumisi. Ascatan Jesús noco Ifono ahuun curushhuunoashu non ishataro futsafori ahuunoa yoishquin. Ascashon nocohuunshon manifotifain nocon Ifo Cristo onantirofo.

¹⁵ Upa Diosin nocohuunoa shinanquin isca huaa, —Nafu uhuun facu Cristo cuscarafu. Ascashon nanfohuunshon uhuun facu Cristo onantirofoquin, —ishon shinan. Non nantifi Cristohuunoa ato yoimisi. Atiriffain nocon tsain icoinra huaifoan Jesús ato numa Dios fu nipanonfo. Atirifiton icoinra huayamashu funoshcani omitsiscapananacafo muran fooshcani.

¹⁶ Ascashon icoinra huamafoan noco nicaquin yoitirofo isca huaquin, —¡Ohuashta! Nan na tsainmun iconcati non omitsiscapananacafo muran catiro, —ishon shinancani. Ascafia nan icoinra huafoan noco nicaquin yoitirofo isca huaquin, —¡Aicho! Noco yoiaino cuscan non icoinra huashu non Upa Dios fu nipatiroran, —ishon shinancani. ¿Ascacun tsoan Diospan tsain Jesushuunoa futsafo yoisharatiromun?

¹⁷ Futsafoan Diospan tsain yoiahuunshon puisii fipaicani. Ascacan noncai ato cuscarama. Man non tapia non ahuun tsain yoiainon Upa Diosin noco shafacafi oincoin. Nantofin afincoin noco nichiniquin. Ascacan non ahuun tsain yoiquicai non tsoa fuparamisima. Non ato icon fustisi yoimisi.

3

Jesús ato tsain funa yoiyotiani cuscan

¹ ¿Ascacan uhuunoacai un mato isca huaquin shinanmapaima? —Pablo fasi nocofunu shara. Fasi tapishararan, —ishoncai un mato anori shinanmapaimisima. Noncai ato cuscarama. Man manfin noco oinmisiquin non matofu itiani. Ascacan nan cuscaracunucai man nocohuunoa yopaima. ¿Iconmun? Non mato anoashu caitianricai non nan cuscaracunu yopaima futsafo ismashquin.

² Ascacan manfin nocon cunu cuscarafuquin. Ascashufin matohuunoa noco nomuran cunua cuscaracuna. Nantififain oinonfo non mato tapima cuscan man aiton.

³ Ascacun futsafoan mato ointirofo man nan Cristo aficoi cunua cuscarafu. Ascashon mato tapitirofo non mato tapima cuscan Jesús cuscaracuna man inon. Toquiri sapaqui cunuaahuunshoncai ato oinmanama. Maton nomurancai ahuatun cunua. Upa Diosin nipamisiton ahuun Yoshin Sharapan mato imashara nantifiton mato oinonfo.

⁴ Cristohuunshon non Dios icoinra huashon non mato yoiaino cuscacoin man ai.

⁵ Ascashon uncain mato isharamatiroma. Uncain anori shinanmisima. Upa Diosin ahuun curushhuunshon si un futsafo tapimatiroma isharononfo.

⁶ Ahuun curushu noco inanno nan tsain funa Jesucristohuunoashu Dios fu nipatirofo non ato tapimatiroma. Moisés cununi cuscahuunoacai non ato tapimamisima isharononfo. Asca nonfin Diospan Yoshin Sharahuunoashu non ishataroquin. Moisés cununi cuscan fusti tanashu non funotiro. Naashu omitsiscapanacafo muran non catiro. Ascacan Diosin Yoshin Sharapan noco nimapacutiro non afu nipanon.

⁷⁻⁸ Shinancapon. Upa Diosin nocon caifo Israelifo ato yonopayai cuscan toquiri sapaqui ato cunushoni. Ato yononi cuscan nicayamacanashu natirofo omitsiscapashcaquin. Upa Diosin ato yononi cuscan Moisés ato yoiaino Diosinhuunoashu ahuun fuso fasi chashaqui nocon shuni Israelifo ointima huani. Chashafishu funainquimashta nishmapacuni. Ascatan Upa Diosin Moisés yononi cuscan fasi sharashtacoinfashu natianfin ahuun Yoshin Sharapan noco yonoai cuscan fasi finacaia ahuun yono sharashtacoin man noco ismaquin.

⁹ Ascacun Moisés yononi cuscan fasi sharafiacun nicayamacanashu natirofo. Ascacan natian Furun Cristohuunshon nocon chaca soashotiro non afu isharonon. Nan fasi shara finacaia. Ahua futsacai nan cuscaracuna sharama.

¹⁰ Upa Diosinhuunshon Moisés noco yonoquin tau huani cuscan fasi sharashta. Ascafia natiancai nan ahuama. Upa Diosin Jesushuunshon noco ashoni cuscan fasi shara finacaia.

¹¹ Upa Diosinhuunshon Moisés yononi cuscan sharafishu itiashtashtafi man cuyoa. Ascacan Upa Diosin Jesushuunshon noco ashoni cuscaqui cuyopacunacama. Ascacan nan fasi shara finacaia.

¹² Ascacufin man non tapia Upa Diosin Jesushuunoa yoini cuscaqui cuyopacunacama. Ascacun ranotama non Jesushuunoa yorafo yoitiro.

¹³ Moisés ahuun fuso fasi chashatanaino fufopomuni nocon shuni Israelifoan oinonfoma. Ascashu fufopomuaino itiashmashtafi ahuun fuso chashai nishmapacuni. Noncai Moisés cuscarama.

¹⁴ Moisés fufopomuni cuscan uhuun caifofo nanscarafori. Ascashocai Diospan tsain oinsharatirofoma. Cristo fustitofin ato shinanmasharatiroquin afanan fufopomua cuscara inonfoma.

¹⁵ Natianri futsan ato Moisés cununi cuscan yoiaino nan fufopomua cuscarafo. Ato ointi curushu anocai tsoan shinansharatiroma. Ascashon isca huaquin shinancani, —Moisés noco yononi tuscain non Upa Dios fu nipatiroran, —ishon shinancani.

¹⁶ Ascaffa tsoancai natian afanan Moisés cununi cuscan shinantama nocon Ifo icoinra huashon ahuunoa tapisharatiro. Afanan fufopomua cuscara iishquima.

¹⁷ Nanscacufin nocon Ifoan Yoshin Sharapan noco nimapacutiro. Nan nocon Ifoan ahuun Yoshin Shara no fu icanocai ahua futsa nocon ifo itiro ma noco yonoshquin.

¹⁸ Ascan noncai fufopomua cuscarama. Nocon Ifoan tsain non oinsharatiro. Nonfin fuisiti cuscarafoquin. Futsafoan noco oinquin nocon Ifo Jesús fasi shara ointirofo. Ahuun Yoshin Sharapan nocon nomuran noco iquifain nocorifi fiananan huaa non nocon Ifo cuscara shara non inon.

4

¹ Ascashon Upa Diosin nocohuun ramapaiquin noco yononi non ahuun tsain shara Jesucristohuunoa yoifoanfafaion. Non ascaicain nocon ointi ihuu icama.

² Noncai tsoa fomanmisima. Ascara chacafocai non tapipaima. Diosin tsain yoia cuscan fustisi non mato yoimisi. Noncai ahuun tsain amaquri yoimisima. Cayacaficoin non mato yoimisi. Ascan Upa Diosin noco oincoin maton nomuran non nocohuunoa mato shinanmapai isca huaquin, —Diosin tsain cununi cuscan Pablonun nantifi noco cayacaficoin yoimisiran, —ishon mato nomuran non mato shinanmapai.

³ Nan tsain shara Jesushuunoa non yoimisi cuscan tsoan nicapayamainocai nafoan icoinra huafoma. Nanfofin nan fufopomua cuscarafoquin. Ascashu omitsiscapanacafo muran focani.

⁴ Nanfofin yoshin chaca Satanás aton ifoshofin ato yonomisiquin. Ascashon aton nomuran fufopomua cuscara ato huamano tsain shara Jesushuunoa tapinonfoma. Jesús ato oinmapai arifi Apa Dios cuscarafoin icoinra huanonfo. Nan tsain fasi shara iconcoinfacian Satanás ato fusho cuscara huama aton nomuranshonri icoinra huanonfoma.

⁵ Ascan noncai nofiri nocohuunoa non mato yoimisima. Ascatarocon non mato yoimisi Jesucristo maton Ifo inon. Noco Ifocun non ahuun noishon a yonoshsharapai. Ascan nonfin maton oinmati cuscaraqui Cristohuunoa mato tapimashquin. Nannori non mato yoimisi.

⁶ Diosin shafa oni huataima yoiquin isca huani, —Faquishcun shafan inonran, —ishon yononi. Nanscarifiai non Jesús ifoantaimano nocon ointi nan faquish cuscara chaca ipaoni. Ascan Diosin Jesucristohuunshon nocon ointi muran chashamana non ahuunshon tapinon ahuu cuscara sharamainquin.

Non Jesús icoinra huashu non isharatiro

⁷ Nan Diosin sharacoianshu no fu icaquin. Mai cuticai ahuashta ahuun nuama. Samamashta moshifiatiro amuran ahuaa chicoin non nanutiro. Nanscarifiai noncai mutsisipamafia Jesús mutsisipashu no fu rafua. Nanscano Diosin ahuun curushpan futsafo ismati ahuamamishti huatiro cuscan. Ascan nan curushcai noconama ahuuna fustifinquin.

⁸ Ascashon non imisi cuscan natian un mato yoi man tapinon. Noco fucash huafafainfi-aifono non unumisima. Non finoain cuscaai non taplama ahuuscamain non aiquin. Noco asca huafiaifoancai non shinanmisima isca huaquin. —¡Ohuashta! Noncai ahuuscatiroma. Man non funoarancai, —non imisima.

⁹ Noco omitsisca huafiaifoaancai Upa Diosin noco potapacunacama. Noco rutupaifi-aifoanri Upa Diosin noco numa non nanonma.

¹⁰ Jesús niyoano rutupaipaonifo cuscan nocorifi nanscarifi rutupaifafaicani. Non ascaiton nantifiton noco ointirofo Jesús nocon muran ica.

¹¹ Non Jesús yonoshonaiton shafatifi noco rutupaicani. Icon nanscacun non Jesushu-unoashu nai. Non ascaiton ointirofo Jesús ahuun curushhuunoashu non nicun.

¹² Ascacun Jesushuunoa non mato yoiatit futsafoan noco rutupaifaiifoanno non mato yoimisi man icoinra huashu afu nipanon.

¹³ —Un icoinra huai. Ascashon un matori yoiran, —ishon nannori Diospan tsain cununi. Nanscarifi aquí norifi Diosin tsain icoinra huashon non matori yoimisi.

¹⁴ Ascashon man non tapia nocon Ifo Jesús man nafiacun Upan Diosin afanan funimani afu ipanon. Ascacun Apan Jesús funimani cuscan mato yafi nocori funimashquin non afu ipanon.

¹⁵ Nanscacufin norifi non omitsiscacai mato icoinra huamaicain. Man icoinra huashon paratama man tapinon Upa Diosin nocohuun ramapaicain noco numani. Non mato yoiai cuscan tapishon yoitirofo isca huaquin, —¡Aichol Upa Diosin, min noco shara huamisiran, —ishon yoitirofo. Nonsashon Diosihuunoa shinansharatirofo.

¹⁶ Ascacun non omitsiscafiaquicai non shinanchacaima. Nocon Ifocai non cachiquiri huamisima. Icon non isinin ipashu nafaiton nocon Ifoan nocon nomuran fiananan huafafaini ahuun ointi cuscara non inon.

¹⁷ Non natian niyoashu omitsiscacai cuscan fasi curushcoinma. Samamashta finontiro. Ascan non Jesushuunoa omitsiscaiton noco fasi sharacoin imai cuscan tsoancai ascaran shara oinyomisima. Nanfori cuyopacunacama.

¹⁸ Ascano natian noco omitsisca huai cuscan non shinantamarocon nan non oinyomisima cuscara non shinain. Diosin icanoshon noco unimamapacunon non shinain. Ahuaraton noco omitsisca huai cuscan samamashta cuyotiro. Ascan Diosin chipo noco imai cuscan noco unimamai cuscaicai cuyopacunacama.

5

¹ Ascano man non tapia non naashu Diosin noco caya funa onihuai. Iscara un mato tapimai. Pushu shuniaino paon icashu payocotiro. Nanscarifiai nocon caya non naino cuyotiro nocon yoshin afanan amuran itiroma. Asca tsoa futsacai noco caya funa oni huatiroma. Diosin icarishofin caya funa sharacoin afanan noco oni huashoshquin. Nan cayacai cuyopacunacama.

² Natiancai nocon cayari fiananantaima. Nanscacun afohuunoa shinain non shacaina cahuatiro. Ascashon shinanquin non isca huatiro, —¡Ohual Diosin ua imapaiyai cuscaicai un ataima. Un fasi Dios ari capaicoin afanan omitsiscashquima caya funa sharacoin ua onihuanon, —ishon non shinantiro.

³ Non Dios ari nocoashucacai non yoshin fustia ishquima. Diosin noco caya funari noco oni huashoshquin.

⁴ Natian non mai ano niyoashu non omitsiscatiro. Ascafia noncai noco yoshin cayaoma ipaima. Non Jesús ari nocoriscaicai ahuun caya cuscara iishquin. Non niyoano nocon caya isinin itiro. Non naino nocon caya payocoi cuyoshquin. Ascafia Diosin noco caya funa shara chipo noco inanshquin. Nancai cuyopacunacama. Isharapacunaca.

⁵ Upa Diosin noco onihua non afu ipanon. Non caya funa yaitian Jesús cuscaracoin non inon. Noco yoiyotiani cuscan ahuun Yoshin Shara noco inan. Ascashon non tapitiro ahua futsafori noco yoiyotiani cuscan noco chipo inanshquin.

⁶ Nanscacufin non shinansharafafaini non nuno mai ano niyoashu nocon Ifo Jesús icari non nocoatima. Nan man non tapia.

⁷ Icon Jesús icano non oiantaimafiaquin nuno mai anoshon non icoinra huafafaini. Ascashon non chipo oinshquin.

⁸ Man non tapia naashu nocon Ifo fu non ipashquin. Nanscaifin sharaquin. Ascacufin non naicain non ratuima.

⁹ Ascano nuno mai ano non niyoashu iyamarai Upa Dios icari non nocoaitian nocon Ifoan noco yonopaiyai cuscan non aiton oin nocoqui fasi unimacoishquin. Nanfin non fasi ashopaicai. Non asca huashoaiton oinfin nocon Ifo nocoqui unimaiquin. Nanquiri fustisi non shinain.

¹⁰ Ascan nan non icoinra huafoti Cristoqui non nocoshquin. Nantianri noco yoipacushquin non mai ano niyoshon shara huayamaraquinmain non chaca huamisiquin. Non ahua shara huamiscun ahua shara sharacoin noco inanshquin. Asca non ahuarashta chaca huamiscun ahua shara noco inanpaifiaquicai noco inantiroma. Ascashu funoshcaini.

Cristohuunoa non Dios fu rafutiro

¹¹ Ascacun Diosin noco yonoa cuscan non ayamashu non ratutiro. Ascatan futsafori non yoipai Diosin ato yonoa cuscan anonfo. Diosin noco onancoian nonmain cayacafi yoiaitofin. Noncai tsoa futsa fuparapaima. Marifi man man noco onancoian. Nonricai mato paramisima. Nocon tsain cayacafi fusti. Manmain nocohuunoa maton nomuran nannorifosi shinanpainon.

¹² Ascan noncai afanan mato shinanmapaima isca huaquin, —Pablo yafi afu yonoafo fasi sharaforan, —ishoncai non mato nocohuunoa yoimapaicai. Non mato cayacafi fusti yoimisi. Man man tapia. Futsafoancai mato yoicoianma. Mato fuparapaicani. Mato yoia cuscaicai amisifoma. Ascashon aton nomuran shinanchacamisifo. Cacapaicamisifo. Nonfin

mato icon fusti yoimisiquin. Ascan man man noco onancoinmisi man nocohuuri noiquin man ato nocohuunoo yoisharatiro.

¹³ Icon Dios noiquifin un curushcai yonoshofanfafainmisiquin ahuunoo futsafoan shinansharanonfo.

Ascan futsafoan nocohuunoo yoiäfo isca huaquin, –Pablon yafi afu yonoäfo nison cuscaraforan, –ishon nocohuunoo yoiäfo. Man manfin tapiaquin non matohuun noiquin cayacaficoïn shinanfain non Diosin tsain mato yoimisiquin marifi man cayacafi shinanon.

¹⁴⁻¹⁵ Cristo nocohuun noiquin noco yonoi non ahuun tsain shara mato yoinon. Cristo nantifi yoräfohuunoashu naani. Ascashu nantifi non afu nai cafiscäi afanan non ipaoni cuscan aashquima. Cristo nafiashu afanan nocohuunoashu noco noi funinaca huani. Norifi naashu ahuunoashu non afanan funitiro a cuscara iishquin. Ascan nofin non apaiyai cuscan fustisicäi afanan non shinantiroma. Cristo noco amapaiyai cuscan nan fusti non shinantiro nocoqui unimanon. Nanfo non icoinra huamisi.

¹⁶ Ascacufin icoinra huamafoan futsafohuunoo shinainfo cuscacai un afanan atohuunoo anori shinanpacunacama. Unri anori shinanpaonifiashucaï un afanan ascapacunacama. Cristohuunooari un amaquri shinanpaoni. Uncai afanan ahuunoo anori shinainma.

¹⁷ Ratoran Cristo Ifohuaashu afin fiananancoian yora funacoin ishquin. Ipaoni cuscacai afanan aimä. Nantian Cristo ahuun nomuran afanan funacoin cuscara huai.

¹⁸ Ascano Upa Diosin Cristohuunshon noco fiananan huää afanan non noicasmanonma. Ascan natian Cristohuunoashu non ahuun yorafo inon. Ascatan noco yonoa norifi ahuunshon yorafo yoiquin isca huanon, –Cristo Ifo huacahuun. Afanan Diosimaqui iyamacahuun ahuun yorafo iishcaquin, –ishon non yoitiro.

¹⁹ Upa Diosin Cristohuunshon afanan nantifi yorafo a ya rafumapai afanan amaqui inonfoma. Cristo noco nashoniano Upa Diosin nocon chaca afanan shinainma. Nocon chaca soashona non afu ipanon. Upa Diosin noco yonoa cuscan nannoricoin non mato yoimisi.

²⁰ Nanscacun Cristo noco nichini non ahuun tsain mato yoinon. Non ahuun tsain mato yoiquifin nan Upa Diosicoinin mato yoiä huaquin. Upa Diosifin nocohuunshon mato yoiquin. Cristo mato yoipaiyai cuscari non mato yoi. Ascacun noco nicacoincapun. Cristo mato nashoni chacafo mato soashoshquin. Ascacun maton chaca shatucahuun afanan Upa Dios fu rafushcaquin.

²¹ Cristocai ahua chaca huayamafiamisicun Apa Diosin nocon chacafo amuran cuy-oimani. Ascan ahuunoashu nan cuscara shara non inon.

6

¹ Ascashon non Dios fu yonoi mato shara huamashquin. Nanscacun nicacoincahuun. Diosin matohuun ramapai. Cristohuunshon man maton chaca soashoni a cuscara shara inon. Diosin matohuun noicoïnfiäiton potayamacahuun funoshcaquima.

² Nan Diosin tsain yoimisi Isaiäs ahuun tsain inonpacoai cuscan cunuquin isca huani, “‘Noco numahuu,’ ishon man ua yoiä. Un mato nicaïfain un matohuun ramapacai un mato numaran,”

ishon Diosin yoini cuscan Isaiäs inonpacoai cuscan cununi. Ascacun nicasharacahuun. Diosin natian matohuun ramapaiquin. Cristohuunshon mato numanon. Natian nicasharacahuun.

³ Noncäi tosan chaca ismamisima Diosin noco yonomapaiyai cuscan shinanchacanonfoma.

⁴ Ascatarocon non nantifi Dioshuunshon non äca cuscan huafain non mato oinmana nonmain ahuun oimatifoshon. Ahuara ahuuscarafäiton non tunucoinmisi. Noco shinanchacamapai noncäi tapiama ahuuscaquimain noco chaca huacanicai. Ascäifäiton non tunucoin.

⁵ Ascashon noco coshafain cunu muran noco iquimafain noco huamisifo nan sinamisifo nocoqui fucashon noco chaca huashcaquin nanscamisifoquin. Ascan nonrifi curushcain yonoi atanacain yamu ichapa oshayamacai foniyanan non ascamisiquin.

⁶⁻⁷ Noco äsca huafäino chaca huatarocon nocon nomuran non ahua chaca shinainma. Non Cristo fu rafuaiton noco yosimisi cuscan man non tapia. Noco chaca huafäinïfancäi non atoqui sinayamacai funaquima non tunucoinmisi.

Ascashon futsafohuun ramapacain non ato shara huafafainmisi non Diospan Yoshin Sharahuunshon non ato nansca huamisi fuparatama non atohuun noicoïnmisi. Non icon fusti yoimisi. Non Diospan curushhuunshon Jesús yonoshomisi. Non nanfo nansca huafafainquin non mato nantifi ismatiro nonmain Diospan oimatifoshon. Satanäs noco chaca huamapafäiton Upa Diosin ahuun Yoshin Sharapan nan Dios cuscara noco imaino ahuun curushhuunshon non ahuara chacafo potatiro.

⁸ Ascashon futsafoan nocohuunoa tsain shara yoifiaino futsafoan nocohuunoa tsain chaca yoimisifo. Ascan futsafoanrifi, –Pablon nocofunu shararan, –ua huafiainfono futsafoan noco roamisifo. Un iconcoin yoifiamisicun, –Pablofin fuparamitsapaimisiran, –ishon uhuunoa futsafoan yoimisi.

⁹ –Pablocai ahuama. Noncai na nocofunu oinpaima, –ua huafiainfono Diosfin ua onancoinshon ua noiquin. Futsafoan ua namapaiiaifono un nia. Ua rutuquirashquifiacaqui ua tsoan rutucoianma.

¹⁰ Uhuun nomuran un omitsiscafiyai uhuun Ifo Jesushuunoashu un unimamisi. Un ahuuomafiashu un Dioshuunshon futsafo un imasharamisi. Un ahuuoma shinantsa afiai nantifi Diosinari uhuunari.

¹¹ Uhuun yoramishti Corinto anoafaoan uhuun nomuran un muai cuscan un mato tapimamisi. Un mato fomanma. Nantifi uhuun nomuran un muai cuscan mato tapima man tapinon.

¹² Ascacun uncai matoqui ointi mutomisima. Manfin uqui ointi mutomisiquin.

¹³ Nanscacun un mato yoi. Manfin uhuun facu cuscaracoinfoquin. Ascacun uqui ointi mutoyamacapun. Un mato noiai cuscan uari noicapun.

Icoinra huafoma fu rafufafainyamacahuun

¹⁴ Icoinra huafoma fu rafufafainyamacahuun. Sharafoan shinainfo cuscacai chacafoan anorisi shinancanima. Shafa yafi faquishcai osinantirofoma.

¹⁵ Nanscarifiyai Cristo futan Satanascai anorisi shinantirofoma. Cristo icoinra huafoan fuchipaiyaifo cuscacai nan icoinra huamafoan fuchipaicanima.

¹⁶ Cristo icoinra huafoma ichanancashon Upa Dios cuffitirofo. Nantianricai icoinra huamafo atofu ichanantirofoma ahuaa ramihuacashon cufishcaquin. Nan rafucaí ositirofoma. Futsafoancai Upa Dioscoin cuffipacanima. Ascan nonfin Diosin pushu cuscarquin. Nocon Diosfin natian niaquin. Diosin yoini isca huaquin,

“Unfin atofu iquicai. Ato fu rafucacaishquin. Un aton Dios icano. Nanfo uhuun yorafo inonfo.”

¹⁷ Ascano icoinra huamafo icaifo cuscan ayamacahuun. Ato fu rafufafainyamacahuun. Ahua chaca huayamacahuun. Man ascaino un matofu iishquin.

¹⁸ Ascatan un maton Upa inon. Man uhuun facu nocofunufo yafi ainfofo inon,” ishon nocon Ifo Diosin yoini. Nan onihuafoti ato iquinaquin.

7

¹ Uhuun yoramishtichin Upa Diosin noco nannori yoiyotiani cuscan shara. Ascashu non isharanon. Nantifi nocon chaca non shatunon. Ahuarafoan nocon caya iyamarai nocon nomuran noco chaca huamatiro nanfo non shatucoianshu nan cuscara shara non itiro. Non Upa Dios noicoianshu a cuscara shara fusti non ipainon.

Corinto anoafu Jesushuunoashu fiananansharafo cuscan

² Noncai mato chaca huamisima. Ascashori non mato chaca ismamisima marifi man chaca inon. Ahuara matona fipaiquicai non mato fuparamisima. Ascan maton ointinin nocohuunoa shinansharacapun.

³ Uncai nan un mato yoiai cuscan un matoqui tsain chaca huashquin yoimisima. Urocon matohuun noicoín un matofu ipapai nan un naitian. Nannori un mato yoimisi.

⁴ Unfin mato icoinra huaicain nan un mato yoiai cuscatsi man ayamaiton. Un mato-huunoa nantifi yorafo yoisharapai matohuunoa shinansharanonfo. Man uhuun ointi ua fupuashoan. Un omitsiscafiain matohuunoashu un unimacoinni.

⁵ Non Macedonian ano nocoshocai non tununima. Nannoshon noco fasi fucash huanifo. Fochishmanantanacquin. Nocon nomuran non ratucoinni man Jesús tanasharatama man funoaiton oin.

⁶ Ascafia Upan Diosin nan nomuran ihuuaifo aton nomuran shinanmasharatiro. Ascacun noco Tito nichishoni nanton nocon nomuran shinanmasharanon.

⁷ Nocoqui nocoshon nocon nomuran shinanmashara. Noco yoia isca huaquin, –Corintofoan uhuun ointi ua unimamaran, –ishon Titopan noco tapimana. Ascara un nicaquin nocon ointi unima. Noco yoiari man uhuunoa yoia isca huaquin, –Non Pablo fasi noi. Nocoqui samamashta nocopainon. Noco cayacafi cunushoni nanton nocon chaca shatumanon. Ascashori nocon ointi non noco. Icon non chaca huaa. Noncai afanan asca huapaima. Non fasi Pablo shinainran, –ishon man yoia cuscan Titopan ua tapimana. Un nanscara nicaino uhuun ointi fasi finacai unimacoian.

⁸ Un mato cunushona cuscan maton ointi ihuuman. Un mato cunu fomaiqui tau huaa mato ointi ihuu huamapaiquima. Cahuanquisi un mato ointi ihuuman. Ascafia uhuun cunu oinquin man chaca shatua. Ascacun un mato cunu foma cuscaí un ramapaima.

⁹ Maton ointi ihuaiton nicaicain uhuun ointi unimaima. Man Diosqui afanan naiton nicaifin un fasi unimacoianquin. Upa Diosfin maton ointi ihuumana man chaca shatunon. Nanscacoifin man man aqquin. Ascan un mato cunushoni cuscahuunshocai un mato funomanama.

¹⁰ Ascashon non shinanqui isca huai, —jOhua! Un chaca hua cuscan Diosirifi un chaca huaran, —ishon shinanquin non nocon chaca shatupaitiro Upa Diosqui nasoshquin. Non ascaiton Upa Diosin noco numatiro non afu rafupacunon. Ascashocai chipo non shinantiroma isca huaquin, —jOhua! Uhuun chaca un shatuyamashu shara icuana. Un Diosqui nasoyamari shara icuana, —ishoncai non anori shinanpacunacama.

Ascacun icoinra huamafoan non shinain cuscacai tsoan anori shinanfoma. Isca huaquin shinanfo, —jOhua! Un chaca huaran, —ishon shinanfiacaquin aton ointi ihuu itirofiacai Diosquiri shinanpaicanima. Ascashu naashucaí Upa Dios fu nipatirofoma.

¹¹ Ascan mancai ascarama. Shinanapon. Man maton ointi ihuano man Diosqui nasoshon. Shinanqui man isca huaa, —Non fasi Diosqui nasopai afanan a cuscara shara ishquin. Noncai afanan asca huaquin chaca huapaipacunacama. Ratoran no fu ichananmisiton chaca shatucasmai non potayotiro no fu afanan ichanainyononma. Non asca huayamaino Upa Diosin noco noaintimatiro. Norifi Pablo noicoin. Afanan no fu ipainon. Noco cunushoni cuscan ratoran non futsan chaca shatuatima non noaintimatiro chaca shatunon non isharashquin, —ishon man yoia. Ascan afanancai tsoan yoitiro, —Chaca shatuafomaran, —ishon tsoanricai ahua chaca matohuun nutatiroma.

¹² Ascacun man tapitiro uncai nan apa ahuin ahua futsa fu ica nan nocofunuhuunoashu ointi ihuahuunoaricai un mato cunu fomanima. Upa Diosin ahuan ointaifi man nocohuun shinansharamisi. Nanscacun un mato cunushoni man tapinon.

¹³ Man nocohuun shinansharaiton nicaquin uhuun ointi un fupuasharacoinna. Nocon yorahuan Tito arifi matohuunoashu unimacoinyamua. Ascan Tito unimaiton oin norifi non unimacoinyamua.

¹⁴ Ascano Titopan tapia un matohuunoa tsain shara yoiai cuscan iconcain. Un matohuunoa yoiai cuscan nanscacoian man huaa. Mancai ua rafimanama. Nantifi un matohuunoa yoia cuscan iconcain afi tapitiro.

¹⁵ Tito matoqui nocoshon oian man iscaiton, —Titopan noco yoiai cuscan nan Diospan tsain. Non nicacoiannashu non omitsiscatiroran, —ishon man yoia. Yoitimashu man ratua. Man nicacoinpaiyaiton oin Tito matoqui unimacoian. Matohuun noi finacoian.

¹⁶ Urifi un matohuun noicoin. Un natian mato icoinra huacointiro nan un mato yoia cuscan man aiton. Ascano un fasi unimai.

8

—Ahuara ashon futsafori inansharacahuun, —ishon Pablonun Corintofo yoini

¹ Ascan un tsain futsari mato yoi man tapinon. Icoindra huafu Macedonia anoafu Upa Diosin aton nomuran shinanmashara futsafo inansharanonfo.

² Nan ahuuomafo Macedonia anoafu fasi omitsiscafiaquin Diosihuunshon unimacoianquin nan ahuuoma futsafori ato inansharafo.

³ Nan un oian cuscan un mato yoi. Nanfoan futsafo inantiro cuscan paratamacoin ato inancoian. Nanfoanfin inanpaiquin ato inanquin.

⁴ Yoiafo isca huaquin, —Jesús icoinra huaa futsafo yopaifo cuscan non ato inanpai. Ascacun Judea anoafu non ato pui fomaicai noco foshocapun. Non nocon nomuran unimacoianquin non ato inainran, —ishon noco yoinifo.

⁵ Non shinanyamua noco pui fusti inainfoshafain non Judea anoafu foshocanon. Ascaciafai ascara iyamuama. Noco pui inantaifoma ichanancashon noco ointaifi cufiyoyamuafo isca huaquin, —Nocon Ifon, nonfin min yoraquin. Min noco yonopaiyai cuscan min noco yonotiro. Nonfin minaquin, —ishon yoyamuafo. Nannori yoicatan nocori yoyamuafo isca huaquin, —Diosin matohuunshon noco yonopaiyai cuscan noco yonotiro. Norifi non mato nicacointiro, —ishon noco yoyamuafo.

⁶ Titopan tau huaquin mato yoyoni isca huaquin, —Maton puifo ichanan huacahuun ahuuomafo Jerusalén anoafu ato inanshcaquin, —ishon yoyoni.

Ascaiton non Tito yoyamua, —Min yoimisi cuscan afanan ato yoihuu nan ahuuomafo Jerusalén anoafu ato pui inanonfo. Man atohuun noiquin ato man inantiro. Corintofo ato yoihuu, —ishon non Tito yoyamua.

⁷ Man fasi finacaiquifin Jesús icoinra huafain Diospan tsain cayacafi yoifain, ahuan tsain tapisharafain iconcain Jesús yonoshosharafain man nocohuun noishara. Man nanscara sharafo huaa cuscan nanscarifi huaquin nan yopaifori man ato inansharatiro. Diosihuunshon man ato noicoianquin unimacain ato inansharacahuun. Asca huacaquin tapisharacahuun.

⁸ Ufici ai un mato yonoima man ahuuomafo pui inanon. ¿Un tapipai futsafoan ato fasi inanpaiyai cuscan marifi man ato inanpaimun? ¿Tsain fustin ato inainran ishon man yoyimaraquin atohuun noicoinquin man ato inanpaimun?

⁹ Man man tapiari nocon Ifo Jesucriston nai murannoashu mai ano fotoataima nantifi ahuuna ipaoni. Ahuacai yopapaonima. Ascafia nocohuun noicoinquin nantifi ahuunafo potayoni. Ascashu nocohuunoashu ahuuoma iyopaoni non ahuunoashu isharapecunon.

¹⁰ Ascan un shinain un mato shara huapaiyai cuscan nanfohuuonoa un mato yoi man tapinon. Ascan manfin fari fusti finoanquin tsoa futsacai man afanan pui ichanan huashon man ato inantaima. Tau huaquin man ahuuomafo noiquin man ato fasi inanpaicoinquin ato inanqui tau huati.

¹¹ Man tau huaquin unimacoincain ato inanqui tau huati cuscan natianri unimayanan ato inancahuun afanan yopanonfoma. Man inanpaiyai ato inancahuun.

¹² Ascacun man ato paratama inanpaifiaiton man Diosin tapia. Man ascaino matoqui unimai man afanan ayashoma man ato inantiroma. Ahuatsi ato inanshquin.

¹³⁻¹⁴ Uncai mato isca huaquin yoima, —Ato ichapa inancahuunca i un mato huaima. Nanfocai ayaino man yopaitiro, —ishoncai un mato yoima. Ascan natianfin man ichapayaquin. Ascacun yopaifo man ato inantiroquin. Manracafin chipo yopaicain nanfo ichapayashori mato inantirofo. Man ascainfin mafiran an cushunonansharashu man ascatiroquin tsoa futsa yopanonma.

¹⁵ Nannori Diosin tsain cununi isca huaquin, —Ratoran futsan ahuun yono ichapa chitunfiacai tushushotiroma ratoran futsari yopaimain inaintonfin. Ascan futsan ichapama chitufiashocai afanan yopatiromaran, —ishon Diospan tsain cununiquin.

Tito yafi afu rafuafo

¹⁶ Un matohuuonoa shinansharai cuscari Titopan arifi ahuun nomuranshon matohuuonoa shinain. Diosin ahuun nomuran shinanmana cuscan non, —¡Aicho! Upa Diosin min fasi shara min Tito shinanmashararan, —ishon non yoimisi.

¹⁷ Ascashon non yoyimua isca huaquin, —Corintofo afanan ato oinyotahuun ato yoisharashquin, —ishon non Tito yoyimua. Non nannori yoaino fasi unimaiyamua. —¡Aicho! Unfin ato ari caicain. Un ato yoisharapai cairan, —ishon noco yoyimua. Un shinain nocon tsain fustihuunoashucai caima. Afin matoqui capasharai cai.

¹⁸ Ascacun no futan Diosin tanamisi futsan yafi Tito non matoqui nichishquin. Nan nocon yorahuan fasi shara. Jesushuunoa arifi yoipaimisi. Ahuunoa nantifi icoinra huafoan shara yoimisifo.

¹⁹ Nan icoinra huafoti ichanancashon nan nocofunu catonnifo no futan nan pui yopaifo non foshonon. Non ato ismapai pui non ato inain cuscan nocon Ifo shararan huanonfo. Non ato shara huapaiyai cuscan tapinonfo.

²⁰⁻²¹ Nan ahuuomafo non ato pui fomasharapai. Ascacun nantifi yorafoan ointaifi non ato oinmasharapai nocoqui shinanchacanonfoma. Nan pui paratama non foshosharapai. Ascano noco isca huanonfoma, —Nocon pui atirifi noco onuanforan, —inonfoma. Ascano nocon Ifoan ointaifi nantifi yorafoan ointaifiri non ato oinmapai non cayacafi ica cuscan.

²² Ascacun nan nocon yorahuan Jesús tanamisi futsan non mato ari nichishquin. Man nonfin nan nocofunu oinmisiquin fasi Jesús icoinra huacoinnaiton. Noco futan Jesús yonoshosharamisi. Ascashon matohuuonoa nicamisi man Jesús tanasharashon man ahuuomafo inansharaiton. Fasi mato ari capaimisi mato futan ato shara huashquin.

²³ Man manfin Tito onancoianquin. Nantonfin u futan mato yonoshosharamisiquin. U fu rafumisi Jesús yonoshosharashquin. Nan Jesús icoinra huaf futsafori afu mato ari focani. Nan Jesús icoinra huaf ichanancashon ato catonnifo mato ari fononfo. Nan futsafoan ato oinquin yoimisifo, —¡Aicho! Nan na yoran ahuu cuscarain Cristoquin noco oinmana. Atohuunshon man non tapia Cristo fasi shararan, —ishon yoimisifo.

²⁴ Ascacufin matoqui nocoifoan man ato ismatiro man atohuun noicoinquin. Man asca huaino un matohuuonoa yoisharamisi cuscan iconcoin icoinra huafotifain tapitirofo.

9

Icoindra huaf Corinto anofoan nan icoinra huaf futsafo ahuuomafo ato pui fomanifo

¹⁻² Mun tapia Jesús icoinra huaf futsafo yopaifo cuscan man ato inanriscapai. Nannori un Macedonian anofo matohuuonoa yoia isca huaquin, —Corinto anofo fari fusti iquisi itisharafa Jerusalén ano ahuuomafo ato inanshcaquin, —ishon matohuuonoa un ato yoia. Man unimayanan ahuuomafo ato inanpaiyaiton nicacaquin arifi ato inanshquicaniquin. Ascacun mancai uhuun cunu fusti yopaima nan pui yopaifo ato fomashquin.

³ Ascacufin un Tito yafi afu rafuafori matoqui nichishquin un matohuuonoa un yoisharamisi cuscan iconcoin tapinonfo. Uncai matohuuonoa tapinonfo ipaitisi yoimisima.

Un ato yoimisi isca huaquin, —Corinto anoafu man iquisi itisharafo. Man atoqui nocoaiton mato pui inanshani nan ahuuomafo man foshonon, —ishon un matohuunoa ato yoia. Ascacun itisharacahuun maton pui inantaifoma.

⁴ Ascun Macedonia anoafu futsa ipaishoma ufu focaquin non mato oian man pui ichanan huayamacun un mato icoinra huashon un ato yoita cuscan man pui itishara huacuma un matohuun rafipaiyaino marifi man rafipaitiro.

⁵ Nansacun un shinan Tito yafi afu rafua rafu iquisi rufofo un mato ari ato nichiqui tau huai pui ichanan huashon nan ahuuomafo fomashquin iquisi man itishara huanon. Ascun un chipo ufoico un matoqui nocoshon ufu foafoan tapitiro tsoan curushcai mato yonoama man ato pui inanno ishon. Ascutama man ato inanpaisharaquin man ato inan.

⁶ Ascacun ointiaquimayamacahuun. Tsoan fimi ushu fustirasi fana fustirasiri ahuun fimi fitiro. Tsoan ushu ichapa fana yono ichapari fitiro. Nanscarifiai tsoan futsafo ichapama inancun nanrifi Diosin ichapama inanshquin. Ascun tsoan unimaquin ichapa futsa inainton ichapari arifi fitiro.

⁷ Nantifiton aton nomuran shinainfo cuscan huafain futsafo inantirofo. Ascashocai yoitiro ma isca huaquin, —¡Oha! Un paratama inanpaiyamafaiton ua yocariaiton un inain.

Ascun un inanyamaino uqui shinanchacaitiro. Un inain uhuunoa shinanchacanofomaran, —ishon anori shinanyamacahuun. Asca huatama unimayanan inancahuun. Nan futsafo unimayanan inanimisi nanfin Diosin fasi ahuun noiquin.

⁸ Man ascacun nan man yopai cuscan paratama Diosin mato shara futsa futsatapafo inantiro man yopanonma. Futsafo yopai fo cuscan man ato inanon. Diosin nantishon tapiquin mato shara huafafaintiro marifi man ato shara huapanon.

⁹ Diospan tsain cunuquin isca huani,

“Nocofunu sharapan ahuuomafo ichapa inansharamisi. Atohuun ramapaiyai cuscan huafain nan nocofunu huacai Diosin ahuun ointiaquimacpacunacamaran,”

ishon cununi.

¹⁰ Diosin nantifi ushu onihuani. Ascacun yoran ushu fanatiro. Chipa Diosin ahuun yonofu foaimashotiro pisharanon. Nanscarifiai man yopai cuscan Diosin mato inanshquin. Paratama mato inantiro man unimaquin futsafo man shara huafafainon.

¹¹ Icon Diosin mato ichapa inanpacui manri futsafo ichapa inanon. Ascun nan yopai fo man ato inain cuscan non ato fomashquin fasi unimaquin yoiqui isca huashceni, —¡Aicho! Upa Diosin min fasi sharacoinran, —huashceni.

¹² Man ato shara huai cuscan nan ahuuomafoan fiishceni. Ficashon unimacai yoishceni, —¡Aicho! Upa Diosin min noco shara huamisiran, —ishon yoishceni.

¹³ Man ato shara huac cuscan nan ahuuomafo fasi unimashceni man ato inansharano. Ascashon yoiquin isca huashceni, —¡Aicho! Upa Diosin nan noco inanfoan min tsain nicasharacoinceni. “Jesus nocon Iforan,” mia huamisifo. Min ato yonoa cuscan noco inansharafu. Futsafo inanfoan ato inansharamisifo. Ascacunfin noficon man non oian iconcoi min Furun Jesus aton Ifocoinran, —ishon nan ahuuomafoan yoishceni.

¹⁴ Ascun mato Upa Dios cufishoshceni. Man ato Dioshuunshon shara huac cuscan. Ascashon yoiqui isca huashceni, —Upa Diosin, minhuunshon nafoan noco shara huac. ¡Aicho! Upan non fasi atohuun noicoi. Atori shara huahuu, —ishon mato cufishoshceni.

¹⁵ ¡Aicho! Upa Diosin ahuun Furun Jesucristo noco inansharacoinni. Ascashon nocoqui nichini no fu rafupacunon. Afin fasi sharacoinquin. Paratamari ahuunoa yoipaisharafia noncai tapiama ahuuscashomain non yoisharatiroquin.

10

Pablonun ato tapimana Diosihuunshon ato yonoshomisi Jesushuunoa yosishquin

¹ Natian un tsain futsari mato yoisharapai. Uhuun yoramishtichin ua nicasharacapun. Cristocai tsain curushpan noco yoima. Nocoahuun noishon funainquimashta noco yoisharai non ahuun tsain nicasharanon. Nanscarifi agu un Cristohuunshon mato funainquimashta yoisharapai man tapinon. Man atrififain yoiquin isca huamisi, —Pablon no fu icun non oinmisi ahuun tsain shacashta noco yoimisi. Ascafia noco cunushomisi cuscan ascaracaima ratutama cayacaficoi noco curushcain cunushomisan, —ishon uhuunoa yoimisifo.

² Un matoqui nocoshocai curushcai mato yoipaima man ua nicanon.

Atrififoan shinanqui isca huafu, —Pablonun nan icoinra huamafoan shinainfo cuscan noco yoi. Diosin ahuun shinanpacai noco yoiamaran, —ishon yoiafo. Un matoqui nocoshon un ato ismatiro nan icoinra huamafoan shinain cuscacai un mato yoimisima.

Diosin shinain cuscan fusti un mato yoimisi. Nocoshon un ato tsain curushu yoishquin tapinonfo.

³ Icon nuno non mai ano ica. Ascafiashu icoinra huamafoan futsafo finonmapaiyai cuscan noncai asca huamisima noco noicasmaifo finonshquin.

⁴ Nan icoinra huamafo ashi futan piyan rutunancani. Ascan noncai ascara ashi non piya non ahuara futsafoyashon nan noco noicasmaifo yoshin chacafo non unumatiroma. Ascatama Diospan curushhuunshon nan noco chaca shinanmapaiyai non ato cuyotiro.

⁵ Ahuarafoan nocon nomuranshon noco amaquiri shinanmapai non Diospan curushhuunshon non afo potatiro afanan noco anori shinanmanonma. Nanfoanfin Dioshuunoo noco shinanmapaicani. Non mato yosimisi cuscan nicacasmaifo. Nanscarafu no fu fochishmanantanapaicani. Noco Dios onanmapaicani. Cacapaimisifoan Dios finonpaifia non Diosin curushhuunshon nanfo non potatiro afanan ascarafo inonma. Non nocon Ifo cufitiro isca huaquin, —Nocon Ifo Criston, nantifi uhuun shinanpan aton ifo ihuun. Un shinain cuscan mirus fusti ua shinanmahuu un mia tanasharanon, —ishon anori nocon Ifo Cristo non yoitiro.

⁶ Man Jesucristo nicacoishon afanan ahua chaca huayamaino un afanan oaitian nan yoitimafo un ato oinmapacushquin.

⁷ Un mato muran imisi cuscan shinancahuun. Man futsa yoiqui isca huaa, —Pablocai ahuama. Acai mutsisipamaran, —ishon yoiario. Yoiario, —Nonfin Cristo ahuun yorafocoin, —ishon yoiario. Iconquin shinantirofo urifi Cristo yoracoiran.

⁸ Nocon Ifo Jesús ua yononi cuscan un mato yonotiro mato chaca huamatama nocon Ifo un mato tanasharamafain maton ointi fupi huamanon. Un anori mato yoimisiyasihuacai un cacapaimisi itama un mato shara huamapai. Un mato anori yoicai un rafipaiyama.

⁹ Uncai uhuun cunupan mato musumapaima.

¹⁰ Atiriffoan uhuunoo yoiquin isca huafo, —Pablonun nocoqui cunua cuscan fasi shafacafi mutsispacoin. Ascafia afincoin no fu icun man non oinmisi acai ahuama. Ahuun tsain ahuamaran, —ishon uhuunoo yoimisiyo.

¹¹ Nannori uhuunoo yoimisiyofiano un samamashta mato ari cashon uhuunoo un mato tapimashquin. Un mato cunushomisi cuscan nannoricoin un nocoshon un mato yoishquin.

¹² Futsafoan mato yoimisiyo isca huaquin, —Unfin fasi ahuara tapicoianquin. Un mato tapimasharatiroan, —ishon yoimisiyo. Ascarafo ichanancanashu afo ranan yoinancani, —Tsoa futsacai noco cuscara sharama. Norus fusti non tapisharacoianquin, —ishon nan cacapaimisiyo ascamisifo. Nanscashon nanfoan fasi amaquiri chaca shinanmisiyo. Uncai yoitiroa un sharacoin. Ascashu un aton cuscara itiroa.

¹³ Noncai anori yoipaitiroa. Diosin noco yonoa cuscan nan fusti non mato yoitiro. Noco yononi non mato ahuun tsain shara yoinon. Nan fustisi non shinanmisi.

¹⁴ Non yoiario cuscan iconcain. Noncai cacapaimisima. Diosin noco yonoa cuscan nan fustisi non mato yoitiro. Diosin noco yonoqui tau huani non mato ahuun tsain shara Jesucristohuunoo yoinon.

¹⁵ Futsafoan mato yonoa cuscacai, —Non mato yonoaran, —ishon non yoimisiyo. Nonfin mato yoiario nan non mato ashomisi fustihuunoo. Futsafoan mato ashomisihuunooacai non yoimisiyo. Manmain paratamari Jesús icoinra huapainon. Ascan Diosin noco yonoaiton non mato paratama yositiro.

¹⁶ Man nanscaino nan tsain shara Jesucristohuunoo nan chai icafo yoitiro. Nan chai icafo man futsan ato yoianocai un ato yoianan un itiroa. Noncai futsa yono shutipaimisima.

¹⁷ Ascan Diosin tsain cunuquin isca huani, —Ascan man ratoran futsa mafiri yoisharapaitama nocon Ifo Jesushuunooarocon yoisharacahuun, —huani.

¹⁸ Futsan afiri yoisharacai acai ahuama. Ascaiton nocon Ifo Jesús ahuunoo yoisharaino non icoinra huatiro na nocofunu shara imisi.

11

Pablon Jesús fu rafucoinmisi futsafoancai Jesushuunoo tapiamafiacashon ahuunoo futsafo tapimapai

¹ Un mato natian yoi. Nan yoran shinansharayamaiton shinantiro cuscan nannori un mato yoifiaquicai nanscaracoin un yoima. Ascacun man ua nicamisi cuscan natianri ua nicasharacapun.

² Nocofunun ahuin futsa fu icun fasi fashicoitiro. Un Cristo yoiyoni arus fusti maton funu cuscara mato iquinon. Manfin ainfo nocofunu futsa fu imisima cuscaraquin. Cristo fusti mato Ifo itiroan ishon un yoiyoni. Man ascaiyamaino urifi uhuun ointi nocotiro.

³ Ascacun un matohuun musui Satanás Eva parani cuscan futsafoan matorifi maton nomuran parapaicani man Jesús afanan tanasharayamafain Cristo fusti man noionma.

⁴ ¡Ohuashta! Futsafoan samamashta mato parapaicani. Non Jesushuunoo mato yoimisi cuscan futsafoan matoqui nocoshon ahuunoo yoicoianmafiafoan mancai ato shatuma-paitama manrocon ato icoinra huai. Non Diospan Yoshin Sharahuunshon tsain shara Jesushuunoo mato yoimisi cuscan nanfoan yoicoianmafiafoan manfin ato icoinra huaquin. Jesushuunoo amaquiri mato yosifiafoan man ato shatumanama. Man ato nicaquin yoimisi, —¡Aicho! Man nocofu ipainon, —man ato huamisi.

⁵ Ascacufin nanfori afiri yoisharafiai nanfoancai ua finoanfoma. Ascashon mato isca huaquin yoicani, —Diosin noco nichian non mato yosinon, —ishon ifiacashoncai ua finoanfoma.

⁶ ¿Man shinanmun un mato Diosin tsain yoiquin uhuun tsainman mato yoisharatiroma? Ascanfia unfin Diosin tsain tapisharaquin. Nan un mato yoiai cuscan cayacaficoi. Manfin ua onancoianquin. Man man tapian un mato Diosin tsain shafacafi yoimisi. Nanscara un mato ismafaini.

⁷ Un Diosin tsain yoiai chaincai un mato ahuashta yocamisima. Uncai mato ahua fiamisima. Ucai mato pui yocama. Ascan un mato chaca huaraca. Ascafia ascara-caima. Mancai ichananshon nan Diosin tsain yoimisciai man inanqui fuya huamisima. Nanscaracai man tapiatama. Un mato Diospan tsain shara Jesushuunoo yoimisi mato shara huaquin man Diospan facufo inon. Un asca huaquicai un mato ahua yocamisima. ¿Ascan man uhuunoo shinanchacaimun? —Pablocai ahuamaran, —ishon man uhuunoo shinanra.

⁸ Un matofu icai chaincai nan icoinra huafo mani futsa arishon ua inannifo ahuun rafanan un yopai cuscan un finon. Maficairocon man ua inanshara icuana. Ua inanfo rafanan un yopai cuscan un fia aiyashon un mato Diosin tsain yoishquin.

⁹ Un matofu ipaoni chaincai un ahua yopafiaquin un mato fucash huapaonima. Nantianri Macedonian anoai icoinra huafo nocoqui nococashon un yopai cuscan ua inannifo. Un mato ano ica chaincai un tsoa ahua yocamisima. Uncai tsoa ahua yocapacunacama.

¹⁰ Ascacufin un mato Cristohuunshon icon fusti yoimisi. Nanscacun ahuun tsain iconcoi uhuun nomuran un nanua. Tsoa Acaya mai anofoancai un mato yoiai cuscan ua shatumatiroma.

¹¹ ¿Un mato anori yoiquinmun un mato noiama? Ma. Anorimafinquin. Diosin tapian un matohuun noicoi.

¹² Nanscacun un mato yonoshonai chaincai un mato ahua fiapaimisima. Natianricai un mato ahua yocaima. Nanscasi huaquin un mato yonoshoncai nan paramisifo afanan man icoinra huanonma. Nan un yonoai cuscan futsafoan yoimisifo isca huaquin, —Norifi non Pablon yonoai cuscan non yonoiran, —ifiamisifo nanfocai un yonoai cuscan tsoan yonomisima.

¹³ Nanfoan paramisifo. Un icai cuscan apaificanicai tsoa ascacoianfoma. —Cristo noco yonoaran, —ishon mato shinanmapaificani nanfocai Cristo fu rafumisifoma.

¹⁴ Icon Satanás nocoqui nocotiro nan Diosin ahuun oinmati afu nai muran ica shara ointsa. Ascashon yoitiro, —Unfin mato shafacafi yositiroquin, —ishon noco fuparapaitiro.

¹⁵ Ascacun Satanás yonoshomisifori nan cuscara itirofo. Chacafofiacanashu Diospan yora shara ointsa itirofo. —Norifi non Dios yonosharashomisirán, —ishon noco shinanmapaicani. Ascafiafoan ahuun unutaquin Diosin ato onaintimaquin finacoishquin. Nanfoan chaca huacanashu omitsiscapanacafo.

Pablon Jesús fu rafumisi omitsiscani cuscan

¹⁶ Un mato yoia cuscan afanan mato yoinon. —Pablonun ahua tapiamaran, —ishon uhuunoo shinanyamacahuun. Ascafia uhuunoo shinanpaiqui ua nicayocahuun. Nan man yora futsa ahua tapiama man nicatiro cuscan uarifi nicasharayocapun. Ufiri un ichapama yomusharanon.

¹⁷ Un mato yoiai cuscan ufiri un yoimuishara cuscaicai uhuun Ifoan ua yonoama. Un mato yoishquiai cuscan nan ahua tapiamafoan yoimisifo.

¹⁸ Icoinra huamafoan afiri yoimuishara cuscan futsafoanri mato yoimisifo. Ascacun nantian un mato yoi ufiri un yoimuisharai cuscan.

¹⁹ Mafi man shinanmun man tapicoian. Nanscashon nan ahua tapiafoma man ato nicatiro. Mato amaquiri yoifiafoan mancai ato shatumanama.

²⁰ Nan ratoran futsan mato curushcai yonoai cuscan man nicacointiro. Man ahuun oinmatifo cuscaracun mato nanfoan yonoa. Ascashori mato yonocani man ato cushusharanon. Mato fucash huafain mato roamisifo. Mato asca huamisifo.

²¹ Mato asca huariaquin shinanfo racafi, —Nofin mutsisipafuquin, —ishon shinanmisifo. ¡Ohua! Uncai anori shinanmisima. Ascan uncai icaifo cuscan ufiri yoimuisharatiroma. Man shinanracafin un mutsisipamaquin. Nanfoan mato aca cuscacai un mato asca huamisima. Ascacun un raffapaitiro. Ascafia nanfo afiri yoimushara cuscarifai nanfoan mato ahuaa yoiäfo cuscahuunoari ufin un yoimuisharatiro. ¡Ohua! Nan ahua tapiafoma cuscan afanan un mato yoi.

²² ¿Nanfoan yoiäfomun, —Non Hebreo sharafo, —ishon? Unrifi un Hebreoquin. ¿Nanfomun Israelifo? Urifi un Israeliquin. ¿Nanfomun Abraham ahuun funafo? Urifi un ahuun funaquin.

²³ ¿Nanfomun Cristo ahuun oinmatifo? Uncaifin ahuun oinmati shara finacaiquin. ¡Ohua! Un asca huaquin yoipaiyamafiaquin un mato yoiäi cuscan shinancapon. Nan paramisifoan mato yoiquin isca huacani, —Nonfi fasi curushcai Jesús yonoshonaquin, —ishon mato yoiäfo. Uncaifin fasi yonoshoku finacaiquin. Nanfoanraca yoiqui isca huamisifo, —Jesushuunshon noco cunu muran iquimanaforan, —ifiamisifo ucaifin cunu muran iquimaquin finacaimisifoquin. Ucaifin fichin coshaquin finacoinmisifoquin. Ua coshafoticaí un tanan huatiroma. Mun nari nari cuamisí.

²⁴ Uhuun yora Israelifoanfin un mucu fustiti coshaqui huafoquin. Nan ua coshaifotifi ua treinta nueve huafain ua coshamisifoquin.

²⁵ Romanonfoanri ua coshaquin rafu non fusti huaäfo. Ascashon uarifi uhuun caifoan toquirinin tsacaquin fusti huanifo. Shashohuanun non pocufainaino man uqui shashohuan cashcui rafu non fustianino mun asa cuani. Man shashohuan ua ya cashcuano un yamu fusti non shafa fustiri unuhuan naquinoashu un ahuun naoti yatanni asashquima.

²⁶ Un cahuancacainaichain manifoti Jesushuunoa yoishquin nan unu coshicoiain fasi musucoin muran icain ua yomutsofoan achicashon ua musuni tapifain uhuun caifoncoinchí ua musuni tapifain nanscarifi aquin uhuun caifomafaoan ua musuni tapifain. Pushurasifo anoäfoanri ua musuni tapifain tsoan istaipama anoäfoanri ua musuni tapifain unuhuan musuni muran futsafoan yoiquin isca huafo, —Norifi non Jesús Ifo huaran, —ifacashon parafo. Nanfoanri ua musuni tapifain.

²⁷ Un isin muäfain un fasi curushcai yonomisi nan un yamu ichapa osha tunufain un foniyanan nomicain piqui tunufain fasi un matsinacain sahuutiama icain.

²⁸ Ascatarifi nantifi Jesús icoinra huafo ichananti pushu anoshon ahuaa ato fucashni huai cuscan urifi un atohuunshon uhuun ointi nocomisí. Shafatifi un ato shinanmisí.

²⁹ Un nica futsan Jesús tanasharapafifain ratuaino urifi un atohuun ramapaitiro. Nan futsan chaca huacun un ahuunshon urifi mutiro. Futsan futsa chaca huamacun urifi uhuun ointi atohuunshon un nocotiro.

³⁰ Ascan un mato rama yoiä cuscan un afanan yoimuisharainocai, —Un Jesusmaisi ahuaa huatiromaran, —ishon man tapinon. Un omitsiscamisí cuscan un mato yoi.

³¹ Non isca huanon, —Upa Diosin min shararan, —non huapanon. Non nocon Ifo Jesucristo ahuun Apa nannori non yoipacunon. Nantofin man tapiaquin. Uncai mato paraima.

³² Nan pushurasi ahuun anu Damasco ano niafoncoinnin Aretas ahuun niaifo patashari yononi nan pushurasi Damasco ano cushushon ua achinonfo.

³³ Ascacun nan Jesús icoinra huafoan ua futanmanhuan muran onucashon cunu foman cayashon ua fotomanifo un casharanon.

12

Pablon ahuun namapan cuscara Diosin tapimani

¹ Ufin un yoimuisharai. Ascara tsain uhuunoa un yoimuainocai ahuacoinma. Nanscafíacun nocon Ifo Jesús ua oinmana cuscan un mato yoinon. Ascano namapan cuscara ua oinmana. Tsoan nicayomisima cuscararifi ua tapimana. Nannori un mato yoi.

² Catorce fari man finoan Diosin nai muran icano ua ihuiriscatani. Un Cristo fu rafuaiton oinquin ua ihuiriscatani. Uncai tapiama uhuun yoshin fusti nai muran cani iyamarai uhuun cayafoya un caniraca. Diosin fustitofin tapiaquin nan un ini cuscan.

³⁻⁴ Diosin nan icano ua ihuiriscatani. Un mato yoiä cuscan afananri un mato yoi. Uhuun yora mumacoin iyamarai uhuun yoshin fustisimain caniquin uncai tapiama. Diosin fustitofin tapiaquin nan un ini cuscan Diosin icano ua ahuaa nicamani cuscacai un tsoa futsa yoitiro. Ascashon ua yoiquin isca huani, —Un icano min oian cuscan tsoashta yoiamahuu, —ishon ua Diosin yononi.

⁵ Un oian cuscan huafain un futsa yoitiro isca huaquin, —Diosifin ua fusti nan icari ua oinmaniquin, —ishon un yoitiro. Ascafiaucuai un anori yoipaima. Asca huaquin yoiaшу

un cacapaimisi itiro. Uncai ufiri yoimuisharapaima. Uruscái un ahua huatiroma. Unfin Diosinhuunshon un ahua huatiroquin. Nansacufin nan fusti un yoimisi.

⁶ Ufiri un yoimuisharapafin un yoimuitiroquin. Un anori yoiquicai yora tapiamafoan yoitiro cuscan un yoima. Un iconcoín uhuunoo yoisharatiro. Ascafia uncai ufiri yoimuisharapaima uhuunoo shinanquin finacoinnonfoma.

⁷ Upa Diosin icari ua ismani cuscan tsoa futsacai oimnísima. Ascano Diosin shinanni ua oinmanihuunooashu ufiri yoimuisharaino un cacapaimisi itiro. Ascacufin Diosin Satanás nitun huamayamaino yoshin chacan uqui nichini ua fucash huariamisi un cacapaimisi inonma.

⁸ Ascacun un cufinquin isca huani, –Ifon, ua cayahuapun, –ishon un yocaquin rafu non fusti huani.

⁹ Un asca huafiaton nocon Ifoan ua cumaquin isca huani, –Un mihuun noi. Uhuun curushhuunshon nan pau min tunutiro. Un mifu rafucacaini. Nan fusti min yopai. Min mutsisipamafiacun un minhuunshon un ato ismatiro un ahuamamishti huatiroman, –ishon ua cumani. Ascacufin unimaquin un yoifafainicai isca huaquin, –Un mutsisipamafiacun uhuun Ifo ahun curushu ua inantiroran, –ishon un yoishquin. Ascano Cristo ahun curushu ua inantiro.

¹⁰ Ascano un mutsisipamafishu Cristohuunooashu un unimai. Ascashon ua roafain ahua chaca finoin omitsiscamafain ahuafoan ua fucashni huafiaino un unimaquin tunutiro. Un asca huaquifin un mutsisipamafishon Cristohuunshon un ahuamamishti huatiroquin.

Pablonun icoinra huafo Corinto anofo fasi shinanni

¹¹ Nan yora ahua tapiamafoan yoitiro cuscan un mato rama yoia. Un mato anori yoifiafin matohuun nauquin. Asca ufiri yoimuisharatama mancairocon uhuunoo yoisharafin shara icuanaquin. Nan futsafoan mato paran. –Nonfin Jesucristo fu rafumisisharaquin, –ishon mato parafiamisifo man ato icoinra huamisi. Ascán ucaifin man icoinra huaquin fincaitiroquin. Un ahuamafiacucai afoan ua finoncoianfoma.

¹² Un Jesucristo fu rafumisicoínshofin un mato ismamisiquin. Un ahuunshon mato ahua sharafo isma man Jesús icoinra huanon. Un ahuunshon mato isma cuscan yoiafo, –¡Aira! ¡Oincapon! Diosin ahuamamishti huatiroman, –ishon yoimisifo. Ahuunshori ascapainfo un mato isma Diosin ahuamamishti huatiro tapinonfo. Funaquima un afo mato ismacoinmisi.

¹³ ¿Ascán ahuuscaquimun man isca huaquin shinanquin? –Pablonun icoinra huaa futsafo shara huaa cuscacai nocorifi shara huashoanmaran, –ishoncai man uhuunoo yoitiro. Un icoinra huaa futsafo ato shara huashoan cuscan nanscarifi huaquin un mato shara huafafaini. Uncai mato ahua fianpaimisima. Unricai mato fucash huamisima. –Ua pimafain ua sahuumacahuuncai, –un mato huamisima. Ascacun ua rau huacapun.

¹⁴ Munfin mato ano cai rafuaquin. Mun itisharashu natian afanan un mato ari cai. Un amisi cuscacai afanan un mato yocaquin fucash huaima. Uncai matona fipaitama unrocon mato fuchipaicoín. Shinanapon. Facufoancai apa yafi ahua pimamisima. Ascán ahua futan apacaifin aton facufo pimamisiquin. Ascán manfin uhuun facufoinfo cuscaraquin. Ascán uncaifin mato Diospan tsain tapimasharaquin uhuunooashu man isharanon.

¹⁵ Ascancunfin nantifi un ahua ra cuscan un mato inanfan ufiri un inanmú man Jesús tanasharanon. Ascacun un mato noiquin finacoinfiatocai man ua noiquin finacoinma.

¹⁶ Atirifoan uhuunoo yoiquiraca isca huafo, –Icon Pablon noco ahua yocayamafiquin noco paran. Noco ahua fianyamafishon noco fomanran, –ishonraca man yoimisi.

¹⁷ ¿Nan nocofunfo un matoqui nichini nanfohuunshon unmun mato paran maton pui fianshquin?

¹⁸ Un Tito yoini isca huaquin, –Corintofo ano catahuun, –un huani. Noco futan icoinra huaa futsafo un matoqui nichian. ¿Titopamun mato paran matona fianshquin? Ma. Man manfin tapiquin Titopacai matona fianpaimisima. Un matofu imisi cuscan arifi matofu ica. Non nanscara rafu matohuun noiquin. Mato shara huashopai Diospan Yoshin Sharahuunooashu noco rafu non matofu imisi.

¹⁹ –Man shinan raca un mato yoiai cuscan man uhuunoo shinansharanon, –ishon un mato yoi. Ma. Anoricaima. Upa Diosin nan un yoiai cuscafin ua nicaquin Cristo ua yoimai cuscan un mato yoiaiton. Uhuun yoramishtichin nan un mato yoia cuscan un mato shara huapai Jesús shinain cuscan huaquin marifi nannorisi man shinanon.

²⁰ Ascacun un matoqui nocoshon oinpai man chaca shatushon Jesús tanasharanon. Un matoqui nocoshon oian man chaca shatuyamacun uhuun nomuran un omitsiscatiro. Un matoqui chipo nocoaitan manraca fochishmanantanancai futsa finonmapai aqui sinacai samamashta sinacuahuanmisifo icai asca huaquiraca, –Norus fusti tapishara. Tsoa

futsafoancai non tapishara cuscan tapiafomaran, —icain. Nannori yoitiacanashu chaca huatanancain yoiti huatanancain cacapaimisi icain man nannorisi shinanquima. Man nansca huainofin un ratuicain. Man asca huaquin chaca shatuyamashu man ua oinpaiyai cuscacai un ascatiroma. Man uqui unimaquin ua oinpaifiaquin man chaca huaino un matoqui unimatamarocon un fasi mato shinain omitsiscatiro. Man nanscaiton un mato oinmanaquin.

²¹ Man asca huainofin un matoqui nocoaitian un ratuicain. Maton nomuran man ahuafo shinanchacafain maton nomuranshon man chaca huapaiyai cuscan huariaino. Nocofunufao aton ahuinma fu icaifoanno ainfori aton funuma fu icaifoanno. Nanscara chaca futsa futsatapafo huafiain man maton chaca shatuashma Diosiqui man afanan nasoyamaino. Un matoqui nocoshon oian man asca huaino un ratutiro. Maton ointaifi uarifi Diosin matohuunshon ua rafimashquin. Man acai cuscahuunoashu un fasi omitsiscatiro. Ascacun un uaiyanan mato oinmai.

13

Pablonun afanan chaca huanonfoma ishon ahuun unutaquin ato yoini

¹ Mun mato oinqui rafu huaa. Natian un afanan mato oincai. Diospan tsain noco yoiquin isca huani, —Tsoan yoiquin isca huai, “Nanton chaca huaran,” ishon yoiaino. Rafu non fustiton nannorifosi yoiaino iyamarai rafutan nannorisi yoiaino non icoinra huatiro, —ishon Diosin tsain cununi.

² Un matofu iyoshon un mato yoini man chaca huanonma. Natianrifi un afanan mato yoi. Un matoqui nasoshon oian tsoan aton chaca shatucunma un ato oinmashquin. Tsoastacai un finonmashquima.

³ Manraca tapipaicai Criston uhuunshon mato yoiaiton. Iconquifin man tapicai. Man samamashta tapitiro. Un mato shafacafi ismatiro. Uncai mato ipaitsi yoima Cristohuunshon un mato yoi. Cristocai mato fuparanima tapimanama mutsisipacoincain mato tapimai man maton chaca shatunon.

⁴ Icon Cristo nocohuunoashu ihui coyan iquinanqui mastafono nocofunu fupashcoin ini. Nocohuunoashu naicain afin numanima. Nafianishaquin natian Diosin ahuun curushhuunoashu man afanan nia. Nanscarifiai nonricai mutsisipama. Afin omitsiscani norifi omitsiscatirofiashu Cristo mato shara huashoan cuscan norifi Diosin curushhuunshon mato shara huafafaini.

⁵ Ascacun maton nomuranshon shinancahuun. *¿Iconmun man man Jesús icoinra huaa maton chaca shatucoianshu Upa Dios fu ipashcaquin? ¿Man tapicoianmun Jesucristo matofu rafua? ¿Man mumisimun? ¿Man mafiri fuparamuamun? —¿Unfin Jesús ahuun yoracoinquin, —ishon man yoifiashucai man ahuun yoracoinmamun?*

⁶ Man manfin ua oinquin tapiaquin un Cristo ahuun yoracoincun. Nan man icoinra huapainon.

⁷ Un mato Upa Dios cufishomisi man chaca huanonma. Nocohuunoa shinansharanonfo ishoncai un Upa cufimisima. Isca huaquin futsafoan nocohuunoa shinantirofo, —Pablon yafi afu rafuafoancai ato yonoshosharafomaran, —ishon nocohuunoa yoifiacanashu. Ascacun marifi man Jesús tanasharaino fasi sharacoin itiro.

⁸ Noncai ahuaa iconcain shatumatiro. Non asca huapaitamarocon Diospan tsain iconcain non afohuunoa futsafo yoisharapai.

⁹ Ascano non ahuaamaran ishon shinanfacaquin man Jesushuunoashu isharacoiainno non fasi unimacointiro. Ascan non mato Upa Dios mato cufishona man nan cuscara sharacoin inon.

¹⁰ Ascacufin un mato isca huaquin cunushona cuscan. Un matoqui nocoshon oian man Cristo tanasharacoincun un ointoshinon. Ufcoi un mato muran cayamaquin un mato cunushoquin isca huai man nicasharanon. Ascan un matoqui nocoshocai Diospan shinanhuunshocai un mato curushcain yoishquima. Diosicai un mato oimanon ua yonoama. Uroco mato Jesushuunoa shinansharamani.

¹¹ Uhuun tsain unutaqui un mato yoisharapai. Jesús cuscara shara fusti ipaicaahuun. Ua nicasharacapun. Nannorisi shinancahuun. Isharacahuun. Man ascaino Diosin matohuun noicoincain mato imasharanon. Ascashon maton ointi unimamanon matofu ishon.

¹² Nantifi yoinonansharacahuun.

¹³ Nantifi Jesús icoinra huafo ufu icafoan mato yoisharapai.

¹⁴ Nocon Ifo Jesucristo matohuun ramapai. Nocon Diosiri matohuun noicoi. Diospan Yoshin Shara matofu rafupacunon. Nanti.

Pablonun Galacia Anoafu Cunu Fomani

Pablonun Galacia anoafu nan icoinra huafoti cunu fomani

¹ Unquian Pablo un mato cunu fomai. Unfi Jesucristo fu rafumisi. Un mato ari caitocai nocofunufaoan ua nichinifoma Jesucristo futan Apa Diosin ua nichinifo. Man Furun naafiacun Apa Diosin funimani. Nan rafutan ua mato ano nichinifo.

² Nan icoinra huafo nuno ufu icafoan nantififain Jesús icoinra huafo Galacia anoafu mato tsain shara fomai.

³ Un mato fasi shinain. Nocon Upa Diosin futan Furun Jesucristo matohuun ramapai. Maton ointi mato unimamanon.

⁴ Ascacun non chaca huamisihuunoashu Jesús nani noco chaca soashoshquin. Nan maifoti ano yora chacafo muran non ica. Upa Diosin afin apaiyai cuscan nan chacafo muranno natian Jesús noco numai.

⁵ Ascacun, —Dios sharacoinran, —huapanonfo. Amen.

Jesús fustiton noco chaca soashonano ahuunoashu fusti non Upa Dios ari nocotiro

⁶⁻⁷ Ascan Cristo matohuun ramapaiyaino Upa Diosin mato catonni. ¿Upa Diosin mato catonfianicun tsain futsa nicaquin ahuuscain man samamashta Upa Dios potaimun? Nancai Jesucristohuunoa cuscarama. Nanscaracai tsain futsa sharama. ¡Ohua! Man ascaiton nicaí un matohuunshon ointi nocoi. Un shinanraca futsafoan mato amaqiri yoishonafo mato funomashaquin. Nan tsain sharacai Cristohuunoa cayacafi mato yosiafoma.

⁸ Un nan tsain shara mato cayacafi yosimisi. Ascan tsoan mato amaqiri yosiamun un iyamarai ratoran futsan iyamarai Diospan oinmati afu nai muran icaton amaqiri yosiashu omitsiscapanacafu muran fopainonfo.

⁹ Un mato yoimisi cuscan un afanan mato yoi. Un na tsain shara Jesucristohuunoa un mato yoimisi cuscan man man icoinra huaa. Ratoranfoan mato amaqiri yosipaiaшу omitsiscapanacafu muran fopainonfo.

¹⁰ Uncai ufiri curafia huamupaima. Ascagama un Upa Diosin uhuunoa shinanmasharapai nanton ua amapaiyai cuscan huaashquin. Un yorafo uhuunoa shinanmasharapaiyaino uncai Cristo oinmati itiroma.

Ahuuscashucon Pablo Jesús fu rafumisi inimun

¹¹ Uhuun yoramishtichin un mato shafacafi tapimapai. Na tsain shara Jesucristohuunoa un mato yoimisi cuscacai nocofunufaoan aton shinanma.

¹² Na tsain shara un mato yoimisi cuscacai nocofunun ua tapimanima. Tsoa futsacain ua yosiama. Ascatarocon Jesucristo uhuun nomuran ua shinanmana cuscan un mato yoimisi.

¹³ Nocon shunifoan noco yonopaoni cuscan anunifo Judaismon. Urifi nan un tanaoinyopaoni. Nanfin man man nicamisi. Man man tapia nan Jesús icoinra huafo Dios tanasharapaiyai fo un fasi curushcain ato omitsiscamapaoni. Un ato cuyopaicoipaoni.

¹⁴ Noco shunifo nan Judaismon noco tapimapaiyai cuscan un fasi finonmafain tafafainpaoni. Uncaifin fasi finonmafain tapifoanfainpaoni. Uhuun faritiri un ato finonmacoinpaoni. Un fasi tapiquin finacoinpaipaoni.

¹⁵⁻¹⁷ Un caiantaima Upa Diosin ua fasi ramapaiquin ua catonni un ahuun yonoshomisi inon. Upa Diosin ua yoimamapaiyai cuscan uhuun caifoma un ato Furun Jesucristohuunoa tapimanon. Uncai nocofunu futsa fu tsainnima ua tapimanon. Upa Diosin afin ua catonnitian un Jesús fu rafumisifo ari catama. Unrocon Arabia mai ano cani. Nannoashu un chipo Damasco pushurasi ano nasoni.

¹⁸ Ascano fari rafu non fusti finonyotan un Damasco anoashu ari cani Pedro oinpai. Un quince oshatan un afu iyoni.

¹⁹ Nan Jesús fu rafumisifo docecai un atoqui nocoyonima. Santiago nan noco Ifoan Jesús chipocu fusti un oinni.

²⁰ Uhuun yoramishtichin ua Diosin oiainno un mato icoinra huamapaifain un mato cunushonai cuscan nan iconcoin. Uncai mato paraima.

²¹ Tapicahuun un chipo Siria yafi Cilicia mai ano cani.

²² Nan Cristo icoinra huafo Judea anoafocanai ua oinyomisifoma.

²³ Ua oinyamafiamisishaquin uhuunoa yoiainoan nicamisifo isca huaquin, —Na nocofunun Pablonun noco omitsiscamapaoni non afanan Jesús icoinra huanonma ishon. Nocrifi cuyopaipaoni. Ascafia natian arifi man Jesús icoinra huaa. Ascashon futsafori icoinra huamapairan, —ishon yoinifo.

²⁴ Ascashon uhuunoa yoinifo isca huaquin, —Pablonun man Jesús icoinra huaa. ¡Aicho! Diosin fasi sharacoin. Ahuamamishti huatiroran, —ishon yoinifo.

2

Jesús fu rafumisi futsafoan, —Pablo no fu inonquin, —huanifo

¹ Ascano fari catorce finontan afanan un Bernabé fu ari cani. Tito arifi no fu cani.

² Diosin uhuun nomuran ua shinanmanai cuscan un atoqui noconi un nocon caifomari nan tsain shara Jesucristohuunoa un ato tapimani. Atirificai un yoinima. Aton niaifofu fusti un ato yoiyoni. Un ato yocani isca huaquin, —¿Un Jesushuunoa yoisimi cuscan man shinan cayacafimun? ¿Unra ipaitsi yoisimi? Man shinain cuscan ua tapimacahuun, —ishon un ato yoini.

³ —Shara. Min ato yoia cuscan cayacaficoiran, —ishon ua yoinifo. Tito ufu oaiton Israelicumá, —Foshqui rupa shatuhuu, —tsoan huanima.

⁴ Futsafoan nannoshon yoinifo isca huaquin, —Norifi non Jesús icoinra huaran, —ifacashocai tsoan icoinra huacoinnafo inima. Nanfoanri yoinifo isca huaquin, —Tito arifi foshqui rupa shatutiroran, —ishon yoinifo. Anori yoiyamafoannocai tsoan anori shinan icuanima. Nanfo no fu ichanannifo. —Norifi non mato cuscararan, —ishon noco shinanmapaicani. Ascashon noco fomanpaicani. Non Jesús icoinra huashu noncai ahua futsa yopaima isharashquin. Ascafia nanfoan yoinifo isca huaquin, —Noncai Moisés cununi cuscan ayamashu non Dios fu itiromaran, —ishon noco yonopaicani. Ascashon nanfoan afanan noco oinmati cuscara imapaicani non Jesucristo fustisi tananonma. Moisés yononi cuscan tananonfo ishon.

⁵ Nanfoan noco yonopaiyaifo cuscacai non ato tsain fusti non nicayoama man iconcoin Jesucristohuunoa tapiai cuscan funononfoma.

⁶ Uncai catontan niaifofosi noima ahuamafori nanscari huaquin un noicoín. Nanscarifi huaquin Diosicai nocon fusohuunshon noco onainma noco shafacaficoín onancoin. Ascacun Jesús fu rafumisifoan ua isca huacani, —Min Jesushuunoa yoisimi cuscan shara tsain futsa yopaimaran, —ishon ua yoinifo.

⁷ Ascan Diosin Yoshin Sharapan Pedro catonni Jesús fu rafumisi inon. Ascashon nocon caífo Israelifo Jesushuunoa ato tapimanon. Nanscarifi aquin uarifi catonni un afu rafumisi inon. Ascashon uhuun caifoma urifi un ato yoinon.

⁸ Ascashon Upa Diosin Pedro catonni afu rafumisi inon. Nocon caífo muran nichini. Jesushuunoa ato yoiaiton Upa Diosin Pedro mutsismani ahuun curushhuunshon ato yoinon. Nanscarifi aquin ua catonni afu rafumisi inon. Ascan nocon caifoma muran nichini un ato yoinon. Un ato yoiaiton ua mutsismani ahuun curushhuunshon un ato yoinon.

⁹ Ascano Upa Diosihuunshon un nocon caifoma yoiaiton nicaquin nan Santiago non Pedro non Juan atishon ua Bernabé yafi muninifo. Ascashon noco yoiquin isca huanifo, —¡Aicho! Non nocon caífo Jesushuunoa yoisimi cuscan marifi futsafo yoitiro. Nocon Ifo yonoshosharatacahuun. Nonfin nocon caífo fusti ano camisi ato yoishquin. Ascan manfin caífo futsafo ari catiroquin.

¹⁰ Man nunoashu nasoaitan ahuuomafohuun ointiaquimayamacahuun. Nan pui non mucua foshotiroran, —ishon noco yoiáfo. Nicaí un unimacoian. Untsi nanscari huapayamai.

Pablonun Pedro Antioquía anoshon yoini, —Min chaca huairan, —ishon

¹¹⁻¹⁴ Ascanfashon Pedro Antioquía pushurasi ano nocotan chaca huatishoni. Noco caifoma futan piyoni. Chipó Santiago fu rafuafo Antioquía ariashu nocoqui funifo. Nocotoshiaifoanno Pedronun afanan ahuun caifofosiyashon pini. Pedronun ahuun nomuran shinanquin isca huani, —Uhuun caífo Santiago anoashu funifo. Ascashocai nocon caifoma futan piinifoma. Ascan uhuun caifoma futan un piyaino uqui shinanchacatirofo. Ascano un afanan ato futan pitiromaran, —ishon Pedronun amaquiri shinanni. Ascaiton oinquin un nantifiton ointaifi Pedro yoini isca huaquin. —Mirifi min Israelifishu nocon shunifoan yonopaoni cuscan man min aquima. Min nocon caifoma cuscara imisi. ¿Ascan ahuuscain natian min nocon shunifoan yonopaoni cuscan min nocon caifomafo min ato tanamapayain? —ishon Pablonun Pedro yoini.

Israelifo yafi Israelimafoan ato chaca shatucanashu Jesús icoinra huacanashu Dios fu nipatirofo

¹⁵⁻¹⁶ Ascan noncai mani futsa cainnima. Nanfoanfin chaca huamisifo. Nonfin Israelifo cainniquin. Ascafia man man tapia Moisés noco yononi cuscahuunshocai non nocon chaca soatiroma noco Diosin onaintimanonma. Ascatama non Jesucristo icoinra huaiton nocon chaca soashotiro. Non ascaitocai noco onaintimashquima. Moisés yononi cuscan

non aitoncai noco chaca soashotiroma. Ascan non Jesucristo fusti icoinra huaiton noco onaintimashquima.

¹⁷ Nonfin Cristohuunshon noco chacan soatiroquin noco onaintimanonma. Nanscara man non tapifiashu nofiri non chaca huamisi. ¿Non chaca shatucoinyamacumun Cristo noco chaca huamapaiquin? Ma. Ascara shinanchacapacuyamacahuun.

¹⁸ Moisés noco yononi cuscan man non tapian. Ahuunoashucaí non Dios fu nipatiroma. Jesús fustiton nocon chaca soashotiro non afu nipanon. Nan non icoinra huai. Ascano Moisés cununi cuscan afanan nasopaiashu non funotiro Dios fu ipashquin. Non afanan nasoquin non oinmani non noco chaca shatucoinshoma.

¹⁹ Ascan Moisés yononi cuscan ayamaquin mun tapini uncai afohuunoashu isharatiroma. Un ascainocai Upa Diosin uqui unimatiroma. Ascacun nanfohuunshon un tapini Cristo fusti un icoinra huaino Upa Diosin uqui unimatiro. Ascashu un ahuun yora itiro. Ascan natiancai un afanan Moisés yononi cuscahuunoo shinanpainacama ua nimapacunon. Afanan ascara shinantama un Dios fusti fu rafui isharashquin.

²⁰ Nocon Ifo Cristo ihui coyan iquinanqui mastafaanoo nani cuscan urifi un afu naa cuscaracoin ini. Ascacucái natian un ipaoni cuscan un afanan aima. Un Jesús icoinra huataima un ipaoni cuscacai un afanan aima. Cristo Diospan Furunmun ua noicoin afin ipaiyai cuscan ua nashoni. Ascacun un icoinra huaino natian Cristo unfu rafucacaini a cuscara ua imashquin.

²¹ Ascan Upa Diosin Furunhuunshon uhuun chaca ua soashoni un afu nipasharon. Uncái ahua futsa shinanmisima nipasharashquin. Nan fusti un shinanmisi. Moisés cununihuunshon nocon chaca non shatutiroanocai Dios fu nipanon Cristo noco nashocuanima. Ipaitsi noco nashoncuani.

3

Moisés yononi cuscan tanayamaraquin non Jesús icoinra huacun noco chaca noco soashotiro

¹ Uhuun yoramishtichin Galacia anoafaoan manfin nison cuscarafuquin. ¿Tsoan mato amaquiri yosiamun? ¡Ohua! ¿Tsoan mato paramun man afanan shinansharanonma? Ascan nonfin mato cayacaficoín yoinisi Jesucristo mastafaanoo matohuunoashu nani. Non mato tapimasharafiamisicun mancaifin tsain amaquiri shinanmisi.

² Nan fusti un mato yocapai man ua cumasharonon. ¿Moisés noco cunushoni cuscan tanashon man Diospan Yoshin Shara fia iyamarai nan tsain shara Jesucristohuunoo man icoinra huashon man fiamun?

³ Man Diospan Yoshin Sharahuunoashu Jesús mato imapaiyai cuscan man ayopaoni. Ascafia natian man shinanqui isca huaa, —Moisés noco yononi cuscan aashu non isharatiroan, —man ica. ¡Ohuashta! ¿Ahuuscain nisofaoan shinanmisi cuscan man shinainmun?

⁴ Man Jesús tanasharaiton mato omitsiscamapaonifo. Ascashon man Diospan Yoshin Sharahuunshon Jesús tanasharamisi. Natian afanan Jesús fusti tanayamaino man ipaitsi Jesushuunoashu man omitsiscapaoni. Ascayamapainon.

⁵ Man nicamisi cuscan man man icoinra huaa. Ascacun ahuun Yoshin Shara mato inanfain tsoan oiinyonima cuscara shara mato ashomisi. Moisés cununihuunshomaquin.

⁶ Nocon shuni Abrahamhuunoo shinancapon. Abrahamfin Diosin yoiyoni cuscan icoinra huaniquin. Ascaiton Diosin yoini, —Mian icoinra huacun un min chaca soashona min ufu ipanon, —ishon yoini.

⁷ Ascacun tapisharacahuun. Nan icoinra huafoti Abraham facu cuscarafu.

⁸ Upa Diosin inonpacoai cuscan tapiyoni nocon caifomafaoanrifi Dios icoinra huaifaoan aton chaca soashofain ato imasharashquin. Ascaifaoanoo atoqui fasi unimacoinni. Diosin Abraham yoiyoni isca huaquin, —Un minhuunshon manifoti un ato shara huashquiran, —ishon Diosin tsain cununi.

⁹ Ascashon Abraham icoinra huamiscun Upa Diosin a shara huashomisi. Nanscarifi aquin icoinra huafoti ato shara huashomisi.

¹⁰ Ascan Diosin tsain cununi isca huaquin, —Moisés cununi cuscan ayamacanasu omitsiscái unupacunacafomaran, —ishon cununi. Tsoacai Moisés cununi cuscaquin amisima. Ascacufin ratoran futsan shinanquin isca huai, —Moisés cununi cuscan un aino Upa Diosin uhuun chaca ua soashotiro un afu ipanon, —ishon anori shinanfiaicai ascacointiroma.

¹¹ Tsoan Upa Dios icoinra huaitonfin ahuun chaca soashofain imasharatiroquin. Ascan tsoan Moisés yononihuunshon aton chaca soapaiquin shinantiro isca huaquin, —Moisés yononi cuscan non ainton noco imasharatiroan, —ifiaifaoancai Upa Diosicai Moisés yononi ahuunshon ato imasharatiroma.

¹² Ascacun man nonfin tapiaquin Jesús fusti non icoinra huashu non Upa Dios fu ipatiro. Ascun Moisés noco yononi cuscahuunoacai ascarama. Moisés noco tapimaquin isca huani, —Nantifi Diosin noco yononi cuscan nantishotapiquin non acacainyamai non Dios fu ititromaran, —ishon cununi.

¹³ Ascun Moisés noco cunushoni cuscan non ayamaiton Upa Diosin noco onaintimashquiran ishon cunufiani nococairocon finonmacufoantan Furun onaintimani. Noco huunoashu omitsiscani. Diospan tsain cununi isca huaquin, —Ratoran futsa ihuiqui mastaifo nanrifi Upa Diosin onaintimai omitsiscanon, —ishon cununi. Ascun non chaca huamisiano Cristo nocohuunoashu ihui coyan iquinanqui nani. Noco nashoyamanicun non omitsiscapacuana.

¹⁴ Ascun Upa Diosin Abraham shara huani cuscan Israelimafori Jesucristohuunshon ato shara huashquin. Ascacun nan icoinra huafoti ato yoiyoni cuscan ahuun Yoshin Shara ato ya rafumatiro. Ascun Cristo noco nashoni Apa Dios fu non ipanon. Nantifi Diosin Abraham yoiyoni cuscan icoinra huaa Israelimafori ato inanshquin.

Moisés yononi cuscan yafi Diosin Abraham yoiyoni cuscan

¹⁵⁻¹⁶ Ascacun uhuun yoramishtichin natian non amisi cuscahuunoa un mato iscara tapimai man tapinon. Afu nocofunu ahuara yoiyoshocai shinan futsatiroma manmain ahuun anu cunushon. Nanscarifiai Upa Diosin Abraham yafi ahuun funa fusti yoiyoni. Ahuun funa ichapafahuunoacai yoiyonima. Abraham funa Cristo fustihuunoa yoiyoni.

¹⁷ Un mato shafacafi yoinon. Upa Diosin Abraham yoiyoni cuscan cuatro ciento treinta fari finontan Diosin Moisés yononi. Diosin Moisés yonofiani Abraham yoini cuscan ointiaquimama. Nan yoini cuscafin aiquin. Ascashocai Upa Diosin shinan futsanima. Nan yoiyoni cuscafin man amisiquin.

¹⁸ Upa Diosin Abraham yoiyoni cuscan icoinra huaiton chipo Upa Diosin Abrahamhuun noicoinquin cashman ashoni.

¹⁹ ¿Ascun nanscaracumun ahuuscai Moiséshuunshon Upa Diosin noco yononimun? Un mato tapimanon. Upa Diosin Abraham yoiyoquin tau huani. Ascashon chipo Upa Diosin yononi cuscan Moisés cununi nantififain tapinonfo. Ascafia yononi cuscaai toa ascamisima. Ascata yoitimashunifo. Ascafia nan Moisés yononi cuscafin tanamisifoqui nan Jesús oaitian. Nanhuunoafin Upa Diosin Abraham yoiyoniquin. Ascun Upa Diosifin ahuun oinmati afu nai muran ifafo tapimaquin tau huani nanfoanrifi Moisés tapimanon. Nan ato yonopaiyai cuscan anonfo.

²⁰ Ascafia Upa Diosicai Abraham ascara yoinima. Ahuun nai oinmatifohuunshon yoyamafain yora futsafohuunshonricai yoinima. Upa Diosicoinin afi Abraham yoiyai cuscan yoini.

Ahuuscashomain Upa Diosin Moiséshuunshon ato yononiquin

²¹ ¿Ascun Upa Diosin inonpacoaifo yoiyoni cuscan yafi Moisés yononi cuscan ascaraoin shinanmamun? Ma. Upa Diosin tsaincai rafuma. Upa Diosin Moisés yononi cuscahuunshon noco nimapacutirocun nanfohuunshon nocon chaca soashocuana non a cuscara shara inon.

²² Ascafia Upa Diospan tsain cununi isca huaquin, —Nantifi manifotifohan man non chaca huamisi. Ascashu nantifi yorafo nocon chacahuunoashu non cunu muran iquia cuscaracoin, —ishon cununi. Jesucristo non icoinra huacun arus fusti noco caimatiro afanan chaca nocon ifo inonma. Nanscaracoinfin cununi.

²³ Ascashon noncai icoinra huayonima. Ascacun Cristo oaitima Moisés noco yononihuunoashu non cunu muran iquimamua cuscarafu. Ascun nan Cristo oaitian non icoinra huacun noco caimanano afanancai non cunu muran iquia cuscarafu itiro.

²⁴ Ascacun non tapitiro Upa Diosin apaiyai cuscan Moisés noco yononi nocon Ifo cuscara iyopaoni. Nanhuunshonri non tapiyoni non icoinra huacun nocon chaca soashofain noco imasharashquin.

²⁵ Non ascafiapaoniano Cristocoin noconocai non afanan Moisés yononi cuscan nocon Ifo itiro noco iquinon.

²⁶ Natian nantifi Jesús icoinra huafu Diospan facufu.

²⁷ Man manfin unu muran iquimamuaquin maton chaca shatuashu Jesús cuscara shara iishquin afu ipashquin.

²⁸ Upa Diosin Cristohuunshon nantifi manifoti anofo noco nanscarafosi oin. Uhuun caifo Israelifo yafi Israelifoma non yonomatifo yafi yonomatimafori non nocofunu yafi ainfori nanscarafosi noco oin. Jesucristo noco Ifo icaino non ahuunoashu yora fusti cuscara itiro. Ascun nantifi icoinra huafotifin non ahuun yorafo.

²⁹ Ascun man Cristo ahuun yorashu marifi man Abraham funafo itiro. Ascaino nantifi Upa Diosin Abraham yoiyoni cuscan matonnari itiro.

4

¹⁻² Ascatan un mato afanan ahuara futsa mato tapimanon. Apa naano furunmun nantifi fitiro. Ascafia facu yosiyocuma iyoafofoan yonotirofo. Nantifi apana ahuunarificacun non facu yonomati cuscara iyotiro iyoafoan yonomayotiro. Apan mai cushumisifoan facu pushco yonoyotirofo nan apan yoini cuscan ahuun fari nocoano pushcoaitian.

³ Nanscarifi aqui non Cristo Ifo huataima norifi non facu cuscara. Nocon shunifoan noco yonopaiyai cuscan noco yonoyopaoni. Ascashu non aton yonomati cuscara non ipaoni. Nan icoinra huamafoan amisifo cuscan noco nanscarifi huamapaonifo non aton yonomati cuscara inon.

⁴⁻⁵ Ascatan Upa Diosin nan yoinitian Furun nichini noco cuscara cainon. Ainfoan shaqui murannoashu cainni. Moisés nocon yorafo yononi cuscan arifi nicapaoni. Ascafia nanrifi nuno mai ano oni nocon shunifoan noco yonopaoni cuscan non afanan ato yonomatifo cuscara itamarocon Diosin ahuun facu iyoafofo cuscara noco imanon. Nanscacufin mai ano oniquin.

⁶ Icon manfin natian Diospan facufoquin. Nanscacun ahuun Yoshin Shara nocoqui nichini ahuunshon nocon nomuranshon Dios yoitiro isca huaquin, —Upashtan minfin uhuun Upacoinquin, —ishon non yoitiro.

⁷ Ascacuai man afanan yonomatifo cuscarama. Natianfin man ahuun facufoquin. Ascan Upa Diosin ahuun facufo inain cuscan matorifi inanshquin. Jesucristohunshon noco inain.

Pablon Jesús icoinra huamisifo ato shinanni

⁸ Man iscapaoni Diosicoiñ tapiyaoashuma. Ahuarafo diosicoiñmefiacun nanfoan aton yonomati man ipaoni.

⁹ Man ascafiapaoni natian man man Dioscoiñ onancoian. Ascan Upa Diosin finacoinquin mato onancoian. Man man Dios onanfiashu ahuuscain afanan man ipaoni cuscan man afanan aton yonomatifo man ipaicain. Nanfoancai mato imasharatiroma.

¹⁰ Maton shunifoan yononi cuscan man man afanan amisi. Ascashu man aton fusiti shafa fuscain fusiti oshuri fuscain fuscitian fuscain aton fusiti fari nocoano atofu man fusimisiquin. Man shinanquin isca huaa, —Non fusititi atofu fusiaton Upa Diosin nocoqui unimatiro nocon chaca noco soashoniran, —ishon man fasi amaquiri shinanmisi.

¹¹ Ascacun ¡Ai timafin! Un matohunshon shinancoiñ. Un mato curushcain yonoshopaoni. Un mato Jesushuunoa tapimafiani unraca ipaitisi mato tapimapaoni.

¹² Uhuun yoramishtichin ua nicasharacapun. Uncai Moisés cununi cuscan afanan tanaima uhuun chaca soanon Dios fu ipashquin. Man Jesús icoinra huaitian Moisés cunushoni cuscacai afanan tanatama Jesús icoinra huaa cuscan urifi nansca huaa. Un Jesús tanai cuscan uhuunri caocahuun. Un matofu ipaoni chaincai man uhuunoa shinanchacapaonima manrocon ua shara huafafainpaoni.

¹³ Un isinin iquin matoqui noco tauni. Upa Diosin ua nitun huani un mato Jesushuunoa yoinon.

¹⁴ Un isin chacacoin fuchifianocai man umaquin ipainima. —Pablon ahuun isin suyacoin. Noncai afu ichanainmaran, —mancai anori imisima. Ascata ma man ua noicoiñmisi. Un mato yoiyai cuscan man ua nicasharapaoni. Ascashon nan Diosin oinmati afu nai muran ica nan Jesucristocoin noia huaquin man ua shara huamisi manri ua fasi cushusharapaoni.

¹⁵ Un mato yosini cuscan man fasi unimacoinpaoni. Ascan ahuuscainmun natian man ipaoni cuscan man unimaimacai. Man man shinainmun man ua noipaoni. Un ahuara yopaishita man ua inanpaoni. Asca atisharacun maton furo futsucumutan man ua inancuapaoni.

¹⁶ ¿Un mato icon yoifiamisimun non noincasmatanaincai?

¹⁷ Moisés cununi cuscan futsafoan mato yosipaicani. Nanfoan amaquiri shinainfo cuscan fasi matori amaquiri shinanmapaicani man ato cuscara inon. Nanfoan apaiyai cuscacai matona sharama. Ascashon nanfoanri noco pashcanan huapaicani man afanan ua nicatamarocon nanfoan mato yosiafo cuscan man fasi ato tananon.

¹⁸ Ratoranfoan mato shara huaifoanno shara itiro. Un matofu iyamafiano mato shara huafori fasi sharacoin itiro. Jesushunshon mato shara huafori sharacoin itirofo.

¹⁹ Uhuun facufoan un fasi mato shinancoiñ. Ascacun un mato tapimai. Ainfo facu caiantaima isin muyotiro. Ahuun facu caishocai afanan isin mutiroma. Unimai. Nanscarifi aqui man Cristo tanasharacoinyamaiton un matohunshon isin mutiro. Criston ahuun Yoshin Shara maton nomuran man nanucoianno afanancai un matohunshon isin mutiroma.

²⁰Un tapiama ahuuscaquimain man afanan amaquiri shinaincain. ¡Ohuashta! Un matofu ipainon un mato yoipaiyai cuscan cunun yoitamarocon uficoín un mato yoicoínnon.

Agar yafi Sara inifo cuscan atohuunshon ahuara futsan yosini

²¹Moisés cununi cuscan tanapaimisifoan afanan ua nicacahuun un mato yoinon. ¿Moisés noco cunushoni cuscan man tapiamamun?

²²Isca huaquin cununi. Abraham facu rafuya ini. Futsa ahuun yonomati futan facu ani. Nan futsa ahuincoin futan facu ani. Nan ahuincoincai tsoan yonomati inima.

²³Nan yonomati ahuun anu Agarcai yoshafotaí inima. Nantifi facu cainmisifo cuscari ahuun facuri caini. Abraham ahuincoin yoshafoshtan facu nanutiroma. Ascafiacun Upa Diosin Abraham yoiyoni isca huaquin, —Min ahuinin chipo furonanfacu nanushquin. Ascashu cainsharashquiran, —ishon inonpacoai cuscan yoiyoni.

²⁴⁻²⁵Diosin ainfo rafuhuunoa noco ahuara futsa yosipai. Ato shara huashononpacoai cuscan ato yoiyoni. Nanscarifi aquin yorafoti shara huashopai. Ascano Moiséshuunshon Israelifo yonopaiyai cuscan ato yononi. Ascashon machi ahuun anu Sinain anoshon ato yononi ahuun tsain tanasharanonfo. Moisés yononi cuscan tanasharapaifiacani tsoacai ascacoinmisima. Ascashu ahuun yonomatifo cuscara icafo. Nanfo Agar cuscarafu. Nanrifi yonomati ipaoni. Nan machi ahuun anu Sinain Arabiafoan anu futsa tuqui huanifo Agar huanifo. Agar ari icafo ahuun facufo cuscara. Nanfoan Moisés yononi cuscan tanapaifiacai anifoma. Ascashu nanfo ahuun yonomati cuscarafu. Nan pushurasi Jerusalén ano icafoan aton ahua cuscara.

²⁶Asafia Upa Diosin icari anuqui futsan Jerusalén funaran ishon anunifo. Nanri Sara cuscara yonomatima. Ahuun facuforicai yonomatima. Nan Jerusalén funafin nocon uhua cuscaraquin. Nonfin ahuun facu cuscaraquin. Non ahuun facufo icainocai non yonomati itiro. Moisés yononi cuscaricai nocon ifo itiro.

²⁷Nannori Diospan tsain cununi isca huaquin,

“Ainfon minfin toosmaquin. Min facuoma. Miacai facu isin huaítan min mumisima. Asafia natian min unimatiro. Min oi ashcafínin unimaquin min ato yoitiro. Un chipo mato facu ichapa inanshquin. Nan ainfo yonomati facufoyafia mincafin finacai facu ichapayacoin ishquiran,”

ishon cununi.

²⁸Ascatan uhuun yoramishtichin manfin Isaac cuscaraquin. Upa Diosin Abraham yoiyoni cuscan ahuun facu Isaac chipo cainni. Nanscarifiái Upa Diosin yoiyoni cuscan man ahuun facufo iishquicai.

²⁹Nan yonomati Agar yoshafotaíma ahuun facu Ismael cainni. Ascano nan toosma Sarapan chipo yoshafoshtafishon Diospan Yoshin Sharahuunshon Abraham facu nanumanano Isaac cainni. Asafia Agar ahuun facu Ismael iyoafishon Sarapan facu Isaac fucash huaquin omitsisca huapaoni. Nanscarifiái non Diospan Yoshin Sharahuunoashu non Diospan facufo icaino futsafoan Diospan facumafoan noco omitsisca huatirofo.

³⁰Ascán Diospan tsain cunuquin isca huani, —Min facu Isaac un inanshquiain cuscacai Agarpan facun fitiro. Ascacun mato anoshon ahua yafi ato nichicahuun afanan matofu inonfoma, —ishon Upa Diosin Abraham yoini.

³¹Ascacun norificai non Moisés yononi cuscahuunoashu non ahuun yonomatima. Noncái nan ainfo ahuun yonomati cuscarama. Nonfin ainfo yonomatima nan Sara ahuun facu cuscara. Non Dios icoinra huashu non tsoa yonomati itiro. Non ahuun facufo itiro.

5

Cristohuunoashu isharaahuun

¹Ascacun Cristo nocohuunoashu naani afanan Moisés cununi cuscan non tananonma. Ascatacái afanan cununihuunoashu ato yonomatima. Cristo fustihuunoashu non isharatiro. Ascacun Cristo cachiquiri huayamacahuun. Man ipaoni cuscan afanan ayamacahuun. Nocon shunifoan cununi cuscan afanan afoqui nasoyamacahuun ato yonomatifo iishcaquima.

²Un mato yoiái cuscan ua nicasharacahuun. Manraca shinanquin isca huai, —Un foshqui rupa shatucuma uhuun chaca ua soashotiroma un Upa Dios fu nipanon, —ishonraca man shinan. Man anori shinaintocai Jesús mato chaca soashotiroma Upa Dios fu man nipanon.

³Afanan un mato shafacafi yoipai. Ratoran futsa man foshqui rupa shatupaimun Dios fu nipashquin. Tsoan anori shinanquifin nan Moisés cununi cuscan tanacointama onanshta amaquiri shinan tanashucaí Dios fu nipatiroma.

⁴ Moisés cununi cuscan fusti man tanaiton maton chacafo soashotiroma. Ascashu man afanan Cristo fu rafuima. Upa Diosin matohuun ramapaifiaino man man Cristo pota. Ascacucaí mato ahuusca huatiroma mato chaca soashona man afu ipanon.

⁵ Ascatama. Diospan Yoshin Sharahuunshon man non tapia Cristohuunshon nocon chaca soatiro Diosin nocohuun shinansharanon. Nan non icoinra huamisi.

⁶ Non foshqui rupa shatu yamarai shatuama nanscara rafu. Afoancai nocon numatiroma Cristo cuscara non inon. Non Jesucristo icoinra huashon non futsafo noicoi-tiro. Nan fusti non yopai.

⁷ Man Jesús tanasharayopaoni. ¿Ascan tsoan mato amaquiri shinanmamun un mato iconcoín tapimapaoni cuscan man afanan nicasharanonma?

⁸ Diosincaí mato anori yosiama. Diosin mato yoimana Furun man icoinra huanon isharashquin.

⁹ Mato muranshon fustiton amaquiri mato yosiaino nan fustihuunshon nantifi mato shinanchacamatiro.

¹⁰ Un Diosin cuffain Jesús icoinra huaiton marifi un shinain cuscan afanan shinan-shquicain. Tsoan mato amaquiri yosiquin fucash huaifin Diosin onaintimashquiquin.

¹¹ Uhuun yoramishtichin atirifiton man uhuunoa yoiqui isca huua, —Nan Pablorigi yosimisiquin non foshqui rupa shatuamashucaí Diosin yononi cuscacai non aimaran, —ishon yoiáfo. Ma. Ascaracaima. Uncái anori yosimisimo. Un anori yoiáiton ua omitsiscamacuanafoma. Ascafia un yoimisi Jesucristo ihui coyan iquinanqui mastanifo. Noco nashonihuunshon nocon chaca soashonon Upa Dios fu nipanon ishon un yoimisi. Atirifi nan nicaquin ua omitsiscamamisifo.

¹² Ascan futsafoan mato yoimisifo isca huaquin, —Man foshqui rupa shatuyamashocai man Dios icoinra huaimaran, —ishon mato shinanchacamamisifo. Nannori yoiqui mato fucash huamisifo. Afanan matofu iyamapainonfo.

¹³ Uhuun yorafoan Jesucristohuunshon ahuun tsain fusti natian tanacahuun. Ahua futsan mato yonotiroma man yonomatifo inon. Ahua futsan mato yonoyamafaiiton chaca huayamaquin. Jesús mato numafiano, —Natian nofin apaiyai cuscan non huatiroman, —iyamacahuun. Ascan noinancahuun. Ahuun noiquin shara huacahuun.

¹⁴ Non yorafo ya noinanshu nantifi Diosin noco yononi cuscan non aicai. Diosin noco yononi isca huaquin, —Mafiri man musu huamuai cuscan nantifihuun noicoincahuun, —ishon cununi. Nan man ascain nantifi Diosin yononi cuscan man aicai.

¹⁵ Man nantifia noinanyamashu chaca huamisi man iquin. Ascan oinfain. Yoiti huamitsayamacahuun. Chaca huua tananyamacahuun. Man ascainocai afanan ichanan-paitirofoma. Ascashon Jesús cachiquiri huatirofo. Chaca huatanashu man funcoiintiro omitsiscashquin.

Noco nomuran non chaca huapaimisi cuscan yafi Diospan Yoshin Sharahuunoashu non isharatiro

¹⁶ Ascan un mato yoi Diospan Yoshin Shara nicacoincahuun ahuunoashu isharashquin. Afin mato yoitiro raqui cacaimain man ahuuscaicain. Nicacoinshocai afanan man apaoni cuscan maton nomuranshon ahuara chaca huapafiaquicai man aquima.

¹⁷ Non nocon nomuranshon non chaca huapaiyai cuscacai Diosin Yoshin Sharapan anori shinantiroma. Ascashon ahuun Yoshin Sharapan noco amapaiyai cuscan noco nomuranshon non shinanchacafain noncái ascapaitiroma. Nocon nomuranshon non shinanpaoni cuscaracai Diosin Yoshin Sharapan ahuun shinan cuscarama. Asca nofin non apaiyai cuscacai non huatiroma. Non chaca shinanpaoni cuscan non ayamaquin Diosin Yoshin Sharapan nocon nomuran yoia cuscan non nicacointiro.

¹⁸ Ascafia Diosin Yoshin Shara no fu rafuaino Moisés yononi cuscan afanan nocon ifo itiroma noco yonoshquin.

¹⁹ Noco nomuran non shinanchacamisi cuscan nantifi shafacafi ointiro. Nan chacafo non tanashu non chaca huaquin isca huatiro. Furomacoin icain ahuara chacafosi nocon nomuran shinanfaimisi icain rafitama ahuinma fu icain ainfori ascariifi ainfono aton funumafo ya imisifo icain

²⁰ Diosicoínma, —Nan uhuun Diosiran, —ishon yoifain shointi fusti tapifain noincas-mamitsacain yoiti huaquisi futsafo pashcaquin futsafain futsafo finonmapaimisi icain ipaitama sinacucahuamisi icai afi apaiyai cuscan fusti shinanmisi icain tsain chipumisi icain toa futsacain noco cuscaramaran ishon yoifain futsafo noisharayamafain.

²¹ Futsan ahuara fianpaifain, rutumitsamisi icain, paunmisi icain, monoyanan pauncaín nanscarafoansifin chaca huacaniquin. Un mato yoiyomisi cuscan oinfain. Ascara chacafo-caí Upa Diosin nantifi iquina ano nocotiroma afu iishquin.

²² Ascafiacai Diosin Yoshin Shara noco Ifo icaino non chaca huatamarocon non ahunshon futsafo noicoitiro unimacoincain ointi isharacain ahuara ahuuscarafaino non shinanchacatama tunufain futsafohuun ramapaimisi icain shara huapaimisi icain yoia cuscacoin amisi icain.

²³ Ahuara tapifiashu afiri curanfía huamuyamacai tso fu iquinanpaiyamacai tsain tsii huafain yoimisi icain futsafohuun shinansharafain afin apaiyai cuscan huatama nan Diosin amapaiyai cuscan fusti huamisi. Diosin Yoshin Shara fustihuunshonfin asca huatirofoquin. Tsoa ascaicai afanan tsain futsan yopaima. Nan Diospan Yoshin Sharapan yonoa cuscan man aiquin. Ahuatocai afanan yonotiroma.

²⁴ Cristo Jesús ahuun yorafoan chaca huapaonifo cuscan ihui coyan iquinanqui man mastanifo aton chaca nantifi cuyonon. Jesús ihui coyan iquinanqui noco nashoni nocon chacafori afu mastai cafisca non a cuscara shara inon. Non chaca huapaoni cuscacai non afanan asca huapaima.

²⁵ Natian non Diosin Yoshin Shara fu rafuaino nanto noco yoiai cuscan non nicasharatiro. Ascashu noco amapaiyai cuscan non anon.

²⁶ Ascatan non Diospan Yoshin Shara fu rafuashucaí non cacapaimisi iyamacain oinmupaimisi iyamacain non itiroma. Man ascaquin futsafo man shinanchacamatiro. Ascara man chacafo shinainno man finononapaitiro. Ascarafin chacacoinquin.

6

Futsafoya ashononantanacahuun

¹ Uhuun yoramishtichin man futsan chaca huaiton oincaquin. Diospan Yoshin Shara tanasharacaquin ahuun ramapaiquin oi tsii huafain yoihuu chaca shatunon. Oinfain. Tsain curushu iyamacahuun. Mafiri man chaca huamutiroquin.

² Nantifia noinantanacahuun. Cufishonantanacahuun. Futsan ahuun nomuran omitsiscaiton ahuun ramapaiquin ointi unimamacahuun. Ascashu cushunonacahuun. Futsan omitsiscaiton nan cufishocahuun Jesusquiri shinanmashquin tanasharanon. Man ascaifin nantifi Cristo yononi cuscan man ai cain.

³ Ascano futsan yoiquin –Unfin fasi sharaquin. Uncai tsoa futsa yopaima ua Dios cufishonon, –ishon shinain. Nan cuscara yoracai ahuama. Afiri paramui.

⁴ Ascafia nofin nocon nomuran non shinantiro non Jesús yonoshosharaimun. Ascan non yonoshosharai tapiashu non fasi unimatiro. Ascaquicai non shinanquin isca huatiroma, –Futsan chaca huai cuscacai un huamisimaran, –ishon non shinantiroma.

⁵ Nantiffain non chaca huamisi. Ascashori nantiffain nocon nomuran non shinantiro non amisi cuscan. Tsoa futsacai Diosin noco amapaiyai cuscan noco huamatiroma. Nofin non atiro.

⁶ Tsoan mato Diosin tsain yosiaiton nan ahuara yopai cuscan inansharacahuun.

⁷ Mafiri paramuyamacahuun. Tsoan Diosin tsain potashu, –Diosin ua yoipaiyai cuscan nanscanonquin, –icafin Diosin ato onaintimaiquin. Ahuara non fana nanscaracoin foaicun nan non fitiro. Nanscarifi aquin non Diosin tsain nicasharayamatan non chaca huashu ahuara chaca ahuuscaraino non omitsiscatiro. Ascanfia Diosin noco yoia cuscacoin ashu non isharatiro.

⁸ Ascan tsoan ahuun nomuranshon shinanchacafainquin chipo chaca huatiro. Ascashu omitsiscái finacointiro. Ascano Diosin Yoshin Sharapan amapaiyai cuscan tsoan nan fusti afafainni nanfin Diospan Yoshin Sharahuunoashu nisharapacunaca.

⁹ Futsafo shara huafainquin unuyamacahuun. Ascashon isca huauquin shinanyamacahuun, –Mun imafofo shara huayomisi. Natian un ascaima. Afanan un asca huapaima. Nanscanonquin, –ishon anori shinanyamacahuun. Non ascai unuyamacun Diosin afi noco inapayaitian noco inansharashquin.

¹⁰ Ascan ahuuscaraifoan oinquin nantifi shara huafafaincahuun. Finonmafain Jesús icoinra huafó shara huafafaincahuun.

Pablonun Galaciafo yoini cuscan huafain ahuun tsain unutaqui tsain shara ato fomani

¹¹ Natian ufcoin un mato cunushoni. Maficoín oincapon uhuun cunu funupafo.

¹² Futsafoan mato yosipaicani. Nanfoan mato isca huamisifo, –Man foshqui rupa shatuyamashu Diosin yononi cuscan man aimaran, –ishon mato yoimisifo. Nanfoancai yoipaicanima, –Jesucristo ihui coyan iquinanqui mastanifo noco nashonon. Nan fusti non yopairan, –ishoncai yoipaicanima. Ascashon shinanquin isca huacani, –Non yoiquin Jesús fustiton nocon chaca soashotiro. Ascan noncai ahuá futsa yopaimaran, –ishon. Non yoiaiton noco omitsiscamatiro. –Ascacucái non anori yoima noco omitsisca huanonfoma, –ishon yoimisifo.

¹³ Nanfo man foshqui rupa shatufiashucai Moisés cununi cuscan tsoa ascacoinmisima. Ascafiashon matorifi shatumpaicani ato cuscara man inon. Marifi nan huamisifo cuscan man aiton nanfoan futsafo yoitirofo, —Nafon nocon tanamisifoquin, —ishon yoitirofo.

¹⁴ Unmain anori shinanpacuyamapainon. Unfin tsain shara fustiuhuunoasi yoipaifafainicain. Nan fusti yoisharapaiqui un isca huai, —¡Aicho! Jesucristo ihui coyan iquinanqui ua nashoni. Ahuunshon fustifi un chaca shinanpaoni cuscan afanan uhuun ifo itiro. Jesús ua nashoaintian nantianrifi uhuun chaca futsa futsatapafo huapaoni cuscan nantifi nan chachafo afu mastani cuscaracoin. Afanancai ua ahuusca huatiroma, —ishon un shinantiro.

¹⁵ Jesucristo ahuun yorashucai non foshqui rupa shatuyamacai non ai futsutiroma. Ascaracai ahuama. Nonricai sharatiroma. Non Jesushuunoashu fusti non shara itiro. Jesushuunoashu fusti non fiananansharacoin itiro. Nan fustiton noco imasharatiro.

¹⁶ Diosin Yoshin Sharapan Jesushuunoa noco yosia cuscan man acun Upa Diosin mato ointi unimamafain matohuun ramapai. Ascashu man Diospan yoracoin.

¹⁷ Ascan uhuun tsain unutaqui un mato yoinon. Uhuun Ifo Jesushuunoashu un omitsiscamisi. Uhuun yoratiso toa ichaparasi oinquin man tapitiro un Jesús yonoshonaiton ua isca huamisifo. Ascacun afanancai tsoan ua fucash huayamacahuun.

¹⁸ Uhuun yorafoan nocon Ifo Jesucristo matohuun ramapaiqui mato shara huafafaini. Nanscasi ipanon. Amen. Nanti.

Pablo

Pablonun Efeso Anoafu Cunu Fomani

Pablonun Jesús icoinra huafo Efeso anoafu cunu fomani

¹ Unquian Pablo, Efeso anoafu manfin Diospan yorafoquin. Man Cristo Jesús tanasharamisi. Un mato cunu fomai man tapinon. Diosin ua amapaiyai cuscan ua catonni un Cristo Jesús fu rafumisi inon.

² Nocon Upa Dios futan nocon Ifo Jesucriston matohuun ramapaiqui matohuunoo shinanquin mato shara huafafaini. Ascashon maton nomuran unimamanon.

Non Cristo icoinra huaifon noco shara huafafaintiro

³ Non Cristo ahuun yoracun Upa Dios icarishon a cuscara shara noco imano ahuun ahuara sharafoti nocori inanshquin. Ascano nocon Ifo Jesucristo Apa Dios non yoinon, —Upa Diosin min fasi sharacoin. Non mia aicho huairan, —ishon non yoinon.

⁴ Mai oni huataima Jesucristohuunshon Upa Diosin noco catonni ahuun yorafo non inon. Ascacun nantifi nocon chaca soashofain nan Furun cuscara shara non inon.

⁵ Nocoahuun noicoinquin afin apaiyai cuscan noco huani Jesucristohuunoashu norifi non ahuun facufo inon. Nanscara afi fuchipaiyoni.

⁶ Diosin Furunhuun noicoincain nocoahuunrifi ramapai. Ascashon noco nimasharapacunaca. Ahua futsahuunoashucai nocoahuun ramapaima. Aficoi nocohuun ramapai. Ascacufi, —Upa Diosin min sharacoinran, —non huaicai.

⁷ Jesús noco nashoni ahuun imi foyanan. Ascan nantorifi nocon chaca soashonano ahuunshon Upa Diosin noco rau huatiro non afu ipanon. Ascacun non tapitiro Upa Diosin fasi nocoahuun ramapacain noco shinanquin finacoinmisi.

⁸ Non yopai cuscan onancoian. Ascashon Furunhuunshon noco fasi shara huafafaini.

⁹⁻¹⁰ Ascano Upa Diosin afi apaiyai cuscacai tsoa tapimayonima. Ascafia noco tapimana nocoahuun ramapaiquin nocoqui Cristo nichini. Ascano Upa Diosin afi shinanyoni cuscan Furun Cristo nan nichipaiyaiatian afanan nichishquin nantifi ahuun yorafo nai muranoafu yafi mai anoafori ato ichanan huashquin Cristo arus fusti aton Ifo inon.

¹¹ Cristohuunshon Upa Diosin nocorifi catonni non ahuun yorafo inon. Nannori nocoahuunoo shinanyoni. Afi apaiyai cuscacoin huashquin.

¹² Ascano non Cristo icoinra huaquin tau huashon non yoiquin isca huanon, —Upa Diosin min fasi sharacoin. Min noco shara huamisi cuscan fasi sharacoin. Tsoa futsacai mia cuscara sharamaran, —ishon non yoinon.

¹³ Marifi man Israeliyamafishon Diospan tsain icocoin nicaquin man man Cristo icoinra huaa. Ascacun maton chaca soashona marifi ahuun yorafo man inon. Upa Diosin yoiyotiani cuscan huafain ahuun Yoshin Shara matoqui nichini mato onanti huaacoinshquin man ahuun yorafocun tapishquin.

¹⁴ Ascano nonfin Diosinafoquin. Ahuun Yoshin Shara no fu rafuaiton non tapitiro ahua futsamain noco yoiyotiani cuscan noco inanshquicain. Ratoran shafatafi nan icari noco ihui oshquiquin. Nannoshon ahuara futsa noco yoiyotiani cuscan noco inanshquin. Ascano afanan Upa Dios non yoiquin isca huanon, —Min noco shara huacoinna. Min fasi shara finacoinran, —ishon non yoinon.

Pablonun cufini cuscan

¹⁵⁻¹⁶ Ascano nan un matohuunoo nicaquin tau huanitian man noco Ifo Jesús icoinra huashon man futsafo noicoinfafainaiton. Ascacun nan un cufiati un matohuunshon noco Ifo aicho huafafaini.

¹⁷ Ascan nan nocon Ifo Jesucristo Apa Diosifin nocon Upa Diosiriquin. Afin sharacoinquin. Nansacun un cufifainmisi ahuun Yoshin Sharahuunshon man shinansharafain ahuun tsainri man tapisharafain finacoinshon man Jesús onansharanon.

¹⁸ Ascan un mato cufishoquin isca huafafaini, —Upa, aton nomuran cayacaficoi ato shinanmahuu mihuunoo tapisharanonfo. Ato tapimahuun min ato catonniqui mifu ipanonfo. Ascashon min yoiyoni cuscan nan mia icoinra huafofi min icaria tsoan oinyomisima cuscara sharacoin min ato inanshquinran, —ishon un mato cufishomisi.

¹⁹⁻²¹ Diosin ahuun curushhuunshon tsoan oinyomisima cuscara ahuamamishti noco ashotiro. Nan ahuun curushpan Cristo naitian afanan funimani afu nai ariashu niaifocoin inon. Nan Upa Dios icarishon Cristo nantifi niaifofu finoncoian. Nan natian niyoafu yafi inonpacoaifori non nantifi mai anoa icafoti non nai muran icafotiri Jesús ato finoncoianquin.

²²⁻²³ Ascan Upa Diosin Furun yononi cuscan nantifi mai anoa manifoti yafi nai muranoafori ato iquinaquin. Ascashon Furun catonni nan icoinra huafoti aton niaifo inon.

Nan icoinra huafofin ahuun yoracoin cuscarafuquin. Criston aton mapo cuscarafuquin. Nocon mapon non shinantiro. Nan fustiton icoinra huafo yonotiroquin. Noco iquina ahuunshon fusti non atiroquin. Nocon mapomaisicai non nitiroma. Nanscarifi aqui nocon Ifo Jesusmaisicai tosa nipatiroma. Nantifi icoinra huafo no fu ica. Ascashu no fu rafucacaini noco imapaiyai cuscan non anon.

2

Diosin nocohuun noiquin noco nimapacunaca non afu ipanon

¹ Ascafia mato chacahuunoashucai man Diospan yora ipaonima afu ipashquin. Ascata ma maton chaca soashonataima yora naa cuscarafu. Omitsiscapanacafu muran man focuana.

² Manfin chaca huapaoniquin. Nan icoinra huamafofin chaca huamisifo cuscan marifi man ato tanapaoni. Yoshin chacafu nai muran icafoan aton niaifo Satanás man tanapaoni. Nanton natian nan nicayosmamisifoan ato nomuran ato shinanchacamamisi.

³ Nantifi non nicayosmamisi cuscarari ipaoni. Non ahuara chaca huapaiyai cuscan non huapaoni. Non chaca shinanmisi cuscari non huapaoni. Upa Diosin nantifi nicayosmamisifo ato onaintimacoin omitsiscapanonfo. Norifi non ato cuscara chacacafia nan icaifo cuscan non aiton nocorifi onaintimacuana.

⁴⁻⁵ Non nocon chaca shatuataima non Diosimaqui ifiano Upa Diosin nocohuun fasi noicoincain nocohuun ramapai. Nan Cristo afanan funimani cuscan ahuunshon nocori funimatiro non afu funi cafiscashu non afu nipanon. Non ahuara shara huua rafanancai noco numaima non omitsiscapanonma. Diosin afin nocohuun ramapaicain noco cashman numa. Ascashon nocon chaca soashona non afu nipanon.

⁶ Upa Diosin Cristo funimanitian norifi non afu funini cuscaracoin afu nipashquin. Ascacun non afu rafuano Cristo Jesús Diosin icarifia norifi non afu ica cuscaracoin.

⁷ Ascan Jesucristohuunshon Upa Diosin nocohuun cashman ramapaicain noco noiquin finacoinshon noco shara huamisi. Ascashon nantifi yorafu ismapacushquin fasi nocohuun noiquin noco shara huamisi.

⁸⁻⁹ Asca afanan un mato yoi. Non ahuara shara huahuu rafanancai noco Diosin numaima non omitsiscapanonma. Diosin afi nocohuun ramapaicoinshon noco cashman numai noco chaca soashoshquin. Ascan tsoacai iscatiroma, –Ufin Dios shara huamisiquin. Ascashufi un Dios fu ipatiroquin, –ishocai tsoan anori yoitiroma. Ascata non Jesús icoinra huaiton Upa Diosin noco numatiro non afu ipanon.

¹⁰ Diosin noco onihuani non Jesucristohuunshon yonosharashonon. Noco oni huataima noco amapaiyai cuscan shinanyoni non futsafo shara huashonon.

Cristo nocon ointi shara huashotiro

¹¹ Ascan mancai Israelifoma. Uhuun caifoan matohuunooa yomisifo isca huaquin, –Nafocai nocon caifoma. Nonfin Diospan yorafuquin. Nanfocai Diospan yorafoma. Diosin noco yononi cuscan nantifi furonanfacufo foshqui rupa shatupacunon ishon. Diosin noco yononi cuscan non aiton tapinonfo non Diospan yoracun. Caifo futsafocai foshqui rupa shatupacuafoma. Ascan non tapitiro afocai Diospan yoramaran, –ishon uhuun caifo Israelifocai yomisifo.

Ascan man Jesús icoinra huataima man ipaoni cuscan ointiaquimayamacahuun.

¹² Shinancapon. Ipaoni mancai Cristo fu iyomisima. Upa Diosin Israelifo catonni cuscan huafainricai mato catoantaima man atofu ahuun yorafu inon. Ahuun yorafu yoiyotiani cuscan huafaincai mato yoiataima. Man shinangui isca huamisi, –¡Ohua! ¿Non ahuuscatiromun noco chaca soashonon non Dios fu ipanon? –ishon man shinapaoni. Nantianri man icoinra huafoma muran iyopaoni man Dios fu rafuyamacain man onanyopaonima.

¹³ Ascashon mancai Diosihuunooa shinanyopaonima. Ascafia Cristo Jesús matohuunoashu naino ahuun imi foni man afu ipanon.

¹⁴ Ascashu Cristohuunoashufin non noinantiroquin. Uhuun caifo Israelifo yafi mani futsafo noco nannorifosi shinanmasharatiro non ahuunoashu noinantanancaim afanan non noincasmatananonma. Ahuatocai afanan noco amaqui imatiroma. Natianfin non Cristohuunoashu yora fusti cuscarafuquin.

¹⁵ Ascano nocohuunoashu naino noco shunifoan noco yonofain noco cunushoni cuscaicai afanan noco yonotiroma non Dios fu ipanon. Ascano Upa Diosin uhuun caifo Israelifo yafi mani futsafori ahuun yorafu noco imashquin non funa cuscaracoinfo non inon. Ascatan afanan non noincasmatananonma. Ascatarocon natian isharcainnonfo. Nanscarafi Upa Diosin noco huamapai yora fusti cuscara noco imashquin.

¹⁶ Uhuun caifo Israelifo yafi mani futsafori Jesús ato ihui coyan iquinanqui nashoni. Nansacun Upa Diosin nan rafu man ato raunan huaa afanan afu isharanonfo. Ascashu noincasmatananyamacai yora fusti cuscara ato imanon.

¹⁷ Ascano mani futsafoancai Diosihuunoo tsoan shinanyopaonima. Uhuun caifo Israelifoan Dioshuunoo shinanmisifo. Ascan Jesús nan noco rafuhuunoashu mai ano oni ahuunoashu non Dios fu ipanon. Ato yoipaoni isca huaquin, —Natian Upa Diosin mato rau huatiro man afu ipanon, —ishon ato yoini.

¹⁸ Ascano Jesús noco nashonicun ahuun Yoshin Shara fustihuunoashu Israelifo yafi mani futsafori Upa Diosiqui funonfo afu rafupacushquin.

¹⁹ Ascacun mancai afanan yora futsafo cuscarama. Natianricai man afanan Dios onanmisima cuscarama. Natianfin man Diospan yorafoquin. Nan mani futsafori Diospan yorafoquin. Ascacun ahuun facu futsafofin maton yorafoquin. Manfin nanscarafosiquin.

²⁰⁻²² Upa Diosin ahuun yorafofin nan pushu shara huamua cuscarafokin. Non pushu tau huaquin quishi mutsisipacoin non yopatiro. Chipo nantifi pushun canofo non ichanan huatiro. Nanscarifi aquin Jesús fu rafumisifo futan Diospan tsain yoimisiforifi nan pushu cano shara cuscarafokin. Pushu cano shara yamainocai non ahuuscashon fomancayan shara huatiroma. Nanscarifiái Jesús fu rafumisifo non Diospan tsain yoimisifoanri noco yoiyamainocai non ahuuscashon icoinra huacuanama Diospan yorafo iishquin.

Ascano Cristo Jesusfin nocon pushu quishi mutsisipacoin cuscarafokin. Pushu quishi yamainocai non pushu huatiroma. Nanscarifi aquin Cristo yamainocai non Diospan yora icuanama. Ahuunoashufin nan pushu shara huamua cuscara non itiroquin. Nonfin nocon Ifohuunoashu pushu mutsisipacoin cuscarafokin ahuashtacai chaca amuran iquitiroma. Pushu yonomisiton ahuarafitiro pushu huashquin. Nanscarifi aquin natian Upa Diosin icoinra huafoti ahuun Furunhuunshon noco nannorisi shinanmaino non ahuun pushu cuscara shara inon ahuun Yoshin Sharahuunoashu non afu iishquin.

3

Diosin Pablo yononi mani futsafo Jesushuunoo yoinon

¹ Uhuun yoramishtichin unquian Pablo un mato yoinon. Mancai uhuun caifo yamafiacun un mato Jesucristohuunoo tapimamisi marifi man Diospan yorafo inon. Ascaiton oinquin Jesús icoinra huamafoan ua cunu muran iquimanifo. Ascan matohuunshon ua iquimanifo.

² Upa Diosin mato shinanfain matohuun ramapaicain mato tapimapai. Ascashon ua catonfain matoqui ua nichini un mato yoinon.

³ Upa Diosin ua tapimayoni cuscaicain tsoa futsan tapiyomisima. Matohuun noicoinquin ua nichini marifi man ahuun yorafo inon. Ascan nanfohuunoo un mato ichapama cunushoni. Nan man man nicamisi.

⁴ Ascan un mato cunushona cuscan oinquin un Cristohuunoo tapia cuscan huafain marifi man tapitiroquin. Tsoashta tapiyopaonima.

⁵ Ascacucái Diosin tsoa tapimayonima. Ascan natian Diospan Yoshin Sharahuunshon nan Jesús fu rafumisi sharafo yafi Diospan tsain yoimisi sharafori man ato tapimana.

⁶ Ascan nan tsain sharaçai tsoan Jesushuunoo tapiyopaonima. Ascan mani futsafori Upa Diosin yorafo itirofo. Ascacun natian matorifi Diosin tapimai. Israelifo yafi mani futsafo Jesushuunoashu Diospan yora fusti cuscarafokin. Ascano Upa Diosin uhuun caifo Israelifo yoiyotiani cuscan Jesucristohuunshon manifoti nanscarifi huaquin inantiro.

⁷ Upa Diosin uhuun ramapaiquin ua catonni ahuun yonomati un inon ahuun tsain shara Jesushuunoo un ato yoinon. Ascashon ahuun curushu ua inanni manifoti Furunhuunoo un ato yoinon.

⁸ Shinancapon. Uncai ahuaama. Nantifi Diospan yorafoan ua finoncoianfo. Ascafia Upan Diosin uhuun ramapaiquin ua catonni mani futsafo un tsain shara Cristohuunoo un ato yoinon. Aafi ahuun yorafo inain cuscan fasi sharacapacoin. Tsoancai ascara shara oinyomisima. Cristo noco shara huaquin futsai cuscaçai tsoashta tapiyomisifoma.

⁹ Upa Diosin nantifi onihuanonpacoai cuscan afin tapiyoni. Tsoashtacai Jesushuunoo tapiataima. Ascacun ua catonni manifoti Furunhuunshon un ato yoinon. Upa Diosin ua tapimani cuscaçai atirifi tsoa tapimayoima.

¹⁰⁻¹¹ Upa Diosin shinanquin tau huani cuscan nocon Ifo Jesucristohuunshon ani. Natian Jesús icoinra huafohuunshon niaifofoan nai muran icafo futan ahuun oinmatifo nan a fu nai muran icafoanri ato tapimashquin. Ascan nicacashon yoishquin isca huaquin, —¡Aicho! Nocon Upa Diosin aca cuscan fasi sharacoin. Arus fusti nantifi tapicoian. Nanton ahuamamishti huatiroman, —ishon yoishcani.

¹² Ascashon non Jesús icoinra huashu non ranotama Diosqui otiro afu tsainshquin. Ascashon non tapitiro non aqui oaitocai noco potaima. Ascano ratutama non Dios fu itiro.

¹³ Ascatan un matohuunoashu omitsiscaitian shinanchacayamacahuun. Maton nomuran omitsiscayamahuu. Nan un omitsiscai marifi man afu isharanon.

Cristo nocohuun noi

¹⁴⁻¹⁵ Ascan Upa Dios cufishquin un ratoconun mai chachimisi. Ascacun nantifi icoinra huafo nai muran icafo futan mai ano icafoan nocon Upaquin. Nonfin ahuun facufoquin. Ascacufin ahuunoashu nan Jesús icoinra huafoti non anu yai futsutiroquin.

¹⁶⁻¹⁹ Un mato Upa Dios cufishoquin isca huamisi, —Upa Diosin, nan ahuara sharafofin minaquin. Ascan nan mia icoinra huafo Efeso anoafo min Yoshin Sharapan aton nomuran mutsismainifoanhuun min Furun Cristo icoinra huashu mifu rafufafainonfo. Min fasi atohuun noimisi cuscan huafain ato tapimahuun.

Ihui tapo sharano fana foaisharatiro cuscan Cristofin Efesofoan aton tapo mutsisipa cuscaroquin. Asca nan min atohuun noia tapicanashu nanforifi isharatirofoquin. Cristofin aton ihui tapo mutsisipacoin cuscaroquin ahuunshon futsafo noicoionfo. Upa Diosin Efesofo nantifi mia icoinra huafoin aton nomuran ato shinanmarsharahuu Cristo atohuun noicoionmisi cuscan tapinonfo. Criston nantifi nocohuun noicoionmisi cuscan non tapifiatiro fasi finacoinquin nocohuun noicoion. Upa Diosin, un mia cufia cuscan nantifi Efesofo tapimahuun. Ascashon min ato imapaiyai cuscan anonfo nantishotapiquin mifu rafucoionfo, —ishon un mato Upa Dios cufishofaini.

²⁰ Non Upa Dios nocon nomuranshon shinain cuscan non yocafiamisi atofin fasi finonmafain noco ashotiroquin. Ahuun curushhuunshon nocon nomuran mutsismainifoanna cuscan huafain ahuamamishti noco ashotiro.

²¹ Ascacun non Upa Dios yoiquin isca huanon, —Upa Diosin, min fasi sharacoin. Min Furun Jesucristohuunshon min noco shara huamisiran, —ishon nantishotapiquin non yoifafainon. Nantifi icoinra huayopaonifo yafi natian icafo non inonpacoaifoanri Dios yoisharapacunonfo. Nanscasi ipanon. Amen.

4

Diosin ahuun Yoshin Sharapan shinain cuscaricoinra huafoan nannorifosi shinanmisifo

¹ Ascan un nocon Ifo yonoshonaiton ua cunu muran iquimanifo. Ascacun uhuun yoramishtichin ua nicasharacapun. Un mato cayacafi shinanmapai. Upa Diosin mato catonni man Jesucristo tanasharanon. Ascacun nan mato amapaiyai cuscan acahuun futsafoan mato oinquin nocon Ifohuunoa shinansharanonfo.

² Ascashu, —Tsoa futsacai ua cuscaramaran, —ishon shinanyamacahuun. Ascatamarocon icoincain futsafohuun ramapaicahuun tsoa ahuuatama icahuun. Funaquima manasharacahuun. Futsan chaca huamisi cuscan huafaiton ahuun noiquin ahuun shinanchacayamacahuun.

³ Diospan Yoshin Sharahuunshon Jesús icoinra huaa futsafo fu isharacahuun. Unimayanan isharatanancahuun. Nantishotapiquin nanscasi huatanancahuun.

⁴ Ascano Jesús icoinra huafosi Diospan yorafoquin. Ascan nonfin ahuun caya muma cuscarofoquin. Diosin ahuun Yoshin Shara fustiton. Afin noco cuna non Jesús icoinra huacun noco imapaiyai cuscan non tapia. Noco yoiyotiani cuscan Cristo oaitian noco inanshquin. Nan fustifin non manasharamisiquin.

⁵ Nanfin nocon Ifo fusti. Nan fusti non icoinra huaiton noco nimapacutiro. Non un muran iquimamushon non yorafo ismano Upa Dios ahuun furumun Yoshin Shara fustiton noco iquitiro.

⁶ Nocon Dios fustifin. Nan icoinra huafoan nocon Upaquin. Arus fustitofin nantifi noco iquimisiquin. Ascashu nantifi non ahuuna inon noco amapaiyai cuscan non anon. Nantishotapiquin nantifi nocofu rafucacaini. Aafin nantifiton nocon niaifo fustiquin. Ahuunoashu fusti nantifi non itiro.

⁷ Ascafata Criston nantifi nan non icoinra huafoti afi futsa futsa huaqui noco imapaiyai cuscan huafain noco ima non ahuunshon icoinra huashon futsafo non shara huanon.

⁸ Ascano Diosin tsain Cristohuunoa cununi isca huaquin,

“Mai anoashu Apa Dios ari nasonitian nan icoinra huafoti ato numani afanan Satanás aton ifo inonma. Ascatama Jesús tanasharanonfo. Nantianri nantifi ahuun yorafo imapaiyai cuscan ato imani ahuunoashu shara huatananonfo,” ishon cununi.

⁹ Ascashon cunuquin isca huani, —Cristo afanan Apa Diosin icari nasoiran, —ishon aqui cununi. Nannori cununi non tapitiro Apa Diosin ari cataima iquisi na mai ano fotoyoni noco cuscara iishquin. Ascashu fasi omitsiscayoni.

¹⁰ Apa ariashu mai ano fotoyoni. Nanton nai ari icafo yafi mai anoafori ato finoinni-foanna. Ascatan nan nai ariafao futan mai anoafao ato ifo iishquin.

¹¹ Nantonfin noco catonpacuni noco amapaiyai cuscan ashu non shara huatananon. Ascashon afu rafumisi futsafo ato imafain nocorifi nichini ahuunoo futsafo non ato tapimanon. Futsafori catonni afin yorafo yoipaiyai cuscan afohuunshon ahuun tsain shara ato yoinon. Futsafori catonni nan tsain shara ahuunoo yoinonfo icoinra huashcaquin. Futsafori catonni ahuun tsain shara icoinra huafo tapimafain ato cushusharanon ahuun tsain tanasharanonfo.

¹² Nantonfin nantifi ahuun yorafo itisharamanaquin ahuunoashu shara huatananonfo. Ascacufin finonmafain non Jesús tanasharaquin. Nofiri non pimamuaino nocon caya mutsisipa sharacoin itiro. Nanscarifiai non futsafo fu shara huatanaino Dioshuunoashu non mutsisipa sharacoin Jesús cuscara non itiro.

¹³ Ascano nannorisi non icoinra huafain non Diospan Furunhuunoo tapinon. Ahuunoo tapitacai non afanan facu cuscara itiro. Nan nocofunu mapo shara ya Jesús cuscaracoin non itiro. Ascashu nan Cristo noco imapaiyai cuscan sharacoin non itiro.

¹⁴ Non ascatacaí facufo cuscara afanan non itiro. Futsan facufo ahuafo yoiaiton icoinra huatiro. Futsan ato yosiaiton icoinra huafain futsari chipo ahuafo yoia cuscan nanforifi icoinra huatirofoquin. Ascashon futsa futsatapafo icoinra huatirofo. Ascacun noncai paramisifoan noco yoipaiyai cuscan non icoinra huatiroma. Noco yoicaquin, — Un mia icon yosiaran, —ishon noco yoipaifiaifoan Diospan tsain anorimacun noncai ato icoinra huatiroma. Noco fuparapaicani.

¹⁵ Noncai ascarama. Ascatacaí nan icoinra hua futsafo noicoingquin non ato icon fustisi yoitiro. Non ascaifin finonmafain nocon Ifo Cristo cuscara non icacainicain.

¹⁶ Ahuunoashu non ahuun caya muma cuscara itiro. Afin catontiro nonmain ahuu cuscaracoin. Ahuun curushhuunshon afin noco amapai cuscan non atiro shara huan tananshquin. Non noinainno non shara huan tanantiro.

Cristohuunoashu non yora funa shara itiro

¹⁷ Ascano nocon Ifohuunshon un mato shafacafi yoinon. Icoindra huamafo icafo cuscan afanan ascayamacahuun. Nanfoanfin ipaitisi chaca shinannisifoquin.

¹⁸ Ascashu yoitimashunifo. Aton nomuranshocai shinansharatirofoma Diosin ato imapaiyai cuscan aashcaquin. Afocai afu rafumisifoma ato nimapacunon.

¹⁹ Ahuara chacafosi huai fuyacanashucaí afanan tsoa rafipaitiroma. Nanscaisiai fuyafo, —Nansanonquin. Ahuara chaca finonpaiquin finonon, —ishon anori fusti shinannisifo. Chaca fustisi shinancani. Nocofunufu aton ahuinma fu imisifoquin. Nanscarifi ainfofo aton funumafo fu icaifano. Nanscara chaca futsa futsatapafo huamisifo. Tunuyamacaicani. Fasi finonmafain chaca huapaicani.

²⁰ Nanfoanfin nansca huamisifoquin. Ascafia Cristocai mato anori yosimisima.

²¹ Ascatacaí Jesushuunoo mato ahuun tsain iconcain yosiaiton man man nicamisi.

²² Ascano mato yosimisi isca huaquin, —Marifi man man chaca huapaoni. Chaca fustisi man fuchipaipaoni. Nan chacafoan mato parafafaini. Afanan afo fuchipaiyamacahuun. Afo potacoincahuun, —ishon mato yosimisi.

²³ Ascacun man shinanpaoni cuscan afanan shinanyamacahuun. Natian shinansharacoinpacucahuun. Jesús shinain cuscan huafain maton nomuran marifi shinancoinc-ahuun.

²⁴ Diosin sharacoin fusti cuscara funa shara icahuun. Jesús mato nashoni maton chaca soashonano Upa Dios cuscara shara man inon.

²⁵ Nonfin Cristo ahuun yorafoquin. Ascacun afanan chaniyamacahuun. Mato fu icafo icon fustisi yoifafaincahuun. Non icoinra huafain Cristo ahuun caya muma cuscaracoin. Ascano noco murannoashu futsa chanicun ahuunshon nantiffain non mutiro.

²⁶ Man mua sinai matsiriscacahuun. Man ascayamaino man chaca huatiroquin. Ascacun fari cataima matsicahuun.

²⁷ Man sinai unuyamacaiaiyaiton Satanás mato yonotiro. Man sinafiai matsiriscaitocai mato chaca huamatiroma.

²⁸ Ratoran futsan mato murannoashu yomutsoaiton a yoisharacahuun afanan yomutsononma yonoquinsharacahuun ahuun rafanan fiishcaquin. Ascان nan ahua futsa yopaitonfin man inantiroquin.

²⁹ Ahua chaca yoitamarocon shara fustisi yoifafaincahuun. Man ato yoiaiton nicashon futsafoan nan tsain shara nicaquin nocon Ifo finonmafain tanasharatirofo.

³⁰ Diospan ahuun Yoshin Shara matoqui nichini matofu rafupacunon Jesucristo oaitian afu man ipanon. Ascacun ahuunshon tapitirofo non Diospan yorafocun. Ascano man natian icai cuscan aquin Diospan Yoshin Shara ahuun nomuran omitsiscamayamacahuun.

³¹ Ascacun futsafohuunooa shinanchacayamacahuun. Tsain isininpaton iyamacahuun. Sinayamacahuun. Sinacani mucayamacahuun. Futsa roayamacahuun. Chaca futsa futsatapafo shinanyamacahuun.

³² Ascatarocon mafin ranan noinancahuun. Nantifihuun ramapaicahuun. Upa Diosin Cristohuunshon mato rauhua cuscan huafain nanscarifiai rau huatanancahuun.

5

Ahuuscamain Diosin facufo atirofoquin

¹ Manfin Diospan facufoquin. Fasi mato noicoi. Ascacun Upa Diosihuun caocahuun.

² Cristo nocohuun noicoi. Noco nashoni nocon chaca soashoshquin. Upa Diosin ahuun facuhuun fasi noicoi. Unimani futsafohuunoashu naiton oin. Ascano Criston noco noimisi cuscan marifi nantifihuun noicoifafaincahuun.

³ Ascano ahuara chaca shinanyamacahuun. Ainfofoan maton funuma fu iyamacahuun. Nanscarifiai nocofunufon maton ahuinma fu iyamacahuun. Ascadari yora futsan ahuun ahuara fianpaiyamacahuun. Diospan yorafocai ascatirofoma. Ascaraaya tsainyamacahuun.

⁴ Ascariifatan tsain mutsama iyamacahuun. Cashu mutsamayamacahuun. Diospan yorafocai ascaraaya tsaintiroma. Ascatama Dios yoisharatirofo isca huaquin, —¡Aicho! Upa Diosin min noco shara huafafainiran, —ishon yoitiro.

⁵ Natian un mato yoiai cuscan man icoinra huatiro. Ratoran futsan shinanchacamisiton ahuinma fu icaino ainfofori nanscarifiaifono funuma furi icain yora futsana fipaimisi. Nan yora futsana ahuara fianpaiquin nan Dioscoin fuchipaitama ahuara futsahuunsi nuuquin nancai fuchipaifafaini. Afanan un mato shafacafi yoi. Tsoan chaca huaicai Jesucristo Apa fu icari nocotirofoma. Nan Jesús niaifo icaricai ahuara chaca afu itiroma. Ascaran chaca huamisifocai Cristo icari noconacafoma.

⁶ ¡Oinfain! Atirifo mato amaquiri yosipaicani isca huaquin, —Nanfoan chaca huafianifin Dios niaifo ari afu ipatirofoquin, —ishon mato yoipaicani. Ascacun oinfain mato paracani. Chaca futsa futsatapafo huaquin shatuyamaifon Upa Diosin atoqui sinai. Yoitimaifon oinquin. Ato omitsiscapanacafo muran potashquin.

⁷ Ascان icaifo cuscan ayamacahuun. Ato fu rafuyamacahuun mato chaca huamatirofoquin.

⁸ Nan acaifo cuscan marifi man chaca huayopaonifiashon natian man Diospan facufo. Ascashu ahuunoashu shafacafi isharacahuun.

⁹ Ascano Cristo matofu rafuaino icoinsharacahuun. Maton nomuranshon cayacafi shinansharacahuun. Diosin ica cuscan marifi icoinsharacahuun.

¹⁰ Diosin fuchipaiyai cuscan huafain tapisharacoincahuun. Nanscacoicahuun.

¹¹ Nan Jesús icoinra huamafoan chaca shinainfo cuscan atofu chaca huatananyamacahuun. Ascatarocon icoinsharaquifin a chaca huaifo man ato oinmactirofo.

¹² Ascان chaca huaifo cuscarahuunooa tsainyamacahuun. Nan chaca huaifo cuscan yoiquifin marifi man chaca huatiroquin. Ascashu man rafipaitiro.

¹³⁻¹⁴ Faquish muran chashamashon non oinsharatiro. Nanscarifi aquin yoran chaca huashon fomanpaifaiton Diospan tsainhuunshon aton chaca shafacafi tapitirofo. Ascano Diospan tsain yoini isca huaquin,

“¡Oinfain! Man Diosihuunooa shinanyamai man naa cuscaracoinfo. Afanan ascayamacahuun. Oshapacui cuscara iyamacahuun. Funinifoancahuun. Maton chaca shatucahuun Diosihuunooa shinashcaquin. Man ascaiton Criston maton chaca soashofain shafacafi mato oinmatiro Dios man tanasharanon.”

¹⁵ Ascacun ¡Oinfain! Icoisharacahuun. Diospan tsain tapiafoma cuscara iyamacahuun. Nan Diospan tsain cununi cuscacoicahuun.

¹⁶ Ascano natiantan nan icoinra huamafoan fasi ahuara chaca finonquin finacoincaini. Ascacun nan man oiaini Dioshuunshon futsafohuun ramapaiquin ato shara huacahuun ato yoisharacoinfaincahuun.

¹⁷ Ascacun amaquiri shinanyamacahuun. Ascatarocon Diosin mato amapaiyai cuscan nan fusti tapicahuun.

¹⁸ Ascashu paunyamacahuun. Pauncacaini man fasi chacacoin itiro. Pauncaquimaron Diosin Yoshin Shara fu rafucain yonoshosharafaincahuun.

¹⁹ Ascatan Diospan tsain shara ichapa yoinonancahuun. Nocon shuni David fanain ini cuscan fanaincahuun. Diosihuunshon futsafo fanainshocahuun. Maton nomuranshon nocon Ifo shinancahuun.

²⁰ Ahuara ahuuscarafaiton nocon Ifo Dios yoiquin isca huafafaincahuun, —¡Aicho! Noco Ifo Diosin, min ua shara huafafainiran, —ishon Upa Dios yoifafaincahuun. Nocon Ifo Jesucristohuunshon anori Upa Dios yoifafaincahuun.

Ainfofo yafi aton funufohuunoo

²¹ Cristo nicasharapaifain mafi rananri nicanonancoincahuun. Nantifi icoinra huafo ya asca huatanancahuun.

²² Ainfofoan man maton Ifon Jesús nicai cuscan huafain maton funuri nicasharacoincahuun.

²³ Nan icoinra huafoan nocon Ifofin Jesucristoquin. Nanton noco iquifain noco cushushara. Nanrifi nocon Numamisi. Nanscarifi aquin Diosin nocofunufu yononi aton ahuinfo iquisharafain ato cushusharanonfo.

²⁴ Nan icoinra huafoan Cristo nicacoianfo cuscan nanscarifi aquin ahuinfoan aton funufu nicacointirofo.

²⁵⁻²⁶ Ascan nocofunufufoan maton ahuinhuun noicoincehuun. Cristo noco noiai cuscan huafain maton ahuinhuunri noicoincehuun. Non icoinra huafoti nocohuun noicoincehuun omitsiscacain noco nashoni nocon chaca soashoshquin ahuun yorafo non inon. Non ahuun tsain icoinra huaiton noco catonni nan chaca huayomisima cuscara noco imashquin.

²⁷ Non ascaiton ahuutiaran nocoshon noco oinshquin non ahuun shinanshara cuscacacun. Nantifi noco chaca soashoshquin. Ascano tsoancai noco yoantiroma Jesús noco imasharano. Ascano Diospan yora sharafo Jesús noco oinshquin.

²⁸ Nan mafiri man musuhuamuai cuscan maton ahuinfori cushusharacahuun. Tsoan ahuin noisharashofin afiri noimuaquin.

²⁹ Shinancapon. Tsoacai afiri chaca huamumisima. Non nofiri musu huamutiro. Fonainquin nofiri non pimai. Nanscarifi aquin Jesús ahuun yorafo cushusharamisi.

³⁰ Ascan nonfin ahuun yoraquin. Upan Diosin Furun cushua cuscan huafain nocorifi Furunmun cushusharamisi.

³¹ Ascano Diosin tsain cunuquin isca huani,

“Ascacun nocofunun ainfo fiashucaí afanan apa yafi ahua fu itiro. Apa yafi ahuamaqui pashcatiro ainfo fi. Ascashu nan oshati fusti muran afu itiro. Ascano nan fusti cuscaran,”

ishon cununiquin.

³² Nan na rama un mato Diosin tsain yoia cuscan tsoancai atirifi tapitiro. Ascafia nan un mato yoia cuscan un Cristo yafi nan icoinra huafohuunoo un yoi.

³³ Ascashi funufoan mafiri man noiai cuscan maton ahuinfohuun noicoincehuun. Ainfofoan maton funufohuunooari shinansharacoincahuun. Aqúi tsain chipuyamafain ato nicasharacoincahuun.

6

¹ Facufoan maton upa yafi uhua nicasharacoincahuun. Nocon Ifon Diosin yononi cuscan maton upa futan uhuan mato iquina. Ascan man ato nicasharacoianshu marifi man icoinsharatiro.

²⁻³ Ascashon Diosin Moisés yononi yorafo cunushoquin isca huanon,

“Maton upa yafi uhuahuunoo shinansharafain ato nicasharacoincahuun. Atohuunoo yoisharacahuun,”

ishon cununi. Nan Diosin yonoquin tau huafain yoiyotiani isca huaquin,

“Upa yafi uhua man shara huacun urifi un mato shara huai. Nuno mai anoashu man unimayopacunon,”

ishon Diosin yoiyotiani.

⁴ Natiantan un apafori yoisharapai. Maton facufoqui tsain chipuyamafain curushcain yoiyamacahuun. Man tsain isininpaton ato yoiaino matoqui sinatirofo. Asca huaquimarocan ato tapimasharacahuun chaca huanonfoma. Nocon Ifon Jesús nocohuun noiai cuscan maton facufo yoisharacahuun noco Ifo tanasharanonfo.

⁵ Yonomatifoan maton ifofo nicasharacoincahuun. Nuno mai anoshon maton ifofoan mato yonotirofo. Maton Ifo Criston fuchipaiyai cuscan man samamashta ashoriscapaitiro. Nanscarifi aqúi maton ifon nantori mato yonopaiyai cuscan shara huashoriscacahuun.

⁶ Maton ifofoan mato oiainnosi yonoshosharaquma matohuunoo shinansharanonfo. Mato oianmafiaifono unimacai ato yonoshosharacahuun. Man ascaiton oin unimanonfo. Man mato ifo yonoshosharaqúfin nan noco Ifo Criston yonoshoshara man huaicain. Ascan nan nuno mai anoashu mato ifo fusti man unimana cuscan huafainri noco Ifo Diosin mato amapaiyai cuscan ashocahuun. Ascashu noco Ifo Jesús ahuun yonomati iishcaquin.

⁷ Ascan mato ifofo fasi unimacain yonoshosharaqúfin nan noco Ifo Dios man fasi unimacain yonoshoshara cuscan.

⁸ Ascan man man tapia yonomatifo iyamarai oinmatifomari nan yonoshosharaifoan nocon Ifo Jesús ato inansharacoinshquin.

⁹ Nanscarifi aquin ifofoan maton yonomatifo shara huafain ato omismati huayamacahuun. Man man tapia aton Ifon Jesús nai murannoashu nanrifi maton Ifo. Jesús noco oin nanscarafosi yonomatifo yafi ifofori atocai futsa ichapama noifain futsa fasi finonmafain noima. Ascata ma nanscarafosi huaquin nantifi nocohuun noiaquin.

Criston nan icoinra huafo noco itishara huaa noco noicasmaifoan noco ahuusca huanonfoma

¹⁰ Ascano uhuun yoramishtichin uhuun tsain unutaquin un mato yoinon. Nocon Ifo fu rafucahuun ahuun curushu mato inannon. Man ascaifi ahuunoashu man mutsisipa shara itiroquin nan tanasharashu.

¹¹ Un ahua ra futsahuunoa un mato yoi man tapisharanon. Ranushumuafu aton niaifoan ato yonotiro itisharanonfo futsafoan ato ahuusca huanonfoma. Ascashon nan yopaifo cuscan ato inantiro. Aton ashi yafi piafo non ahuun cuno maiti inanfain ahuun cuno shofucumuti sahuufain ahuun cuno sapa ponutamucai ashin iquinonma. Nanscarifi aquin Upa Diosin mato inanpaiyai cuscan nantifi ficahuun yoshin chaca Satanás mato chaca huamapaiyai cuscan aashquima.

¹² Non Jesús tanasharaitocai yorafoan noco unumatiroma. Ascata ma nan yoshin chaca Satanás yafi yoshin chaca futsafoanri noco curushcain chaca huamapai. Nanfo non oinyamafiatiro noco asca huapaifafaini. Nanfoan icoinra huafo ma yonofafaini chaca huanonfo. Nan yoshin chaca ichapafoan.

¹³ Ascacun Upa Diosin ahuun curushu noco inanpaiyai cuscan ficahuun mutsismashcaquin yoshin chacafoan matoqui nocoshon man itisharashu pacushcaquima. Ascano nan yoshin chacafoan mato chaca huamapaiyaiton Diospan curushhuunshon man finontiro mato chaca huamanofoma. Ascan Diosin mato amapaiyai cuscan nantifi man acoinnashu man isharatiro yoshin chacafo matomaquinoa potashcaquin. Asca Jesús fu rafushon man chaca huashquima.

¹⁴ Mato yoia cuscan ranushumuafu itishara cuscan marifi itisharacahuun nan yoshin chacafo matoqui nocoshon mato chaca huamapaiyai cuscan huashquima. Upa Diosin mato imapaiyai cuscan fusti acahuun itisharashcaquin. Iquisi ranushumuafu ato nanushumuti yopacani aton camisa nonoaino pacushcaquima. Nanscarifiai man icocoiaino yoshin chacanun mato pacumatiroma. Ranushumuafu ahuun cuno sahuuti shofucumua sahuumisifo non noicasmaifoan aton ashin ahuun ointiqui tsacanonma. Marifi Diosihuunoashu isharacahuun yoshin chacafoan maton ointi chaca huanonma.

¹⁵ Ranushumuafu aton sapato shara sahuutirofo aya ichosharashcaquin ahuashta puamashquima. Nanscarifiai marifi itisharacahuun futsafoqui nocoriscashon Diosin tsain shara man ato yoiaino aton ointi unimanonfo.

¹⁶ Ascan ranushumuafu sapa nituhuati pia yafi ashi iquinonma tsomatiro nan noicasmaifoan aton piannonma. Nanscarifiai maton nitumati man yopai. Man noco ifo Jesús icoinra huaiton nan yoshin chacafoan maton nomuran shinanchacamapaiyai cuscacai man atiroma. Ascano non Jesús icoinra huaino nan nocon nituhuati cuscara itiro.

¹⁷ Ranushumuafu ahuun cuno maiti sahuutirofo aton mapo cushusharashcaquin nan noicasmaifoan ato mapoqui ahuusca huanonfoma. Nanscarifiai marifi man Jesús icoinra huashu Upa Dios fu man nipatiro. Man ascaitocai yoshin chacanun mato ahuusca huaitiroma. Ranushumuafu aton nopo fitirofo nan ato noicasmaifo ahuun rutushcaquin. Nanscarifiai Diospan Yoshin Shara ahuun nopo cuscara ficahuun. Nan nopo cuscara fin Diospan tsainquin. Nanrifi man yopacoin nan yoshin chacafo matoqui nocotima huashcaquin.

¹⁸ Ascacun Diospan Yoshin Sharahuunshon Dios unutama cuffafaincahuun. Aqi mutoi futsucaquima. Ahuara futsa ahuuscarai cuscan Upa Dios cufficahuun. Ointiaquimacaquima. Upa Dios cuffafaincahuun. Nantifi Jesús icoinra huafo ato cuffishofafaincahuun.

¹⁹ Ascashon uarifi cuffishocahuun Diospan Yoshin Sharahuunshon ahuun tsain shara ranotama un ato yoifafainon. Nan uhuun caifomafuunoashuri Jesús ato nashoni un yoinon.

²⁰ Ascashon nan un mato yoiai cuscan huafain un yoimisi. Ascacun Cristo ua nichini ahuunshon nantifi yorafo un yoifoanfafainon. Ascacun ua cunu muran iquimanifo. Ua Upa Dios cuffishocahuun un ranotama Diosin atohuun noiai cuscan huafain un ato yoinon.

Pablonun tsain shara ahuun unutaquin Efesofo ato fomani

²¹ Ascan nocon yorahuan Tiquicohuun un fasi noicoin. U futan nocon Ifon Jesushuunoa yonoshomisi. Ascacun Tiquico un mato ari nichishquin. Un icai cuscan huafain urimain ahuuscaiquin mato nanto tapimai.

²² Ascacufin un mato ano nan nichicai nonmain ahuuscaicain matorifi tapimafain maton ointi unimanon.

²³ Ascano nocon Upa Diosin futan nocon Ifon Jesucristo maton ointi unimanon Jesús icoinra huashu man nantifi noinain futsutiro.

²⁴ Man nocon Ifon Jesucristo nantishon tapiquin man ahuun noi unupacuyamaino Upa Diosin nantifi matohuun ramapai. Unquian Pablo un mato cunushoni. Nanscari inon. Nanti.

Pablo

Pablonun Filipos Anoafu Cunu Fomani

Cunu muranshon Pablonun nan icoindra huafo Filipos anoafu cunu fomani

¹ Uhuun yoramishtichin Filipos anoafuan manfin Diospan yorafoquin. Un mato yafi mato niafofo non mato cushumisifori cunu fomai man tapinon. Timoteo natian ufu nuno. Nantori mato yoisharapai. Ascan nonfin Cristo Jesús ahuun yonomati rafuquin.

² Nocon Upan Dios futan nocon Ifon Jesucristo matohuun ramapaiqui matohuun shinan-sharaicai mato shara huafainpainon. Ascashon maton ointi unimamapainon

Icoindra huafo Pablonun ato cufishofafainpaoni

³⁻⁵ Un mato fasi shinain. Nan un matohuunooa shinaintifi unimacain un mato Upa Dios cufishomisi isca huaquin. —¡Aicho! Uhuun Upan Diosin, Filiposofoan min Furun icoindra huaquin tauhuanifotian yafi natiantan u futan min Furunhuunooa futsafo tapimapaifafaincaniran, —ishon un matohuunooa Upa Dios cufifafaini.

⁶ Ascano un icoindra huai man Jesús Ifo huaquin tau huanitian Upa Diosin maton ointi fianananshara huani cuscan natianrifi shafatifi mato fiananan huariai cuscan nan Jesucristo oaitian man nanscasi anon.

⁷ Ascacun un fasi matohuun noiquin. Uhuun nomuranshon nannori un mato shinan-fafaini. Upa Diosin noco shara huamisi cuscan marifi man man u futan mumisi. Ascacufin ua cunu muran iquimaifotian Upa Diosin ua shara huafain uhuun ointi ua shara huashoni. Nan uhuun ointi ua shara huashoan cuscan marifi man man muumisi. Ascan futsafoan Jesushuunooa amaquiri yoifaifon un amaquiri aton yositamarocon shafacaficon un ato yoi tapisharanonfo. Un ato yoimisi isca huaquin, —Jesús noco nashoni nocon chaca soashonano non afu ipanon, —ishon un ato cayacafi yoinon. Upa Diosin ua shinansharamani marifi u futan un muai cuscan man munon.

⁸ Jesucristo nocohuun noiai cuscan huafain urifi un matohuun noi. Ascacun un mato fasi shinain. Urifi un matofu ipaicoinqin. Un icon yoiiai cuscan Diosin ua onancoian.

⁹ Ascacun un mato cufishoni man Dios onancoinfain ahuara iconcoin fusti man tapisharaquin finacoinshon futsafo man noicoinnon.

¹⁰ Ascashon man tapitiro ahuamain shara iyamarai chacaquin. Ascano man Jesús fu rafuashu nan cuscara sharacoin man itiro. Tsoanshtacai matohuunooa ahua chaca ointirofoma nan Cristo oaitian.

¹¹ Nanscashi marifi nan Jesucristo shara huafafainai cuscan man huatiro. Man ascaiton futsafoan mato oinqin yoitirofo isca huaquin, —¡Aicho! Nafu icoinsharamisifo. Upan Diosihuunooashu isharamisifo. Ascan Diosin fasi shararan, —ishon yoishquicani. Un nannori matohuunshon Upa Dios cufifafaini.

Un Cristo fu rafupaipacunaca nan fusti un shinain

¹² Uhuun yoramishtichin un afanan mato yoinon. Ua cunu muran iquimanifo un afanan ato Diospan tsain shara Jesucristohuunooa ato yoiamaishafain. Ascafiaino yora paratamafain Jesús icoindra huafafaincaini. Nan ua chaca huafacashon nanfoanri uhuunshon nan tsain shara Jesushuunooa nicacaquin man icoindra huafo.

¹³ Ascano nantifi ranushumuafu futan nunooa yorafoanri man tapiafo un Cristohuunooa yoiaiton ua cunu muran iquimanifo. Un ahua chaca huayamafiaiton.

¹⁴ Ascatan ua cunu muran iquimafiafocai un funamisifo. Ascatamarocon ranotama futsafo Cristohuunooa un ato yoifafaini. Un ascaiton oincani Jesús icoindra huafo paratamafain ranotama Diospan tsain shara futsafori ato yoifafainonfo.

¹⁵⁻¹⁷ Ascano atiriffain ua noicoinqin uhuunooa shinanmisifo isca huaquin, —Pablon cunu muran iquimafiafocai Upa Diosin tsain yoiiai cuscan tsoan shatumanima ato Jesushuunooa yoiiai cuscan nicasharanonfo, —ishon uhuunooa shinansharacani. Nannori Jesushuunooa shinainfoan yoimisifo. Icon atiriffain nan tsain shara Jesushuunooa un yoiiai cuscan yoifaicashon nanfoan ua shutipaicani. Un icai cuscan ranotama Jesushuunooa yoipaicaquin. Nanfoancai Cristo noicoianfoma. Ascashon shinanqui isca huafo, —Pablon cunu muran iquifiafashon Jesushuunooa yoimisirani, —ishon non yoiaiton nicaquin, —Ahuun ointi non isinmatiroan, —ishon uhuunooa shinanchacamisifo.

¹⁸ Nannori uhuunooa yoifaifonocai un shinanchacatarocon un fasi unimai man futsafo Jesushuunooa yoimisi cuscan. Ascashon futsafoanri shinansharafain cayacafi yoimisifo cuscan man rafucainta Jesushuunooa yoiiai cuscan un fasi unimacoinni.

¹⁹ Ascacun mun tapian man ua cufishonai cuscan yafi Jesucristo Yoshin Sharapan ua ashoain cuscan un fasi unimai. Ascatan nan ahuara ahuu cuscaran un finonfiashucain un shinanchacaima. Ascatarocon nan un finon huain cuscan ua shara huashoin.

²⁰ Upa Diosin ua amapaiyai cuscan un fasi huapaicoincain un rafitiroma. Un rafitamarocon un niyoashu iyamarai un naicain un ratuima. Un ascaiton oinquin futsafoan Jesushuunoo shinansharanonfo.

²¹ Cristo fustihuunoashu un afu ipapai. Ascashu un nairifi shara finacoin itiro unmain nanriashu afu fasi unimacoin cayamaifin.

²² Ascafia un nataima iquisi futsafo Jesús icoinra huamayotiro afu ipanonfo. ¿Ascan ratocaimun sharaquin? ¿Niyoashu iyamarai un naamun shara? ¿Ascacun ratomun un catontiroquin? Uncai tapiama.

²³⁻²⁴ Nan rafu shara. Asca uncai catontiroma. Urifi un Jesús ari capaicoincain afu ishquin. Nan fasi shara finacoinfiashu un shinan man ua fasi yopacoin un mato ahuun tsain shara yoinon.

²⁵ Ascano man fasi ua yopaifin mun tapiaquin. Ascatari mun tapia un nayoataima un matofu iyoano man Jesús icoinra huaqui finacoiashu man fasi unimacointiro.

²⁶ Ascano un afanan matofu iyoaiton oin Cristo Jesushuunoashu man fasi unimacoinshquin. Ascashon man yoiquin isca huashquin, —¡Aicho! Jesucriston min afanan nocoquin Pablo nichian nocon cayacafi tapimasharanon, —ishon man yoishquin. Ascanshu man uhuunoashu fasi unimai finacoinshquin.

²⁷ Ascacun isharacahuun. Man isharaiton oinquin yoitirofo isca huaquin, —Jesús icoinra huafo isharacoinmisifo. Ascashon nan tsain shara Jesushuunoo iconcoiran, —ishon yoishquicani. Ascan un matofu iyoano iyamarai un chaicushon matohuunoo nicaquin un tapitiro man Jesús tanashara. Man nannorisi shinainton Diospan Yoshin Sharahuunshon futsafo man ato Jesús icoinra huamashquin.

²⁸ Icoina huamafoan mato tsain shatumapaifaino mancai atoqui ratushquima. Rahuinmafain man ato Jesushuunoo yoifafainshquin. Ascashu man atoqui ratuyamaiton oinquin tapitirofo mato Upa Diosin numa. Ascashu nanfo funofiaincain man funotama man Dios fu ipanaca.

²⁹ Upa Diosin mato shara huashoan man Cristo icoinra huafain marifi man ahuunoashu omitsiscanon.

³⁰ Un nocon Ifo Jesushuunoashu un omitsiscamisi. Man man maficoín ua oinpaoni natianri man ua nica ahuunoashu un omitsiscaiton. Un ahuunoashu omitsiscain cuscan marifi nanscarifiai man omitsiscain.

2

Cristo nocohuunoashu omitsiscaifianishaquin natian Apa Dioshuunshon nantifi finoncoian

¹ ¿Man Cristo fu rafuaiton mato unimamaimun? ¿Matohuun noiquin maton ointi isharamamun? ¿Diospan Yoshin Shara matofu rafuimun? ¿Cristo matohuun shinaincain matohuunri ramapaiyaiton man man mumisimun? Icon nanfo man man mumisi.

² Nanscacun ua unimamaquin finai cuscarí Cristo maton nanscarifi huaquin shinanmapaiyai cuscan nannorifosi mato nomuran shinancahuun. Ascashu noinancahuun Jesús mato amapaiyai cuscan fusti aashcaquin.

³ —Ufin un apaiyai cuscan fustifin un huaicain. Ascan futsafoan apaiaifo cuscacai un shinanpaima. Ascano un acai cuscamun futsafoan uhuunoo shinansharapainonforan, —icashu cacapaimisi iyamacahuun. Anori itamarocon futsafohuunoo shinansharacahuun. Ascashon atohuunoo yoiquin isca huacahuun, —Nanfoanfin ua finontirofoquin. Ascan uncai ahuama. Jesús fustiton ua imasharatiroran, —ishon futsafo finonmapaiyamacahuun.

⁴ Ascashon mafin man apaiyai cuscan fusti shinanyamacahuun. Futsafoan apaiaifo cuscarí shinanshocahuun.

⁵ Ascashon nocon Ifon Jesucristo shinain cuscan marifi nannori shinancahuun.

⁶ Aafin Dioscoquin. Apa Dios imisi cuscan arifi onihuaifacun. Ascashocai yoiquin isca huapaonima,

—Urifi un Diosquin. Nantifi uhuun Upanari uhuuna. Ascano uhuun Upan nai murannoashu ica cuscariai un nuno mai ano itiroquin. Un ascaitocai ahuaton ua chaca huatiromaran, —ishoncai Jesús anori shinanpaonima.

⁷ Arifi Dioscoinfashon nan Apa Diosin ahuun curushu yafi ahuun ahuamamishti potayoni mai ano oshquin. Ascashu nocofunucoin noco cuscara ipaoni. Arifi nocofunu caintiro cuscan cainni yorafoan aton oinmati cuscara iishquin mai ano fotoni.

⁸ Ascano nocofunucoin cainfianishaquin nancaifin fasi omitsiscain finacoinquin. Nanscaiton Apa yoini isca huaquin,

—Nantifi yorafohuunoashu min ato nashoshquiran, —ishon Apa yoini. Ascashon Apa nicacoiashu ihui coyan iquinanhuunoashu noco nashoni. Ahuashta

chaca huayamafiamisishaquin nai nan chaca huamisi ointsacai omitsiscacaini naani.

⁹ Ascafiacun Upan Diosin Furun afanan funimani afu niaifocoin inon. Ascacun tsoa futsacai Jesús finontiroma. Asca Upa Diosin Furun yoiquin isca huani,

–Mirus fustifi min ua cuscara. Nantifiton aton Ifo. Ascan minfin uhuun Facu Jesucristoquin. Tsoa futsacai mia finontiramaran, –ishon Apa yoini.

¹⁰⁻¹¹ Ascanishaquin natian Jesús nantifi finoncoian. Nai muran icafo yafi mai ano icafo non naamisifo non yoshinofanri. Aqai oshon nantiffain ratoconun mai chachishon yoishquicani isca huaquin,

–Jesucristo minfin nantifiton noco Ifoquin, –ishon yoishquicani. Nannori Furunhuunoa yoicaquin nantianri Apa Diosihuunoa yoisharashquicani.

Jesús icoinra huafoan a icoinra huamafo muranshon ato ismatiro ahuuscashumain isharatiroquin

¹² Ascacufin uhuun yoramishtichin un matofu iyoshon un mato yoiyopaoni cuscan man nanscasi huaquin nicacoinmisi. Natianri un matofu iyamafashon nan un mato yosipaoni cuscan unutama finacoinquin nicasharafafaincahuun cachiquiri huacaquima. Jesús mato numafain maton chaca soashona man afu nipanon. Ascashon nunori shinancahuun, –Nan ua yonopaiyai cuscan un ayamaifin musuquin. Ascashu un funotiroran, –ishon shinancahuun.

¹³ Diosin maton nomuran mato shinansharamafafaini mato amapaiyai cuscan man anon. Afin apaiyai cuscan huafain matorifi nannori shinanmatiro.

¹⁴ Ascacun Diosin mato amapaiyai cuscan fusti huacahuun. Nantifi man acai cuscan huaquin tsain chipufain fochishmanantananyamacahuun.

¹⁵⁻¹⁶ Man ascaiton oinquicai Jesús tanamafoan matohuunoa yoitirofoma isca huaquin, –Nan Jesús tanamisifofashon tsain chaca yoimisiforan, –ishocai matohuunoa yoitirofoma. Man ascaitocai mato tsoan ahuashta rafantirofoma. Ascatamarocon man isharaiton ointirofo man Diospan facucoinfoshon. Man ahua chaca huamisima. Nan Jesús icoinra huamafoanfin ahuara chaca huamisifoquin. Ascashon shinanchaca fustimisifo. Ascasi acani man funofo. Ascashu faquish muran icafo shinantsafo. Mancai ato cuscarama. Ato cuscara itamarocon Dioshuunoasi ato yoifafaincahuun icoinra huacanashu Jesús fu nipanonfo. Ascan manfin ato muranshon nan chashamatinin chasha huaiquin ato ismashaquin a chaca huamisifoan mato oinnonfo. Man ascaino Jesús afanan oaitian unfi unimashquicain. Ascashon uncai ipaitsi mato Diosin tsain yoimisimaran, un nantifi yoitiro.

¹⁷⁻¹⁸ Un mato yoisharamisi man Jesús icoinra huacoinnon. Asca Upa Dios un yoitiro isca huaquin, –Upa Diosin, mian yononi cuscan un Filiposofo min Furun Jesushuunoa yoimisi. Nan icoinra huanonfo min ato yoiai cuscan acoinonfo. Un ato mia icoinra huamahuunshon ua rutushquicaniran, –ishon un Upa Dios yoitiro. Ascano ua rutufiafo uhuunshon man Jesús icoinra huano un unimatiro. Ascacun marifi ufu unimacahuun Diosin ua shara huaino un matohuunoashu natiro.

Timoteo yafi Epafrodito

¹⁹ Jesucristo apaiyaiton un matoqui Timoteo samamashta nichipai. Chipu u ano naoaitian matohuunoa ua tapimanon. Nocoshon matohuunoa ua yoiaiton nicai un fasi unimacointiro.

²⁰ Timoteo mato noicoquin matohuunoa tapipai man isharacaimain man Jesús tanasharaquin. Asca tsoa futsacai Timoteo cuscarama. Ascashu un matohuun noiai cuscari arifi matohuun noicoquin.

²¹ Nantiffain afin apaiifo cuscan fusti shinanmisifo. Jesucristo ato yonomapaiyai cuscacai shinanmisifoma.

²² Ascan Timoteocai ascarama. Maficoquin man man onan. Nan uhuun facu cuscaracoinshofin. Timoteo u futan Jesushuunoa yoimisiquin.

²³ Ascacufin un Timoteo mato ano nichiriscapaicain. Unmain ahuuscaicain un tapiatima. Ascan nan un tapiantian un mato ari Timoteo nichiriscatiro uhuunoa mato tapimanon.

²⁴ Un nocon Ifon icoinra huai uatsi mato ari nichiyamaiton. Ua nichiaino un samamashta un mato ari caicain.

²⁵ Ascano manfin uqui Epafrodito nichiniquin un yopai cuscan ua ashonon. Ascacun nanfin uhuun ushto cuscaracoinquin. U futan Diosin tsain yoifafaini. Afin fasi mato shinain. Ascan un shinanracafin afanan un mato ari nichishquin.

²⁶ Epafrodito isinincai mato tapimapaiyamafiano man man tapian nicaquin mato-huunshon shinanqui ahuun ointi nocoita. Ascashon yoiyamua isca huaquin. — Tapianmapainonforan aton ointisin ihuutirofoquin, —ishon matohuunoa yoiyamua. Ascashu natian matofu fasi ipaicoin.

²⁷ Iconfinquin Epafrodito fasi isininqui man naqui rashquiyamua. Ascafia Diosin ahuun ramapaicain uhuunri ramapaiyaino man cayayamua. Ascan naanofin un fasi shinain omitsiscasquima. Muma sharamain matoqui nocoyamaiton.

²⁸ Ascacufin un mato ari nichipaicain. Matoqui nocoaino man aqui unimanon. Man ascaino urifi un unimashquin. Mato ari Epafrodito nocoanocai un afanan shinain omitsiscasquima. Muma sharamain matoqui nocoyamaiton.

²⁹⁻³⁰ Cristo yonoshoni man naqui rashquiyamua. Ascan man chai icashucaí uqui man oyamaino matohuun rafanan Epafrodito uqui oyamua. Ascafia matoqui nocoaiton fasi unimacain nocon Ifohuunshon ihui sharafain ahuun noiquin a ismasharacahuun.

3

Ahuara iconcoian shara finacoian

¹ Uhuun yoramishtichin uhuun tsain unutaqui un mato yoi. Manfin nocon Ifon Jesucristo ahuun yorafoquin ascacun unimacahuun. Un mato cunushoni cuscan afanan un mato yoi. Man poshtutanonma nicafafainainfin sharaquin. Nan tsain shara man tanacucai yora futsafoan mato amaquiri yositirofoma.

² Ascacun ¡Oinfain! A yora chaca huaifo fishtayamacahuun. Pashna pofu cuscarafokin. Nan yora chacafaan mato amaquiri yosipaicani isca huaquin, —Man foshqui rupa shatuyamashucain man Dios ari nocotiromaran, —mato huamisifo.

³ Asca non foshqui rupa shatuahuunshocai nocon chaca non soatiroma. Jesucristo noco nashoni nocon chaca soashoshquin. Arus fustifin nocon chaca soashotiroquin. Nan Furuhuunshori Diosin noco ahuun facufo imatiro. Ahuun Yoshin Sharahuunshon non Dios yoitiro isca huaquin, —Non mia fasi noi. Min sharacoinran, —ishon non yoitiro. Jesucristo noco nashoni nocon chaca soashoshquin. Ascacun non aqui unimacoinni. Arus fusti noco numatiro. Man non tapia non foshqui rupa shatuahuunshocai noco ahuusca huatiroma.

⁴ Futsafoan yoiquiraca isca huafo, —Unfi shara fustisi huamisiquin. Ascashufin un Dios fu ipatiroquin, —ishon shinanfiaifono urifi un nannori shinanpaiquin un nannori shinanquin finacuana.

⁵ Un caintan ocho oshatan ua foshqui rupa shatunifo. Asca unfin Israelifoa caifoquin. Urifi un Benjamín nami. Uncai osiama. Unfin Israelicoinquin. Diosin Moisés yoini cuscan urifi un nicacoianquin. Ascatarifi unfin Fariseoquin.

⁶ Diosin tsain tanasharapaicoinquin nan Jesús tanamisifo un ato chaca huapaoni. Unfi nantifi Moisés tsain tanasharapaoniquin. Tsoancai uhuunoa yoiqui isca huatiroma, —Pablonuncaí Moisés tsain nicacoianpaonimaran, —ishocai tsoan yoitiro. Ascashon un shinanquin isca huapaoni —Nanfoan ua imasharatiroran, —ishon un fasi amaquiri shinanpaoni.

⁷ Ascafia natian mun tapia afocai ahuama. Afoancai ua imasharatiroma. Nanfo mun potacoian Jesús fusti icoinra huashu afu ipashquin.

⁸⁻⁹ Ascano uncai afanan un ipaoni cuscan apaima. Nantifi un ipaoni cuscan mun potacoian. Un ascai un funocoinpaoni. Ascacun natian un shinancai nanfo ahuama. Nan ahuara chaca potamua cuscarafocai. Natian uhuun Ifo Jesucristo fusti un onanpaicoian. Nancaifin shara finacaiquin. Arus fusti ua imasharatiro. Moisés tsain yonopaoni cuscaí un afanan ascatiroma ua imasharanon. Ascatamarocon un Cristo icoinra huaino Upa Diosin Furunhuunshon ua imasharatiro a cuscara shara un inon. Ascan un Diosiqui nocoaitian uqui unimatiro un Cristo fusti icoinra huacun ua imasharanon.

¹⁰ Un Cristo onanpaisharacoin afu rafushquin. Diosin ahuun curushpan Cristo afanan funimaní cuscan urifi nan curushu un mupai a cuscara shara ua imanon. Cristo omitsiscapaoni cuscan urifi afu rafushon un mutiro. Unrifi ascapai nan cuscara ishquin. Ascashon ua nashoni un chaca huapaoni cuscan ua soashoshquin. Ascacufin un ipaoni cuscaí afanan ascapaima. Ascafia un nan Cristo fu naa cafiscapaoni. Ascashu natian a cuscara shara iishquin.

¹¹ Ascano unrifi nan funini cuscan un funipai. Cristo naafiashu afanan funini. Ascanshaquin afanan nanacama. Nanscarifiai urifi un afu funi cafiscapai. Nuno mai ano niyoshon afanan chaca huatama nan cuscara shara iishquin.

Un fasi Jesús tanaqui tapicoian un aqui nocoaitian afu ipashquin

¹² Un ipaiyai cuscacai un acoinnataima. Un Jesús cuscaracoin ipaifiaicai un icataima. Jesucristo uhuun ointi fiananan huani a cuscaracoin ua imashquin. Ascacun un Jesús tanasharafafaini a cuscarasharacoin ishquin.

¹³ Uhuun yoramishtichin un Jesús cuscaracoin icataiyamafiaicai un ipaoni cuscan afanan un shinainma. Un Jesús cuscara ipaiyai cuscan nan fusti un shinain.

¹⁴ Ascashon uncai ahua futsa shinainma. Nan Jesucristo fusti un tanapaicoin. Nan fusti un shinanafaini. Ascano Diosin ua catonni un afu ipanon. Jesucristohuunoashu Upa Dios ari un nocotiro. Nocoashu a cuscarasharacoin un itiro.

¹⁵ Man Jesús tanasharai nan un mato yoia cuscan marifi nannori shinacahuun. Un shinain cuscan futsan shinanyamaiton afincoi Diosin ato cayacafi tapimatiro.

¹⁶ Ascashu Cristohuunoa man tapia cuscan nanscacoicahuun.

¹⁷ Uhuun yoramishtichin un Jesús tana cuscan marifi uhuun caocahuun. Non icai cuscaifori oincatan nanfohuuri caocahuun.

¹⁸ Un mato yoimisi cuscan nannoricoin natiantan afanan uhuun nomuran uaiyanan un mato yoi. Jesucristo noco nashoni nocon chaca soashoshquin non ipaoni cuscan afanan non shinanonma. Futsafoancai nan na un mato yoiai cuscan nicapaicanima. Ato chaca shatucasmacani. Ascafin Jesús noicasmafain icafoquin.

¹⁹ Jesús ato amapaiyai cuscacai shinantama nan afin apaiayo cuscan fusti shinancani. Pifain ayafain huacaquin. Nan fusti shinancani. Ascashon nan nocofunfoan ainfofohuunoa fusti shinancani. Nanscarifi ainfofo aifono nocofunu futsafo yasi icaifoanno. Nanscara chacafosi huacani. Nanscaisi tapiafo. Non chacaforan itama noncaifin sharaquin icafo. Afanancai tsoa rafapaitirofoma. Nanscarafo nacanashu omitsiscapanacafo muran focani.

²⁰⁻²¹ Ascafia noncai ascarama. Ascatarocon nonfin Diospan yorafoquin. Nonfin nai muran afu ipanacaquin. Nocon numamisi Jesucristo nanno ica. Nanfin non fasi manaicai. Unimayanan afanan Jesús nocoqui oaitian nocoqui nocoshon ahuun curushpan a cuscara sharacoin noco imashquin. Ascashu non nacun nocon caya chacanafiaino Jesús nocon caya fiananan huashotiro non afanan ahuuscatama isharaicain funa sharacoin ahuun caya cuscara non inon. Nanscarifi aqui ahuun curushpan nantifi noco iquina.

4

Nocon Ifo Jesushuunoashu unimafafaincahuun

¹ Ascacun uhuun yoramishtichin un fasi matohuun noicoin. Un mato fasi oinpaisharai. Nan un matohuunoa shinaintian un mua fasi unimacoinna. Un mato Jesushuunoa yoimisi cuscan natian man man icoinra huasharacoin. Man ascaino un fasi unimacoinni uhuun yonoricai funoima. Ascacun uhuun facufoshtan Jesús cachiquiri huacaquima tanasharacahuun.

² Ascatari un nica Evodia yafi Síntique fochishmanantananfainaifoan. Ascacun un ato yoi achishta rafutan, Evodia yafi Síntique un mato yoisharapai. Ahuuscai man fochishmanantananfainai. Cristohuunshon nannori rafu shinansharacahuun. Afanan ascayamacapun.

³ Uhuun yorashtan min u futan Dios yonoshomiscun un mia yoi. Nan ainfo rafu ato yosisharapun. Afanan rau huatananshu yorahun tananonfo. Nan rafutafin u futan Jesushuunoa futsafo yoipaonifoquin. Ascano Clemente arifi u futan Jesushuunoa yoipaoni. Ascan natian yora futsanfoanrifi u futan Jesús yonoshonafo. Ascacun nanfofin Diosin ahuun libroqui nai muranshon aton anufo man cunuquin afu nipashquinonfo. Nantifi ahuun yorafo Diosin aton anu cunua afu nipanonfo.

⁴ Ascacun Jesús mato Ifoquin unimacahuun. Afanan un mato yoi futsai unimacahuun.

⁵ Nocon Ifo oti chaimaquin. Ascacufin isharaicahuun. Futsafohuun noicoicahuun. Man ascaiton yorafoan mato oincaquin, —Isharaforan, —ishon matohuunoa yoinonfo.

⁶ Ascano shinanchacayamacahuun. Ascatarocon ahuara ahuuscarafiaino Upa Dios cuficahuun. Man yopai cuscaari a yoicahuun. Man cufiaino Upa Dios yoicahuun isca huaquin, —¡Aicho! Upa, min ua nicasharamisi un yopai cuscan min tapishon min ua ashosharamisiran, —ishon cuficahuun.

⁷ Man ascaitofin maton nomuran Diosin maton ratufo potafain mato ointi isharamaiquin. Ahuara ahuuscarafiaino Diosin nocon ointi isharamatiroqui. Ascan noncai tapitiroma ahuuscashomain nocon ointi noco shinansharamatiroquin. Ascafia Jesucristo non icoinra huacun nocon ointi yafi nocon nomuran noco shinansharafafaini.

Ahuara sharafosi shinacahuun

⁸ Ascano uhuun yoramishtichin mun cunuquin anaitcuana. Un afanan mato yoi futsapai. Ahuara icon fusti shinanfain ahuara sharafosi shinanfain ahuara cayacafi fusti

shinanfain ahuara noco shinanmasharatiro nan fustiri shinanfain ahuara yorafoan shara huaifo cuscan shinanfain Diosin noco ashoain cuscan nanfo fusti shinansharafafainc-ahuun. Ascashon nocon Ifo —¡Aichoran! —huacahuun.

⁹ Ahuara un mato yoia cuscan huafain un mato tapimana cuscan huacahuun. Ascashon ahuara futsan un acaiton man oian cuscan macafiri acahuun. Man ascaiton oinquin Diosin maton nomuran isharamatiro. Ascashu matofu ipashquin.

Filipos anoafoan pui ichanan huacashon Pablo fomanifo

¹⁰ Un unimacoín man ua shinanfiaquicai man ua pui fumayomisima. Man ua pui inanfiapaonishaquicai afanan man ua fumayomisima. Ua pui fumapaimisifiashucaí ahuuscashuco ua fumatiroma. Ascafia natian man man afanan ua fuma. Ascacun natian un nocon Ifo, —¡Aicho! —huai. Uarifi afanan man ua cushusharamisi.

¹¹ —Ascano un ahuara yopafiaquicai man ua ahua inanmaran, —un mato huamisima. Ahuarafo ahuuscarafaiinocai shinanchacatarocon un unimacointiro. Diosifin nannori ua tapimanaquin. Ascashu un ahuara ichapaya iyamarai un ichapama ayafishuri un unimatiro.

¹² Ascano mun tapiarifi ahuuscashumain ahuuoma non isharamatiroquin. Nanri mun mumisi. Ascatan ahuuscashumain ahuara ichapayashuri non isharamatiroquin. Nanrifi mun mumisi. Ascatan ahuara ahuuscarafaiinori un unimacointiro. Ascacun uncai shinanchacamisima. Un pii manyashu iyamarai foniquiri nanscara un mutiro. Raniran futsanoashu ahuara ahuuscarafaiinoricai un shinanchacatiroma. Ascatarocon un unimacointiro.

¹³ Cristo ahuun curushu ua inainton nan curushhuunshon ahuara ahuu cuscararan futsan un atiroquin.

¹⁴ Ascafiacufin nan shara man uhuun ramapaicain ua shinan. Ascan manfin ua shara huaquin un omitsisca cuscan marifi man ua shinanquin ua shara huua.

¹⁵ Man Filipos anoafoan man rama Jesucristohuunoo nicaquin tau huanitian Macedonia anoashu un caiton un yopai cuscan marus fusti man ua inanni. Ascan man icoinra huua futsafoancai tsoan ua pui yafi ahuara futsa fumanifoma. Nan man man tapia.

¹⁶ Un Tesalónica ano icun un yopai cuscan man ua fumafafainpaoni.

¹⁷ Ascafia ufcain un maton pui fianfafainmisima. Man ua inanshara cuscan Upa Diosin oinquin matorifi ahuun rafanan shara huafafainshquin. Mato shara huaino urifi unimacoinshquin.

¹⁸ Ascano natiancai afanan un ahua yopaima. Munmain ayashufin. Epafrodito uqui nocoshon man ua fuma cuscan ua inantoshiyamua. Un yopai cuscan finonmafain man ua fumayamua. Nan man Diosihuun noiai cuscan huafain uhuunrifi noiquin man ua fumayamua. Man ua inainton oian cuscan Diosin matoqui unimacoinni.

¹⁹ Uhuun Diosin man yopaiti mato inanshquin. Upa Diosin ahuun ahuara sharacoinfo aya cuscaí ichapa cuyopacunacama. Furun Jesucristohuunshon mato inanshquin.

²⁰ Ascacun nan nocon Diosifin nocon Upaquin. Nan fasi sharacoin. Arus fustifin sharacoinquin. Tsoancai a finontiro. Nan, —Nocon Ifocoinran, —non huapanaca. Nanscari inon.

Pablonun ahuun tsain unutaquin Filiposofa tsain shara fomani

²¹ Nantifi Jesucristo icoinra huafu ua yoisharashocahuun. Nan icoinra huafu ufu icafoanri mato yoisharapaicani.

²² Nunoa nantifi Jesús icoinra huafu mato yoisharapaicani. Nan niaifocoin Cesar ahuun pushu anoa yonomisifoanri mato yoisharapaicani.

²³ Nocon Ifo Jesucristo matohuun ramapaicain maton nomuran mato shara huapanon. Nanscasi ipanon. Amen. Nanti.

Pablo

Pablonun Colosas Anofo Cunu Fomani

Pablonun Jesús icoinra huafo Colosas anofo cunu fomani

¹⁻² Uquian Pablo Diosin afin apaiyai cuscan ua catonni Jesucristo fu rafushon ahuun tsain un yoifoanfainon. Timoteo futan un mato cunu fomai. Arifi Cristo ahuun yora. Colosas anofoan manfin Cristo tanacoianshu Diospan yorafoquin. Nocon Upa Diosin matohuun ramapaiqui matohuunoa shinanquin mato shara huashofafainpainon. Ascashon maton nomuran maton imasharapainon.

Pablonun Jesús icoinra huafo cufishofafainpaoni

³⁻⁴ Un mato fasi ichapa shinain. Nan nocon Ifo Jesucristo Apa Dios non mato cufishofafaini. Ascan man non nica man Jesús icoinra huacoincun. Ascashon nan Jesús icoinra huaa futsafohuun man noicoianri man non nicamisi. Ascacun non nocon Upa Diosin yoiquin isca huamisi, –¡Aicho! Upa Diosin Colosas anofoan min Furun Jesús man tanasharaforan, –ishon mato cufishofafaini.

⁵ Nan tsain shara iconcoin Jesushuunoa cayacaficoi man man nicamisi. –Jesucristo icoinra huashu Dios icari man afu ipasharatíroran, –ica man man nicamisi. Nan tsain icoinra huashu man futsafohuun noicoimisi.

⁶ Nan tsain shara Jesushuunoa nicaquin tau huaquin man icoinra huani. Ascashon nicaquin man tapini nan iconcoin. Diosin matohuun ramapaiquin Jesucristohuunshon maton chaca soashoni man icoinra huanon. Ascacufin nan tsain sharahuunoashu man fiananan. Nicacani arifi manifoti nanscarifi amisifo.

⁷ Nan Epafras nocofunu fasi shara. Un ahuun noicoi. Arifi no futan Cristo yonosharashomisi. Noncai matofu itiro ipaonima. Ascacun afincoin mato Jesushuunoa tapimayopaoni.

⁸ –Colosasfoan Diospan Yoshin Sharahuunshon futsafo noicoi, –ishon matohuunoa Epafras noco tapimana.

⁹ Ascacufin nan un matohuunoa nicaquin tau huaitian natianri un mato Upa Dios cufishoquicai unumisima. Ascacun un mato cufishoquin isca huafafaini, –¡Aicho! Upan Diosin, Colosas anofo min Yoshin Sharahuunshon min ato tapimapaiyai cuscan huafain ato tapimahuu. Min ato tapimapaiyai cuscan aton nomuranshon tapicoinfain mia tanasharanonfo, –ishon un mato cufishomisi.

¹⁰ Ascashon nan mato amapaiyai cuscan man aiton oin Dios matoqui unimacoinsquin. Ascatan nan mato yonomapaiyai cuscan acai man isharashu ahuun facu cuscaracoin man itiro. Ascano man futsafo shara huashofafainquin. Man Dios onanquin finacoinfafaintiro.

¹¹ Ascan Upa Diosin ahuamamishi shara huatiroquin. Ahuun curush mutsisipacoin mato inantiro ahuara ahuascarafaiho marifi ahuunshon man tunucoinnon. Nanscafi-quin man tunutiro funaquima unimasharacain.

¹² Ascano unimacain man Upa Dios aicho huatiro. Nantofin noco imasharafain ahuun yorafo inanpaiyai cuscan huafain nocorifi inain. Norifi non ahuun yorafocon noco inanshquin. A icano shafa fusti faquishicai imisima.

¹³ Ascacun noco numa non afanan faquish muran inonma. Ascan nan Satanás icanofin fasi faquishcoincun. Nannoashu funocani. Upa Diosin nannoa noco numa ahuun Furun shara fu non ipanon. Nanto Furun fasi noicoi.

¹⁴ Nocon chaca soashona ahuunshon Upa Diosin noco rau huatiro afu non ipanon.

Jesús noco nashonihuunoashu non Dios fu isharapacunaca

¹⁵ Ascan noncai Upa Dios non ointromafiano Furun Jesús mai ano oni. Ascashon Furunmun noco tapimani ahuu cuscaramain Apa Diosiquin. Ascan Furun Jesusfin nan Apa cuscaracoin. Ahuun ointi cuscarari. Ahuashtacai oniataima Apa Dios fu nai muran iyopaoni.

¹⁶ Ascan Criston nantifi onihuani. Nai murannofo yafi mai anofofori ato onihuapacuni. Nan non oinmisifo yafi non ointromafori ascashon nantifi onihuani. Ahuun oinmatifo nan afu icafo onihuafain yoshinon aton niaifofori onihuani Upa Dios Furun Cristohuunshon nantifi onihuani.

¹⁷ Ahuashtacai oniataima Cristo iyopaoni. Ahuun curushpan nantifi cushusharamisi. Ascashon fishifo cushufain fari cushufain oshuri cushufain nocon mai cushufain. Ascan nantifi cushuyamaino cuyoi futsucuanafu. Nai yafi mai choquiqui futsucuanafu.

¹⁸ Tsoancai Jesús finontiro. Ahuashta oniataima nantifi finonyopaonishaquin. Nantianrifi nantifi finoncoian. Aafin ahuun yorafo nan icoinra huafo ato Ifocoinquin.

¹⁹ Ascacun Upan Diosin yoiquin isca huani, —Un imisi cuscacoin nanscarifi uhuun facu imisiquin. Ascashu arifi ufu Dioscoin. Nonfin nanscara rafuquin, —ishon unimacain Upa Diosin yoini.

²⁰ Jesús ihui coyan quinanqui mastafaan ahuun imi focain noco nashoni nocon chaca soashoshquin. Ascacufin ahuunoashu non Upa Dios fu afanan isharatiro. Ahuunoashu nantifi mai anofo yafi nai murannofofi afu isharatirofo.

²¹ Maton nomuranshon man Dios noicasmafain man fasi chaca huapaoniquin. Ascashu-cai man Dios fu rafuyamacai marificai man ahuun yorafo ipaonima.

²² Ascaciaun Furun Jesucristo nai muranshon mai ano nichini nocofunucoin iquiyonon. Ascashu ihui coyan iquinanhuunoashu noco nashoni. Ahuunoashu natian Diosin matofu rafucain maton chaca soashotiro a cuscara shara man inon. Ascano man aqui nocoaitian matohuunoacai ahuashta chaca shinantiroma. Ascashocai mato yoitiro ma isca huaquin, —Min chaca huamisiran, —ishoncai mato yoipacunacama.

²³ Ascano nan tsain shara Jesucristohuunoa icoinra huashon man ahuara futsa shi-nanyamaitocai Upa Diosin matohuunoa yoipacunacama isca huaquin, —Min fasi chaca huamisiran, —ishoncai yoipacunacama. Ascatarocon man icoinra huaquin unuyamaiton oinquin nan mato yoiyotiani cuscaino mato ihuishquin man afu ipanon. Man Jesushuunoa tsain shara nicaquin tau huani cuscan nannoricoin un manifoti ato tapimani. Ascacun unquian Pablo un Upa Diosin tsain yoifoanfainmisi Jesushuunoa ato yoishquin.

Diosin Pablo yononi Jesús icoinra huafo yonoshonon

²⁴ Ascacun un fasi unimai un matohuunoashu omitsiscamisi marifi man ahuara ahu-uscaraifi Cristo tanasharanon. Cristo nocohuunoashu omitsiscani cuscan urifi afu rafumisifo nan Diospan yorafohuunoashu omitsiscamisi. Un matohuunoashu omitsiscaifin nantianri un Cristohuunoashu omitsiscaiquin.

²⁵ Ascacun Diosin ua catonni maton oinmati cuscara un inon. Ahuun tsain shara un mato yoinon. Ascashon ua yoiquin isca huani, —Nan manifoti anofo yorafo uhuun tsain shara Jesucristohuunoa ato yoifoanfainhuun, —ishon ua yononi. Ascashon nan uhuun caifomafo muran ua nichini.

²⁶ Nan tsain Jesucristohuunoacai noco shunifoan tapiyopaonifoma. Diosin tsoa tapimay-opaonima. Natiantan Diosin rama shara noco tapimani. Non ahuun yorafocun.

²⁷ Upa Diosin Cristohuunoa yoiyotiani cuscan nantifi matori tapimashquin. Uhuun caifo fustisicai tapimani nan uhuun caifomaforifi ato tapimai isca huaquin, —Uhuun Facu Cristo matofu rafucacaini. Ascacufin man icoinra huatiroquin un icano man unfu iishquin. Ascashu Cristo shara fustisi ica cuscai urifi un mato nanscara imashquinran, —ishon mato tapimai.

²⁸ Ascano Jesucristohuunoa non yoifoanfainmisi. Diosin ahuun shinanpan un ato yoi-foanfainmisi. —Ascacun Diosin tsain nicasharacoincahuun man funoshcaquimaran, —ishon un ato yoiimisi isharanonfo. Ascacun nan non Cristo icoinra huamisifo nantificain Diosin ointaifi non oinmapai a cuscara shara iishquin.

²⁹ Ascacufin un Dios fasi yonoshofainicain. Ahuun Yoshin Sharapan uhuun nomuran ua yosiain cuscan huafain un mato yonoshofaini. Man Cristo cuscaracoin icai Upa Dios ari man nocoshquinon.

2

¹ Uhuun yoramishtichin, un mato tapimapai. Matohuunshonfin curushcain un mato Upa Dios cufishofaini Laodicea anofo futan futsafoanri ua oianmafiamisifoan nanfori un ato Upa Dios cufishofaini.

² Ascashon un mato cufishomisi mato nomuranshon man shinansharafain mafiran man noinancoinon. Asca huatananshu man Upa Dioshuunoa shafacafi tapisharatiro. Ipaoni tsoancai Cristohuunoa tapiyopaonima. Ascacun natian ahuunoa mato shafacafi tapimapai man onancoinsharanon.

³ Nantofin nantifi onancoinfaifi tapicoianquin. Apa Diosin tapia cuscan arifi ahuun nomuranshon tapicoianquin. Ascacun Upa Dios ahuarafa shara aya cuscan Cristohuunshon marifi man tapitiroquin.

⁴ Un mato nannori yoi futsafoan mato paranonfoma. Isca huaquin, —Non mato shafa-cafi tapimaniran, —ifacanasu nanfoicafin chanimisifoquin. Ascashon mato shafacafi yoicafiscamisifoquin fasi amaquiri mato yosipaicani.

⁵ Ascacun un matofu iyamafashon shafatifi fasi un mato shinain. Mun nica matohuunoa man nannorifosi Jesushuunoa cayacafi shinanfaifi man Jesús icoinra huafainaiton nicai un fasi unimacoinni.

Cristo mato funa cuscara shara ima marifi man nan cuscara shara inon

⁶ Man Jesucristo icoindra huaquin tau huashon man Ifo huacoinna. Ascacun shafatifi afu rafufafaincahuun. Ahuun tsain nicacoincahuun.

⁷ Ahuara fimi fanano ahuun tapo chaicoin foanno cai fana tucuitiroma. Mutsisipacoin itiro. Nanscarifiai Jesusfin nan tapo cuscara sharaquin. Ascacun afu rafufafaincahuun chaca huatamarocon a cuscara shara ishcaquin. Epafra mato tapimamisi cuscan shafatifi finacoinquin Jesús icoindra huafafaincahuun. Ascashon shafatifiri Upa Dios aicho huacahuun.

⁸ Oinfain futsafoan mato paranonfoma. Amaquiri mato tapimashcaquin. Man cayacafi Jesús icoindra huai cuscacai mato ascara tapimapaicanima. Ascashon nan mato yosipaiyaifo cuscan man ato nicashu ipaitsicoin man icoindra huatiro. Ascan nanfoancai Diospan tsain Cristohuunoa yoicoianfoma. Ascashon nan aton fuyamisi cuscan mato tapimapaifain nan icoindra huamafoan shinainfo cuscan fustisi mato icoindra huama paicani.

⁹ Ascano Cristo yafi Apa Dios nanscara rafu. Cristo noco cuscara nocofunucoinfiashu Dios imisi cuscan arifi nanscamisi.

¹⁰ Aafin nantifiton aton niaifocoinquin. Nantifi niaifofo yafi yoshinfori ato finoncoian. Ascashon ato iquimisi. Ascacufin man Jesús fu rafushocai man ahua futsa yopaima. Nan isharamisi cuscan marifi man nanscatiro.

¹¹ Man Cristo Ifo huaitian maton nomuran mato fiananan huashoni man chaca huapaoni cuscan afanan man ascanonma. Ascan nocofunufaoan aton fuyamisi ipaoni. Ascafia man cunotinín foshqui rupa shatutocai maton chacan soashotiroma. Cristo fustitofin maton ointi fiananan huashotiromoquin. Ahua futsanmaquia. Nan fustitofin maton chaca soashotiromo afanan man chaca huapaoni cuscan man atama nan cuscara shara man inon.

¹² Ascano man unu muran iquimamuaitian maton chacafo man chaca huapaoni cuscan nanfo mai huamua shinantsai. Ascan non Jesús mainitian man chaca huapaoni cuscan nan chacafori mai huamua shinantsatiro. Man unu muran iquimamuashu funinaca huanni man Jesús fu funi cafiscatiro a cuscara funa shara iishquin. Diosin ahuun curushuunoashu Jesús afanan funini nan non icoindra huua. Ascano Jesús mai murannoashu funinitian marifi man afu funi cafiscatiro a cuscara funa shara iishcaquin.

¹³ Man Jesús Ifoataima nan yora naa shinantsa man apaoni. Ascashon man chaca huapaoni. Ascafia Upa Diosin Cristo funimani afu nipanon. Nanscarifi aqúi matorifi ahuanhshon nimapacutiro. Ascashon nantifi nocon chacafo man rau huua.

¹⁴ Shinancapon. Nantifi non chaca huamisi cuscan noco chacafo Upa Diosin noco soashoni. Afanan afohuunoa Diosin shinanonma. Ascano Diosin yononi cuscan nicatama ahua futsa non chaca huapaoni. Nanfo nantifi non chaca huamisifo cuscari cunupacua. Ascafia nan cunupacui cuscan ihui coyan iquinan ano Jesús mastanihuunshon nanfo noco soashoni.

¹⁵ Ascano Jesús ihui coyan iquinanhuunoashu noco nashonishaquin Satanás yafi nantifi yoshin chacafo finoncoian. Ascacucui afanan noco ahuusca huatirofoma. Nanforicai afanan noco ifo iyamacain noco iquitirofoma. Ascacufin Jesús ihui coyan iquinanhuunoashu naiton Diosin manifoti ismani nan yoshin chacafocai afanan ahuashta ahuun curushu ayamaran ishon ato ismani.

Jesús icaria sharacoin nan fustisi fuchipaicahuun

¹⁶ Ascacufin ratoran futsan mato yosipai isca huaquin, —Nocon shunifoan yononi cuscan nantifi nanscacoicahuun. Ahua futsa piyamafain ahua futsari ayayamacahuun. Fuusititian fuusiyamashu man chaca huai. Ascan nan oshu ina funatianri fuusicahuun. Tunutitian fusti noco shunifoan yononi cuscan man atiroran, —ishon mato amaquiri yonopaiyaifo cuscan ato nicayamacahuun.

¹⁷ Cristo nocoataima nanfohuunoa noco tapimayopaonifo. Ascafia afincoian mai ano oanocai non afanan nanfo yopaima. Nan Cristo fusti non yopai.

¹⁸ Oinfain. Futsafoan mato shinanmapaiyaifo cuscan man ato nicashu nan Upa Diosin mato inansharapayai cuscan man funotiro. Ascacun ato nicayamacahuun. Mato amaquiri yoipaiquin isca huacani, —Uhuun namapan cuscara Diosin ua isma cuscan fasi sharacoin. Uncai ahua yamafiacun Diosin ua isma cuscan tsoa futsacai oinyomisima. Ascan un oian cuscan miarifi Diosin oinmanaino shara itiroran, —ishon cacapaimisiton mato amaquiri yoipaicani. Mato yoipairi isca huaquin, —Non Diospan oinmati afu nai muran icafo cufitiroran, —ishon mato parapaicani. Nanfoan aton nomuranhshon futsa futsa huaquin shinainfo cuscan fusti matorifi yosipaicani ato cuscara cacapaimisifori man inon. Diosin shinan cuscacain shinantama afin shinantirofo cuscan fusti shinancani. Nanscashu nanfo curafipaaimisifo.

¹⁹ Nanfocai Cristo fu rafuyamacai aton ifomari. Cristofin nan nocon mapo cuscarariquin. Nonfin ahuun caya nato cuscarariquin. Nocon caya nofiri non cushumusharashu non mutsisipacoin itiro. Ascan nocon nami pono uhuapafo yafi nami pono futsafo nocon cayahuu nannorasi ichanatirofo. Nanscarifi aquin Criston ahuun yorafo cushusharacoinmisi. Ahuscayamacain isharacain mutsisipa non inon. Noco nannorifosi shara noco shinanmami. Non Cristo fu rafucocin Upa Diosin finacoinquin Furunhuunshon ahuu curushu noco inantiro a cuscara non inon. Nanscarafin noco Diosin ashopaiquin.

²⁰ Cristo mato nashonitan marifi man afu naa shinantsapaoni. Ascan natiancai man chaca huapaoni cuscan afanan ascaima. Ascatarocon man isharacoinmisi. Man ascanocai nan icoinra huamafoan mato yonotirofoma. ¿Ascacufin ahuuscai man ato nicamun mato yonopaiyaifo cuscan aashcaquin? Ascacun ato nicayamacahuun.

²¹ Ascashon nanfoan mato yonoquin isca huapaicani, –Mato tushu inainfo cuscan fiyamafain nanrifi piyamacahuun, –ishon mato yonopai.

²² Ascano nanfoan mato yosipaiyaifo cuscaai Diosin ato yonoama. Nan nocofunufaoan shinainfo cuscan fusti mato yonopaicani. Ascan nan mato yonopaiyaifo cuscan nanfo cuyoi futsushqui afanancai ascashquima. Ascacun ato nicayamacahuun.

²³ Icon yorafoan shinanquin isca huacaquin, –Nanfoan ato yosiainfo cuscan shararan. Ascano nanfoan fasi tapicoianfo. Diosin noco yononi cuscarai fasi tapicoianfo. Ascashon Diospan nai oinmatifo cuffafaincaini. Ascacanashu tsoashtacai raquiri huamisima cuscarafa. Ascataricai aton caya afiri musu huamuafoma. Ascashu nanfo fasi sharacoinran, –ishon atohuunoa shinanmapaicani. Ascafia afocai isharacoinmisifoma. Ahuarafo chaca huaifo cuscaai shatutirofoma. Icon nanfofin cacapaimisi shunifo.

3

¹ Upa Diosin Furun Cristo funimani cuscan nanscarifi matori afu funimani cafisca huai man funa shara icain a cuscara shara icashu man afu rafunon. Cristo natian Apa fu ica a futan nantifi iquina. Ascacun ahuunoa shinanfain mato amapaiyai cuscan nanfohuunoari shinancahuun.

² Ascacun Diosin fuchipaiyai cuscan nan fusti shinancahuun. Nanscacoinscaquin. Ascan nuno mai ano yorafoan chaca huapaiyaifo cuscan marifi asca huapaiyamacahuun.

³ Afanan un mato yoi Cristo noco nashoni. Ascan manfin afu naa shinantsayoniquin. Natianfin man Cristo fu rafucain Upa Dios furi man icacaini. Nanscarifiai mato furi Upa Dios icacaini. Man ascafaiatocai tsoanshta ointirofoma man Cristo fu rafuai cuscan afu isharashcaquin.

⁴ Ascano Cristo afanan mai ano oaitian nantifiton ointirofo non afu rafumisifo noco nimapacunaca. Ascashu Cristo shara fusti ica cuscaim norifi non a cuscara sharacoin iishquin nantifi yorafoan oinshquicani.

Non chaca iyopaoniflashu natian non funa sharacoin Jesús cuscara man non ica

⁵ Ascacun man chaca huapaoni cuscan afanan asca huayamacahuun. Ascarafo shi-nanyamacahuun. Ascatarai maton ahuinma furi iyamacahuun. Nanscarifiaiainfofoan maton funuma furi iyamacahuun. Ascashon shinanchacayamacahuun. Nocofunufaoan maton ahuinma fuchipaiyamacahuun. Ainfofoan maton funumari fuchipaiyamacahuun. Ahuara chacafo fuchipaiyamacahuun. Mafin man fuchipaiyai cuscan fusti fuchipaiyamacahuun. Man ascaquicain Dios man noicoimma ahuara futsa fusti man noicoin.

⁶ Nanscara chacafocai Diosin oinpaima. Ascacun nanscara chacafocui Diosin fasi sinacoin. Nan yoitimamisifo ato onaintimashqui.

⁷ Ascano marifi man Dios nicocointaima man nanscara chacafu huapaoni.

⁸ Man nansca huapaoniflashon natian nan chacafu shatucocinahuun. Ascatarai afanan sinayamacahuun. Tsain fushnuicamitsamisi iyamacahuun. Futsafo noicasmacani aqui sinayamacahuun. Ascashon futsafori roayamacahuun. Tsain mutsama yoiyamacahuun.

⁹ Man chaca huapaoni cuscan man man potocoin. Ascashu paranonanyamacahuun.

¹⁰ Man ipaoni cuscan afanan atanma natian man Jesucristo catoan a cuscara shara iishquin. Ascan Upa Diosin mato nomuran onihua funa. A cuscara shara finacoinquin mato imafafainshquin ahuunoa finonmafain onansharanon.

¹¹ Non Cristo ifocuin Diosin nantifi nanscarasi huaquin noco oin. Israelifo yafi Israeli-foma cunu tapiafo yafi cunu tapiamafori onicoinfo yafi nahuafo non yonomatifo yafi yonomatifomari Diosin nanscarafosi noco oin. Nantifi non Jesucristo ahuun yorafocun. Nan fusti non yopai.

¹² Ascashon matohuun fasi noiquin mato catonni ahuun yorafo man inon. A cuscara shara mato imashquin. Ascacun futsafohuun ramapaicain ato shara huafafaincahuun.

Iquisi futsafohoouno shinanfain nan mafi man apaiyai cuscan shinantamarocon futsafoan apaiyaifo cuscari shinanshocahuun ato oi tsii huafainri yoifafaincahuun.

¹³ Futsan mato chaca huafiaiton ato copitamarocon yoisharafain rau huariscahuun. Nocon Ifoan mato rau huaa cuscan huafain futsafo ya rau huatanancahuun.

¹⁴ Ascano un mato yoia cuscacoin acahuun. Nanfo sharafiashu non nantifihuun noiainofin fasi shara finacayaquin. Ascatan non noinanshu non isharacointiro. Ahuara futsa sharafori nocon Ifoan yononi cuscan non noinanshu non nanscacoitiro.

¹⁵ Ascacun Cristo nicacoisharacahuun maton ointi sharamanocai man fochishmanantantiroma. Ascatamarocon ahuunoashu isharacoincain ahuun yora fusti cuscara man itiroquin. Ascacun Upa Diosin mato catonni ahuunoashu isharacain futsafoqui man shinanchacanonma. Ascaquin man Upa Dios yoitiro isca huaquin, —¡Aicho! Upa Diosin min uhuun ointi shara huashoran, —ishon yoifafaincahuun.

¹⁶ Cristo noco tapimani cuscan huafain maton nomuran nanucoincahuun. Nantofin mato iquinaquin. Ascan ahuun tsain tapisharashon futsafo yari tapimatanancahuun isharashcaquin. Mato nomuranshon Diosin aicho huafain David fanainni cuscan fanain ishocain ahuun tsainhuunoari fanaincahuun.

¹⁷ Manfin nocon Ifo Jesús ahuun yorafoquin. Ascano nantifi man yoiai cuscan huafain man acai cuscan nantifiri yorafo ato ismacahuun matohuun caononfo. Ahuunshon Upa Dios yoinonfo isca huaquin, —¡Aicho! Min ua shara huashomisan, —ishon yoifafaincahuun.

Non Jesús icoinra huafomain non ahuunoashu non ahuuscatiroyin

¹⁸ Ainfofoan nocon Ifoan mato yononi cuscan maton funufoan maton yoiai cuscacoin acahuun.

¹⁹ Nocofunufoan maton ahuinfohuun noicoincahuun. Ato tsain curushcain yoiyamacahuun.

²⁰ Facufoan maton upa yafi uhua nicasharacoinfaincahuun. Man ascaino Diosin matoqui unimacoion.

²¹ Upafo yafi uhuafon maton facufo tsain isininpaton yoiyamacahuun. Ascan maton facu man tsain isininpaton afafainnaino shinanquin isca huatiro, —¡Ohua! Uncai ahuuscatiroma uhuun upa yafi uhuun uhua uqui unimanon. Ua tsain isininpaton afafainnaino, —ishon facu shinantiro. Ascano upafo futan uhuafon asca huaquifin mato facufo man aton ointi ihuumatiroyin.

²² Ascano yonomatifoan maton ifofo nicasharafain atori parayamacahuun. Ascan mato oiainfono fusti ato yonoshocaquima. Mato oianmafaiifono ato yonoshosharacahuun. Nan maton Ifocoin Jesucristohuun man noiaino matoqui unimanon ato yonoshosharacahuun.

²³ Ahuarashta yonocaquin nocon Ifoan curushhuushon yonoshosharacahuun. Nocofunufo fustihuunoashucai man yonoima. Nocon Ifo Jesús nantifi noco oin. Ascan nocon Ifo yonoshosharacahuun. Anori shinanfain yonosharacahuun.

²⁴ Ascashu ointiaquimayamacahuun nocon Ifo Cristo man yonoshosharaino afin chipo nocoqui nocoaitian mato inansharashquin. Nan aya cuscan huafain mato inain. Aafin maton Ifocoinquin. Ascan manfin nan yonoshoniquin.

²⁵ Man chaca huaiton Diosin mato onaintimai. Diosin nanscarafosi noco oin. Ascan ratofoanmain chaca huaiquin nanfo ato onaintimai.

4

¹ Ascan ifofoan maton yonomatifo inansharafain ato parayamacahuun. Man man tapia marifi man ifoya. Maton Ifoan nai muranshon matori oinfainni.

² Ascacun Upa Dios cufinquin unuyamacahuun. Cufinquin ahuaara futsa shinancaquima. Upa Dios iconcoin fusti cufinquin isca huafafaincahuun, —¡Aicho! Upa Diosin min ua shara huafafainiran, —ishon cuficahuun.

³ Ascashori nocori cufishocahuun Upa Diosin mani futsafoanri noco nichiano non Cristohuunoa ato yoinon. Nannoa icafoancai tsoan Cristohuunoa nicayomisima. Ascan un Cristohuunoa tsain shara un yoiaiton ua futsafoan cunu muran iquimanifo.

⁴ Ua fasi cufishofafaincahuun Jesucristohuunoa shafacaficoin un yorafo ato yoinon.

⁵ Ascashon Jesús icoinra huamafo fu icaquin ato ismasharacahuun man ishara cuscan. Ascashon man atoqui nocoaitifi Jesushuunoa yoisharafafaincahuun.

⁶ Ato fu tsaincaquin shara fusti ato yoifafaincahuun. Cayacaficoin ato yoicahuun aton nomuranshon shinanchacanonfoma. Man ascaquifin nantifi yorafo cayacaficoin man cumasharatiro.

Pablonun ahuun tsain unutaquin Colosas anoafo tsain shara fomani

⁷⁻⁸ Ascano nocon yorahuan Tiquicohuun un fasi ahuun noicoin. Nanton u futan nocon Ifo Jesús yonoshomisiquin. Ascacun un Tiquico mato ari nichicain un icai cuscan mato tapimafain urimain ahuuscaiquin mato tapimanon. Ascashon mato yoiaino shinansharafain maton ointi man unimanon.

⁹ Ascan uhuun yorahuan futsarifi Onésimo nanrifi mato ari nichí. Nanfin matofu ipaoniquin. Ahuunrifi un fasi noi. No futan nocon Ifo Jesús yonoshoqueicai unumisima. Nan rafu matoqui nococashon nonmain nunoashu ahuuscaiquin mato tapimanonfo.

¹⁰ Ascano noco yora Aristarco yafi ua cunu muran iquimanifo. Nantonrifi mato tsain shara fomai. Ascan Marcos arifi mato yoisharapai. Nanfin Bernabé ahuun chaiquin. Ascacun nan Marcos matoqui nocoaiton un mato yoia cuscan ihuisharafain cushusharacahuun.

¹¹ Ascan nocon yorahua futsan ahuun anu Jesús nanrifi ahuun anu futsa Justo atorifi mato yoisharapai. Nanfoan uhuun caifo Israelifo u futan Dioshuunoa yoimisifo. Nanfoanri ua unimamamisifo. Ascan uhuun caifo futsafoancai u futan nunoshon Dios yonoshomisifo. Nan un mato yoiaino futan Dioshuunoa un yoimisi.

¹² Epafra matofu iyopaoniton arifi mato yoisharapai. Nanrifi nocon ifo Jesucristo ahuun oinmati. Ascashon nanton mato Upa Dios cufishoqui isca huafafaini, —Upa Diosin min ato amapaiyai cuscan nantifi ato amahuu ahua futsa shinanonfoma. Ascashu min Furun Jesús ointi cuscara shara inonfo, —ishon nannori un mato Upa Dios cufishoquin huafafaini.

¹³ Ascacun un mato yoiaino cuscan man icoinra huatiro. Epafra matofu yafi Laodicea anoafo non Hierápolis anoaforifi mato fasi Upa Dios cufishofafaini.

¹⁴ Ascano nan nocon yorahuan Lucaspan yorafo cayahuamamisi. Nanhuunrifi un fasi noicoin. Nan Lucas futan Demaspan mato yoisharapaicani.

¹⁵ Jesús icoinra huafo Laodicea anoafo ua ato yoisharashocahuun. Ascashon nan icoinra huaa futsafo Ninfapan pushu muran ichananmisifori ua ato yoisharashocahuun.

¹⁶ Ascan un na cunu mato fomai cuscan oinquin tau huashon nan icoinra huaa Laodicea anoafori ato fomacahuun arifi oinonfo. Ascan nan un ato cunushona cuscari marifi oincahuun.

¹⁷ Ascashon Arquivo ua yoiquin isca huaquin, —Upa Diosin mia yonoa cuscan acoinhuun, —ishon nannori ua yoishocahuun.

¹⁸ Unquian Pablo un mato cunu fomai. Futsan ua cunushofiamisi natian uficoin ahuun unutaquin un mato cunushoni. Ascacun uhuun ointiaquimayamacahuun. Man man tapia ua cunu muran iquimanifo. Diosin matohuun ramapaicain matohuunoa shinansharapainon. Nanti.

Pablo

Pablonun Tesalónica Anoafu Cunu Fomani

Pablon futan Silvano Timoteo nan rafu non fustifain Tesalónica anoafu tsain fomani

¹ Uhuun yoramishtichin Tesalónica anoafu unquian Pablon un mato cunu fomai. Manfin Upa Diosin ahuun facufoquin Jesucristo maton Ifo. Ascan nuno Silas yafi Timoteo ufu icafo nan rafutan mato tsain shara fomai. Ascashon nocon Upa Diosin matohuun ramapaicain maton ointi shara huashonon.

Tesalónica anoafu Jesús icoinra huacoinnafo cuscan ato ismani

²⁻³ Un matohuunoa shinaintifi Upa Dios cufinquin un isca huafafaini, —¡Aicho! Upa Diosin Tesalónica anoafu min ato shinanmashara. Ascan mia icoinra huacashon mia fasi noicoianfo. Ascashon mia yonosharashomisifo. Ascatan nocon Ifo Jesús funaquima manasharamisifo nocoqui afanan nasoshquiran, —ishon un shafatifi un mato Dios cufishofafaini.

⁴ Uhuun yoramishtichin Diosin matohuun fasi noicoinquin mato catonni man ahuun facufo inon.

⁵ Ascan noncai nocon tsain ipaitsi mato yoimisima. Ascatamarocon Diospan Yoshin Shara futan ahuun curushhuunshon non mato Jesushuunoa tsain yoimisi. Ascacun man man icoinra huacoinni. Ascashon marifi man man tapian non mato muran matofu ishara paoni. Ascaiton marifi man Jesús icoinra huacoinni.

⁶ Asca noco Ifohuun nocohuunri man caomisi. Mato futsafoan fasi omitsiscamafianon non mato nan tsain shara Jesushuunoa yoiaiton Diospan Yoshin Sharahuunshon man unimacoincain nicasharapaoni.

⁷ Asca huacanashu nantifi icoinra huafo Macedonian anoafu non Acaya anoafori man ato oinmashara matohuun caotiro nocon Ifo Jesús tanasharanonfo.

⁸⁻⁹ Macedonia anoafu futan Acaya anoafu matohuunshon nocon Ifoan tsain nicaquin tau huanofo. Non matohuunoa ato yoiataima noco yoimisifo isca huacaquin, —Tesalónica anoafu nocon Ifo Jesús fasi icoinra huacoinafo. Ascan Pablo yafi afu rafuafo fasi ato shara huafain yoiainfo cuscan ato nicasharapaicani. Ascashocai afanan ahuara futsa rami huacashon cufitirofoma. Nan Dios natian niacoin icoinra huafain man manayanan yonosharatiro.

¹⁰ Ascan nantian Apa Diosin nan chaca huamisifo manifoti ato onaintimaitiancai nan chaca huamisifo acai cuscan noco asca huaima. Ascatamarocon nocon numai norificai non atofu omitsiscaimaran, —ishon matohuunoa nantiffain yoiainfo.

2

Pablonun Tesalónica anoshon Jesús yonoshoni cuscan

¹ Uhuun yoramishtichin man man tapia noncai ipaitsi matofu ipaonima. Non mato Jesushuunoa tapimasharapaoni.

² Man man tapia non matofu nocoataima Filipos anoafu noco omitsisca huafain noco roapaonifo. Ascashon noco shatunapaifiaquicai Upa Diosin ahuun curush noco inanno non ranotiroma nan tsain shara Jesushuunoa un mato yoini cuscan noco toan shatumanama.

³ Ascano man man tapia un mato iconcain Diospan tsain yoiquicai un mato fuparamisima. Ascashon unricai mato yoimisima isca huaquin, —Uhuunshon Tesalónica anoafu shinansharaforan, —ishocai un yoimisima.

⁴ Ascatamarocon Upa Diosin ua catonni un ahuun tsain shara Jesushuunoa mato yoinon. Ascacun noncai yorafa nocohuunoa shinansharamapaitiroma. Ascatamarocon Dios fusti nocohuunoa non unimamapai. Nan fustiton nocon nomuranshon non shinain cuscan nantifi tapicoian.

⁵ Man man tapia uncai matohuunoa tsain shara yoimisima marifi man uhuunoa shinansharanon. Unricai mato fuparamisima ua ahuara inansharanonfo ishon. Un mato iconcain yoimisi cuscan Upa Diosin tapicoian. Nanto ua oinfafainni.

⁶ Noncai tosa futsafo curafia huamapaipacunacama.

⁷ Ascafia non Cristo fu rafumiscun noco nichini ahuun tsain mato yoinon. Ascacufin non mato yonopaiquin non mato yono cuamisi man noco nicasharafain non yopai cuscan man noco inanon. Ascafiacai non asca huapaipaonima. Non matofu ipaoni nan facu yomushta ahuan cushusharatiro cuscan nanscarifi non mato huapaoni.

⁸ Non mato fasi noicoinquin unimacain non mato Diosin tsain shara yoiyai nan fusti non mato inanmusharapaoni fasi matohuun noiquin.

⁹Uhuun yoramishtichin manmun ointiaquimamanmun un mato murannoashu curushcain yonopaoni. Ascafiacui un ahuara yopaifiaquicai cashman un mato yocaquin fucash huapaonima. Ascatamarocon mato Diosin tsain shara yoiyanan shafatifi yafi yamuri un yonopaoni un yopai cuscan fishquin.

¹⁰Ascano man Jesús icoinra huaa muran un matofu icai chain man man oinyopaoni. Jesús cuscara isharcain unricai ahua chaca huapaonima. Un ascaiton maficoiu uhuunoa man man oinpaoni.

¹¹⁻¹²Apan ahuun facufo noicoiquin ato yoisharatiro isharononfo. Nanscarifi aquin un mato yoisharapaoni man isharcain maton ointi man unimanon. Ascashon Upa Diosin mato imapaiyai cuscan a cuscara man inon. Nantorifi mato catonni afu man Jesús cuscara shara ipanon.

¹³Un mato Diospan tsain yoiaino man yoini isca huaquin, —Nan tsain shara min noco yoiyai cuscacai nocofunun tsainma. Nan Diospan tsainran, —ishon man yoini. Icon non mato Diospan tsaincoin yoisimi. Ascaiton ahuun tsain nicaquin man icoinra huaiton mato fiananan huaa Jesús cuscara man inon.

¹⁴Uhuun yoramishtichin Diospan yorafo nan Dios fu tsainti pushu anoafu ichananmisi-foti Judea anoafohuun man man caoa. Ascano matorifi maton caifoa mato omitsisca huamisifo cuscan nanfoanrifi Jesucristo icoinra huaifoa oinquin aton caifo Israelifoa ato omitsisca huamisifo.

¹⁵⁻¹⁶Ascashon nocon Ifo Jesús rutufain ahuun tsain yoimisifori rutunifo. Ascano nocorifi atomaquishon potanifo. Noco asca huaifoa oincai Upa Diosin atoqui unimaima. Nantifi yorafo chaca huapaicani. Nocori shatumapaicani non nocon caifoma Jesushuunoa yoinonma ato numapaiquin Dios fu ipanonfo. Ascashocai Dios chaca huaquin unumisifoma. Ascaifoa oinquin Diosin afanan tunuyamacaiquin ato fasi onaintimai.

Pablonun afanan Tesalónica anoafu oinpaini

¹⁷Uhuun yoramishtichin non matomaquinoashu canishaquin non mato fasi shinanfaini. Afanan matofu ipaiquin. Ascan afanan non mato oincapaifian non catiroma.

¹⁸Un mato ari fasi capaicaicafian Satanás noco catima huamisi.

¹⁹Non mato yoisimi Jesús cuscara shara man inon. Ascano Jesucristo nocoaitian nantifain tapitirofo man Jesús tanacoinmisi. Nantian Jesús ahuun ointaiifi non matohuunoa unimacoinshquin non mato yosipaoni cuscan man nicacoinmisi.

²⁰Icon nocohuunshon man Jesús icoinra huacoincun non unimai. Ascano Upa Diosin arifi noco aicho huatiro.

3

¹⁻³Un fasi matohuun noi. Mato ari fasi capaifiaquicai un tapinima ahuuscashumain un mato ari catiroquin. Fasi un mato ari capaifiaquicai afanan un tunutiroma matohuunoa tapipai. Ascan un shinan ufcoin Atenas ano un nituyoi. Ascashon Timoteo un matoqui nichishquin. Arifi no fu Diospan facu. Ascashon no futa Upa Dios yonoshquin tsain shara Cristohuunoa yoifoaanfainmisi. Ascacun un Timoteo matoqui nichini mato yoisharonan man Jesús tanasharaquin finacoianshu man omitsiscafiquin man tunuconnon.

⁴Asca tsoa futsan omitsisca huataima non mato yoini isca huaquin, —Non Jesús tanasharaiton nan Jesús noicasmaifoa noco omitsisca huashquiran, —ishon non mato yoiyoni. Non mato yoifafainpaoni cuscan man nanscacoian. Nantian man man tapia non icocoin Jesushuunshon noco omitsisca huamisifo.

⁵Ascacun un matohuunoa fasi tapipaifain. Un mato fasi shinancoinpaoni. Ascashon un Timoteo mato ari nichini man Jesús icoinra huapaoni cuscan nantianrifi man nansca huamun ua tapimashquin. Uhuun nomuran un ratuni Satanás mato chaca huamapaiyai cuscan man nansca huaimainquin. Ascashon man Satanás tanaino non mato ipaitsi yosipaoni itiro.

⁶Ascafi ascarama. Timoteo afanan mato anoashu nocoqui nocotoshishon matohuunoa tsain shara noco yoiya. Man Jesús icoinra huafain man nantifihuun noicoiu. Ascatan nocohuunoiari man shinansharafain fasi nocorifi man oinpaicoian. Nanscarifi aquin norifi non mato fasi oinpaicoiu.

⁷Ascacufin uhuun yoramishtichin noco Jesushuunshon omitsisca huafain ahuara futsafoanri noco fucash huapaifaifono man Jesús icoinra huacoinnaino non shinansharatiro.

⁸Ascan man manfin Jesús tanasharaquin. Mancai ahua futsan afanan shinainma. Nan non tapiaitian non fasi unimacoincain non ishara tiro. Ahuara ahuuscarafaino non tunutiro.

⁹Non matohuunoa shinainquin non Upa Dios cufaitian nocon nomuran non fasi unimacoincain. Non matohuunshon Dios cufinquin aicho huafafaini.

¹⁰ Shafatifi yafi yamutifi non mato Dios cufishofafaini noco mato ari nichiano non mato afanan oinon. Ascano man ahuarafo tapisharatayamaiton un mato tapimashquin man Jesús icoinra huaquin finacoinon.

¹¹ Asca nocon Upa Dios futan nocon Ifo Jesucriston matoqui afanan noco nichipainon.

¹² Nocon Ifoan mato shinanmasharaino man noinain finacoinshcaquin. Futsafo man noisharanon. Non matohuun noicoian cuscan marifi nantifi yorafo man finacoinquin noisharapainon. Non mato noiai cuscan man nantifiri noicoinnon.

¹³ Man ascaiton Diosin maton nomuran mato mutsismai Jesús tanasharafain man ahua chaca huanonma. Ascaino nocon Ifo Jesús ahuun yorafoya oaitian marifi man a cuscara shara Upa Dios ointaifi man ishquin.

4

Ahuuscashumain non isharatiroquin Upa Diosin nocoqui unimanon

¹ Uhuun yoramishtichin uhuun tsain unutaqui un mato yoinon. Non mato yosipaoni ahuuscashumain man itiroquin Diosin matoqui unimanon. Nan non mato yosipaoni cuscan man man nansacoian. Ascacun afanan non mato yoi noco nicacoincapun. Man Dios tanashara cuscan nocon Ifo Jesushuunshon fasi finacoinquin tanasharacahuun.

² Man man tapian nocon Ifo Jesús noco yononi cuscan nannoricoian non mato tapimpaoni.

³⁻⁵ Ascano noco Upa Diosin mato a cuscara shara imapaia man maton ahuinma fu iyamacain ainfofori aton funuma fu inonfoma. Ascان man ascaino nan Jesús icoinra huayamafain Dios onanmisimafoan chaca huamisifo cuscacai huatamarocon nan Diosin yononi cuscan maton ahuin fusti fu man isharatiro.

⁶ Nannori Upa Diosin yononi, –Futsafoan aton ahuin fu ipaiyamacahuun. Tsoa fomanyamacahuun futsan ahuin fu ishquin, –ishon Diosin yononi. Ascان non mato yosini cuscan tsoa ascayamaquin chaca huaiton Upa Diosin ato onaintimacoin.

⁷ Upa Diosicai noco catonnima non furoma inon. Ascatarocon noco catonni non a cuscara shara inon.

⁸ Ascacufin tsoan un mato yosimisi cuscan nicayamai atocai nocofunu fustisi nicacasmaima. Dioscoinrifi nicacasmamisi. Nanton ahuun Yoshin Shara mato inan mato amapaiyai cuscan man tapinon.

⁹ Uhuun tsaincai man yopaima noinanshquin. Upa Diosifin afin mato tapimaicain man noinanon.

¹⁰ Man non tapia man nantifi icoinra huafo Macedonia anoshon man noicoian. Ascacufin non mato yoisharapaicain fasi finacoinquin man ato noicoinnon.

¹¹ Ascacun isharacahuun maton nomuran ahuaton fucash huanonma. Futsan acai cuscahuunoa shinanchacashoyamacahuun. Diosin mato amapaiyai cuscan fustisi acahuun. Nannori non mato yoimisi.

¹² Man asca huaiton icoinra huamafoan mato oinquin matohuunoa shinansharatirofo. Man yopai cuscan mafi man fitiroquin. Ascان mancai futsafona ato yocaima.

Jesús afanan oaitian

¹³ Uhuun yoramishtichin, un mato yosiain cuscan huafain nicasharacahuun. Jesús icoinra huafo naashumain ahuuscacanimainquin un mato tapimai icoinra huamafoan ahuun yora naacon manoaifo cuscan marifi man ato cuscara iquima. Afoan shinancani ato yora naacon non afanan ato oinnacamaran icashu.

¹⁴ Jesús nafashu afanan funini. Nan non icoinra hui. Ascان Jesús afanan oaitian icoinra huafo nan namisifo Upa Diosin atorifi funimashquin afu inonfo.

¹⁵ Non mato yoia cuscan nan Diosin tsaincoin. Nocon Ifo nai ariashu oaitian nan niyoafocai nocon Ifoqui nocoli tau canima. Ascafia Jesús icoinra huacanashu nan niyoafo yafi namisifo nannoranan nocon Ifoqui nocoshceni. Nanscafin anonpacoiquin.

¹⁶ Ascashon noco nai muran ichanan huashquin. Tau huaquin Diosin ahuun manuti fasi chaan chaan aashquin. Chaan chaan acaino Diospan oinmatifo nan a fu imisifo aton niaifoan oi ashcaffinin cunashquin isca huaquin, –Nan man Jesús icoinra huafoti nan namisifo yafi niyoafori fucahuun. Jesús fu nai muran ichananshquin, –ishon ato yonoshquin. Nanscatapaiyaino nocon Ifo Jesús nai murannoashu fotoriscashquin. Ascان nan Jesús icoinra huashu namisifo funitaushceni.

¹⁷ Ascان non nuno mai ano niyoafori non atofu funi caishqui nai coin muran nocon Ifo Jesús fu ichananshquin. Ascashu nantishotapiquin non afu ipanaca.

¹⁸ Ascacun nan tsain shara futsafo ya yoinancahuun maton nomuran unimashcaquin.

5

¹⁻³ Uhuun yoramishtichin ahuutianmain Jesús oshquicain tsoashtacai tapiama. Ascacun nanfohuunoa un mato tapimayoi. Man man tapia yomutson pushu muran iguiataimacain pushu muran icafo ato tapimayotiroma. Rato yamumain iquiriscatoshincai tsoancai tapitiroma. Nanscarifiai nocon Ifo Jesús mai ano oaitiancai tsoan tapiyotiroma. Nocoti chaima icoinra huamafoan isca huashcani, –Nonfin isharacoianquin. Ahuatocai noco ahuusca huatiromaran, –ishon yoishquicani. Anori yoiaifono nantianri samamashtacoin omitsiscariscatashcani. Ascan ainfoan facu nanuashu caiyaintian isin muriscatiro. Nanscarifiai omitsiscai nocoaitian tsoan futsancai nan omitsiscai finontiroma. Raquiricai onutiroma omitsiscashquima.

⁴ Ascafia uhuun yoramishtichin mancai icoinra huamafo cuscarama. Man man shafacafi tapia nocon Ifo nocoriscai cuscan. Ascacun man iquisi itisharatiro. Ascashuca nan nocoaitian man mustairitiroma.

⁵ Icoinra huamafo faquish muran icafo cafiscái. Ascashon ahuafo chipo iishquiai cuscacai tapiafoma. Ascan mancai ato cuscarama. Marificai man faquish muran icafo cafiscaima. Ascatarocon manfin nan shafa muran iqui cafiscáiquin. Jesús inonpacoai noco yoipaoni cuscan man man tapia.

⁶ Ascacun noncai itisharafoma cuscarama. Nanfoan niyoashu nan oshan muran cuscarafoma. Jesús oaitianhuunocai shinanfoma itisharashquin. Ato cuscara iyamacahuun. Nantishotapiquin Diospan tsain nicasharacahuun Jesús oaitian man itisharashcaquin. Ahua chaca shinantamarocon afin mato amapayai cuscan fusti shinancahuun.

⁷ Icoinra huamísimafoan yamu ifafainai fo cuscara. Nan oshamisifo yamu pauncani.

⁸ Ascafia noncai nan cuscarafoma. Nonfin yora nan shafatoca ishara cuscarafuquin. Ascano Diosin mato amapayai cuscan shinanfafaicahuun. Jesús icoinra huacoincahuun. Futsafuahuun noicoincahuun. Man ascainocai yoshin chacafoma mato chaca huamatiroma. Jesús noco numani afanan chaca nocon Ifo itamarocon afin noco Ifo inon non afu ipaishquin. Nanfo man tapicoian cuscan huafain shinancahuun.

⁹⁻¹⁰ Diosicai noco catonnima nocoqui sinaquin omitsiscapanacafoma muran noco potashquin. Ascatarocon noco catonni Jesucristoahuunshon nocon chaca soashoshquin non afu nipanon. Ascano nan noco nashoni oaitian non niashu iyamarai naashu non afu ipanon.

¹¹ Ascacufin futsafoan aton nomuran unimamacahuun. Mun tapian manfin nanscacoinsiquin. Ascashon nanscasi huariacahuun. Jesús tanamatanacahuun.

Pablonun ahuun tsain unutaquin ato yosisharani

¹² Uhuun yoramishtichin un mato yosisharapai. Ua nicasharacapun. Upa Diosin nan tapimamisifo catonni ahuun tsain mato yosinonfo. Nanfoan mato curushcain yonosharashomisifo nocon Ifo man tanasharanon. Ascan atohuunoa shinansharafain ato nicasharacahuun.

¹³ Nocon Ifohuunshon mato yonosharashomisifo. Ascacun atohuunoa shinansharafain ato noicoincahuun mafiran fochishmanantananyamacain isharacoincahuun.

¹⁴ Uhuun yoramishtichin ua nicasharacapun. Nan shanimsifo yoicahuun shaninonfoma yonosharashcaquin. Aquí tushcuimisifori yoisharacahuun nocon Ifo mutsisipa tanasharanonfo. Nan samamashta chaca shinanmisifo ato oinmasharacahuun man atohuun noiquin man ato cufishotiro chaca huanonfoma. Nantifihuun noicoincáiquin ato oitsii huasho yoisharacahuun. Ascatan ahua ahuuscarafaino atohuun patsicain ato yoisharacahuun.

¹⁵ Futsan mato chaca huaiton ato copiyamacahuun. Ascatarocon nantishotapiquin shara huatanancahuun. Nantifi yorafo shara huacahuun.

¹⁶ Unimafafaincahuun.

¹⁷ Dios fu tsainfafaincahuun.

¹⁸ Ahuara ahuuscarafaino yoiquin isca huacahuun, –¡Aicho! Upa Diosin, min ufu icacainiran, –ishon yoicahuun. Manfin Cristo Jesús icoinra huamisiquin. Ascan Upa Diosin nannori mato shinanmapai. Man asca huaiton Diosin fuchipai.

¹⁹ Diosin Yoshin Sharapan mato amapayai cuscan shatuyamacahuun.

²⁰ Futsafoan Dioshuunshon mato yoiaiton, –Nanton yoiai cuscacai ahuamaran, –ishon shinanyamacahuun.

²¹ Ahuara futsan mato yosipaiyaiton Diospan Yoshin Sharahuunshon a yocacahuun nan tsain yoiai cuscain icon iyamarai iconmaquin. Ascano nan tsain icon fusti tanasharacahuun. Tsain iconma icoinra huayamacahuun.

²² Ahuara chaca fishtayamacahuun.

²³ Diosin fustiton nocon nomuran isharamatiro noco fucashhuanonma. Nantofin mato imasharacoinquin ahuun ointi cuscara man inon. Ascashon maton cushusharafain maton nomuranri cushushara ahuara shara fusti man shinanon. Upa Diosin mato nansacoin huaino nocon Ifo Jesucristo afanan oaitian matoqui shinansharashquin.

²⁴ Diosin mato catonni man icoinra huanon. Diosin noco ahuara yoiai cuscacai noco paratiroma. Noco ashoshquin.

Pablonun ahuun tsain unutaquin ato cunushoni

²⁵ Uhuun yoramishtichin noco Upa Dios cufishocahuun.

²⁶ Nantifi yoinonansharacahuun.

²⁷ Ascashon Upa Diosin mato yonoa cuscan nicasharacahuun. Nan man icoinra huafoti un mato cunu fomaicai ato nicamacahuun.

²⁸ Nocon Ifo Jesucriston mato shara huamayai cuscan mato asca huamapainon. Nanti.
Pablo

Pablonun Tesalónica Anoafu Afanan Cunu Fomani

Pablonun Jesús icoinra huafo Tesalónica anoafu cunu fomani

¹ Unquian Pablo un mato cunu fomaino Silvano futan Timoteo mato yoisharapaicani. Nan rafu nuno ufu icafo. Ascacun uhuun yoramishtichin Tesalónica anoafuan manfin Diospan facufoquin. Ascano Furun Jesucristo mato Ifocoin. Man ichananmisi ahuunoa shinanshaquin.

² Apa futan man yopai cuscan mato inantiro ahuun Yoshin Sharapan matohuun ramapaiqui mato nomuran mato shinansharamatiro. Mato asca huanon.

Cristo nasoaítian nan icoinra huamafo Upa Diosin ato onaintimashqui

³ Uhuun yoramishtichin man Jesús icoinra huaquin tau huani cuscan natian man fasi finacoquin icoinra huashu fasi man noinancoinna. Ascan un mato Dios cufishonaitian un cufinquin isca huafafaini, —¡Aicho! Upa Diosin min yorafo Tesalónica anoafuan fasi mia tanasharacoianforan, —ishon un mato cufishomisi.

⁴ Ascacun un mai futsafo ari cashu nan icoinra huafo fu un ichanaintian matohuunoa un ato yoisharamisi isca huaquin, —Nan icoinra huafo Tesalónica anoafu ahuun caifo futsafoan ato omitsisca huamisifo. Ascafia ahuaara chaca futsa finonfiacaquicai aton nomuranshon shinanchacatarocon Jesús icoinra huacashon tunucoianfo, —un yoimisi.

⁵ Ascacufin Jesushuunoa omitsiscaquin man tapitiro Diosin cayacafi shinanquin mato itishara huaa afu man ipanon. Ascashu natian man omitsiscafiashu chipo man afu isharpacunaca.

⁶ Diosin iconconin fustisi. Ascacufin ahuunoaashu man omitsiscaiquin nan mato omitsisca huaifofin aafin aton chipo onaintimaquin omitsiscamacoinshquin.

⁷⁻¹⁰ Ascashu nocon Ifo Jesús mai ano nasoaítian noco numai oshquin non afanan omitsiscapanonma. Nan oaitianri ahuun oinmati mutsisipafori nai ariashu afu fotoshcani. Ascaino nantifi ahuun yora nan cuscara sharacoinfo aqui unimacoquin ahuunoa non yoiquin isca huashquin, —¡Aicho! Nocon Ifo Jesús tosa futsacai mia cuscarama. Min nantifi finoncoian. Min sharacoin. Non mia noiran, —ishon non yoishquin. Ascan non mato Jesushuunoa yoipaoni cuscan man man icoinra huaa. Ascashu nan Jesús nocoaitian marifi man noco futan yoisharashquin. Ascan nantianri Apa Dios icoinra huayamafain ahuun tsain shara ahuunoa yoiaifo cuscan nicacasmamisifo omitsiscapanacafo muran ato potashquin. Anoashucaí tosa raquí fopanacama. Nocon Ifo Jesús icanoricai nocopacunacafoma. Ahuun curush shararicai toan oinnacama.

¹¹ Ascacufin non mato cufishoquin isca huafafaini, —Upa Diosin min ato imapaiyai cuscan ato imahuu. Mia icoinra huashon futsafori shara huapaiyai fo cuscan min curush ato inahuun, —ishon Upa Dios un nantishon tapiquin mato cufishomisi.

¹² Non mato nannori Upa Dios cufimisi futsafoan mato oinquin arifi nocon Ifo Jesushuunoa yoisharanonfo isca huacaquin, —Jesús ahuaamamishi huatiro. Ascashon ahuun yorafo nan cuscara sharacoinfo ato imaran, —ishon ahuunoa yoisharanonfo. Ascano Upa Dios futan noco Ifo Jesucriston matohuun ramapaiyaino mato nanscara shara huatiroquin.

2

Na nocofunu chacahuunshon Dios nicacasmamisifoquin ishon ato yoi

¹⁻² Ascan nocon Ifo Jesucristo afanan oaitian nantian nan icoinra huafoti non aqui noconain futsui afu ipashquin. Ascafia futsafoan maton parapaicani isca huaquin, —Jesús man oshon inonpacoai cuscan ua tapimanan, —ishon futsan mato yoiaraca. Ascan futsanriracan mato yoi isca huaquin, —Man non nica Jesús man oaran, —ishon futsan yoiaino futsanri yoi Pablonun noco cunu fuma, —Jesús man oaran, —ishon mato yoifiahucaí icoinma. Ascacun mustairiyamacahuun. Un mato yoinon. Jesús mai ano nocoaino nantifi icoinra huafo afu ichananshquin. Ascashu afu ipanaca. Mato yoisharapaiyaiton nicasharacahuun.

³ Nan chanimisifo icoinra huayamacahuun. Jesús oataima iquisi nan manifoti anoshon Upa Diosin tsain potacani afanan nicapaicanima. Fasi finacaía yoitima ishcaquin. Nantianri nocofunin chaca finacoian yorafoan ointirofo. Nantocafin Diosin yononi cuscan nicacasmacoquin. Nanfin Satanás yoraquin. Ascafia chipo omitsiscapanacafo muran caashquin.

⁴ Ascan niyoshon nan nocofunin chaca yoishquin isca huaquin, —Un nantifi finoncoian. Nan man yoia, “Nocon Diosiran,” ishon cufimisifo. Ascan nancai Diosimaran, —ishon ato

yoishquin. Ascatan Dios fu tsainti pushu muran iquishon ato yoishquin isca huaquin, — Ahuara futsa cufiyamafain ahudara futsari noiyamacahuun. Unfin Diosiquin, —ishon ato paranshquin.

⁵ ¿Man ointiaquimanamanmun un matofu iyoshon nanfohuunoa un mato yoipaoni?

⁶ ¿Ascán man shinanmamun un mato yoini isca huaquin, —Nan nocofunu chacacoin Upa Diosin nitumayoi. Ascashon nan Upa Diosin nitun huayamaino caashquin yorafoan oinonfo, —ishon un mato yoini?

⁷ Nan noicasmamisi nitumayoicai oataima. Chipu Upa Diosin afanan nan nocofunu Satanashuunshon chaca huamisi nitun huayamaino nocoshquin. Acái nocoataimafia nan Satanashuunshon natanri chaca huafiacaquin fomanpaicani.

⁸ Chipu nan nocofunu chacacoin Satanashuunoashu yonomisi nocoshquin. Ascaiton nocon Ifo Jesús ahuun tsainman rutushon omitsiscapanacafo muran potashquin.

⁹ Nan rutuataima Satanás curushhuunshon nan nocofunu chacacoinni tsoan oinyomisima cuscara Satanás yonopan nanscarafu huashquin yorafo parashquin.

¹⁰ Nan nocofunun icoinra huamafo aton parashquin. Ascashon chaca futsa futsatapafo huaiton oinquin nan icoinra huacanashu arifi nanfo omitsiscapanacafo muran foshquicani. Nanfoancai Diosin tsain iconcain nicapayamafain tsoanricai nan tsain shara noimisifoma Dios fu ipashcaquin. Ascashu omitsiscapanacafo muran foshcaini.

¹¹ Ascacufin Diosicai afanan aton nomuran nitun huaima nan paramisifoan ato yoiafo cuscan icoinra huanonfo.

¹² Ascashon nanfoanricai Diospan tsain iconcain fusti icoinra huayamafain tsoanri noipaimisima. Ascatararocon chaca fustisi fuchipaiyaifoan Upa Diosin ato omitsiscapanacafo muran potashquin nan paramisi futsafo fu ipanonfo.

Diosin noco catonni nocon chaca soashu afu non ipanon

¹³ Ascafia uhuun yoramishtichin mancai ascarama. Nocon Ifo matohuun noicoinquin Upa Diosin mato catonni. Ascano mancai omitsiscapanacafo muran catamarocon ahuun Yoshin Sharapan ahuun tsain iconcain man man icoinra huua.

¹⁴ Ascano ahuun tsain shara Jesucristohuunoa non mato yoiai cuscan nocohuunshon man man tapian. Ascashon marifi man icoinra huaiton Furun Jesucristo funimani cuscan matorifi funimashquin a icano man afu ipanon.

¹⁵ Ascacufin uhuun yoramishtichin, non mato iconcain yosimisi cuscan nan fusti tanasharacoincahuun. Ascán man oian ahua futsa ascarayamacun afo tanayamacahuun. Non mato yoipaoni cuscan nan fusti icoinra huafain non mato cunushoni cuscari nanrifi shinancahuun.

¹⁶ Nocon Ifo Jesucriston futan nocon Upa Diosinri nocohuun noifain nocohuun rama-paiquin. Nocon nomuran noco unimapacunaca. Ascacun non tapitiro nococai potapacuna-cama non afu ipanon.

¹⁷ Ascacun maton nomuran unimafain ahuun curush mato inanpainon ahudara ahuus-carafiaino man yorafo yoisharafain ahudara man ato ashosharafafainon.

3

Noco Upa Dios cufishocahuun

¹ Ascán uhuun yoramishtichin uhuun tsain unutaqui un mato yoinon. Ascano noco Upa Dios yocashocahuun nocon Ifoan tsain shara man nica cuscan huafain noco Ifohuunoa nantifi futsafori yoicahuun arifi onihuafoanricai futsafori samamashta yoiaifoan icoinra huanonfo.

² Ascano atifitocai nocon Ifo Jesús icoinra huacanima. Ascacun noco Upa cufishocahuun noco numanon nan yora shinanchacamisifo futan nan isharamisifoanmari noco ahuusca huanonma. Ascashon Jesushuunoa non tsain shara yoiai cuscan noco shatumanonfoma.

³ Ascafia nocon Ifo no fu icacaini. Ascashon nocon yoimisi cuscan noco huashoshquin. Nan yoshin chaca Satanás noco omitsiscamapaifaiton nocon Ifoan noco mutsismafain noco cushusharafafaini.

⁴ Non matohuunoa shinansharamisi cuscan non icoinra huai. Ascashon non mato yononi cuscan man nanscasi amisi. Natanrifi man nanscasiariai. Nan non icoinra huai.

⁵ Upa Diosin fasi matohuun noiai nocon Ifoan mato tapimapainon. Cristo ahudara ahuuscarafiaino tunucoinni cuscan marifi ahuunshon man tapisharapainon.

Nantifain non Jesús yonoshosharanon

⁶ Uhuun yoramishtichin nocon Ifo Jesucristohuunshon un mato yonoi. Icoinra huua futsanfoan noco nicacasmatan yonocasmái shanimisifo fu rafuyamacahuun.

⁷ Man man tapishara non maton muran icashu non shanitamarocon non yonosharpaoni. Non yonoai cuscan marifi nocon fu yonosharacahuun. Nocoahuun caoncahuun.

⁸ Non matofu icai chaincai maton tushu non cashman mato pianpaonima. Ascatamarocon nantishotapiquin curushcain non yonopaoni ahuun rafanan pui fishon norifi piishquin. Ascano marifi marus fusti maton pui man ichapa potanonma. Non yonoi nanscapaoni.

⁹ Diospan tsain yononi isca huaquin, –Nan mato Diosin tsain yoimisifo yopaifo cuscan ato inancahuun, –ishon cununi. Ascan un mato yocapaiquin iconcoin un mato yocacuana. Ascafia non mato oinmasharapaquicai non mato ahua cashman yocamisima.

¹⁰ Man man shinainmun non mato muran ishon non mato yoini isca huaquin, –Tsoan yonoshomacai pitiromaran, –ishon mato yoini.

¹¹ Ascashon matohuunoa noco yoiabo isca huaquin, –Atirifi onihuanifoti yonocasmacani. Ascashu cahuascaquin chani fusti yoifoanfaincaniran, –ishon matohuunoa noco tapimanafo.

¹² Ascano nocon Ifo Jesucristohuunshon non mato na cuscarafo non yoi man afanan ascanonma. Uncai uhuun tsain fustiton un ato yoi fustima. Unrifi mato yonoi. Ascacun afanan ascayamacahuun. Afanan foanfainyamacahuun. Ascatamarocon yonosharacahuun ahuun rafanan pui fishon man yopai cuscan fishcaquin.

¹³ Ascacun uhuun yoramishtichin nan man yonosharamisifo un mato yoisharapai. Man futsafo shara huamisi cuscan unupaiyamacahuun.

¹⁴ Ascan tsoan un mato yonoo cuscan nicacasmaiton oin afu rafuyamacahuun. Man ascaino rafipainon Diosin tsain nicacasmashu.

¹⁵ Nanscara yora fucai tsoan rafutiroma. Ascafia shinanqui isca huayamacahuun, –Un noिकास cuscararan, –ishon anori shinanyamacahuun. Ascashon nan mato yoracoinhuun man shinain cuscan atohuurifi shinancahuun.

Pablonun ahuun tsain unutaquin ato cunushoni

¹⁶ Nocon Ifoan arus fusti nocon ointi unimamatiro. Shafatifi ahuaara ahuuscarafiaino maton ointi mato unimapainon. Nocon Ifo nantifi matofu isharanon.

¹⁷ Unquian Pablo nantian uficoin uhuun mucupan un mato cunushoni. Ascano oinquin man tapitiro uficoin un mato cunushoni. Ascan nan un cunwaiti un nansca huamisi.

¹⁸ Nocon Ifo Jesucriston nantifihuun matohuun ramapai. Nanti.

Pablo

Pablonun Timoteo Cunu Fomani

Pablonun Timoteo cunu fomani

¹ Unquian Pablo un mia cunu fomai min tapinon. Upan Diosin ua catonni Furu fu rafunon ahuun tsain Cristo Jesushuunoa un yoifafainon. Nan nocon Numamisi Jesucristo futan ua yononi manifoti isca huaquin un yoinon, —Jesucriston noco nashonishaquin arus fusti noco Upa Dios ari iyoshquinran, —ishon un ato yoinon.

² Ascano un mia Jesucristohuunoa yoiaiton min icoinra huani. Ascacun min icoinra huahuunshon min uhuun facu cuscaracoin. Un mihuun fasi noi. Nocon Upa Diosin futan nocon Ifo Cristo Jesús mia noiquin mia cushusharafain mihuunrifi ramapaia. Ascashon min ointi mia main huamanon.

Futsan amaquiri mato yosiaiton icoinra huafo yoihuu ato nicanonfoma

³ Ascan un Macedonia ano caquin un mia yoini isca huaquin, —Efeso anoashu cariyamahuun. Anoa futsafoan ato Diospan tsain amaquiri yosimisifo. Ato yoihuu afanan asca huaquin yosinonfoma, —ishon mia yoini.

⁴ Non Diosin tsain yosiquin futsafo non yoitiro Jesús icoinra huanonfo. Ascan nan amaquiri yosimisifo asca huatarocon shunipafo yafi aton shunifohuunoi yoiäfo. Non yosiqui asca huaicai Diosin noco icoinra huamapaiyai cuscan tsoan tapitiro. Nicañacani afohuunoa fochishmanantantirofo. Ascashon ato yoihuu afanan shunipafo yoinonfoma. Aton tsain shatumahuu.

⁵ Un nannori yonoa noinanfo. Ascashucaí non nocon ointi muran ahuashta shinancha-catarocon shinanshara fustifain nocon nomuranshori non nocohuunoa huacai chaca shinanyamafain non Jesús icoinra huacoinnai cuscan non futsafo noicointiro.

⁶ Atrififaincai asca huacanima. Ascatarocon Diosin yonoa cuscan man cachiquiri huafo. Ascashon tsain ahuama ipaiti yoisifo.

⁷ Ascashon Moisés nocon yononi cuscan futsafo tapimapaicaqui nanfoan yoisimisifo isca huaquin, —Moisés yononi cuscan man non fasi tapicoiran, —ishon yoifiamisishacaquicai yospaiyai fo cuscan tapicoianfoma.

⁸ Man non tapia Moisés yononi cuscan shara yosimainquin cayacaficoín futsafoan nicasharatiro isharashcaquin.

⁹ Man non tapia tsoa isharamisi Diospan tsain fusti tanasharashucaí Moisés yononi cuscan yopacanima isharashquin. Ascan nan Diosin yononi cuscan nicascamamisifo tapimapai chaca huamisifo cuscan shatuyamaifoan ato onaintimashqui.

Ascashu nanfo isca huamisifo. Diosin yononi cuscan nicascamamisifo icain Diosin ato shinanmapaiyai cuscan shinancasmafain chaca futsa futsatapafo huamisi icain aton apa yafi ahu chaca huafain rutumtsamisi icain.

¹⁰⁻¹¹ Aton ahuinma non aton funuma fu icain nocofunufu yafi ainfofo chaca huatanan-misi icain futsa curushcain aton yonomati imafain chanimisifo. Ascacashu ahuara futsa Diosin noco sharacoin yononi cuscan nicascamacani. Nanscaräfo Diosin ato nicamapai nan yononi cuscacoin anonfo. Ascafia chaca huamisifo cuscan shatuyamaifoan ato onaintimashqui tapinonfo. Upa Diosin ua yononi cuscan ahuun tsain sharacoin nantifi yorafo un ato yoinon. Nocon Dios fasi sharacoincun.

Diosin ahuun ramapaicun Pablonun aicho huani

¹²⁻¹⁴ Noncai Diospan Furun onanyopaonima. Ascashon un yoipaoni isca huaquin, —Jesuscai Diospan facuma. Aafin chanimisicoínquin, —un huapaoni. Ascashon ahuun yorafori un fasi ato omitsisca huapaoni. Un nocofunu fasi musucoín ipaoni. Un tapipaonima un Diospan Furucoin chaca huafiaquin. Un asca huafiaiton uhuun ramapaiquicai ua onaintimanima. Cristo Jesús ua noiquin ua shara huashofain ua tapimani ahuuscashomain un icoinra huatiroquin.

¹⁵ Un natian mato icon yoiäi cuscan man icoinra huatiro. Cristo Jesús nai ariashu mai ano ftoni yora chacafo numashqui afu ipanonfo. Ascan unfi chaca huaqui finacaimisiquin. Tsoa futsacai asca huamisima.

¹⁶ Ascacun uhuunshon Upa Diosin nantifi yora ismatiro nan chaca finacaia ahuun chaca soashotiro afu ipanon. Isca huaquin shinantirofo, —Shinancapon, Pablonun fasi chaca huapañificun Jesucristo fasi Pablo noiquin. Jesús uarifi noitiro. Pablo numaquifin uarifi numatiroquin un afu nipanon, —icashon shinantirofo.

¹⁷ Ascano nocon Dios Niaifocoin nipanaca. Arus fusti Dios futsa yamai. Tsoancai Dios ointiro. Nantiffain non ahuunoa yoisharapacunaca isca huaquin, —Mirusu fustiton nantifi tapicoian. ¡Aicho! —ishon non yoipacunon.

¹⁸ Timoteon min uhuun facushtan. Un mia yoiai cuscan nicasharahuu. Min Dios yonoshonataima mihuunoa iquisi inonpacoai cuscan yoisharayoni. Ascan natian afanan un mia yoisharai. Mihuunoa yoisharani cuscan nanscasi huafafainhuun. Satanás noco chaca huamapafiaitton a nicatamarocon Dios fusti tanasharafafainhuun chaca huashquima.

¹⁹ Min Jesús icoinra huacoinmisi cuscan unuyamahuu. Ahuunoa shinanfaihuun. Ahuara chaca huashon Upa Dios yoiriscahuun min nomuranshon ahua chaca afanan shinanshquima. Atirifiton chaca huafiacashon Upa Dios yoimisifoma arus fusti shinanfaiacuquin shafacafi cainmacasmacuquin. Ascashon tsoan Dios yoipaimisima aton chaca soashonon. Asca chaca huariaifoan afanan icoinra huacanima. ¡Ohua! Afanancai aton nomuran shinansharamisifoma.

²⁰ Noco yora rafu nanscara rafuquin. Himeneo yafi Alejandro un ato Satanás inan ato onaintimanon. Ascashon tapinonfo afanan noco Ifo Jesús chaca huanonfoma.

2

Ahuuscashomain non Dios cuftiroquin

¹ Natian tsain futsa un mia yoinon. Ua nicasharapun. Upa Dios cufifaihuun. Nanfin fasi shara finacoianquin. Ahua futsacai ascarama. Nantifi yorafohuunshon Upa Dios cufihuun ahuun Yoshin Shara yopaifo cuscan ato cufishoquun. Diosin atohuun ramapainon cufishofain Diosin ato amapaiyai cuscan cufihuun nanscasi huanonfo. Atohuunoa Upa Dios yoihuu isca huaquin, –¡Aicho! Upa Diosin min na yorafo shara huashoshquiran, –ishon cufinquin nannori yoihuu.

² Nannoricoin nan niaifocoin yafi ahuun niaifo patasharinoafori ato Upa cufishoquun noco iquisharanonfo ahuaraton noco fucash huanonma. Ascano Dioshuunoa non shinanfaiatiro a cuscara sharacoin iishquin.

³ Ascacun nan nocon Numamisi Dios noco oian non isharaiton oin unimacointiro. Nanscara fuchipai.

⁴ Nantofin nantifi yorafo numapaiquin. Ascashon aton chaca soashona afu ipanonfo. Cristohuunoa iconcain tapisharanonfo.

⁵⁻⁶ Iconcain Diosifin fustiquin. Futsa yamai. Afin sharacoinquin. Yorafocai a cuscarafoma. Nantiffain man non chaca huamisi. Ahuara chacacai Dios fu itiromai. Nan Jesús nocon cuscara nocofunuquin. Arus fustitofin noco nashoniquin nocon chaca soashoshquin non Dios fu ipanon. Nantifi yorafo numapaiquin noco nashoni. Upa Diosin yorafo tapimapaiquin Furun Jesús mai ano nichini noco nashoshquinon.

⁷ Ascacun Upa Diosin ua catonni Jesús fu rafucain ahuunoa uhuun caifomafo un yoinon. Atorifi un Jesushuunoa icon yoiaiton icoinra huanon. Ascan uncai mia paraima. Icon fustisi mia yoi.

⁸ Ascano nantifi manifotifainmain Upa Dios cufipainonfo. Ahuara chaca yoicani fochishmanantananyamacain sinatamari Jesús tanasharaqin mushainacahuan Dios cufipainonfo.

⁹ Ainfofori un yoisharapai non ichanaintian isca huaquin shinanonfoma, –Uhuun saya sharastacoin sahuufain fusoqui cunucain uhuun foo shara huafain nantiffain ua oinonforan, –ishon ascacacuin man icai cuscan matohuunoa futsafo shinansharamapaiyamacahuun.

¹⁰ Ascatarocon ato futan ahua futsa shinancaquima Upa Dios fusti shinancoincahuun. Man yoimisi isca huaquin, –Non Dios noicoinran, –ishon. Manmain icoincain futsafo shara huashofaincahuun. Un ainfofo anori yoisharapai.

¹¹⁻¹² Ascano Diospan tsain nicashquin man ichanantiro. Ascacun mun yoimisi ainfofoancai nocofunufo yonotiro. Diospan tsain yoimisiton yoiaiton puusiquima ainfoan nicasharatiro yoiai cuscacoin tapifain nan yoiai cuscacoin aashquin.

¹³ Diosin Adán onihuaquin tau huani. Chipo Evari onihuani.

¹⁴ Ascacufin Satanascái Adán parayonima. Eva paraquin tau huani. Nanto chaca huaquin tau huani. Diosin ato yononi cuscacai nicanima. Ascano ichanainfotian ainfofoan nica fustitirofo.

¹⁵ Ascacufin ainfofoan facu caiyaintian isin muyotiro. Ascacufin Jesús icoinra huashon noifain a nanscara shara icanashu Dios fu ipatirofo.

3

Ahuu cuscaramain ichanarfo cushumisifo itiroquin

¹ Iton tsoan Diospan yorafo cushumisi ipaiquin yonoshosharafafainpaitiro.

² Nan nocofunu cushumisi shara fusti itiro.

Ascano ahuara chaca ahuunoa shinainfocain cushumisi itiroma.

Ahuin fusti ya icain

pau fuchipaimisi iyamacain

ahuara ahuuscarafaino shinansharamisi icain

ahuara shara fustisi shinanpaimisi icain

ahuun pushu muran yora iquimasharamisi icain

futsafo Diospan tsain tapimasharatiro icain.

³ Paumisi iyamacain

sutumitsapaimisiri iyamacain

futsafo yoisharapaimisi icain.

Ascataricai fochishmanantananpaimisi iyamacain

pui noipaimisiri iyamacain.

Nan cuscara nocofunu catonhuun icoinra huafo ato cushumisi inon.

⁴ Ahuin yafi ahuun facufori ato ismasharaiton

ahuun facufoan ahuunoa shinansharafain nicasharanonfo.

⁵ Ascano ahuin yafi ahuun facufo nicamasharayamaino ahuuscashomun nan Diospan yorafo ichananmisifo ato nicamasharatiroquin.

⁶ Ascacun nocofunun rama Jesús Ifoatocai ichananmisifo cushumisi itiroma. Nan cuscara man catoanfin shinanqui isca huatiroquin, —¡Aicho! Unfin fasi sharaquin. Ascan ua samamashta catoanfo un ato cushumisi inon. Ascan uncai futsafo cuscarama. Un ato finoncoianran, —icashon cacapaimisi itiro. Nannori Satanás noco shinanchacamapai.

⁷ Ascacun isharaicon oinmisishacaquin nan icoinra huamafoanri ahuunoa shinansharacashon catontirofo nan ichananmisifo cushumisi inon. Nanscara iyamaiton Satanás ahuun nomuran shinanmatiro nan chaca huamisi cuscan. Ascashon nan chaca huamisifohuunoa shinanquicai a ichananmisifo tapimasharatiroma.

Ahuu cuscaramain ichananfo shara huashomisifo itiroquin

⁸ Nanscarificai ichananfo aton shara huashomisifo isharamisifo

futsafoan atohuunoa shinansharafain

icon fustisi yoimisifo. Nan cuscarafao ichananfo aton shara huashomisifo itiroquin.

Iscarari itirofo.

Paumisi iyamacain

pui noimisiforicai itiroma.

⁹ Ascashon tsoancai Jesushuunoa tapiyopaonima.

Natian ahuunoa Diosin noco tapimanai cuscan tsoan nan icoinra huafoan shara huashomisifo itiroquin. Ascano fasi finacaiquin Jesushuunoa tapiipaicoian nan cuscarafin ichananfo aton shara huashomisi itiroquin.

¹⁰ Tsoan ichananfo ato shara huashomisi ipaiyaiton iquisi oinsharayotirofo. Isharacoincaimain ahua chaca huamaquin. Ascan oianfo isharaconcaimaiton nan cuscara ichananfo shara huashomisi itiroquin.

¹¹ Aton ahuinfori isharaconmisi icain yoiti huamitsapaimisi iyamacain paunmisiricai itiroma. Ahuara shara futsa aquifin Jesushuunshon asharamisi itiroquin.

¹² Nan ichananfo aton shara huamisifori

ahuin fustiyafa itirofo.

Ascashon ahuin yafi ahuun facuforifi onihuaniti. Nanfoanri Jesús tanasharanonfo.

¹³ Nanscara shara huashomisi ichananfoan ahuunoa yoisharatirofo. Ascashon nanton nocon Ifo Jesucristo icoinra huaquin finacointiro.

Tsoan Jesucristohuunoa nicayopaonima cuscan Pablonun cunushoni

¹⁴⁻¹⁵ Uhuun facushtan Timoteo un mi ari cariscapaificai un funa caiyamaquin un mia tapimai ahuuscashumain ichananmisifo isharatirofoquin. Uhuun cunuhuunshon un mia tapimayoi. Jesús icoinra huafo ichananmisifo nanfofin Diospan yorafoquin. Ascan nan Dios ipanaca. Ahuun tsain iconcoian ahuun yorafo nan ichananmisifohuunshon futsafori tapimaiquin.

¹⁶ Icon atirifitocai tsoan Diospan tsain tapiataima isharaashacaquin. Ascafia Jesushuunoashu non isharatiro.

Aafin Apa Dios icariashu mai ano fotoni nocon cuscara yoracoin iishquin.

Ascatarifi Diosin Yoshin Sharapan ismapaoni Jesuscai ahua chaca huamisima icon fustisi imisi.

Diospan oinmati afu nai muran icafoanri oinnifo.

Ahuunoashu manifoti futsafoan yoiqui isca huamisifo, —Jesús Upa Diosin facu. Ascashon arus fusti maton chaca soashotiroran, —ishon yoifanfafainmisifo.

Yoiaifoan nicacashu atirifi manifoti anoshon icoinra huacani.

Ascashu Jesús naafiashu mai murannoashu funini.

Chipo afanan Apa icano nuinacahuani arifi nantifiton aton niaifocoin iishquin.

4

Atiriffain afanan Jesús icoinra huayamafiacashon futsafo iconma yoipaicani

¹ Diosin Yoshin Sharapan noco cayacafi tapimayoni atirifiton Jesús potaifo cuscan. Ascashocai afanan icoinra huapaitama nan yoshin chacafohuunshon ato yoipaiyaifo ato tanacani funoshcaquin.

² Nan paramisifoan chanihuunoasi shinanfaimisifo cuscan nannorifi futsafori tapimashcani. Nanfoan chani fustisi yoifafaincaquicai afanan ahuara iconcoin shinantirofoma. Chani fustisi tapiafo.

³ Ascashon fasi amaquiri futsafo yosicaquin isca huacani, —Mancai fianantiroma. Atirifi tushu man pitiromaran, —ishon ato parapaicani. Anori yosipaifiaifoan Upa Diosin nantifi tushu onihuani cuscan non nanfo unimacain pitiro. Ascashon piquin non Upa Dios, —¡Aicho! —huatiro. Ascan non Diospan tsain icoinra huashon ahuara iconcoin non tapitiro.

⁴ Ascan nantifi Diosin onihuani cuscan sharacoin. Non ahuara potatiroma. Nantifi Diosin onihuafon non piquin, —¡Aicho! —huatiro.

⁵ Diospan tsainhuunshon non Upa cufaino nantifi Diosin onihuani cuscan sharacoin itiro.

Jesucriston yonoshomisi shara

⁶ Uhuun facushtan Timoteo un mia tapimanai cuscan min icoinra huaa futsafo mirifi min ato tapimashu min Jesucristo yonomati shara itiro. Nan tsain shara Jesushuunoa min icoinra huamisi. Facushon min Diospan tsain icon nicamisi cuscan nansacoin min tanasharacoinmisi. Shafatifi nan tsain shara min nomuran nanuhun futsafori tapimasharashquin.

⁷ Ascafia futsafoan shunipafo cuscara ato tapimapaicani. Ascan nanfocai Diospan tsainma. Ascacun ato nicayamahuu. Aton nicatamarocon Diospan tsain fusti oinsharahuu a cuscara shara iishquin.

⁸ Non ejercicio huaino noco caya non shara huatiro mutsisipa iishquin. Nanscarifai non Dios cuscara ipaiquin ahuun tsain nocon nomuran non nanuaiton ahuun curushu noco inanshquin. Nancaifin shara finacoianquin. Natian noco shara huatiro. Ascashon non Jesusqui nocoaiton noco imasharapacunaca.

⁹ Nancaifin min icoinra huatiroquin.

¹⁰ Ascano non fasi curushu yonoshofafainicain man non omitsiscamisi futsafo nan tsain shara icoinra huanonfo. Nonfin tapia nocon Dios nipanacaton nocori nimapacutiroquin. Afin nantifi yorafo nashoniquin. Ascafia icoinra huafoti afu nipatirofo.

¹¹ Nanfo un mia tapimanai cuscan huafain un mia yonoai cuscari futsaforifi tapimafain ato yonohuun Diospan tsain icoinra huanonfo.

¹² Timoteo icoinra huaa futsafo ato ismahuu min Jesushuunshon ato yoisharafain mirifi isharacain min Jesús icoinra huashon atohuun min noitiro. Ascacun ahua chaca huapaitama Jesús cuscara isharahuu. Pushcoflashu min ascaitocai mihuunoa tsoa ahua chaca yoitirofoma.

¹³ Un miqui nocoaitian atofu min ichananshon Diospan tsain yoia cuscan ato anushoquin yoisharafain yosisharahuu.

¹⁴ Ichananfo ato cushumisifoan mia manmanshon cufishonaifono nantianri Diosin mia amapaiyai cuscan mia ashoni min icoinra huaa futsafo tapimasharafain min ato cushusharanon. Ascan Upa Diosin mia cashman tapimani cuscan huafain futsafori shara huashofainquin shatuyamahuu.

¹⁵ Un mia yonoa cuscan nantifi huafafainhuun ato ashosharashquin. Ascaifin min shafatifi itisharatiroqui. Ascaquin ahua futsa shinantaquima nan min acai fustisi asharafainhuun. Min ascaiton oinquin yoitirofo man min fasi itisharacoian.

¹⁶ Ascacun oinfain. Nantishotapiquin min isharacain min ato cayacafi Diospan tsain tapimasharanon. Min ascaiton Diosin mihuunshon ato numatiro afu ipanonfo chaca huashcaquima. Mirifi min Jesús fu rafucacaintiro. Ascaquin min nomuran unimashquin.

5

Ahuuscashumain icoinra huaa futsafo fu non isharatiroquin

¹ Ascashon nocofunu iyoafo tsain curushu yoyamahuu. Ascataka min upa min yoisharatiro cuscan huafain iyoafo futsafo yoihuu. Min ushtocoinfo min yoisharatiro cuscan huafain nanscarifi chipocu futsafo yoihuu.

² Ainfo mustufori min uhuacoin min shara huatiro cuscan huafain atorifi shara huahuun. Ascashon min chico yafi chipi min shara huamisi cuscan huafain shomayafari shara huahuun. Ato furi ipaiyamahuun. Ascatama atohuunoa shinansharahuun.

³ Ainfo funuomacoin facuomacain fafaomacai nan icoinra huafo ichananfoan cushusharatirofo.

⁴ Ascafiacun funuoma futsan facufo ya iyamarai fafayashon nanfoan cushusharatirofo. Jesús tanasharapaiyaifoan nansca huatirofo. Diosin nanscara fuchipai.

⁵ Ainfo funuoma ahuun yoraomashon Dios fusti shinanquin. Isca huaquin cufitiro, —Upa Diosin ua cushusharahuu, —ishon cufitiro. Shafatifi yafi yamutifiri Upa Dios cufifafaintiro.

⁶ Ascafia funuoma futsafocai ascatiroma. A futsan shinain cuscan huaquin shinantiroma. Futsa afin apaiyai cuscan fusti shinanfafaitiro. Ascaquicai Dioshuunoa shinansharatiroma. Ascashon pushuti chani yoifoanfafaitiro. Nan cuscarafocan chaca huafafainicai Dios fu nipatirofoma. Ascashu nifiahu man naa shinantsaafa.

⁷ Timoteon nanti un mia yoiyai cuscan funuomafihuunoa ichananmisifori tapimahuu. Min ato tapimanai cuscan icoinnaifoan tsoancai atohuunoa yoitiroma isca huaquin, —Timafin. Nafoan aton funuomafo cushusharayamaifoan ato chaca huacaniran, —ishocai atohuunoa tsoan yoitiroma.

⁸ Tsoan ahuun yorafo cushusharayamafain ahuun afocoinri cushusharayamaicai Diosin tsain cununi cuscan aima. Nancaifin Jesús icoinra huafoma cuscara finacaiquin.

⁹ Ratoran funuoma futsa ahuun fari sesenta nocoataima ahuun funu niyoano furoma ipaonicai. Nanscaracai ichananfoan cushutiroma.

¹⁰ Ascan funuoma isharamisi futsafoan ahuunoa isca huaquin yoitiro, —Nan ainfo funuomaton futsafo shara huafafainiran, —ishon ahuunoa yoifain ahuun facufo tapimasharamisiran huafain futsafo ahuun pushu ano nococun ato shara huamisi icain Jesús icoinra huafo shara huafain futsafoan ahuara chaca finocan atori shara huamisi icain futsafo ato shara huamiscain ascara funuomafo ichananfoan ato cushusharatiro.

¹¹ Ascafia funuoma yoshafotaime nan ichananfoan cushutirofoma. Rucun yoiyomisi, —Cristo fustihuunoa shinanquin un yonosharashopairan, —ishon. Ascafia chipo anori afanan shinanyamaquin fasi nocofunu fipaiquincai a yoiyoni cuscan afanan shinainma Jesús yonosharashquin.

¹² Ascacanashu Jesús yoiyoni cuscan ayamashu omitsiscaquin. Aton nomuran shinantirofo isca huaquin, —¡Ohua! Un Jesús yoiquin tau huani cuscacai un aama. Ntiancai uqui unimaimaran, —ishon shinantiro.

¹³ Ascashon pushuti chani yoifoanfafaini. Yonotama shafatishon funocointiro. Nanscara man fuyamisi. Chaca yoimisi cuscan yoiama shara icuana.

¹⁴ Ascacufin ainfofo yoshafotaifoma un ato yoisharapai isca huaquin, —Man afanan shara itiro. Ascan man mato facucoin ayashon cushusharafain maton funuri pichasharashon man shara huashotiroran, —ishon un ato yoi. Man ascaitocai yoshin chacafoan matohuunoa tsain chaca yoitiroma.

¹⁵ Ascafia atiriffoan Jesús potayoni Satanás tanashcaquin.

¹⁶ Ratoran ainfoan Jesús tana amaqui funu nacun nan ichananfoan cushuamarocun ahuun yoracoinfoan cushusharatiro. Ascan nan ainfo tatuoma ahuun yorafomacun nan Jesús icoinra huafoan cushusharatiro.

¹⁷ Ichananfoan cushumisifo ato inansharatiro. Nanfoanrifi tanasharamisifoma yonosharashomisifo. Nan Diospan tsain yoimisifo non ahuun tsain yosimisifori inansharatiro yopai cuscan finonfo.

¹⁸ Nannori Diospan tsain cununi isca huaquin, —Moipan trigo camaqui puamafoanfafaini ahuun shacafo tsosaiton a runushcaquima shara huacahuun. Ahuuscashon pitiromaquin. Asca huaquima piimacahuun, —ishon cununi. Ascashon cununi isca huaquin, —Tsoa yonosharaiton oinqui ahuun rafanan inansharacahuun, —icashon Diospan tsain cununi. Cununiri isca huaquin, —Mato cushumisifo non mato shara huashofafainmisifori ato inansharacahuun yopaifo cuscan finonfo, —ishon cununi.

¹⁹ Futsan cushumisi yoiti huaiton a nicayamahuu. Ascano yora rafutan iyamarai rafu non fustifain nannorisi futsahuunoa yoiifoan man icoinra huatiro.

²⁰ Ascan chaca huua iconcun nan ichanaintian nantiffain ointaifi yoihuu. Man ascaiton nicai ratucani ahuun caononfoma.

²¹ Timoteon nocon Upa Diosin futan Furun Jesucristo non ahuun oinmati shara afu nai muran icafoan noco oin. Ascacun aton ointaifi un mia yoinon. Nanti nan un mia yonoa cuscan ahuu. Nannorisi nantifi yoihuu. Isca huaquin shinanyamahuu, —Nan uhuun yoracoinfoan chaca huafo cuscacai un futsafo yoima. Ascashon cushumisiton

chaca huacucái un tsoa tapimaimaran, —ishon anori shinanyamahuu. Ascaquima nantifihuunoa nannorisi shinanhuun.

²² Ascano ichananfo aton cushumisi catonriscayamahuu. Iquisi oinsharayohuu Jesús tanasharamisi iyamarai tanasharamamainquin. Tsoan ahuun chaca fomanpairiai cushumisi catonyamahuu. Ascaran min catoanfin mirifi min ahuun chaca fomanshonni cafiscaiquin. Ascacun ascayamahuu. Jesús cuscara isharcainhuun. Ahua chaca huayamahuu.

²³ Natian tsain futsa un mia yoisharapai. Min shaquipan imisi. Ascacun unu fustisi ayaquima ichapama pau fata ayahuun cayasharashquin.

²⁴ Ascano atirifi yorafoan chaca huamisi cuscan nantifiton tapishocai. Tsoan nanscarafo catontiroma cushumisi inon. Ascan atiriffain chaca huamisi cuscan tsoan topicuma. Nanscarafoan fomanmisifo. Ascafia chipo Diosqui nococun a chaca huamisi cuscan puashoshquin nantiffain ahuunoa tapinonfo.

²⁵ Nanscarifiai futsafoan futsafori shara huamisi cuscan nantiffain nanhuunoa man tapiafo. Ascan futsafoan arus fusti oianmafiano futsa shara huaquin ashomisi cuscan nanforifi chipo Diosin puashoshquin nantiffain tapinonfo.

6

¹ Ascan tsain futsa afanan un mia tapimanon. Nan yonomati Jesús icoinra huafoan aton ifo yonosharashofain ato nicasharacoinon. Asca huaifoan oiniquicai icoinra huamafoan atohuunshon Diosqui shinanchacatirofoma. Ascashon non Jesushuunoa yosimisi cuscan shinanchacanofoma.

² Rato yonomatinin Jesús icoinra huano ahuun ifoan arifi Jesús icoinra huacun nicasharacointiro, —Nicayosma iyamacahuun. Ascatarocon nicasharapaifafaincahuun, —ishon ato yoihuu. Nanscara yonomati yafi afo Diospan facufo. Ascashu yora huatananfo. Yonomatinin ahuun ifo noiquin yonoshosharaino nan Upa Diospan facu sharacoin yonoshosharai.

Ahuaraton noco imasharacointiro

Ascacun un mia tapimanai cuscan huafain futsafori tapimasharahuun.

³⁻⁴ Un mia tapimana cuscan cayacafi sharacoin. Nannorifi nocon Ifo Jesús yosipaoni. Ascan tsoan anori yosiaman nanton amaquiri yosia. Nan cuscara cacapaimisi. Aatocai ahua tapiama. Ahuun nomuranshon shinanchacaquin samamashta futsa fu fochishmanantananpaitiro. Ascatacai unimatiroma. Ascaquin futsafo ahua ya cuscan fuchipaifain futsahuunoa tsain chaca huafain futsahuunoa shinanchacamisi. Futsan aqiu oshon futsahuunoa yoiyai cuscan samamashta icoinra huashon ahuun nomuran shinanqui isca huamisi,

—Nanto ua chaca huaaran, —ishon shinanchacafafainmisi.

⁵ Nan cuscara yorafoan chaca fustisi shinanfaimisifo. Ascatarei fochishmanantananfainmisifo. Ascashon afanancai tsoan ahua icon yoirofoma. Chani fustisi tapiafo. Ascashon isca huaquin shinanmisifo, —Non nan tsain shara Jesushuunoa tanaicai non afanan ahua yopatiroma. Non fasi ichapayatiroan, —ishon amaquiri chaca shinanmisifo.

⁶ Ascano non aya cuscan ichapaya iyamarai non ahuuomafashori non unimacain Diosihuunoa shinanfaini nancaitofin pui finoan shara finacaiquin. Nanfin iconquin unimacai non isharaino nocon nomuran non unimatiro.

⁷ Non caincai non pui yafi mafo ya cainima. Ascatarea ahuuoma non caini. Nanscarifiai non naacun noco mai huafotiancai non ahua fotiroma. Nantianri nocon furo yoshincai ahua fotiroma.

⁸ Ascacufin non tushu yafi sahuutiyashu non unimatiro.

⁹ Ascafia tsoan pui yafi mafo ichapa fipaiquin samamashta shinanchacatirofo. Pui ichapa fipaiquin futsafo chaca huaiton pui fiishquin. Ascashon Satanás ato chaca huamaino amaquiri shinanchacafain atorifi omitsisca huaitiro. Ascatan ahuun unutaqui omitsiscapanacafo muran nocoshceni.

¹⁰ Ascatan pui noicaquin chaca futsa futsatapafo huaitirofo. Atirifi fasi pui fipaicaquin Jesús cachiquiri huacoicani. Asca huacanashu aton nomuran omitsiscai finacoinmisifo.

Pablonun Timoteo yononi cuscan

¹¹ Ascafia Timoteon Upa Diosin mia catonni min ahuun yora inon. Ascacufin nanfoan pui fusti yafi chaca fustisi shinanfo cuscan shinanyamahuu ato cuscara ishquima. Ascatarocon Upa Diosin mia imasharapaiyai cuscan nan fusti fuchipaihuu. Ascashu Jesús cuscara shara ipaicain a icoinra huafain Dios yafi futsafori noicoihuun. Ascashon ahua ahuuscarafaino Jesús icoinra huashon min tunutiro. Ascatan nantifi yorafohuun ramapaihuu.

¹² Ichananfo ano min ato cayacafi shara yoini isca huaquin, —Un Jesús icoinra huai. Afin uhuun Iforan, —ishon min ato yoini cuscan yora ichapafain mia nicanonfo. Ascacun ahuara ahuuscarafiaino nantishotapiquin Jesús icoinra huacoinhuun. Ahuarafoan mia shatumpaiyai cuscan nicatama Jesús fusti icoinra huafafainhuun. Ascashu shafatifi Jesús fu rafuhuun. Jesushuunoashu min Dios fu nipatiro. Ascano natian nan min naitianri ahuara chacafo potahuu Jesús onancoinshquin.

¹³ Nan oni huati Upa Diosin nantifi ato nimai. Ascano Romanon niaifohan ahuun anu Poncio Pilato yocaiton Jesús ahuunoo yoisharani. Nan Dios futan Furun Jesusin ointaifi un mia yonoi.

¹⁴ Un mia yonoai cuscacoin fusti acacainhuun. Ascashon ahuashta chaca huaquima un mia yonoa cuscan fusti noco Ifo Jesucristo oaitian huahuun.

¹⁵ Upa Diosin nichipaitian nocon Ifo Jesucristo afanan nocoqui nocoshquin. Nantianri non oinshquin. Nocon Diosin arus fusti nantifi iquisharafain nantifi niaifohan aton niaifocoinri. Ifofoan aton ifocoinri.

¹⁶ Arus fusti niaifocoin ipanaca. Nancai napanacama. A icarifi chashacoianquin. Ascano tsoacai aqúi nocotiro. Tsoanricai ointamari ointiro. Ascacun non ahuunoo yoisharanon. Aafin curushcain ipanacaquin. Nanscasiai.

¹⁷ Nan pui ichapayafo yoihuu cacapaimisi iyamacain isca huaquin shinanonfoma, —¡Aicho! Un pui ichapayashu nantishotapiquin un isharacoincai, —ishon yoinonfoma. Ato yoihuu ascanonfoma. Tsoancai tapiama ahuutiamain aton mafo yafi ato pui cuyoriscaicai. Ascata Dios fusti non icoinra huacun noco nimapacusharatiro. Nanton ahuarafo non yopai cuscan noco inan non afoqui unimanon.

¹⁸ Ato yoihuu futsafo fasi shara huafafainonfo. Yopaifo ato fishcoyamafain unimacoincai ratoran shafatan ato cashman inansharanonfo.

¹⁹ Ascashu chipo Diosiqui nocoifotian ato inain cuscaicai cuyopacunacama. Ascatarí Dios fu isharapacutirofo.

Pablonun ahuun tsain unutaqui Timoteo yononi

²⁰ Ascano Timoteon Diosin ahuun tsain sharapan mia tapimani futsaforifi min ato yoinon. Ascacun oinfain. Ahuun tsain oinsharayohuu futsafo cayacafi tapimashquin. Futsafoan Diosin tsain amaquiri yoisififo. Afiranan yoinonancaquin ipaitsicoin yoicaquin. Nanfoan yoisififo non tapicoianran ifiacashocai tapiafoma. Ascacun atofu iyamahuu.

²¹ Atirififain nanscara shinanfo, —Non fasi tapicoianran, —ishon. Ascacanashu Jesús noco icoinra huamapaiyai cuscan afanan tsoan icoinra huacanima.

Upa Diosin mihuun ramapainon. Nanti.

Pablo

Pablonun Timoteo Afanan Cunu Fomani

Pablonun Timoteo yoisharani

¹⁻² Uhuun facushtan Timoteo unquian Pablon afanan mia cunu fomai min tapinon. Un Jesucristo fu rafumisi. Apa Diosin ua nichipaiyai cuscan ua nichini manifoti ato tapimashquin ahuunshon Furun icoinra huashu non Dios fu ipatiroquin. Nannori Upa Diosin yoiyoni. Nocon Upa Diosin futan nocon Ifo Jesucristo mihuun noiquin mia cushusharafain mihuuri ramapaia. Ascashon min nomuran mia unimamanon.

Pablonun Cristohuunoa yoini

³ Ascan uhuun shunifoan Upa Dios yonoshonifo cuscan huafain urifi nansca huamisi. Uhuun nomuranshon ahuashta uhuunoa chaca shinantama un yonoshoni. Ascashon un Upa Dios mihuunoa cufinquin un, –¡Aicho! Upa Diosin, –huafafaini.

⁴ Un mimaqui pashcaino min uaini. Ascan nancai un ointiaquimamisima. Ascacun un mia fasi shinain mia afanan oinpai uhuun ointi unimashquin.

⁵ Ascan min nocon Ifo Jesús icoinra huacoinna cuscan min chichi Loida yafi uhua Eunice nannoricoin icoinra huamisifo. Ascano nan rafutan icoinra huaqui tau huani cuscan mirifi min chipo icoinra huacoinni. Nanfohuunoacai un ointiaquimamisima.

⁶ Ascacun un mia afanan shinanmapaiyai cuscan fusti shinanhuun. Un mia mayatasho Upa Dios cufishoni nantianri afin mia amapaiyai cuscan min huanon. Ascashon min ahuun Yoshin Sharapan ahuun tsain yoisharafain min ato cushumisi inon. Ascacun aqúi tushcuyamahuu. Upa Diosin mia amapaiyai cuscan fusti unimacain ahuu. Non chi cutu huasharayamaino nocatiro. Nanscarifiai Upa Diosin noco amapaiyai cuscan non huayamai non funotiro. Ascashocai non afanan ahuun tsain yoisharaima. Ascafia non chi cutu huasharaino afanan urutiro. Nanscarifiai Diosin noco amapaiyai cuscan non afanan acaino non ato yoisharatiro.

⁷ Ascafia Diosin ahuun Yoshin Sharapacai noco nichinima non rafipainon. Ascatamarocon ahuun Yoshin Shara futan ahuun curushhuunshon ranotama ahuun tsain shara yoicai non yoraqui ratuyamacain atohuunrifi non noitiro. Ascashon norifi non shinansharatiro.

⁸ Ascacun noco Ifohuunoa futsafo yoi rafipaiyamahuun. Un cunu muranfiano uhuun rafipaiyamahuun. Un ahuun tsain shara yoiaiton ua omitsisca huashcaini. Ascafia Diospan curushhuunoashu min ufu uhuunoashu omitsiscashotiro.

⁹ Ascano Upa Diosin noco numani non ahuun Furun cuscara shara inon. Non ahuara shara huaa rafanancai noco numanima. Afin apaiyai cuscan noco numani. Noco huun noiquin noco numani. Ahuarafo oni huataima Jesucriston noco huun ramapaicain noco huun noia.

¹⁰ Ascano nocon Numamisi Jesucristo noconi. Ascacun natian ahuunshon non tapitiro fasi noco huun noi ahuatoncai noco namapacutiroma. Ascacun ahuun tsain sharahuunshon non tapitiro nocon chaca soashonano non afu ipanaca.

¹¹ Upa Diosin ua catonni Jesucristo fu rafumisi icain ahuun tsain shara Jesushuunoa un futsafo yosinon.

¹² Ascan nan ua yononi cuscacoin un huamisi. Ascacun ua omitsisca huamisifoquin. Un omitsiscafiai un rafiama. Rafitamarocon un Jesús onancoinfain un icoinra huai. Ascan un Jesús yoini isca huaquin, –Ifon ua cushusharahuu. Un chipo mifu isharapacunon, –ishon un yoini cuscan natian nan oaitian ua ashoshquin. Nan un icoinra huacoinna.

¹³ Un mia cayacafi tapimana cuscan icoinra huacoinhuun funoshquima. Nocon Ifo Jesucristo icoinra huafain ahuunri noicoihuun. Ascacun ahuunshon nantifi noicoihuun.

¹⁴ Upa Diosin min nomuran ahuun tsain shara mia nanumana cuscan afohuunoa shinanfaihuun funoshquima. Ascano ahuun Yoshin Shara nantishotapiquin no fu rafui. Ahuunshon Diosin mia tapimana cuscan min nomuranshon min mucusharatiro funoshquima. Futsafori tapimashquin.

¹⁵ Man min tapian nantifi icoinra huafo Asia mai anoafon ua potafo. Ascashocai tsoan afanan ua oin fupaicanima. Ascano Figelo futan Hermógenes nan rafutari ua potafo.

¹⁶⁻¹⁷ Onesiforoacai ato cuscara inima. Acái uqui oi rafipainima. Ascashu Roma ano noconi. Nanno nocoshon funafafainquin cunu murannoa ua fuchini. Ascashon ua oinyoi ocacainmisi. Ascacun ahuun afofohuunrimain Upa Diosin ramapainonran.

¹⁸ Man minrifi tapishara un Efeso ano ipaonitian nanton ua shara huafafainpaoni. Ascano nocon Ifoan noco ichanan huaitianmain Onesiforo shara huacoinpainon.

2

Jesucriston ahuun yorafo nan ranushumua shara cuscara itiro

¹ Timoteon uhuun facushtan Jesucristo ahuun curushhuunoashu min isharatiro chaca huashquima.

² Un futsafori Jesucristohuunoa yoimisi cuscan mirifi man min nicamisi. Ascano nocofunfoan min icoinra huaa cuscan arifi icoinra huafoan ato catonhuun. Min nicamisi cuscan atorifi tapimahuun nanfoan futsaforifi cayacafi tapimasharanonfo.

³ Ranushumua shara omitsiscatirofia ahuun niaifoan yoiai cuscan nicasharatiro a yoia cuscacoin aashquin. Nanscarifiai mirifi min no fu Jesucristohuunoashu omitsiscatiro.

⁴ Ranushumua sharapan ahuun niaifo ahuunoa unimamapaitiro. Ascan afu ranushumuafoa fucai yonotiro. Ascashon ahuun niaifoan yonopaiyai cuscan fustisi nicatiro. Nanscarifiai Jesús fusti nocon Ifo icaino arus fusti noco yonotiro. Ascashon noco amapaiyai cuscan non aashquin.

⁵ Afanan un iscara un mia tapimai. Tsoa futsafo fu chashupai iquisi yonoaifo cuscan nicaifain itisharatiro. Ascan itisharayamashocai atirifi shonotiro. Nanscarifiai Upa Diosin noco inansharapaiyai cuscan fipaiquin iquisi ahuun tsain non nicasharatiro noco yoiai cuscacoin aashquin. Ascano itisharashu chipo non aqui nococun noco inansharapaiyai cuscan non fitiro.

⁶ Mau yonomisiton fasi curushcain ahuun mau yonoshon afi ahuun yono finquin tau huashon chipo futsafo inantiro. Nanscarifi aquin mirifi nocon Ifo Jesús curushcain yonosharashohuun mia inansharapaiyai cuscan fiishquin.

⁷ Un mia yoiai cuscan shinanhuun. Ascan min shinainton nocon Ifoan min nomuran mia tapimashquin.

⁸ Ascacun ointiaquimayamahuu Jesucristo naafiacun Upa Diosin funimani. Nan David ahuun funa. Nannori nan tsain shara Jesushuunoa un yoimisi.

⁹ Nan un yoiaiton ua omitsisca huamisifo. Ua cunu muran iquimaquin ua yoimisifo isca huaquin, –Min chaca huamisicon non mia cunopan munshuiran, –ishon ua asca huamisifo. Ascafiacai Diospan tsain tsoan munushtiroma.

¹⁰ Ascashon Diospan tsain nicasharatirofo. Ascaiffoan atorifi Diosin catonshquin. Ascacufin nuno cunu muranshon un tunuicain futsafoan Jesucristo icoinra huanonfo afu ipashcaquin.

¹¹ Un mia yoiai cuscan iconcoin.

Non Jesushuunoashu naashu
non afu nipashquin.

¹² Non ahuunoashu omitsiscai.

Asafia non chipo a futan futsafo iquimashquin.
Non yoiquin isca huaiton, –Jesuscai uhuun ahuamaran, –ishon non yoiaiton
arifi yoishquin norificai non ahuunama.

¹³ Non afanan Jesús icoinra huayamafiaitocai aacai ascarama.

Noco yoiyomisi cuscan afanan shinan futsatiroma.
Yoiyoni cuscan iconcoin fusti. Atocai chani yoitiro.

Ahuun tsain iconcoin fusti.

Aacai ointi rananyama.

Afu yonoa cuscan aiton oin Diosin unimai

¹⁴ Nan un mia yoia cuscan mifu ichananfo yoifafainhuun nicasharafain ointi-aquimanonfoma. Nocon Ifohuunshon ato yoihuu tsain mutsamayamacain fochishmanantanonfoma. Ascaiton tsain mutsama yoicaquin ato shinanchacamatirofo.

¹⁵ Uhuun facushtan, Diosin tsain shafatifi oinsharahuu Dios yonosharashoshquin miqui unimanon. Min ascaifin ahuun yonoshomisi shara min iishquicain. Ascashon ahuun tsain iconcoin cayacafi shara futsafo min tapimatiro. Min ascacun Diosin mia oiainnocai min raffitiro.

¹⁶ Ascano yorafoan Dioshuunoa yoicoinyamafiaquin ipaitsi tsain mutsama yoiaifoanno atofu iyamahuu. Nan cuscarafoan aton nomuranshon fasi shinanchacaquin finacoin-tirofo.

¹⁷ Nanfoanri futsafo tapimapaiyai cuscan fasi chacacoin. Ascano yorafoan ato nicanashu aton ointi fasi isincointirofo. Nocon caya muran coo ichapacoinyashu nantifi nami payocotiro. Nanscarifiai tsain amaquiri futsan yosiahuunoashu yora ichapafaoan aton nomuran fucash huatirofo. Ascashocai afanan icoinra huapaitirofoma. Nan Hime-neo yafi Fileto nanscara rafu.

¹⁸ Nan rafutan fai shara funofo. Afanancai Diospan tsain iconcoin yoiafoma. Ascashon yoimisifo isca huaquin, –Upa Diosin noco funimanai cuscan man finoan. Afanancai

icoindra huafo funitirofomaran, —ishon amaquiri yosiafo. Anori yoiainfoancai nicaquin atiriffain afanan icoindra huacanima. Ascashon man cachiquiri huaafo.

¹⁹ Ascafia Diosin tsain iconcain. Toquirininhuancai tsoan rafutiroma. Diospan tsain nanscarari tsoancai fiananan huatiroma. Icon yoimisi cuscan nannoricoin. Toquirininhuanqui yora cunuacai tsoan soatiroma. Nanscarifai Diospan tsain cununi isca huaquin, —Nocon Ifoan ahuun yorafo onancoian. Ascano ahuun yoracoinfoan chaca huamisifo cuscan potatiroforan, —ishon cununi.

²⁰ Nocofunun pui ichapayatón pushu uhuapa shara huaa. Amuran puratofu yafi cuchofo sharashtacoinfo. Ascano futsafo ahuun pushu ano nococun pushu ifoan nan purato yafi cucho sharashtacoinfo ato pimatiro. Ascafia ahuun pushu muranri nanno ahuun shihuati aquí chaca potati itiro.

²¹ Ascano mirifi min chaca potacoinyashu nan shihuati chaca aquí potati cuscara itamarocon min nan purato sharashtacoin cuscara itiro. Ascán min Jesús cuscara shara icaino Upa Diosin mia yonosharamapaiyai cuscan min ahuunshon ahuaa futsafo shara huatiro.

²² Ascán pushcofoan chaca huapaimisi cuscan mirifi asca huayamahuu. Nan chacafo huaifoan oin atomaquinoashu ichoriscatahuun chaca huashquima. Chaca huapaimarocón iscarafu fuchipaihuu. Jesús cuscara shara ipaiquin nan icoindra huafain futsafo noicoinfain isharacoinhuun. Futsaforifi Jesús aton chaca soashona aton nomuranshon shinansharaifoan Diosin tanasharapaiyai. Nanscarafu fu rafuhuun.

²³ Ascatafi futsafo tsain mutsama yoitiacanáshu fochishmanantanancain samamashta sinatirofo. Ascarafo fu atofu iyamahuu mirifi ato cuscara iishquima.

²⁴ Nocon Ifoan ahuun yonomati sharacai fochishmanantanamisi itiro. Ascatafi nantifi yorafo shara huatiro. Ascashon funainquimashta oi tsii huafain nan amaquiri shinainfo ato tapimasharatiro atohuunoa shinanchacanofoma.

²⁵ Diospan tsain iconshara nicacasmaifori oi tsii huafain ato tapimasharahuun Diosin aton nomuran shinanma futsaino ahuun tsain iconcain tapinonfo.

²⁶ Ascatacai afanan amaquiri shinantirofoma. Cayacafi shinantirofo. Ascano Satanasfin nan masharo cunu muran iquimana cuscan ato huamapaimisi ato chaca yonopaiyai cuscan anonfo. Ascafia nan cayacafi Diospan tsain nicaquin finacoianfofin. Nan masharo cunu muran iquimamua cuscara finontirofoquin iquishcaquima.

3

Jesús oti chaimamain yorafo ahuu cuscara ishquicanicai

¹ Un mia tsain futsari yoinon. Ascacun un mia yoiái cuscan min nomuran shinanhuun. Jesús oti chaima ahuaa chacacoin finonshquin. Ascano non omitsiscatiro. Ascafia non icoindra huaafo. Noco musu huamapaifafainshcaini.

² Chaca iscarafu huashcaini. Futsafo shinantama afiri fusti noicain futsafo noiama icain pui fusti noifain afiri fusti yoimusharacain curafapaimisi icain roanmitsamisifo icain aton apa yafi ahua nicacasmamisifo iishquicaini futsafoan ato shara huashoan cuscan ato, —¡Aicho! —huayamafain atohuunoa fusti shinanchacaquin. Ascaquicai Diosihuunoa ahuaa sharafo shinansharatiroma.

³ Tsoa noiamafain futsafoan chaca huaa cuscan futsafo rau huayamai icain pushutifi cahuancacaini yoiti huamitsacahuancacaimisi icain ahuun nomuranshon shinanchacai cuscan shatuyamafain pofucoin icain ahuaa sharafo noicasmafain.

⁴ Ascatafi fuparamitsamisi icain afu rafumisifo fomanquin ato chaca huamisi icain ointi rochitimamisi icain cacapaimisicoin icain ascashofin Dios noicointama afin apaiyai cuscan fustisi shinancaini.

⁵ Futsafo fu ichananfiaguicai Diosin ahuamamishti atiro cuscan icoindra huacanima. Ascacun nanscarafu fu iyamahuu.

⁶⁻⁷ Ascatafi ainfofoan chaca huamisifo cuscafi Dios yoimisifoma ato chaca soashonon. Anoricai itama afananri ahuaa chaca futsa futsatapafo huapaicaquin shinanfaimisifo. Ascaquin ato ointi nocofo chaca huamisifo shinancaquin. Ascashon nanscara ainfofoan yoimisifo isca huaquin, —Un tapipai ahuuscashumain un isharatiroquin, —ishon yoifiaguicai Jesucristohuunoa Diospan tsain iconcain nicafiaguicai tapicoianfoma. Ascano nan yora chacafoan nanscara ainfofo ato pushu muranshon iquimisifo ato tsain shara nicatsa yoiquin. Ascafia ato tsain shara yoiamafiaqui. Ascán ato yoiainfo cuscan fasi amaquiricoin. Ascashon ato iquipaicaini.

⁸ Nan nocofunufu nan Janes yafi Jambres cuscarafu. Nan rafu Egipcio shointian rafu. Ascano Moisés yorafo Diosin tsain tapimapaiyai cuscan nantianri nan rafutan ato yoini isca huaquin, —Moisés mato yoiái cuscan nicayamacahuun, —ishon yoinifo. Nanscarafon

Diospan tsain iconcoïn futsafo nicamapaima. Ascashon aton nomuran fasi chaca fusti shinanmisifo. Ahua cayacaficai shinantirofoma. Nocon Ifo Cristo icoinra huapaicanima. Ascashon Diosin potacoianfo.

⁹ Nan Janes futan Jambres ato amaquiri chaca yospaiyaifoan tapinifo. Nanscarifi aquin nan chaca huamisofoan ato parapaiyaifoannori tapishquicani. Ascashon tapitirofo nanfoan afi ipaitsicoin shinanmisifocun. Ascacun, —Ahua tapiafomaran, —ishon atohuunoa yoishquicani.

Pablonun ahuun tsain unutaqui Timoteo yononi

¹⁰ Ascafia Timoteon min tapia uncai ato cuscarama. Un imisi cuscari man mian tapicoian. Un futsafo tapimana cuscan min nicamisi. Ascashon man min tapia nocon Ifo Jesús ua amapaiyai cuscan nan fusti un apaiyaiton. Min oinmisiri urifi un Jesús icoinra huacoïnshon futsafoan amaquiri shinanchacafainocai atohuunshon un shinanchacata-marocun un futsafohuun noicoïnquin. Ahuara ahuuscarafiaino un tunumisi.

¹¹ Ascashon uarifi omitsiscamamisifo. Un ahua futsa chaca finoainton mificoïn man min oinni. Ascaquin uhuun nomuran un nocomisi ua omitsiscahuaifoanno. Ascan un finoan cuscan man min tapian nan Antioquia ano non Iconio ari yafi Litra anoashumain un ahuuscaquin. Ascafia nanfohuunooashu un omitsiscafiaiton nocon Ifoan ua numani.

¹² Icon. Ratoranfo nocon Ifo Jesucristohuunooashu isharapaiyaifo omitsisca huashcani.

¹³ Ascano nan yora chaca huamisofo yafi paramisifori chaca finacoïnya ishquicani. Futsafo paraifoan atorifi futsafoanri parashcani.

¹⁴ Ascafiafonocai min ato cuscara ishquima. Mia tapimamisifo cuscan yafi min icoinra huacoïnmi cuscan nanscacoïnri huafafainhuun. Nan mia tapimamisifo man min tapicoian.

¹⁵ Nan facushtashon min Diosin tsain shara tapinifoanna. Nanfoan mia shinansharamatiro min Jesucristo icoinra huashu afu ipashquin.

¹⁶ Nantifi Diospan tsain cununifo cuscan afin ahuun shinanpan futsafo shinanmana cayacaficoïn cunushonfo. Ascano cununi cuscahuunshon noco tapimai ahuamain iconcoïn fustiquin. Ascafia non chaca huaiton Upa Diosin tsain cununihuunshon noco tapimatiro non afanan chaca huanonma. Ascan ahua ahuu cuscararan amaquiri non acaitori ahuun tsain sharanun noco cayacafi oinmatiro non tanasharaquin finacoïnfaïn ahuuscashumain non a cuscara shara itiroquin.

¹⁷ Ascacun ahuun cununihuunshonri noco tapimai non itisharashon nantifi ahuun yorafo ahua shara futsa futsatapafo non yorafo huashofaïn.

4

¹ Upa Dios futan Jesucriston noco oinfafainni. Nantofin nantifi yora niafo yafi nan namisifori ato yoipacushqui niyoashumain ahuu cuscara imisiquin. Nanrifi chipo nocoqui oshon nantifi yorafo iquishquin. Ascacun un mia cayacafi yonoi ua nicasharahuu.

² Diospan tsain futsafo yoihuu. Ascashuri itisharahuu nantishotapiquin ato yoishquin. A min oian nicapaisharifoan ato yoihuu. Ascan min oianri nicacasmaïfoan nanforifi yoihuu. Ato cayacafi yoisharahuu amaquiri shinanonfoma. Ascashon ahua chaca huaifoan ato shafacafi yoisharahuu aton chaca shatunonfo. Ascatarï ato tsain shara yoihuu aton nomuran unimanonfo. Ato oi tsii huashon yoïfainhuun unimasharanonfo.

³ Ascacun ato yoisharahuu ratoran shafatacái tsoan afanan Diospan tsain iconcoïn nicapaishcanima. Ascatama nanfoan nicapaiyaifo cuscan fusti nicashcani. Ascashon tapimisi ichapafu funafafainshcani Diospan tsaincoïnma nicapaiyaifo cuscan ato yosinonfo.

⁴ Ascashocai Diospan tsain cununi cuscan afanan nicapaishcanima. Shunipafo cuscara fusti nicapaishcani.

⁵ Asca huafiaïfono Diospan tsaincoïn fustisi tanafain. Nan fustiri icoinra huahuun. Min omitsiscaïtanri tunuhuu. Diospan tsain yoimisiton ato yoisharamisi cuscaocun ahuun. Diosin mia yonomapaiyai cuscan nantifi ashosharahuu ahuun yonomati shara ishquin.

⁶ Ascano natian uhuunoa un mia yoïnon. Uncai tsoan chai nïpatïroma. Ratoran shafata Jesushuunooashu un naicain. Un samamashta mai anoashu Jesús ari cai.

⁷ Ascacun nantishotapiquin un Jesús tanasharapaimisi. Ua amapaiyai cuscaï un umisima. Natian ua yonomapaiyai cuscan nantifi mun icoinna. Un nantishotapiquin Jesús icoinra huamisi.

⁸ Nocon Ifo shara Jesús ua inansharapaiyai cuscan ua mucushona. Ascashon afin noco huunoa tapicoian. Ascan noco inanshuïain cuscan iconcoïn. Nan oaitian afu rafumisifo isharamisifo noco inansharashquin. Ua fusti inanshuïma. Tsoan Jesús noicoïnquin fasi oïnpaïfaïn manasharamisifo atorifi inansharashquin.

Pablonun ahuunoa tsain futsa Timoteo yoini

⁹⁻¹⁰ Tsain futsari un mia yoi. Demas natian mafo yafi ahuara futsafo yorafo aya cuscan noicoinquin ua potafaini Tesalónica ano man caa. Crescente arifi Galacia ano man caa. Tito arifi Dalmacia ano man caa. Ascacun uqui oriscahuu ufu iishquin.

¹¹⁻¹² Natian Lucas fusti ufu icai. Min uqui oaitian ua Marcosri ihuushohuun. Un Tíquico Efeso ano nichitan. Ascan min oquin ua Marcos ihuushohuun u futan nocon Ifo yonosharashonon.

¹³ Un Troas ano uhuun tsahuuti ashcapari chichia Carpo pushu muran un huayoni. Nanrifi oquin ua fushohuun. Uhuun librofori un yopai. Ascacia nanfo finonmafain uhuun documentofu un yopacoin. Ua nanfo fushohuun.

¹⁴ Asca Alejandro nan ahuun cuno yonomisiton ua fasi chaca huua cuscan Diosin nan onaintimashqui.

¹⁵ Non nocon Ifo Jesushuunoa yoimisi cuscan nanto fasi nicacasmamisi. Ascacun mirifi oinfain miarifi chaca huapaitiro.

¹⁶ Ascan ua tau huaquin niaiffo ano iyonifo tsoancai uhuunoa yoisharanima. Nantifi ratucaquin ua potafaini focaquin. Ascacun Upa Diosin ato onaintimayamapainon.

¹⁷ Asca huafiaifoanno nocon Ifo ufu ica. Ahuun curush ua inan un fasi chai ahuun tsain shara uhuun caifoma un yoiaiton cayacaficoi nicasharanonfo. Ascashon nocon Ifoan ua numani masharofu muran ua potanonfoma.

¹⁸ Nanscarifi aquin ua chaca huafiaifoan nocon Ifoan nantishotapiquin ua cushusharashquin. Ascashon ahuun unutaqui a icano ua iyoshquin ahuun yorafo fu un isharapacunon. Non ahuunoa yoisharapacunon. Nanscari inon.

Pablonun ahuun unutaqui ato tsain shara foman

¹⁹ Ascano Priscila yafi Aquila ua yoisharashohuun. Onesíforo yafi ahuun aforananri ua yoisharashohuun.

²⁰ Nan Erasto Corinto ano nituni. Trófimo isinin icaino un Mileto ano nitun huani.

²¹ Oi pacuataima uqui ohuu. Ascano Eubulo non Pudente non Lino non Claudia nanfo futan nantifi Jesús icoinra huafoan mia yoisharafo.

²² Nocon Ifo mifu icain. Mia shara huashofafainon mihuun ramapainon. Nanti.

Pablo

Pablonun Tito Cunu Fomani

Pablonun Tito yoisharani

¹⁻² Unquian Pablo un mia cunu fomai min tapinon. Unfin Jesucriston ahuun yonomati yafi afu rafumisiquin. Ascashon ua nichini nan Diosin catoanfo un ato tapimanaino Ifo Jesús icoinra huanonfo. Nocon Upa Diosicai chanitroma. Nantofi ahuara oni huataima yoiyoniquin isca huaquin, —Tsoan uhuun tsain iconcoin uhuun facu Jesushuunoa icoinra huaition unfu ipatiroran, —ishon yoiyoni.

³ Ascan afin yoipaiyaitian nan tsain shara Furunhuunoa ato tapimana. Ascano nocon Numamisi Diosin ua catonshon ua yononi un Jesucristohuunoa futsafo yoinon.

⁴ Tito, un mia nocon Ifo Jesucristo icoinra huamani cuscan min Jesús icoinra huashu min uhuun facu cuscaracoin. Un Jesús icoinra huaa cuscan mirifi min nansca huani. Ascacun nocon Upa Diosin futan nocon Numamisi Jesucristo mihuun ramapaicain mia nomuran unimamanon.

Titopan Creta mai ano yononi cuscan

⁵ Un mia Creta mai tomahuan ano nichifaini non ato yonoshoni cuscan min anaitinon. Ascacun un mia yoini isca huaquin, —Nan pushurasifoti cushumisifo catonhuun ichananfo cushusharanonfo, —ishon un mia yoini.

⁶ Cushumisi iscarafu catonhuun. Nan nocofunu ishara fusticoimisi cushumisi itiro. Ahuunoa ahuara chaca yoiiaifocai cushumisi itiro. Ahuun fusti ya icain ahuun facufoanri nocon Ifo Jesús icoinra huafo. Ascan tsoancai atohuunoa yoiquin isca huatiroma, —Cushumisiton ahuun facufoan fasi chaca huamisiforan, —ishocai yoitirofoma. Ascancocai ahuun facufo yoitimamisifori itirofoma.

⁷ Ascano nan cushumisiton Diosin yonoshona. Ascashon nan Dios fu tsainti pushu murannofo ahuun yorafo cushushara. Ascacufin nantiffain ahuunoa yoisharafo aton cushumisi inon. Ascashu cacapaimisi iyamacain ointi rochitimani iyamacain paumisi iyamacain sutumitsapaimisi iyamacain futsafo parashon ato pui fianmisiricai itiro.

⁸ Ascatarocon iscara cushumisi itiro. Yora shara huashopaimisi icain ahuara sharafo fustisi noifain ahuara ahuuscarafaino shinanchacatama shinanshara fustimisi icain isharafo Jesús cuscara Diospan tsain shara fusti tanafain. Ascano ahuara amaqurifo futan chacafoan ahuun nomuran shinanchacamapaiyai cuscan atamarocon nan Diosin amapaiyai cuscan fustisi amisi. Nanscarafu cushumisi shara itiro.

⁹ Ascacun Diospan tsain non icoinra huatiroma non iconcoin. Non Diospan tsain yoiaiton fasi icoinra huafafainmisi nan cuscara cushumisi shara itiro. Ascashon arifi futsafori nan tsain sharaahuunshon aton ointi unimamatiro. Ascafia futsafoanri Diospan tsain nicasmaifoan atorifi nan tsain sharaahuunshon cushumisiton ato oinmatiro amaquri shinainfo cuscan.

¹⁰ Ascashon yora ichapafoan Diospan tsain nicasmafain nan Dios fu tsainti pushu murannofo cushumisifori ato nicasmacani. Ascashon tsain mutsama ipaitsi yoiäfo. Nan Moisés yononi cuscan tanamisifo atirififo nanscarafu.

¹¹ Pui fusti fipaicaquin futsafo fasi amaquri chacacoin tapimacani. Ascacun atohunshon ahuun yorafoyashon Jesús cachiquiri huafo. Ascacun aton tsain shatumahuu afanan futsafo amaquri yosinonma.

¹² Nocofunun arifi Creta ano ica, —Nanto inonpacoai yoimisirani, —ishon ahuunoa ahuun yorafo yoimisifo. Ascano nanton yoiquin isca huaa, —Uhuun yorafo Cretafofin chanimisifoquin. Yoina pofu cuscarafu. Piqui fustisi tapiafo. Pitsishunifo icain shanishuniforan, —ishon yoini.

¹³ Nan yoini cuscan icon. Ascacun ato cayacafi yoisharahuu afanan chaca huatarocon Jesús icoinra huacashon tanasharanonfo.

¹⁴ Ascatan afanan uhuun caifo Israelifoan aton shunipafo cuscara tanayamafain nan Diosin tsain iconcoin nicasmamamisifoan futsaforifi yonomisifo cuscan nicanonfoma.

¹⁵ Ascan ratoran futsa Jesús aton chaca soashona ahuun nomuran shinanshara fustiquin. Nantifi Diosin onihua cuscan shinantiro isca huaquin, —Nantifi ahuarafo sharafoanran, —ishon shinantiro. Ascafia nan icoinra huamafoan aton nomuranshon shinanchacamamisifo. Ascashon nantifihuunoa shinanchacamamisifo. Aton nomuranshon chacacoin fusti shinanfo. Ascashocai afanan shinansharatirofoma. Tapiafoma ratomain shara iyamarai chacaquin. Ascashon chaca fustisi shinantirofo.

¹⁶ –Nonfin Dios tapicoianquin, –ishon yoifiamisifo man acai cuscahuunshon non tapitiro nanfoancai Diosihuunooa tapicoimnisifoma. Ascashon fasi chacacoin fustisi shinanncani. Ascaquicai ahua shara huatirofoma.

2

Pablonun Tito cayacafi shara yosini arifi futsafo yosisharanon

¹ Ascano Diospan tsain futsafo yosisharahuu isharanonfo.

² Ascashon nocofunu iyoafofo yosihuu isca huaquin. Ahuara ahuuscarafiaino shinanchacatama shinanshara fustifain isharafo cuscan futsafoan atohuunooa yoisharatirofo icain ascashon cayacaficoïn Diospan tsain tapicoïnshon iconra huacoinnafo icain futsafohuun noicoinfain ascatan ahuaara chaca finoin omitsiscafishon tunucoinonfo. Nannori nocofunu iyoafofo yosihuu.

³ Nanscarifiayainfo iyoafofori ato yosihuu isca huaquin. Ainfo iyoafofo Jesús tanacoianshu isharanonfo. Ascashucaï futsafohuunooari chani yoifoanfainmisi iyamacain paumisi iyamacain. Ascatarocon ahuaara shara fustisi futsafo tapimashquin.

⁴ Ascashon shomayafari yositiro aton funufo yafi aton facufori noisharanonfo.

⁵ Ascatancai ahuaara ahuuscarafiaino shinanchacatama shinanshara fustifain ahuaara chacafo shinantama aton nomuranshon shara fustisi shinansharatiro icain aton pushu ano yonoshara fustifain futsafo tsain shara fustisi yoiquin ahuun nomuran shinansharatiro icain funun aton yoiï cuscan nicasharatirofo. Ascan nan ainfo iyoafofoan yoiquin isca huaifoannocai atohuunshon tsoan Diosin tsainhuunooari tsain chaca huatiroma.

⁶ Ascatari pushcofori tapimasharahuu ahuaara ahuuscarafiaino shinanchacatama shinanshara fustinonfo.

⁷ Tito mirifi ato ismarshahuun nantifi min acai cuscan shara fustisi huahuu. Min ascaino minhuun caononfo. Min ato yosiaitian cayacaficoïn shara ato yosihuu arifi isharanonfo. Ato yosiyan cashuyamahuu. Cashutama ato yoicoinhuun.

⁸ Ato cayacaficoïn yosihuu isharacoinnonfo. Ascano min ato yoiï cuscaï tsoancaï min tsain chacacoinran huatiroma. Ascataama mia nicacasmashu rafitirofo. Ascashocai tsoan nocohuunooa ahua chaca yoitirofoma.

⁹ Ascan yonomatifo yosihuu aton ifofoan ato yonoai cuscan nantifi nicasharanonfo. Ascashon ato unimamafain ato tafiyamafain.

¹⁰ Ahuun ifo ahua onuntama nansca huaquin ato ifofo oinmatirofo ascaïfoan ato iconra huacointiro. Yonomatifo ascaïfoan futsafoan yoitirofo isca huaquin, –ïoïncapon! Nan yonomatifo isharacoinmisi. Nanfoan Jesús ifoacoinnafo. Ascan aton Numamisi Diospan tsain sharaçoin. Ascacun norifi ahuun tsain non nicanon, –ishon yonomatihuunshon Diospan tsainhuunooa shinansharatirofo.

¹¹ Ascan Upa Diosin nantifi tapimana atohuun ramapaiqui Furunhuunshon yorafoan aton chaca soashotiro afu ipashquin.

¹² Ascano nan tsain non iconra huaiton nocorifi tapimai non afanan Diosimaisi inonma. Ascashocai non chaca huapaoni cuscan non afanan atiroma. Ahuaraton noco shinanchacamapaiyai cuscaï non afohuunooa shinantiroma. Ascataama ahuaara ahuuscarafiaino non isharatiro. Natian Upa Diosin noco amapaiyai cuscan fusti non atiro.

¹³ Non nanscara Diospan tsain tanasharashon man non tapia nocon Diosin ahua-mamishti huamisi nan nocon Numamisi Jesucristo chipo nocoqui oi. Nan oaitian nantifiton oïnshquicani nocon Ifon ahuu cuscara sharamainquin nantifi finoncoian. Ascacun non fasi oïnpaiquin non manasharai.

¹⁴ Nanto noco nashoni non afanan chaca huamisi iyamacain non yoitimamisi inonma. Afanan ahuaara chaca nocon ifo itamarocon nan noco imasharacolain cuscan ahuun yorafo non inon. Ascashu norifi a cuscara fasi shara huapaimisi non itiro.

¹⁵ Nanfohuunooa futsafo yosihuu. Nocon Ifoan mia yonoa cuscan ranotama min ato cayacaficoïn shara yositiro. Ascashon min aton nomuran unimamafain ahuaara chaca huaïfoan min ato yonotiro afanan asca huanonfoma. Futsan mia yoiquin min ahuaamaran mia huafaiton ato nicayamahuu.

3

Nan iconra huafaoan atirofo cuscan

¹ Ascano nantifi iconra huafao ato yoihuu niaïfofo nicasharafain yoitimamisifo inonfoma. Ascashon atorifi yoihuu itisharacashon ahuaara sharafo huafafainmisirifi inonfo.

² Ascashon ato tapimahuun futsahuunooa tsain chaca huanonfoma. Ascatan fochishmanantananyamacain futsafohuunooa shinansharafain nantifi yorafo ahuun nomuranfo yora shara huafafainmisi iishquin.

³ Norifi nocon nomuranshon non amaquri chaca shinanpaoni. Ascashu non yoitima-coin icain chaca futsa futsatapafo non huapaiyai cuscan huafain nocon nomuranshon non shinanchaca cuscan nannoricoinri non huapaoni. Nanfo nocon ifo ipaoni. Ascatarifi non iscara ipaoni. Non futsafohuunoa shinanchacafainmisi icain futsafo aya cuscan fianpaitiashu non aqi shinanchacamisi icain non futsafo noicasmafain nofirananri non noicasmatananpaoni. Non nanscara chacafo huapaoni.

⁴⁻⁵ Non asca huafiapaonishaqui Upa Diosin nocon Numamisi nocohuun ramapaicain nocohuun noiquin noco numani. Ascashon noco chaca soashoni non afanan chaca ipaoni cuscan inonma. Non ahuara shara huaa rafanancai noco numanima. Affin nocohuun ramapaiquin nocon chaca soashoni. Noco ointi chocatsa cuscara non funa sharacoin inon. Ahuun Yoshin Sharahuunshon noco ointi oni ocomafain nocon nomuran onihua funa.

⁶ Upa Diosin ahuan Yoshin Shara nocoqui nichini noco iquinon. Nocon Numamisi Jesucristohuunoshu nantifi yorafo fu rafucacaini.

⁷ Ascano Diosin nocohuun ramapaiquin yoini isca huaquin, –Uhuun facu mia nashoni. Min chaca mia soashoshquin. Ascacufin natiancai mihuun ahua nuamaran, –ishon yoini. Ascacun norifi non ahuan facufo icaino non afu ipatiroquin.

⁸ Nan un mia yoiyai cuscan non icoinra huatiro. Ascan nanfo ato yoifafainhuun. Ascacun un mia yosia cuscan icoinra huaa futsafoan futsaforifi shara huashofafainon. Tsoan asca huaifin fasi shara huacoinquin. Ascano aton ointi unimamaquin isharanonfo.

⁹ Futsafo tsain mutsama yoitiacanashu fochishmanantanannmisifo. Ascatan aton shunifohuunoshuri fochishmanantanannfain Moisés yononi cuscahuunoshuri fochishmanantanannmisifo. Ascacanashu ipaitsi yoinancani. Tsoan anori futsa yoiqui shinansharamatiroma. Afo fu iyamahuu.

¹⁰ Ascan futsan ahuan tsainhuunshon icoinra huafo pashcanan huamaiton nan ichananmisifo aton cushumisifoan yoitiro afanan ascanonma. Asca man yoifia afanan ahuan tsainhuunshon ato pashcanan huaiton yoicahuun afanan asca huanonma. Man man yoiqui rafu huafia nicayamafain ato pashcanan huaiton nanscarafo fu afanan iyamahuu.

¹¹ Nanscara yoran ahuan nomuranshon amaquri shinanchacamisi. Ascashon afiri man tapia a chaca huai cuscan.

Pablonun ahuan tsain unutaqui yoini

¹² Uhuun tsain unutaqui un mia yoinon. Un miqui Artemas iyamarai Tíquico nichiaitian uqui Nicópolis ano oriscahuu. Un nanno oipacutian iishquin.

¹³ Ascan Zenas nan abogado yafi Apolos nan min acai cuscan ato ashosharahuun yopaifo cuscan ato inanhuun ahua yopatama fosharatanonfo.

¹⁴ Noco yorafo nan icoinra huafo yoihuu shara huafafainonfo. Ascacanashu futsafo yopaifo cuscan ato inansharatirofo. Ascayamaquicai futsafo shara huashotiروفoma isharaquin.

Ahuan unutaqui ato yoisharani

¹⁵ Nantifi ufu icaifoan mia yoisharacani. Nantifi uhuun yorafo nan icoinra huafo mia ari icafon nanfo ua yoisharashohuun. Nocon Ifoan mato nantifi ramapainon. Nanti.

Pablo

Pablonun Filemón Cunu Fomani

Pablonun Filemón cunu fomani

¹⁻² Uquian Pablo un mia cunu fomai. Uhuun yorahuan Filemón un fasi mia shinancoin. Man min tapia un Jesucristohuunoa yoifafaini. Ascacun ua cunu muran iquimanifo. Nocon yora Timoteo ufu ica. Arifi mia tsain fomapai. Ascan minfin no futan Jesucristo yonoshomisiquin. Nan Jesús icoinra huafo min pushu muran ichananmisifo ua atori yoishohuun. Nocon shafo Apia yafi Arquipori nan Arquipo arifi noco futan Jesucristohuunoa yonoshomisi nan rafuri non ato tsain fomai.

³ Diosin matohuun ramapaiquin. Maton ointi unimamanon. Upa Diosin futan Furumun nocon Ifo Jesucristo mato asca huashonon.

Filemón Jesús icoinra huashu nantifi atohuun noini

⁴⁻⁵ Un nica min nocon Ifo Jesús icoinra huacoinfain min ahuun noicoin. Nantifi ahuun yorafori min atohuun noicoiinton un nicaquin un cufaitian Dios un yoimisi isca huaquin, —¡Aicho! Upa Diosin, Filemón mia tanasharacoianran, —ishon un mihuunoa cufimisi.

⁶ Ascashon un mia cufishomisi min Jesús icoinra huaa cuscan mirifi min futsafo tapimanaiton arifi icoinra huanonfo. Min asca huaquifin finonmafain Cristohuunoa non aya cuscan min tapitiroquin. Nannori un mia cufishona.

⁷ Uhuun yorashtan min ua noiai cuscan un unimacai unrifi mua uhuun nomuran un fasi unimacoinni. Ascashon min Diospan yorafori shara huafafaini mihuunshon arifi ato nomuran unimanonfo. ¡Aicho!

Pablonun Onesimohuunoa Filemón yocani

⁸ Min Cristohuunoa uhuun yorahua. Ascacufin ahuunshon un mia yoipaiyai cuscan ranotama un mia yonotiro.

⁹ Ascafiaquicai un mia yonomapaima. Un fasi minhuun noicoinquin mia yonotamarocun un mia yocai. Ufin Pabloqui natian un anifo. Un Cristohuunoa yoimiscun ua cunu muran iquimanifo.

¹⁰ Ascacun un mia Onesimohuunoa yocai. Nanrifi uhuun facucuin cuscarquin. Un nuno cunu muranshon un Onésimo Jesús icoinra huamani. Ascashon natian Jesushuunoa uhuun ua cusca.

¹¹ Ascashon nantocai mia yonoshorapaonima. Ascafia natian mia yafi ua shara huatiroquin.

¹²⁻¹³ Un Onésimo nitun huanpai ufu inon. Un fasi ahuun noi. Ascashon nichiqui un fasi shinanshquin. Ascan mincai ufu itiro ma nan tsain shara Jesushuunoa futsafo yoishquin. Un nuno cunu muranshon un shinan Onésimo mihuun rafanan ufu itiro u futan yonosharashquin.

¹⁴ Ascafia un mia yocayoataimacai un ahuaa huapaima. Ascashon min ahuaa ua shara huashoin cuscacai un mia curushcain yonotiro ma mianmain min apaiyai cuscan fusti min acaitonfin.

¹⁵ Itsairaca Onésimo mimacai pashcayoni. Ascashu afanan chipo mifu ipashquin.

¹⁶ Un mia yoia cuscan un fasi ahuun noi. Ascano min finacoinquin ahuun noitiro. Ascafia natiancai min yonomati fustisi ishquima. Nanto arifi man Cristo icoinra huaa. Ascacun natian min ahuun yoracoin cusca.

¹⁷ Ascashon min shinan un mifu Jesushuunoa rafumisi. Ascacun Onésimo miqui nococun min ua shara huacuana nanrifi nanscarifi huaquin shara huahuu.

¹⁸ Mia chaca huacun iyamarai mia nificun ua tapimahuu un mia inanon.

¹⁹ Ascan natian uficoin un mia cunushoni. Unquian Pablo Onésimo mia nifian cuscan un mia inanshquin. Ascafia man min tapia un mia Jesús icoinra huamani uhuunshon min Jesús fu nipanon. Ascashu min nifian shinantsa aquin.

²⁰ Uhuun yorashtan un mia yoca cuscan ua ashopun. Min Onésimo shara huaa cuscan urifi uhuun nomuran un unimashquin. Jesushuunshon nanscacoin ua huashopun.

²¹ Man min tapia un mia yoca cuscan huafain mian ashoshquin. Paratama min ua ashoshquin. Ascan mia cunushquain mun tapia min ashquain cuscan.

²² Tsain futsari un mia cunushoni min tapinon. Min ua Upa Dios cufishomisi afanan un miqui nocoshquinon. Ascacun min pushu ano ua cunu futsa itishara huashohuun. Ascan mian cufishona cuscan Diosin nica. Ascashon miqui ua nichishquin. Ascapainon.

Pablonun ahuun tsain unutaquin ato yoisharani

²³ U fu rafumisi nuno cunu muran nan Epafra mia yoisharai. Nanto arifi Jesucristohu-unoa yoiaton cunu muran iquimanifo.

²⁴ Ascano Marcos non Aristarco non Demas non Lucas nanfoan u futan Jesús yonoshomisifo. Ascashon nanfoan mia tsain shara fomapai.

²⁵ Nocon Ifo Jesucristo mia cashman shara huashofafainon. Nanti.

Pablo

Jesushuunoa Futsan Hebreofo Cunushoni

Diosin Furunhuunoashu no fu tsainni

¹ Uhuun yoramishtichin un mato cunu fomai man tapinon. Upa Diosin noco shunifo yoipaiyai cuscan ahuun tsain yoishomisifo yoiyopaoni ato tapimanonfo. Namapahuunshon ato yoifain namapan cuscarahuunshon ato yoifain ahuun nai oinmatihuunshon ato yoifain ahuun oicoinin ato yoipaoni.

² Asca huapaoniflashu natian noco yoipaiyai cuscan Furunhuunshon noco yoia. Furunhuunshon nantifi nai murannofo yafi mai anoafoti onihuani. Furun catonni nantifi nai murannofo yafi mai anoafoti ahuuna inon.

³ Nanton Apa Diosin cuscaracoin. Noco ismacoin ahuu cuscaramain Apa Diosiquin. Apa shara imisi cuscan arifi nanscaracoin. Furunmun ahuun tsainmansi ahuamamishti huatiroquin. Ascan ahuun curushhuunshon ahuun tsainmansi onihuafofi yonotiro afin apaiyai cuscan anonfo. Ahuun tsainmansi nantifi onihuafofi cushusharafafainmisi. Nanfin nocohuunoashu nani nocon chaca noco soashoshquin non a cuscara shara inon. Ascashu Apa ari cani a futan nantifi iquifafainshquin.

Upan Diosin Furumun ahuun oinmati afu nai muran icafo finoncoian

⁴ Afin Apa Dios ahuun Furuncoinquin. Oinmati afu nai muran icafoai Upa Diosin furuncoinfoma. Furun Apa Dios fu niaifocoin. Oinmatifocai ascarafoma. Ascan ato finoncoian.

⁵ Upa Diosin ahuun oinmati afu nai muran icafoai yoiqui,

“Man uhuun facunatoncoinforman,”

ato huamisima. Furun fusti yoiqui isca huani,

“Unfin min upaquin. Minfin uhuun facucoinquin,”

ishon Furun yoini. Ahuun oinmati afu nai muran icafohuunoacai anori yoimisima.

⁶ Ascashon Furun mai ano nichini yoracoin inon ahuun oinmati nan afu nai muran icafo yoini isca huaquin,

“Nantifi uhuun oinmati ufu nai muran icafoan, uhuun facu Jesús noicoinhaunon.

‘Min uhuun Iforan,’ yoicahuun,”

ishon anori ato yoini.

⁷ Ascatan ahuun oinmati afu nai muran icafohuunoa yoiquin isca huani,

“Fuu foanriscatiro. Nanscarifiai uhuun oinmati ufu nai muran icafo un ato yoiai

cuscan ua ashoriscatirofo. Nanfori chi urumanhuan cuscarafoma. Un ato yonoa

cuscan yorafa onaintimariscatirofan,”

ishon Upa Diosin yoini.

⁸ Ascashon Furu yoiquin isca huani,

“Minfin uhuunfin cacoinnaquin. Mirifin min Diosiquin. Min yorafa iquipa-

cunaca. Min ato niaifocoin icainocai min unupacunacama. Min ato iconcoinn

yonosharapacunaca. Min icanori shara fusti ipanaca.

⁹ Ascashon minfin ahuara shara fustisi noicoinqin. Ahuara chaca min noicasmái. Ascacufin Diosin, nanrifi min Diosin, nanton mia catonni. Mia unimama cuscaai tsoa futsan ascara mumisima. Mirus fustiton min nantifi finoncoian. Min ato Niaifocoinran,”

ishon un mia yoini. Uncai mifu rafuafo anori yoimisima.

¹⁰ Afanan Upa Diosin Furun yoini,

“Minfin uhuunfin cacoinnaquin. Mirifi min nantiffain ato Ifo. Ahuashta oni-

ataima nan maitio yafi nai murannoafoti min onihuaquin tau huani.

¹¹ Sahuuti chocanashucaí afanan shara itiroma cuyotiro. Nanscarifiai nantifi maitio yafi nai murannoafoti cuyoshcani. Ascafia mincai ascarama. Minfin ipanacaquin.

¹² Sahuuti chocanacun potatirofo futsa funa fiishcaquin. Nanscarifiai maitio yafi nantifi nai murannoafoti afanan sharafofocuma min ato cuyomatiro, afanan mai yafi nai fiananan huashquin afanan funa shara inonfo. Ascan mincai mai yafi nai cuscarama. Mincai fianananpacunacama. Nanscasi min apanacaran,”

ishon Upan Diosin Furun yoini.

¹³ Afanan Upan Diosin Furun yoiquin isca huani,

“Min ufu niaifoaitiancai nan mia noicasmafoan afanan mia ahuusca huatiro-

foma. Minfin nantifi ato iquiniran,”

ishon yoini. Asca anoricai ahuun oinmati afu nai muran icafo yoimisima. Ascashon Furun fusti catonni nantifiton aton Ifo inon.

¹⁴ Ascano Upa Diosin nan ahuun oinmati afu nai muran icafo yononi noco cushusharanonfo. Ratoranfoan Jesús ifoancanashu afu ipatirofo. Diosin yononi nanfo ahuun oinmati afu nai muran icafoan ato cushusharanonfo.

2

Jesús nocohuunoashu nanishaquin noco imapacunaca. Nanhuunoa shinanfafaicahuun cachiquire huashcaquima

¹ Ascacun nan tsain icocoin shara Diospan Furunhuunoa non nicamisi cuscan noco nomuran non nanucoinfafainon cachiquire huashquima.

² ¡Shinancapon! Diosin nocon shunifo oinmatifo afu nai muran icafohuunshon ato tapimani. Ascafia ato yoini cuscan tsoan nicayamaiton Diosin ato onaintimacoinni.

³ Diospan nai oinmatifoan ato yoini cuscan nicacasmaifoan ato onaintimani. Nanscarifi huaquin Furun nan nocon Ifo Jesús noco yoini cuscan non nicayamacaiyaiton mimacai huaquin noco onaintimashqui. Ascan nantorifi yoini nocohuunoashu chipo nashquiai. Ascashon noco chaca soashonano non afu ipanon. Ascano yoiaiton nicacashon afu rafumisifoan nannori noco tapimani.

⁴ Ascadari nanfohuunshon Upa Diosin futsafo ato ismani nanfoan yoinifo cuscan icocoincun. Ascashon tsoan oinyomisifoma cuscara isinincal futsa futsatapafo ahuun curushhuunshon ato caya huapacuni. Ahuun Yoshin Sharapanrifi nanfo ato tapimani yonoshononfo. Ascashon afin ato catonpacuni ahuun yono futsa futsa huaquin yonoshononfo. Ratoranfo catonpai afin ato catonniquin ahuun yono anonfo.

Jesucristo arifi Diosifashu noco cuscara yoracoin ica

⁵ Non mato yoimisi Upa Diosin nantifi oni huanitiacai ahuun oinmatifo afu nai muran icafo yoinima isca huaquin, –Manfin nantifi mai anofoan ato ifo ishquiran, –ishoncai ato yoinima.

⁶ Ascacun David yoini isca huaquin,

“Upa Diosin, minfin nantifi yorafo onihuaniquin. Ascan noncai ahuama. ¿Ascacun ahuuscai min nocohuun noifain min noco shinanquin min noco cushusharahun?”

⁷⁻⁸ Ascashon min yononi cuscacoin min oinmati mifu nai muran icafoan noco finonyoni nan min Furun afanan nocoqui nocoaitan. Ascacun min yorafo onihuasharani mia cuscarari inonfo. Ascashon nan min onihuanifotifain ato ifo non iishquin.”
Min anori yonofanicai atirifi yorafoan aton ifo icataima.

⁹ Ascan Jesús arifi noco cuscara iyopaoni. Nantian Diospan oinmati afu nai muran icafoan Jesuri finonyopaonifo. Nocohuunoashu omitsiscacain noco nashoni. Upa Diosin nocohuun ramapaiyaino Furun Jesús nantifi manifestihuunoashu nani. Ascano noncai afanan napanacama. Upa Diosin nantifi yorafo yononi ahuunoa

¹⁰ Upa Diosin nantifi onihuanu ahuunoashu nantifi ica. Ascashon yorafori onihuanu ahuun facufo icain afu ipanonfo. Ascacun Furun Jesús nichini nocohuunoashu omitsiscano non afu ipanon. Furun fusti nocohuunoashu omitsiscatiro noco chaca soashoshquin. Nan iconcain Upa Diosin yononi Furunmun noco omitsiscashoano noco Ifo sharacoin inon. Ascashon Apa Dios icari noco iyoano non afu ipanon.

¹¹ Jesuscai ahua chaca huamisima. Ascashon nocori chaca soashona non a cuscara shara inon. Ascashon rafitama nocohuunoari yoiquin isca huai, –Nanfo uhuun yoraforan, –ishon yoitiro. Ascatan Jesús ahuun Apa Dios nanrifi noco Upa.

¹² Nan icoinra huafohuunoa Jesús Apa Dios yoiquin isca huani,

“Upa Diosin, mihuunoa uhuun yorafo un yoisharashquin. Un atofu mihuunoashu fanainshquinran,”

ishon yoini.

¹³ Ascashon yoiquire isca huani,

“Uhuun Upa Dios un icoinra huairan,”

ishon yoini. Afananri yoiquin isca huani,

“Shinancapon Upa Diosin ua icoinra huafo ua inan uhuun facufo inonfo,”

ishon Jesús yoini.

¹⁴ Ascano facufo namiyacain imiya. Nanscarifiai Jesús arifi noco cuscara yoracoin cainni. Yoracoin cainnishaquin noco naashoni afanan Satanás noco ifo iyamacain noco namapacunonma. Nocohuunoashu Jesús naitian Satanás ahuun curush shatuni afanan noco ahuusca huanonma.

¹⁵ Ascano nocohuunoashu nataima yorafo napaicani ratucoinfafainpaonifo. Ascafia nocohuunoashu naitian noco numani. Ascano non nashquiai huunoa shinaincai non afanan ratuima. Ascatacai ratu afanan noco ifo itiroma.

¹⁶ Ascano man non tapia Jesuscai ahuun oinmati afu nai muran icafo ashoyoi onima. Ascatarocon Abraham ahuun funafo nan icoinra huafoti ato ashoyoi oni.

¹⁷ Ascacufin Jesús noco cuscara yoracoin ini. Nan non mumisi cuscan arifi muuyopaoni. Ascacun nocohuun ramapaitiro. Nan Apa Diosin yonoa cuscacoin amisi noco numashqui. Nocohuunoashu nani noco chaca soashoshquin. Ascacun nocohuunoo Apa Dios yoitiro isca huaquin, –Upa, un ato nashoni aton chaca soashoshquin. Ascان nan un icoinra huafo aton chaca soashofain ato rauhuhuu, –ishon Apa yoitiro. Ascashu nocohuunshon Dios cufimisi niaifocoin itiro.

¹⁸ Nanscarifi aquin Satanás chaca huamapaipaoni. Ascان Jesús omitsiscafiaquicai chaca huamisisima. Ascacun nocorifi Satanás chaca huamapaipayian Jesús nocohuun ramapaitiro. Non muumisi cuscan arifi muuyopaoni. Ascashon noco numatiro non chaca huanonma.

3

Jesusfin Moisés fincoianquin

¹ Ascacufin uhuun yoramishtichin matorifi Upa Diosin catonni ahuun yora sharafo icain man afu ipanon. Upa Diosin Furu Jesús nichini no fu ishon ahuun tsain shara noco tapimanon. Ascatan nocon numamisi icain nocohuunshon Apa Dios cufimisicoin. Ascacun maton nomuran Jesushuunoo shinanfafaicahuun.

² Upa Diosin Israelifo tapimapaiyai cuscan tau huaquin Moisés yoiyoni. Ascacun arifi Moisés ahuun caiffo nan yoiyoni cuscan ato tapimani. Ascashu nan Upa Diosin yononi cuscacoin Moisés apaoni. Nanscarifi aquin Upa Diosin Jesús catonni ahuunoo ahuun yorafo tapimanon. Ascashu nan Apa Diosin yononi cuscacoin arifi Jesús acoinmisi.

³ Pushu sharahuunoo yoisharatirofopia nan pushu huamisihuunoo finacoinquin yoisharatiro. Nanscarifiai Moisésuunoo yoisharatirofopia nan Jesushuunooacafin finacoinquin yoisharatirofoquin.

⁴ Pushufo ratoran futsan afin oni huatirofia Upa Diosifin nantifi onihuaniquin.

⁵ Ascان Moisésfin Upa Diospan oinmatiquin. Upa Diosin ahuun yora nan Israelifo ato yonopaiyai cuscan iquisi Moisés yoiyoni. Ascacun arifi nantifi ato yoinon. Inon pacoai ato yoipaiyai cuscan Moisés tapimayoni ahuun caifori ato yoinon.

⁶ Ascafia Jesuscai Upa Diospan oinmatima. Ascatan nancairocofin Furuncoinquin. Ascashu ahuun yorafoan ato Ifocoin. Nan Apa yononi cuscan ahuun yorafo cushusharacoinmisi. Ascacun Upa Diosin tapipai nonmain Jesús icoinra huashon noco yoiyotiani cuscan non ratutama mansharaicai nan Jesús afanan oaitian. Ascashu non nanscacoiaishu non ahuun facufo ipatiroquin.

Diospan yorafoan ahuunooashu aton ointi unimatiro afanan fucashuni inonma

⁷⁻⁸ Ascان Diosin Yoshin sharapan yoiquin isca huani,

“Upa Diosin mato yoiyai cuscan nicasharacahuun. Tsoan istaipama mato shunifo icafofian un atohuunoo tapipaoni uamain nicasharafain ua nicacasmacanicuin. Ascashon nanfoan ua nicacasmaonifo. Ascacun ato cuscara iyamacahuun. Maton ointi mutoyamacahuun. Ascatarocon Jesús mato yoiyai cuscan fusti nicasharafafaincahuun.”

⁹ “Maton shunifo tsoan istaipamanoashu icaino yoitimafiafoan funaquima uhuun yono un ato ismapaoni. Tsoan oinyomisima cuscara shara cuarenta fari un ato ahuamamishihti ismasharapaoni.”

¹⁰ “Un ato ahuaara ismafaiatocai ua tsoan nicapaonima. Uarocon nicacasmaonifo. Ascaiffoan oinquin un mato shunifoqui sinapaoniquin. Nantianri un yoini isca huaquin, ‘Nanfoan aton nomuran amaquiri shinanachacamisifo. Ua tanatama. Un ato shinanmapaiyai cuscacai tsoan tapipaonima.’

¹¹ Ascان atoqui sinaquin un yoini isca huaquin, ‘Nan na Israelifoan ua nicacasmacani. Un aton nomuran unimamapaiyai cuscacai un ato ashopacunacamaran,’” ishon Upa Diosin noco shunifohuunoo yoiniquin.

¹² Uhuun yoramishtichin oinfain. Nocon shunifo cuscara iyamacahuun. Maton nomuran man Jesús icoinra huayamashu man chacacoin itiro. Man ascaicai nan Dios ipamisi fu man ipaima. Ascashon man cachiquiri huatiroquin.

¹³ Ascatarocon shafatifi yoinonansharafain noco Ifohuunoo shinanmatanansharafafaincahuun. Ahuara chacafaoan noco paratirofo. Ascafia non shinanmasharatanainnocai nocon ointi non mutotiroma.

¹⁴ Non tau huaquin Jesús icoinra huacoinni cuscan non nanscasi unuyamashu non afu ipatiroquin.

¹⁵ Ascانo un rama mato cunushona cuscan afanan mato yoi,

“Upa Diosin mato yoi ai cuscan fusti nicasharafaincahuun. Maton shunifoan Upa Dios nicacasmacani aton ointi mutopaonifo. Ascacun ato cuscara iyamacahuun. Maton ointi mutoyamacahuun. Ascashu yoitimashuni iishcaquima,” ishon Diospan tsain cununi.

¹⁶ ¿Ascán tsoafoanmun Dios nicacasmafain ahuun tsain cachiquiri huapaonifoquin? Nantifi nocon shunifo Moisés ato Egipto mai anoashon iyoni. Nanfoanfin Dios nicacasmaonifoquin.

¹⁷ ¿Tsoafoquimun Upa Diosin cuarenta fari sinaniquin? Ascano nanfoanfin Dios nicacasmafain chaca huapaonifoquin. Ascaifoan Upa Diosin tsoa istaipamashon nantifi ato namapacuni.

¹⁸ Tsoacon Diosin yoinimun isca huaquin, —Un mato nomuran unimamapai ai cusca ai un afanan asca huapanacamaran, —ishon yoini. Nan nicayosma shunifo ato yoini.

¹⁹ Ascán Upa Diosicai tsoan icoinra huanima. Ascashu Diosin ato iyopai anocai tsoa iquinifoma yora futsafoqui musucani.

4

¹ Ascano Upa Diosin ato yoini cuscan norifi non icoinra huashu non afu rafucun nocon nomuran unimamatiro. Ascacun oinfain. Marifi Diospan tsain man icoinra huayamashu mato imasharapai ai cuscan man funotiro.

² Upa Diosin nocon shunifo tsain shara yoiquin isca huani, —Un mato numai. Mato fu mai shara ano ishquin un mato iyoicai. Nannoashu man ufu rafuaitocai afanan tsoa futsan mato ahuusca huatiroma. Nannoashu man isharacoion, —ishon ato yoini. Ato yoi ai cuscan nicafishocai icoinra huanifoma. Nanscashofin ipaitsicoin nicanifoquin.

³ Ascafi non Jesús icoinra huacun Upa Diosin nocon ointi imasharatiro afu rafucain non isharanon. Ascán nocon shunifocai ascanifoma. Ascacun Upa Diosin ato yoini isca huaquin,

“Na Israelifoancai ua icoinra huacanima. Ascaifoanno un atoqui sinaquicai mai shara futsa ano ato imapacunacama anoashu isharanonfo,”

ishon ato yoini. Nannori yoifianishaquin Upa Diosin nantifi onihuaquin anaitishon tununi. Nanscarifai nantian yafi natianrifi ahuun yorafo imasharapai afu isharanonfo.

⁴ Afanan Diospan tsain cununi isca huaquin,

“Siete oshatan Diosin yononi nantifi onihuaquin anaitishon tununiran,”

ishon cununi.

⁵ Ascano Upa Diosin nocon shunifo fu rafupaini ato mai shara futsa ano imapaiquin anoashu isharanonfo. Ascafi Diospan tsain afanan cununi isca huaquin,

“Un ato imapai aricai un afanan ato imapacunacama anoashu isharanonfo,”

ishon Upa Diosin yoini.

⁶ Ascano nannori yoifiani futsafoan chipo icoinra huafoan Upa Diosin ato iquimatiro afu rafucain aton nomuran unimacain isharanonfo. Ascán nocon shunifoan icoinra huayamashucan iquinifoma.

⁷ Ascano Upa Diosinhuunshon afanan David yoini isca huaquin,

“Natian Diosin tsain man nicafai maton ointi mutoyamacahuun. Ascashu yoitimari iyamacahuun,”

ishon David yoini.

⁸ Ascashon Josué ahuun caifofo aton mai ano iyoni nannoashu isharanonfo. Ascafi nan maicoihuunoacai Diosin chipo noco yoima. Nan Israeli maihuunoa yoiquicai isca huacuanima, —Natian man ua nicasharaquicai afanan man shinanchacaima. Ascatamarocon maton nomuran unimacain ufu man rafucacashquinran, —ishoncai yoi cuanima.

⁹ Ascacufin natiari Upa Diosin ahuun yorafo aton nomuran unimamapai isharanonfo.

¹⁰ Upa Diosin nantifi onihuaquin anaitishon unimayanan tununi. Nanscarifai non Upa Dios fu rafucain non iyopaoni cuscan non afanan ascapaitiroma. Non ipaoni cuscan nantifi non shatutiro. Ascashu non Dios fu rafuaiton nocon nomuran unimamamon.

¹¹ Ascacufin non Dios nicasharashu a cuscara isharacain nocon nomuran unimai cuscan non muunon. Ascán nocon shunifo yoitimashuni. Diosin ato mai shara iquimapaifaquicai icoinra huayamaifoan ato iquimanima. Ascán noncai ato cuscara ipaima Diosin noco imapai ai cuscan non funoshquinma.

¹² Upa Diosin nipanaca. Nanscarifai ahuun tsaincai unupacunacama mutsisipacoin. Ahuun tsainhuunoashu non isharatiro. Nopu cunocoinnin ahuara cashushon amuran non oincointiro. Nopu cunocoinfia Diospan tsain mimacaya fasi cunocoin cuscara. Ahuun tsainhuunshon non imisi cuscan yafi non shinanmisi cuscan nantifi noco puashotiro.

Ascashon nocon nomuran onancoian. Non shara iyamarai non chaca shinanmisi cuscan ahuun tsainhuunshon noco puashotiro.

¹³ Nantifi onihuani Upa Diosin onancoian. Tsoancai otayamafain tsoanricai foman-tiroma. Nantifi non amisi cuscan huafain non shinanmisi cuscain Diosin onancoiaiton. Ascan chipo ahuun ointaifi non aqui nocoaitian nantifi non amisi cuscan huafain non shinanmisi cuscan noco puashopacushquin.

Futsafoan nocon Upa Dios cufishotirofo. Ascafia Jesuscaifin ato finoncoianquin. Nantorifi noco Apa Dios cufishomisi

¹⁴ Ascacufin Jesús Diospan Furun nocohuunshon cufimisi nai muran cani. Nantofin nantifi Upa Dios cufimisifo ato finoncoianquin. Ascashon non yoimisi isca huaquin, —Jesús noco Iforan, —ishon non yoimisi cuscaai non cachiquiri huapanacama.

¹⁵ Nantifi finoncoian nocohuunshon cufimisi Jesusfin non muai cuscan arifi muyopaoni. Ascan ahuaraton noco shinanchacamapaiyai cuscan arifi nansca huayopaoni. Ascacun nocohuun ramapaitiro. Satanás nan yoshin chacapan noco chaca huamapaiyai cuscan nanrifi chaca huamapaifaitocai anima. Jesuscai ahua chaca huamisima. Nantifi non mutiro cuscan arifi muyopaoni. Non omitsiscamisi cuscan arifi muyopaoni. Ascacun nocohuun ramapaitiro.

¹⁶ Ascacufin Diosiqui ranoquima non yoipaiyai cuscan non yoinon. Non yoiaiton Jesushuunshon Upa Diosin nocohuun ramapaicain noco ashoshquin.

5

¹ Israelifoan aton caifo futsa catonnifo Upa Diosin ato yoipaiyai cuscan ahuunshon ato tapimanon. Ascacun nanfoanrifi Upa Diosin yoipaiyaifo cuscan nan nocofunhuunshon yoinonfo. Nantifi ato cuscara nocofunu ini. Ascashon nan catonnifo atohuunshon Diosin yoimisi niaifocoin inon. Nantifi Diosin yoishomisi futsafoan aton niaifo inon. Moisés ato yononi cuscan Israelifoan Dios fu tsainti pushu muranshon inafa inanpacunifo. Ascashon nan Diosin yoishomisi niaifoan nan inafa ato rutushonaino ahuun imi foaiton oinquin Diosin aton chaca soashoni.

² Nan Israelifoan yorafohuunshon Dios fu cufimisi niaifoan ato asca huashoaitian atohuunri ramapaitiro. Ascafia arifi ato cuscara nocofunu. Ahuun caifofoan amaquiri shinanquin Dios tanasharamisifoma cuscan arifi nansca huamisi. Ascafiafashon chaca huamisifo cuscan nicai arifi atohuun ramapaitiro.

³ Ascashon inafa ato rutushotiro Upa Diosin aton chaca soashonon. Arifi chaca huamisi. Ascafiafashon arifi ahuun ina rutuni Upa Diosin ahuun chaca soashonon.

⁴ Tsoacai afiri catonmutiroma ahuun caifofoan ato Dios yoishomisi niaifo iishquin. Ascano Upa Diosin Aarón catonni cuscan atorifi catontiro.

⁵ Nanscarifiai Cristocai afiri catonmunima yorafohuunshon Dios cufimisi niaifocoin iishquin. Ascatama Apa Diosin catonquin isca huani,

“Min uhuun facucoin natian un mia catoan nantifiton aton Ifo min inon,”
ishon Apa Diosin yoini.

⁶ Ascashon afanan yoiquin isca huani,

“Minfin nan niaifo Melquisedec cuscaraquin. Nantofin yorafohuunshon ua yoimisi ipaoni. Ascan mirifi min nanscasi apanacaran,”
ishon Apa Diosin furun Jesús yoini.

⁷ Jesús mai ano iyoashu omitsiscapaoni. Ascashu nocohuunoashu naitian oi ashcafinin uaiyanan Apa Dios cufinquin isca huani, —Upashtan, mian numapaiquin mian numatiro un nanonma. Ascafia un apaiyai cuscan huaima nan mian amapaiyai cuscan fusti ua huahuun, —ishon Apa Dios yoini. Ascashon nan Apa amapaiyai cuscan fustisi shinanquin cufiai cuscan nicacoinni.

⁸ Ascashu Diospan facucoinfiashu omitsiscani. Omitsiscafiaquin Apa nicacoinni. Ascashori arifi muyopaoni ahua ahuuscarafiaino Apa nicacoinpaoni.

⁹ Nocohuunoashu omitsiscafiaquin Apa Diosin yoiai cuscan nicacoinni. Ascashon yorafa ismani ahua chaca huamisima. Ascashu ishara fustimisi. Ascashu nocon Numamisi sharacoin itiro. A nicasharaifoti Upa Dios fu ipatiroquin.

¹⁰ Ascano Upa Diosin Furun Jesús catonshon yoiquin isca huani, —Minfin nan Melquisedec cuscara iquicai. Ascashon yorafohuunoa ua cufimisi niaifocoin min ipatiro ato numashqui. Ascashon nantifi yorafohuunoa ua yoimisifo min ato finoncoianran, —ishon Apa Diosin yoini.

¡Oinfain! Man Jesús cachiquiri huaa fasi musucoin itiro

¹¹ Ascan nan rama un mato yoia cuscan nanfohuunoa un mato paratama shafacafi tapimapaifaiainocai man nicasharamisima. Ascashon man funa tapisharamisima.

¹²⁻¹³ Ascan mancai na rama Diospan tsain nicama. Man man fari ranan nicafiami-sishaquicai man tapi sharataima. Man tau huaquin Jesucristohuunoa tapini cuscan man man ointiaquimamisi. Ascaquicai man futsafo tapimatiroma. Ascata ma mancairocofin futsafo yopaiquin man tau huaquin Jesushuunoa tapini cuscan afanan mato tapimanonfo. Ascashufin man facufo cuscaraquin. Facushta shoma fusti ayotiro. Shoma fusti acaiton non tapitiro yosiataima. Tushucoincai piyotiroma. Nanscarifiai mancai atirifi Diospan tsain tapisharataima.

¹⁴ Ascan tsoan Diospan tsain shafatifi oinfafainni cununi cuscan aashquin. Nanton tapitiro ahuara shara afainmain ahuara chaca aquimaquin. Nan cuscarafoan fasi paratama Diospan tsain tapi sharatirofo.

6

¹⁻² Ascan noncai facufo cuscarama. Facufoancai ichapa tapiama. Ascan iyoafofoan paratama tapisharafo. Nanscarifiai non tau huaquin Jesucristohuunoa tapini cuscan nan fusticai non shinafafaainima. Ascashon non tapini non ahuara shara huahuunshoncai noco chaca soashotiroma Upa Dios fu non ipanon. Non tapiniri Dios icoinra huayamashucai non afu ipatiroma.

Ascatan non unu muran iquimamua nocon chaca soashonano non Jesús ifoashon futsafo ismatirohuunoa tapifain nan icoinra huafo futsafo non ato manmanshon cufishotiro Diosin ato yonomapaiyai cuscan anonfo nanrifi tapifain yora naashu funitirohuunoi tapifain icoinra huafo ma Diosin ato omitsiscapanacafo muran potashquiai nanfohuunoa man non tapiyoni. Ascan afanan noncai tapimamisi yopaima nanfohuunoa noco tapimanon. Ascano afanan ascata ma noficairocon non paratama Diospan tsain shara tapinon Jesús tanasharashquin.

³ Ascan natian Upa Diosin ahuara futsafo noco tapimapaiyai cuscan ahuun tsainhuunoa non nicasharanon nanscaco in aashquin.

⁴⁻⁶ Tsoan Diospan tsain shara Jesucristohuunoa tapiyoni Furun Jesús aqui nichini ahuun ifo icaino ahuun nomuran mumisi. Ascashori Diospan Yoshin Shara fu rafucain ahuun tsain shara noco cunushoni iconcoin oinquin ahuun nomuran muumisi. Ascatan Jesús oaitian ahuun curushhuunshon ahuamamishti tsoan oinyomisima cuscara man aashquiai man ahuun nomuran muumisi. Ascan nantifi ahuara sharafo ahuun nomuran mufiamisishaquin Jesús cachiquiri huaco inshon nocon Ifo Jesús afanan masta cafisca huai. Ascashon futsafoan Jesushuunoa shinanchacatirofo. Ascaran yorafoancai afanan shinan futsatiroma aton chaca shatushon Jesús ifoashquin.

⁷ Shinancapon. Diosin oi fumaraino oian mau fupuatiro yonofa foai sharanon. Ascano mau yonomisifo unimatirofo yono foaisharano pisharashaquin. Ascacufin na mau Diosin shara huaquin. Nanscarifiai tsoan Diosin tsain nicafafaini ishariatiro futsaforifi shara huashoshquin.

⁸ Ascafia mau futsan ifoan fanayamaino yono foaitamarocon totoشمoshafosi foaitiro. Nanscara mau chaca foaitiro. Ascashon afanan tsoan fipaiquima coatiro coonon. Nanscarifiai tsoan Diosin tsain nicafafafiai yoia cuscan atama ahuun tsain cachiquiri huaco incun nanscarafo Diosin omitsiscapanacafo muran potashquin.

Non tapitiro non Jesús icoinra huashucai non funotiroma

⁹ Uhuun yoramishtichin, un mato na rama cunushona cuscacai un anori matohuunoa shinainma. Ascan mancai ascarama. Un icoinra huai mancai nocon Numamisi Jesús cachiquiri huamisisima. A tanasharashon nan mato yoia cuscaco in man amisi.

¹⁰ Upa Diosin icon fustisi. Amaquiri ahuashta shinantiroma. Ascashon mato shinanfaini. Man ahuun noiquin ahuun yorafo man shara huashomisi. Ascaquin man Dios ismai man noiai cuscan. Ascashori man unutama ato shara huafafainmisi. Man ato shara huaa cuscan Upa Diosin mato oiainnocai ointi aquimacpacunacama.

¹¹ Man yorafohuun noiai cuscan unupacuyamacahuun. Ato shara huafafaincahuun tushucaquima. Nan Jesús oai chain natianri Dios yonosharashocoinfafaincahuun. Man ascain nan man manamisi cuscan Upa Diosin mato inanshquin. Ascashu man Jesús cuscara shara iishquin.

¹² Ascacun tushucaquima nan Diospan yora futsafoan Jesús icoinra huaco incashon ato yoiyotiani cuscan manasharamisishacaquin man ahuun Yoshin Shara flao aton nomuran unimamanon. Ascan marifi atohuun caocahuun Jesús tanasharaco inshacaquin.

¹³⁻¹⁴ Nocon shuni Abrahamrifi nanscaraco in ipaoni. Ascashon Upa Diosin yoiyoni isca huaquin, —Unfi Diosico inquin. Tsoancai ua finontiroma. Urusu fustifin un iconmisco inquin. Uncai chanitiro ma. Ascacun un mia shara huaquin ahuara yoipaiyai cuscan mian

icoindra huatiro. Ascashon min funafo ichaparasi un mia ato cainmashoshquin. Ascan mincai ato tanan huatiromaran, —ishon Diosin Abraham yoiyoni.

¹⁵ Ascaiton nicaquin Abraham funaquima mana sharapaoni. Nan yoiyotiani cuscan furun Isaac ahua cainni.

¹⁶ Ascacufin non tapitiro Diosin nan yoiai cuscacoin huamisi. Ascan futsan noco ahua yoiquin icoindra huamapaiyai cuscan nan futsan finoncoiaiton nannoricoinrifi noco yoiaihunshon non icoindra huatiro. Ascan tsoancai, —Anorimaran, —ishon fochishmatiroma.

¹⁷ Ascacun Diosin noco tapimapai ahuun tsain iconcain fusti noco yoiquin isca huatiro, —Un mato yoiyotiani cuscan ashofin man ua icoindra huatiroquin, —ishon Diosin yoini. Ascacun non tapitiro noco yoiyotiani cuscan nannoricoincun. Ahuun tsain fiananantiroma. Ascashon yoiyotiani cuscan afanan yoiquin isca huani, —Unfin Diosicoinquin. Tsoancai ua finontiroma. Ascacun un mato yoiai cuscan man ua icoindra huatiroiran, —ishon yoini icoindra huanonfo.

¹⁸ Diosin nocon icoindra huamapaiquin nannoricoin noco yoiyoni. Ascacun non tapitiro nan shinain cuscan Diosin nannoricoin noco yoiaiton. Man non tapia Diosincain chani-tiroma. Noco yoiyoni Furun nocoqui nichishquin noco numanon. Ascacun non icoindra huatiro nan yoiyotiani cuscan Furunmun noco numano non afu ipanon.

¹⁹ Ascashu fianananyamacain afananricai shinan futsatiroma. Ahuara ahuuscarafi-aquicai noco Jesusmaqui imatiroma. Ahuunoashu fusti non nai muran Upa Dios fu ipatiroquin.

²⁰ Jesús tauí Apa Dios ari cani. Nannoshon nocohuunoa apa cufishofafaini noco numanon. Ascan Jesusfin nan Melquisedec cuscara noco Dios cufishomisi niaifo ipanacaquin.

7

Nan Dios yorafohuunshon cufimisi ahuun anu Melquisedec

¹ Ascatarifi natian un Melquisedechuunoa mato yoinon. Nanfin Salem pushurasi anofoan aton niaifo iniquin. Nanrifi nantifi yorafohuunshon Dios cufimisi futsafo finoncoian ini. Nanfin Abrahamqui noconiquin. Nan mucu fustiti niaifofo yomutso chacafo ato ichoshon ahuun piaca mafofo yafi futsafoan mafororifi afanan ato fishotani Abraham oaino nan Melquisedec Abrahamqui fai pochinin noconi ahuun pushu ano naso curani oaino. Ascashon isca huaquin yoisharani, —Abraham, Diosin mia shara huairan, —ishon yoini.

² Nannori yoiaiton Abraham ahuun mafo yafi ahuun tushuforifi atirifi Melquisedec inancoinni. Tsain futsa *la décima parte* inancoinni. Nan Melquisedec ahuun anu futsafin iconcain yoifain isharacoinmisiran huanifo. Nan Salem pushurasi murannoa aton niaifocoin ipaoni. Ascano nan Salem onicoinnin tsainmanfin aton nomuran unima sharairan huanifo. Nan Melquisedec ahuun anu futsari nomuran unima sharai niaiforan huanifo.

³ Naanfin uhuaomacain upaomari iniquin. Ahuun shunifohuunoacai tsoan tapiyopaonima. Tsoancai cainnitian yafi naitian tapipaonifoma. Aafin Diospan Furun cuscara Dios yorafohuunshon cufinmisi ipanaca.

⁴ Uhuun yoramishtichin shinancapon. Nan Melquisedec niaifocoin. Tsoa cuscarama ipaoni. Ascan nan Abrahamfin Israelifoa aton shuni iqui tauniquin. Nocofunu fasi sharacoin. Ascashon Melquisedec ahuun caifoyamafiacun ahuun mafofo yafi ahuun tushu *la décima parte* inancoinni. Ascacun non tapitiro Melquisedec Abraham finoncoian.

⁵ Israeli shoco futsafo Leví ahuun funafo. Nanfofin Upa Diosin catonniquin ahuun yorafohuunoa ato cufishomisi inonfo. Nan Levifoansi aton caifohuunshon Dios cufifafainmisi ipaonifo. Ascafia Dioshuunshon Moisés Israelifo yononi cuscan nantifi ato tushufo non ato ahuarafori futsa futsa huaquin nan Leví ahuun funafo *la décima parte* inanpacunifo.

⁶ Ascano Diosin Abraham yoiyoni ahuun funafo chipo ichapacoin ishquiain. Ascafia Melquisedec Levipan ahuun funayamafiacun Abraham nantifi ahuun ahua futsa futsa huaquin Melquisedec *la décima parte* inancoinni. Ascacun Melquisedec Abraham yoini isca huaquin, —Abraham, mia Diosin shara huairan, —ishon yoini.

⁷ Icon nantiffain man non tapicoian tsoan futsafo finoncoinshon ahuun tsainman ato shara huatiro. Ascacun non tapitiro Melquisedec Abraham finoncoian.

⁸ Ascacun ahuun caifo Israeli shoco futsafoan. Nan Leví ahuun funafo ahuafo futsa futsa huaquin *la décima parte* ato inanfanifo nanfo man naamisifo. Ascano arifi Melquisedec Abrahamna futsa futsa huaquin *la décima parte* fiini. Ascacun Diospan tsain cununi cuscan Melquisedec natian nia.

⁹⁻¹⁰ Levipan ahuun funafoan aton shuni Abraham. Ascashon Abraham Melquisedec ahuarafu inaintian nantianrifi Levifoan arifi inain cafisca huanifoquin. Nan Abraham Melquisedec inaintiancai ahuun funa Leví caiantai inima. Chipu Abraham ahuun funa Leví cainni. Ascacun non tapitiro Melquisedec fustiton aton shuni Abraham yafi atorifi finoncoian.

¹¹ Uhuun yoramishtichin shinancapon. Upan Diosinhuunshon Moisés noco yononi cuscan yafi Leví funafoan nocohuunshon Dios cufimisifoan noco numatiroanocai Diosin Furun nichicuanima nocohuunshon Apa Dios cufimisi inon. Cristocai Aarón nan Leví ahuun funa cuscarama. Aafin Melquisedec cuscaraquin.

¹²⁻¹⁴ Tauí Leví ahuun funa Aarón. Nan Aarónfin yorafuhoonshon Diosin cufimisi futsafoan aton niaifo ipaoniquin. Ascan nocon Ifo Jesuscai Leví ahuun funama shoco futsa. Ascashucái Aarón cuscarama. Nocon Ifo Jesusfin Judápan ahuun funaquin. Nan Levipan ahuun chipocu Judá. Ascano Judápan yorafoanri yorafuhoonshon Diosin cufimisifo itiroforan ishoncai Moisés yoisimisa. Ascacun non tapitiro Upan Diosin Furun nichini afanan ahuun yorafo yoi futsanon. Ascatarifi Moisés yononi cuscan fiananan huashquin. Ascashon yononi Judápan ahuun funa Jesús nocon cufishomisi niaifo inon.

¹⁵ Ascacun afanan un mato cayacafi yoisharapai. Natian shafacafi man non tapishara Diosin ahuaa futsa yononi cuscan nocon Dios cufishomisi funa Melquisedec cuscara nocoqui noconi.

¹⁶ Moisés yononi cuscacoin Leví ahuun funafo fustifin Dios cufimisifo itirofoquin. Ascafia Jesuscai Moisés yononi cuscahuunoashu noco Dios cufishomisi icama. Aafin Diospan curushhuunoashu nipanacaquin. Ascashu noco Dios cufishomisi ica.

¹⁷ Nannori David Diospan tsain Jesucristohuunoa cunuquin isca huani,
 “Min Melquisedec cuscara yorafuhoonshon Dios cufimisi ipanacaran,”
 ishon cununi.

¹⁸⁻¹⁹ Ascacun non tapitiro Moisés yononi cuscacai non afanan tanaima. Nanfoancai noco ahuusca huatiroma noco imasharanon non Dios cuscara isharashquin. Nanfohuunshoncai nocon chaca soashomisima non Dios fu ipanon. Ascan Jesuscai ascarama. Aafin fasi shara finacoian. Upan Diosin nocoqui nichini ahuunshon non tapinon non afu ipatiro.

²⁰⁻²¹ Ascatarí Upan Diosin Furun yoini cuscacai Levipan ahuun funafo anori yoimisima. Ascacun Furun Jesús yoiquin isca huani,

“Unfi nantifiton aton ifocoinquin. Un mia yonoai cuscan min nantifi yorafo atohuunshon ua cufimisi ipashquin. Ascashon un mia yoia cuscacai un afanan shinan futsapacunacamaran,”

ishon Furun yoini.

²² Ascan Apa nannori yoinicun non tapitiro Jesushuunoashu non Upan Dios fu ipatiro. Ascano Leví ahuun funafocai ascarafoma. Nanfohuunoashucái non Diospan yora itiroama. Ascan Upan Diosin Moiséshuunshon Levipan ahuun funafo yononi cuscan sharafishu nan furun Jesús yononi cuscan fasi shara finacoianquin.

²³ Nanfo ichapafofia aton caifohuunshon Dios cufimisifocai ipatirofoma. Nan futsa naitian futsarifi catontirofo arifi aton yorafuhoonshon Upan Dios cufimisi inonfo.

²⁴ Ascafia Jesuscai ato cuscarama. Aafin nipanacaquin. Nanrifi noco Upan Dios cufishomisi unupacuyamacain nanscasi apanaca.

²⁵ Ascan non ahuunoashu Upan Dios fu ipapaiyaiton nocohuunshon Upan Dios yoifafaini isca huaquin, —Upan Diosin, un ato nashoni aton chaca soashohuun. Ascashon mi ano ato imahuu, —ishon nocohuunoa Apa yoishquin. Ascatan nocohuunoa Upan Diosin yoia cuscan nanscacoín noco huashoshquin non afu ipanon. Ascaicai non funopacunacama.

²⁶ Ascan nan Jesusfin nocohuunoa Dios yoimisiquin. Yoimisi futsafo finoncoian. Aafin Diosin cuscara sharacoianquin. Tsoancai ahuunoa ahuashta chaca yoitiroama. Aatocai ahua chaca shinanyamafain yora chacafo cuscarama. Ascashon Upan Dios icanofori finoncoian. Ascashon non yopai cuscarifi noco ashotiro.

²⁷ Yorafuhoonshon Dios cufimisi niaifo futsafofiahucái ascarafoma. Nanfoan shafatifi inafu rutupaonifo Upan Dios ismaquin ato chaca soashonon. Ascashon Upan Diosin aton chaca soashonano futsafohuunoari nanfoan inafu rutushopaonifo Upan Diosin atori chaca soashonon. Ascafia Jesuscai ato cuscarama. Ato fasi finoncoian. Atocai ina rututiroma aton chaca soashonon. Ascatamarocon nancaifin nantifi yorafuhoonoashu nashoniquin nocon chaca soashoshquin. Ascano nancai afanan ahua futsa yopaima noco chaca soashoshquin. Ascashon nan fustiton nocon chaca soashonano non Upan Dios fu ipatiroquin.

²⁸ Ascan Upan Diosihuunshon Moisés yononi cuscan yorafuhoonoa Upan Dios cufimisifo non aton niaifofori catonnifo. Ascan nanfofin noco cuscarafuquin. Ascashon nanfoanri chaca huamisifo. Shara ipaifiaquin samamashta chaca huapaonifo. Ascacun Diosin

ahuun tsain yoyoni cuscan Furun Jesús chipo catonni nocohuunshon Dios cufishomisi ipanon. Aatocai ahua chaca huamisima. Aafin shara fusti imisiquin.

8

Upa Diosin ahuun tsain futsancai anori noco tapimayopaonima cuscan natian noco tapimani Jesús fustihuunoashu non afu ipatiro

¹⁻² Ascan nan Jesusfin Apa Dios niaifocoin icari afu icaquin. Ascashon non yopai cuscan nocohuunoo Apa yoipacushquin. Aafin noco yoishomisi niaifocoinquin. Nan icaricai tsoa futsan onihuanima. Dios fustiton nanri onihuani. Nanriashu nocohuunoo Apa fu tsaincacaini. Nan ica ari Dios fu tsainti pushu cuscaracoin. Ascano un mato cunushona cuscan nanfo man shafacafi tapi.

³ Nan nocon yorafohuunshon Dios cufimisi niaifocoin nantifi ato catonnifo ahuarafa Dios inanfin ina rutucashon aton chaca shoashonon. Ascano nocohuunshon Dios cufimisi nan Jesús arifi ahua futsan inanniquin.

⁴ Moisés yononi cuscan Levi ahuun funafosi Israelifoan aton Dios cufimisi itirofo. Nanfoanfin inafu rututirofo aton chaca soashonon. Ascano Jesuscai Levipan funama. Ascashu Jesús nuno mai nao icashucui nocohuunshon Apa Dios cufimisi icuanama.

⁵ Ascano nuno mai anoshon nan Levi funafoan Dios fu tsainti pano pushu muranshon yonoshopaonifo. Nannoshon ahuun caifo Israelifo tapimapaicaquin Dios icarimain ahuu cuscaracoin. Ascafia ascaracoin tsoan tapiyonima. Ascacun Upa Diosin Moisés yononi isca huaquin, —Un mia tapimanai cuscan nansacoin ufu tsainti pano pushu huahuun. Man min shinainmun un mia machi anoshon tapima cuscan nansacoinrifi ufu tsainti pano pushu huahuun. Ascacun yonomisifo tapimahuun nan un mia yoia cuscacoin huanonfo, —ishon Upa Diosin Moisés yononi.

⁶ Ascafia Diosin Furun Jesús yononi cuscan nan Moisés yononi cuscan finconcoian. Ascacun Jesús Apa icarishon nocohuunoo Apa cufifafaini nocon chaca soashonano non afu ipanon. Ascan Levipan funafoancai asca huapaonifoma. Upa Diospan Furun Jesús yoyotiani cuscaai ato yoisimisa. Ascano atorifi yoyotiani cuscan sharafishu nan Furun yoyotiani cuscaifin fasi shara finacaiaquin.

⁷ Upa Diosin Moisés yoyotiani cuscahuunoashu non isharacain ahua futsa non yopayamatirocucui nan Jesushuunoo ahua futsa fasi shara finacaia noco yoicuanima.

⁸ Ascafia Upa Diosin yoini Moisés huunshon ato yoifianicai tsoa ascacoinmisima. Ascashucui isharayamacain yoitimacoin imisifo. Ascacun nocon Ifo Diosin yoini isca huaquin,

“Un chipo Israelifo nan Judápan ahuun funafori tsain funa shara futsa un ato yoishquin. Nan un ato sharacoin ashoai cuscan un ato tapimashquin.

⁹ Un ato shunifo Egipto anoshon iyoni. Nantianri un ato yoisharani uhuun tsain nicasharaifoan un ato cushusharafafainon. Un ato asca huafiaino uhuun tsain cachiquiri huanifo. Ascaifoan un ato potayoni. Ascacun ato shunifo un yoini cuscaai un ato funafo anori yoishquima. Ascatarocon uhuun tsain shara futsa un ato yoishquin ua nicasharanonfo.”

¹⁰ “Un Israelifo yoishquiai cuscaai cunu fustihuunshon un ato tapimashquima. Ascataka aton nomuran uhuun tsain shara nanumafain aton nomuran cunui cafisca huaano. Nan un ato yonoai cuscacoin anonfo. Ascano un ato Upa Diosincoan iishquin. Nanfo uhuun yorafa iishceni.

¹¹ Nantiffain ua onancoinshceni. Yora ahuamafoan ua onainfoanno niaifofoanri nansca huaquin ua onancoinshceni. Ascashon tsoa futsacai uhuunoo aton yora futsafo tapimashquicanima. Aafimain nantifiton ua onancoinyainfoan.”

¹² “Un atohuun ramapaishquin. Chaca huafiainfoan un ato chaca soashofain un ato rau huashquin. Ascashocai chaca huafocoin cuscan un afanan afo shinanpacunacamaran,”

ishon Diosin yoini.

¹³ Ascacun Diosin afanan ato yoini isca huaquin, —Un mato tsain funa shara yoiran, —ishon ato yoini. Ascan Moisés huunshon ato yononi cuscaai tsoa afanan yopatiroma. Nan Moisés huunshon ato yononi cuscan fasi tsain shunicoan. Tsoancai afanan afohuunoo yopaiyamaino nan tsain cuyocointiro. Ascashu nanfohuunoo shinanmaquipacunacafo.

9

Pano pushu cunu futsa ocu murancoin Jesús iquitamarocon Apa Dios icaricoan iquini

¹ Upa Diosin Moisés tapimani ahuuscashomain ahuun yorafafoan nan na mai anoshon pano pushu muranshon cufitirofoquin.

² Ascan nan amuranshon Dios cufiti pano pushu cunu rafuya iniquin. Nan cunu taua muran anuqui isca huanifo, —Nuno shara fustisi itiroran, —ishon anunifo. Nan muranrifi faro nia ini. Cuno chashna faca facaitsa tushpacua ahuun shoimishti muran shuni ocapacushon otapaonifo. Nannori sapa acamaquishon piti ini. Nan sapa camaqui misi sutu huashon huafafainpaonifo. Ascashon Diosin atofu ica cuscan ato oinmashquin.

³ Pano cushotopan futsan fupoa cunu ocu murancoin anunifo isca huaquin, —Nuno fasi shara finacoianran, —ishon anunifo. Israelifohuunoo aton Dios cufishomisi niaifo fusti nan cunu futsa muran iquitiro ini.

⁴ Nan Dios cufiti cunu muran nantio cuno chashna faca facaitsa sharaishtan puraishica ini. Ascashon nan cufiti camaqui ahuaa coanifo ahuun coin tipoaino nohuu inin sharayacoin inon. Nan coin tipoaino Dios ismapaonifo a cuffifafaincaquin. Nannori cashon uhuapa ini. Nan ihui casho cuno chashnanpan puraishacafo faca facaitsa sharacoin ini. Nan cashon muranri tutso chashna faca facaitsa muran misi torumishti anucaquin, —Mananran, —huapaonifo. Nan casho muranri Aarón ahuun poquiti yafi toquiri sapa rafu nanunifo. Nan poquiti casho muran nanuataifoma Upa Diosin charo shachoco onihuariscatani. Ascashon nan toquiri sapa rafuqui Upa Diosin Israelifo yonopaiyai cuscan ato cunushoni.

⁵ Ascan nan casho camaqui Diospan nai oinmati ointsa rafu nimanifo. Ato putaon rafutan aton mapo manaon mutiquinanfo. Ascano nan nai oinmati rafuhuunshon Diosin fasi sharacoin ato cushusharamisi ato ismanon. Ascacun nanno anuquin isca huanifo, —Nunoshon Diosin nocon chaca soashonaran, —ishon nan casho anunifo. Ascafia nanfohuunooacai un mato natian paratama yoiyotiroma.

⁶ Ascashon nan amuranshon Dios cufiti pano pushu ocu murancoin iquisi itishara huacashon nan aton caifofohuunshon atohuunoo Dios cufimisifo cunu umainti cainifo nannoshon Upa Diosin ato yononi cuscan aashcaquin.

⁷ Ascano nan cunu futsa ocu murancoin ahuun yorafohuunshon ato Dios cufishomisi-foan aton niaifocoin arus fusti nan faritifi iqui fustipaoni. Nanno iquicai moipan imimaisi iquipaonima. Ascano moipan ahuun imi foshon ahuaa chaca huamisi cuscan ahuunoo afiri yoimucain ahuun yorafohuunshori yoiaiton Upa Diosin aton chaca soashoni. Ahuaa chaca huafiaquin tapishoma acafo cuscan nanfoni soashonon.

⁸ Ascacun nanfohuunshon Diosin ahuun Yoshin Sharapan noco shafacafi tapimani nan pano pushu ipaonitian ahuun caifofohuunshon Dios cufimisi niaifon fusti cunu osa futsa ocu murancoin iquipaoni Dios fu tsainshquin. Ascano nan cunu ocu murancoin anunifo, —Nuno fasi shara finacoianran, —ishon. Nantiancai tsoan tapiatai inima chipo Jesushuunshon nantifi Diospan yorafo afu tsaintirofo.

⁹ Un na rama yoiyai cuscarafohuunoo natianrifi noco nanscara tapimatiro. Ipaoni Moisés ato yononi cuscan Dios fu tsainti pano pushu muranshon ahuaafo Dios inanfan moifori rutushopaonifo ato chaca soashonon.

Ascafia afohuunshocai aton nomuran unimapaonifoma. Nanfoancai aton nomuran shinanmapaonima isca huaquin, —Natian Upa Diosin uhuunoo ahua chaca ointiroma. Un natian shara. Un natian Upa Dios fu itiro afu tsainshquin, —ishocai tsoan anori shinantiro ipaonima.

¹⁰ Ascan Moisés ato yononi cuscan ahuun caifofohuunshon Dios cufimisifoan ato nansca huashonifo. Ascashon ahuaa futsafo ato tapimanifo. Ahua pifainmain ahuari ayatirofoquin. Ascatan ahuscashuraiman muchoquimutirofoquin Diosin ato nicacoinon. Ascafia nanfoancai aton chaca soashocointirofoma. Cristo oataima nannori Diosin ato yoiyoni. Nan Cristo naitian ahuunoashu man nantifi fianananshara. Ascanocai Moisés ato yononi cuscan afanan tsoashta yopatiroma.

¹¹ Upa Diosin ahuaa sharacoin noco yoiyotiani isca huaquin, —Un maton chaca soashoni man ufu isharcocoinon, —ishon yoini. Ascano nan Israelifohuunshon Dios cufimisi niaifocoinca noco nan yoiyotiani cuscan tsoan ascacoin huatiro ipaonima. Ascafia Cristo mai ano oaitian afocoin nocohuunshon Apa Dios cufimisi niaifocoin man ica. Ascashon nantifi ahuaa sharacoin noco yoiyotiani cuscan noco ashoshquin. Ascan nan naashu pano pushu ocu murancoin iquitama. Cayacafi Apa Dios icaricocoinrocon iquini. Nannocai Diosin mai onihuani cuscarama. Noco funufoan pano pushu onihuafianifo. Ascan Dios icaricaifin fasi shara finacoianquin. Ahuashtatocai ari fnontiroma.

¹² Ascan Cristocai chashoanfo futan moipan facufoan aton imi Apa Dios icari fonima. Ascatarocon afinco noco nashoaintian ahuun imi foni. Ascanocai Upa Dios icari ahuashta chaca iquitiro. Ascafia Cristo noco nashoin fustini nocon chaca soashoshquin non Apa Dios fu ipanon. Ascashucaifafanan nanacama.

¹³ Ascan ratoran futsa Diosin yoiyoni cuscan ayamashu ahuun yorafohuunshon Dios cufimisi niaifo yoiyotiro ipaoni. Ascano nanfoan chashoanfo futan moipan ahuun imi

fifain iquisi moipan facu coayopaonifo. Ascashon ahuun maapo yafi imi osishon yoraqui fasha fashapaonifo ahuun chaca soashonano Diospan yora shara icashu afu iishcaquin.

¹⁴ Nanfo iconfia fasi mimacaia Cristo noco nashonihuunshon chaca noco soashotiro. Ascashon atocai ahuashta chaca huapanacama. Ascan nan Diosin Yoshin Shara nipamishuunshon Apa yoini isca huaquin, —Upa un atohuunoashu nai. Ascacun uhuunshon min aton chaca soashotiro min yorafo inonfo, —ishon Jesucriston Apa yoini. Ascan non chaca huamisi cuscan non unuyamashu omitsiscapanacafo muran non cacuana. Ascafia non afanan asca huatamarocon Cristo noco nashonihuunshon non afanan chaca shinanonma. Ascashu nocon nomuran chocatsa shara cuscara itiro. Ascashon Upa Dios nipanaca non yonosharashotiro.

¹⁵ Moisés ato yononi cuscan sharaifacucai tsoan nicafafainpaonima. Nantianri nantiffain chaca huapaonifo. Ascano nanfoan chaca huapaonifo cuscan Cristo fustiton aton chaca soashotiro. Ascafoancai Moisés ato yononi cuscan afanan ato yonotiroma. Ascacun natian Cristo atohuunoashu nani ato chaca soashoshquin. Nanfin aton Numamisi sharaquin. Ascan Cristo icoinra huafoti Upa Diosin ato yoitiro isca huaquin, —Uqui fucahuun uhuun facuhuunoashu uhuun yorafo iishcaquin, —ishon yoitiro. Nanto noco yoiyotiani cuscan Furunhuunshon noco catontiro ahuun yorafo non inon.

¹⁶⁻¹⁷ Natian ahuaara futsa un mato tapimapai man tapinon. Nocofunun nataima cunutiro isca huaquin, —Un naanomaim tsoan uhuun ahuaarafo fitiroquin un mato iquisi tapimaiyoiran, —ishon cunutiro. Ascacun ahuun ahuaarafo futsa inanpaiyai cuscan nataishoma iquisi nan yoiyomisi cuscan cunushotiro. Ascan nan nocofunu niyoanocai ahuun ahuaarafo tsoan fiyotiroma.

¹⁸ Nanscarifiai Diosihuunshon Moisés ahuun caifo Israelifo yononi moi yafi chashoanfo rutuaifono ahuun imi fonon. Ascan aton imi foyamainocai ato yoiyoni cuscacoin Diosin ato ashotiroma. Ascacun nan moi yafi chashoanfo rutucashon Dios ismafain tapipaonifo chipo Cristo ato nashoshquai cuscan. Cristo atohuunoashu nataimacai Diosin aton chaca soashocoinpaonima afu ipanonfo.

¹⁹⁻²⁰ Upa Diosin Israelifo yonoai cuscan nantificoin Moisés ato tapimafain ato yononi. Ascashon nantifi ato tapimaqui anaitishon nii uhuapamashta futsan ahuun anu hisopo ahuun ponya uhuapamashta fini. Fishon moipan facun ahuun imi yafi unu osishon nan hisopo ponyamishu pishtanufain chashoanun rani amuran pocotan Diosin yononi cuscan ahuun papio cunuaqui imin fasha fashafain Israelifoquiri imin ato fashacuni. Ascashon ato yoini isca huaquin, —Nan imihuunshon man tapitiro Upa Diosin noco yoiyotiani cuscacoin ashu non afu ipatiro. Ascashu non ahuun yorafo itiroran, —ishon Moisés ahuun caifofo yoini.

²¹ Nanscarifi aqui Dios cufiti pano pushuqui Moisés moipan imi fasha fashafain nantifi amurannafoquiri imi fasha fashani.

²² Nan Upa Diosin Moisés yononi cuscacoin nantificuana ato imin fashacuni ato chaca soashonano isharanonfo. Ascan imi foyamainocai Diosin noco rau huacuanama nocon chaca soashoshquin.

Cristo nocohuunoashu nani nocon chaca soashoshquin

²³ Dios cufiti pano pushu murannoa ahuaarafo nan Dios icaria cuscaracoinfo. Ascan nanfoqui Moisés imin fashacuni shara inonfo. Ascan amuran sharafia nan moifoan aton imifohuunshoncai nocon chaca soashocointiroma. Ascatarocon nan Cristo nocohuunoashu nai fustinihuunshon nocon chaca soashotiro. Noco nansca huashoano non Dios icari catiro a cuscara shara afu ipashquin. Nannocai ahuashta chaca iquitiroma. Ascatan nannoricai Dios cufiti pano pushu cuscaracoinma. Aricairocofin fasi shara finacoianquin.

²⁴ Ascan nan Dios fu tsainti pushufin nocofunufan onihuaniquin. Amurannoa ahuaarafo nan Diosin icaria cuscaracoin. Ascan Cristocai funinaca huatan amuran iquitama. Apa Diosin icaricoinrocon cayacafi iquini nocohuunna Apa Dios cufishofafainshquin.

²⁵ Ascan nan ahuun yorafohuunshon Dios cufimisi niaifo pano pushu cunu futsan ocumurancoin arus fusti faritifi iqui fustipaoni amuranshon Dios cufishquin. Ascashon ahuun imicoin ya a muran iquitamarocon inapan imi ya iquipaoni. Ascan Cristocai a cuscarama. Aacai faritifi noco nashofafainmisima Dios icari caashquin.

²⁶ Ascamicucuai nan Diosin ahuaarafo onihuanu chain nocohuunoashu omitsiscafafainmisi icuana. Ascafiacai ascarama. Satanás ahuaara chacafo aton curush cuyomanaitian Cristofin nocohuunoashu nai fustini nocon chaca soashoshquin afanan chaca nocon ifo inonma.

²⁷ Ascan nantifi yorafo non nai futsushquin. Noncai nofiri yoitiro ahuutianmain non naicain. Diosin fustiton yoitiro. Naashu nantifi non aqui nocoaiton niyoshon non amisi

cuscan noco yoishquin. Noco yoiano nan Jesús icoinra huafoti afu ipasharatirofo. Nan icoinra huamisifoma ato omitsiscapanacafo muran potashquin.

²⁸ Ascashu Cristo aafiri inanmucaín noco nashoin fustini. Yora ichapafohuunoashu omitsiscacai noco nashoni. Ascafia chipo afanan ahuun yorafoqui mai ano nasoshquin. Ascanishaquin nantian afanan nocohuunoashu naima nocon chaca soashquin. Ascata-marocón ratoranfo aquí unimacai manaífoan ato numashqui afu ipanonfo.

10

¹ Diosin Moisés yononi cuscahuunshon non tapitiro Cristocai fin noco ahuara shara huashoshquin finacoinshquin. Ascacun Moisés ato yononi cuscacai noco ascacoin huatiroma. Nantorifi ato yononi cuscan nan faritifi atohuunshon Dios cufimisifoan moi yafi chashoanfo rutushomisifo aton chaca soanonfo. Ascano nan Moisés yononi cuscahuunshoncai ato numayamafain ato imasharamisima Dios fu ipanonfo.

² Ascamicucai Israelifohuunshon moi yafi chashoanfo ato rutushopaonifo cuscan tsoan unu cuamisima. Ascashon nan Dios tanapaicoínmisifori ato chaca soashoshquin fusti huaa cuani. Ascashon tsoancai aton nomuran shinanquin isca huaacuanama, — ¡Ohuashta! Un chaca huamisiran, —ishocai tsoan anori shinancuanafoma.

³⁻⁴ Ascafiaicai ascarama. Nan faritifi moi funufo yafi chashoanfo ato rutushonaifotian nan chaca huamisifo cuscan fasi ato shinanmapaonifo. Ascafiaquicai nan inapan imihuunshon tsoan ato chaca soashopacunacama Dios fu ipanonfo.

⁵ Ascacufin Criston Apa Dios icariashu mai ano fotoatama iquisi Apa yoiquin isca huani, “Upan, mincai fuchipaima moipan imihuunshon chaca soanonfo. Ascacun mian chipo yorafoan caya cuscara onihuashoin un mia ufiri inanmunon. Ascashu yorafoti un naashoshquin ato chaca soashoshquin.

⁶ Min yorafoan moifo rutucashon cofain ahuara futsafori mia inancaquin. Nan miacoin inain cafisca huamisifo aton chaca soashcaquin. Ascacun miancai ascarafo fuchipaima.

⁷ Upan, un mi ariashu nuno mai ano fotoa min ua amapaiyai cuscan aashquin. Nannoricoin uhuunoa min tsain cunuyoniran,” ishon Cristo yoini.

⁸ Uhuun yoramishtichin, shinancapon. Cristo Apa yoiquin tau huani isca huaquin, — Upan, Moisés ahuun caifo yononi cuscacai min afanan nanfo fuchipaima. Ascacun nanton ato yonoquin isca huani, “Moi yafi chashoanfo rutuafoño aton imi foaihuunshon min ato chaca soashonon,” huani. Ascashon ahuara futsafori mia inanpaifain ina futsafori rutushon cofain nan miacoin inain cafisca huamisifo aton chaca soashcaquin. Ascano nanfoancai mia unimamatirofomaran, —ishon yoiquin tau huani.

⁹ Ascashon afanan yoiquin isca huani, —Upan, un mi ariashu nuno mai ano fotoni min ua amapaiyai cuscan aashquin, —ishon Jesucristo yoini. Ascacun noco nashoni nocon chaca soashoshquin. Ascacun Moisés ato yononi cuscacai non afanan yopaima noco chaca soashonon. Nanfo Jesús man shatumani.

¹⁰ Ascashu Apa amapaiyai cuscan Jesucristo afiri inanmucaín noco nashoni nocon chaca soashoshquin non a cuscara shara inon. Ascacun noncai afanan ahuara futsa yopaima. Nanton noco nashoin fustini. Ascanishaquicai afanan nanacama.

¹¹ Ascacun nan atohuunshon Dios cufimisi Israelifoan shafatifi inafo rutupaonifo Upa Diosin aton chaca soashonon. Ascashon nanfoanrifi shafatifi aton yorafohuunshon ahuarafo Dios inanfafainpaonifo. Ascafiaquicai nanfoan ato chaca soashopacunacama.

¹² Ascafiaifono nan nocohuunshon Apa Dios cufimisi nan Jesusfin afiri Apa inanmuniquin noco nashoshquin. Ascashu nai fustini. Ascancocai non afanan ahuara futsa yopapacunacama nocon chaca soashonon. Ascacun nocohuunoashu naacaini Apa Dios ari caní afu nantifiton aton niaifocoin iishquin.

¹³ Ascashu nan Apa ari noconitian yafi natianrifi ato manaiyoi nan noicasmaifo Apa Diosin aton curush shatumaitian afanan ahuushta inonfoma. Ascacun nantianri Jesús fusti nantifiton aton Ifocoin iishquin.

¹⁴ Ascashu afiri Apa inanmúi fusticai noco nashoni nocon chaca soashoshquin. Nan icoinra huafoti non a cuscara shara inon. Ascashocai afanan Diosin nocohuunoa ahuashta chaca oinpacunacama. Manmain Furunmun noco chaca soashocun. Cristocai ahuashta chaca huamisima. Ascacun norifi non a cuscara sharacoin iishquin.

¹⁵⁻¹⁶ Nannori Diosin Yoshin Sharapan yoiquin tau huani isca huaquin,

“Uhuun yorafoan ua icoinra huacun aton nomuran uhuun tsain ato nanumafain aton ointi muranri uhuun tsain cunui cafisca huashquin ua ointiaquimaiyamacai ua tanasharanonfo,” ishon yoini.

17 Ascashon afanan yoiquin isca huani,

“Man ahudara chaca huamisi cuscan yafi uhuun tsainrifi man nicacasmamisi nanfocai un afanan shinanpacunacamaran,”

ishon Diosin Yoshin Sharapan yoini.

18 Ascashon noco chaca soashofain nanfohuunoo afanan noco shinanshonima. Ascacuai non afanan ahudara futsa inantiroma noco chaca soashonon.

Non Upa Dios fu rafucoinon

19 Dios icaricai ahuashta chaca itiroma. Ascacun Jesús noco nashoni nocon chaca soashoshquin. Ascacun uhuun yoramishtichin, Jesushuunoashu ranotama non Dios fu itiro.

20 Ipaoni nocohuunshon Dios cufimisifoan pano cushto pochimua fupucufoan nan faritifi iqui fustipaonifo Dios cufishcaquin. Ascafia noncai afanan asca huapacunacama. Natian ahudara futsan funa sharacoin Jesús noco ashoni. Ascashon ahuun caya mastaifotian nan pano cushtopan fashnui cafiscani. Ascacun Jesushuunoashu non Dios icano iquisharatiro.

21 Nocon Ifo Jesusfin nocohuunshon Apa Dios cufimisi niaifocoinquin. Ascashu aafin nantifi Diosin yorafoan aton Ifoquin.

22 Ascacun non Jesús icoinra huacun nan noco nashonihuunshon nocon ointi funa sharacoin huashotiro. Ascashocai non chaca huamisi cuscan afanan non shinantiroma nocon nomuran unimacoion. Ascashon noco nan unu tsoi sharapan nashimana cafisca noco huatiro. Non afanan ahuashta chaca nocon nomuran shinanonma. Ascan nan iconcoin Upa Dios fu rafuashu non afu tsainshquin.

23 Ascan non yoiquin isca huamisi, —Jesús uhuun Ifo. Upa Diosin noco yoiyotiani cuscan noco ashoshquiran, —ishon non yoimisi. Nan iconcoin. Ascacun ahua futsa shinanyamacahuun. Nan fustirocon shinanfafaicahuun.

24 Diosin noco shara huamisi. Ascacun norifi non shinanon ahuuscashumain futsafo non shinanmatiroquin noinantanancain non shara huatananshquin.

25 Man man tapia Jesús oti chaima. Ascacun ichanain unupaifafainyamacahuun. Dios cufiyanan ahuun tsainri nicafain fananshofafaincahuun. Jesushuunoo man shinain cuscan futsafoya yoinonancahuun maton ointi unimashcaquin. Atirificai afanan ichan-fafainmisifoma. Ascacun ato cuscara iyamacahuun.

26 Ratoran futsafoan tapiafo Jesús ahuunoashu naani ahuun chaca soashoshquin. Nanscara man tapifashon chaca huariaquin nocon Ifo Jesús cachiquiri huacoincun. Ascarafo-cai afanan ahuun chaca soashotiroma. Jesús fustiton nocon chaca soatirofia nanton man Jesús cachiquiri huacoinna.

27 Nanscarafo Diosin ato onaintimacoishquin. A noicasmamisifocai fin fasi onaintimaquin finacoishquin. Nantianri nan cachiquiri huamisifo fasi omitsiscapanaca. Ascashu Diosin ointafi nococani fasi ratucoinfiaifoan Diosin ato yoiquin isca huashquin, —Umaquinoashu omitsiscapanacafu muran fotacahuun, —ishon ato yoishquin.

28 Ipaoni yora rafutan iyamarai rafu non fustifain nannorisi futsahuunoo tsain chaca niaifofo yoicaquin isca huapaonifo, —Natocai Moisés noco yononi cuscan acama. Fasi chaca huaran, —ishon yoiaiton niaifoan nicaquin iconcoincun ahuun ramapaitama yononi nan rutumanifo.

29 Ascano nan Moisés yononi cuscan nicacasmamisifo rutumapaonifo cuscan nanscarifi huaquin ratoranfoan Jesús nicacasmamisifocun ato onaintimaquin finacoishquin. Ascashon nanscarafoan shinanquin isca huanmisi, —Mun nicamisi Jesús ua nashoni. Nan naino ahuun imi foni. Ascashon ua catonni ahuunoashu un Diospan facu inon. Ascan un shinan nanfocai ahudara. Ascacun uncai Jesús icoinra huapaimaran, —ishon anori shinain nantonfin Jesús nicacasmamisicoishquin. Ascara tsain yoiquin Diospan Yoshin Sharaqui tsain chaca huamisi. Ascafia nan Diosin Yoshin Sharapan yorafohuun ramapaiquin Jesushuunshon aton nomuran fianan huashotiro a cuscara shara inonfo. Ascafia nan nicaiyosmashunifocai fin fasi ato onaintimaquin finacoishquiquin omitsiscapanonfo.

30 Ascan man non tapia Diosin aficoin yoiquin isca huani, —Tsoan futsa chaca huaiton unfin ato onaintimaiquin, —ishon yoini. Afanan Diospan tsain cununi isca huaquin, —Nocon Ifoan ahuun yorafoan chaca huaifoan nanfori Diosin ato onaintimashquiran, —ishon cununi.

31 Ascan ratoranfoan nocon Ifo Jesús cachiquiri huashon chaca huariaifo fasi musucoin. Ascacun nanscarafo nan Diosin nipanacaton achishon ato fasi onaintimacoishquin.

32 Shinancapon uhuun yoramishtichin. Man tau huaquin Jesushuunoo tapifain man ifo huapaoni cuscari ointiaquimayamacahuun. Futsafoan mato Jesús tanatima huafaino

manrocon nocon Ifo Jesús man tanasharacoimpaoni. Ascashon mato omitsisca huafiainfono nanscara tunufain man nocon Ifo tanasharacoimisi.

³³ Ascashon man Jesús tanasharaiton futsafoan ato ointaifi mato roafain mato omitsisca huamisifo. Nanscarifiai man muumisi cuscan Jesús tanamisi futsafo arifi omitsiscaifoan oin atofu rafucain man ato tsain shara yoitiro ato ointi unimamashquin.

³⁴ Jesús icoinra huaa futsafo cunu muran iquimanifo. Ascacun atohuun noicai man atohuunri ramapaiquin cunu muran ato oincai man cani ato shinansharamapaifain aton ointi unimamashquin. Ascan nantianri nan icoinra huamafoan maton mato onuquin cuyocoinnifo. Mato asca huafiafocai shinanchacatarocon man man tapini Upa Diosin nan icarishon mato ahuaara shara finacoianfo mato mucushona nanfocai funopacunacama. Nanscara tapiashu man unimacoinni.

³⁵ Ascacun man Jesús icoinra huaa cuscan cachiquiri huayamacahuun. Man cachiquiri huayamacun Upan Diosin mato fasi shara huashquin. Ascashon mato inain cuscan tsoan ascara shara oinyomisima.

³⁶⁻³⁷ Ascacun Diospan tsain cununi isca huaquin,
 “Jesús oti chaima. Matoqui samamashta nocoshquin. Nantonfin afin tapiquin ahuutianmain nocoqui ooshquicain. Ascashu oicai ichaipacushquima,”
 ishon cununi. Ascacun man Jesús tanasharai cuscan omitsiscafiagu tunucahuun. Unupaiyamacahuun Diosin mato amapaiyai cuscan ashon nan mato yoiyotiani cuscan man fishquin.

³⁸ Ascashon afanan Diospan tsain cununi isca huaquin,
 “Nan un imasharaiton ua icoinra huamisi. Naantofin ua tanasharashquiquin. Ascacun tsoan ua cachiquiri huacucui un aqúi unimashquimaran,”
 ishon Diosin yoini.

³⁹ Nanscarafaoan Jesús cachiquiri huacoicanashu omitsiscapanacafo muran focani. Ascan noncai ascama. Ascata ma non Jesús icoinra huacoincun noco numa non afu ipanon.

11

Icoindra huamisifohuunoa

¹ Ascacun non Upa Dios icoinra huacoinschon noco yoiyotiani cuscan noco ashoataiyamafiacun non icoinra huai. Chipomain noco ashoaiton. Nanscarifiaquin noco yoiyoni cuscan non oiantaiyamafiaqui ahuun tsainhuunshon non icoinra huai. Non nanscara shinanquifin non icoinra huaquin.

² Ascacun nocon shunifoan Diosin ato yoini cuscan fasi icoinra huacoimpaonifo. Upa Diosin atoqui unimacoinquin atohuunoa tsain shara yoini.

³ Ascacun icoinra huashon non tapitiro Diosin ahuun tsainmansi nantifi nan mai yafi nai ariafori onihuani. Non ointiro cuscarafohuunoacai Diosin ahuafo onihuanima. Ascata ma ahuun tsainmansi nantifi onihuani.

⁴ Nocon shuni Abel Dios icoinra huashon chashoanun facu inanquin nan Diosin inain cafisca huani. Ascan Diosin aqúi unimacoinni. Ascan ahuun ochin Caincai ascara inima. Nan Cain icoinra huayamaitocai nantori inanpaiyai cuscan Diosin fuchipainima. Ascan ahuun ushto Abel icoinra huacoincun ahuunoa Diosin yoiquin isca huani, —Min ua inanshararan, —ishon yoini. Abel man Dios icoinra huashu man naafianicun non ahuun caoaino nocoqui Diosin unimacointiro.

⁵ Nocon shuni Enoc arifi Dios icoinra huacoinnashu afu rafucoimpaoni. Ascan nayamafiacun nan icari Diosin ihuirscatani. Ahuunoa Diospan tsain cununi isca huaquin, —Un Enoc yoiyai cuscan ua nicacoimisi. Ascacun un aqúi unimacoiran, —ishon Diosin yoini.

⁶ Ascacun non icoinra huayamaquicai non Dios unimamatiroma. Ratoran futsan Diosin fu ipacoinquin icoinra huatiro natian Dios nia. Ascashori tsoan fasi onanpaicoinquin icoinra huaiton naanfin aqúi nocoaiton Diosin fasi shara huashquiquin.

⁷ Nocon shuni Noé arifi Dios icoinra huacoimpaoni. Ascan iquisi Diosin Noé yoiquin isca huani, —Un oiuhuanrasi fumai faitahuan foran fucaino asai futsunonfo. Ascacun shashohuan pushu ya huahuun. Min non min ahuin non min facu rafu yafi min fanfanhua rafuya asashcaquima. Un mia yoiyai cuscan huahuun, —ishon Diosin Noé yoini. Ascan tsoancai ascara oinyomisimafia Noén icoinra huafain shashohuan huani ahuun facufo ya asashcaquinma. Nantonfin Dios icoinra huafain isharaconmisiquin. Ascan nan icoinra huamafocai ascanifoma. Ascata ma nanfoan chaca huafafainpaonifo. Ascacun Noéhuunshon non tapitiro icoinra huamisifo isharaifonocai nan icoinra huamafo isharamisifoma. Ascashon Diosin fu Noén rafuaiton a cuscara sharacoimani.

⁸ Nocon shuni Abraham arifi Dios icoinra huacoimpaoni. Ascan Diosin Abraham yoiquin isca huani, —Nan un mia iyopaiyaiquiri min catiro. Ascan min cainni anoashu catahuun.

Nanno un mia mai inain mina inon, —ishon Upa Diosin yoini. Ascaran tapiataima ini raquiricaimain caiquin. Ascafia nan Diosin yoia cuscacoin ani.

⁹ Ascashon nan Diosin yoiyotiani cuscacoin icoinra huashu nan Diosin nichian mai ano nocoashu Abraham nan mai futsa aria yora futsa ahuun caifo cuscarama iyopaoni. Nannoashuri pano pushu tapasi cuscara muran iyopaoni. Ascan ahuun facu Isaac yafi ahuun shota Jacoborifi nanscara muran iyopaonifo. Upa Diosin Abraham yoini cuscan nan rafu nannoricoini ato yoini.

¹⁰ Diosin Abraham yononi cuscan nan mai ano iyofashon tapipaoni chipo Dios icari afu ipashquiain cuscan. Nanno Diosin nantifi onihuanu sharashtacoinfo nanfori ahuunari ipanaca. Diosin icaricai ahuashta cuyopacunacama. Nanscasi apanaca. Ascacun Abraham manayopaoni chipo nanno afu ipashquin.

¹¹ Diosin Abraham yoini isca huaquin, —Min ahuin Sarapan chipo furonanfacu nanushquin. Ahuunoashu min funafo ichaparasi iishquiran, —ishon yoini. Nannori yoifano Abraham anifoshta ahuin yoshafoshta toosma ini. Ascacun Abraham ahuun nomuran shinanquin isca huani, —Upa Diosin ua yoiyoni cuscan ua ashoshquin. Nantonfin nan yoia cuscacoin huamisi, —ishon Abraham Dios icoinra huani. Ascashu ahuin Sarapan facu caianno Abraham facuya ini.

¹² Ascano Abraham anifoshta afanancai chai nitiromafia ahuun funafo fasi ichaparasi-coin. Tsoancai ato tanan huatiroma. Fishifo yafi mai furomishticai non tanan huatiroma. Nanscarifiai Abraham ahuun funafocai tsoan tanan huatiroma.

¹³ Nantifi na rama yorafohuunoo mato yoia cuscan afanan atohuunoo un mato yoi. Diosin ato yoiyoni cuscan fiashuma naanifo. Fiataiyamafiaquin Dios icoinra huanifoan chipo fiishcaquin. Ascacun Diosin ato yoiyoni cuscan aton nomuranshon oincoin cafiscail unimacoinnifo. Ascashon yoinifo isca huaquin, —Nunocai non ipanacama. Na mai anoashu nan mai futsa aria yora futsa cuscarafu nonran, —ishon yoinifo.

¹⁴ Ascan nannori yoiiaifon non tapitiro nanscara yorafa nuno mai ano ipaitama Diosin icari capai afu ipashquin.

¹⁵ Ascan aton mai ipaoni shinantacani nasopai ari naso cuanifo.

¹⁶ Ascan ari nasopaitama Dios icarirocon fasi shinannifo ari nocopaicaquin. Nanfoan tapinifo nanno fasi shara finacoian. Ascashon Upa Diosin nan icari ato itishara huashoano afu ipanonfo. Ascacufin atohuunoo ranotama yoini isca huaquin, —Unfin ato Diosiquin, —ishon yoini.

¹⁷⁻¹⁸ Afanan Abrahamhuunoo un mato yoinon. Upa Diosin tapipaini Abraham icoinra huafainmain nan yoia cuscacoin aiquin. Ascashon yoiquin isca huani, —Min ina ua rutushotamarocon min facu fustishta Isaac ua rutushoahun, —ishon Diosin yoini. Upa Diosin iquisi tapimani ahuun facu fusti Isaachuunshon ahuun funafo ichapa iishquiain cuscan. Ahuara sharafo Diosin Abraham yoiyoni cuscan ahuun facu Isaachuunshon nantifi ashoshquin tapimaiyoni. Nannori Upa Diosin Abraham yoiaiton ahuun facu fustishtacoinfia rutushon Dios inancuani. Ascano Dios icoinra huacoinshon nan yoini cuscacoin ani.

¹⁹ Ascashon ahuun nomuran shinanquin isca huani, —Upa Diosin ua yoia isca huaquin, “Min facu Isaac ua rutushoahun,” ua huaiton un shinan Diosintsii ahuamamishti huatiroquin. Ascan uhuun facu naafiadun Upa Diosin samamashta funimatiroquin, —ishon shinanni. Icon ahuun facu naa cuani. Ascacun Abraham shinanni, —Uhuun facu man naafiadun Diosin funimana shinantsairan, —ishon shinanni.

²⁰ Ascan Isaac arifi Dios icoinra huacoinpaoni. Ascacun Diosin ahuun nomuran shinanmani furun rafu chipo ato shara huashononpacoai cuscan icataima yoiyoini.

²¹ Nanscarifiai Jacob arifi Dios icoinra huacoinpaoni. Ascacun nataima Diosin ahuun nomuran shinanmanai cuscan ahuun shota nan Josépan facu rafu Diosin ato shara huashononpacoai cuscan ato yoini. Ato yoitan ahuun poquitiqui cocusamushon Dios cufini.

²² Ascan José arifi Dios icoinra huacoinpaoni. Ascashon natichaima ahuun yorafa yoiquin isca huani, —Chipo Upa Diosin nocon funafo nan Israelifo Egipto anoshon ato iyoshqui. Focaquin uhuun shaofori foshcaquin. Nan man icaino afanan ua mai huashcaquin, —ishon ato yoiyoni.

²³ Moisés apa futan ahuari Dios icoinra huacoinpaonifo. Moisés cainyaintian apa futan ahua oianfo aton facu sharashtacoin ini. Ascashori tapinifo Moisés nocofunucioaintian Upa Diosin yonosharashoshquiain cuscan. Ascacun Egipcio niaifoan ato yononi Israelifoan aton facu yomumishti nantifi rutunonfo. Ascafiainocai nan Moisés apa futan ahua ratuquimarocon Diosin icoinra huashon oshu rafu non fustitan aton facu onunifo niaifoan ato Moisés rutumanonma.

²⁴ Ascashon Moisés arifi Dios icoinra huacoinpaoni. Egipciofo futan ahuun caifoyo atiriffain shinanpaonifo Moisés Faraón ahuun chata. Ascacun Faraón facu shomayatón ahuun facuran, huapaonifo. Ascafia Moisés nocofunucoiantian Dios icoinra huashon ato yoini isca huaquin, —Uncai niaifon Faraón ahuun chatama. Ahuun facuricai uhuun uhuacoinmaran, —ishon yoini.

²⁵ Ascan Moisés aafin tapini Egipcio niaifo icashu fasi isharacain arifi ato futan fari ranan unimacain chaca huatiro. Ascafia Moisés ascapainima. Ascapaitamarocon shinanquin isca huani, —Uncai Egipciofo futan chaca huapaima. Ascata huuun caifo nan Diospan yorafo omitsiscaifo cuscan urifi un atofu omitsiscairan, —ishon shinanni.

²⁶ Ascashon tapiyopaoni chipo Cristohuunoashu omitsiscafiashu Upa Dios ari nocoaiton ahuaa sharacoin inanshquin afu ipanon. Ascacun Egipciofo ato ahuaa ichapa fiapaquin ato fia cuani. Ascafia Moisés anori shinantama shinanquirocon isca huani, —Un Cristohuunoashu omitsiscacu ua fasi imasharatiro. Ascan un Egipciofo anoashu ahuaa ichapayatirofia nanfocai uhuuna ahumarán, —ishon shinanni.

²⁷ Ascan Dios icoinra huafain Egipcio anoashu ahuun caifoyofa Moisés cani. Egipciofoan aton niaifo aqui sinafiainocai aqui ratutama nan niaifoan ahuun mai anoashu cani. Dios tsoan ointromafia Moisés mupaoni Dios afu rafucoincun. Nan oincuin cafisca huapaoni. Ascashon nan Diosin yononi cuscan huaqui unupaonima.

²⁸ Ascan Egipciofo anoashu Israelifo foataima iquisi Diosin Moisés yoiquin tau huani isca huaquin, —Min caifoyo yoihuu chashohuanun facu rutunonfo. Ascashon ahuun imin aton pushuti ahuun caincaini ocuma rafu yafi amanaonri raishaquin futsanonfo. Man asca huacun Diospan nai oinmatin Egipciofoan aton facu iyoafofo namaitian mato facufo finonmanon nanonfoma, —ishon Diosin yoini. Ascacun Moisés arifi nan Diosin yoiatón nica cuscan icoinra huashon ahuun caifo Israelifo yononi. Ascancocai Israelifoan facu iyoafofo fustishta naanima.

²⁹ Ascacun Israelifoan Dios icoinra huanifo. Ascan nan unuhuan anunifo isca huaquin, —Unuhuan Oshinran, —ishon anunifo. Ascashon nan unuhuan oshin pocufainifo. Upa Diosin unuhuan nushmancayan mai muto sharacoin ato huashoriscatanaino Israelifoan pocufainifoanno ato cachiori Egipciofoan ato rutupaiquin ato mufainifo. Arifi ato futan pocupaicain. Ascashu man nushmancayan caiyainfoan Diosin atoqui unuhuan tiintanaino asai futsunifo.

³⁰ Ascashon Upa Diosin Israelifo yononi pushurasi ahuun anu Jericó cachiori sieté oshatan tarati huayacunonfo. Nan pushurasi cachiori toquiri cunu fasi cuyacoin masoa cunuacua ini. Ascan Israelifoan ahuun unutan cahuacuainfoanno nantifi toquiri sapa cunuacuafu paoinquiran ishon Diosin ato yoini. Ascacun nan Diosin ato yoiac cuscan icoinra huafon nansacoian cunufu paoinqui futsunifo.

³¹ Ascan nantifi Jericó anoafu nai futsunifo. Ascafia nan Rahab ainfo furoma fusti ahuun yorafoya nanima. Ahuun caifoancái Dios icoinra huanifoma. Arus fusti Dios icoinra huacoinni. Ascan Jericó anoafu aton toquiri cunu paoincainima. Israelifoan ato niaifo Josué onanti huamisi rafu Jericó ano ato nichini atohuunoa tapishquin. Nan onanti huanmisi rafu Rahab ahuun pushu muran ato iquimani ato shara huaquin. Ascacucái ahuun caifo rutucaquin Rahab rutunifoma.

³² ¿Ascán ahua futsamun un mato yoiatiroquin? Yora ichapafuonri Upa Dios icoinra huapaonifo. Nanfohuunoa un mato yoiatiroquin un mato yoiatiroquin. Nan Gedeón non Barac non Sansón non Jefté non David non Samuel non Israelifo Dios yoiac cuscan yoiatiroquin futsafuonri un mato yoiatiroquin un mato yoiatiroquin.

³³ Ascashon nanfoan Dios icoinra huacashon ahuun ranushumafu yononifo ato noicasmaifo rutunonfo. Ascacun ato noicasmaifo rutufu finonhunnifo afanan ato ahusca huanonfoma. Atirifi niaifo ishon ahuun yorafo cushusharapaoni isharanonfo. Diosin ato yoiatiroquin cuscan ficutunifo. Ascancocai nan icoinra huamafuon ato masharofu muran potafiacun Diosin masharofu cotushcuru imano ato ahusca huanonma.

³⁴ Ascan atirifi niaifo chacapán futsafu yonocun ato chi uru muran potamafuonri Diosin ato cushushara coinni coononfoma. Atirifi ato nopun rutupafuonri tsoan ato anima. Ascancocai shaca fuacai isininfiainfoan Diosin ato mutsismani. Ascancocai nan ato noicasmaifoan ahuun ranushumafu atoqui fufuainfoan nanfoancairocon Diosin curushuunshon ato ichonifo ato ahusca huanonfoma.

³⁵ Ainfofoanri Dios icoinra huacun aton yorafo man naafiainfoan Diosin ato funimani afanan ninonfo. Ascancocai futsafuonri Dios icoinra huacoinnafoan nan icoinra huamafuonri ato omitsisca huanifo nan naifotian. Ascashon ato yoiatiroquin isca huanifo, —Man Upa Dios potaiton non mato ahusca huaima man casharatanon. Asca man Dios potayamaiton non mato rutuiran, —ishon ato yoinifo. Ato asca huafuainfoancái tsoan Dios potapainima.

Ascacun ato rutunifo. Ato rutuafotaima shinanquin isca huanifo, —Noco rutufiafo Upa Diosin samamashta noco funimatiro non afu ipasharanon, —ishon shinannifo.

³⁶ Ascano icoindra huaa futsafoquiri atoqui cashu mutsamacain fichi ato coshafain atirifi cunopan munushfain onushfain ato cunu muran iquimanifo.

³⁷ Ascashon atirifi toquirinin tsacaqui ato rutufain atirifi nisatinin ato shatufain nopurifi ato rutunifo. Atirifi ahuuomafaoan chashoanun fichi sahuuti huasho sahuunifo. Ato omitsisca huaquin nansca huanifo.

³⁸ Ascashu tsoan istaipama ano yafi machi ano non mahua quini muran non mai quini muranri iquifaifainifo. Ascan nan icoindra huafoan icoindra huamafo shara huafishon copiquiri ato fasi chaca huafafaipaoanifo. Ascan sharafo cutsi Diosin ahuun yorafoya ato ima.

³⁹ Ascashu nanfo omitsiscafiaquin Dios icoindra huacoimpaonifo. Ascacun Diosin atohuunoa yoiquin isca huani, —Nafoan ua icoindra huacoinnafo. Ascacun un atoqui fasi unimacoinni. Omitsiscafiaconi fasi isharocoinmisiforan, —ishon Diosin atohuunoa yoini. Ascafiaquicai Diosin ato yoiyoni cuscan tsoan fiatai inima.

⁴⁰ Ascashon Upa Diosin ato manamayopaoni. Ascacun norifi non icoindra huashu non atofu Jesús icari nocoshquin. Nantianri yora fusti cuscara non iishquin a cuscara shara noco imaino. Ascano unimaquin nanfocai no fu ahua futsa afanan yopapacunacafoma.

12

Non Jesushuunoa shinanfafainon

¹ Ascan noco shuni ichapafohuunoa rama non nica. Nanfoan Dios icoindra huapaonifo. Ascacun norifi non atohuun caononcahuun. Ascashon ahuarashta noco nitumapaiyai cuscan nanfo non cachiquiri huacoinnon. Ascatan ahuaa chacafaoanri samamashta noco curushcain chaca huamapaitiro. Nanfori non cachiquiri huacoinnon Diosin noco amapaiyai cuscan fustisi huashquin. Ascacun funaquima non ashofafainon.

² Ascacun non Jesús fusti shinanfafainoncahuun. Nanfin noco Ifocoin noco tapimamisi-coinquin. Ascan nanton noco ismaquin tau huani ahuaa ahuuscarafiaino non Dios icoindra huacoinnon. Ascashon Apa yoia cuscacoin huacoimpaoni. Ascacun norifi non ahuun caononcahuun. Ascashon nan mastacaquin yorafoan ointaifi rafini huanifo. Asca huafiaifoanno fasi omitsiscafiaquin tunucoinni manmain tapiashu chipo nocon Numamisi icain. Nanscara tapiashu fasi unimacoinni.

³ Yora chacafaoan fasi chaca huafiaifaoan tunucoinni. Ascashu nocohuunoashu omitsiscaini cuscan man shinanquicai matorifi omitsisca huaifotian man shinanachacayamafain man ointi mutotiroma. Ascaquicai Diosin mato amapaiyai cuscan man unutiroma.

⁴ Curushcain maton nomuranshon man chaca shinanquin man potapaifainmisi ointiaquimashon chaca huashquinma. Man asca huafafainaino Jesucristo nocohuunoashu naani noco chaca soashoshquin. Ascan mancai ascamisima. Ascatarocon shafatifi curushcain man chaca shatufiashucaí Jesús ini cuscan tsoa nataima.

⁵⁻⁶ Ascafia nan noco yoia cuscacoin non ayamaiton oinquin Upa Diosin nocohuun noiquin noco onaintimatiro noco tapimashquin. Ahua futsa shinantama nancairocon non tanasharanon. Ascashon nantifi ahuun yorafo ato nansca huashoan. Ascacun nanfoan tapinonfo Diospan facufocun. ¿Man man ointiaquimanamun Diosin maton nomuran unimamapai man ahuun facufocun mato tapinonfo? Ascan ahuun tsain cununi isca huaquin,

“Uhuun facushtan unfin min Ifocoinquin. Ascacun un mia onaintimai min tapinon afanan mian tanasharanon. Ascacun nan mato onaintimaitian tapicahuun afanan ascashcaquima. Mato asca huaitian mato nomuran shinanachacayamacahuun. Mato cayacaficoín tapimapaiquin,”

ishon cununi.

⁷ Upa Diosin mato tapimapaiyai cuscan funaquima tapicahuun. Ascashu omitsiscafiaquin shinanachatarocon tunucoinahuun. Ascano omitsiscaquin man tapitiro man Diospan facufo. Apafoan ato facu tapimatirofo cuscan nanscarifiaquin Upa Diosin noco cayacafi tapimani. ¿Rato facumun apan onaintimatiroquin tapimashashquin?

⁸ Nantifi facufoan aton apa ato onaintimaiton man muumisifo. Nanscarifiai Upa Diosin noco tapimayamainocai non ahuun facucoín iyamacain nonricai ahuun yoracoinfo itiroma.

⁹ Nocon upafoan non facufocun noco onaintimapaoni. Ascacun non atohuunoa shinansharafain nonrifi ato nicacoimisi. Ascan nocon Upa Diosin noco onaintimaiton non tunuquin finacointiro. Ascashon noco tapimapaiyai cuscaín non fasi unimacain non isharatiro.

¹⁰ Nocon upafoan afi shinanshara cuscan aton facufo onaintimamisifo a nicasharanonfo. Ascan non yosiatiancai afanan noco asca huamisima. Nanscarifi aqui Upa Diosin cayacafi fustisi shinanquin noco shara huapaiquin noco onaintimamisi non a cuscara shara inon.

¹¹ Nan icon noco onaintimaitiancai non musharatiroma. Non isincoin mui non pashapaitiro. Ascashiashon chipo ointi nocoshon non shinantiro Diosin noco tapimasharapaiqui nocon nomuran unimamafain Furun Jesús cuscara shara noco imai.

Non Dios nicacasmai fasi musucoin

¹² Ascacun ahuara ahuuscarafaino shinanchacayamacahuun. Upa Diosin mato tapimapaiyai cuscan nan fusti tapicahuun. Ascashon Jesús tanaquin unupaitama nicasararafaincahuun. Ascatari ahuun tsain sharaquin mutoyamacahuun.

¹³ Ascashu cayacafi isharacoincahuun Jesús tanasharashaquin. Man ascaiton oin nan icoinra huasharafoma matohuun caopaitirofo Jesús cuscara shara iisharashaquin.

¹⁴ Ascacun fochishmanantanapaimitarocon nantifi yorofo fu isharapaifaincahuun. Ascatari Jesús cuscara shara ipaifaincahuun. Ascan tosa Jesús cuscara shara iyamaino nantocai nocon lfo oinnacama.

¹⁵ Upa Diosin nocohuun ramapaiquin Furunhuunshon noco shara huafafainmisi. Ascacun oinfain Diosin noco shara huapaiyai cuscan huafafaincahuun funoshcaquima. Ascatari oinfain mato ointi mutoyamacahuun. Ascan mato nomuran man mutocacaiquin futsafori man chaca huamatiro arifi nanscara inonfo.

¹⁶ Ascatan maton ahuinma fu iyamacahuun. Ainfofoan maton funuma furi iyamacahuun. Ascashon Diosin mato inanpaiyai cuscan fiicasmaquima nancairocon fiicahuun. Ascashu Esaú ini cuscan ayamacahuun. Aatocai Diosihuunoa shinanpaonima. Diosin Esaú inansharapaifaiton fasi fonicoinquin ahuun ushto inanni ahuun rafanan tushu fiishquin. Nan paii fustihuunshon nantifi Diosin inanpaiyai cuscan funocoinni. Ascacun marifi ascayamacahuun.

¹⁷ Man man tapia apa inansharapaiyai cuscan fipaiiaquin finima. Ascashon apa yocaquin isca huani, –Upashta, mian inanpaiyai cuscan ua inanpun, –ishon uaishofaitocai inannima man main chipocuton fiamacun. Ascacun oinfain Diosin mato inanpaiyai cuscan maton chaca man shatuyamashu marifi man Esaú cuscara itiro. Ascashon Diosin mato inanpaiyai cuscan man funocointiro.

¹⁸ Upa Diosin noco shunifo yononi cuscacai mato yonomisima. Ato yoini machi ahuun anu Sinaí tunanman fotanonfo. Nannoshon ahuara futsa ato yoishquin. Ascashu nan ato yoia cuscan nocoafono Upa Diosin oi uhuapacoinin ato yoinquin isca huani, –Nan machi ano mapuyamacahuun. Man mapuashu man nariscairan, –ishon ato yoini.

Nantianri nan machi ano chi urumanhuan oinfain shafatafia nannori faquishihuancoincain ninhuunhuan yafi cana piishcain

¹⁹⁻²⁰ manuti fasi chaan chaan icain Diospan ahuun oi uhuapacoinin ato yoiai cuscan nicacani fasi ratucoinnifo. Ascacun Moisés yoinifo isca huaquin, –Non afanan Diospan oi nicapaima. Ipaishoma non nariscatiro. Ascan Upa Diosin noco yoiquin isca huaa, “Mato inafó machi ano mapuaifoan toquirinin tsacacahuun naanonfo,” ishon noco yoia. Ascacun Dios yoihuu noco yoipaiyai cuscan noco yoitama miarocon yoiquin tau huanon. Min chipo noco yoitiro. Aafin noco yoiaino non nariscatiroquin, –ishon Israelifoan Moisés yoinifo.

²¹ Moisés arifi oian cuscan ato yoini isca huaquin, –Urifi un fasi ratucoin taritari iquinran, –ishon yoini.

²² Ascafia mancai Dios fu tsainpai na machi Sinaí ano man oima. Ascataman nan machi Sión ano man cai. Nan Jerusalén futsa Dios icari. Ascan nan Diosin ipamisi. Nannoashu ahuun oinmati afu nai muran imisifo ichanancashon Dios shararan huafafaincani. Nan ahuun oinmatifocai tsoan ato tanan huatiroma fasi ichapacoinfo.

²³ Nannori nantifi Jesús icoinra huafu afu icafo. Ascan nan Dios icari aton anufo cunupacaa afu ipanonfo. Ascacufin marifi man Diosiqui oaqin. Ascan nanton yoishquin ratotomai icoinra huacoinnashu afu ipanaca iyamarai icoinra huamisimaquin. Ascashu icoinra huashuma afu ipanacama. Nan icoinra huafotisi ato a cuscara shara imai chaca huamisima cuscara inonfo.

²⁴ Ascan man man Jesusqui fua. Nanton noco nashoantaimacai tsoa futsan noco nashonima. Ascacun natian ahuunoashu non Dios fu ipasharatiro. Nocon shuni Cain ahuun ushto Abel rutuni. Ascacun Upa Diosin Caín yoini isca huaquin, –Cain, ahuuscaquimun min ushto rutuaquin. Natian un mia curushcai onaintimairan, –ishon Diosin yoini. Ascafia Jesús rutuai fotiancai anori yoinima. Afimain nocohuunoashu naiton noco chaca soashoshquin. Ahuunoashu non Dios fu ipasharatiroan ishon noco yoini.

²⁵ Ascacun ¡Oinfain! Diosin mato yoipaiyai cuscan nicatimayamacahuun. Nan mai anoshon nocon shunifo Moisés ato yoini cuscan nicayamaifoan Upa Diosin ato onaintimani. Ascashu na mai anoashu Moisés noco cuscara cainni. Ascan Jesuscai ascarama. Apa Dios icariashu nocoqui fotoní. Nanton noco yoiaí cuscan non nicayamaino fasi musucoin. Ascan non Furun nicayamacaiyaiton Upa Diosin noco onaintimaquin finacoin.

²⁶ Ascan Upa Diosin Moisés yafi noco shunifo machi Sinain anoshon ato yoiaitian ahuun tsainmansi mai nayanaiyaimani. Ascashori yoini isca huaquin, —Chipocai un mai fustisi nayanaiyaimaima. Un mai yafi nairifi fasi curushcai un nayanaiyaimairan, —ishon Diosin yoini.

²⁷ Ascacun nan noco yoini cuscahuunshon non tapitiro nan ahuara ipatirofoma Diosin nanfo cuyoriscatashquin afanan ahua inonma. Ascan nan ahuara Diosin imapacunacafu fusti itiro.

²⁸ Ascataricai Diosin icari mai nayanaiyaitiroma. Nannoshocai ahuashta non chaca finotiroma. Ascashu nanno non afu ipasharatiro. Ascacun non Diosin aicho huafafainon. Nantonfin ahuamamishiti huatiroquin. Ascacun ahuunoa non shinansharafain non cuffafainon. Ascashon noco amapaiyai cuscan non ashoino nocoqui Upa Diosin fasi unimacoinshquin.

²⁹ Ascan man man tapiari nocon Diosin nan chi urumanhuan cuscara. Ascan tsoan ahuun tsain shara cachiquiri huacoincun Diosin ato chi urumanhuan muran potashquin amurannoashu omitsiscapanonfo.

13

Ahuuscashomain non Dios unimamatiroquin

¹ Manfin Cristo ahuun yorafoquin. Ascashu noinanfafaincahuun.

² Diospan yorafo mai futsa ariashu matoqui nococun ato shara huacahuun. Ascan futsafoan Diospan yorafo atoqui nococun oinyamafiamisishaquin ato shara huaquin tapinifoma nanfo Diospan oinmati afu nai muran icafofiacun.

³ Nan cunu muran iquiafo shinancahuun. Ascashu atohuun ramapaicoincahuun. Marifi atofu cunu muran iquimamua shinantsa acahuun. Futsafo Jesushuunoashu omitsiscacoinnafo nanfohuunri ramapaicahuun. Ascashu marifi atofu omitsiscamuai shinantsacahuun.

⁴ Nocofunufaoan maton ahuininfoya noinancahuun. Ascashu shinanmasharatanancahuun. Ascatarí maton ahuin non maton funu fusti fu icahuun. Ascafia ratoran futsa aton ahuinma non aton funuma fu icaifoan Diosin nanscarafu ato onaintimashqui.

⁵ Pui noiyamacahuun. Man aya cuscan fustia unimacahuun. Upa Diosin yoini isca huaquin,

“Uncai matomaqui ipayamacai uricai mato potanacamaran,”

ishon yoini. Ascacun nan tapiashu non fasi unimacointiro.

⁶ Ascan iconcain non yoitiro isca huaquin,

“Un ahuara huaiton uhuun Ifoan uari ashomisi. Ascacufin un ratuima. ¿Upa Diosin ua cushuainocai nocofunufaoan ua ahuusca huatiromun?”

ishon non yoitiro.

⁷ Dios fu tsainti pushu muranshon Diosin tsain yoimisifoan mato yosinifo cuscan atohuunoa shinancahuun. Nanfoan futsafo shara huafafainmisi. Ascashon fasi noco Ifo Jesús icoinra huamisifo. Ascacun atohuun caocahuun Jesús tanasharafafainshcaquin.

⁸ Ascashu Jesucristo ipaoni cuscan natian icai cuscan yafi ishquiai cuscari nancai fianananpacunacama. Nanscasipacunaca.

⁹ Ascan atrififoan mato amaquiri yosipaicani. Tsoancai anori nicayomisima cuscarafu mato yosipaicani. Ascacun ato tanayamacahuun. Mato yosipaicani isca huaquin, —Nocon shunifoan noco yononi cuscan non nami futsafo piaino nocon nomuran noco shinanmasharatiroman, —ishon mato yoimisifo. Ascafiai tushucaí nocon nomuran noco shinanmasharatiroma. Ascataka Diosin noco noiahuunshon noco imasharatiro non a cuscara inon.

¹⁰ Ascacun nan non icoinra huamisi Jesucristo ihu coyan iquinanhuunoashu noco nashoni nocon chaca soashoshquin. Tsoan Jesuscairocon icoinra huatama nan Moisés yononi cuscan fustisi icoinra huafo. Nanfoancai no futan aton chaca soatirofoma.

¹¹ Ascan Moisés ato yononi cuscan ahuun yorafohuunshon Dios cuffimsi niaifon fusti nan cunu futsa ocu murancain iquipaoni. Nan muran inapan imi focun nan imi oinquin Upa Diosin ato chaca soashonon. Ascashon inafaoan ato caya pushurasi pasoato foshon coapaonifo.

¹² Nanscarifiai Jesús Jerusalén pasoatonoashu noco omitsiscashocai ahuun imi focai ahuun yorafohuunoashu nani nocon chaca noco soashoshquin non a cuscara shara inon.

¹³ Ascan norifi Jesús ipaoni cuscan non anoncahuun. Ascashon ahuun yorafoan nan potanifo cuscan huaquin nocorifi noco yorafoan noco potatiro. Ascashon Jesús roanifo cuscan nocorifi ahuunshon noco roatirofo. Ahuunoari shinanchacamisifo cuscan nocorifi ahuunshon noco huunoari shinanchacatirofo.

¹⁴ Nuno nan mai anoashu non omitsiscafiacuicai non shinanchacaima. Man nonmain tapiashu nuno nan mai ano non ipanacama. Ascatan man non tapiari chipo Dios icari nocoashu non afu ipashquin. Ascacun nan non manasharamisi.

¹⁵ Nocon shunifoan apaonifo cuscacai afanan Diosin fuchipaima. Noncai afanan inafo rutuima nocon chaca soashonano Upa Diosin nocoqui unimanon. Ascatarocon Jesús noco nashonihuunshon non Upa Dios aicho huai. Ascan non yoiquin isca huanon, —¡Aicho! Upa Diosin, min Furun Jesús uhuun Ifo. Ahuunshon un mia aicho huairan, —ishon non yoifafainon.

¹⁶ Yoiquin asca huatan yora futsafohuun ointiaquimayamacahuun ato shara huashquin. Ascan Jesushuunshon man yorafo shara huafain man aya cuscan futsan yopaiton man inanquin. Asca huaquifin man Dios unimamacointiroquin.

¹⁷ Ichhananti pushu anoshon maton Diosin tsain yoimisifo nicasharacoinfaincahuun. Ascashu mato yoiainfo cuscacoin acahuun. Nanfoanfin mato cushufafainiquin man Jesús tanasharanon. ¿Ascan nanfoanri tapiaro chipo Diosqui nocoifoan ato yoishquin isca huashquin, —Man man uhuun tsain ato tapimasharamisimun? —ishon ato yoishquin. Ascacun ato nicasharacahuun man ato nicasharaino unimanonfo. Ascan man ato nicayamaino aton ointi ihuu itiro. Ascashu marifi man funocointiro.

¹⁸ Nocori Upa Dios cufishocahuun. Diosin noco amapaiyai cuscacoin man non huamisiquin. Ascashocai nocon nomuran non ahua chaca shinainma. Non isharapai fusti.

¹⁹ Uarifi Dios cufishocapun matoqui ua samamashta nasomanon.

Ato Dios cufishotan ahuun tsain unutaqui ato yoini

²⁰⁻²¹ Upa Diosin nocon ointi unimamamisi nocon nomuranshon non ahuashta shinanchacanoma. Nocon Ifo Jesús nocohuunoashu man naafiacun Apa Diosin funimani. Nantifi finoanshu nocon Cushumisi shara inon. Jesús noco nashonihuunoashu non Upa Diosin ahuun yorafo ipashquin. Ascacun man ahua shara yopai cuscan Upa Diosin mato inantiro mato amapaiyai cuscan man anon. Furun Jesucristohuunshon nocon nomuran noco shinanmasharashu nocoqui unimacoinshquin. Ascacun nantififain non Jesushuunoa yoisharapacunaca. Nanscari inon.

²² Uhuun yoramishtichin un mato cunushona maton nomuran mato shinansharamashquin. Un mato chitoshta cunushona. Ascacun funaquima un mato cunushona cuscan ua nicasharacapun.

²³ Un mato tapimapai nocon yorashta Timoteo natian man cunu murannoashu man caian. Ascan samamashta uqui nocoashu u afu mato ari cai.

²⁴ Nantifi ichananfo maton Diosin tsain yoimisifo non cushumisifo non nantifi Diospan yorafo ua yoisharashocahuun. Italia anofoanri mato yoisharafo.

²⁵ Upa Diosin matohuun noiquin nantifi mato shara huashofafainon. Nanti.

Santiago Icoinra Huafo Cunushoni

Santiago ato tsain shara yoini

¹ Uhuun yoramishtichin man manifoti pashcananni. Unquian Santiago un mato yoi sharapai. Ascan un mato cunu fomai man tapinon. Upa Dios futan nocon Ifo Jesucriston un ato yonomatifin unquin.

Upa Diosin noco cayacafi shinanmasharatiro

²⁻³ Uhuun yoramishtichin ahua ahuuscarafiaino man shinanchacatamarocon man Jesús icoinra huaquin finacoishon funaquima man tunutiro. Man asca huaino Jesús mato imapaiyai cuscan man atiro. Ascan ahuafoan mato chaca huamapafiaino unimacoincahuun.

⁴ Man ascashu Jesús cuscara ahuun tanamisicoin shara man itiro. Ahua futsacai man yopaima isharashquin.

⁵ Ratoran man futsan man ahuashta tapishoma Dios yocacahuun mato tapimanon. —Ua fucashni huayamacahuun, —ishoncai mato Upa Diosin yoinacama. Man tapipaiyai cuscan nantifi unimacainrocon mato tapimashquin.

⁶ Ascan man Dios yocafiatan ointi rananya iyamacahuun. Shinanquin isca huayamacahuun, —Un Dios yoca cuscan ua tapimai iyamarai itsairaca ua tapimaimaran, —ishon anori shinanyamacahuun. Ascatama icoinra huacoincahuun. Tsoan icoinra huacoinyamashu nan futaan ihui focuatiro cuscan. Ascashu fuuhuanquin ihui focuacaiton non tapitiro ma raquiricaimain focuauicai. Nanscarifi aquin tsoan Dios yocafiaquin icoinra huacoinyamashon futsa futsa huaquin shinantiro.

⁷ Man ascaiton, —Nocon Ifoan noco ahuarashta huashoinran —ishon shinanyamacahuun.

⁸ Ascan, —Uncai tapiama Diosin ua ashoyamaraquinmain ua ashoicain, —ishon shinanyamacahuun. Ascarafocai Diosin ato ahuashta huashoshquima. Nanfoan ointi rananyashon futsa futsa huaquin shinanmisifo.

⁹ Ascan atrifi Diospan yorafo nan ahuuomafohuunoo icoinra huamafoan shinantirofo isca huaquin, —Nan ahuuomafocai ahuamaran, —ishon atohuunoo shinantirofofia nanfocaifin Diospan facufoquin. Ascásu na ahuuomafon shinantirofo isca huaquin, —¡Aicho! Unfin Diospan facuoinquin. Un Jesús yafi Dios fu ipashquiran, —ishon shinantirofo.

¹⁰ Nanscarifi ratoran Jesús icoinra huaa futsan mafo ichapayashon shinantiro isca huaquin, —Uhuun mafocai ua imasharatiroma. Urifi un Jesús fasi yopacoin uhuun Ifo inon ua imasharanon. Jesús ua numayamaino urificai un ahuashta itiomaran, —ishon shinantiro. Charo samamashta tsasiashu niriqui futsutiro. Nanscarifi yora mafo ichapaya samamashta natiro.

¹¹ Farin fanafo tsacaino samamashta tsasitiro. Ascashu niriqui futsutiro afanancai shara itiro. Nanscarifi nan mafo ichapaya ahuun mafo inanmitsapafiaino samamashta nariscái amaqui cachitiro.

Ahuara chaca non finonfianton Diosin noco tapipai nonmain tanasharquin

¹² Tsoan omitsiscafiaino tunucoianfin nanfin unimacoin itiroquin. Ascacun Upa Diosin ahuunoo yoiyoni isca huaquin, —¡Aicho! Mian nicasharafain niyoshon mian noimisi. Ascashufin natan min ufu ipatiroquin, —ishon yoini.

¹³ Tsoancái yoitiroma isca huaquin, —Un chaca huapaiyai cuscan Upa Diosin afin ua chaca huamapairan, —ishocai yoitiro. Tsoanshtaricai Dios chaca huamatiroma. Arificai tsoa chaca huamapacunacama.

¹⁴ Ascatarocon ratoranfoan chaca huapaiyai cuscan atohuun nua. Afin ahuun nomuranshon chaca huapaiyai cuscan nanscacoín huatiroquin.

¹⁵ Un mato ahua futsa yoi. Tau huaquin nocofunun ainfo facu nanumana. Funainquimashta ahuan shaqui murannoashu yosiacutiro. Caiyaintian facu caintiro. Nanscarifi aquin tau huaquin nocon nomuranshon non ahua chaca shinanfakitiro. Ascashon chipo non chaca huatiroquin. Ascatan chaca huariaicai non Dios fu rafutiroma. Nocon chacahuunooashu amaqui non ipanaca.

¹⁶ Ascacun uhuun yoramishtichin mafiri paramuyamacahuun.

¹⁷ Nocon Upa Diosin nai muran ifiashon nuno mai ano noco shara huashofafaini. Nantofin nantifi noco oni huashosharaniquin. Fari non oshu non fishifo non nantifi chashaifoti Upa Diosin onihuani. Ahua shara futsaforifi nantifi noco onihuashoni.

Noco shara fustisi onihuashoni. Nanscarifiai fari tsacaino nocon yoshin samamashta fiananantiro. Asca Diosincai fianananpacunacama. Ascataricain ointi rananya ipanacama. Nanscasipacunaca.

¹⁸ Upa Diosin noco catonni ahuun tsain iconcoihuunshon noco cainma futsa a cuscara shara non inon. Nonfin Jesús icoinra huaquin tau huaniquin. Ascashu Diosin nantifi onihuanifotihuunoashu non ahuun facu iyoa cuscara.

Diosin tsainfin cayacaficoiquin nicashu nanscacoicahuun

¹⁹ Uhuun yoramishtichin un mato yoi ai cuscan nicasharacahuun. Futsan mato ahuara yoiaiton funaquima nicasharayocahuun. Tsain ichapa yoimisi iyamacahuun. Samamashta sinayamacahuun.

²⁰ Upa Diosin Furun cuscara shara noco imapaifaino non sinaitocai noco imapaiyai cuscan noco imatiroma.

²¹ Ascacun ahuara chaca maton nomuran man shinanmisi cuscan huafain ahuara man chaca huamisifori shatucahuun. Ascatan Diospan tsain mato nomuran man nanushon. Mato yoini cuscan nicasharacoincahuun. Man Diosin tsain nicasharashufin man afu ipasharatiro.

²² Diospan tsain nica fustiquima. Nan cununi cuscacoin acahuun. Man nicafiai ascayamashufin man mafiri paramuiquin.

²³⁻²⁴ Futsan ahuun fuso fuisitinin oinfiashu samamashta oian cuscan ointiaquimai. Nanscarafiai man Diosin tsain oinfiashu nan oian cuscacoin aima. Ato yononi cuscan man tapifishucaai ascacoianfoma.

²⁵ Futsafocai ascarama. Diosin tsain shara fustisi oinsharashu nan yoi ai cuscacoiaino. Shafatifi Diosin tsain tanacoiancai ahuara futsa afanan ahuun ifo itiroma. Ascashu ishara fusticoincain ahuun ointi unimatiro.

²⁶ Ascan tsoan yoiquin isca huai, –Unfi Diosin tsain nicacoinmisiquin, –ishon anori yoifiaqui tsain chaca yoiquin shatuamashu nanscara yorafin afiri paramutiro.

²⁷ Ascafia nan facu uhuamacoifno yafi ainfo funuomafo non cushusharaicai. Nan icoinra huamafoan acaifo cuscan non huaima non ascaino Upa Dios nocoqui unimai.

2

Nantifi yorafohuunoa nannorifosi shinansharacahuun

¹ Uhuun yoramishtichin nocon Ifo Jesucriston Upa Diosin cuscaracoin. Nanfin man icoinra huamisiquin. Ascacun yorafohuun nannorifosi shinansharacahuun. Nan man futsafori shara huamisi cuscan huafainri futsafohuun shinanchacayamacahuun. Shara huacahuun.

² Itsairaca nocofunu mafo ichapaya matofu ichanainno anio chashna shara sahuufain sahuuti sharacapacoin sahuufain matofu ichanantiro. Ascan nantiantari nocofunu ahuuoma sahuuti chocashta sahuuashu arifi matofu ichanantiro.

³ Ascaiton nan nocofunu mafo ichapaya samamashta man yoitiro isca huaquin, –Uhuun yorashtan, nuno tsaoti shara ichananti pushu muran tsaoyohuun, –ishon man yoiaino nantianri ahuuomashta nocotiro. Ascashon man yoiquin isca huai, –Min cachiori nitiroran huayamaraquin tapa camaqui tsaohuu, –ishon man yoiquin chaca huai.

⁴ Man asca huaquicai yorafohuun nannorisi man shinainma. Ascaquin man chaca shinain. Nan yora mafo ichapaya man shara huafiaquicai yora ahuuomashta man chaca huamisi. Ascaicai mafi ranan man nannorifosi shinanainma.

⁵ Ascacun uhuun yoramishtichin ua nicasharacapun. Un matohuun noicoishon un mato cayacafi shinanmasharapai. Yora ahuuomafohuunoa nan icoinra huamafoan shinanmisifo isca huaquin, –Nan ahuuomafocai ahuamaran, –ishon shinancani. Upa Diosincai atohuunoa anori shinainma. Nanfifin yora ahuuomafocatoan Jesús icoinra huacoinonfo. Ascacun nan ahuuomafocan Upa Diosin noicoiainfoan ato yoyoni cuscan nantifi ahuunafori atona iishquin.

⁶ Nannori Diosin yoifiano mancai ahuuomamishtifo sharacoin huamisima. Shinan-capon. Nan ahuuomafocan mato chaca huamaforocon nan mafo ichapayafoan mato paramisifo. Ascashon mato curushcain ranushumuafocan aton niaifocoin ano iyomisi.

⁷ Nanfoanrifi nocon Ifo Jesusqui tsain chaca huamisifoquin.

⁸ Ascan nocon Niaifocan Diospan noco yononi cuscan man ashufin man cayacafi ishara tiroquin. Noco yononi isca huaquin, –Mafiri man noimuai cuscan huafain futsafohuunri noicoicahuun, –ishon Diospan noco yononi.

⁹ Ascafia man asca huatamarocon nan mafo ichapayafofosi man shara huamisi cuscaicai nan ahuuomafo man shara huamisima. Man ascaicain Diosin yononi cuscan man aima. Ascaquifin man chaca huai.

¹⁰ Ascashon mancai shinanquin isca huatiroma, –Diosin noco yononi cuscan atirifi un nicacointiro. Asca fustishtacai un tanapaimaran, –ishon anori man shinainno yoitima-coin man itiro. Ascashu nantifi Diosin yononi cuscan man nicacasmai cafiscatiro.

¹¹ Upa Diosin yononi cuscan, –Nocofunufao aton ahuinma fu iyamaifoanno ainfofori nanscarifi aton funumafo fu itromaran, –ishon yonofain Diosin yonoquirifi isca huani, –Tsoa rutuyamacahuun, –ishon noco yononi. ¿Ashashon maton ahuinma iyamaraiyainfo-forifi maton funuma fu iyamafiacashon man futsa rutua nanmun shara? Ma. Man futsa rutuacai Diosin noco yononi cuscan man aima. Ascashu man yoitima itiro.

¹² Diosin noco yononi cuscan noco imasharapai afanan ahua chaca noco Ifo itama non afu isharacoincacainon. Non chipo Diosiqui nocoaiton noco yoishquin nonmain nicasharamisi iyamarai nonmain nicacasmamisiquin. Nannori noco yoishquin. Ascacun oinfain. Shinansharafain isharacoincahuun.

¹³ Ascashon Diosin nantifi yorafo puashoshquin. Ascan niyoshon man futsafohuun ramapaipaonimacun Diosiri matohuunri ramapaishquima. Ascan niyoshon man fut-safohuun ramapaipaonicun Upa Diosin matohuunri ramapaishquin. Ascashocai mato onaintimaima. Ascatama manrocon afu ipasharatiro.

Tsain fustisi yoicaquima nan man yoimisi cuscacoin acahuun

¹⁴ Uhuun yoramishtichin un mato yoisharapai. Man futsafo yoiquin isca huamisi, –Un Jesús icoinra huairan, –ishon yoiflashocai futsafo man shara huamisima ipaitsicoim man yoimisi. Un Jesús icoinra huairan ishon yoiflashu maton nomuracai fiananancoianma. ¿Nanscarafu Dios fu ipatiromun?

¹⁵⁻¹⁶ Natian iscara un mato tapimapai man tapisharanon. Itsairaca mato yorahua sahuutiromacun tushuomacuri oinquin man yoitiro isca huaquin, –¡Aicho! Uhuun yorash-tan Diosin mia shara huaiquin. Sahuuti shara sahuuhuu matsinashquima. Ascatari pisharahuun. Un chipo mia shafa futsan oinshquinon. Casharatahuun, –ishon yoifiaqui yopai cuscan man inanyamaino nancai ahuama. Mancai ashosharama.

¹⁷ Nanscarifi aqui man yoiquin isca huai, –Un Jesús icoinra huairan, –ishon yoifiatan man futsa shara huayamaino acai ahuama. ¿Tsoanco mato icoinra huatiromun a man Jesús icoinra huacun?

¹⁸ Itasai raca futsan yoitiro isca huaquin, –Min Jesús icoinra huai min ahua futsa yopaima Upa Dios fu ipashquin, –ishon yoitiro raca. Ascafia man futsafo shara huaya-macun tsoancai tapitiroma man Jesús icoinra huua. Unfin Upa Dios yonoshona cuscan nantiffain man ointiro un Jesús icoinra huacoinnamainquin.

¹⁹ Nan Dios fustifin man icoinra huamisiquin. Nanfin sharaqin. Ascan yoshin chacafoanri man tapiafo Dios fusticoim. Ascashu fasi aqui ratucoinani tari taricani.

²⁰ Man ratoran futsan icoinra huafashon Diosin yononi cuscan man ayamashucaí man-cai ahuama. Ascan Diosin yononi cuscan man ayamashucaí man icoinra huacoinnama. Tatimafafainyamacahuun.

²¹ Shinancapon. Upa Diosin nocon shuni Abraham yononi cuscacoin ani. Ascashon nicasharacoincun Diosin yoini, –¡Aicho! Un mia yoia cuscan min aa. Min fasi shararan, –ishon yoini. Diosin yononi cuscan Abraham ahuun furun Isaac rutucuan Dios inanshquin.

²² Abrahamfin Dios icoinra huafain yoia cuscan aniquin. Diosin yoini cuscan huacoinshon non tapitiro a icoinra huacoinshon.

²³ Icoinra huacoincun Upa Diosin ahuunoa yoini, –Abraham minfin sharacoinquin. Ascashu min ufu isharatiroran, –ishon yoini. Diosin Abraham yoiniri, –Abraham minfin ufu rafusharacoimisiquin, –ishon Diosin yoini.

²⁴ Ascashon man tapitiro non icoinra huua fustihuunoashucaí non Dios fu ipatiroma. Non icoinra huacoinfain noco yoia cuscan acoinnashu non afu ipatiro.

²⁵ Nanscarifiai nan ainfon furoma ahuun anu Rahab. Nan Israeli rafu Rahab ahuun caifoan pushurasi muran noconifo ahuu cuscaramainquin tapipaicani. Ascashu chipo Rahab ahuun pushu murancoin iquinifo. Ascacun nanton ahuun pushu muran nocon caifo rafu onuni ato ahuusca huanonfoma. Ahuun pushu muranshon ato fai futsan nichini ahuun caifo futsafoan ato fuchinonfoma. Upa Diosin Rahabhunoari yoini, –Min ua icoinra huashon nan rafu min shara huua. Ascacun un mia imasharairan, –ishon Upa Diosin Rahab yoini.

²⁶ Afanan un mato iscara tapimasharanon. Nocon furo yoshin nomaqui caanofin nocon caya natiroquin. Afanancai shara itiro. Nanscarifi aqui non Diosin icoinra huafashon noco yononi cuscan non futsafo shara huayamainocai nancai ahuama. Non ascaicai non shara itiro.

3

Nocon tsainhuunoa cununi cuscan

¹⁻² Uhuun yoramishtichin un mato ahuaara futsa yoinon. Maton muranfin tapimamisi fustirasi itiro. Nantifinton man non ahuaara amaquiri chaca huafafainmisi. Ascafia Diospan tsain tapimamisifoan amaquiri yosicun Upa Diosin ato onaintimaquin finacoinshquin. Ascan nan ahuaara chaca yoimisisima nancaifin isharacoinmisiquin. Ascashu shara fustisi itiroquin.

³ Un mato afanan ahuaara futsan tapimapai. Nan caballo ahuun cunopan anushushon fichiqui rusfi chichishon cayacafi casharai canon non ninifoanfaiiro. Caballo uhuapacoinfiacun nan ahuun anushumutinin uhuapamashtacoinfiashon nan non niniaiquiri catiro.

⁴ Shinacapon. Shashohuan uhuapafiacun ahuun chifishtati uhuapamashtafishon nan non iyopaiyaiquiri iyotiro. Fuuhuanun shashohuan catima huafiatiro ahuun chifishtatinin nan non iyopaiyaiquiri iyotiro.

⁵ Nanscarifiai nocon ana uhuapamafishon nocon tsainmanri non futsafo fasi chaca huatiro. Nofiri non chaca huamutiro. Ascan parito ushu uhuapamashtacoinfiano mau uhuapacoin cotiro.

⁶ Nanscarifiai nocon ana uhuapamashtacoinfia chi cuscara. Nocon tsainhuunoashu nofri non chaca huamuointiro. Ascashucui non afanan isharacointiroma. Nocon tsainhuunshon non nantifi chacana huatiro. Yoshin chacahuunshon non ahuaara chaca yoitiro futsafori omitsiscamashquin.

⁷⁻⁸ Asca yoina futsa futsatapafo yafi puiyafon non mupash cuscara non unu muran icafori non onaonma huatiro. Ascafia noco anancai tsoanshta non onaonma huatiroma. Ascashon nocon tsainman non chaca futsa futsatapafo yoitiro. Nocon tsainfin nan rono pau cuscaroquin. Nocon tsain chacahuunshon non futsafo namatiro.

⁹⁻¹⁰ Nanhuunri nocon Ifo Upa Diosihuunoa non tsain shara yoitiro. Nantofin yorafo onihuaniquin a cuscara inonfo. Ascafia nan noco anari non futsafo tsain chaca yoimisi. Nanhuunri non tsain shara yoitiro. Ascacun uhuun yoramishtichin ascaramafinquin.

¹¹ ¿Unu rufuquinuashu tsoi afainocai unu saoya ositiro mun? Ma. Ascaracai itiroma.

¹² ¿Uhuun yoramishtichin non manian fanamun shopa foaitiro? Ma. Ascaracai foaitiroma. Non ahuaara fanafin nanscaracoin foaitiroquin. Nanscarifiai unu rufuquinuashu afainocai sao ya afatiroma. Ascatari tsain shara yafi chaca ositiro.

Diosin noco iconcoi shinanmatiro

¹³ Tsain futsari un mato yoinon. Nan mafi ranan man cayacafi shinanmumisi cuscan. Futsafori man ashosharamisi. Ascashon man ato ismasharatiro. Tsoa chaca huamisima nan Diosin yonoaiyai cuscan fustisi huamisi. Man ascaiton nantiffain ointirofo man Dioshuunshon cayacafi shinansharacun.

¹⁴ Ascan man isharatamarocon maton nomuran fucashcoi icain futsa aya cuscan fipaifain man shinanchacafain mafi man apaiyai cuscan fustisi futsafo yonoquin. Anori shinanquin isca huayamacahuun. —Un Diosin tsain tapicoian. Un ahuun ointi cuscaracoinran, —iyamacahuun. Anori yoiquifin man futsafo paraincain maton nomuran man chaca shinain cuscan fusti huafain man ato fomanpai. Ascashufin man cacapaimisicoi-foquin.

¹⁵ Anoricai Upa Diosin mato tapimamisima. Jesús icoinra huamafoan shinanchacamisifo. Man ascashon Satanás yoshin chacapan mato amaquiri shinanchacamamisi.

¹⁶ Isca huaquin mato shinanmatiro. Futsa aya cuscan fipaifain futsaqui shinanchacafain mafi apaiyai cuscan fustisi shinanfain futsafo matohuunoa man shinanmapai ato yonoshquin. Ascashufi man cacapaimisifoquin. Man ascainfasi man fochishmanantanantiroquin. Ascaquin man ato fucash huatiro chaca futsa futsatapafo huaquicai tsoan cayacafi shinantiro.

¹⁷ Ascan Upa Diosin cayacafi shara shinanmisi cuscan matori shinanmapai isca huaquin. Maton nomuran shinanshara fustifain futsafo fu shara huatanancain fochishmanantanapaitama futsafo shara huashofain futsafoan mato yoia cuscan nicasharafain futsafo shutiacufoanpayamafain futsafohuun ramapaiquin ato shara huashofainmisi icain, nantifiton nannorisi shinansharafain ointi rananya iyamacain fomanpaimisiri itamarocon cayacafi fustisi yoimisi.

¹⁸ Ascashon nannorifosi man shinainno futsafori man shinanmasharatiro isharacoinnonfo Jesús cuscara shara ishcaquin.

4

Icoinra huamafoan apaiyai fo cuscan noiyamacahuun

¹ ¿Ahuuscain mafi ranan man fochishmanantanantiashu man sutunainmun? Maton nomuran shinanchacashufin man ascaicain. Chaca fusti fuchipai.

² Man ahuafo fuchipai fiaquicai man fitiroma. Ascashon fasi fuchipaiquin man futsa rutupaitiro fianpaiquin. Ascashu man fochishmanantanain tsain isininpaton man iquinonain. Ahuafo fipaiquin man fipaiyai cuscacai man Dios yocamisima mato inanon.

³ Ascashon Dios cuffiaquin man amaquiri yocaitocai. Asca Diosin mato ahua inantiroma. Mafi man apaiyai cuscan fustisi amupaimisi. Man ascaitocai mato ahua inantiroma.

⁴ Afin mato amapaiyai cuscacai nancairocon shinantama nan mafi ranan man apaiyai cuscan fustisi man shinanmisiquin. Ascaquicai man Dios noicoianma. ¿Man tapiamamun nan icoinra huamafoan fuchipaiyai cuscan marifi man fuchipaya. Ascaqui man Dios noicasmamisi itiro? Asca man icoinra huamafo cuscara icashufin Diosin noicasmamisi man itiroquin.

⁵ Diospan tsain cununi isca huaquin, –Uhuun Yoshin Shara un mato ya rafumaniran, –ishon cununi. ¿Man shinanmun ipaitsi noco cunushoni? Man ahua futsafo noiaiton oinquin ahuun Yoshin Shara fasi ahuun ointi isincointiro.

⁶ Ascan afanan Diospan tsain noco cunushoni isca huaquin,

“Ratoran futsan Upa Dios nicacasmai afin apaiyai cuscan fustisi huai nanfin cacapaimisicoinquin. Ascaraquicai Diosin unimaima. Ascashon ato onaintimashqui. Ascacia nan ratoran futsan Jesús cuscara ipaicoinquifin nantonfin tapiquin fasi Jesús yopacoin isharashquin. Nanscarafohuunfin Diosin ramapaiquin ato shara huashoshquin finacoishquin ahuun curushu ato inanshquin tanasharanonfo,”

ishon cununi.

⁷ Ascacun Upa Diosin mato yoimisi cuscacoin acahuun. Nan yoshin chaca Satanás mato amapaiyai cuscan nicayamacahuun. Ascashon yoiquin isca huacahuun, –Satanás, Jesucristo uhuun Ifoquin. Umaquinoashu catahuun, –ishon yoicahuun man asca huaino matomaquinoashu ichoriscatanon.

⁸ Ascadari Dios fu rafucahuun a cuffafaincahuun. Man ascaino matofu rafucacaitiro. Man chaca huamisi cuscan shatucahuun. Ascashu afanan ointi rananya iyamacahuun. Man Dios tanafashon nantianricai nan icoinra huamafoan acai cuscan man huatiroma. Ascaquicai man tanashartiroma. Ascashon maton nomuran man shinanchacamisi cuscan shatucoincahuun.

⁹ Man chaca huamisi cuscan shinancasmacahuun. Ascashon man chaca huamisi cuscan shinantani uaicahuun. Afanan afo shinancani shuchitamarocon uaicahuun.

¹⁰ Ascashon nocon Ifo Jesús yoiquin isca huacahuun, –Ifon un fasi mia chaca huamisi. Ascacun ua numahuu, –ishon yoicahuun. Man ascaiton Upa Diosin matohuun ramapaiquin maton chaca soashotiro man afu ipanon.

Futsahuunoo yoiqui chaca huayamacahuun

¹¹ Uhuun yoramishtichin Diospan tsain noco yoiquin isca huani, –Noinancatan yoiti huatananyamacahuun, –ishon cununi. Man ascayamacai Diosin noco yononi cuscan man aim. Ascaquifin, –Diospan tsain amaquiriran, –ishon man yoicai. Ascashon mancai yoi tiroma, –Diospan tsain cayacafi iymarai amaquiriran, –ishon yoitamarocon ahuun tsain man nicacointiro.

¹² Diosin fustiton noco yonopaiyai cuscan noco cunushoni. Arus fustifi tapicoianquin tsoamain isharacoian iymarai chaca huaquin. Nanton arus fusti tapia noco numa iyamaraimain noco omitsiscapanacafo muran potaicai. ¿Ascan ahuuscain man futsafohuunoo yoiqui chaca huamisisimun?

Ahuara ahuuscara afaitocai non tapitiroma

¹³ Natian un mato tsain futsa yoiaiton ua nicasharacahuun. Atiriffain man yoimisi isca huaquin, –Na shafata iymarai funamanri non pushurasi futsa ari canon. Nannoshon non fari fusti finonyoicanon ahua inannantsashon ahuun rafanan non pui ichapa finon, –ishon man yoimisi.

¹⁴ Ascafiashocai man tapiama funamanrimain ahuuscataniquin. Nan man cainitian yafi man naitian nishfo cuscara. Man oinfiaino samamashta yamafoaintiro. Nanscariffai mancai chai nipatiroma.

¹⁵ Ascacun anori shinantamarocon man shinanquin isca huatiro, –Upa Diosin ua nimapaiyaino un nyotiro. Nantonfin ahua apaiyai cuscan ua huamatiroquin, –ishon man yoi tiro.

¹⁶ Ascafi mancai ascara shinanmisima. Ascatamarocon man yoiquin isca huamisi, – Ufin un apaiyai cuscan un huatiroran, –ishon man shinanmisi. Ascashu man cacapaimisi. Man ascafin fasi chacacoinquin.

¹⁷ Ascashon ratoran futsan Diosin amapaiyai cuscan tapifiashon futsa ashosharayamaino nantofin chaca huaiquin.

5

Mafo ichapayafo Santiago ato yoini ascanofoma

¹ Mafo ichapayafoan ua nicasharacahuun un mato cayacafi yoinon. Ascan natian man ahuashta yopayamafiai chipo man fasi omitsiscashquin uaiquin.

² Man ichapa aya cuscan chipo payocoi futsui. Maton sahuuti sharacapacoinfo coroisifoan piquin futsashcani.

³ Maton puii afanan ahuushta ahuun nuima. Man maton pui ichapacoin mucua oinquin futsan yoiuro, –Mifin min yoashicoin. Mina fusti min shinain. Ascashocai man futsafohuun ramapaimisima. Ascacun Diosin mato onaintimashqui. Maton ointi ihuucoin mui. Man ahuuscampaishquin. Man fasi ratucocoin nan tapiashu chipo man omitsiscashquiran, –ishon ato yoi. Nanfin ahuun unutaniquin.

⁴ Shinanapon. Mancai maton yonomamisifo inansharamisima. Man ato fuparamisi finonmafain fiifiaquin. Upa Diosin ahuamamishti atiroquin. Man ato chaca huamisi cuscan nanton oian. Fasi yonoi atsanacani piniaifoan Diosin man ato nica.

⁵ Mato yonomisifo omitsisca cuscan mancai ascatamarocon man niyoashu man fasi isharamisi. Ahuashtacai man yopamisima. Moipan ichapa pii shoatiro. Tapiama shoacan ifoan rututiro pinonfo. Nanscarifiai mancai niyoashu isharamisi. Unimacain ahuara apaiyai fustisi man amisi. Man tapiama ascara chaca huafiashu samamashta man nai omitsiscai futsushquin.

⁶ Yora tatimamishstifiacun man ato chaca huamisi. Atohuunoa tsain chaca man huai niaifo ato achimashquin. Man ato chaca huaino ahuuscashucaí afinri numatirofoma. Ahua chaca huayamafiashu nan maton tsainhuunshon man ato rutumani.

Omitsiscafiaquin tunufain Dios cuficahuun

⁷ Uhuun yoramishtichin man omitsiscafiaquin tunuyocahuun nan nocon Ifo Jesús oaitian. Funayamacahuun. Natian un mato ahuara futsa yoipai. Mau fanashon ifoan funainquimashta manasharatiro nan funusharaitian. Oi pacutian manasharatiro funushonaitian.

⁸ Nanscarifi aquin manayocahuun. Nocon Ifo man oti chaimaquin. Ascacun ahuun tsain cachiquiri huacaquima tanasharacahuun.

⁹ Uhuun yoramishtichin nocon Ifo man oti chaimaquin. Tapicahuun nan chacafonaintimayoi oiquin. Ascacun futsaqui tsain chipuyamacahuun matori onaintimanonma.

¹⁰ Nocon shunifoan nan nocon Ifo ahuun tsain yoisimisifoan fasi omitsiscafiaquin funatama nocon Ifohuunoa ato yoipaonifo. Nan ipaonifo cuscan atohuun caocahuun.

¹¹ Man man tapia nanfoan omitsiscafiaquin funatama tunucoinpaonifo. Nanscarafonin unimatirofoquin ishon non yoisimi. Nocon shuni Jobhuunoa man man nicamisi. Fasi omitsiscafiaquin nocon Ifon icoinra huacoinni. Ahuun tsaincai cachiquiri huanima. Ahuun unutaqui Upa Diosin fasi shara huashoni nan funoni cuscan afanan inancoinni. Ascan non tapitiro nocon Ifon nocohuun ramapaicain nocohuun noicoin.

¹² Ascan man man tapia Upa Diosin nocohuun noiquin noco cushusharamisi. Ascan Diosin noco shinanmafaini nan man tapicoian cuscan futsafo ismacahuun. Maton tsainhuunshon ato ismacahuun. Man futsafo matohuunoa icoinra huamapaigui isca huaquin yoiyamacahuun, –Diosin ua oiaínno un mato icon yoiran, –ishon yoiyamacahuun. Mato tsain, –Ai iyamarai ma, –ishon yoicahuun. Icon fustisi yoicahuun. Man ascaiton maton tsainhuunshon man chaca huatiroma Diosin mato onaintimanonma. Ascara shinancahuun.

¹³ Asca man ratoran futsan chaca finonshon Upa Dios cuficahuun. Man ratoran futsan unimaquin Dios fanainshotiro isca huaquin, –¡Aicho! Upan Diosin min shararan, –ishon fanainshocahuun.

¹⁴ Nan ratoran futsa isinincaiton nan ichananmisifo aton cushumisifo cunacahuun a cufishononfo. Nocon Ifo cufishquin ichapamashta shuniyashon fumanfain nocon Ifo Jesús anuhuunshon Upa Dios cufishocahuun.

¹⁵ Man icoinra huacoinshon isinincaifo man cufishonaino cayasharatiro muma shara itiro. Nanton chaca huamiscun Upa Diosin a caya huafain ahuun chaca soashotiro.

¹⁶Ascacun man chaca huaa cuscan yoinonancahuun Upa Diosin maton chaca soashonon mato caya huanon. Ratoran futsan Jesushuunoashu isharashon nanton mato Upa Dios cufishonaiton nicasharashquin nan cufiai cuscan ahuamamishiti huashotiro.

¹⁷Ascan nocon shuni Elias nan nocofunu noco cuscarari ipaoni. Non muai cuscarari arifi mupaoni. Ascafiashon Upa Dios fasi cuficoiainno fari rafu non fusti nushmancayan oi fuyonima. Cufinquin isca huani, —Upa Diosin uhuun yorafoan mia cachiquiri huafokin. Ascacun oi fumariamahuu uhuun yorafoan afanan mia tanasharanonfo, —ishon cufini. Asca huano fari rafu non fusti nushmancayan oi fuyonima.

¹⁸Ascan chipo afanan cufiaino oihuanrasi funi. Nantianri yonofa foaisharani.

¹⁹⁻²⁰Uhuun yoramishtichin mafin ranan Diosin tsain tanacashon futsan Diosin tsain cachiquiri huacun afanan Jesús tanayamaiton futsan yoiquin, —Min chaca huamisi cuscan shatuhuu Jesús afanan tanasharahuu, —ishon anori man yoiaino nicashon ahuun chacafo shatucoianshu Jesusqui afanan nasotiro. Omitsiscapanacafo muran cacuana futsan numayamaino. Asca huashon ahuun chacafo cachiquiri huamacoinshon Diosin ahuun chaca rau huashotiro futsan numacun. Ascacun afanan Diosincai ahuun chaca ahuunoa shinainma manmain ahuun chaca shatumacoinshonfin. Nanti.

Santiago

Pedronun Icoinra Huafo Cunushoni

Pedronun ato tsain shara foman

¹⁻² Unquian Pedro un Jesucristo fu rafumisishon ua yonopaiyai cuscan un ashoshquin. Un mato cunu foma man tapinon. Man Jesús tanaino maton mai Jerusalén anoshon mato potanifo. Ascan man maitio pashcai futsufaini. Atirifi man Ponto ano foaino atirifiri man Galacia ano foaifoanno atirifi Capadocia ano foaifoanno atirifi Asia ano foaifoanno atirifiri man Bitinia ano foni. Upa Diosin inonpacoai cuscan mato catonni ahuun facufo man inon. Jesucristo mato nashoni maton chaca mato soashoshquin ahuun Yoshin Sharahuunshon mato chaca shatufain man tanasharanon. Ascano Upa Diosin matohuun ramapaiquin maton nomuran fasi unimafafaini.

Non Diospan facufoshon non tapitiro non afu ipashqui cuscan

³ Ascacun nocon Ifo Jesucristo Apa non aicho huapanon. Upa Diosin ahuun Furun Jesús mai muranno funimani ahuunoashu nocon nomuran fiananan huai a cuscara funasharacoin non inon. Ascan ahuunoashu non nipai aqui non nocoaitian afu ipashquin.

⁴ Ascashon Upa Diosin noco yoini cuscan noco numapacunaca non afu ipanon. Diosin ica cuscarifiai norifi non aqui nocoaitian a cuscara shara iishquin. Noco imapacuai cuscan unupacunacama icain chacapacunacama icain sharapacunaca fusti. Charofo sharashta iyofiahu chipo tsasi futsutiro. Ascan noncai charo cuscarama. Chipo noco Diosin imashquin cuscacai fianananpacunacama. Non afu isharapacunaca.

⁵ Ascان non icoinra huacun Upa Diosin ahuun curushhuunshon noco cushusharafafaini Jesús oaitian. Nantianri noco imashquiai cuscan nantifi noco inanshquin ahuashtacai non funoshquima.

⁶ Ascان natian niyoashu man omitsiscafiai man chipo Jesús fu ipasharashquin. Ascacun omitsiscafiai fasi unimacoincahuun.

⁷ Diosin nocoahuunoa onanpai nonmain Jesús icoinra huacoinnaquin. Un mato ahuara futsa tapimapai. Cuno nan oro chi muran coashon non tapitiro nan orocoinmainquin. Nan orocoiashucai cotiroma. Nanscarifiai omitsiscafiaqui man Jesús cachiquiri huayamacun Diosin onantiro man Jesús icoinra huacoinnamainquin. Nan oro chicoinfia man Jesús icoinra huacoinna nancaifin fasi shara finacoianquin. Ascan Jesús oaitian omitsiscafiaquin man icoinra huacoinmisticun mato yoiquin isca huashquin, —¡Aicho! Min omitsiscafiai min isharamisi. Ascacun un miqui unimacoinni. Min ufu rafusharapacushquinran, —ishon mato Jesús yoishquin.

⁸⁻⁹ Man nocon Ifo Jesús inimisimafiashon man ahuun noi. Natianri man oiantaimafiashon man icoinra huacoinna. Ascashu man fasi unimacain maton ointi roama roamamisi. Ascashon man icoinra huacun Diosin mato imasharapacunaca.

¹⁰⁻¹¹ Nocon shunifon nan inon pacoai cuscan Diosin tsain yoimisifoan ahuun Yoshin Sharahuunshon Jesushuunoa yoipaoni isca huaquin, —Nocon Numamisi nocoqui oshqui. Mato omitsiscashoshquin man ahuunoashu isharanon, —ishon cununi. Ahuunoa cunupaoni cuscan nanfoanri fasi tapipai tsoamain nocon Numamisi iishquicain ahuutiari-main oshquicain.

¹² Diospan Yoshin Sharapan ato tapimani man inonpacoai yoini nanfoan niyocashon oinyotirofoma. Ascatarocon afoan oinyamafaino mancaifin oinshquiquin. Ascan nan tsain shara Jesushuunoa nantiffain man non nicamisi. Upa Diosin icanoshon ahuun Yoshin Shara nichini ahuun curushhuunshon mato Jesushuunoa yoimisi. Nan man nicamisi cuscari Diospan oinmati afu nai muran icafoanri tapipaicoincani.

Upa Diosin noco yononi non Cristo cuscara shara inon

¹³ Ascان maton nomuran cayacafi shinansharacahuun. Jesucristo oaitian Upa Diosin mato shara huashoshquiai cuscan itisharacahuun mato yoini cuscan fiishcaquin. Ascacun ahuara futsan shinanyamacahuun. Afin mato amapaiyai cuscan fustisi shinancahuun.

¹⁴ Manfin Diospan facufoquin. Ascan Upa Dios nicasharacahuun. Mato amapaiyai cuscacai man tapiyopaonima. Man chaca huapaoni cuscan afanan shinanyamacahuun.

¹⁵ Ascatarocon natian Upa Diosin mato isharamapaiyai cuscan fustisi acahuun. Nanfin shara fustuquin. Ahuacai chaca huamisima. Ascacun marifi a cuscara shara icahuun. Nan man afafainnai cuscan isharacahuun.

¹⁶ Diospan tsain cununi isca huaquin, —Unfi isharamisiquin. Ascan marifi isharacahuun, —ishon Diosin yoini cuscan cununi.

¹⁷ Ointiaquimayamacahuun man nocon Upa Dios cuffifafainai cuscan nanton noco nantifi oinfafainni nanscarafosi. Nanscacun Diosin nanscasi huaquin nocoahuun noi. Upa

Diosin nan yonoshomisifo cuscan atoti inanpacushquin. Nan yonoshosharamisifosi ato paratama inanpacushquin. Ascan nan yonosharamafo funoshceni. Ascacun oinfain. Nuno mai ano niyoshon Diosquiri shinansharacahuun mato yonomapaiyai cuscan ashocahuun funoshcaquima. Man nonfin tapiacquin non nuno mai ano ipanacama. Non chipo Diosqui nocoshquin.

¹⁸ Man manfin tapiacquin nocon shunifoan noco tapimapaoni cuscaai afoan noco numapacutiroma non afanan chaca huanonma. Nan pui paratamacoinfiashocai noco numatiroma non afanan chaca huanonma. Nan pui chicoinfiahu nanfori cuyoi futsushquin.

¹⁹ Cristo fustitofin noco numatiroquin. A fustitocai ahua chaca huanacama. Nan chashoan facu muma sharacoin cusara. Jesús aficoi noco nashoni ahuun imi fonihunshon noco numashqui non afanan chaca inonma.

²⁰ Upa Diosin mai oni huataima Furun Jesús catonni noco Numamisi inon. Ascafia futsafoancai tapiyopaonima natiantan Diosin mato tapimana.

²¹ Cristohuunshon man Diosin icoinra huamisi. Criston naafianicun Apa Diosin funimani afu nantifiton aton niaifocoin inon. Ascan manfin Dios icoinra huafain man man tapia chipo man afu ipashquin.

²² Man non Jesús icoinra huashon ahuun tsain iconcain cununi cuscaai man nicaicoinmisi. Ascashu man a cuscara shara imisi man icoinra huua futsafori noicoinmisi. Fomanonantama noinainshara finacoincahuun.

²³ Man chaca ipaoni cuscaai man afanan ascaima. Diospan tsainhuunshon mato fiananan huua. Ahuun tsainhuunoashu non ipasharatiro. Ahuun tsaincai cuyopacunacama. Nocon upa futan nocon uhua noco cainfiani non chipo natiro. Ascafia Diospan tsainhuunshon noco cainma funa. Ascashu ahunoashu non afu ipatiro.

²⁴ Un mato ahua futsa tapimapai man tapisharanon.

“Faasi tau foaisharafiahu chipo samamashta tsasitiro. Charofori tau sharashtacoin iyofiahu chipo samamashta tsasitiro afanancai non ointiro. Nansarifai nantifi yoraforicai chai nipatirofoma. Nantifi non nai futsushquin.

²⁵ Ascafia nocon Ifoan ahuun tsaincai ascarama. Nocon Ifoan noco yoia cuscan nan iconcain cuyopacunacama.”

Nan tsain shara Jesushuunoa futsafoan mato yoimisi.

2

¹ Ascacun nantifi man chaca huamisi cuscan unucahuun. Futsafohuunoa shinanchacayamacahuun ato chaca huafain ato parayamacahuun atori fomanyamacahuun. Futsa aya cuscan fipaiquin ato noicasmafain ato yoiti huayamacahuun. Atohuunoari tsain chaca yoiyamacahuun.

²⁻³ Ascatarocon Diospan tsain shara fuchipaicahuun. Facu rama caianton shoma apaitiro cuscan huaquin marifi Diospan tsain shara fuchipaicahuun. Man man mumisi nocon Ifoan noco shara huashoaiton. Ascacun mato imapaiyai cuscan fustisi tapisharacahuun.

Cristofin nan toquiri mutsisipa cuscaraquin

⁴ Ascan man toquiri pushu huaino toquiri ichapa yopafain nan uhuapa shara fusti man yopai pushu mutsisipa huashquin. Atirifi uhuapamafo afuchi putsainicani. Nansarifiai nocon Ifo Jesúsfin nan toquiri uhuapa shara nia cuscaraquin. Icoinra huamafoan nocon Ifo fuchipaicanima shinanquin isca huacani, —Acai ahua. Noncai a yopaimaran, —ishon yoifiaiffoan Upa Diosin nocon Ifo Jesús catonni. Fasi ahuun noicoinquin. —Tsoa futsacai a cusarama, —ishon Diosin yoini. Ascacun aqui fucahuun maton toquiri mutsisipa cusca shara imanoni.

⁵ Man aqui oashu nan toquiri uhuapama nia cuscarafo man itiro. Nan Diosin pushu huatiro cusca. Iquisi toquiri mutsisipa uhuapa shara fia. Nanfin nocon Ifo Jesús. Apan catonquin tau huani chipo nocorifi catonni Jesús cusca shara non inon. Ascan Jesushuunoashu norifi non Diospan pushu cusca. Tsoa na pushu muran opai isharacointiro. Ascacun nonfin ahuun pushu anoa ahuun yonomatifoquin. Ascashon noco amapaiyai cuscan fusti non Jesushuunshon ashosharatiro. Non Diosin Furuhuunshon isharamisi. Ascacun non yonoshonai cuscan Upa Diosin nocoqui unimacacaini.

⁶ Ascan Diospan tsain cununi isca huaquin,

“¡Oincapon! Un Cristo oian arus fustifin sharacoinquin. Ascacufin un catoanquin uhuun yorafoan ato ifo inon. Afin pushu quishi toquiri mutsisipa cuscaraquin. Ascacun uhuun yorafo afu isharanonfo. Tsoancai Cristo icoinra huashon shinan futsapacunacama. Ascatarocon afu unimapacucoinnacaran,”

ishon Diosin yoini.

⁷ Icon tsoan Cristo icoinra huashon ahuunoo shinantiro isca huaquin, –Tsoa futsacai Jesús cuscara sharama. Un fasi ahuun noicoiran, –ishon yoitiro. Ascafia tsoan icoinra huayamaino Diospan tsain atohuunoo cunuquin isca huani,

“Pushu yonomisifoan quishi toquiri uhuapa shara potaifoan pushu ifoan yoiquin isca huatiro, ‘Nan quishi toquiri fasi shara. Un fuchipai nahuun uhuun pushu shara huashquin,’ ishon yoitiro. Nanscarifi aqui nan nicayomashunifoan Cristo potafianifo Diospan catonni ahuun yorafoan aton Ifo ipanon,”

ishon yoini.

⁸ Afanan Diosin tsain yoini cuscan huafain un maton yoi isca huaquin,

“Toquiri uhuapa fai namancaia racafiano oinsharatamacai otisicaini non pacutiro. Nanscarifi aqui tsoan nocon Ifo Jesús icoinra huacoianshma pacui cafiscashu funotiro Upa Dios icari nocopaifiai omitsiscapanacafo muran focaniran,”

ishon Diospan yoini. Diosin yonofiani Cristohuunoo nicacasmafain yoitimashu funopacunafo. Nannori Diospan tsain yoiyoni.

⁹ Ascafia Diosin noco catonni ahuun yorafo non inon. Afin niaifocoinquin non yonoshotiro futsafori cufishoshquin Jesushuunoo ato tapimashquin. Noco a cuscara sharacoin imaino non ahuun yoracoinfo itiro. Ascashon ahuunoo futsafo yoisharashquin. Non faquish muran ica shinantsa apaoni. Ascafia afincoin noco catonni ahuun yoracoinfo non inon afu shafacafi shara ipashquin.

¹⁰ Mancai ahuashta nicayopaonima. Ascafian natian man Diospan yoracoinfo. Diosin matohuun ramapaifaiton mancai muyopaonima. Ascafia natian Diosin matohuun ramapayaitofin man man mumisiquin.

Diosin yonomati sharafo icahuun nantishotapiquin

¹¹ Uhuun yoramishtichin un mato yoisharapaiyai cuscan ua nicasharacapun. Non icoinra huamafo muran ifiashucai non atofu ipanacama. Noncai aton yoracoinfoma. Ascafia nan icoinra huafoma icaifo cuscan ayamacahuun. Mato amaquri shinanchacamapaifiaifoan ascara shinanyamacahuun. Nanfoan maton nomuran mato chaca huamapaicani.

¹² Ascacun ato murannoashu Jesushuunoo icoinsharacahuun. Nan man niyoano matohuunoo tsain chaca yoiifiamisifo chipo Diosin nantifi noco ichanan huaitian nanfoan tapitirofo mancai ahua chaca huatama man icoinsharamisi. Ascashon yoitiro isca huaquin, –¡Aicho! Nanfoan Dioshuunshon futsafo shara huashomisi. Ascacun Dios sharacoinran, –ishon yoishquicani.

¹³⁻¹⁴ Nocon Ifoan apaiyai cuscan nantifi niaifofoan mato yonoaiton nicasharacahuun. Niaifocoin nicasharafain niaifo patasharinoafori nicasharacahuun. Nanfo Upa Diosin nichini chaca huamisifo onaintimatan a nicasharaifo aton yoisharanonfo.

¹⁵ Ascan futsafo fasi tatimacoishon amaquri shinanmisifo. Ascashocai Diospan tsain tapipaicanima. Ascan ahua tapiamafiacashon mato isca huaquin yoipaicani, –Man Jesushuunoo yoimisi cuscan amaquricoiran, –ishon yoimisifo. Ascan Upa Diosin mato yonomapaiyai cuscan futsafo man shara huashofafainaihuunshon man ato shatumatiro.

¹⁶ Jesús fusti maton Ifocoin. Ascan ahua futsa shinantama isharacahuun. Diosin mato amapaiyai cuscan fustisi huafafaincahuun. Ascashucai ahua futsa maton ifo itiro. Ahua chaca huatama Diospan yonomatifo ifafaincahuun.

¹⁷ Ascacun nantifi yorafohuun shinansharacahuun. Nantifi Jesús icoinra huafocoincahuun. Diosihuunoo shinancahuun isca huaquin, –Un Dios noicoquin uo yonopaiyai cuscan un nicapaicoin. Uncai yoitima ipaima ua onaintimanonma, –ishon Diosihuunoo anori shinancahuun. Mato niaifofo nicacasmaquima ato nicasharacahuun.

Cristo noco omitsiscashoni cuscan norifi non ahuunooashu omitsiscatiro

¹⁸ Yonomatifoan maton ifo nicasharacahuun mato yoiainfo cuscan ashcaquin. Ato nicacasmaquima atohuunoo shinansharacahuun. Nan mato shara huashomisifo fusti shinancaquima. Nan mato chaca huamisifori aton ismasharacahuun,

¹⁹ Man chaca huayamafiacun mato ifoan mato omitsiscamafaino Diosihuunshon shinanquin tunucahuun. Man tunuaiton Upa Diosin matohuunoo yoisharashqui.

²⁰ Ascacun man chaca huahuunshon maton ifoan mato coshaino man tunuanocai matona ahuama. Man shara huahuunooashucui man omitsiscaima. Ascan man shara huafiacun maton ifoan mato coshaino man tunucun nocon Ifo Diosin matohuunoo shinansharashquin.

²¹ Cristofin nocohuunooashu omitsiscacoinniquin. Ascacun norifi non ahuunooashu omitsiscatiro. Non ahuun caotiro a cuscara shara iishquin.

²² “Ascan nantocai tsoa chaca huayamafain tsoa paramisima.”

²³ Futsafoan roafiainfoannocai pusinima. Omitisca huafiainfoancai ato yoiquin isca huanima, —Un mato chipo copishquiran, —ishocai yoimisima. Ascatarocon Apahuunoa shinanquin isca huani, —Upan man min uhuunoa onancoian. Nanscarifi huaquin min ato onancoian. Ascan min ato ashquiai cuscan iconcoiran, —ishon shinanni.

²⁴ Jesusfin noco ihui coyan iquinanquinoashu noco nashoniquin. Nantifi nocon chacafo amuran cuyoinanni non afanan chaca huatarocon non a cuscara shara ipanon. Nan isi muahuunshon noco caya huamai non afu ipanon.

²⁵ Ascan manfin nan chashoanfo funoa cuscarafo ipaoniquin. Ascafia natian man mato cushmani Jesusqui nasoa mato cushufafainshquin man afu rafupacunon.

3

Ahuuscashumain funu fu ahuin isharatiroquin

¹ Ascan nanscarifiai ainfofoan maton funufo nicasharacoicahuun. Atirifi mato funufoan Diospan tsain icoinra huayamafia ato nicasharafain ato Jesushuunshon shara huashofafaincahuun ipaishomari arifi nanto nocon Ifo icoinra huatiroquin.

² Maton funufoan mato yoiaiton nicatimacaquima nicasharafain man Jesús cuscara isharaiton oin atirifoan nocon Ifo icoinra huatirofo.

³ Foaromucai tuhuuti sahuufain sahuuti sharacapacoin sahuuahuunshoncai maton funu man icoinra huamatiroma.

⁴ Ascatarocon maton nomuran shinansharafain man futsafo tsain tsii huafain yoisharamisicun nanscarafo Upa Diosin fasi fuchipaicoin. Nanscarafo oinquin, —Nan fasi shararan, —ishon yoitirofo. —Na cuscara ainfofin ahuan ica sharacoicoin, —ishon Diosin ahuanoa oinquin yoitiro.

⁵ Nanscara nocon shunifo ainfofoan Diosin icoinra huafain isharamisifo. Diosin ato nomuranshon shinansharaino aton funufori nicasharapaonifo. Ascashon aton funu nicasharacoianfoanno ato funufoan atohuunoa shinantirofo isca huaquin, —Uhuun ahuinin ua shara huashofafaini. Ascafin fasi sharacoicoin, —ishon funufoan shinantirofo.

⁶ Nocon shuni Abraham ahuan ahuin Sara nanscapaoni. Ascashon ahuan funu fu tsainquin isca huapaoni, —Uhuun iforan, —ishon yoipaoni. Marifi ratutama isharacain nan Sara ipaoni cuscan man shinainno ahuan facufo cuscara man itiro.

⁷ Nocofunufoan marifi nanscarifiai maton ahuinshofta fu isharacain shara huafafaincahuun. Atohuunoa shinansharacahuun. Ainfofocai nocofunu mutsisipa cuscarafo. Ascashon ato cushusharacahuun. Diosin matohuun ramapaiyaino man afu ipanaca. Maton shara huacacari Upa Diosin maton ahuinfori nanscarafosi sharashta huashoshquin afu ipanonfo. Ascan ato shara huacahuun man Dios cufiain cuscan mato ashonon.

Man futsafo shara huafaiton mato omitiscamacani

⁸ Ascan nan un mato yoiac cuscan. Nantiffain nannorisi shinansharafain futsafoan ahuaia finoncun atohuun ramapaiquin noicoicahuun. Shara huatanancahuun. Cacapimisi iyamacahuun futsafahuun ramapaiquin shara huafafaincahuun.

⁹ Ascan futsafoan mato chaca huafain mato rofiatitaton ato copitamarocon ato shara huacahuun. Nanscara Diosin noco yononi. Non futsafo shara huaiton oinquin Upa Diosin noco fasi shara huashquin. Noco Diosin catonni noco shara huaquin.

¹⁰ Diospan tsain cununi isca huaquin,

“Man isharapaiquin ahuaia chacafo yoiyamafain futsafo parayamacahuun.

¹¹ Ahuaia chaca huaiifo muran foyamacahuun mato chaca huamatirofoquin. Ascatarocon futsafo shara huafafaincahuun. Futsafo fu fasi isharapaicoincahuun. Fochishmanantanacaquima. Maton nomuran tsii huatanancahuun.

¹² Ascashu man isharaiton oinquin Upa Diosin matoqui fasi unimaicain mato cushusharashquin. Ascashon man ahuaia yocaiton mato nicatiro. Man yocai cuscan mato ashoshquin. Ascan tsoan chaca huamiscun Upa Diosin ato nicaima ato shatumashquin,” ishon huani.

¹³ ¿Non futsafo shara huamapaiyaitomun tsoan noco chaca huamatiroquin?

¹⁴ Ascafia ipaishoma man isharaiton mato omitiscamatirofofia Upa Diosin mato shara huashquin. Diospan tsain cununi isca huaquin, —Icoiran huamafu musua cuscan musuamahuun. Ratuyamacahuun, —ishon noco yoini.

¹⁵ Ascata ma maton nomuranshon nocon Ifo yoiqui isca huacahuun, —Criston minfin uhuun Ifocoinquin. Mincai ahuashta chaca huamisima. Minfin shara fustiquin, —ishon yoicahuun. Ascatari futsafoan mato yoiquin isca huai, —Ahuuscashocon min tapiain min Dios fu ipashquaiin, —ishon mato yocaiton iquisi itisharacahuun ato tapimasharashquin.

¹⁶ Ascashon ato oi noma cumasharacahuun. Ato fu fochishmanantanquima ato nicacoisharacahuun. Man ahuaa chaca huaa cuscan man fomainno mancai futsafo Jesushuunoa cayacafi yoitiroma. Ascashon man chaca huashon Dios yoiriscacahuun Jesushuunoa yoisharashcaquin. Mato chaca huafiacanashu man isharaiton oinfin rafipaitirofoquin.

¹⁷ Ascan non chaca huahuunoashu non omitsiscacai sharama. Man nonmain chaca huashufin nonfin omitsiscatiroquin. Ascan non shara huaashu Upa Diosin noco amapayai cuscan non omitsiscacai nanfin sharaquin.

¹⁸ Cristocai ahua chaca huamisima. Nan fustifin sharaquin. Nantiffain man non chaca huamisi. Cristo ahua chaca huayamafiamisishaquin nocohuunoashu nani nocon chaca noco soashoshquin. Afanancai nanacama. Noncai afanan ahua yopapacunacama nocon chaca soashonano. Man naafiashu Apan ahuun Yoshin Sharahuunoashu funini. Ascashon Apa Dios icari noco iyoshquin.

¹⁹ Ascan Jesús naino ahuun Yoshin Shara nan a namisifo icano cani. Nanfo nan cunu muran ica shinantsa aponifo. Ato ano cani ato ahuun tsain shara yoishquin.

²⁰ Ascan nan Noén shashohuan huai chain Diosin funaquima yorafo manayopaoni aton chacamain shatucaniquin ahuun tsain icoinra huashcaquin. Ascan Noén fustiton ahuun yorafo yashon nicacoinnifo. Ocho yora shashohuan muran iquinifo asashcaquima. Ascaino atriffocanai tsoanshta Dios nicapainima. Ascaino faitahuan nocaino asai futsunifo. Cristo funiataima aton yoshin icafo muran cani ahuun tsain ato yoishquin.

²¹ Noé unu faitahuaino shashohuan muran iquiashucaí asanima. Faitahuan nocofinocai Noé yafi ahuun yorafo shashohuan murannoashu asanifoma. Nanscarifiai futsan noco unu muran iquimanaino funishon non yorafo ismai Cristo Jesús noco funimani non afu ipanon. Nan unu muran non iquiainocai non yorafo ismama noco caya non nashimana afanan choshta inonma. Ascatarocon non ato ismai nocon chaca soashocun Cristofin noco funimaniquin noco numashqui. Ascan non afanan shinanchacatarocon non Jesushuunshon shinansharanon Dios fu ipashquin.

²² Ascan natian Criston Apa fu ica niaifocoin ipashquin. Tsoashtacai finontiroma. Ahuun oinmati afu nai muran icafo non nantifi yoshinfo non aton niaifofori nantifi ato yoiyai cuscan aashcaniquin.

4

Upa Diosin noco ahuun curush inain cuscan huafain non futsafo shara huashoshquin

¹ Criston niyoashu omitsisicapaoni. Ascacun nanton shinanni cuscan marifi nannori shinanchahuun. Arifi omitsisca cuscan marifi man omitsiscatirofia ahuun curushhuunoashucaí chaca afanan mato ifo itiroma.

² Anori shinancuicai man afanan chaca shinainma Upa Diosin mato amapayai cuscan fustisi man huapaitiro.

³ Fari ichapacoin man man funoa Jesús icoinra huamafoan amisifo cuscan man huapaoni. Man chaca huapayai cuscan fustisi man huapaoni. Yamutifi monocain ayafain maton nomuran shinanchacafain maton ahuinmafo ya ipaicain ainfori aton funumafo ya ipaiyafono paunmisticoin icain futsafo ya ichananshu atofu monoshquin mucayanan Dios noitama ahuaa futsafo man noipaoni. Nan chacafocin Upa Diosin noicasmacoianquin. Ascacun afanan asayamacahuun.

⁴ Ascan nan man chaca huapaoni cuscan man shatuano matofu rafupaonifoancai ahuuscashon tapitirofoma. Ascashu matohuunoa yoiquin isca huatirofo, –¡Aira! ¿Ahuuscain afanan na yorafo no fu ichanapaicanimamun monoyanan non atofu paunpaoni? ¿Ahuuscain afanan ascapaicanimamun? –ishon yoicanashu mustairiscatirofo. Ascashon mato roatirofo.

⁵ Anori shinanfiatirofo Diosifin noco niaifocoinquin. Nan muma niafo futan nafoan. Nantifiton ahuun ointaifi yoiquin isca huashquin, –Ahuuscain uhuun facu man icoinra huayamafain niyoshon man chaca huapayai cuscan fustisi man huamisimun, –ishon ato yoishquin. Ascashon ato onaintimacoishquin. Futsafoan yoishquin isca huaquin, –Min uhuun facu icoinra huacoinmisiquin. Ascan natian min ufu ipatiroan, –ishon ato yoishquin.

⁶ Ascacun Upa Diosin ahuun tsain yoishomisifo nichini nantifi yorafoan ahuun tsain shara Jesucristohuunoa nicasharanonfo. Nan naamisifoanri niyocashon man nicayopaonifo. Nantifi man nai futumisifo. Ascafia nan ratoran futsafoan Jesús icoinra huacun Upa Dios nia cuscan atorifi nimapacushquin afu nipanonfo.

⁷ Ascacun tsain futsari un mato yoinon. Shinancapon. Nantifi manifesti man cuyoti chaima. Ascacun cayacafi shinansharacahuun. Ahua chaca shinantamarocon Upa Diosin

mato shinanmapaiyai cuscan nan fusti shinancahuun. Ascashon Upa Dios cuffifaincahuun.

⁸ Ascashu noinancoincahuun. Nan non noinancaifin sharacaiquin. Futsan noicoishon non ato rau huatiro noco chaca huai cuscan afanan shinanonma.

⁹ Futsafo maton pushu ano nocoaiton aqui unimacai mato pushu muran iquimasharahuu. Mato nomuran aqui mutokuima.

¹⁰ Ascan Upa Diosin noco ahuarafu futsa futsa huaquin tapimashara cuscari nan icoinra huaa futsafori non ato shara huashofain non atorifi curafia huanon. Man ascaiton oinquin Upa Diosin ahuun yorafu noicoian cuscan huafainri man atohuun noicoitiro. Ascái unuyamacahuun.

¹¹ Ascan ichananshon Diospan tsaincoin ato yoicahuun. Diosicoinchi yoicafisca huaquin. Ascan Diospan curushhuunshon futsafo shara huashocahuun. Ascacun nantifain Jesucristohuunshon Upa Dioshuunoa yoisharononfo. Man ascaiton oinquin nantifi yorafuan yoitirofo isca huaquin, —¡Aicho! Upa Diosin fasi shara. Furun Jesucristohuunshon ahuamamishti huatiroman, —ishon yoishquicani. Nocon Ifo Jesucristo arus fusti shara huamisi. Nantocai ahuashta chaca huapanacama. Arus fusti ahuun curushhuunshon ahuamamishti huapanaca. Asca huapacuquicain ununacama. Nanscasi huapanaca.

Jesús icoinra huafo omitsiscatiro. Futsafoan ato omitsiscamamisifo

¹² Uhuun yoramishtichin omitsiscafiai mustairiyamacahuun. Shinanchacayamacahuun. Man tunucoiainton oinquin Upa Diosin tapitiro man Jesús tanacoian. Ascacun shinanqui isca huayamacahuun, —Ahuuscain un omitsiscainun, —ishon anori shinaryamacahuun.

¹³ Anori shinantamarocon unimacahuun. Man Cristo fu omitsiscái cafiscái. Natian marifi man mua ahuunoashu omitsiscafiahu chipo man aquí nocoaitian nan isharamisi cuscan marifi man afu ipasharapacunaca. Ascacun omitsiscafiai fasi unimacoincahuun.

¹⁴ Ascan man Cristo tanacan Upa Diosin mato shara huashoin. Ascashon ahuun Yoshin Shara mato ya rafumapacushquin. Ahuunshon man mutiro Jesús matofu ica. Ascan mato roafiafoanno unimacoincahuun.

¹⁵ Ascan futsafoan chaca huamisishacaquí ato chacahuunoashu omitsiscatirofo. Ascashu rutumitsamisifo icain yomutso icain pofucoin icain ahuunoamafia futsanhuunoa ahuaa yoipaimisi. Ascacanashu ato chacafuunoashu omitsiscatirofo. Ato cuscara iyamacahuun omitsiscashacuima.

¹⁶ A man mua nocon Ifo Jesús icoinra huashu rafiymacahuun. Ascaquima. Upa Dios yoicahuun isca huaquin, —¡Aicho! Upa Diosin un min Furun Jesús ahuun yora. Ascacun nan icoinra huamafoan ua omitsiscamaifoanno un Jesushuunoashu omitsiscamisi. ¡Aicho! —ishon yoicahuun.

¹⁷ Ascan nonfin Diospan yorafuquin norifi natian non omitsiscayoi. Non omitsiscaiton nocon Ifo Criston noco yoipai isca huaquin, —¿Uhuun yorashtan ua mian noicoianmun? —ishon noco yocatiro. Ascafia natian non omitsiscafiaitan Upa Diosin tapitiro nonmain Jesús icoinra huacoinnaquin. Chipo nantifi nan maifoti cuyoaitian nan Diospan tsain Jesushuunoa nicacasmamisifo Upa Diosin ato onaintimashqui. Ascan natian norifi non omitsiscayofiahu chipo nan Jesús icoinra huamafo mimacoincain omitsiscapanacafoquin.

¹⁸ Diospan tsain yoini isca huaquin,

“Nan icoinra huafo isharamisifo Dios ari nocoataima omitsiscayotirofo. Ascafia Dios ari nocoashucaí afanan tsoa omitsiscapanacama. ¿Ascashon Dioshuunoa shinantama chaca huamisifo ahuuscainmun? Nanfofin fasi omitsiscapanacafoquin,”

ishon cununi.

¹⁹ Ascacun Diosin mato yonoai cuscan omitsiscafiacaquin shinanchacayamacahuun. Nanton mato onihuaniquin. Ascacun nan yoiquin isca huacahuun, —Upan Diosin min ua amapaiyai cuscan shara fustisi un huapai. Mirus fustifin min ua yonotiroquin, —ishon Dios yoicahuun. Ascashu isharafaincahuun. Nantofin mato yoimisi cuscacoin huamisiquin.

5

Pedronun icoinra huafo yosisharani

¹ Ascan natian ichananfo cushumisifoan un mato yosipai. Ua nicasharacapun. Ascashon maton nomuran uhuun tsain nanuocoincahuun. Urifi Jesús icoinra huafo un ato cushumisi. Nocon Ifo Cristo omitsiscaiton un oinni. Chipo afanan nasoshquaitian urifi un afu isharapacushquin tsoan oinyomisima cuscara sharashtacoin nantifiton oinshquicani. Ascan nantifiton nocon ifon iishquin.

² Ascacun un mato yoi nan Jesús icoinra huafo ichanainno Diosin mato yononi cuscan ato cushusharacahuun. Ato Diosin tsain yoisharacahuun isharononfo. Ascashon shinanquin isca huayamacahuun, —¡Ohua! Un ahua futsa huapaifaiquin un Diosihuunshon ato cushuiran, —ishon shinanyamacahuun. Ascatarocon yoiquin isca huacahuun, —¡Aicho! Diosin ua amapaiyai cuscan un ahuun yorafo cushusharairan ahuun tsain tanasharononfo, —ishon anori man shinainno Upa Diosin matoqui unimacoinni. Ascafia maton nomuranshon man shinanquin isca huai, —Un ato cushuaihuunshon ua pui inantirofo, —ishon anori shinanyamacahuun. Pui fustihuunoo shinanyamacahuun. Ascataka Dios fasi yonoshosharapaiquin ato cushusharacahuun.

³ Ascacun ichananofo ato niaifo cuscara iyamacahuun. Ato yonoyamacahuun nan mafin man apaiyai cuscan arifi huanonfo. Ascataka ato Jesushuunshon ismasharacahuun mato huun caononfo. Man ascaino arifi Jesús cuscara inonfo.

⁴ Nan nocon cushumisciofin nocon Ifo Jesucristoquin nan nocoaitian mato yoishquin isca huaquin, —¡Aicho! Man mai ano niyoshon ua icoinra huafo man ato cushusharamisi. Ascan nantifi un iquinafo ya man ufu ipatiro niaifo patashari iishquin. Man ufu ipaiyai cuscaai unupacunacamaran, —ishon mato yoishquin.

⁵ Nanscarifiai pushcofoan iyoafofo nicasharacahuun mato yoiifo cuscan aashcaquin. Pushcofoan iyoafofoya shara huatanacahuun.

“Upa Diosicai cacapaimisifo cuscara tapipaima. Ascashon nan cacapaimisifo ato onaintimashqui. Ascan nan tsii huatananmisifofin shara huashoshquiquin. Nan cuscarafahuun Upa Diosin atohuun ramapaiquin ato shara huashofafainshquin,”

ishon Diospan tsain cununi.

⁶ Ascacun nan Upa Diosin fustiton ahuamamishti atiro. Nanton mato amapaiyai cuscan unimacai acahuun. Shinanqui isca huacahuun, —Un Upa Dios fasi yopai. Diosinmaisicai un ishara tiromaran, —ishon anori shinacahuun. Man ascaiton Diosin nan apaiyaitian mato amasharashquin man afu ipanon.

⁷ Ascashon mato huunoo shinanfainni mato cushusharashquin. Ascan man ahuafofo shinancha cuscan Upa Diosin yoicahuun maton nomuran unimamanon.

⁸ Masharo fonainquin cahuancacaiquin ahuafofo funafoanfainni piishquin. Nanscarifiai nan nocon noicasmamisi yoshin chaca Satanás cahuancacaini tsoan Diosihuunoo shinanyamaifo ato chaca huamafain ato omitsiscamashquin afanan Diosihuunoo shinanonfoma. Ascacun oinfain. Ahuafofo chahuunoo shinanyamacahuun. Upa Diosin mato shinanmapaiyai cuscan nan fusti shinacahuun Satanás mato chaca huamanonma.

⁹ Nan man omitsiscacai cuscan icoinra huafo futsafo manifi anoafofo omitsiscacani. Ascacun Satanás mato chaca huamapaiyaiton nicayamacahuun. Maton Ifo fustisirocon icoinra huacahuun. Ahuafofo chaca tunufafaincahuun.

¹⁰ Ascan man omitsisca cuscan anaitiano Upa Diosin a cuscaracoin mato imasharafain ahuun curush mato inanshquin. Diosin mato huun ramapacoin. Ascashon mato mutsishanaino nan ahuafofo huuscarafainni man Jesús icoinra huacoinnon. Ascashon nan fustisi man shinainton mato catonni man afu ipanon. Nannoshon nantififain ointirofo nocon Ifo Jesús sharacoinnan nantifiton ato niaifocoin. Nantianri man afu ipashquin.

¹¹ Nantofin ahuamamishtifo huapanacaquin. Nan fustiton atiro cuscaai tsoa futsan huatiroma. Nanscasi huapanaca.

Ahuun unutaquin Pedronun ato yoisharani

¹² Unfi Silvanohuunoo shinansharamisiquin. Unfi nan icoinra huatiroquin Diosin amapaiyai cuscan huamiscun. Un tsain ichapama cunua maton nomuranshon man shinansharanon. Un mato cunushona cuscan Upa Diosin mato huunoo shinansharamis. Ascan ahuafofo huuscarafainni Dios fustihuunoo shinansharacahuun.

¹³ Jesús icoinra huafo ichanannisifo murannoo Babilonia anoafofo mato yoisharafo. Uhuun facushta Marcos arifi mato yoisharapai.

¹⁴ Marifi man noinantanan yoinonansharatanacahuun. Manfin Cristo yorafoquin. Ascacun maton nomuran unimacahuun. Nanti.

Pedro

Pedronun Afanan Icoinra Huafo Cunushoni

Pedronun ato yoisharani

¹ Unquian Simón Pedro un mato cunu fomai. Unfi Jesucristo ahuun oinmatiquin. Un afu rafumisi. Ua nichini un futsafo ahuun tsain shara yoinon. Un mato shinain. Nocon Diosin nan nocon Numamisi Jesucristo un icoinra huaa cuscan marifi nanscarifi aquin man icoinra huamisi. Ascashon icoinra huacashon man mumisiri nan fasi shara finacoian. Diosin fasi sharacoin matori icoinra huamani.

² Ascan man Upa Dios yafi Furun Jesús man nocon Ifo man onancoincun matohuunoo shinansharaqin matohuun ramapaiqui maton ointi unimamatiro.

Cristo ahuun yorafo icafo cuscan

³ Jesús noco catonni a cuscara shara icain non afu ipanon. Nantofin ahuamamishti huatiroquin. Non Jesús onancoincun non yopai cuscan ahuun curushhuunshon noco inanshquin. Ascashon noco imapaiyai cuscan non anon.

⁴ Noco yoyiotiani cuscan ahuun curushhuunshon ahuara futsafo sharacoin noco ashoshquin a cuscaracoin non inon. Ascan nan icoinra huamafoan afin chaca huapaiyai cuscan huamisifo. Ascafiacun Jesús nocori numai non aton cuscara chacafo inonma.

⁵ Ascacun nan mato imapaiyai cuscan fusti ipaichuun. Icoinra huashu a cuscara sharacoin ifafaincahuun. A cuscara shara man icainoo Dioshuunooashu finonmafain mato amapaiyai cuscan fustisi tapicahuun.

⁶ Ascan mafi man apaiyai cuscan fusti shinancaquima ahuunooashu isharafoan ahuara ahuuscarafainoo tunufain Dioshuunoo fusti shinanfafaicahuun.

⁷ Ascatari nantifi yorafo shara huafain ato oi tsi huashon ato noifafaincahuun.

⁸ Man asca huafafaini nocon Ifo mimacaiquin man onancointiro. Ascashon mato amapaiyai cuscan man yonoshosharatiro.

⁹ Ascafia man ascayamai nan fusho cuscara man iishquin. Mato amapaiyai cuscaai man ointiroma. Ascacun man chaca huapaoni cuscan Jesús mato chaca soashonano man man ointiaquima.

¹⁰ Ascacun uhuun yoramishtichin Upa Diosin mato amapaiyai cuscan nantifi acahuun. Ascashon man tapicointiro mato catonnicun ahuun yorafo man inon afu ipashquin. Ascashuca man chaca huapaoni cuscan man afanan nasopacunacama.

¹¹ Ascan nocon Numamisi Jesucristo ahuun yorafo iquina ari marifi man nocotiro. Man nococun mato isca huashquin, —¡Aicho! Iquiyohuu. Min niyoshon uhuun tsain nicacoinmisiquin. Ascan natian min ufu isharafoacuiquin, —ishon Jesús mato yoipacushquin.

¹² Nan un mato yoia cuscan man man tapicoian. Un icon yoimisi cuscan. Ascashon nantishotapiquin nanfohuunoo un mato shinanmashquin man ascapacunon.

¹³ Un niyoatian nannori mato shinanmafainshquin. Uafin nocon Ifoan yonoaquin un mato yosinon.

¹⁴ Nocon Ifon Jesucristo ua cayacaficoian tapimana un samamashta nai. Ascacun un mato nanfohuunoo nantishotapiquin shinanmai marifi man u futan nannorisi shinanon.

¹⁵ Un mato yoiri mun nafiano un mato yosimisi cuscan man ointiaquimanonma.

—Cristo Diospan Furun chashapacucahuanaiton non oinniran, —ishon Pedro yoini

¹⁶ Ascacun nonfin mato tapimamisi nocon Ifo Jesucristo ahuamamishti huatiro, —Afin chipo nocoqui nasoshquiran, —ishon non mato yoimisi. Non mato yoimisi cuscan noco-funoofoan aton nomuranshon shunipafo onihua cuscaai non mato yoimisima. Noficoian non oinmisi cuscan non mato tapimana. Upa Diosin Jesús chashamapacufannaiton man non oinni.

¹⁷ Nantianri Upa Diosin nai muranshon Furunhuunoo yoini isca huaquin, —Nanfin uhuun facucoinqin. Un ahuun noicoian. Un aqi unimacoinniran, —ishon Upa Diosin nan ahuamamishti huatiroshaquin Furunhuunoo yoini. Tsoa futsacai a cuscara sharama. Arus fustifi icoinsharamisiquin. Furun ahuu cuscara sharamainquin ishon nan machi anoshon Upa Diosin noco ismani.

¹⁸ Nan machi ano norifi non afu ini. Nan machi Upa Diosin catonni nannoshon ahuun yono shara noco ismani. Nai muranshon Furunhuunoo yoiai cuscan norifi ahuun oi non nicacoinni.

¹⁹ Ascan Diospan tsain yoimisifoan inonpacoai cuscan Jesushuunoo cununi cuscan natian non icoinra huaquin financointiro. Ascacun marifi icoinra huacoicahuun. Nan tsainhuunoo shinanfafaicahuun. Natian man faquish muran ica shinantsa ain. Ascafia Jesús mato chashamashotiro nantishon tapiquin man tanasharanon. Nan yamutishon

man manamisi afanan shafaitian faquish inonma. Nanscarifiai Jesús afanan nocoaitian man manai afanan faquish cuscara muran ishquima. Nantianricai afanan ahua chaca shinantama maton nomurancairocon man fasi unimai finacoishquin.

²⁰⁻²¹ Ascacun tapicahuun isca huaquin. Diospan tsain yoimisifoancai afin aton nomuranshon shinanfain cunupaonifoma. Ascatama Diospan Yoshin Sharapan ato shinanmana cuscan nannoricoin cunupaonifo. Ascashon Diosin ato yonoa cuscan cunushonifo.

2

Futsafoan chani fusti ato yosipaonifo

¹ Ascafia nantianri futsafoan Diosihuunoa amaquiri yoipaonifo isca huaquin, —Upa Diosin noco yoia cuscan non mato yoiran, —ifacashon parapaonifo. Nanscarifiai nan cuscara paramitsamisifoan mato muranshon yoishcani isca huaquin, —Upa Diosin mato yoipaiyai cuscan noco tapimana non mato yoinon, —ishon mato yoifiacani chanimisifo. Mato fomanpaicani. Mato amaquiri yosiaifono afanan nannorisi cayacafi man shinanonma. Ascacun un mato yosin tsoan ato tanashufin funotirofoquin omitsiscapashcaquin. Nocon Ifo Jesús ato nashoni afanan chaca aton ifo inonma. Ascafia noco tapimapaoni cuscacai icoinra huafoa. Nanfoan Jesús ifoacasmacani. Ascacun nanfo ascaifoan Upa Diosin ato onaintimariscashquin omitsiscapanonfo.

² Nanfoan fasi chacacoin ato tapimanai cuscari yora ichapafoan ato tanashcani. Ascashon Diospan tsaincoinhunoa shinanchacatirofo. Ascacashu Diosin ato shinanmapaiyai cuscan funofo.

³ Nan chanimisifoancai futsafo shara huapaicanima. Nanfofin yoashicoinfoquin. Diospan tsaincoin ato tapimatamarocon aton nomuranshon amaquiri shinainfo cuscan fusti mato tapimashcani. Ascashon maton pui fianshcani. Ascatan mato parashquicani. Ascafia Diosin ato oin chaca huaifo cuscan ointiaquimashquinma. Ratoran shafata ato onaintimashqui omitsiscapanonfo.

⁴ Upa Diosin ahuun oinmati afu ica atiriffioan chaca huapaoni. Ascaifoancai Diosin ato rau huanima. Ascafia Diosinmaquinoashucaí tsoa raquishta ichotirofoma. Ascashon ato faquishihuan muran potani raqui fononfoma. Nanno faquishihuan muranshon mananonfo Diosin nantifi nan Jesús icoinra huafoa onaintimaitian atorifi fuopacufoannafo muran potashquin.

⁵ Nanscarifiai nan yorafo Noé niyoatian Diosin tsain nicacasmapaonifo. Ascan Noé ato yoini isca huaquin, —Dios sharacoin. Ascan maton chaca shatucahuun a cuscaran shara inonran, —ishon ato yoini. Ascafiashucaí tsoan Dioshuunoa nicacasmapaonifo. Ascacun Diosin yonoa faitahuanun nantifi yorafo manifoti anofo ato cuyoni asai futsunonfo. Noé yafi ahuun yorafo siete tushunifo. Diosin ato numaino asanifoma.

⁶ Nanscarifi aquin nan Sodoma yafi Gomorra ano icafoan fasi chacasi huapaonifo. Ascacun Diosin yoini, —Un ato onaintimacoinshquiran, —ishon yoini. Yoitan nai muranshon chi urumanhuan potani ato coaino nai cuyononfo. Nanno chi mapo fusti ini. Nanscarifi aquicai Diosinhuunoa futsafoan shinanmisifoma. Nanscacun ato musu huapaifiaino atiriffifain chaca shatuyamashu omitsiscapashcani.

⁷⁻⁸ Ascan nan Sodoma yafi Gomorra coataima nan nocofunun Lot Diosin yononi cuscan tanacoianshu isharapaoni. Ascan nanno icafoan chaca fustisi shinanpaonifo. Ascaifoan shafatifi Lotpan ato oinni chacanisí tapiaifoan. Ascaifoanno ahuun nomuran fasi fucash mupaoni. Nocofunufon shafatifi tsain mutsama yoifafainofo nicaí ahuun nomuran fasi ihuucoin muuni. Ascacun Diosin nan fusti numani chaca huamisifoya nanonma.

⁹ Nanscarifi aqui nocon Ifoan ahuun yora sharafotisi numatiro ahuarafoan noco chaca huamapaifafainnai cuscan non anonma. Ascashon nan chaca huamisifori ato onaintimashqui ahuun unutaqui ato omitsiscapanacafo muran potashquin afanan ariashu funonfoma.

¹⁰ Nan aton nomuran shinanchacamisifoan ahuara chaca fusti huapaiyai fo cuscan huamisifo. Nanfoan noco Ifo Cristo nicacasmamisifo. Ascan nan cuscara yorafo Diosin ato onaintimaquin finacoishquin. Nan cacapaimisifoan shinanquin isca huamisifo, —Tsoancai noco yonotirofoma, —ishon shinanfafaimisifo. Diospan nai oinmati sharafori roafiaicai tsoa musutirofoma.

¹¹ Asca huafiaifoanno Diospan oinmatifo nan Dios fu icafocai ato cuscarama. Nanfoanfin ato finoncoianquin. Nan cacapaimisifocai Dios oinmatifoan ato curush cuscarama. Ascafia Diospan oinmatifoancai Diosin ointaifi nan yoshin chacafoqui tsain chaca huamisifoma.

¹² Nan chaca huamisifocai Diosin nai oinmatifo cuscarama. Ahuarafohuuono tapia-mafiacanashu roanmitsapaimisifo. Nanfofin nan yoina pofu cuscarafuquin. Nan cuscara yoinatocai shinansharatiroma. Ahuara chaca huapayai cuscan fusti nanscasi huafafaintiro. Nan yora chacafuquin nanscarafuquin. Ascacufin Diosin ato achishon namashquin omitsiscapanonfo.

¹³ Nanfoanfin futsafo omitsiscamamisifoquin. Ascan Diosin copiquiri ato omitsiscamapacunaca. Shafatifi nanscara yorafoan faquishiataima chaca huapayai fo cuscan fusti huacani. Ascan manfin noinancoianquin ichananshon pishcaquin. Ascan nan paramitsamisifori matofu ichananfo. Jesús icoinra huacoianmafianashu mato muran iquiafo mato futan pianan mato parapaicani. Nantianri nan chaca huamisifo cuscari huacani. Nanscara fusti fasi fuchipaicani.

¹⁴ Nan ratorashta ainfo ointani afu ipaitiro. Chacasi huapaifafaini. Ainfoan Jesús tanasharayamashon ato chaca huamai atofu iishquin. Atonama fuchipaimisifo. Nanscasi aifin fuyamisifoquin. Diosin nan cuscara yorafo onaintimai omitsiscapanonfo.

¹⁵ Nanfofin Balaam cuscarafuquin. Balaam Beorpan furumun Dios cachiquiri huani. Pui fiishquin yorafo ato chaca huapaoni. Nan chaca huai cuscan fusti noipaoni. Nanscarafuquin mato paramisifoquin.

¹⁶ Diosin yonoafin Balaam ahuun burro nan yora tsaintiro cuscan ani. Ascashon ahuun ifo yoini, —Ahuuscaqumun min ua coshaiquin, —ishon nan muropan Balaam yoini. Ascaino Balaam nan yora nison cuscaracoin ini. Fasi amaquiricoi shinanni.

¹⁷ Nanscara nocofunufocai Diospan tsain noco tapimacoin sharama. Isca atohuunoa mato yoinon. Nanfofin pozoa nutsoa cuscarafuquin. Pozo ano nocoquin nonmaincoi-quin nan pozoa nutsofiashu non nomi shatutiroma. Nanscarifi aquin atohuunshon non Dioshuunoa tapitiroma. Coin fisopan oinquin non shinantiro, —¡Aicho! Natian oi fui. Nocon mai mutocoincun muchana huashoin nocon yonofu foai sharanon, —ishon non shinantiro. Ascan coin fiso fuuhuanquin noco finonquin nocon mai muchana huatiroma. Nanscarifi ai nan yorafoan noco shinanmapai Dioshuunoa noco tapimaifai atohuunshon non ahuu tapitiroma.

¹⁸ Nan chanishunifo fasi cacapaimisifo. Ascashon yoitirofo isca huaquin, —Non tapia cuscaicai tosa futsan tapiama. Nan futsafoan atirofoma cuscafin non huatiroquin, —ishon ipaiti yoifiacanashu chanimisifoquin. Futsafoan ato chacan ramashta shatufiacanashu nan paramisifoan ato yoitiro isca huaquin, —Min futsan ahuin fu ipayai cuscafin sharaquin. Ahuunfin min fasi unimatiroquin. Non anoncahuun, —ishon futsan iyotiroquin futsa afanan chaca huamashquin.

¹⁹ —Man ahuaara shara huahuunoashuca man Dios fu ipatiroma. Ascacun nan man ahuaara chaca huapayai cuscan huacahuun. Man apayai cuscan tosa mato shatumatiro-quin. Unimacai acahuun, —ishon ato yoifiacin ato fasi amaquiri yosiafo. Ascafia naporicai isharamisifoma. Afiri paramucani. Nan chaca fustifi ato ifoquin. Nanfo Satanás ahuun oinmatifo. Ahuarafo iyamarai tsoaran futsa nocon ifocun non ahuun oinmati itiro.

²⁰ Tsoan nocon Ifo nan nocon Numamisi Jesucristo icoinra huashocai nan icoinra huamafoan chaca huamisifo cuscan afanan chaca huaima. Nan chacafomaquinoashu pashcatiro afanan ato ifo ishquima. Ascafia afanan ahuun chaca aqui nasoino nan ipaonima cuscara fasi chaca finacoian iishquin.

²¹ Man Jesús fu rafumisifishu chipo man cachiquiri huashu afanan man aqui nasocas-mai. Ascacun man Jesús tanayamamisifin shara icuanaquin. Nan Jesús icoinra huamafo Diosin ato onaintimashqui. Ascafia tsoan Jesús Ifopaonifiashu chipo cachiquiri huafon ato onaintimaquin finacoishquin.

²² Nanscarifi ai nocon shunifoan iconcoi Diosin tsainhuunoa cununifo isca huaquin, “Pashnafin nan pashnacoquin ahuaara futsama. Pashna nan imisi cuscan anantiro. Ascashu chaimashta cayotiro. Ascatan afanan nasocuran ahuun anan afanan pishotiro. Yahuarifi nan yahuacoquin ahuaara futsama. Yahua nan imisi cuscan michanpan ipaitiro. Nashifiashu afanan michan ano nasotiro nannoashu afanan michanashquin.”

ishon cununifo. Nanscarifi ai tsoan Diospan Yoshin Sharuunshon ahuun ointi fianan huataimashuñ Satanás ahuun yoracoquin. Ahuaara futsa cuscarama. Ahuun chaca shatuyotirotia nan chaca huamisi cuscan afanan ahuun chacaquin nasotiro.

3

Nocon Ifo Jesús afanan nasoshquin

¹ Uhuun yoramishtichin afanan un mato cunu foma futsai. Nan na cunun un mato shinansharama futsapai man afanan ointiaquimanonma.

² Diosin tsain yoimisi sharafo nan nocon shunifoan yoipaonifo cuscan norifi nocon Numamisi Jesús non afu rafumiscun noco yonopaoni cuscan huafain un nanfohuunoa mato shinanmapai.

³ Iquisi un mato tapimapai Jesús man oti chaimacoin. Nantianri atirifi yorafoan chaca huapayai fo cuscan fusti huashquicani. Nanscarafofin matoqui cashu mutsamatirofoquin.

⁴ Ascashon mato yoiquin isca huacani, —¿Diosin yoini cuscamun a Jesús oa raniquin? Nocon shunifo nayopaonitiancai ahuashta fianananma nanscara fustisi. Diosin mai onihuani chaincai ahuashtari fianananma. Nanscasi airan, —ishon yoishquicani.

⁵ Man tapificashocai tsoan shinanpaicanima Diosin unuhuan nushmancayan mai onihuani. Ascashu unhuansi iyopaoni. Ascafia Diosin ahuun tsainmanshi unuhuan nushmancayan mai onihuariscatani.

⁶ Unuhuanunri mai fupoaino nantifi yorafori asai futsunifo.

⁷ Nanscarifi aquin ahuun tsainmanshi nai yafi mai yoiai cuscan mucuyotiro chipo nantifi coashquin. Nantianri Jesús icoinra huamafo nan chaca huamisifo Diosin ato onaintimashqui omitsiscapanonfo.

⁸ Ascacun uhuun yoramishtichin ointiaquimayamacahuun man non yoimisi mil farifi fasi chaicoinquin. Ascafia nan shafa fusti non yoimisi chaimashtacoin. Ascashon non shinain cuscaei Diosin shinainma. Diosin nanscarasi nan rafu oinfafainni.

⁹ Ascafia atirififoan shinanacuin isca huacani, —Nocon Ifoan yoiyotiani cuscan icataima. Ascafia man yoini cuscan finonpacucoinran, —ishon shinancani. Ascaquimaron Diosin nocoahuun ramapicoquin. Tsoacai omitsiscapanacafo muran potapaima. Funaquimafin ato mana sharamisiquin nantifiton aton chaca shatunonfo ahuun tsain nicasharashcaquin omitsiscapashcaquin.

¹⁰ Ascafia nocon Ifoan Jesús samamashta nocoriscai. Yomutso yamu noco pushuano nocoriscaitocai tsoan tapitiroa ahuutiacaicain nocoriscaicain. Nanscarifiai tsoancai tapiama ahuutianmain nocon Ifo nocoriscaticain itisharafoma mustairiscatani. Nan nocon Ifo nocoaitian achahuanoquin iishquin. Nantiantan nai murannofo cooi cuyotanaino yamariscatashquin. Mairifi nantifi mai anoafori cooi cuyotanaino yamariscatashquin.

¹¹ Na rama un mato yoiai cuscan nantifi ishquiai topicashon nocon Ifo nicasharacoincahuun. Nanscara shara icahuun. Non itisharashucaí non ipaoni cuscan non afanan ashquima. Afin noco imapayai cuscan fusti non anon.

¹² Jesús ratoran shafata nocoriscaticuin shinanfafaicahuun. Ascacun futsafo Jesushuunoa yoicahuun icoinra huanofo aton chaca shatunonfo Jesús samamashta oiquin. Icon Jesús oaino nantifi nai muran cooi chii huancoinni fasi mushan mushancoin huai.

¹³ Ascafia Diosin yoini cuscan nanfo coano nai yafi mai funa futsa oni huashquin icoinra huafo fusti nanno iishquicani. Ahuara chacacai ano itiro. Shara fustisi itiro. Ascacun nan non mana sharanoncahuun.

¹⁴ Uhuun yoramishtichin man Jesús manacuin maton nomuran shinansharafafaincahuun. Ahuara chaca shinanyamacahuun. Man ascaiton Diosin mato ointiro ahuun Furunhuunoashu man sharacoin icun. Diosiqui ratuquimarocon shinanquin isca huafafaincahuun, —Upa Diosin ahuun Furunhuunshon ua noi. Unrifi un Dios noi afu rafupacushquin —ishon nannori shinancahuun.

¹⁵ Ascacun ointiaquimayamacahuun. Nocon Ifo oataima funaquima non manasharanoncahuun. Non futsafo ahuunoa yoiaiton aton chaca shatucashon Jesús ifoanonfo afu ipasharashcaquin. Nan nocon yorashtan Pablon nannori Upa Diosin a tapimanicun noco cunushoni.

¹⁶ Nan cunuaite ahuun cunu Pablonun nannorisi cunumisi nocon Ifo afanan oshquiai cuscan ahuunoa cununi. Non atirifi a cununi cuscaei non funa tapiyotiro. Non fasi nan fusti shinainno Diospan Yoshin Sharahuunshon non tapitiro. Ascafia nan Diosin tsain tapiafoma shinan futsamisifoan Pablonun cununi cuscan amaquiri yosiafo. Nanscarifiai Diosin tsain futsafori amaquiriri yosimisifo. Ascacanashu omitsiscapatirofo.

¹⁷ Un mato yoia cuscan man man tapia. Ascacun oinfain marifi nan Diosin tsain nicasmafoan mato amaquiri yosiaino man nicanonma. Man Jesús icoinra huacoinnaiton mato cushusharatiro. Ascafia nan amaquiri yosimisifo man nicaino marifi man funotiro. Ascashon man afanan amaquiri shinantiro.

¹⁸ Ascatarocon nocon Ifo Jesucristo ahuun tsain nicacoinfaincahuun nan onanquin finacoinshcaquin. Mato shara huapayai cuscan a cuscara shara ishcaquin. Maton nomuran tapisharacuin finacoinshcaquin. Nan fusti non Jesucristo yoiquin isca huatiro, —Minfin nocon Ifo. Minhuunshon fusti non ahuara shara huatiro. Mirus fustifin min

sharacoinquin, —ishon natian yafi nan inonpacoai cuscan non yoipacunon. Nanscasi ipanon. Amen. Nanti.

Pedro

Juanpan Icoinra Huafo Cunushoni

Diosin tsainman noco nimapacutiro

¹Unquian, Juan, un mato cunu fomai man tapinon. Jesucristohuunooa un mato tapimani. Un nicafain un oinyanan un mucuman mucuinmisi cuscan un ahuunooa mato yoi man tapinon. Ahuashta oniataima Jesús apa Dios fu iyopaoni. Upa Diosin ahuun tsain noco yoipaiyai cuscan Jesús noco tapimapaoni. Ascashon ahuunshon non Diosin tsain tapitiro noco nimapacuai.

² Apa Dios fu ifiashu nocoqui ftoni. Nanton noco nimapacutiro. Ascashon non oian cuscan un mato yoi.

³Upa Dios futan Furun Jesucristo shinainfo cuscan norifi atohuunshon non shinanmisi. Shinainfo cuscan non huai. Non atofu rafumisi. Ascashon non oian cuscan huafain non nica cuscan un mato yoi marifi nannorifosi man shinanon. Ascashu man no fu rafusharatiro.

⁴Un mato cunu fomai non unimai cuscan marifi man unimanon. Non natian unimayofiai man marifi nannorifosi shinainno non fasi mimacai unimatiroquin.

Jeshuunshon chacapan afanan nocon ifo itiro

⁵Ascan Diospan Furun yoini cuscan nicashon non mato yoi. Noco isca huani, —Farin chashainocai faquishtiroma. Nanscarifiai Diosin shara fustisi icanocai ahua chaca afu itiroman, —ishon noco yoini.

⁶Ascafia non yoiquin isca hua, —Non Diosin shinain cuscan norifi nannorifosi non shinanmisi. Non afu rafuuran, —ifiashon non chaca huashu non chania. Diosin iconquin yoini cuscan non aimi.

⁷Ascatamarocon ahuun tsain yoini cuscacon non aafin fasi sharacoin itiroquin. Nanton shinain cuscan norifi nannorifosi shinanshquin afu rafushquin. Non ascaiton nocon chaca noco soashotiro. Jesús Upa Diospan Furunmun ahuun imi foyanan noco nashoni nantifi nocon chaca noco soashoshquin.

⁸Ascafia non yoiquin isca hua, —Uncai chaca huama, —ifiatan non nofiri paramumisi. Jesús iconquin yoini cuscan nocon nomuran non nanucoianma.

⁹Ascatamarocon nocon chaca non yoiaton Upa Diosin yoini cuscan noco rau huatiro. Non chaca huamisi cuscan afanan Upa Diosin shinantiroma Furunmun noco nashoni nocon chaca soashoshquin. Upa Diosin sharacoinshon noco yoini cuscan nanscacon huai. Nantifi nocon chaca noco soashotiro non chaca huamisima cuscara non inon.

¹⁰—Nantifi yorafoan chaca huamisi foran, —Diosin huani. Ascafia non yoiqi, —Uncai ahua chaca huamisi foran, —ishon non futsafo shinanmatiro —Diosin noco pararan, —ishon anori yoiquicai noncai ahuun tsain icoinra huacoinnama.

2

Criston Apa Dios nocohuunooa yoisharatiro noco onaintimanonma

¹Uhuun yora mishtichin, un mato cunushoni man oinshon ahua chaca huanonma. Ascafia ahua non chaca huacun Jesucristo apa noco yoishotiro nocon chaca soanon. Yoiquin isca huatiro, —Upa, un ato nashoniquin. Aton chaca soashohuun, —Apa huatiro. Atoncai ahua chaca huamisima. Afin shafacafi icaquin. Ascan Apa Dios noco yoishotiro nocon chaca soashonon.

²Noco nashonishaquin nocon chaca noco soashotiro. Noco fustima. Nantifi manifotihuunooashu noco nashoni nocon chaca soashoshquin.

³Ascan Jesús noco yoini cuscan aquin non tapitiro non afu rafui. Nanton shinain cuscan non tapitiro norifi nannori shinanquin.

⁴Futsan shinanquin isca huatiro, —Un Jesús fu rafuiran, —ifiatan yoitimacoin. Ahuun tsain nicasmai. Nan cuscara yorafin chanimisiquin. Jesús icon yoini cuscan ahuun nomuran nanucoianma.

⁵Ascan ratoran yoran ahuun tsain nicacoinquifin Dios noicoquin. Ascashofin tapitiroqui afu rafucoian.

⁶Ascan futsan shinanquin isca huai, —Un Jesús fu rafucoian, —icafin Jesús icai cuscan arifi itiroquin.

Noco yononi cuscan tsain funa shara

⁷Ascan un mato cunushonai cuscan man man nicamisi. Jesús maton ifo iqui taunitian mato yononi man man nicamisiquin. Mato yonooa cuscan mato tapimani.

⁸ Ascafia ahuun tsain tsoan nicayomisima cuscara un mato cunushoni. Noco yonoquin isca huani, —Yorafohuun noicoincahuun, —noco huani. Man ascaicai man chaca huapaoni cuscan afanan man atiroma. Jesús shafacafi ica cuscan marifi ahuunoashu man shafacafi itiro.

⁹ Ascafia ratoran yoran yoiquin, —Un Jesushuunoashu shafacafi icaran, —ifiatan yora noicasmashu aacai shafacafi icama. Atoncai Diosin tsain nicacoiantaima.

¹⁰ Tsoan yorafohuun noi aafin shafacafi icaquin. Oinsharaicai non pacutiroma. Nanscarifi aquin tsoan shafacafi ishoncai ahua chaca huafafaintiroma.

¹¹ Ascafia ratoran futsan futsa noicasmaicai aacai shafacafi icama. Chaca huafafaini. Chaca huafafainquicai ahuun nomuran shinantiroma ahuun chaca shatushquin. Ascafia tapiama man fasi funocoian.

¹² Uhuun facumishtichin maton chaca Jesushuunshon Upa Diosin man soashona afanan afo shinanshquima. Ascacun un nannori mato cunushoni.

¹³ Ahuashta oniataima Upa Dios iyopaoni.

Anifomishtichin, ahuu cuscaramain Upa Diosiquin man man tapia. Tapishon man icoinra huamisi. Ascan un matori cunushoni.

Pushcohuaifoan Satanás mato amapaiyai cuscacai man amisima Jesús tanasharashquin. Ascan un matori cunushoni.

Uhuun facufoan marifi nocon Upa Dios ahuu cuscaramainquin man man tapia. Tapishon man icoinra huai. Ascan un matori cunushoni.

¹⁴ Anifomishtichin, un cunua cuscan ahua oniataima Upa Dios iyopaoni. Nanmain ahuu cuscaraquin man man tapia. Ascan un nannori mato cunushoni.

Pushcohuaifoan, Satanás mato amapaiyai cuscacai man amisima. Jesús tanasharashquin. Ascan Jesushuunoashu man mutsisipacoin. Diospan tsain maton nomuran man man nanua icoinra huafafainshcaquin.

¹⁵ Ascatan ahuarafoan Upa Diosimaqui noco imapaiyai fo noiyamacahuun. Ahuarafo yora chacafoan aton nomuran shinainfo cuscan afo noiyamacahuun. Afo noiquicai man Dios noicointiroma.

¹⁶ Ahuara chacafo aton ifono yorafo imisi cuscan un mato tapimai. Ahuara chaca fuchipafain ahua chaca oinquin mupaimisi icain —Un ahuarayashuffin un isharaquin un futsafo finoncoian. Uncai futsafo cuscarama, —icashu cacapaimisi. Ascara chacafocai Upa Diosin noco amapaima. Ascara chacafoan yoshin chacahuunshon noco amapai.

¹⁷ Ascafia ahua chacafo cuyoi futsui. Ahuara chacafo yorafoan fuchipapaiyai cuscar nanfori cuyoi futsui. Asca Diosin noco amapaiyai cuscashu nanfo Upa Dios fu ipashquicani.

Iconmisihuunoa yafi chanimisi

¹⁸ Ascan uhuun yoramishtichin un tsain futsari mato yoi man tapinon. Diosin nantifi maitio nan chaca huamisifo onaintimayoi. Man nocoti chaima. Man man nicamisiri nan nocofunun Cristo noicasmái arifi oshquin. Natianri Cristo noicasmái nococani. Ascacun noco tapitiro Upa Diosin nan chaca huamisifo onaintimaitian nocoti chaima.

¹⁹ Nan yorafoan no futan Cristohuunoa nicayofiapaonishaquin noco potafo. Ascaifoan non tapitiro no futan Cristo icoinra huacoinmisisima. Noco potafo. Ascaiton non tapitiro afocai no fu Cristo yorama.

²⁰ Ascafia mancai ato cuscarama. Upa Diosin ahuun Yoshin Shara matoqui nichini matofu rafupacunon. Asca ahuunshon man iconcoian tapia.

²¹ Mancai icon tapiamama. Ascacucui un mato cunushonima. Ahuara icon iyamarai iconma man Diospan Yoshin Sharahuunshon tapicoian. Man tapiari nan chanimisifoancai noco icon yoitirofoma.

²² Ratofomain chanimisiquin un mato tapimai. Tsoan isca huai, —Jesuscai Cristoma. Diospan Furunmafingquin, —icafin chanimisiquin. Nanscarafoan Cristo noicasmacani. Upa Dios yafi Furun icoinra huafoma.

²³ Ascatan tsoan isca huai, —Criston Diospan Furunmaran, —icacai Upa Diosin yora itiroma.

²⁴ Ascatan Jesushuunoa man nicaquin tauhuani cuscan cachiquiri huayamacahuun. Shafatifi ahuun tsain maton nomuran nanusharacahuun. Man ascafin Upa Dios yafi Furun fu man rafupacunacaquin.

²⁵ Noco yoyotiani cuscan non afu ipasharatiroquin.

²⁶ Futsafoan mato amaquiri tapimapai. Ascan un atohuunoa mato cunushoni man tapinon.

²⁷ Ascafiacquin Upa Diosin ahuun Yoshin Shara matoqui nichini matofu rafupacunon. Natianri ahuunshon man iconcoin tapia. Nan fusti non yopai noco tapimanon. Afin mato tapima cuscan shafatifi maton nomuran ahuun tsain nanucoincahuun afu rafushquin.

²⁸ Uhuun yoramishtichin, Jesús mato tapima cuscan cachiquiri huayamacahuun. Shafatifi nicacoincahuun yoia cuscan aqui. Ascan Jesús nocoaino man aqui rafipaitiroma. Ascatararocon ahuun ointaifi ahuara chacafo man huamisi shinanshma man Jesús fu isharatiro.

²⁹ Dios isharacoinmisi ahuashtacai chaca huamisima. Man man tapia. Tsoa isharamisi nanfin Upa Diosin imapacunacaquin ahuun facu inon. Nanri man tapia.

3

Diospan facufo

¹ Upa Diosin nocohuun fasi noicoin. Nocohuun shinansharamisi. Ascanshon noco yoiquin isca huatiro, —Manfin uhuun facufoquin, —ishon yoitiro. ¡Aicho! Shinancapon. Iconcoin nonfin Diospan facufoquin. Ascafiashon iconra huacoinyamashon Upa Dios onanmisifoma. Ascan non Diospan facufiacun tapiafoma.

² Uhuun yoramishtichin icon natian nonfin Diospan facufoquin. Noco chipo imai cuscan tsoan tapiataima. Ascafia Jesús oaiton oin non a cuscaracoin ishquin. Nan man non tapian.

³ Tapiashu non a cuscara sharacoin ipaitiro. Ascashon nocon chaca non potatiro a cuscara sharacoin iishquin.

⁴ Tsoan chaca huafafainicai Diosin noco yononi cuscan aima. Noco yonoa cuscan ayamashu chacacoin iqui.

⁵ Man man tapia nocon Ifo Jesús noco cuscara nocofunuri ini nocon chaca noco soashoshquin. Atocai chaca huamisima. Apa Diosin yonoa cuscan fustisi huapaoni.

⁶ Tsoan afu rafushocai chaca huafafaintiroma. Jesushuunoa tapia. Ahuunoa onancoiantaima.

⁷ Uhuun yoramishtichin, futsafoan mato amaquiri yoipaicani nocon Ifo tanatima huaquin. Ato nicayamacahuun. Tsoan isharamisi nocon Ifon cuscara shara itiro. Noco imasharatiro a cuscara isharamisi non inon.

⁸ Upa Diosin yora oni huataima yoshin chaca Satanás chaca huayopaoni. Ascan tsoan chaca huafafaini arifi Satanás ahuun yoraquin. Ascacufin Diospan Furun oniquin Satanás ahuun yono cuyoi futsunon.

⁹ Upa Diosin noco nimapacunaca ahuun facufo non inon. Ascan tsoa ahuun facushocai chaca huafafaintiroma. Non ahuun yora ipaiquicai non chaca huamisi itiroma.

¹⁰ Ascan ratofomain Diospan facufo iyamarai Satanás ahuun yorafoquin non tapitiro. Tsoa Diosin yoia cuscan aimacai ahuun facu itiroma. Tsoan futsafo noiamacai arifi Diospan facu itiroma.

Nantifi noinantanacahuun

¹¹ Jesús ifoaquin tau huashon man nicamisi isca huaquin, —Noinanacahuun, —ica man man nicamisi.

¹² Caín cuscara iyamacahuun. Cainfin Satanás yora iniquin. Chipocu isharamisicun afi ascayamaquin chipocu rutuni.

¹³⁻¹⁵ Non futsafo noishon non tapitiro Upa Diosin noco fiananan huaa non afanan omitsiscapanaca muran catanmarocon non afu ipanon. Tsoan futsafo noiyamashu omitsiscapanacafo fu ipatiroquin. Tsoan futsa noicasmái aafin rutumitsamisi itiroquin. Man man tapia rutumitsamiscái Dios icano nocotiroma. Ascan iconra huamafoan mato noicasmaino mustairiyamacahuun.

¹⁶ Jesucriston fasi nocohuun noiquin noco nashoni. Afi nocohuunoashu napai noco nashoni. Futsafo noicoin atohuunoashuri non natiro.

¹⁷ Ascatari futsa ahuara yopacoinfaiiton non atohuun ramapaiyamashucaí Upa Diosin ato noiai cuscan non ato noia.

¹⁸ Ascan uhuun yoramishtichin, futsafo noicoincahuun. Non isca huashu, —Un minhuun noiran, —ifiatan yopaifo cuscan non inanyamacai sharama. Non ato shara huacoinshon non ato noicoitiro.

¹⁹ Ascaquin non tapitiro Jesús iconcoin noco tapima cuscan non ai. Ascan ahuun ointaifi ratutama nocon nomuran unimatiro.

²⁰ Ascafia nocon nomuran non shinanquin isca huai, —Un ahua chaca huamaran, —non ifaiiton Diosin nocon nomuran nantifi tapicoian.

²¹ Ascan uhuun yoramishtichin, nocon nomuran non shinain cuscan non chaca huayamashucaí Diosqui rafipaitiroma. Non aqui ranotamarocon non afu isharapai.

²² Non anori shinainfin Upa Diosin noco yonoai cuscan non aicain. Non ascaino nocoqui Upa Diosin unimatiro. Ascatan non yocai cuscan noco inatiro.

²³ Noco isca huani, —Uhuun Facu Jesucristo icoinra huacahuun. Noinancahuun, —noco huani.

²⁴ Ascán tsoan Upa Diosin yononi cuscashu afu rafumisi itiro. Upa Diosin ahuun Yoshin Shara nocoqui nichini. Ahuunshon non tapitiro Upa Diosin no fu icacainaiton.

4

Ratomun Diospan Yoshin Shara iymarai Satanás yoshin chaca non tapitiro

¹ Uhuun yoramishtichin, ratoran futsafoan mato yoiquin isca, —Un mato Diospan tsain yoiran, —ifiacaquin atirifoan paramisifo. Ascaiton ato nicashon man Diosin tsain ointiro. Aton tsain ascacoinyamaiton man tapitiro Diospan Yoshin Sharahuunshon mato yoiama. Diosin ato yonoama.

² Ascán tsoan yoiquin isca huaquin, —Jesucristo nan Diospan Furun Apa ariashu mai ano oni nocofunucoin ishquin, —ishon mato anori yoiaiton Diospan Yoshin Sharahuunshon mato yoiaiton man tapitiro.

³ Ascán tsoan mato Jesushuunoa yoipaiyamaiton man tapitiro acai Upa Diospan yorama. Diosihuunshon mato yoitamarocon Jesús noicasmaifohuunoa mato yoi. Man man nicamisi nan cuscara yorafo manifesti foanfafaicani. Natianri nantifi mai ano icafo ascacani. Yoshin chacapan Jesús noicasmaquin ato yonoa.

⁴ Mancai ascaranma uhuun yoramishtichin. Manfin Diospan facufoquin. Diospan Yoshin Shara matofu ipanaca. Atofin Satanás finoncoianquin. Ascacun marifi ahuunshon Jesús noicasmafoti man finoncoianquin. Nanfo Satanás ato iquina. Mato amaquiri tapimapaicani. Ascafiainfoan ato tanatamarocon Jesús tsain man nicaquin finacoian.

⁵ Nanfoancai icoinra huacanima. Diosin shinain cuscaai shinancanima. Jesús icoinra huamafoan shinainfo cuscan futsafori tapimapaicani. Ascán icoinra huamafoan nan-norisi shinainfo ato nicaipaicaquin.

⁶ Ascashon non tapitiro ratofoanmain Diospan Yoshin Sharahuunshon noco icon yoiyamaquin yoshin chacahuunshon noco parapaicain. Non tapitiro isca huaquin. Nonfin Diospan yorafoquin. Tsoan noco nicapai afin Diospan yoraquin. Ahuun Yoshin Sharahuunshon noco icon yoi. Ascán tsoan noco nicapaima acai Diospan yorama. Yoshin chacahuunshon noco parapaitiro.

Non futsafo noicoianquin tapitirofo non Diosi fu rafumiscoin

⁷ Uhuun yoramishtichin, Upa Dioshuunshon non yorafo noitiro. Ascashu non noinanoncahuun. Tsoa Diospan facuashu afu rafui. Ascanshon futsafo noicoaintiro.

⁸ Upa Diosin noimisiquin. Ascán tsoan Dios noiyamaquin onancoiantaima.

⁹ Upa Diosin nocohuun noiquin noco ismani isca huaquin. Ahuun Furun fusti manifoannatihuunshon nichini ahuunoashu non afu nipanon.

¹⁰ Mai ano nichini nocohuunoashu noco nashonon nocon chaca soashoshquin. Nan shinainquin non tapitiro Upa Diosin noco noicoinmisi. Noiaicoin futsacai ascaranma. Noncai futsafo noifiai ascatiroma.

¹¹ Ascán uhuun yora mishtichin, Upa Diosin noco fasi noicoin norifi non noinanoncahuun.

¹² Tsoan Upa Diosin oinyamafiamisishaquin noinanquin non tapitiro no fu ica. Non asca huafafainquin Diosin noco noiai cuscan norifi ahuunshon futsafori non noitiro.

¹³ Ahuun Yoshin Shara nocoqui nichini. Ascacun non tapitiro no fu ipanaca. Ascarifiai non afu ipanaca.

¹⁴ Non oinni cuscan non mato yoi. Upa Diosin Furun nichini manifoannati aton numamisi inon.

¹⁵ Ascán tsoan yoiquin isca huai, —Jesusfin Diospan Furunquin, —huafin Upa Diosin afu ipanacaquin. Ascarifiai Upa Dios fu ipatiroquin.

¹⁶ Ascán noco noicoiainton non mumisi. Natianri noco noiyaiton non icoinra huatiro. Diosin nantihuun noimisiquin. Tsoan afu rafushon futsafori noicoinmisi. Ascarifiai Upa Diosin afu rafupacunaca.

¹⁷ Non afu rafuashu noco amapaiyai cuscan non noinanointiro. Ascatan non Upaqui nocoaitan non ranotiroma. Noco yoia cuscan non ratutamarocon non unimatiro. Nantianri Upa Diosin manifoannati ato yoishquin ratofoanmain chaca huayamaraquin nicasharamisiquin.

¹⁸ Noco noiai tapiashucaí non ratutiroma. Non noiyamashu, —Upa Diosin ua onaintimairan, —icashu non ratutiro. Tsoan anori shinaincai Diosin noco noiai cuscan aima. Ascafiahu Diosin noco noiai cuscan aquin non ratu potatiro.

¹⁹ Non Upa Diosihuun noiataima afincoi noco huun noitauni. Noco huun noiaino norifi natian non Upahuuri noicoitiro.

²⁰ Tsoan yoiqiu isca huai, —Un Upa Dios noicoiran, —iflashon futsa noicoianma. Aafin chanimisiquin. Futsa oinfiaguin noi yamashocai Diosiri oinyamaquin noicoitiro.

²¹ Upa Diosin noco isca huaqui yononi, —Ua noishon futsafori noicoicahuun, —ishon yoini.

5

Non Jesús icoinra huacoinquin non ahuunshon futsafo noitiro

¹ —Jesús Diospan Furun. Diosin catonni nocon Numamisi inon, —tsoan icoinra huaiton Upa Diosin ato funa cuscara imatiro ahuun facufo inonfo. Ascan tsoan Upa Dios noi quin ahuun facuri noitiro.

² Ascan non Dios noishon noco yonoa cuscan aquin non tapitiro ahuun facufori non noicoi.

³ Upa Diosin noco yoi a cuscan aquin non ahuunshon Dios noicoitiro. Noco yonoa cuscaai curushma. Upa Dios noiashu noco yonoa cuscan non unimatiro.

⁴ Non Upa Diosin facushoncai ahuaa chacafoan noco shinanchacamapaiyai cuscan afoancai noco funomatiro. Diospan Furun Jesucristo icoinra huashu ahuafoan noco chaca huamapaiyai cuscan non finotiro.

⁵ Ahuaa chacafoan noco funomapai Diosin noco imapaiyai cuscan non anonma. Ascafia Jesucristo Diospan Furun non icoinra huashon ahuunshon na chacafo non finotiro chaca huashquima. Nan icoinra huafoansi finotiro.

⁶ Man non tapia Diospan Furun nocofunu ini. Un oinmisi cuscan un mato yoi man icoinra huacoinnon. Nan Jesús unu muran iquimamaino Upa Diosin yoini isca huaquin, —Naafin uhuun facuquin, —ishon yoini. Jesús naitianri ahuun imi foaino Apa Diosin noco tapimani nanton ahuun Furumun. Ahuun Yoshin Shara iconmisi arifi nocon nomuran yoisimisi Jesús Diospan Furun.

⁷ Ascan rafu non fustiton nannorisi yoiquin Jesús nocofunu nan Diospan Furuquin.

⁸ Jesús unu muran iquimanitian yoifain naitian ahuun imi foni cuscan tapimafain Diospan Yoshin Sharari noco yoisimisi. Nannori fosi yoiquin rafu non fusti huani.

⁹ Ascan yorafoan noco ahuaa yoiaton icoinra huatan Upa Diosin noco yoi a cuscan mima huaquin non icoinra huacoinotiro. Acai yora cuscarama. Aafin Dioscoi quin. Ascan ahuun Furunhuunoa noco yoiaton non icoinra huacoinotiro.

¹⁰ Tsoan Diospan Furun icoinra huashon Apan Diosin ahuunoa yoini cuscan ahuun nomuran icoinra huatiro. Ascafiaquin ahuun Furunhuunoa yoisimisi cuscan tsoan icoinra huayamashon nanton, —Dios chaniran, —ishon yorafo shinanmapai.

¹¹ Isca huaquin Upa Diosin yoini, —Uhuun facuunshon un mato nimapacutitoran, —ishon yoini.

¹² Tsoa Furun fu rafuafin nipanacaquin. Ascafia tsoa Furun fu rafuamakai nipatiro.

Ahuun unutaqui ato yoisharani

¹³ Jesús Diospan Furun man icoinra huua. Ascan un mato nanfo cunushoni man nipanaca man tapinon.

¹⁴ Non Upa Dios cufiai cuscan arifi asca huapaiquin noco ashontiro. Ascaino ranotama non Upa cufitiro. Noco ashoin cuscan tapicoishquin.

¹⁵ Noco nicaiton non tapisharatiro ahuaa non yoca cuscan noco ashoiton.

¹⁶ Ascan tsoan Jesús icoinra huafishon chaca huaiton oinquin non Upa cufishotiro chaca shatunon. Ascan Upa Diosin ato numatiro nipanonfo ato imasharatiro. Ascafia futsafoan ipaiti Jesús ifoancoinna ointa iyofishon chipo potocian. Chaca shinan-fafaiquin Dios cachiquiri huacoinnafo. Ascarafocai tsoashtan numatiro man nipanon. Naashu omitsispacunacafo muran focani. —Ahuunoa Upa cufishocahuun, —ishoncai un mato anori yoima.

¹⁷ Upa Diosin noco amapaiyai cuscan ayamashu chacacoin itiro. Nan chacafo huaifoan non Upa cufishotiro aton chaca shatunonfo Upa Dios fu ipashquin.

¹⁸ Ascan non tapia ratoranfo Upa Diosin ahuun yoracoinshocai chaca huafafaintiro. Diospan Furunmun ato cushusharatiro nan yoshin chacanun ato achinonma chaca huamashquin.

¹⁹ Man non tapiari non Diospan facufo. Nan icoinra huafoma ahuun facufoma. Manifoannati nan yoshin chaca ato iquina.

²⁰ Diospan Furun oni Dios iconmisiton noco tapimanon. Ahuunoashu non Upa Dios nan iconmisi fu non ipatiro. Furunri Diosicoi no fu ipanaca. Ascan noco nimapacutiroquin.

²¹ Ascano uhuun facufoan, ahuafo Diosicoi ma shinanyamacahuun. Nanti.

Juanpan Afanan Icoinra Huafo Cunushoni

Juanpan ato yoisharani

¹⁻² Unquian, Juan, un fari ichapa icoinra huafo un aton cushumisi. Un mato cunu fomai man tapinon. Tsain icon non nicamisi cuscan nocon nomuran non nanupacunaca. Ascan nanno ichananfo Upa Diosin mato catonni urifi matohuun noicoin. Urus fustima. Jesús icoinra huaa futsanfori matohuun noicoin.

³ Upa Diosin Furun Jesucristo futan iconquin nocohuun noi. Ascan noco cashman shara huafain nocohuun ramapaicain nocon nomuran shinanmashara nocon nomuran non unimacoinon.

Upa Diosin noco yononi non nantifi noicoin

⁴ Upa Diosin noco yononi ahuun tsain iconcain tanasharanonfo. Atirifi Upan yononi cuscan aiton nicai un fasi unimai.

⁵ Uhuun yoramishtichin, na un mato cunushonaicai tsain funama. Man Jesús icoinra huaquin tau huani cuscan man man nicamisi. Nocon Ifoan noco yoimisi cuscan un afanan mato yoi non noinanoncahuun.

⁶ Noco yononi cuscan non ahuun noicain non futsafohuunri noicoinnon. Man tau huaquin nicamisi cuscan noco yononi isca huaquin, –Shafatifi non noinanoncahuun, –ishon yoini.

Ratofomain Jesucristo icoinra huai

⁷ Ascan tsain futsari mato yoi. Fuparapaimitsamisi manifoannati pashcanain futsucani, –Jesucristo nan Diospan Furun apa ariashu mai ano oni nocofunucain ishquin, –ishoncai yoipaicanima. Ascarafoan mato fuparapaimisifo Cristo noicasmafain icafo.

⁸ ¡Oinfain! Atohuun caoyamacahuun. Man funotiroquin. Upa Dios yonoshofiaqui man atohuun caohuaino mato inanpaiyai cuscan man funotiroquin. Ato nicayamacahuun nantifi Upa mato inanpaiyai cuscan fishcaquin.

⁹ Tsoan Cristo yoini cuscan atama futsa tanashu acai Diospan yorama. Ascan Cristo yosini cuscan nan fusti tanacoin Apa Diosin yafi Furun fu rafui.

¹⁰ Tsoan Cristo tsain cayacaficoin yosiyamaiton maton pushu muran iquimayamacahuun. Aqi unimayamacahuun.

¹¹ Maton pushu muran iquishon futsafori amaquiri yosiaino matohuunri nutiroquin.

Ahuun tsain unutaqui

¹² Un mato paratama cunushopafian unfincoin matoqui nocopai non yoinonanon. Ascan non natian unimafai un matoqui nocoaino fasi mimacai non unimanantanantiro.

¹³ Nan pushu futsano ichananfo Upa Diosin atori catonni ahuun facufo inonfo. Nanfoanri mato yoisharapaicani. Nanti.

Juan

Juanpan Gayo Cunushoni

Juanpan Gayo tsain shara yoini

¹ Uhuun yorashtan Gayon, unquian, Juan, un fari ichapa icoinra huafo un ato cushupaoni. Un mia cunu fomai min tapinon. Un mia noicoin.

² Uhuun yorashtan un mia Upa Dios cufishona min nomuran shinansharafain min muma shara ipainon. Min isharapainon.

³ No futan Jesús icoinra huaa futsafo mia anoashu uqui nocofo. Nocoshon mihuunoa ua yoiifo, —Gayon nocon Ifo tanacoinfafaini. Shafatifi nocon Ifoan tsain icon yoini cuscan nannori imisiran, —ishon mihuunoa ua yoiifo. Nicaí uhuun nomuran fasi unimai.

⁴ Uhuun facufoan Jesús tanacoainton nicaí un unimacoinni. Ahua futsancai ua unimamaquin ascacai huatiroma.

⁵ Uhuun yorashtan, un nica min icoinra huaa futsafo oinyamafiamishiquin min ato cushufafaini. Ato cushuquin min unumisima.

⁶ —Gayo noco noisharamisiran, —ishon mihuunoa ichananshon yoiifo. ¡Aicho! Upa Diosin ato shara huapaiyai cuscan mirifi min ato asca huafin sharacai itiroquin. Nan yopaifo cuscan min ato inantiro fosharatanonfo.

Nan paramisifo

⁷ Nanfo foanscamisifo Jesushuunoa yoifoanfaincani. A ahua yopai fiaquicai icoinra huafoma yocanifoma.

⁸ Jesús ahuun tsain iconquin yoimisifo. Ascacun non ato futan ashquin.

⁹ Min icoinra huafo fu ichanan ano un mato cunu fomayamua. Ascashiashon Diótfefes ua nicacasmaquin. Aafi icoinra huafo iquinpai. Fasi cacapaimisi.

¹⁰ Matoqui nocoshon man ichanan muranshon noco chaca huamisi cuscan un mato tapimashquin. Noco huunoa tsain chacari yoifain chaniri yoifain. Nocon yorafori matoqui nocofacun ato iquimapaima Diosin tsain mato yoinonfo. Futsafoan ato iquimapaifaiton atorifi pota. Afanan atofu ichananonfoma.

¹¹ Uhuun yorashtan, Diótfefes chaca huamisi cuscan ahuun caotamarocon ahua shara fustisi min huapaitiro. Tsoan shara huamisi nan Diospan yora. Ascan tsoan chaca huamisi Diosquiri shinanmisima.

¹² —Demetrio nocofunu shararan, —ishon nantifi yorafoan yoiifo. Aafin iconmisiquin. Norifi ahuunoa non yoisharamisi. Man min tapia non icon yoimisi.

Ahuun tsain unutani

¹³⁻¹⁴ Un mia paratama yoipaiquiaquin un afanan mia cunushotamarocon un miqui nocopai non yoinonantanon.

¹⁵ Min nomuran unimanon. Nocon yorafoan nunoshon mia yoisharapaicani. Min icanoa uhuun yorafoa ua yoishopacuhuun. Nanti.

Juan

Judaspan Icoinra Huafo Cunushoni

Judaspan ato tsain shara fomani

¹ Uhuun yoramishtichin unquian Judas un mato cunu fomai. Unfin Jesucristo ahuun yonomatiquin. Un Santiago ahuun ushto. Nocon Upa Diosin matohuun noiquin mato catonni. Ascan nocon Ifo Jesucristo mato cushufafaini.

² Nocon Ifoan matohuun ramapaicain maton nomuran unimamanon. Ascatari matohuun noicoinnon. Mato mima huaquin asca huanon.

Nan chanimisifo chaca hua cuscan Judas ato asca hua

³ Uhuun yoramishtichin nocon Ifoan noco nashoni cuscan yafi nantianri noco imapaiyai cuscan non chipo afu ishquiai cuscahuunoari fasi nanfohuunooa mato cunushopaifiai mun nica man tsain futsa yopacoin. Ascacun un mato cunushoni man Jesucristo icoinra huai cuscan man shinanfafainon. Nannori Upa Diosin Furuhuunshon noco tapimani. Furunhuunooa noco tapimani cuscan nan fusti non yopai tanasharashquin. Ascan tsain futsa mato amaquiri yosipaiyai foan aton tsain nicatamarocon nan mato tapimamisi cuscan nan fusti icoinra huacahuun.

⁴ Futsafoan mato muran nocoli tau cashon man tapicuma mato fomanfo chaca huamisi-fiacashon. Ascashu nanfocai Diospan yorama. A furicai imisifoma non chaca huamisi cuscan non yoiaiton Upa Diosin Furunhuunshon noco soashona non afu ipanon. Nan fusti non yopai isharashquin. Ascafia nanfoan fasi amaquiri chacacoin mato tapimapaicani. Isca huaquin mato yoipai, —Man Jesús icoinra huashon man apaiyai cuscan man atiroqui. Maton ahuinma fu icain ainforori aton funuma fu itirofo. Ascashon ahuaa chaca futsafo man huapaiyai cuscan man atiro. Non asca huaitocai Dios noco onaintimaimaran, —ishon fasi amaquiri mato yosipaicani. Nocon Ifo Jesucristo fusti nicacasmacani. Nan cuscarafahuunooa Diospan tsain cunuyoni. Ato onaintimaicoishquin.

Diosin chaca huaifo onaintimai

⁵ Un natian mato cunushoni cuscan man man tapiyofianicun un afanan mato yoi futsai nan chacafahuunooa man tapinon. Nocon Ifoan nantifi nocon shunifo Egipto anoshon caimafianicun atrifiton icoinra huayamaifoan nan icoinra huafo mato chipo namaqui cuyoi.

⁶ Ointiaquimayamacahuun Diospan oinmati afu nai muran icafori tau cani ishara-coinyopaonifo. Ascashu Diosin ato yonoai cuscan acoinyopaonifo. Ascafiashon chipo Diosimaqui ipanifo. Ascacun Upa Diosin ato faquishihuan muran munushushon ato manamayoi. Ascashon chipo nantifi icoinra huafoa onaintimaitian ichanan huashon omitsiscapanacafo muran ato potashquin.

⁷ Diospan oinmati a fu nai muran icafoan chaca huapaonifo cuscari Sodoma yafi Gomorra chaimashon nanscara chaca huapaonifo. Nocofunufoon aton ahuinma chotaifoanno. Ainfoanri aton funumafo chotamapaonifo. Nocofunufori ari ranan chotanarapaiyai foanno ainfon tanatama. Ascacani chacani tapipaonifo. Ascacun atohu-unshon non tapitiro nan chaca huamisifo omitsiscapanacafo muran focani. Nanhuunooari ointiaquimayamacahuun.

⁸ Nanscarifiai nan chanimisifoan chaca fustisi huafafaincani. Ascacanashu futsafo fu chaca huatananmisi icain niaiforori nicacasmafain. Diospan nai oinmatifori roamisifo.

⁹ Ascashon nai muran icafo Diospan oinmati niaifo patashari ahuun anu Miguel nantocai chaca huaifo cuscan asca huamisima. Ascashu Satanás fu fochishmanantananni Moisés naitian Satanás Miguel nitun huapaini Moisés ahuun caya mai huanonma. Ascafiacai Miguelcái nan Satanás roanima. Roatamarocon yoini isca huaquin, —Nocon Ifoan mia asca huairan, —ishon yoini.

¹⁰ Ascafia nan chanimisifoan ahuafo tapiyamacun nanfohuunooa atoqui tsain chaca huamisifo. Ascatari ari apaiyai cuscan fusti huafafainmisifo. Yoinaton shinansharatiroma cuscan. Ascacanashu ari chaca huamuafoquin omitsiscapashcaquin.

¹¹ ¡Ai timafin! Fasi omitsiscapashcaquin. Caín chipocu rutuni. Nanfori nanscarafo. Balaam cuscarafori. Nan Balaam pui fusti shinanquin chaca huani. Nanfoanri nansca huamisifo. Coré cuscarari. Nan Coré ahuun niaifo Moisés nicacasmapaoni. Ascacufin Diosin nan namaniquin arifi nicacasmacanashu nai omitsiscapashcaquin.

¹² Ascan manfin noinanshu ichananmisiquin nocon Ifohuunooa shinanfain pishcaquin. Nanfori ranotama matofu ichananfiacashon nocon Ifohuunooacai shinancanima. Futsafahuunooaricai shinantama aficairocon shinanmufustiafo, —Non mato yosiquin mato cushusharatiroman, —ifiaquin tsoa ahua yosisharamisifoma.

Nan coin oi maisinincal mai muto muchana huatiroma fanafo foaisharanon. Mai mutoano coin choshtacuashu oi fuaino fanafo foaimasharatiro. Nanscarifiai nanfo coin oi maisi cuscarafo. Nan cushumisi ointsafiacashocai nocon Ifohuunoo tsoacai tapiafoma. Fana ahuun tapofo ya tsucucan tsasiashu fimioma itiro. Man nai rafua cuscara. Nanscarifiai nan chanimisifoancai tsoan Jesús icoinra huamatiroma nipanonfo.

¹³ Ascashu unuhuan fuchomanhuan cuscarafo ahuaa sharacai mainfin ano potatiroma. Fuchoquin facosh cusmun cutsispotiro. Ascashu chipo fuarasiqui futsutiro. Nanscarifiai nan chanimisifoancai ahua shara huashotiroma. Fishi pacui chashapacucahuatan faquish acuncahuatiro. Ascaitocai non afanan oinshtatiroma. Nanscarifiai nan chanimisifoan Dios cachiquire huacanashu faquishihuan muran focani. Diosin nanscarafo chipo onaintimacoinsiquin omitsiscapanonfo.

¹⁴ Ascan Adán nan Diosin onihuaquin tau huani. Anoashu siete facu pacuafu. Ascano ahuun unutani ahuun anu Enoc ini. Nan Enoc nan chanimisifohuunoo inonpacoi cuscan yoiquin isca huani, —Oincapon! Nocon Ifo oi. Nan afu nai muran icasharafi ichapacoin afu fucani. Tsoancai ato tanan huatiroma. Nantian nantifi yorafo yoipacushquin niyoshon man amisi cuscan.

¹⁵ Nantifi manifoti anofoan noco Ifoqui fucani. Ratofomain ahuun yorafo afu ipanacafu iyamarai ratofomain icoinra huayamashu omitsiscapanacafu muran focaniquin. Nan afu rafumisifomacai ahuun yorafoma. Ascan nan chaca huafoti ato yoifain niyoano Dios maisi ipaoni cuscan yoifain nantifi nan tsain chaca aqui huamisifori ato yoishquin.

¹⁶ Nanfoanri tsain chipumisifo icain futsahuun ahuaa chaca nuutapaimisifo. Nan chaca huapaiyai cuscan fusti tanafafainmisi icain afiri yoimusharamisifo. Ascacashu cacapaimisifo icain futsahuunoo tsain shara yoiamafiaquin futsa cuncun huapaimisifo, “Ua shara huanon,” ato huamapairan, —ishon Enoc huani.

Nan icoinra huafo ato yoini isharanonfo

¹⁷ Asca huafiafoan nocon Ifo Jesucristo fu rafumisifoan mato yoinifo cuscan ointaquimayamacahuun.

¹⁸ Ascan mato yoini isca huaquin, —Jesús oti chaima icoinra huamafoan mato cashu mutsama huapaicani. Nanfoan tanatama afi chaca huapaiyai fo cuscan fusti tanafafaincaniran, —ishon yoinifo.

¹⁹ Nan cuscara nocofunfoan mato pashcanan huapaimisifo. Ahuaa chacafo fusti fuchipaicaquin. Ascarafo fucai Diospan Yoshin Shara icama.

²⁰ Asca chaca huafiacanashu. Uhuun yoramishtichin man Jesús icoinra huua cuscan Upa Diosin mato shinanmana. Ascacun ahuunshon finacaiquin tapicahuun man icoinra huahuunoo nan cuscara shara ishcaquin. Diospan Yoshin Sharahuunshon Upa Dios cuficahuun mato imapaiyai cuscan tapishcaquin.

²¹ Jesús tanasharacahuun Upa Diosin mato noicoiain cuscan man mufafaintiro. Nocon Ifo Jesucristo nocohuun ramapaiquin non naafiacun noco nimapacuaino non afu ipanon. Ascacun funaquima manasharacahuun afu ipashcaquin.

²² Futsafoan isca huaquin shinantirofo, —Jesús ua nimapacutiro icon iyamarai iconmaran, —ishon. Nanscarafohuun ramapaicahuun.

²³ Ascan futsafohuunoo un mato yoinon isca huaquin. Ahuaa non coapayamafaino chi muran pacuaiton non nushfiriscatiro cononma. Nanscarifi aqui futsan chaca huafafainmisi cuscan shatuataicuma numariscahuun. Ascashon ato yoicahuun aton chaca arifi shatuyamashu chi muran iquinonfoma. Ascan futsafoanri fasi chacacoin huamisifo. Nanscarafohuunri ramapaicahuun. Ascfia oinfain marifi man ato cuscara chaca huamisi iishcaquima. Atohuun ramapaitan nan ahuarashta chaca huaifo cuscan noicasmacoinsahuun.

Ahuun unutaqui Dioshuunoo yoisharani

²⁴ Ascan uhuun tsain unutaqui nocon Dioshuunoo un mato yoisharapai. Nanton mato cushusharatiro man chaca huanonma. Unimacoincain ahuun ointaifi mato imasharatiro. Nannoshocai tsoan matohuun ahua chaca nuutatiroma. Ascashu unimacoin man aqui nocoshquin. Nantofin mato nansca shara huashotiroyquin.

²⁵ Nan fusti noco Dios. Nantonrifi nocon Ifo Jesucristohuunshon noco numani. Ascashon nantifi finoncoian tsoa futsacai a cuscarama. Arusu fusti niaifocoincain manifoti iquina. Ascashon ahuamamishti huatiroyquin. Ahuashta oni huataima nanscaracoin iyopaoni. Natian ishquiai cuscarari. Nansca huapanaca. Nanscasi ipanon. Amen. Nanti.

Jesucriston Juan Oinmani Cuscan (Apocalipsis)

Ahuara ahuuscaran ashquiiai cuscan Jesucriston Juan tapimani

¹ Uhuun yoramishtichin natian un mato cunu fomai man tapinon. Unquian Juan un mato cunu fomai. Upa Diosin Jesucristo yonoa samamashta ahua ahuuscaran huariscashquiiai cuscan ahuun yorafo tapimashquin. Ascacun iquisi ua oinmayoa. Jesús ahuun oinmati nan nai muran ica uqui nichian. Upa Diosin ahuun yorafo tapimapaiyai cuscan ua tapimayoa. Ascacun nan ua tapimana cuscan un mato yoi.

² Upa Diosin Furun Jesucristohuunoya yoi cuscan nan iconcoin. Ascashon nan ua yoi cuscan ua oinmana cuscan huafain nantifi un cunua.

³ Ascafia un cunua cuscan icataima. Inon pacoai cuscan iquisi un mato cunushona. Un cunua cuscan futsafo yoi arifi unimaino nan nicaifori iconra huafain nanfori unimashcani. Un mato cunushonai cuscan samamashta iishquin.

Juanpan Diospan yorafo siete mai futsafo aria ichananmisi ato cunu fomani

⁴⁻⁵ Ascan Asia mai ano man icati pushurasi siete nan Jesús iconra huafo ichananmisifo un mato cunu fomai cuscan nicasharacahuun. Nocon Upa Diosin niyopaonishaquin natiarifi nicain nipanaca. Ahuun Yoshin Sharari afu ipamisi. Nan Upa Diosin yafi ahuun Yoshin Sharapan non Furun Jesucriston matohuun ramapaiyaino maton nomuran mato shinansharapainonfo. Ahuaton maton nomuran fucash huanonma. Nocon Ifo Jesucriston Diospan tsain noco yoimisi cuscan non iconra huatiro. Nan Diospan Facucoinfiacun rutunifo. Rutushon mai huafi fo Apa Diosin funimani afu ipashquin. Tsoa futsacai ascayomisima. Ascan Apafu ishon nantifi niaiffo maifoti anofo ato iquishquin. Nanton noco noicoin. Ascashu ahuun imi focain noco nashoni ahua chaca afanan nocon ifo inonma.

⁶ Ascacun ahua chaca nocon ifo itamarocon ahuunoashu Apa Diosin ahuun yorafo man non ica. Ascashon noco yonomapaiyai cuscan non anon. Ascan non ahuun yorashon futsafo non Upa Dios cufishotiro. Nanscarafu nocon Ifo Jesucriston man noco ima. Ascacun nantifi yorafoan ahuunshon isca huaquin yoipacupainonfo, —¡Aicho! Tsoa futsacai Jesús cuscara sharama. Arus fusti nocon Ifo ipanaca. Arus fustiri nantifi yorafo ato iquipacunaca, —ishon yoipacupainonfo. ¡Amen!

⁷ “Shinancapon. Nocon Ifo Jesús cooin camaqui afanan oaiton

nantifi yorafo niafo futan namisifoanri oinshquicani.

Nan mastamisifoanri oinshquin.

Ascashu nocoaiton nantifi manifestifain ratucaquin

yoishcani isca huaquin,

‘¡Ohuashta! Diospan Furun Jesús non chaca huamisishaquin non aqui ratucoinran,’ ishon yoishquicani.

Nanscafin aashquiquin. ¡Amen!”

⁸ Jesús yoiquin isca huani, —Unfin ahua oniataima iyopaoniquin. Urifi un ipamisi. Ahuutiamain nocon mai cuyoicai urus fusti un ato yoitiro. Unfin ahumamishti huatiroquin. Un niyopaoni cuscan un ipanacaran, —ishon nocon Ifoan yoini.

Nocon Ifo Jesucristo aficoi Juan oinmani

⁹ Unquian Juan un matofu Jesús ahuun yora. Ascacun man uhuun yorafo. Nantifi non iconra huafo noco iquinashu no fu rafupacunaca. Man Jesushuunoashu omitsiscafiaquin man tunumisi. Man mumisi cuscan urifi un mumisiquin. Un Diosin tsain yoifain Jesushuunoari ato yoimisi. Ascacun aton niaiffoan ranushumuafu yonoa ua achicashon ua mai futsan ahuun anu Patmos ano ua nichinifo. Nan mai unu toomanhuan ano.

¹⁰ Nanno domingo futsaino Diosin Yoshin Sharapan ua iquifain nan tapimapaiyai cuscan ua tapimashquin. Ascashon ahua namapan cuscarahuunshon man ua ismacoian. Ascaiton ucachiorinoa tsain achacoin un nicariscatana. Nan manuti nicatsa un nica.

¹¹ Ascashon ua isca huaquin yoi, —Min oiain cuscafoin futsafo cunushohuun. Nan cunu Jesús iconra huafo ichananmisifoti ato fomahuu. Nan ichananmisifo Efeso anofo fomafain Esmirna anofo fomafain Pérgamo anofo fomafain Tiatira anofo fomafain Sardis anofo fomafain Filadelfia anofo fomafain Laodicea anofofori min oiain cuscafoin cunushon ato fomahuu, —ishon ua yoi.

¹² Tsoamain ufu tsainquicai nicanat ifiacucahua oinpaiquin un oian lamparina cuscara otati siete oro ointsa un oian.

¹³ Nan otafo nushmancayan nocofunu ointsa nanno nia. Ahuun sahuuti ofan ofaicaí sahuufain ahuun nanushumuti putacoin ahuun shochi ano nuua oshin oro ointsa faca facaitsa sahuua.

¹⁴ Ahuun foo oshopacoin yoa rama furoa ointsa. Ahuun furorifi chi shahuacai ointsa. Ascan faquishfiano chi uruaino non oinsharatiro. Nanscarifiai yorafoan fomanpaiquin ahuaa onupaifiaiton Jesús onantiro.

¹⁵ Ahuun taurifi cuno faca facaitsan ointsa. Ahuun oi uhuapacoin shushan tuporo iqui nicatsa.

¹⁶ Ahuun mucu mumihuuri fishi ointsa siete tsoma. Ahuun ashfan muranri nopus ocuma rafu cunocoin asuonmua ointsa. Ahuun fusorifi fari chashaquin finai ointsa. Nanscara nan nocofunu un oian.

¹⁷ Nan ointani un ananman pacua nan naa shinantsai. Ascaiton ahuun mucu mumi-huurishon manmainyanan ua yoiquin isca huua, –Ratuyamahuu. Ahuara oniataima un iyopaoni. Nanscarifiai un ipanaca. Uncai unupacunacama.

¹⁸ Unfi ipamisiquin. Mun nafianishaquin un afanan funini. Ascashu un nipanaca. Yorafo naitian urus fusti un ato numatiro. Un shafi cuscara aya. Un fupotiro omitsiscapanacafo muran fotamarocon Upa Dios icari fononfo. Ascafia ascayamaifoan un fuputiro omitsiscapanacafo muran fononfo. Unfin nipanacaquin.

¹⁹ Ascacufin rama min oiain cuscan huafain chiporifi un mia oinmashquiain cuscan cunuhuu.

²⁰ Ascashon natian min oian cuscan un mia yoi min tapinon. Nan fishi siete non nan lamparina siete oro ointsa nanfohuunua un mia tapimanon. Nan fishifo un tsoma nanfofin nan ichananfo Diosin tsain ato tapimamisi cuscarafuquin. Ascan nan lamparinafo oro ointsafo nanfofin ichananti pushu ano Jesús icoinra huafo cuscarafuquin, –ishon Jesús ua yoia. Nan siete ichananti pushu ano icoinra huafo ato tsain shara fomani.

2

Jesús Efeso anoa icoinra huafo ichananti pushu murannoa ato yoini cuscan

¹ Ascatan Jesús ua yoiqui isca huaquin,

–Ua icoinra huafo Efeso anoa aton Diosin tsain yoimisi un yoipaiyai cuscan ua cunushoquin isca huai. “Unquian maton Ifo Jesús un nantifi Uhuun Upa Diosin tsain yoimisifo un atofu icacaimisi ato cushusharashquin. Ascacun un mato yoipaiyai cuscan ua nicasharacahuun.

² Man imisi cuscan mun tapia. Man manfin uhuunoashu fasi yonosharamisiquin. Ahuara ahuuscarafaiaino man tunucuinmisi. Yora chaca huamisifo fu man rafucasmamisi. Ascan ratoran futsan yoimisi isca huaquin, ‘Cristo ua nichian. Ascacun un mato yosinon,’ ishon mato yoiainfoan. Man yoimisi isca huaquin, ‘Non tapinon. Aton tsain non nicayonon iconmainquin,’ man huamisi. Ascashon ato nicacaquin man ato onanmisi uhuun tsain mato yositama aafin chaniaifoan.

³ “Ascan uhuunoashu omitsiscafiaquin man tunucuinmisi. Mancai ua tanaquin un-upaimisima.

⁴ Man asca sharafiamisi un tsain futsan mato yoisharapai. Man fasi ua noiquin tauhuani cuscaai natian man ua noiquin asca huaima. Man mutoi futsui.

⁵ “Man ua noiquin tau huani cuscan shinancahuun. Nanscacoín huaquin ua noicahuun. Man noinain tauni cuscan afanan noinancoicahuun. Chii tsoan tanama samamashta nocatiro. Nanscarifiai marifi man chi nocacuana cuscara. Ascashon man ua tanasharayamaiton oinquín tsoan afanan mato tanaima. Ascashu man ichanainno afanan tsoa matofu ichanainma. Man chaca huai cuscan shatupaiyamafain uquiri man nasopaiyamaino un matoqui oshon un mato shatumatiro. Man afanan uhuun tsainyoimisi inonma. Man ascaitocai tsoan afanan matohuunshon ua tanapaishquima.

⁶ Asca huafiaquin ahuaa futsan man shara huamisi. Nan Nicolaitafoan amaquiri yosiaifoan atirifiton mato muranшон tanafo nanfoan chaca huamisi cuscan un noिकासma. Un nan chaca noिकासma cuscan marifi man noिकासmai.

⁷ “Ascacun man pafiquiyaquin Diosin Yoshin Sharapan nan icoinra huafo ato yoiain cuscan nicasharacahuun. Ascan Satanás mato chaca huamapaimisi. Ascafia tsoan uhuun curushhuunshon Satanás yafi ahuaa chacafori finoncoian naantofin ua cachiquiri huatararocon ua tanasharacoianquin. Naanfin Upa Dios icano un iquimashquiquin ufu ipasharanon,” –ishon Jesús nan icoinra huafo Efeso anoafo yoia.

Jesús Esmirna ano icoinra huafo ichananti pushu murannoafo ato yoini cuscan

⁸ Ascatan afanan Jesús ua yoiqui isca huua,

–Ua icoinra huafo Esmirna anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Ahuara oniataima un iyopaoni. Urifi ipanaca. Uncai unupacunacama. Mun nafiacun Upa Diosin ua funimani. Ascashucaí un afanan napanacama. Unrocon nipanaca. Ascacun un mato yoiqui isca huai.

⁹ “Man omitsiscaí cuscan mun tapia. Mun tapiari man ahuuoma. Man ahuuomafia un matofu icano man ua cuscara shara itiro. Ascacun un maton nomuran fupuashotiro man unimanon. Uricai mato potapacunacama. Ascano uhuun Upa Diosin ica ari nantifi un aya cuscan nanfori matona iishquin. Ascacufin man ahuuomafo ointsafia manfin ichapayaquin. Ascafia mun tapia futsafo Judio cainfianishaquin ua icoinra huafoma. Ascacufin nanfocai Diospan yorafoma. Ascashon matohuunoa tsain chaca yoimisisifo. ‘Norifi non Diosin tanamisiran,’ ishon yoifiafocai iconma. Ascashu nanfoan Satanás tanaanashu ahuun yoracoinfo ica.

¹⁰ “Ascano inon pacoai cuscan un mato yoionon. Satanás atirifi mato cunu muran iquimashquin manmain ua cachiquiri huamainquin tapipai. Ascacun ahuutiaran man omitsiscashquiain cuscan ratuyamacahuun. Ua cachiquiri huatamarocon isca huaquin shinancahuun, ‘Ua rutufiaifoannocai un ratuima. Ua chaca huafiainfoanri un tunucoin-tiro. Uncai uhuun Ifo potapacunacama. Ascacun uhuun Ifo un tanaqui finacoinfaini,’ ascashu man naiton un mato nimapacunaca man ufu ipanon.

¹¹ “Ascacun man pafiquiyaquin Diosin Yoshin Sharapan nan icoinra huafo ato yoiái cuscan nicasharacahuun. Ascan tsoan omitsiscafiaquin ua cachiquiri huayamai nantofin Satanás uhuunshon finocoinquin. Ascatan naashucaí omitsiscapanacafo muran canacamaran,” –ishon Jesús nan icoinra huafo Esmirna anoafó yoiá.

Jesús Pérgamo anoa nan icoinra huafo ichananti pushu murannoafó ato yoini cuscan

¹² Ascatan afanan Jesús ua yoiqui isca huaa,

–Ua icoinra huafo Pérgamo anoa aton Diosin tsain yoimisi un yoipaiyai cuscan ua cunushoquin isca huai, “Unquian un maton Ifo Jesús, un mato yoisharapai man tapinon. Uhuun tsain nan nopu ocuma rafu cunocoin cuscara. Ascashon uhuun tsainmansi uhuun yorafo cushusharafain nan ua noicasmamisifo un ato onaintimatiro.

¹³ Mun tapia man pushurasi Pérgamo ano ica. Nannoshori Satanás yorafo iquimisi. Ascaino rafitama man ua tanasharamisi. ‘Jesús uhuun Iforan,’ man ato huamisi. Nannori ua tanamisi futsan ahuun anu Antipas nanton uhuunoa ato yoifafainmisi. Ascacun nan man rutuafo. Nanscara man tapiflashocai man ua potama. Manricai ratuima. Ascashon maton nomuran man shinanquin isca huaa, ‘Noco rutufiaifoannocai nocon Ifo Jesús non icoinra huaquin shatuimaran,’ ishon man shinanmisi.

¹⁴⁻¹⁵ “Nanscara shara. Ascafia ahuaara fustirasi man chaca huamisi cuscan un mato yoi man afanan asca huanonma. Shinancapon. Ahuuscashomain Israelifo non chaca huamatiroquin ishon niaífo Balac nan nocofunu Balaam yocani. Ascaiton Balaam nan yosini. Ascacun nan Balac Israelifo chaca huamani aton ahuinma chotamafain ainfofori aton funumafoya ato imani. Ascashon nan ua icoinra huamafoan ahuaara futsafo rami huacashon nocon Diosiran ishon tushu inanmisisifo. Nan tushu Israelifo atofu ichanancashon nan piinfi. Nanscarifiaquin matofu ichananmisi atirifi nan Balaam chaca yosini cuscan nanfoanri natian nansa huacani.

¹⁶ “Ascacun nan Balaam ato chaca huamani cuscan marifi afanan ascayamacahuun. Ascan ratoranfoan chaca shatuyamacaiyaino un atoqui samamashta nocoriscashquin. Ascashon uhuun tsainmansi un ato onaintimashqui. Uhuun tsain nan nopu cunocoin cuscara.

¹⁷ “Ascacun man pafiquiyaquin Diosin Yoshin Sharapan nan icoinra huafo ato yoiái cuscan nicasharacahuun. Ascafia Satanás mato chaca huamapai. Tsoan ua cachiquiri huatama uhuunshon Satanás finocoin nantonfin ua tanasharacoianquin. Ascacun un cushusharashquin. Un Israelifoan aton shunifo fariña cuscara fata shara nai muranshon shafatifi un ato nirishopaoni. Nan anuquin manánran huapaonifo. Ascan tsoancai tapipaonima ahuuscashomain un ato nirishoicain. Nanscarifi aquí un nan manán futsa cuscara un ato inanshquin nancái tsoan ointiroma. Nanfohuunshon un ato shara huapanaca. Ascatarí tsoan chaca huatama ua tanafainnaiton un ato toquiri osho sharashatocoin inanshquin. Tsoa futsacai nan anu onantiroma. Ascan nan toquiri fiafin ufu ipasharatiroquin,” –ishon Jesús nan icoinra huafo Pérgamo anoafó yoiá.

Jesús Tiatira anoa nan icoinra huafo ichananti pushu murannoafó ato yoini cuscan

¹⁸ Ascatan afanan Jesús ua yoiqui isca huaa,

–Ua icoinra huafo Tiatira anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon.

Uhuun furo chii shahuacai cuscara. Ascacun un mato onancoian. Uhuun tau nan cuno faca facaitan cuscara. Ascacun un mato yoiquin isca huai.

¹⁹ Mun tapifain mun onancoian man shara huamisi cuscan. Ascashu man noinancoian. Ua icoinra huafain man ua tanacoimisi. Uhuunshori futsafo man shara huamisi. Ascatan omitsiscafiquiri uhuunshon man tunucoinmisi. Ascacufin man ua icoinra huaquin tau huanitian man futsafo shara huamisi. Ascafia natiancaifin mima huaquin man ato shara huafafainiquin.

²⁰ "Ascashon man ato shara huamisi. Ascafia ahuara futsan man chaca huamisi cuscan un mato yoi man afanan asca huanonma. Nan ainfon Jezabel ipaoni cuscara matofu ichananmision yoimisi isca huaquin, 'Unfi Diosin tsain mato yoitiroquin,' ishon mato yoifiamisi nantocai uhuun tsaincoin yoimisima. Aafin chanimisi. Ascashu nan ainfo fasi chacacoin. Mato amaquiri yosimisi. Ascafiaitocai ahuun tsain man shatupaimisima. Ascashon ua yonoshomisiko paramisi aton ahuinma chotanonfo. Nanscarifi huaquin ainfo aton funuma chotamamisi. Ascashon mato yoimisi isca huaquin, 'Ahuara futsa non rami huanon nocon dios inon. Nan non tushu inanon. Ascano marifi man atofu ichananshon nan tushu man pitiroran,' ishon nan ainfoan mato chaca yoimisi.

²¹ "Ascafia nan ainfoan chaca huamisi cuscan un yoifafainmisi uamain icoinra huashon ahuun chaca shatuicai. Ascafiai ahuun chaca shatupaimisima.

²² Ascacufin un isininmaquin finacoinquin racashu omitsiscanon. Ascano ratoran futsafo a cuscara furomacoinshon aton chaca shatuyamaifoan nanforifi un ato onaintimaquin finacoin omitsiscanonfo.

²³ "Ascano ahuun tanamisifori un namaquin cuyoshquin. Un asca huaiton nantifi ua icoinra huafao maifoti anofoan tapitirofo un nantifi yorafo onancoian. Ascashon aton nomuran shinainfo cuscan un onancoian. Tsoancai ahuashta ua fomantiroma. Ufimain un nantifi onancoincun. Ascacufin nan shara huamisi urifi un ato shara huashquin. Ascane ratoran futsan chaca huamisi nanrifi un onaintimashqui.

²⁴ "Uhuun yoramishti Tiatira anofoan mancai atirifiton nan ainfoan mato chaca yosipaiyai cuscan man tanamisima. Ascane nan ainfoan ahuun nomuran Satanás shinachacamanai cuscan ahuun tanamisifo fustisi ato tapimamisi. Ascafia mancai anori tapipaimisima. Ascacun un mato yoisharapai. Ahuara futsacai un mato yonoima.

²⁵ Ascacun uhuunshon man tapimisi cuscan nanfohuun ointiaquimayamacahuun. Un mato ihuiyoaitian nanfo cachiquiri huapaiyamacahuun.

²⁶ "Tsoan Satanás finoncoinfain nan ainfoan chaca yosiai cuscan tanatama nan naitian uhuun tsain tanasharacoianshu unfu ipashquin. Ascane naanfin niaifo patashari itiroquin. Nan maifoti anofo ato iquishquin

²⁷ Ascane Upa Diosin tsain uhuunoa cununi isca huaquin, 'Cristo maifoti anofo ato iquina. Ascane tsoan ahuun tsain shara nicacasmaiton ato onaintimashquin. Mai cuti curushcain non potaino moshi futsutiro. Noncai afanan ahuuscashon shara huatiroma. Nanscarifi aquin nan yoitimamisifo ato onaintimanaitiancait soashta ato numatiroma naanonfoma,' ishon uhuunoa cununi. Upa Diosin ua yononi cuscan nanscarifi huaquin un mato yonoi maifoti anofoan aton niaifo man inon. Ascashon man ato yoiyai cuscacoin anonfo.

²⁸ Shafaino ishtumanhuan fustiton chashaiton nantiffain ointirofo. Nanscarifiai un afanan oaiton nantiffain ua oinshcaini. Ascane nantianrifi un ato yonoshquin afanan tsoashta chaca huatama uacairocon tanasharanonfo. Ascashu ufu isharapacunacafo.

²⁹ Ascacun man pafiquiaquin Diosin Yoshin Sharapan nan icoinra huafao ato yoiyai cuscan nicasharacahuun," —ishon Jesús nan icoinra huafao Tiatira anofo yoi.

3

Jesús Sardis anoa icoinra huafao ichananti pushu murannofo ato yoini cuscan

¹ Ascatan afanan Jesús ua yoiqui isca huua,

—Ua icoinra huafao Sardis anoa aton Diosin tsain yoimisi un yoipaiyai cuscan ua cunushoquin isca huai. "Unquian, un maton Ifo Jesús, un mato yoisharapai man tapinon. Diosin Yoshin Shara ufu rafumisi. Ascacun nan Diosin tsain yoimisifo un iquimisi. Ascacun un mato yoi isca huaquin. Man amisi cuscan mun tapicoian. Yorafoan matohuunoa yoimisifo isca huaquin, 'Nan Sardis anofoan Jesús icoinra huafain isharacoinmisiforan,' ishon matohuunoa yoimisifo. Man isharamisifo ointsacun. Ascafia mancai matohuunoa yoiyai cuscan man amisima. Mancai ua tanacoianma.

² "Ascashu man uqui ointi mutoa. Afanan ascayamacahuun. Man shinanyopaoni cuscan nannori afanan shinacahuun. Ascafia mun tapia Upa Diosin mato imapaiyai cuscan man ascacoiantaima. Ascashon un mato yonoo cuscan afiaquin atirifi man ascacoianma.

Ascacun maton nomuran afanan shinansharacahuun man uhuunoa tapimisi cuscan nantifi funonoma.

³ “Ascacufin man uhuun tsain icoinra huafain man nicapaoni cuscan afanan nannori shinacahuun. Man chaca huua cuscan afanan asca huatama uarocon tanasharacahuun. Ascan afanan man uqui nasoyamacaiyaino un matoqui samamashta nocoriscatiro mato onaintimashqui. Pushu muran icafoan tapitirofoma ahuutianmain yomutso aton pushu muran iquiriscatiroquin. Nanscarifiai mancai tapiama ahuutiaran un matoqui nocoriscatashquin mato onaintimashqui.

⁴ “Ascafia matofu ichananmisifo fustirasi Sardis anofoan chaca huamisifoma. Nocon sahuuti choshtacoincun non pucatiro futsa funa shara sahuushquin. Nanscarifiai atirifi man chaca shinanpaoni cuscan man potacoinshon uhuunoa fusti man shinanfainaino un matoqui nocoaitian sahuuti oshopa sharashtacoin un mato inanshquin man ufu ipanon. Ascan isharamisishaquin man unfu ipanaca ua cuscara shara iishcaquin.

⁵ “Ratoran futsafori maton cuscara uhuun tsain cachiquiri huatama ua tanasharafain uhuunshon Satanás finoncoincun nanfofin unfu isharapacunacafo. Ascashu ua cuscara shara iishcani. Nanforifi un ato sahuuti oshopa sharashtacoin inanshquin ufu ipanonfo. Ascan Uhuun Upa Diosin nan ua icoinra huafoti aton anufo man libro muran cunua nantiffain tapinonfo ufu ipashquiaifo. Ascan nanfo fusti afu nipatirofo. Ascashocai un aton anu soapacunacama. Uhuun Upa Diosin futan ahuun oinmati afu nai muran icafoan ointaifi un ato yoishquin isca huaquin, ‘Nafofin uhuun yoracoinfoquin,’ ishon un ato yoishquin.

⁶ Ascacun man pafiquiyaquin Diosin Yoshin Sharapan nan icoinra huafo ato yoiyai cuscan nicasharacahuun,” —ishon Jesús nan icoinra huafo Sardis anofo yoiya.

Jesús Filadelfia anoa nan icoinra huafo ichananti pushu murannofo ato yoini cuscan

⁷ Ascatan afanan Jesús ua yoiqui isca huua,

—Ua icoinra huafo Filadelfia anoa aton Diosin tsain yoimisi un yoipaiyai cuscan ua cunushoquin isca huai. “Unquian un maton Ifo Jesús, un mato yoisharapai man tapinon. Unfin ishara fustimisiquin. Uhuun tsainrifi iconcain. Pushu ifo shafiya arus fusti pushu fuputiro yorafo iquimai iyamarai fupotiro futsafo iquinonfoma. Nanscarifiai maton niaifo David shafi cuscara ipaoni. Tsoa ahuun mai ano imapai iyamarai ato nitun huapaoni iquinonma. Nanscarifiai unfi David funaquin. Urus fusti un yoitiro upa Dios icano tsoa iquitiro iyamaraimain iquitiro. Ascacun un mia yoi isca huaquin.

⁸ Man amisi cuscan mun tapicoian. Un mato yonoa cuscan man futsafo uhuunoa yoimisi. Ascacucui un mato yonoa cuscan tsoan mato shatumatiroma. Man ascaiton futsafoan matohuunoa yoiyaf nafocai ahuamaran mato huafiaifoanno mancai uhuun tsain cachiquiri huamisima. Ua cachiquiri huatarocon Jesús nocon Iforan man huamisi.

⁹ “Futsafo arifi Judío cainfanishaquicai ua icoinra huafoma. Ascan nanfocai Diospan yoroma. Nanfo chanimisifo. Ascacun un ato yonoshquin mato fuoshopacufoan yoinonfo isca huaquin, ‘Icon. Diospan Furun matohuun noicoi,’ ishon matohuunoa yoishcani.

¹⁰ Ascano omitsiscafiain un mato yonoa cuscan funaquinua man tunucoimisi. Uhuun tsain nicaifain ua tanasharashori man ua cachiquiri huamisima. Ascacun chipo nantifi yorafo manifi anoashu fasi omitsiscaifotian ratofomain Diospan ahuun yoracoinfoquin tapishcani. Ascashu nantifi icoinra huamafo omitsiscaitian un mato cushusharashquin nanfo omitsiscafi cuscan man omitsiscanonma.

¹¹ “Ascacun un samamashta oshquin. Ascan man ua icoinra huua cuscan potayamacahuun. Ascatarocon Upa Dios tanasharacahuun mato inansharapaiyai cuscan futsan finonma.

¹² Tsoan omitsiscafiyaquin uhuun tsain cachiquiri huatama tunucoinfain ua tanasharacoinshon nantonfin Satanás finoncoianquin. Ascashufin uhuun Upa Dios icano un ato imapacusharashquin. Nannoashu raqui canacafoma.

“Ascacun un nantifi tapimashquin nanfo Uhuun Upa Diosin ahuun yorafocun. Ascashon un ato yoiquin isca huashquin, ‘Nan nuno uhuun Upa icano man no fu ipanacaran,’ un ato huashquin. Diospan yorafo Jerusalén ano ipaonifo. Asca natianrifi Upa Diosin icano ahuun anu Jerusalén funa. Chipo nan Jerusalén funa Upa Diosin icariashu nocoqui fotoshquin. Ascan tsoan ua cachiquiri huamisima nanno ipanaca. Ascashon uhuun anu futsa tsoan nicayomisima nanrifi nan un ato anu tuqui huashoshquin. Ascashu un isharapacunaca cuscan arifi ufu isharapacunacafo.

¹³ “Ascacun man pafiquiyaquin Diosin Yoshin Sharapan nan icoinra huafo ato yoiyai cuscan nicasharacahuun,” —ishon Jesús nan icoinra huafo Filadelfia anofo yoiya.

Jesús Laodicea anoa nan icoinra huafo ichananti pushu murannofo ato yoini cuscan

¹⁴ Ascatan afanan Jesús ua yoiqui isca huua,

—Ua icoinra huafo Laodicea anoa aton Diosin tsain yoimisi un yoipaiyai cuscan ua cunushoquin isca huai. “Unquian, un maton Ifo Jesús, un mato yoisharapai man tapinon. Upa Diosin ua amapaiyai cuscan fustisi huamisishaquin uhuun tsain un mato yoinon. Urifi nan icon fustisi un yoimisi. Ascan Upa Diosin nantifi onihuanifoti aton niaifofin unquin. Ascacun un mato yoiquin isca huai.

15-16 “Man amisi cuscan mun tapia. Ua cachiquire huacoinyamafashon un mato amapaiyai cuscacai man fuchipaicoianma. Ascashu ichananfiaicai ichananpaitocanan man ichananma. Man fasi mutoi futsua. Ascaracai sharama. Ahuara matsisharacoin niscaquin non unimacai ayatiro. Ahuara shana shara matsinaqui non unimacai ayatiro. Ascafia ahuaa catsacai non unimacain ayatiroma. Catsa muquin non michotiro. Nanscarifiai atirifi yorafo nan ahuaa shana cuscarafu. Ua tanasharacoianfo. Ascan atirifi ahuaa matsi cuscarafu. Uhuun tsain tapisharataicanima. Ascacun un atohuun ramapaicoin. Ascafia mancai shana yafi matsi cuscarama. Ascara itama manfin nan ahuaa catsa cuscaroquin. Man uqui mutocoian. Ahuara catsa muuquin non michotiro cuscan urifi un mato nansca huai. Ascashon un mato potashquin.

17 “Ascan man yoimisi isca huaquin, ‘Diosin ua tapimapaiyai cuscan nantifi mun tapia. Uncai ahua futsa yopaimaran,’ ishon man anori shinanfiai mancai tapiama man chacafo huamisi. Ascacun un mato yoi. Timafin. Ua yopafiai man fasi cacapaimisi. Diosin Yoshin Sharapan mato imapaiyai cuscacai man tapiama. Manfin ahuuoma cuscarafuquin. Man imisi cuscacai mun tapia. Ascan uncai ascara fuchipaima. Ascafia un matohuuonoa shinain cuscacai man tapiama. Manfin nan fusho cuscarafuquin. Fushocai ahuaa ointiro. Nanscarifiai man chaca huai cuscacai man tapiama. Ascashu man yora chitoria cuscarafuocai man tapiama. Nanscarifiai ua yopafiaiquai man tapiama.

18 “Ascacun un mato yoisharapai man chaca huamisi cuscan huafain afanan chaca huaquima. Ua yocacahuun un mato tapimanon ahuuscashumain man ua cuscara shara itiroquin. Ascafia man chitoria cuscara. Ascacun un mato sahuuti sahuumasharai man afanan rafinonma. Nanscarifiaquin man chaca huamisi cuscan un shafacafi oincoian. Ascacun uhuunoashu fusti man maton nomuran fiananan huatiro ua cuscara shara iishquin. Man fusho cuscaracoinrifi imisi. Ascacun ua yocacahuun un mato cayahuamafain uhuun tsain mato tapimasharanon. Ascan oinsharafain ua tanasharashcaquin.

19 “Ascan un mato noiyamaquicai anori un mato yoicuanama. Ascafia nan un noicoiainfo fusti un ato onaintimashqui chaca shatunonfo. Ascashon nanfori un ato yoisharapai ua tanasharanonfo. Ascacun man chaca shinanmisi cuscan afanan anori shinanyamacahuun. Natian uhuun tsain nicacoincahuun un mato yoiaai cuscaquin ashcaquin.

20 Shinanapon uhuun yoramishtichin. Un matofu rafupaicoin un matoqui nocoa. Yora pushu muran iquipaiquin iquisi pushu ifo cunatiro iquimanon. Nanscarifiai un matoqui nocoa mato yoiquin isca huashquin, ‘Un mifu rafupairan,’ ishon un mato yoipacumisi. Ascano tsoan ahuan nomuranon ua nicaquin ua yoiquin isca huai, ‘Ifon, uqui ohuu. Un mia fuchipaifain un mia yopacoianran,’ ishon yoiaino un afu rafui. Arifi ufu rafuaino.

21 “Ascano tsoan chaca huamisi cuscan shatufain ua tanasharacoian naanfin uhuun Upa Diosin icari ufu ipasharatiroquin. Ascafia un niaifocoin icaino nanfin niaifo patashari itiroquin. Unfin Satanás yafi yoshin chacafo finoncoianquin. Uhuun Upa Dios icariashu uhuun Upa fu un niaifocoin ica. Nanscarifiai tsoan ahuan chaca cachiquire huafain ua tanasharacoianshu un icanoashu arifi ufu niaifo ipatiroquin.

22 Ascacun man pafiquiyaquin Diosin Yoshin Sharapan nan icoinra huafo ato yoiaai cuscan nicasharacahuun,” —ishon Jesús nan icoinra huafo Laodicea anofo yoia.

4

Dios icarishon ahuuonoa yoisharapacunacafo

1 Ascashon nannori ua yoifain Diosin Yoshin Sharapan ahuaa futsa ua oinmanaino nan namapan oian un huua. Ascashon un oian Upa Diosin icaria caincaiti nan un oinyaino nan oi un nicaquin tau huua nanrifi un afanan nica. Nan manuti nicatsa achacoin. Ascano ua yoiquin isca huua, —Nuri uqui ohuu. Ahuarafo chipo ahuuscara aashquiai cuscan un mia oinmayoiran, —ishon ua yoia.

2 Ua yoitapaiyaino samamashta Diosin Yoshin Sharapan ua shinanmatana. Ascashon ua iquipaiyai cuscan ua iquina. Ascatai nan oi un nica ari ua iyoa. Nanno niaifoan tsaoti uhuapa shara un oian. Nocon Ifo Diosin tsoan.

3 Nan nocon Ifo fasi sharashtacoin iscara un oian. Toquire rafutan aton anu jaspe yafi cornalina nan rafu sharashtacoin faca facaitsa rafu. Nan jaspe oshoshara. Ascan cornalina

oshin chushushara. Nanscarifiai nocon Ifo sharashtacoin faca facaitsa ointsa. Nahuan fai tonan shara cuscaraton a tsaono tarati huaa.

⁴ Nannori nocon Ifon tsaono veinte cuatro nocofunufu tsaoti tarati huashu tsaonifo. Nan nocofunufoan Jesús tanamisifo. Nanfoan icoinra huafo aton cushumisi ipaoni. Sahuuti oshopa sharashta sahuufain maiti oro faca facaitsa sharashta maiafo.

⁵ Ascatan nocon Ifo tsaono canan facaiqui ointsa icain turuica nicatsari un nica. Nanscara nicaquin non tapitiro Diosin ahuamamishti huatiro. Tsoa futsacai ahuun curush cuscarama. Ascatan nan Upa Diosin tsaono siete lamparina uruaiton un oian. Nanfo uruai cuscan huaquin Diosin Yoshin Sharapan nan siete icoinra huafo ichananti pushufoti murannofoan futsafo tapimafain oinmatirofo ahuu cuscarama in Diosiqui arifi tapinonfo.

⁶ Nannori un oian ununhuan ointsa tsosi sharacoin. Ascato nocon Ifoan ahuun tsaoti anori nan onihuan rafu non rafuri niafo. Furo ichapaya. Fusoqui yafi puchiuhuuri furo ichapaya.

⁷ Futsarifi masharo ointsa icaino futsa moi funu ointsa ica. Ascato futsan ahuun fusori nan nocofunun fuso ointsa icain futsari nan tutumanhuan noyai ointsa ica.

⁸⁻¹⁰ Nan cuatro putao ya seis putao ya. Nan ato putao ocuma rafu furo ichapayari. Shafatisho yafi yamutishori nan rafu non rafuri fanainquin isca fafaincani,

“Nocon Ifo Dios fasi sharacoin. Shara fustisi huapanaca. Nantofin ahuamamishti huatiroquin. Iyopaonishaqui natianri ipamisi. Ascashuri ipanacaran,”

icashu nan rafu non rafuri fanainriacani. Ascashon yoiiafori isca huaquin,

“Nocon Ifo Diosin mirus fusti min nocon Ifocoin. Tsoa futsacai mia cuscara sharama. Min isharapacunaca. Ascacufin non mia fasi noiquin aicho hua. Min noco shara huafafaini,”

ishon nan rafu non rafuriton yoiriaifoanno nan icoinra huafo cushumisifo veinte cuatrofain nocon Ifo Diosin ahuun tsaoti camaqui tsoa naman fuoshopacufoan aton maiti oro ointsa sharashtacoin nocon Ifo tsoa afofori nannosi huacashon yoiiafo isca huaquin,

“Nocon Ifo Diosin min noco maiti inan cuscan non mia afanan nasoin. Man min noco inanfiacun non mia fasi noicoiquin noco maitifo non mia afanan nasoin.

Ascán mirus fustifin min noco iquitiroquin. Min nocon Numamisi. Ascashu mirus fusti min nocon Ifocoin.

¹¹ Ascán minfin isharamisiquin. Ascacun mihuunoa fusti non yoitiro isca huaquin. Min nocon Ifocoin. Min nocon Dios. Tsoa futsacai mia cuscara sharama. Min isharapacunaca. Ascacufin non mia fasi noicoiquin. Ascán minfin min shinanpasi ahuamamishti huatiroquin. Min nantifi ahuamamishti onihuan. Min apaiyai cuscan fusti nantifi min onihuan. Ascacun minhuunooashu fusti nitiroforan,”

ishon nan Jesús tanamisifo veinte cuatro yorafoan yoiiafo.

5

Jesús nan chashoan facu cahuashara cuscaraton cununi cuscahuunshon noco tapimani

¹ Ascatan afanan un oian cuscan un mato tapimai. Nocon Ifo Diosin ahuun tsaoti camaqui tsaoshon ahuun mucu mumiore papel ocuma rafu cunua sufishon tsoa. Ascashon siete tashna huatinin tashna huaa.

² Ascashon un oian Diosin oinmati mutsisipacoin nan afu nai muran ica. Nantori oi ashcafinin cunaquin isca huaa, —Na cunu non oinpa. Ascán chaca huamisima fustiton na tashna huatifo fuputiro na cunu non oion. ¿Ascán tsoan chaca huamisimamun na cunu ahuun tashna huatifo noco fupushona non oion? —ishon oi ashcafinin yoiia.

³ Ascafia nan nai murannofo futan mai anofo nocon Diosin oinmatifo afu ifiashocai tsoashtacai cunu fupushotiroma amuran oionfo.

⁴ Ascacun uaiyanan un yoiia, —¡Ohuashta! Chaca huamisimacai tsoan fuchiana na cunu noco fupushonon amuran non oion, —ishon un shinan. Ascacun un fasi uairia.

⁵ Ascacun nan veinte cuatro icoinra huafo aton cushumisi futsan ua yoiquin isca huaa, —Uaiyamahuu. Oinpon. Nocon Ifo nia. Cristo nanfin nocon niaifocoinquin. Rato yoinacai nan masharo uhuapa cuscara mutsisipacoinma. Nanscarifiai Cristo Israelifoon aton niaifo mutsisipacoin. Nanton ahuamamishti huatiro. Tsoa futsacai a cuscarama. Ascacun anu futsamisifo isca huaquin, “Judápan funafo nan masharo curush cuscaracoiforan,” huamisifo. Ascacufin nocon yorafoan aton niaifo David ipaoniquin. Ascán nan David ahuun funa natian nuno Upa Dios fu ica. Ascacun nanton nan siete tashna huamua noco fupushotiro nan cunu non oion. Ascacun afanan uaiyamahuu, —ua huaa.

⁶ Ascatan nannori chashoan cahuashara fustifia ahuun masho siete nantirifi ahuun furo un oian. Rutuafo ointsafia Diospan tsaoti ano nia ica. Nannorifi nan rafu non rafuri Diosin onihua yafi nan veinte cuatro icoinra huafo cushumisifoan tarati huayacunafo.

Tsoa futsacai a cuscarama. Nanton ahuamamishti huatiro. Diosin Furun manifoti ano nuchian ahuun Yoshin Sharahuunshon nantifi yorafo onancoinon.

⁷ Ascán Upa Diosin nan cunu ahuun mucu mumiori tsomacun nan Jesús chashoanun facu cuscaratón man fia.

⁸ Fishon nan rafu non rafuri Diosin onihuani yafi nan veinte cuatro icoinra huafo cushumisifoan fuoshopacufoan manuti guitarra cuscarafu yafi tutsofo nanfoan tsomafo. Nan tutsofo oro faca facaitsa. Nanfo muran fiin otano ahuun coin tipoi ininsharayacoin. Nansarifiai Diospan yorafoan a cufiaiton Upa Dios nan icarishon ato nicamisi.

⁹⁻¹⁰ Ascano nantianri nanfo fanainti funapan fanainquin iscafo,
“Min chaca huayamañamiscun mia rutunifo.

Ascashu nantifi yorafo manifoti min noco nashocai min imi foni
Satanás afanan nocon ifo itama

Upa Diosin ahuun yorafo non inon.

Ascacun mirus fusti nan cunu Upa Diosin tsoma min fitiroquin.

Ascashon ahuun tashna huamuafu

min noco fupushotiro

amuran cunua cuscan noco tapimashquin.

Mihuunshon mia icoinra huafoti

Diospan yorafo itirofo.

Ascano nanfoanri futsafo

min tsain shara ato tapimanano min ato amapaiyai cuscan anonfo.

Ascacun non maifoti anoafoan

niaifo patashari iishquiran,”

icashu fanaincafo.

¹¹ Ascatan un oianri Diosin oinmatifo afu nai muran icafo ichaparasicoin tsoancai ato tanan huatiroma. Nanfo fanaincafoan oinfain un ato nica. Diosin tsaoti ano tarati huayacunafo nan Diosin onihuani rafu non rafuri non nan Jesús icoinra huafo cushumisifo veinte cuatro naqui huayacunafo. Ascashu nanfo ya osiashu Diosin oinmatifo fu fanaincafoan un nica.

¹² Fasi oi ashcafinin fanaincani iscafo,

“Diospan facu Jesús chashoan cahuashara cuscara sharashtacoin man rutunifo.

Ascafia natian nantifi manifoti ato iquifain

nantifi nai murannoafoti yafi mai anoafori ahuuna iquin.

Naantofin nantifi tapicoianquin

ahuun curushhuunshon ahuamamishti huatiro.

Ascacun nantifiton min sharacoinran mia huapanonfo.

Mirus fustifin min nocon Ifo iquicain.

Ascacun ¡Aicho! Min nocon Ifo ishara fustipacunacaran,”

icashu fanaincani.

¹³ Ascatafin un nica nantifi nai murannoafu fanaincaino mai anoafori fanaincaino unuhuan anoafori fanaincani iscafo,

“Upa Diosin ahuun tsaoti ano tsoa.

Furun Jesús chashoan facu cuscara sharashta

nan rafu nocon Ifo ishara fustipacumisifo.

Ascacun nantifiton man sharacoinran ato huafain

man fusti nocon Ifocoin

ahuamamishti man huatiroran, ishon yoipacunonfo,”

icashu fanaincani.

¹⁴ Ascatan nan rafu non rafuri Diosin onihuani foan yoiquin isca huafo, —¡Aicho! Nansasi ipanon. Amen, —icaifoanno nan veinte cuatro Jesús icoinra huafo cushumisifo nan Dios yafi Furun nanman fuopacufoannafo. Nanfoanrifi Upa Dios yafi Jesushuunua yoisharafo.

6

Nan tashna huati siete

¹ Ascatan un oian nan Jesús chashoan facu cuscaratón nan cunu tashna huamua siete tsoma. Ascashon fusti fupua. Fupuaino un nica nan rafu non rafuri Diosin onihuani futsan ahuun oi ashcafinin yoiái cuscan nan turuica nicatsatón yoiái, —Ohuu, —yoni.

² Ascacaino caballo oshopa ua chaima nocotoshaiton un oian. Nan caballo camaqui toaran piyacati tsomashu tsocun niaifoan maiti maimana. Man maimanano nannoashu

caballo camaqui man caa. Nantorifi futsafo iquipaiyai cuscan man iquini caa. Ascaitocai tsoashta nitun huatiroma. Nantomain nantifi finoncoincun.

³ Ascatan Jesús Diospan facu nan chashoan facu cuscaraton afanan nan cunu tashna huamua futsan fupua. Fupuaino un nica nan rafu non rafuri Diosin onihuani futsan afanan yoia isca huaquin, —Ohuu, —yoni.

⁴ Ascaino caballo futsari oshininpa nocotoshia. Nan caballo camaqui tsaocun nopolu chainipa inanfain yonoa mai ano catanon. Ascatan nocoshon maifoti anoa ato shinanmana afanan unimasharatamarocon noicasmatananancanashu rutunanonfo.

⁵ Ascatan Jesús chashoan facu cuscaraton afanan nan cunu tashnahuamua futsari fupua. Nan fupuaino un nica nan rafu non rafuri Diosin onihuani futsan afanan yoia isca huaquin, —Ohuu, —huaino caballo futsa fisopari nocotoshiaiton un oian. Nan caballo camaquiri tsoanra tsaoshon ahuun ihuu tananti tsoma ica.

⁶ Ascaino nantianri un oi nica nan rafu non rafuri Diosin onihuani nastumai un nica yoiquin isca huaiton, —Tushu yamaicuana iishquin. Nan aya cuscafia fasi chicoin. Nocofunun shafa fusti yonoshon ahuun rafanan trigo kilo fusti fitiro ascaymarai arroz kilo rafu non fustisi fitiro. Afanan fipaifia ahuun pui tushuama ahuaara futsa afanan fipanan. Ascacun shuni yafi nan fimi uva ahuun unu chacana huayamahuu, —ishon yoia.

⁷ Ascato afanan Diospan facu nan chashoanun facu cuscaraton afanan nan cunu tashna huamua futsari fupuaino un nica nan rafu non rafuri Diosin onihuani futsan afanan yoiquin isca huua, —Ohuu, —huua.

⁸ Ascana caballo futsa fasi pashicoin nocotoshiaiton un oian. Nan caballo camaqui futsari tsoaa ahuun anu Namamisi. Nanton yorafo namatiro. Ascashon nantori yoia isca huaquin, —Un yorafo namapairan, —huaiton Diosin yoia, —Ai. Min atiroran, —huua. Nan Namamisi cachiore futsan oa. Ahuun anu Namisifoanno ica. Ascano nan namamisihunoashu mani futsafoya futsafo rutunancani atirifi tushuoma fonicanai naifoanno atirifi pau futsa futsatapafoan ato namaino atirifi yoinafoan ato rutua nacani. Ascashu fasi yorahunrasi nashcane. Tsoan ato tanan huatiroma un oian.

⁹⁻¹⁰ Ascatan afanan Jesús nan cunu tashna huamua futsa fupua. Fupuaino un oian nan Jesús icoinra huashu namisifo. Niyopaonifotian Diospan tsain futsafo yoifain Jesushuunoari yoifoanfainpaonifo. Ascaifoan ato rutunifo. Ascashu nanfo Jesushuunoashu nani. Natian un oian aton furo yoshinfoan Dios cufiti ano ichanancashon oi ashcafinin yoiafo isca huaquin, —Nocun Ifo Diosin, min nantifi onancoian. Min ahuamamishti huatiro. Min isharafustimisi. Mincai ahuashta chaca huamisima. Min iconmisi. Nan mia icoinra huamafoan mai anoshon noco rutunifo. Ascacun ahuutianmun min ato onaintimaicain, —ishon yoiafoan.

¹¹ Ato yoiqui isca huaquin, —Manayocahuun. Funacaquima. Futsafo mato cuscarafori uhuunshon uhuunoa yoimisifo iishcane. Ascacun nanfo mato cuscara uhuun oinmatifo arifi iishquicane. Nanforifi uhuunshon yora chacafoan ato rutushcane. Ascana ahuun unutaqui ato rutuafoano mato ano nocoshcane, —ishon nocon Ifoan ato yoia. Yoitan sahuuti osho chainipa sharashtacoan ato inan. Nanfoanmain mai ano niyoshon Upa Diosin tanasharamisicun ato inanyama.

¹² Ascatan Jesús nan chashoan facu cuscaraton afanan nan cunu tashna huamua futsari fupuaiton un oian. Fasi curushcai mai nayanaiyaicain farin afanan chashayamaino nan sahuuti cushto fisopaton fupoa cuscara faquishcoincain oshu oshicoincain imi ointsa icain.

¹³ Nihuu curushpacoin nocoquin fana higuera ahuun fimi oshianfo unutaquin niriatiro. Nanscarifiai fishifo nai murannoashu mai ano pacuafo.

¹⁴ Nainhuan miscoacunfoanni ointsa yamariscatanaino machihuan yafi mai toomanhuan naiyanaiyaicaino futsa ano shucucaina.

¹⁵ Ascaino nantifi mai anofo ratucoianfo. Manifoti aton niaifofo non niaifo patasharifo non ranushumuafaoan ato niaifofo non mafo ichapayafao non yora mutsisipafao non oinmatifo non ifomaisifori nantifi ratucoianfo. Ascana atirifi mahua quini uhuapa muran ichoafao onupaicane. Atirifiri machi cuya ano ichoafao toquirininhuan ananmanri onupaicane.

¹⁶⁻¹⁷ Ascatan fasi fiisiyanan yoiafo isca huaquin, —¡Ohuashta! Upa Diosin nai murannoaton ahuun Furun Jesús nan chashoan facu cuscara natian nocoqui sinacoin. Ascacun non ahuuscatiromun omitsiscashquima. Tsoashtacain Diosin numatiroma noco onaintimanonma. Ascacun na machi cuyafo yafi toquirininhuan noco camaqui pacupainon Diosin noco fuchishon noco omitsisca huanonma, —ishon nan nicacasmamisifoan yoiafo.

7

Diosin ciento cuarenta y cuatro mil ahuun yorafo cushushquiai cuscan

¹ Ascatan afanan un oian cuscan un mato tapimai. Diosin ahuun oinmati rafu non rafuri afu nai muran imisifo un oian. Futsa fari oaiquiri niaino futsari fari cai quiri nia. Ascan futsa fari oai istafari niaino futsari fari cai istafari nia. Ascaino niuu nishmapacufoana. Afanaricai nantifi maifoti anoa nii puifo puri puricama. Unuhuanri afanan fuchoima pusiquima raca.

² Nan rafu non rafuri Diosin ato yonoa mai yafi unuhuan chacana huatirofo. Ascano Diosin oinmati afu nai muran ica futsari nan fari oaiquirinoashu oaiton un oian. Nocon Upa Diosin nan nipanacaton ahuun sello ya oa. Nan Diosin yonocun ahuun yorafotihuun nutatiro nantiffain tapinon Diospan ahuun yorafocun.

³ Nan oquin Diosin oinmati rafu non rafuri ato oi ashcafinin yoia isca huaquin, — Manayocahuun. Diosin tanamisifo iquisi fumananqui un ato Diosin anu nutayonon nanfo Diospan yorafocun nantiffain tapinonfo. Ascacun non acataima ahuara mai anofo yafi unuhuan anoafori chacana huariyamacahuun, —ishon ato yoia.

⁴ Uun nica 144,000 Israelifoa aton fumananqui Diosin oinmatin Diosin ahuun anu man ato nutan.

⁵⁻⁸ Nocon shuni Israeli ahuun facufo doce furonanfacufo cainni.

Iyoaton ahuun anu Judá.

Judá cachiori Rubén.

Rubén cachiori Gad.

Gad cachiori Aser.

Aser cachiori Neftalí.

Neftalí cachiori Manasés.

Manasés cachiori Simeón.

Simeón cachiori Leví.

Leví cachiori Isacar.

Isacar cachiori Zabulón.

Zabulón cachiori José.

José cachiori chipo facucoin Benjamín.

Nan doce fustirasi pashcanain futsuashu icafo. Ascan nan shoco futsafo anoashu caiafo aton funafo doce mil Diosin ato catonni.

Yorahuanrasifain ato sahuuti oshopa sahuuafu

⁹ Ascatan Upa Diosin yafi Furun nan chashoanun facu cahuanshara cuscara tsoano yorahuanrasi niafo tsoancai ato tanan huatiroma. Nan maifoti anofo manifotifain sahuuti oshopa chainipa sahuucashon upu tsoafo.

¹⁰ Nanfoan oi ashcafinin yoiafo isca huaquin,

“Nocon Upa Diosin futan Furun Jesús noco nimapacufo. Nocon Ifo Jesús nan chashoan facu cahuanshara cuscara noco huunoashu nani nocon chaca soashoshquin non afu nipanon,”

ishon yoiafo.

¹¹⁻¹² Ascatan Nocon Ifo tsoano ahuun oinmatifo afu nai muran imisifo non Jesús tanamisifo ato cushumisifo yafi nan rafu non rafuri Diosin onihuani nanfo nanno niafo. Ascashon ratoconun mai chachishon fuoshopacufoantan Dios yoisharaquin isca huafo,

“¡Aicho! Mirus fusti min icocoin. Min isharapacumisi. Mirus fustirifi min noco imasharatiro. Min nantifi onancoian. ¡Aicho! Non yopai cuscan min noco ashomisi. Ascacun nantiffain min sharacoinran mia huapanacafo. Minfin ahumamishti huatiroquin. Min nanscasi huapanaca. Nanscasi ipanon. Amen,”

ishon yoiafo.

¹³ Ascacun Jesús tanamisifo aton cushumisiton futsan ua yoca isca huaquin, —¿Na yorafo sahuuti osho chainipa sahuuafu raniashu fuafomun min tapiamamun? —ishon ua yoca.

¹⁴ Ascaiton un cuma, —Ma. Uncai tapiama. Minfin tapiaquin. Minfin ua yoitiroquin, —un huaiton. —Nanfo fasi omitsiscani. Ascaifoan Diospan Furun nan chashoan facu cahuanshara cuscaratón ato nashonihuunshon ato chaca soashona ato imasharanon. Nanscacun ato sahuuti oshopa shara sahuumana.

¹⁵ Ascashu Upa Diosin icano afu imisifo. Afu ishon nan Upa Diosin ato yonoa cuscan ashopacunacafo. Ascacun ato cushufafaini ahuara chacafo atoqui nocononma.

¹⁶⁻¹⁷ Diospan Furun nan chashoan facu cahuanshara cuscara Upa Dios fu imisi naanfin ato cushumisi ipashquiquin. Ascanocai afanan toa foniyamacai nomipacunacafoma. Afanaricai farin ato tsacaima. Ascashon Jesús ato iyoaino unimapacunacafo. Ascacun Upa Diosin aton ointi fupuashoshquin afanan uainonfoma, —ishon yoia.

8

Nan tashna huamuafu Jesús ahuun unutaqui fupua

¹ Ascatan ahuara iishquiái cuscan ua oinmayoa. Jesús Diospan facu nan chashoanun facu cahuanshara cuscaratón cunu tashna huamua siete man fupuquin tau huayoa. Ascán natian ahuun unutaquin futsari fupuaítan un oían. Diosin icano nai murannoashu nantifi media hora puusiyoafoma.

² Ascatan Diosin ahuun oinmati siete afu nai muran icafoan atoti manuti inanpacua chipo ato yoiáitan chaan chaan ashquinonfo.

³ Ascaino Diospan oinmati futsan paran uhuapamashta oro faca facaitsa tsomashu Upa Dios cufiti ano nia un oían. Nan paran uhuapamashtanun ahuara inin shara coaino fia. Ascán nantifi Diospan yorafoan cufimisifo cuscan osishon Dios cufiti camaqui huaa. Nannori chaima Diosin tsaóa.

⁴ Ascano nan oinmati Dios fu nai muran imisi paran uhuapamashta tsomashon ahuun coin tipoi inin shara nai muran man foa. Nanscarifiaí Diospan yorafoan cufiaífo cuscan Upa Diosin nan icarishon nicatiro.

⁵ Ascacun Upa Diosin man itishara huaa maifoti anoafu nan icoinra huafoma ato onaintimashqui. Ascashon ahuun oinmati yonoa afanan paran uhuapamashtanun cufiti sapa muran chí fospi huanon. Fospi huatan nai muranshon mai ano man pota. Ascaino mai ano fasi curushcai turuica achacoín nicaífan canan piishicain mai nayanaiyaica.

Oinmati afu icafoan manuti chaan chaan acani

⁶ Ascatan Diosin ahuun oinmati siete afu nai muran icafo atoti manuti inan itishara huafo chaan chaan ashaquin.

⁷ Ascán futsan ahuun manuti chaan chaan acaino unu matsi tocoromishti yafi chí imia osia mai ano pacua. Ascaino mai cashcu futsa man coi cuyoa. Un tercero del maitio man coi cuyoa. Nantifi mai anoa fasifo yafi ihuifo man coi cuyoari.

⁸ Ascatan Diosin oinmati futsanri ahuun manuti chaan chaan acaino machi uhuapa chí urumanhuan ointa Diosin nai muranshon potaino unuhuan muran pacua. Ascano unuhuan cashcu futsa imi ica. La tercera del unuhuan imi ica.

⁹ Ascaino atirifi unuhuan muran icafo man nai cuyoafu. Atirifi la tercera de shashohuanfori man coi cuyoafu.

¹⁰ Ascaino Diosin oinmati futsan arifi ahuun manuti chaan chaan acaino fishi uhuapacoin chí uruai cuscara nai murannoashu pacua. Atirifi unufo muran man pacua. Fishihuan chí uruai cuscara la tercera unufoqui man pacua. Ascashu unu tsosia sharafoquiri man pacua.

¹¹ Nan fishihuan ahuun anu mocacoinran huamisifo. Nan unu muran pacuano la tercera unu moca ica. Ascacun yora ichaparasi nan unu ayacanashu nai futsuafu.

¹² Ascatan Diosin oinmati futsan arifi ahuun manuti chaan chaan acaino farin la tercera afanan chashasharama oshuri la tercera afanan chashama. Ascaino la tercera fishifoanri afanan chashafoma. Ascashu shafata cuatro horas faquishia. Yamuri cuatro horas fasi faquishcoin.

¹³ Nanfo un oíainno un oíanri Diospan oinmati tutumanhuan cuscara fasi cuya noyáitan un nica. Naanton oi ashcaífinin yoiquin isca huaa, —¡Ohuashta! Diosin oinmati afu nai muran icafo rafu non fusti futsan aton manuti chaan chaan acaino mai ano icafo fasi mimacaía omitsiscashcani. Ascacun ¡Ai timafin! —ishon yoía.

9

¹ Ascatan Diosin oinmati futsan arifi ahuun manuti chaan chaan acaino Diospan tsoara futsa nai muranshon mai ano nichian. Ascán fototan nan yoshin chacafo quininhuan faquish muran icafo ano caa. Nan quininhuan fupotiya. Ascán amurannoafocai ahuuscashu caintirofoma. Ascafia nan nai murannoa fotomana Diosin shafi inan quininhuan faquishi murannoa ato caimanon.

² Ascashon ato cainmatanaino nan mai quininhuan murannoashu coinmahuanfoya nai muran foafu. Ascaino fari chashasharayoama. Nantio nai faquishcoin iyoa.

³ Ascatan nan coinmahuan murannoashu ocutsuru cuscarafu ichaparasi mai ano nichian. Diosin ato fasi pofucuin ima inapapia cuscara inonfo.

⁴⁻⁵ Ascashon ato yonoa isca huaquin, —Mai anoafu fasifo yafi fanafu non ihuifori chacana huayamacahuun. Ascán tsoan uhuun yorafoma aton fumananquiri uhuun anu nutamuafoma nanfo fusti man ato tucatiro. Ascafia ato rutuyamacahuun. Ato rututama mucu fustiti oshu man ato omitsiscahuatiroran, —ishon ato yonoa. Ascacun ato tucafoanno nan icoinra huamafo inapapia muutsa mucani fasi omitsiscafo.

⁶ Mucu fustiti oshu nanscara mucani nan icoinra huamafo tunuyamacaicani aafin napaiäafo. Ascashon yoiqui isca huafo, —¡Ohuashta! Uncai tunutiroma. Un naafin shara itiroquin, —ishon yoiäafo. Ascafia ahuuscashucaï natirofoma.

⁷ Ascan natian nan ocutsurufu ahuu cuscaramainquin un mato tapimai. Caballo iquisi itishara huatirofo futsafo rutuifoshcaquin. Nanscarifiai nan ocutsurufu nan caballo cuscara ointsäafo. Ato maiti oro cuscara sharashtacoin maiafo. Aton fusorifi nan nocofunun fuso ointsäa.

⁸ Aton foo ainfoan foo ointsäa ato shutarifi masharonun shuta ointsäa icain

⁹ Aton shochi ano cuno ointsaton shofucumuäafo ahuaraton ato tsacapaiyaino amuran iquinonma. Ascashon aton putao pua puaiquin achacoin nan caballofoan ahuun taramuti taräafoaino futsafoya rutunain nicatsäa.

¹⁰ Ascatan nantifi tsitsisiyäafo. Naanton yorafo chachiano isin mutiro inapapia mutsäa. Ascashon ato tsitsisinin yorafo omitsisca huatiro. Mucu fustiti oshu ato isinmumatiro.

¹¹ Nan quinhuan faquish muran yoshin chacafo icafoan aton niaifoon ahuun anu Israeli tsainman Abadön. Griego tsainmanri ahuun anu Apoliön. Onicoinnin tsainman yorafo rutumisi.

¹² Ascan man chaca finonquin tau huääa. Ascan nan rafu nocoataima.

¹³ Ascatan Diosin oinmati afu ica futsan ahuun manuti chaan chaan acaino. Anoshon Dios cufiti acamaqui nan rafu non rafuri moi masho ointsäa oro sharashtacoin nan nushmancayanoa oi un nica. Cufimisifo ano un oi nica.

¹⁴ Nan oin Diosin oinmati afu icaton manuti tsoma yoiäiton un nica isca huaquin, —Nan rafu non rafuri yoshin chacafo Upa Diosin ato munushua nan unu uhuapa ahuun anu Eufrates anoäa ato muputahuun fononfo, —ishon yoiäa.

¹⁵ Nanno nan yoshin chaca rafu non rafuri afin itisharamisifo. Ascan rato hora yafi rato shafatan non rato oshu non rato farimain ato caimanaitian atirifi yora mai anoäa la tercera yorafo ato rutushcaini.

¹⁶ Ascashon un nica yorahuanrasi dos cientos millones ranushumuäafo caballo camaqui tsäafo futsafo rutui foshcaquin.

¹⁷ Ascatan Upa Diosin ua ismani nan ranushumuäafo yafi ato caballofo un oian iscara, Nan caballo camaqui tsäafoan aton shochi nan chii rucun cuscara cuno oshin shara non tonancoin non chashnanpan shofucumuäafo. Ascan nan caballofoan aton mapo masharo mapo ointsäa. Aton ashfan murannoashu coin yafi chii uruaino azufre ashfacanun siiquin.

¹⁸ Nanfoan yora ichaparasi man namafo. La tercera manifioti man ato namafo.

¹⁹ Aton ashfa futan ato inan yorafo rututiro. Aton ina nan rono paupaton ina cuscarafo. Nanfoan yorafo omitsisca huafo nanonfo.

²⁰ Atirificai afohuunoashu nayamafiacani aton chaca shatuafoäa Upa Dios tanashcaquin. Ascatamarocon yoshin chacafo tanamisifo cuscan shatuyamafain oro iyamarai cuno oshopa sharashta non cuno futsan ahuun anu bronce non toquiri non ihuirifi rami-huafo. Ascafia nanfoancäa ahuäa oinyamafain nicatirofoma raquiri cahuascatiroma, —Naan nocon Dios. Non ahuun noiran, —ishon yoimisifo cuscan shatuafoäa.

²¹ Ascashon chaca futsa futsatäpafo huamisifo cuscan shatuafoäa. Rutumitsamisifo cuscari shatuyamafain shoitian cuscan shatuyamafain nocofunufu aton ahuinma fu imisifo cuscan shatuyamafain ainfofori nanscarifiaifono. Onumisifo cuscari shatuafoäa. Ascashu nanfo chacacoinfiashon tsoan aton chaca shatuafoäa nocon Ifo Jesucristo tanasharashcaquin.

10

Upa Diosin ahuun oinmatinin nan afu ica papel uhuapama cunua sufia tsoäa

¹ Ascatan un oian Diosin ahuun oinmati afu ica futsa mutsisipacoin nai murannoashu fotoaiton. Coin camaqui fotoaiton ahuun caya un oian iscara. Maiti nanhuanfai ointsäa maia. Ahuun fuso fasi chashacoian fari ointsäa. Ahuun quishi rafu chi ointsari.

² Ascashon papel uhuapama cunua sufia tonoshon tsoäa. Ahuun tau mumiori ununhuan fumancayan paicain ahuun tau mushquiuri mai ano paia.

³ Ascatan oi ashcafinin cuna nan masharo uhuapaton ahuun oi nicatsäa. Ascaiton nan siete turuica curushcain oi uhuapaton futsan cuma.

⁴ Ascacun nan yoiäa cuscan nicashon un cunucuana. Ascafia nai ari Dios icarishon oi futsan ua yoiqui isca huääa, —Min rama nica cuscan cunuyamahuu. Aton tsain tsoäa tapimayamahuu, —ishon ua yoiäa.

⁵⁻⁷ Ascatan Diosin ahuun oinmati afu nai muran icaton mutsisipacoin unuhuan yafi mai ano paishon ahuun mucu mumiori mushainacahuan yoiäa isca huaquin, —Upa Diosin nipanacaton nai yafi nantifi nai muran icafo onihuafoäa mai yafi mai anoäa onihuafoäa

⁹ Ascacun maifoti yafi manifoti tsain futsa futsatapafo nan Jerusalén ano ichananfo nan rafutan aton caya oinpai fuafo. Ascafia niaifofoan yonocun tsoancai aton caya mai huatiro icama. Osha rafu non fusti nushmancayan aton caya racacun oinriafo.

¹⁰ Ascano nantifi yorafo fasi unimacaquin yoiafo isca huaquin, –¡Aichofain! Nan Diosin tsain yoimis rafutan nocon omitsisca huamisifo cuscan afanan noco asca huacanimaquin, –icashu yoinanfo. Ascatan unimacaquin ahuafo cashman afiranan inanonanfo.

¹¹ Ascafiaifoanno osha rafu non fusti nushmancayan finontan Upa Diosin ato nimariscatanaino funinaca huanafu. Ascaiton oincani fasi ratucoincani fiisicani. Taritari-cafo.

¹² Ascana nai muran Upa Dios icariashu fasi oi ashcafinin ato yoiaiton. Nan rafutan nicafo. Ato yoiquin isca huaiton, –Nuri fucahuun, –ato huatapaiyaino ato noicasmaifoan oiainfoanno nan rafu atomaquinoashu coin muran Upa Dios icari foafo.

¹³ Fotapaiyaifoanno mai ano fasi curushcain naiyanaiyaishquin. Ascaino atirifi pushu Jerusalén anoafu maocomushquiai cuscan un oinyoa. Ascaino siete mil yorafo man naafu. Nan tushuafo fasi ratucoianfo, –Shinacapon. Upa Diosin nai muran icaton ahuamamishti huatiroman, –icashu yoinanshcani.

¹⁴ Ascatan nan mai anoashu omitsiscaiyoi rafufiashu samamashtacoin afanan omitsisca-shquin.

Diosin ahuun oinmati a fu nai muran imisiton ahuun unutaquin manuti chaan chaan aca

¹⁵ Ascaino Diosin oinmati afu ica futsan ahuun manuti chaan chaan acaino nai muran Upa Dios icarishon oi ashcafinin yoiafo isca huaquin,

“Natian nocon Ifo Diospan Facu nantonfin nantifi yora manifoti ato iquina.

Ascashu arusu fusti aton niaifo unupacunacamaran,”

ishon yoiafo.

¹⁶⁻¹⁷ Ascatan nan Jesús icoinra huaa cushumisifo veinte cuatro nocofunufu aton tsaotifoqui Dios icano tsoafo. Ascashon fuoshonpacufoantan Upa Dios yoiafo isca huaquin,

“¡Aicho! Min nocon Ifo Dios min ahuamamishti huatiro. Min curushhuunshon natian nantifi manifoti min ato iquina. Ahuashta min oni huataima min iyopaonishaquin. Natianrifi min ipanaca.

¹⁸ Manifoti miqi sinamisifofia. Ascana natian mirifi min atoqui sinaquin min ato onaintimashqui. Nantianrifi mia tanamisifo min ato ahua inansharashquin. Ascashori nan min tsain yoimisifori inansharafain mia icoinra huafoti nan min ato yoia cusca-coin amisifoin yoimafain ahuaafishon mia tanamisifo yafi niaifofoan mia tanamisifori nanfo min ato inanshquin. Ascashon nantifi mia tanamisifo min ato inansharashquin mifu ipanonfo. Nantianri nan yora chaca huamisifori min ato onaintimashqui omitsisca-panacafo muran fotanonfo,”

ishon yoia.

¹⁹ Ascaino Diosin icaria Dios fu tsainti pushu fupucuaiton un oian. Nan Upa Diosin Israelifo yononi cuscan cunuacua cashon muran nanuaiton un oiainno canan facaicain nai turuica curushcoin icain mai nayanaiyaicain unu matsi tocorofo nai murannoashu mai ano pacui.

12

Ainon yafi famanhuan cuscara nai murannoa Juanpan oinni

¹ Ascatan afanan uhuun namapan cuscaraton ua oinmana cuscan un mato tapimai. Nai murannoa ahua tsoan oinyomisima cuscara un oian. Ainfoan ahuun saya chashacoin fari ointsa sahuuashu oshu camaqui paia ointsa. Ascatan doce fishi ointsafo ahuun maithuun nua maia.

² Nan ainfoan facu nanuashu man facu isinhuaio fasi fiisica.

³ Ascatan nantianri nai murannoa ahua tsoan oinyomisima cuscara un oian. Nan Satanás yoshin chaca famanhuan cuscarafishu oshicoin siete mapoya. Ascashon ahuun mapotifi niaifoan maiti maia. Ascatarifi mucu rafuti mashoya.

⁴ Ahuun ina sharafoaino atirifi fishi nai murannoashu mai ano pacua. Nanscarifiai Upa Diosin ahuun oinmatifo Satanás atirifi ato chaca huamani. Ascana ahuunoashu a cuscara yoshin chacafori ato imano nai muranshon Upa Diosin ato potafain mai ano ato nichini. Ascacun nannoshon nan Satanás famanhuan cuscaraton ainfo facu caiyainton cushua caintanaiton facu piishquin.

⁵ Ascashu furonanfacu caian. Nan facu nantifi manifotifain aton niaifo iqui. Ato cushusharashquin tsoashta yoitima inonfoma. Ascacun Upa Diosin icano ahuun facu ihuiriscatana afu niaifo inon.

⁶ Ascacun tsoan istaipama ano Diosin nan ainfo ati shara huashoni nanno ichonon. Nan mai ano fari rafu non fusti nushmancayan Upa Diosin nan ainfo cushusharafain pimasharani ahuuscanonma.

⁷ Ascashori un mato tapimai ahuuscashomain nai muranshon nan yoshin chaca Satanás famanhuan ointsaton nocon Ifo Diosin finonpaiquin. Ascaiton Upa Diosin ahuun oinmati afu nai muran icafoan aton niaifo ahuun anu Miguel Diosin nichian. Satanás yafi yoshin chacafo Miguel ahuun oinmatifoya potananpainifo.

⁸ Ascafia Miguel futan Diospan oinmatifoa Satanás yafi ahuun yoshin chacafo ato finoncoinnifo. Ascashon nai arishon ato potapacuni afanan ari inonfoma.

⁹ Ascacun Miguel futan Diospan oinmatifoa ato nai muranshon mai ano potani. Nan famanhuan cuscara nan rononhuan shuni ahuun anu futsa Satanás nantifi manifoti ato parafainmisi.

¹⁰ Ascatan oi uhuapa nai muranno a un nica. Isca huaquin yoiaiton,

“Nan yoshin chaca Satanás nai muranshon man potafo. Nanton Dios ano cashion Jesús icoinra huafohuuonoa tsain chaca yoi isca huaquin, ‘Mia icoinra huafoan fasi chaca huaran,’ ishon nocohuunoa shafatifi yafi yamutifiri yoifafaini. ¡Aicho! Ascafia natian Upa Diosin Satanás ahuun curush man shatumacoinna afanan nan yoshin chaca nocon ifo inonma. Ascan ahuun Facu nan nocon Numamisi Cristo afincoin nantifi man ato isma ato iquishquin. Ascacuai afanan Satanás Jesús icoinra huafoan aton ifo itiroma.

¹¹ Ascacun nocon yorafoan fasi icoinra huacoinschon yoimisifo isca huaquin, ‘Nocon Ifo Jesús Diospan facu nan chashoan facu cuscara nocohuunoashu nani nocon chaca soashoshquin,’ ishon yoifoanfaincani. Ascashon Jesushuunoa yoimisifo cuscan yafi ahuun imi focain ato nashonihuunshon Satanás finoncointirofo afanan ato ahuusca huanonma. Ascacun yoitirofo isca huaquin, ‘Nan icoinra huamafoan noco rututirofia noncai ratuyamacai nocon Ifo Jesús potapacunacamaran,’ ishon nan icoinra huafoan yomisifo.

¹² Ascacufin man nai muran Dios ari icafo unimacahuun. Nan icoinra huafoan Jesushuunshon man Satanás finoncoian. Ascashon Satanás nai muranshon man potafo. Ascafia nan mai ano icafoqui man nocoa. ¡Ohuashta! Mai anoafu yafi unuhuan anoafori fasi omitsiscashcani. Satanás man tapia ahuutianran Jesús mai ano nocoriscashon omitsiscapanacafo muran a potashquin tsoa afanan chaca huamanonma. Nanscara man tapiashu Satanás fasi sinacoinquin nantifi manifoti ato omitsiscamapai Jesús fu ipanonfomaran,”

ishon yoia.

¹³ Ascatan a mai ano potafo man tapishon Satanás shinanquin isca huaa, —Nan ainfo furonanfacu caian un mufoicai aqui nocoshon omitsiscahuashquin, —ishon shinan.

¹⁴ Ascacun Diosin nan ainfo tutumanhuanun pui chainipa cuscara inan ahuun noyacaini cashu tsoan istaipama ano iyonon. Nannoshon Upa Diosin fari rafu non fusti nushmancayan cushusharayoa nan yoshin chaca rononhuan cuscaraton ahuusca huanonma.

¹⁵ Ascano nan rononhuan ahuun ashfapan unuhuan nachian fai tahuain cuscara ainfoqui nocoshon asanon.

¹⁶ Ascafia Upa Diosin yonoa nan ainfoqui faitahuan nocotama mai muran man foa ainfon asanonma.

¹⁷ Ascacufin Satanás famanhuan cuscara sinatapacoin ainfo yafi ahuun funafo rutupai caa. Ascashon nan Diosin yonoa cuscan amisifo yafi Jesús noco Ifoan noco nashoniran huamisifo nanfofin ainfoan ahuun facufo. Nanfo Satanás ato cuyopai caa.

¹⁸ Ascan unuhuan cusumunri nan famanhuan cuscara Satanás nishon ato manai.

13

Unuhuan murannoashu yoina cuscara musucoin cainacahuana

¹ Ascan uhuun namapan ointsa ua oinmana cuscan afanan un mato tapimai. Unuhuan cusumun un niano yoina cuscara musucoin unuhuan murannoashu cainacahuanaiton un oian. Ahuun caya fustifiashu siete mapoya. Ascan ahuun mashori diez ya. Nan ahuun mashoti niaifoan maiti maia. Ascanshon Upa Diosiqui tsain chaca huaquin ahuun fumananfoqui cunu futsa cuscarafu nutan.

² Nan yoina cuscaraton ahuun caya masharo leopardo ointsa. Ahuun tau rafu oso masharona ointsa. Ascan ahuun ashfa masharo leonna ointsa. Ascan nan Satanás yonoa ahuun curushhuunshon nan yoina pofu cuscaraton tsoan atiroma cuscan nanto huatiro. Ascashu ahuun yorafo aton ifo itiro ato yononon.

³ Ascaiton nantifi yorafo manifoti anoafaoan oianfo ahuun mapo futsa amaquinao rutuafo shinantsafiashu man caya. Ascacun yoiafo isca huaquin, —¡Airra! ¡Oincapon!

Ahuuscashutsi ahuun mapo futsa man rutucoinfiafo natian afanan man niaran, —icashu yoinanfo. Yoiquin asca huacatan nanton yoia cuscacoin tanafu.

⁴ Ascan tanacashon yoiafo, —¡Aicho! Satanás ahuun shinanhuunshon na yoina pofu cuscaratón tsoa futsan atiroma cuscan huatiro. Ascacun ahuunoashu nantifi yorafo yonotiro. Ascan Satanás nocon Ifocoin. Noco yoipaiyai cuscan non nicacointiro. Nan yoina pofu cuscarari nocon Ifo. Tsoancai a finontiro. Tsoa futsacai na yoina pofu cuscarama. Tsoancai a rututirofomaran, —ishon yoiafo.

⁵ Ascashu nan yoina pofu cuscara fasi cacapaimisi ica. —Tsoa futsacai ua cuscaramaran, —ishon yoia. Nantori Diosiqui fasi tsain chaca huamisi. Ascashon Satanás yonoa fari rafu non fusti nushmancayan nan yoina pofu cuscaratón nantifi yorafo ato iquina.

⁶ Nantianri Dios roafain ahuunoa tsain chaca yoifain nan icanoahuunoa tsain chaca huafain nan icanoafoquiri tsain chaca huai.

⁷ Ascan Satanashuunshon Jesús icoinra huafo mai ano icafo ato rutumashquin. Ahuunshon nantifi manifesti yafi nantifi tsain futsa futsatapafo yoimisifoan aton niaifocoin inon.

⁸ Ascan nanfoan nantiffain nan yoina pofu cuscara noishceni. Ascashon yoiquin isca huashceni, —Minfin nocon Diosiquin, —huashquicani. Ascaifoancai nocon Ifo Jesús aton anu ahuun libro muran cunuima afu nipanonfo. Mai oni huataima Jesús nantifi icoinra huanonpacoifoan ato anu ahuun libro muran iquisi cunuyoni afu ipanonfo. Ascashu nan chashoanun facu cuscarashu noco nashoni noco nimapacushquin.

⁹ “Man pachoyaquin ua nicacahuun.

¹⁰ Nan yoina pofu cuscaratón Jesús icoinra huamisi futsafo cunu muran iquimapaiquin iquimashquin. Ascan ato rutupaiquiri ato rutushquin.”

Ascafia uhuun yoramishtichin shinanchacayamacahuun. Nan non Jesús icoinra huafoti non omitsiscafiaquin non tunucoinshquin nocon Ifo Jesús cachiquiri huashquima.

¹¹ Ascatan un afanan oian yoina pofu futsa cuscara mai murannoashu caiyainton un oian. Chashoan facu cuscarafishu masho rafuya. Nan Satanás famanhuan cuscaratón ahuun tsain fasi pofucon. Nanscarifai nan yoina pofu futsa cuscaratón ahuun tsain pofuconiri.

¹² Nan yoina pofu unuhuan murannoashu cain tauaton ahuamamishti huafain yorafoti iquina cuscan nan yoina pofu futsari nanscara huaa. Ascashon nantifi maifoti anoa ato yonoa isca huaquin, —Nan yoina cuscara mapo rurano man naacoinfiashu afanan man nia. Nancai noco iforan nocon Diosiran huacahuun, —ishon ato yonoshquin.

¹³ Ascashon ahuamamishti tsoa atiroma cuscan ato isma. Yorafoan aton ointaifiri nai murannoachii pacumana.

¹⁴ Satanashuunshon nanscara huariaquin yorafo man paran Diosiran huanonfo. Ascashon ato yonoa, —Nan yoina pofu cuscara nopu cunopatón man rutufiafo afanan nimisi nan ointa uhuapacoin ramihuacahuun, —ishon ato yonoa.

¹⁵ Ascacashon ato yonocun Satanashuunshon man ramihuafo nan yoina pofu cuscara ointa man shacaimana. Ascano shacaitan nan ramihuafoan tsaincain yoia isca huaquin, —Ua ifoacahuun. Min Diosiran ua huacahuun. Tsoan ua noicasmaquin nannori yoicasmaiton nan rutucahuun, —ishon ato yonoa.

¹⁶ Ascatan nan yoina pofu cuscara futsa nan mai murannoashu oaton yoiqui isca huaa, —Maton mucu mumiori iyamarai mato fumananqui nan yoina pofu cuscara futsa unuhuan murannoashu oaton ahuun anu iyamarai ahuun numero nantifi sellopan ato nutacahuun. Facufo nutafain iyoafofori nutafain mafo ichapaya nutafain ahuuomafo nutafain oinmatifomari nutafain oinmatifo nutacahuun. Ascan tsoashta finonmayamacahuun. Nantifi nan yoina pofu futsan ahuun anu sellopan nutacahuun matoquin, —ishon ato yonoa.

¹⁷ Ascan tsoa sellopan anu nutama atocai ahuaa fipaifiaquicai fitiroma. Ascashuri ahuaa inan mitsatiroma ahuun rafanan tushu yafi sahuuti ahuaa futsa yopai cuscan fishquin.

¹⁸ Ascacun shinansharacahuun. Ratoranfoan Diosihuunshon shinansharaqui tapitirofo nan yoina pofu cuscaratón ahuun numero tapifain ahuun anurifi tapitiro. Ascan nan yoina pofu ointsafishu nocofunucoin. Ahuun numero 666.

14

Jesús icoinra huafoan 144,000 fanainshocani

¹ Ascatan uhuun namapan ointa ua oinmana cuscan afanan mato tapimai. Chashoan facu cuscara nan Jesús machi ahuun anu Sión ano nia un oian. Nanno 144,000 ahuun yorafo afu nia. Ahuun anu yafi Apa Diosin ahuun anuri aton fumananqui cunua.

² Nantianri un nai murannoachii uhuapacoin nica. Unuhuan ponoain nicatsa nicafain turuica achacoin nicatsa. Nan oi uhuapa un nica yora ichapa fanainceni manuti ichapari manuafo. Nan manuti ahuun anu arpa guitarra cuscara.

³ Fanainti funa tsoan nicayomisima Upa Diosin ahuun ointaifi fanainshofo. Ascaifoanno nannori nan rafu non rafuri Diosin onihuani yafi Jesús icoinra huafoti cushumisifo veinte cuatrofoanri arifi nicafo. Nan 144,000 Jesús fu machi ano niafo. Ascan nanfoansi nan fanainti funa tapianfo. Jesús ato nashoni aton chaca soashoshquin Satanás afanan aton Ifo itamarocon nan aton ifocoin inon. Tsoa futsacai nan fanainti funapan atofu fanaintiroma.

⁴ Nan 144,000 yorafoan nocon Ifo Jesús nan chashoan facu cuscara tanacoinmisifo. Chaca shinantamarocon Jesushuunoa shinanfaimisifo. Afin ato numani ato nashonishaquin Apa Diosin yorafo non ahuun yorafori inon. Ato catoan ahuun yorafo icaino ato yoa cusan anonfo. Nanfoancaiyainfoqui chaca huamisima. Jesús caiquiri afu foanfaimisifo.

⁵ –Nanfoan chani yoiaran, –ishoncai tsoan atohuunoa yoitiroma. Jesushuunoashu isharamisifo.

Diospan Furun yafi ahuun oinmati mucu fustiti non mucu foshca fusti a fu nai muran imisiton yotafo cusan

⁶ Ascatan un oian Diospan oinmati futsan afu nai muran ica fasi cuyacoin noyaino nantifi yorafo maifoti anofo tsain shara ato yoinon. Caifoti yoifain shoco futsafoti yoifain nantifi tsain futsa futsatapafa yoimisisfoti yoifain manifotiri ato tsain shara yoinon. Upa Diospan tsain nipanacahuunoa ato yoa.

⁷ Oi ashcafinin ato yoa isca huaquin, –Diosquiri shinancahuun. Mato yonoa cusan man ayamashu aqui ratucoincahuun. Nicacoinsharacahuun. “Min sharacoin min ahuamamishti min atiroran,” huacahuun. Natian Diosin nantifi chacamisifo onaintimai. Nanton nai onihuaifain mai onihuaifain unuhuan saoya onihuaifain anu tsosi sharari onihuani. Ascan a noicahuun. A yoihuu isca huaquin, “Min sharacoin min ahuamamishti atiro. Min nocon Ifon Dios shararan,” huacahuun, –ato huaa.

⁸ Ascatan Diospan oinmati futsan afu nai muran ica ahuun tsain anaitishon futsan nocotoshishon isca huaquin yoa, –Nan pushurasi uhuapa ahuun anu Babilonia. Yorahuanrasi nan pushurasi uhuapa ano ica. Nan yorafoan fasi chaca huamisi. Nanfoan chaca huamisi cusan manifotiri chaca huama. Asca huaifoan Upa Diosin ato onaintimai afanan ipanonfoma. ¡Aichofain! Diosin ato onaintima afanan pushurasi Babilonia yamairan, –ishon Diosin oinmatinon nai muran icaton yoa.

⁹⁻¹¹ Asca huatan afanan Diosin oinmati futsari nai muran icaton nocotoshishon oi ashcafinin yoa isca huaquin, –Tsoan na yoina pofu cuscara yafi ahuuna ointsa ramihua nicacoiainno yoimisi isca, “Nan uhuun Dioscoinran,” ishon anori yoiquin aton mucu iyamarai aton fumananqui na yoina pofu cuscara ahuun anu cunua Upa Diosin atoque sinacoinshquin. Naafoanno Diosin ato fasi curushcai onaintimacoinshquin. Chi muran ato potafiacai cuyonacama. Jesús nan chashoan facu cuscara yafi ahuun oinmatifo afu nai muran icafo aton ointaifi ato omitsiscapanacafo muran potashquin. Isin muuqui unupacunacafoma. Tsoan ato numatiroma. Nan yoina pofu cuscara yafi ahuuna ointsa ramihua ifoanfo ahuun anu aton mucu iyamarai fumananqui cunua. Ascacun shafatifi yafi yamutishonri omitsiscapacoinshcani. Tsoan tunupacunacafomaran, –ishon Upa Diosin ahuun oinmati nai murannoaton yoa.

¹² Ascancunfin uhuun yoramishti maton ointi fupuima sharacahuun. Omitsiscafiaquin tunucahuun. Diosin noco yononi cusan acahuun. Nocon Ifo Jesús cachiquiri huayamacahuun.

¹³ Ascatan un nica oi nai muranshon ua yoiaton, –Un mia yoiái cusan cunuhuu. Ratoranfo nocon Ifo Jesushuunoashu nai unimacoinshcaniran, –ishon ua yoa. –Ainfain. Iconfinquin. Naacanashu afanan omitsiscatirofoma. Upa Diosin ato ama cusan acoinafo. Nantianri unimacoinshcani. Nanfoan futsafo shara huashomisi cusan Diosin nanfo ointiaquimamisima. Ascan Upaqui nocoaifoan ato inansharashquinran, –ishon Diospan Yoshin Sharanun yoa.

¹⁴ Ascatan uhuun namapan ointsa oian cusan afanan mato yoinon. Un oian nai coin oshopa camaqui nan Diosin catoan Jesús ointsa un oian. Niaifon maiti orocoin maifain nopa ushtia cunocoin tsoa.

¹⁵ Ascan ahuun oinmati futsan afu nai muran ica Dios icanoashu caa nocon Ifo yoishquin. –Natian man ica. Nan maifoti ano man fanafo oshian. Natian chituahtian. Ascan min nopa ushtia tsoatan tashushon ichahuahuu, –huaa. Nannori yoifaquin fanacoinhuunoa yoiama. Diospan yorafohuunoa yoicoian isca huaquin, –Natian nantifi Jesús icoinra huafo ihuihuu Upa Dios icano ichananshu afu ipanacaforan, –ishon yoicoian.

¹⁶ Asca huatan nan nai coin camaqui tsaoshon ahuun noppu curushcai fucoa. Diosin mai anoafu tashtua cuscan huaquin aton icha huashquin. Nopucoinhuunoacai yoiama ahuun tsainhuunoa yoia. Afin yoiatiant ahuun yorafo ichanan huai.

¹⁷ Ascatan un oian Diosin oinmati futsari afu nai muran icanoa caa. Arifi noppu ushtia cunocoin tsuma.

¹⁸ Ascatan afanan Diosin oinmati futsari Dios cufiti anoashu caa. Nanton Diosin yonoa cuscan chihuunshon yorafo onaintimatiro. A oinmati noppu ushtia cunocoin tsumashon oi ashcafinin yoia, —Nan fimi ahuun anu uva nantifi oshiancoin. Ascan mushtushon icha huahuu, —ishon yoia. Nanscarifiai Upa Diosin ahuun oinmatihuunshon a nicacasmamisifo ichanan huashquin.

¹⁹ Asca huatan nan oinmati ahuun noppu ushtia cunocoin tsumashon uvatifin shatushon prensa muran pota ahuun unu fonon. Nanscarifiai Diospan oinmatifo afu nai muran icaton Diosin tsain nicacasmamisifo ichanan huai. Ascan Diosin atoqui sinacoin ato onaintimai.

²⁰ Diosin icanoshon ato onaintimanama. Futsafoan ato rutushcani aton imi ichapa foshquin. Ascaran tsoan oinyomisima. Aton imi noacoin caballo fasi tusanancoian. Ahuun chai trescientos kilometro.

15

Upa Diosin ahuun oinmati siete a fu nai muran imisifo afanan ato yonoa mai anoafu onaintimanon

¹ Ascatan uhuun namapan ointsa un ahuaara futsan un oian. Tsoan oinyomisima cuscara nai murannoa un oian. Oin uhuun nomuran, —jUru! —un ica. Natian un oian cuscan mato tapimanon. Nicacahuun. Diosin yora yoitimashunifoqui fasi sinaiquin. Ascacun ahuun oinmati siete afu icafo ato yonoa nantifi mai anoafu onaintimai omitsiscanonfo. Nan ahuun unutaqui Upa Diosin ato onaintimai. Afanancai atoqui sinaquin ato onaintimashquima.

² Un oian unuhuan pusi-quima raca unuya chi osian ointsa. Nanno yorahuanrasi nia. Na yorafoancai yoina pofu cuscara yafi ahuuna ointsa ramihua ahuun numero atoqui cunu nutanmisima. Nanfoan ato shuhuincoianfo. Nan unuhuan pusi-quima raca unuya chi osian ointsa fumancayan maniafo. Upa Diosin atoti manuti inanpacua. Nan manuti guitarra cuscara ahuun anu arpa.

³ Aton arpa tsoamacashon Diospan oinmati Moisés yafi Jesús nan chashoanun facu cahuanshara cuscara fanainmisi cuscan atorifi nannori fanaincani isca huaquin, “Ifon, mincaifin Diosiquin.

Min ahuaamamishti atiro.

Min amisi cuscan sharacoin.

Tsoan futsacai atiroma.

Min manifoti nantifi aton niaifocoin ipanaca.

Min shinanmisi cuscan cayacafi iconcoin.

⁴ Ifon, nantiffain miqui musucaquin

mia nicasharapainonfo.

Min ahuaamamishti tsoan oinyomisima min atiroquin.

Nantifi yorafoti anori yoipacunonfo.

Mirus fusticai min chaca huamisima.

Nantifi manifoti miqui funonfo.

Min shara fustisi huamisi.

Nantiffain oinquin isca huashquin,

‘Min sharacoin. Min nocon Ifocoinran,’ ”

ishon mia yoishcani.

⁵ Ascatan afanan un nai muran Diosin icano oian. Ua fupushona Diosin icanocoin un onon.

⁶ Dios ica murannoashu ahuun nai oinmati siete nantifi chifi ichananfo. Nanfoan mai anoafu onaintimai omitsiscanonfo. Sahuuti oshopa chainipa chashai sahuufain oro cuscara nonushumua sahuuafu.

⁷ Nan rafu non rafuri Diosin onihua futsan Diosin oinmati afu nai muran icafo siete atoti oro tutso inancaua. Diosin nan nipanacaton iconra huafoma mai anoafu sinacoinquin nan cuchanfo muran ahuaara chacacoin fospihuamua atoqui ocano omitsiscashcani.

⁸ Ascatan nantian Diosin chashaiton ahuaamamishti atiro cuscan ato ismaino nan ica muran coinmahuan fospia nashfiain. Ascan mai ano nan Dios nicacasmamisifo Diosin oinmatifo afu icafoan ato onaintimai omitsiscanonfo anaitiataimanocai tsoa Dios icano iquiyotirofoma.

16

A nicayosma shunifo Diosin ato onaintimai omitsiscapanonfo

¹ Ascatan Dios icaricoian oi ashcafinin un nica. Diosin oinmatifo nan siete afu nai muran icafo ato yoia isca huaquin, —Diosin a nicascamamisifo mai ano icafo atoqui sinaquin nan tutsofo ahuaa chacafo fospihuamua atoqui ocacahuun, —ishon ato yonoa.

² Nicacashon Diosin oinmati futsan tauhuaqui ahuun tutso nai muranshon mai ano oca. Nan yoina pofu cuscara ahuun anu aton mucu iyamarai aton fumananqui cunuafo yafi afin ramihuamua ointsa ifoanfono nanfo aton yoratisho coo suyacoin fuchiriscata isincoin tunutirofoma.

³ Ascatan afanan Diosin oinmati futsan ahuun tutso nai muranshon unuhuan muran oca. Ocaino unuhuan fianananriscatana nocofunu rutuano ahuun imi foa ointsa. Ascانofin nantifi nan unuhuan murannoashu nai futsuafo.

⁴ Ascatan afanan Diosin oinmati futsan ahuun tutso nai muranshon unufoti yafi mai murannoashu unu afafotiqui oca. Oceano unufoti yafi mai murannoashu unu afafotiri fianananriscatana imi ica.

⁵⁻⁶ Nantianri oinmati futsan Dios fu tsaincaiton un nica. Nan unu cushumisiton isca huaquin yoia,

“Upa Diosin tsoa min oni huataima min iyopaoni. Min ipaoni cuscan natianri min nipanaca. Min shara fustisi imisi. ¡Aicho! Nantianri mia nicascamamisifo min ato onaintimai cuscan iconcoin. Aton chaca shatucanashu min Furun Jesús Ifocoianfo non min tsain aton yoimisifori nan icoimaran huafoan ato rutuafo. Ascacufin min icoinra huafoama namai cuscafin iconquin. Min yorafo fasi omitsiscamamisifo ascan min nan icoimaran huafo onaintimai omitsiscanonfo. Min cayacafi iconcoin ato onaintimaran,”

ishon Diospan oinmatinin yoia.

⁷ Asca huashon Dios icanoa nai muran nan cufiti ano fustishosi Upa Diosin cufinmisifo anoan un futsanfo nica yoiquin isca huaifoan,

—Nocon Ifon Diosin, min nai oinmati yoia cuscan iconcoin. Mia nicayosma shunifo min ato icon cayacafi ato onaintimairan,
—ishon yoiafo.

⁸ Ascatan Diospan oinmati afu ica futsan Dios icarishon ahuun tutso murannoa ahuaa chaca fari camaqui ocashquin. Oceano farihuunoashu yorafo coa.

⁹ Farin fasi shanacoinquin yorafo coa. Coaino omitsiscafo. Man tapiamisifo Diosin ato onaintimai aton chaca shatuafoama. Dios ifoantamarocon. —Diosin noco chaca huai. Ahuun cuscaramain Diosiquin. Chacacoinran, —ishon yoiafo. —Diosifin sharaquin. Nantofin ahuamamishti huatiroquin, —ishoncai tsoan anori yoipaicanima.

¹⁰ Ascatan Diosin oinmati futsan Dios icarishon ahuun tutso murannoa nan yoina pofu cuscara chacacoin yafi afu icafo ato camaqui oca. Oceano nan yoina pofu cuscara chacacoin ifofo icano faquishcoin ica. Ascan nantififain isincoin muafo tunutiroma. —Aripun, —iriafo.

¹¹ —Diosin noco asca huaa. Ascan nocon yoratishon coo suyacoin non isin tunutiroma. Nan nai murannoa Dios chacacoinran, —ishon yoifishu aton chaca shatuafoama.

¹² Ascatan Diosin oinmati futsan nai muranshon ahuun tutso murannoa unu uhuapa ahuun anu Eufrates amuran oca. Oceano nan Eufrates nutsoriscatana man mutocaina. Nan niaifo rafu non fusti fari oaiquirinoashu fucani. Ascan Eufrates nutsocoian aton ranushumuafo ya pocufaitirofo.

¹³ Ascano un yoshin fasi chacafo rafu non fusti fushco ointsafo un oian. Futsan famanhuan ointsa nan Satanás ahuun ashfan murannoashu caincaina futsan nan yoina pofu cuscara ahuun ashfan murannoashu caincaina futsan nan fuparapaimisiton, —Unfin Diosin tsain mato yoimisiran, —ifishu chanimisi yoshin chaca ahuun ashfan murannoashu caincaina.

¹⁴ Nan rafu non fusti fushco ointsa yoshin chacafoan ahua tsoan oinyomisima cuscara ahuamamishti yorafo ismafo. Nantifi niaifofo manifoti ano focani ato ichanan huamai nocon Ifo Jesús ahuun yorafo rutunonfo. Nantianri nocon Diosin ahuamamishti amisiton ahuun yono ismashquin.

¹⁵ Asca huaifoan nantianri nocon Ifo Jesús noco yoipaiyai cuscan un maton yoinon. Isca huaquin yoia, —Ua nicacahuun. Yomutson tsoan tapimaima pushu muran iquinon. Samamashta pushu muran iquiriscatiro ahuaa onushquin. Nanscarifai un tsoa tapimaima nan un matoqui nocoriscaitian. Un matoqui samamashta nocoriscashquin. Tsoan

itisharacacaini ua tanasharashon manasharacoian fasi unimashquin. Ascan tsoan ascata itisharayamaino un matoqui nocoriscaitian nantifi yorafoan ointirofo tsoan ua tanasharama. Ascashu fasi rafipaitirotan, –ishon yoia.

¹⁶ Nannori nocon Ifon Jesús yoifiashu nan rafu non fusti yoshin chacafoan nantifi niaifoto maifoti anoafu ichanan huua Diospan yorafo rutupaquin. Ato ichanan huamai nan mai ahuun anu Israelifo tsainman Armagedón.

¹⁷ Ascatan Diospan oinmati futsan ahuun tutso nai muranshon oca. Asca huatan Diosin icarishon Upa Diosin fasi oi ashcafinin yoia, –Mun aca. Natian man anaitiaran, –ishon yoia.

¹⁸ Ascatan fasi curushcoian canan pishiiriaicain ahuafo achacoinfo yafi fasi nai turuicacoin icain mai nayanaiyaiqui curushcoian. Ascacai tsoan mumisima. Nocofunu onihuaquin tau huanitian natianri mai nayanaiyaiqui ascaitocai tsoan muyomisima.

¹⁹ Ascan nan pushurasi uhuapa ahuun anu Babilonia ano nayanaiyaiicaino mainhuan nantiocon rafu non fusti toshamanhuan cainni. Maifoti anori aton pushurasifo nan mai nayanaiyaiquin maocomua. Diosin na pushurasi Babilonia anoafu chaca huamisifo cuscan ointiaquimamisima. Ascan atoqui fasi sinamanhuanquin ato onaintimacoin omitsiscanonfo.

²⁰ Nantianri unu potofotin yamariscatashquin ano icafori nai futsuafo. Nantifi machifotiri yamariscatashquin.

²¹ Nantianri unu matsi tocorofo uhuapacoin aton ihuu cincuenta kilos cuana nai muranoashu yorafo fuchi pacua. Ascafia aton chaca shatutamarocon, –Diosin fasi chacacoin. Nan unu matsi tocorofo uhuapacoinun noco omitsiscamairan, –ishon yoiafo.

17

Mai futsan anoafu ainfon furoma cuscarafu

¹ Ascatan uhuun namapan ointsa ahua ahucaran ariscashquiaian cuscan afanan ua oinmayoa. Nan Diosin oinmati afu nai muran icafo siete tutso tsoacashon futsan ua yoia, –Nuri ohuu. Nan pushu ichaparasi unufo chaimashta anoafu fasi chacacoin. Ainfo furomacoin cuscarafu. Ascano Upa Diosin ato onaintimashquin. Oinyopon. Mia oinmanon.

² Nantifi niaifoto maifoti atofu inanmitsamisifo. Ascan atohuunoashu afori fasi chacacoin icafo. Nan ainfo furomacoin cuscara icafo. Ascan Diosin ato onaintimashquiaian cuscan mia ismaran, –ishon ua yoia.

³ Asca huashon tsoan istaipama ano Diospan Yoshin Shara ua iyoa. Nannoa un oian nan ainfon yoina pofu cuscara oshicoian camaqui tsoa. Nan yoina pofu ahuun yoratishton anu ichapa cunua. Nantifi nan anufo Diosqui tsain chaca cunua. Nan yoina pofu mapo siete ya. Masho mucu rafutiya.

⁴ Nan ainfon saya chainipa shonan yafi oshin sahuua. Oro facafacaitsa macush cuscara sharashtan yafi futsan ahuun anu perla oshopa nanri sharashtacoin sahuua. Tutso oro tsoma amuran ahuafo chacacoin. Amuran nanua cuscan yorafo ahua chacacoin futsa futsatapafo chaca huama. Aton nomuran shinanchacamana. Paunmafain chanimisi imafain aton ahuinma chotamisifo imafain aton funuma chotamamisifo imafain nanscara chacafosi ato imapacumisi.

⁵ Ahuun fumananqui cunua cuscan tsoan onanmisima. Isca huaquin cunua,

BABILONIA
NAN PUSHURASI ANOAFU
TSOAN FUTSA ATO CUSCARAMA.
AINFOFU FUROMACOIN CUSCARA
YAFI NANTIFI MAI ANOA CHACAMISHTIFO
ATON UHUA CUSCARARAN,

ishon cunua.

⁶ Nan ainfon furoma cuscara Jesús icoinra huafo ichapa nan Jesús uhuun Iforan huamisifo ato rutumamisi un oian. Un na ainfo oin un mustairia. Un yoia, –¡Ajaa! Ascaran ainfon chaca un oinyomisimaran, –ishon un yoia.

⁷ Un ascaino Diosin oinmati afu nai muran icaton ua yoia, –¿Ahuuscain min mustairimun? Nan ainfo yafi nan yoina pofu camaqui cahumisi nanton siete mapoya non masho mucu rafutiya tsoan atohuunua tapimisima. Ascan natian un mia tapimai.

⁸ Nan yoina pofu min oian yoinacoinma. Afin niaifo uhuapa chacacoin. Nanscacun Dios noicasmamisi. Niyopaoni. Natian niyamafishu chipo nan yoshin chacafo icanoashu cainshquin. Nannoashu cainfiacun Upa Diosin omitsiscapanacafo muran potashquin afanan anoashu canacama huaquin. Tsoan Jesús icoinra huamacai aton anu ahuun libroqui

cunuama afu ipanon. Nanfoan na niaifon yoina pofu cuscara oincashon mustairitan, “¡Aira! ¡oíncapon! Man nafiacanashu afanan oaran,” ishon yoishquicani.

⁹ Ascan tsoan ahuun nomuran Diosihuunshon cayacafi shinantiro nanton un rama cunua cuscan tapitiro. Na yoina pofuhuunoa mato yoinon ua nicasharacahuun. Ahuun mapo siete mapocointamarocon nanfohuunshon siete niaifohuunoa noco tapimai. Nanfo icano siete machifo. Nannori nan ainfo furoma cuscara ica.

¹⁰ Mucu fustiti nan niaifofo yamai. Man nanifo. Fusti natian nia. Futsan chipo iishquin. Chipo ifiashucaí chai ipashquima.

¹¹ Nan yoina pofu cuscara oshicoín un mia yoia cuscan arifi yoinacointamarocon niaifon chaca futsan. Nan iyopaoni cuscan natiancai icama. Arifi nan siete fu ipaonifo. Chipó afanan ifiashu omitsiscapanacafo muran cai afanan anoashu canacama.

¹² Ascan nan masho mucu rafuti min oian mashocoinma. Nanfohuunshon mucu rafuti niaifofo noco ismapai. Nanfo niaifofo icataifoma. Chipó mani futsanfo mucu rafuti aton niaifofo tироfo. Na yoina pofu cuscara fu niaifofo iishquicani. Ascanfiacai chai niaifofo ipashquicanima. Samamashta unuriscashquin.

¹³ Ascafia unuataima nan siete niaifofo nannorisi shinanmisifo. Nan nocofunun yoina pofu cuscara apaiyai cuscan nannorisi shinancani. “Min noco yonopaiyai cuscan non atiroran,” ishon nan mucu rafuti niaifofoan nan nocofunu yoina pofu cuscara yoishquicani. Afin nantifi niaifofo aton niaifocoin iishquin.

¹⁴ Ascacashon nan nocofunun yoina pofu cuscara futan nan mucu rafuti niaifofoan nocon Ifo Jesús ahuun yorafoya noicasmacani. Jesús ahuun yorafo cunani ahuun tanamisifo inonfo. Ascashon ato catoan. Nanfo ahuuscarafiaino nocon Ifon cachiquiri huamisima. A tanacoinmisifo. Nan yoina pofu cuscara nan mucu rafuti niaifofo futan Jesús chashoan facu cahuan sharashta cuscara nan nocon Ifo yafi ahuun yorafo rutumapaishcani. Rutupaíyaiaton atorocofin Jesús ato namashquin. Nantianri ahuun tanamisifo afu iishquicani. Nocon Ifon nantifi niaifofo uhuapafo non niaifofo patashariri aton niaifocoinshon ato iquitiro. Nocon Ifon Jesús aton Ifocoinshon ato iquitiro. Nantifi niaifofo yafi ifoafori manifesti anoafó ato iquitiro. Ascan tsoancai nocon Ifon Jesús shuhuintiroma ahuun tanamisifocai ato tsoan cuyotiroma, —ishon nan Diosin oinmati afu nai muran imisitón ua yoia.

¹⁵ Ascan afanan ua yoia isca huaquin, —Min oian nan ainfo furomacoin cuscara unu fumancayan tsoa. Nan unucaí unucoinma. Nanhuunshon caifofo non yorafo non mani futsafo non tsain futsa futsatapayafo nan ainfon furomacoin fu icafo noco ismapai.

¹⁶ Nan mucu rafuti niaifofo yafi nan niaifofo yoina pofu cuscara ainfo furoma cuscara noicasmacoinshcani. Nantifi ahuuna man fiishquin afanan ahuomacoin iishquin. Ascan afanan tsoacai na ainfo furoma cuscara fu ipaishquima. Ascaiton nan mucu rafuti niaifofo yafi nan niaifon yoina pofu cuscara noicasmacoincaquin omitsiscamacaquin chi muran ainfo furomacoin cuscara potashcani afanan inonma.

¹⁷ “Min noco yonopaiyai cuscan non atiroran,” ishon nan mucu rafuti niaifofoan niaifofo yoina pofu cuscara yoiafo. Ascafia Diosin nannorisi ato shinanmana afin apaiyai cuscan atohuunshon anon. Ascatan Diosin yoíyomisi nan anon pacoai cuscan nanscara huashquin.

¹⁸ Na ainfon furomacoin cuscara ainfocointamarocon naanfin pushurasi uhuapacoín. Nanfoan manifesti aton niaifofo iquinaran, —ishon Diospan oinmatinín afu nai muran imisitón ua yoia.

18

Diosin oinmatinín afu nai muran ica yoia isca huaquin, —Natian Babilonia anoafó nai futsucani, —ishon yoia

¹ Ascatan Diosin oinmati futsan nai murannoashu mai ano fotoaiton un oian. Upa Diosin yonoa niaifofo patashari nanton ahuamamishiti atiro. Ahuunshon maifoti chashacoian.

²⁻³ Oi ashcafinín cunaquin isca huaa,

“Babilonia ano icafoan fasi chaca huamisifo. Chaca fustisi shinanmisifo. Nocofunfoan aton ahuinma chotamisifo ainfofoan aton funumari chotamamisifo. Man amisifo cuscan caifo futsanfori atohuun caoafó. Ato chaca huamamisi Upa Dios tanatamarocon chaca fustisi tananonfo. Man chaca huamisifo cuscan caifo futsafori aton niaifofoan nanscarin huaquin chaca huamisifo. Nan Babilonia ano icafoan fasi mafo ichapaya. Ascan ahua yopacaquima mai futsa anoafó aton mafo inan ahuun rafanan pui fiishcaquin. Ascano futsafoanri mafo inanmitsacashon ahuun rafanan pui finonfo. Asca huacanashu Babiloniahuunoashu afori mafo ichapaya icafo. Asca huacaquin Upa Dios shinanmisifoma.”

“Ascacufin Upa Diosin nan Babilonia anoafo fasi onaintimai afanan tsoan ano inonma. Ato namaquin cuyoshquin. Afanan ano yora itamarocon yoshin chaca futsan futsantapafo tsain mutsama yoifafainaifo ano icaforan,”

ishon Upa Diosin oinmatinin nan afu nai muran icaton ua yoia.

⁴⁻⁸ Yoiquin asca huatanaino nai murannoashu un oi futsan nica isca huaquin,

“Babilonia ano icafoan fasi chaca huamisi finacioianfo. Nan chaca huamisiko cuscan Upa Diosin ato oinshon ointiaquimanama. Ascashon ato onaintimacoinshquin, Upa Diosin, nan Babilonia anoafo futsafo chaca huamisiko cuscan mimacoin huaquin ato onaintimahuu omitsiscanonfo. Man yoiafo isca huaquin, ‘Noncai Dios yopaima. Non ahuashta yopatiroma. Nonfin isharamisiquin. Nonfin ainfon niaifocoin isharamisi cuscara. Noncai man funu amaqui naa ainfo funuoma cuscarama. Nanscara ainfo manoi omitsiscatiro. Noncai manotamarocon non isharapacunacaran,’ ishon cacapaimisifoan yoiafo.”

“Ascan, Upa Diosin, ato fasi onaintimahuu omitsiscái tununonfoma. Icoinra huafoan ua nicasharacahuun. Upa Diosin ato samamashta onaintimacoinshquin afanan isharatamarocon atirifi namafain omitsiscamafain aton tushu cuyomashquin fonainquin naanonfo. Tsoan atiroma cuscan Upa Diosin ahua-mamishi huatiro. Nanton ato onaintimai ato cooi cooi futsunonfo. Ascano Upa Diosin mato yoi isca huaquin, ‘Uhuun yoramishtichin, Babilonia anoafo cuscara iyamacahuun. Ato fu rafuyamacahuun. Ato futan chaca huayamacahuun un ato onaintimai cuscan un matori onaintimanonma,’ ”

ishon Upa Diosin mato yoi.

⁹ Ascan Babilonia coaino mai futsafoti aton niaifofoan oincani uaicaquin manoshcani. Nanfoan Babiloniafo futan Upa Dios potacani chaca huanonfo. Babilonia anoafohuunshon mafo ichapa fiafo.

¹⁰ Nanfo coaino oincani niaifofo fasi ratushquicani.

“¡Ohuashta! Babiloniafoan rato caifo futsancai mato cuscarama. Man tapicoinsharafiacoan samamashta Upa Diosin mato onaintimai man coi futsunon. ¡Ai timafin!”

ishon ratucoincaquin niaifofoan yoishquicani.

¹¹ Nanscarifiai manifoti aton inanmitsamisifo uaishcani. —¡Ohuashta! Babilonia man coi cuyoa. Natian tsoan futsacai nocon mafo non nocon ahuaara futsafo fitiroma.

¹² Nocon oro sharashtacoin fianmafain nocon torofo oshoshtacoin fianmafain nocon toquirifo faca facaitsa chicoin fianmafain nocon toquiri futsan ahuun anu perla fianmafain nocon pano futsa futsatapafo fianmafain nocon ihui inin sharashtacoin futsa futsatapafo fianmafain toquiri curushcain oshopa sharashtacoin ahuun anu marfilhuunshon ahuaarafo onihuaafain ihui chicoinhuunshon ahuaarafo onihuaafain cuno ahuun anu bronchehuunshon ahuaarafo onihuaafain cuno futsan ahuun anu fierohuunshon ahuaarafo onihuaafain toquiri ahuun anu marmolhuunshon ahuaarafo onihua nanfo afanan fianmafain.

¹³ Nocon pitiri ahuun anu canela non yochi non nan fimi ahuun anu uva ahuun unu non shuni non harina roroshta non trigori fianmafain inin shara aton anu incienso yafi futsan ahuun anu mirra non inin futsafori fianmafain nocon inafon nan moifo non chashoanfo non caballofo fianmafain taramutiya fianmafain nocon oinmatifori noco afanan fiantirofoma.

¹⁴ “¡Ohuashta! Babiloniafoan nan ahuaarashta sharashtacoin futsa futsatapafo man fasi fuchipaimisifo afanan man fitiroma. Nantifi man aya cuscan man funocioian afanan man fiapanacama. Man ahuaara yopapaonima. Man acai afanan ascanacama. Nantifi matona man funoi cuyocioianran,”

ishon nan inanmitsamisifoan yoishquicani.

¹⁵ Babiloniafo fasi omitsiscái nan Babilonia anoafo yamafashon aton mafo fimisifo atohuunshon mai futsa inanmitsashon pui ichapa fimisifo fasi ratucoincani. Fasi uaishcani manocaquin yoiquin isca huashcani,

¹⁶ “¡Ohuashta! Rato futsafocái Babiloniafo cuscarama. Ahuun yorafo sahuuti sharashtacoin sahuumisifo. Sahuuti shonan shara non oshin shara non oro toquiri faca facaitsa chicoin non toquiri futsa ahuun anu perla sahuutihuun nua nanscara sahuuafo.

¹⁷⁻¹⁹ Fasi isharaifiamisishacaquin samamashtacoin nantifi man funofo. Afanan aton pushurasi yamai. Man coi cuyoi futsua. ¡Ohuashta!”

ishon nan inanmitsamisifoan yoishquicani. Nanscarifiai nan shashohuan ifofo non amuran fomisifo non shashohuanun camisifo pui fiishquin afoanri fasi shinain. Babilonia coaiton chaicushon oincani manocani fasi uaicani.

“¡Ohuashta! Rato pushurasi futsancai Babilonia cuscarama. Nanno fustishon shashoan ifofoan pui ichapa fiafo. Ascanfiacanashu samamashtacoin nantifi man aya cuscan man funoaforan,”

ishon shashoan yonomisifoan yoishquicani.

²⁰ “Ascafiainfoanno nantifi Upa Dios fu icanoafoan unimacahuun. Babiloniafoan Jesús icoinra huafo man omitsiscamamisifo. Ascancufin Upa Diosin ato fasi onannitimana omitsiscapanacafo. Nantifi Jesús icoinra huafoan non Jesús fu rafumisifoan non Diosin tsain inon pacoai yoimisifoanri unimacahuun,”

—ishon yoia.

²¹ Ascatan Upa Diosin ahuun oinmati afu nai muran icaton futsan mutsisipacoin toquiri uhuapacoin finifoantan unuhuan muran potaquin yoia isca huaquin,

“Un na toquiri curushcai pota cuscan nanscarifiai Upa Diosin nan pushurasi anoafo Babilonia curushcai ato onaintimashqui coi munononfo. Cuyoriscatashquin afanan tsoan oinnacama.

²² Ascán afanan Babilonia ano manutifo nan shainti non manuti futsafori pusicanima. Tsoancai afanan ato nicanacama. Yonomisi afanan ano iyamacain afanan naniainfo nicayamafain

²³ afanan lamparina ano otapacunacafoma. Nocofunun ainfo fiaino unimaifoan man nicamisi.”

“Ascán afanan tsoan ascaran nicapacunacama. Babilonia anoa inanmitsamisi-foan fasi tapicoincani. Nanfoan fasi ichapa fiafo. Aton shointihuunshon manifoti paramisifoquin.

²⁴ Babiloniafoan Diosin tsain yoimisifo non Jesús icoinra huafo futsafori rutumamisifo. Manifoti anoa ato rutunifo,”

ishon Diospan nai oinmatinin yoia.

19

¹⁻² Ascatan nai muran icafo ichapacoin aton oi un nica. Oi ashcafinin un ato nica isca huaquin,

“Tsoan chaca huamisi Upa Diosin ato onaintimai. Iconquin ato onaintimai. ¡Aicho! Nocon Ifon Diosin fasi sharacoin non yoipacunon. Nanton nocon chaca soashona non afu nipanon. Ahuunoa fusti non yoitiro isca huaquin, ‘Min nocon Ifocoin. Tsoa futsacai mia cuscarama. Mirus fusti min sharacoimisirán,’ ishon nantifishon yoipacunonfo. Ahuun shinanhuunshon ahuamamishti huatiro. Upan Diosin Babilonia anoafo atohuunoa isca huaquin yoia, ‘Nan Babilonia anoafo ainfo furomacoin cuscarafo. Man chaca huamisi fohuun manifoti anoafo ato chaca huama. Ascancufin ua Babiloniafoan fasi ua chaca huafo. Uhuun yorafori man omitsiscamacani naanonfo. Ascán un ato omitsiscamapacunacaran,’ ”

ishon Upa Diosin yoia.

³ Afanan oi ashcafinin nai murannofoan yoia isca huaquin,

“¡Aicho! Nocon Ifon fasi sharacoin non yoisharapacunon. Chaca huamisi fo iconquin ato onaintimai. Ato chii urumanhuan muran potai. Nan chiicai nocapacunacamaran,”

ishon yoiafo.

⁴ Ascánori Upa Diosin tsoa ano nan Jesús icoinra huafo aton cushumisifo nan veinte cuatro nocofunifo yafi nan Diosin onihuan rafu non rafuri anaman fuoshonpacufoantan isca huaquin yoiafo

—¡Aicho! Nanscasi ipanon. Amen. Nocon Ifon Jesús fasi sharacoin, non yoipacunon

—ishon yoiafo.

⁵ Ascatan Upa Dios tsoa ano un oi futsan nica isca huaquin,

“Upa Diosin oinmatifo non niaifoanri man Diosin mato yoia cuscan nicacoinmisi. Marifi Upa Diosihuunoa yoisharacahuun isca huaquin, ‘¡Aicho! Upa Diosin min fasi sharacoinran,’ ”

huacahuun.

Jesús nan Diospan chashoan facu cahuanshara cuscara ahuun yorafo aqui ihuutiro afu fusi huanonfo

⁶ Ascatan yorahunrasi aton oi unuhuan ponoin achacoin cuscara yafi nai curushcain turuica nicatsa un nica yoiaifoan,

“Nocon Ifon Diosin tsoan atiroma cuscan ahuamamishti huatiro. Nanfin nantifi-fain nocon Niaifocoinquin. Manifoti anoa noco iquinan. ¡Aicho! Nocon Ifon Diosin fasi sharacoin non yoipacunon.”

⁷⁻⁸ “Nocofunun ainfo fiaino ainfo unimacoin itisharatiro ahuun funu fu fianain. Nanscarifiai nocon Ifo Jesús nan chashoan cahuanshara cuscara natian ahuun yorafo afu imapacui. Ascan ahuun yorafo man itisharafo afu ipashcaquin. Ainfoan ahuun funu unimamai nashitiro. Nashishon saya funa sharashtacoin patsashon sahuutiro afu fiananshquin. Nanscarifiai ahuun yorafoan itisharashon Upa Diosin aton chaca soashonon Jesús fu ipasharanonfo. Ascacun non unimanon. Tsoa futsancai mia cuscara sharamaran non nocon Ifo huanon,”

ishon yoiafo. Diospan yorafoan Jesushuunshon futsafo shara huamisi. Ascan Diosin ato sahuuti sharashtacoin sahuumana Jesús fu ipasharanonfo.

⁹ Ascatan Diospan oinmati nan afu ica ua yoia, —Un mia yoiai cuscan cunuhuu isca huaquin, “Uhuun Facun Jesús chashoan facu cuscara natian nantifi ahuun yorafo ichanan afu ipashcaquin. Ascan ohuu. Uhuun Facu ahuun yorafo pimai minrifi ato futan pitiro afu ipashquin,” ishon Upa Diosin nannori yoi fasi unimatiro. Nannori Upa Diosin ahuun tsain. Ahuun tsain man icoinra huatiroan, —ishon ua yoia.

¹⁰ Ua yoiaino un anaman fuopacua, —Min sharacoinran, —ishon yoishquin. Ascashiashon ua yoia, —Asca huayamahuu. Ua anori yoiyamahuu. Unrifi nan mi futan Jesús icoinra huafo cuscarari. Jesús mato yoia cuscan man cachiquiri huamisisima. Un matofu ahuun oinmatiri. Nan fusti non fuoshopacutiro yoishquin, “Min fasi shara. Min uhuun Iforan,” ishon min nan fusti yoitiro. Diospan tsain yoimisifoan yoiafo cuscan unrifi un mia yoia nanscasi huaquin non Jesushuunshon non yoinon, —ua huaa.

Cristo afanan mai ano oshquiai cuscan yoia

¹¹ Ascatan uhuun namapan ointsa ua oinmana cuscan afanan un mato tapimai man tapinon. Upa Diosin nai muran icanoa un oian. Fupoti fupumua pushu muran non ointiro. Nanscara Upa Diosin icari un cayacafi oian. Nanno caballo oshopa un oian. Nan caballo camaqui tsaooton ahuun anu ichapa. Ahuun anu rafuhuunoo mato yoinon. Yoia cuscan acoimisi. Ascan ahuun anu futsan Iconmisi. Nanton iconcain yora chacafo onaintimai. Nan Diosin tsain nicacasmamisifo ato potashquin omitsiscapanacafo muran.

¹² Ahuun furo chi uruai cuscara rafu. Chi uruaino faquishfiacun yoran oinsharatiro. Nanscarifiai nocon Ifoan yorafoti aton nomuran shinain cuscan onancoian. Niaifo maiti sharashtacoin ichapa maia. Ahuun fumananqui anu cunua. Arus fusti nan anu onan.

¹³ Sahuuti chainipa sahuua. Nan sahuuti imiqui pocoa. Ahuun anu futsari Diospan Tsainran.

¹⁴ Ahuun yorafo nai ariashu caballo oshopa camaqui aton Ifo cachiori focani. Ahuun ranushumua cuscarafo. Aton sahuutifo yufan oshopa sahuuafo. Na sahuuti oshopa rama patsamua cuscarafo.

¹⁵ Ahuun tsain nupu cunocoin cuscara. Ahuun tsainmansi manifoti yoitimamisifo ato onaintimai. Manifoti ato iquina ratofomain yoitimamisiqui ato curushcai onaintimaquin finacoin. Ahuun tsain nicacasmamisifocun nan Diosin ahuamamishti huatiro fasi atoqui sinacoin. Ascan Jesushuunshon ato onaintimai omitsiscapanacafo muran ato potashquin.

¹⁶ Jesús ahuun anu futsan ahuun sahuuti chainipa mananquirinoa yafi maiquirinoahuun cunua isca huaa,

NIAIFOFO MANIFOTI ATON NIAIFOCOIN ANUFAIN IFOAFO MANIFOTITON ATON IFOCOINRAN

ishon cunua.

Jesús nan yoina pofu cuscara finnoncoinyaino chii urumanhuan muran potani

¹⁷⁻¹⁸ Ascantari un oian Diosin oinmati afu nai muran ica futsan fari tsacaino nishon oi ashcafinin puiyafa noyaiton cuna, —Fucahuun. Upan Diosin mato pimapai. Niaifocoinfo non ranushumua aton niaifocoinfo non aton niaifo patasharifo non nocofunufu mutsisipacoin non caballo non caballo catu camaqui tsaoofo non nantifi Diosin tsain nicacasmamisifoti niaifofu non yora ahuamari nantifi Diosin ato namashquin. Ascacufin puiyafaan aton nami pi mayanshquincaniran, —ishon nan oinmatinin puiyafa yoia.

¹⁹ Ascatan un afanan nocon Ifo Jesús ahuun noicasmamisifo nan yoina pofu cuscara yafi manifoti aton niaifofu uhuun namapan ointsa un ato oian. Man ichananfoan Jesús ahuun caballo camaqui tsaocun ahuun yorafoya rutupaicani.

²⁰ Aton rututamarocon Jesús ato achia chi muran ato potashquin. Nan yoina pofu cuscara yafi nan fuparamitsamisiton, —Unfin Diosin tsain mato yoimisiquin, —ishon yoifiashu chanimisi. Nanton yoina pofu cuscarahuunoo tsoan atiroma cuscan Satanashuunshon huamisi. Ascan nantifi cunua yorafo nan yoina pofu cuscara ahuun anu atoqui nua.

Nanfoan yoimisi isca huaquin, —Min uhuun dios. Un mia noiran, —ishon yoimisiso. Ascarafofin nan yoina pofu cuscaraqui. Ascan nan paramitsamisiton tsoan atiroma cuscan ahuamamishti acai cuscan man oianfo. Ascaquin ato paracoian. Nan rafu nan yoina pofu cuscara yafi nan paramitsamisi niyoa Jesús ato chi urumanhuan muran pota.

²¹ Nan rafutan yora tushuafo Jesús ahuun caballo camaqui tsaoshon ahuun tsainman nopo cunocoin cuscarahuunshon ato rutumana nai futsuafo. Naafoanno puiyafa atoqui ichanancashon aton caya piqui mayafa.

20

Jesús Satanás achishon nusha mil fari

¹ Ascatan Diospan oinmati Diosin icariashu fotoaiton un oian. Shafi cuscara tsoma. Nan yoshin chacafo quininhuan faquish muran icafoqui atoqui fupoti fupoa. Nanno Diosin oinmati fupoti ahuun shafi cuscara yafi cuno pono uhuapa cuscara tsoma.

² Tsomashon nan famanhuan cuscara achia. Diosin mai oni huataima nan nononhuan iyopaoni. Paramitsamicoin. Naanfin yoshin chacacoin Satanás. Achishon cuno pononun nusha.

³ Ascashon quininhuan faquish muran pota. Potatan aqi fupocoian amuran mil fari inon afanan caifoti paranonma. Nan mil fari anaitiano cainmayoi ahuutishotama afanan mai ano cahuancacayonon.

⁴ Ascatan niaifoan tsaotifo Upa Diosin icanoa un oian. Jesús ahuun yorafo nan tsaotifo camaqui tsaofafo. Jesús yonoano a futan futsafo yonoshquin. Ascashon nannori un oian nan Jesús icoinra huaa futsafo. Nanfo niyoano nan yoina pofu cuscara yafi ahuuna ointsa rami huati nanfoan ifoanmisima. —Minfin uhuun Ifo. Un mia noiran, —ishoncai yoimisi-foma. Aton anu aton mucu iyamarai aton fumananqui cunumisifoma. Ascatarocon yoimisiso isca huaquin, —Jesús fustifin nocon Ifoquin, —huamisifo. Diospan tsain fustisi tanamisifo. Ascan nan yoina pofu cuscara atoqui sinaquin ato tushtumana. Nai futsufiafo Diosin ato funimani. Funishon Jesús futan mai ano mil fari yorafoti iquina.

⁵ Nanfo funi yoi. Ascan nan mil fari anaitiano futsanfori funimashquin.

⁶ Shinacapon uhuun yoramishtichin un mato yoiai cuscan. Nacorifi Upa Diosin noco funimaqui tau huashquin. Nocon catoon ahuun yorafo non inon. Upa Diosin yafi Criston noco yonomapaiyai cuscan non futsafohuunoo non Upa Dios cufmisi. Non Jesushuunoashu omitsiscamishashaquin naashu non omitsiscapanacafo muran canacama. Ascatarocon non Cristo icanoshon a futan futsafo iquishquin. Ascashu Jesús cuscara shara icashu non fasi unimacoinshquin.

⁷⁻⁸ Ascatan nan mil fari anaitiano Satanás quininhuan faquish murannoo afanan cainmayoshquin nan manifoti anoafu parayonon. Ascatan Dios nicacasmafo manifoti ano ato ichanan huai Diospan yorafo rutumashquin. Ichananfoanno fasi ichaparasi. Nan Dios nicacasmafo tsoan tanan huatiroma. Aton anuquin Gog yafi Magog man huamisifo.

⁹ Manifoti cunua ato ichanan huashquin Diospan yorafo icano ato cufuacufoanifo ato rutushquin. Ascaciafocun Upan Diosin ahuun yorafo fasi noiquin ato numashqui. Nan yorafo Satanás ichanan huua nai muranshon ato camaqui chi urumanhuan potai nai futsunonfo.

¹⁰ Ascatan nan yoshin chaca Satanás nanton yorafo fuparapaimitsamicoin Upan Diosin chi urumanhuan muran pota. Nanno omitsiscapanaca. Nannori nan yoina pofu cuscara yafi a futan yonopaoni, —Unfin mato Dioshuunoo yoimisiquin, —ishon yoifiamisishaquin Satanashuunoo ato yoimisi. Fasi paramitsamicoin. Nan rafu non fusti chi urumanhuan muran omitsiscapashquin. Isin muuquin unupacunacafoma.

Jesús icoinra huafoma ato onaintimashquiai cuscan

¹¹ Ascatan tsaoti oshopa uhuapacoian un oian. Nanno Upa Diosin tsaofafo. Ahuunoashu nantifi mai anoafu non nai muranuari cuyoi futsui. Ascashu nantifi yorafo nai futsui. Diosiqui onupaifiai tsoan onutiroma.

¹² Ascatan un oian nan niaifofo non yora ahuamafori naacanashu Upa Diosin tsaofafo ano niafo. Nanno niafoanno Upa Diosin ahuun librofo fupua. Libro futsari fupua. Nan libro ahuun anu nipamisifo aton anu cunua. Nan naafoan amisi cuscan librofo muran nantifi Upa Diosin man cunua. Ascan nan chaca huapaonifo cunupacua cuscan ato ismashon iconcoincun ato onaintimacoinshquiran ishon ismatiro.

¹³ Nan asafu yafi mai anoashu naamisifo nan omitsiscapanacafo muranri nantifi nan naamisifo Upa Diosin ahuun ointaifi fuafo. Nan chaca huafu cuscan atoti Upa Diosin onaintimapacua.

¹⁴Nantiffain nan Diosin tsain nicascasmamisifo Upa Diosin ato chi urumanhuan muran pota. Man naafiafoan natian ato chi urumanhuan muran pota. Nannoashu omitsiscapanacaforan ishon ato anupacua.

¹⁵Ascan nan libro ahuun anu nipamisi. Tsoa ahuun anu nan libro muran Upa Diosin cunumisima nanfo chi urumanhuan muran pota.

21

Nai yafi mai funacoin Upa Dios afanan oni huashquin

¹Ascan uhuun namapan ointsa Upa Dios noco ashoain cuscan ua oinmana. Un oian nai yafi nai murannoafoti maifoti funacoin Diosin onihua. Nan nai yafi mai tauhuaquin onihuan yamariscatana. Nan ununhuanri yamariscatana.

²Ascan un oianri Diospan yorafoan Jesús tanasharamisifo nai murannoafoti Upa Dios icariashu fotocani. Nanfo icano ahuun anu Jerusalén funa. Nan Jerusalén funaya fotoashu nanno icani. Fotoaiton un oian fasi sharashtacoin. Ainfon ahuun saya sharashtacoin sahuua itisharashquin funu fu fianain. Nanscarifi aquin Upa Dios nan Jerusalén funa atishara huua sharashtacoin inon. Ahuun yorafo nanno afu nipasharashcani.

³Ascan Upa Dios tsaoa ano oi ashcalfin un nica. Yoia isca huaquin, —¡Aicho! Natian Upa Dios yorafo fu iishquin. Ato muran iishquin nanfo ahuun yorafo inon. Aafin aton Diosiri iishquin.

⁴Ato cushusharashquin afanan tsoa omitsiscatiroma. Atohuun ramapai tsoa uacai ato shinamsharatiro aton funon turuashontiro afanan shinanchacai cuscan pusitama unimanon. Ato cushuaino tsoashta afanan nayamacain manoyamacain uaiyamacain isin mucanimaran, —ishon yoia. Ahuara chacafo iyopaoni cuscacai afanan ascanacama.

⁵Asca huatan Diosin ahuun tsaoti camaqui tsaoshon yoiquin isca huua, —Un nantifi funa onihuiran, —ishon Dios yoia. Ascashon futsan ua yoia, —Min nicai cuscan cunuahuu nan tsain nantiffain icoinra huanonfo. Iconcain nan tsain yorafoan icoinra huatirofo, —ishon ua yoia.

⁶Ascashon afanan Diosin ua yoia isca huaquin, —Mun aca. Natian mun yoiyoni cuscan man anaita. Ahuara oni huataima un iyopaoni. Ahuutiamaifoti maifoti cuyoicai urus fusti un yoitiro. Un nantifi iquina. Ufin ipamisiquin. Tsoan naaqui nomicoinquin yoitiro isca huaquin, “Unfin fasi unu yopacoicai nashquima,” ishon yoitiro. Nanscarifai tsoa ipasharapaiquin yoitiro isca huaquin, “Un fasi numamisi yopai. Un Dios yopacoinran,” ishon anori yoiaiton un unimaquin cashmancain nan nimapacutiro ufu nipanon.

⁷Tsoan ua cachiquiri huatamarocon nan naitian ua tanasharacun nantonacaifin nantifi un mia yoia cuscan ahuunari iishquiquin. Naanfin un cashman inanshquin. Unfin ahuun Dios iishquin. Aafin uhuun facu iishquin.

⁸Ascashon ratoran futsan ratutan cohuuqui uhuunoashu omitsiscapayamacun ua cachiquiri huashquin uhuun tsain icoinra huayamafain chacacoin futsa futsatapafu shatucasmafain rutumitsamisi icain aton ahuinma chotamisi icain ainfofoanri aton funumafo chotamamisi icain shointi nan yoshin chacafo fu tsainmisi icain Uacai noitamarocon ahuara futsan finaquin noicoiain icain ascarafo yafi nantifi chanimisifori ufu ipatamarocon chi urumanhuan muran nan omitsiscapacunafo muran ipashcani. Anoashuca fonacafoma, —ishon Upan Dios ua yoia.

Jerusalén Funa

⁹Ascatan Diosin oinmati afu nai muran icafo nan siete nanfoan tutso muran ahuara chacacoin fospihuamua maifoti camaqui ocaquin ato omitsiscamacani futsan uqui oshon ua yoiquin isca huai, —Ohuu. Un mia ahuara sharacun ismai. Nocofunun ainfo fii cushusharashquin. Nanscarifi aquin Jesús nan chashoanon facu cahuanshara ascaraton icoinra huafo fia ahuun yorafo inon. Ohuu. Un ato mia ismanon, —ua huua.

¹⁰⁻¹¹Ascan Diospan Yoshin Sharapan ua iquinaiton Diospan nai oinmati ua machi uhuapa cuyacoin camaqui iyoa nantifi un oinnon. Jesús icoinra huafo nan Dios icanoafoti aton chaca soashona nanfo nai murannoafoti Upa Dios icariashu fotoaifoan ua isma. Nan machi cuyacoin anoshon ua isma. Nanfo icano ahuun anu Jerusalén funa. A muran icafo Jesús tanasharamisifo. Upa Diosiri atofu ica. Nanno fasi faca facaitsa. Toquiri faca facaitsa cuscara. Fasi sharashtacoin. Nan toquiri ahuun anu jaspe tsosia shara toquiri futsan ahuun anu cristal. Faca facaitsa cuscara.

¹²Cunu cushto mutsisipan cuyacoin nan Jerusalén tarati huayacuna. Nan cunu cuyacoin doce fupotiya. Fupotiti ano Diospan oinmati afu nai muran icafo doce nia cushusharashquin. Israeli ahuun facu doce facufo aton funafori tiri futsan pashcanifo. Nan fupotifoti aton anu doce nutanfo.

¹³ Nan cunu rafu non rafuri cuyacoin iyacuna cuscan fupotiya doce fari oaiquiri rafu non fusti non fari oai istafari rafu non fusti non fari cai istafari rafu non fusti non fari caiquiriri rafu non fusti fupotiya.

¹⁴ Nan cunufo cuyacoin toquirininhuan doce camaqui onihua. Jesús nan cashoanun facu cahua sharashta cuscara afu rafumisifo doce aton anu toquirininhuantiqui nutan.

¹⁵ Diospan nai oinmati futsan nan unfu tsainquin tananti tsoa Jerusalén funa non ahuun cunufo cuyacoin uhuapan non ahuun fupotiri tananshquin. Nan tananti facatahua chainipa cuscarafishu oro sharashtacoin.

¹⁶ Nan Jerusalén funa ahuun cunu rafu non rafuri cuyacoin nantishon fosi. Ahuun chainipa non ahuun ashfanri nantishon rafu. Ahuun cuyari nantio fosi. Diospan nai oinmati futsan tanan dos mil dos cientos kilometros ahuun chainipa non ahuun ashfan non ahuun cuyari.

¹⁷ Ahuun cunufo cuyacoin ahuun cushto sesenta y cinco metros tanan. Nan oinmatinin afu nai muran icaton yorafoan tananmisi cuscari arifi metronun tanan.

¹⁸⁻²⁰ Jerusalén funa sharashtacoin. Ahuarafa amuran vidrio botica cuscara cushtocoin ocu rafu oinquin non nocotiro. Vidrio botica cuscarafishu oro. Nanhuunoa Upa Dios onihua. Ahuun cunufo cuyacoin non cushtocoinri. Toquiri ahuun anu jaspe tonan shara ahuun cuno oshin shara faca facaitsaya osian. Toquiri sapa cushtocoin futsa futsatapafo doce putsamunia camaqui nan cunu rafu non rafuri Upa Dios onihua. Toquiri sapa fasi chainipa cushtocoin futsa futsatapafo fusti tauhuaqui fuca. Ahuun anu jaspe.

Nan jaspe tonan shara ahuun cuno oshin faca facaitsaya osian.
A fuchi toquiri sapa futsa fasi chainipa cushtocoin ahuun anu zafiro. Nan zafiro tonan sharashtacoin.

A fuchi toquiri sapa futsa fasi chainipa cushtocoin ahuun anu agata. Nan agata shonan sharashtacoin osian.

A fuchi toquiri sapa futsa chainipa cushtocoin ahuun anu esmeralda shonan sharashtacoin.

A fuchi toquiri sapa futsa chainipa cushtocoin ahuun anu onice oshin mapash sharashtacoin.

A fuchi toquiri sapa futsa chainipa cushtocoin ahuun anu cornalina oshin sharashtacoin.
A fuchi toquiri sapa futsan chainipa cushtocoin ahuun anu crisolito ahuun cuno oshin faca facaitsa cuscara sharashtacoin.

A fuchi toquiri sapa futsan chainipa cushtocoin ahuun anu berilo shonan mapash sharashtacoin.

A fuchi toquiri sapa futsan chainipa cushtocoin ahuun anu topacio chashna sharashtacoin.
A fuchi toquiri sapa futsan chainipa cushtocoin ahuun anu crisoprasa shonan yafi chashna mapash osian sharashtacoin.

A fuchi toquiri sapa futsan chainipa cushtocoin ahuun anu jacinto nanhuain ointsas mapash sharashtacoin.

A fuchi ahuun unutaquin toquiri sapa futsan chainipa cushtocoin ahuun anu amatista nanhuain ointsas sharashtacoin. Nan toquiri sapa doce sharashtacoin a fuchi cunu Upa Diosin nimanifoanni.

²¹ Nan cunu rafu non rafuri ahuun fupotifo doce perlahuunshon Diosin ato onihua. Perla toquiri cuscara osho sharashtacoin. Nan perla fustihuunnoa fupoti fusti onihua. Perla fustihuunnoari fupoti fustiri onihua. Nansca huashosi nan doce fupotifo Upa Dios onihua. Nan Jerusalén funa ahuun faitifi oro sharashtacoin onihua. Nan oro vidrio botica cuscara cushtocoin ocu rafu oinquin non nocotiro.

²² Ascan nanno Dios fu tsainti pushu yamai. Upa Dios nan ahuamamishi huatiro yafi nocon Ifo Jesús nan chashoan facu cahuan sharashta cuscara Jerusalén funa muran imisifo. Ascafin yorafo atofu tsainpai pushu yopacanima.

²³ Nanscarifiai nanno fari yafi oshu yopacanima. Upan Dios yafi Jesús nan chashoan facu cahuan sharashta cuscara atofu ica. Upan Dios nanno ishon ato chashashona. Jesusrifi aton lamparina cuscara ato otashona cayacafi oinsharanonfo.

²⁴ Nanhuunshon chashaino manifoti nifoanfaitirofo. Niaifoanri nan Jerusalén funa muran iquishon ahuarafa shara man aya cuscan iquimashquin.

²⁵ Nanno yamuri yamai. Faquishpacunacama. Ascan ahuun fupotifo fupopacunacama.

²⁶ Ascan Jerusalén funa muran manifoti anoafo iquicaquin ahuarafa shara aya cuscan amuranri iquimashcani. Aqwi fasi unimacani finacoinscani.

²⁷ Ascan ahuarashta chaca amuran iquitiroma. Nan shinanchacamisifo non chaca huamisifo non paramisifori iquitirofoma. Tsoa Jesús nan chashoan facu cahuan sharashta cuscara ahuun libro muran ahuun anu cunuano nanno afu ipatiro. Nanfosi Jerusalén funa muran iquitirofo Jesús fu ipasharashcaquin.

22

¹⁻² Ascan uhuun namapan ointsa Diosin ahuun oinmati afu ica futsan Dios icanomain ahuu cuscaraquin ua isma. Upa Dios yafi Jesús nan chashoan facu cahuan sharashta cuscara tsaoa anoashu unu tsoi cristal shafacaficoín ointsa afain. Icafo nushmancayan unu afain. Nanno icafoan nan unu tsoi shara ayapaiyaitian ayatiro. Nannoashu nipanaca. Nannori fai nushmancayan ica. Unu ocama rafu nii shocoa. Nan nii ahuun fimi piipaiyaitian pitiro. Nanscarifiai Dios no fu ipacoíainno non ahuunoashu nipasharashquin. Nan nii oshutifi fimimisi. Ahuun pui tsasipacunacama ahuun shachoco funa shara ipanaca. Ahuunoashu manifoti non Dioshuunoashu muma funa shara ipanaca.

³ Nanno Jerusalén funa Upa Diosin yafi Jesús no fu iishquin. Non aton yoracoinshon non ato noicoínshquin. Non aton oinmati cuscara iishquin. Ato fanainsharashocun ato yoisharapacunaca. Ascan nocon mai shuni ano chaca futsa futsatapafa ipaoni cuscacai nan Jerusalén funa ascarama. Ahuashta chaca amuran itiroma.

⁴ Nannoa nocon Ifoan fuso oinfafaincani. Aton fumananqui ahuun anu nutamana.

⁵ Nocon Ifon Diosin ari icafo ato shafahuashoan. Ascan afanancái lamparina yafi fari yopatirofoma. Anocai afanan yamuima. Nanscasha afu niaífo patashari ipanacafo.

Jesús oti chaima

⁶ Ascatan Diospan oinmati afu nai muran icaton afanan ua yoia, —Nocon Ifon Diosin ahuun tsain yoimisifo aton nomuran tapimamisi ahuara ahuuscaranai cuscan aton yorafo tapimashcani. Nanscarifiai natianri ahuun oinmati afu ica futsa nichian ahuara ahuuscaran arishcashquiain cuscan ahuun icoinra huafoti tapimashquin. Nan un mia yoiaí cuscan iconcoín. Nantifi uhuun tsain man icoinra huatiroran, —ishon ua yoia.

⁷ Yoiquin asca huatan nocon Ifo Jesús yoia isca huaquin, —Un nai murannoashu mai ano matoqui nocoriscashquin. Man min oian inon pacoai cuscan nanfo min cunushotiro. Tsoan nanfo icoinra huafain cachiquiri huayamashu unimacoin iishquiran, —ishon Jesús ua yoia.

⁸ Uquian, Juan, un nanfo nicafain oian un nan Diospan oinmati afu nai muran icaton un anaman nofuomupacua nan uhuun ifocoíncun ismashquin.

⁹ Un asca huafaiton ua yoia isca huaquin, —Asca huayamahuu. Urifi mia cuscara. Min non Jesús icoinra huafo non ahuun tsain yoimisifo non nantifi nan min rama cunua cuscan icoinra huafo urifi mato cuscara nocon Ifon Diosin ahuun oinmati. Ascan Upa Diosin fustisi min Ifo huatiro. Nan fusti min anaman nofuomupacucahuashotiro, —ua huaa.

¹⁰ Ascatan afanan ua yoia isca huaquin, —Ahuuscaran arishcashquiain cuscan min rama cunua samamashta iishquin. Ascan min cunua cuscan onuyamahuu. Nantifi yorafo tapimahuun.

¹¹ Ascan Jesús nocoaitian nan nicacasmamisifo fasi chaca finacoínshquicani. Yora chacacoin huamisifori mimacoin chacacoin iishquin. Nan Diosin yoia cuscan huamisifori mimacoin Diosin yoia cuscan aashcani. Nan Jesús cuscara shara imisifoanri mimacoin huaquin aton Ifo tanasharashcani, —ishon Diospan oinmatinin nan afu imisifo futsan ua yoia.

¹² Ascashon Jesús afanan yoia isca huaquin, —Ua nicasharacahuun. Un matoqui samamashta nocoriscái. Nocoshon un mato yoia cuscan man huacun un mato inansharashquin. Nan shara huamisifo un ato shara huafain nan chaca huamisifo un ato onaintimacoínshquin.

¹³ Ahuarafo onihuataima un iyopaoni. Unfin ipamisiquin. Un ipashquin. Un unupacunacama. Ahuutiamain maton mai cuyoicái urus fustifin un yoitiro.

¹⁴ Jerusalén funa muran iquishon nan nii ahuun fimi pipaiquin pitiro nipashquin. Nanscarifiai Upa Dios fu icaino arus fusti mato nimapacutiro. Nan ua icoinra huafo aton chaca shoashona nanfo fusti uhuun Upa Diosin ato iquimatiro nofu ipanonfo.

¹⁵ Ascan nan yora chacacoin pashna pofu cuscara iquimayamafain shointifo ya nan shointi icoinra huafo iquimayamafain nocofunun ahuun ahuinma chotamisi yafi ainfoanri ahuun funuma chotamamisi iquimayamafain rutumitsamisi iquimayamafain tsoan Dioscoínma noiquer ifoancun iquimayamafain nan chanimisifo nan chani noimisicái. Ascara yorafocai Jerusalén funa muran iquitirofoma.

¹⁶ Unquian, Jesús, uhuun oinmati nan unfu icaton míqui míqui nichian un mia yoia cuscan ua icoinra huafo ichananti anori min ato tapimanon. Unquian David ahuun funa. Un fishi uhuapa shafainoshta oinmisi cuscara. Nan fishi oinquin non tapitiro samamashta shafariscatiro. Nanscarifiai un otichaima tapicanashu itisharatirofo Jerusalén funa muran ufu ipanacaforan, —ishon Jesús yoia.

¹⁷ Ascano Diospan Yoshin Shara yafi Jesús ahuun yorafoanri nantifi yorafoqui isca huacani, —Jesusqui fucahuun, —yoirafoan. Tsoan nicacoainton yoiqui isca huatiro, —Jesusqui fucahuun, —huatiro. Tsoa nomicoin unu yopai unu ano catiro ayatan ahuun nomi shatutiro. Nanscarifiai tsoan ahuun chaca shatupai Jesusqui otiro Upan Dios fu ipashquin. Ahuara inantamarocon Jesús icoinra huashu afu nipatiro.

¹⁸ Unquian, Juan, ahuuscaran arishcashquiain cuscan un mato cunushona. Un mato cunushonai cuscan cayacaficoín. Tsoan nan tsain nica natian un mato yoipacuai cuscan. Ua nicasharacahuun. Un mato cunushona cuscan tsoan afanan tsain futsa shinanfain cunucun nan libro muran omitsiscapanacafohuunoa cunua cuscan iconcain Upa Diosin nantifi nanfo omitsiscamashquin.

¹⁹ Ascantari ahuuscaran arishcashquiain cuscan un cunua tsoan nan tsain atirifi soacun Upa Diosinri ahuun anu soashquin nan ahuun libro murannoa. Ascacufin nan Jerusalén funa shara muran iquipacunonfoma. Un nan cunua cuscan nan Upan Diosin ahuarashta shara yoiyoni cuscan aya ipanaca.

²⁰ Jesús yoia cuscan nannori un mato cunushona. Nanton yoiqui isca huaa, —Icon. Un matoqui samamashta nocoriscairan, —ishon yoia. Ascaran inon. Ifon Jesús nocoqui oriscahuu.

²¹ Mancai Diospan yorafo. Ahuara ahuuscarafiaino nocon Ifon Jesús matohuun noishon maton nomuran mato fupuashoin man shara inon. Nanscasi ipanon. Amen. Nanti.

Juan